









が学編

北京大學《儒藏》編纂中心

圖書在版編目(CIP)數據

儒藏. 精華編. 一一〇/北京大學《儒藏》編纂中心編. 一北京: 北京大學出版社, 2008.12

ISBN 978-7-301-11828-3

I.儒··· II.儒··· III.儒家 IV. B222

中國版本圖書館CIP數據核字(2007)第175431號

書 名: 儒藏(精華編──○)

著作責任者:北京大學《儒藏》編纂中心 編

責任編輯:馬辛民 王 應

標 準 書 號: ISBN 978-7-301-11828-3/B • 0514

出版發行:北京大學出版社

地 址:北京市海淀區成府路205號 100871

網 址: http://www.pup.cn

電子郵箱: dianjiwenhua@163.com

電 話: 郵購部 62752015 發行部 62750672 編輯部 62765691 出版部 62754962

印 刷 者:北京中科印刷有限公司

經 銷 者:新華書店

787毫米×1092毫米 16開本 63.25印張 615千字 2008年12月第1版 2008年12月第1次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

《儒藏》精華編第一一〇册

首 席 總 編 纂 季羡林

項目首席專家 湯一介

湯一介

總

編

纂

本

册

主

編

嚴佐之

龐 樸

孫欽善

安平秋

(按年齡排序)

精華編凡例

爲儒 則的典籍的叢 家經典和 、中國傳統文化以儒家思想爲中心。 編。 反映儒家思想、體現儒家經世做人原 收書時 限自先秦至清代結束。 《儒藏》

藏 学中 二、《儒藏》精華 的精要書籍 編爲《儒藏 》的 部分,選收《儒

互見。 漢文寫作的儒學著作,編爲海外文獻部類 寫者一律收其釋文文本。 已收入入選的個人叢書或全集者,僅存目録,並注 分類法分類,大類、小類基本參照《中國叢書綜録》和 土文獻。 (中國古籍善本書目),於個別處略作調 三、《儒藏》精華編所收書籍,包括傳世文獻和 出土文獻單列爲 傳世文獻按《四庫全書總目》經史子 韓國、日本、越南儒學者用 個 部 類,原件以 整。 古文字書 凡單書 集四 部 出 明

> 編 ,不改編,保持原書的完整性 四 所收書籍的篇目卷次,一 和 獨 仍底本原 7 性 貌

不

選

爲主,酌校異同。校記力求規範 勘價值的版本爲校本。 確定内容完足、精確率 五. 對 人選書籍進行簡要校勘。 高的版本爲底本,精選 出校堅持少而精 精 煉 以對校爲 以 校 有 Œ 主 誤 校

例, 進行規範化標點。 六、根據現行標點符號用法 專名號除書名號用 , 結合古 籍 角號(《》) 標 點 诵

落。 外 ,其他一 律省略。

一般不分段 正文原已分段者,不作改動。 七、對較長的篇章,根據文字内容,適當劃 千字以内的 短文 分段

出 及其他有關情 及整理時所確定的底本、校本(舉全稱後括注簡 介紹作者生平、該書成書背景、主要内容及影響,以 現順序前詳 八、各書卷端由整理 後略 況。 重複出 者撰 現的作者,其生平事蹟按 寫《校點 說 明》, 簡 稱 要

九 、本書用繁體漢字豎排,小注 律排爲單行

本册責任編委本册審稿人 李暢然華

陳 新

《儒藏》精華編第一一〇册

經部 四書類

四書總義之屬

四書章句集注〔南宋〕朱 熹

1

四書章句集注

〔南宋〕朱 熹 撰

論語卷第三 論語卷第二 里仁第四 八佾第三 九七 九七

目

録

四三

三四

<u>--</u>

一〇八

一九九

一八九

一八九

一七六

六四

六四

五四四

四三

| 孟子卷第十三 四七一 孟子卷第十二 四三七 孟子卷第十二 四三七 二十 二十 二十 二 | |
|---|--------------------------------|
| | |
| 孟子卷第七 | |
| 孟子卷第六 | 論語卷第九 二三六 衛靈公第十五 二二七 |

| 目 | 附 録 | 盡心充 | 孟子卷第十 | 盡心章句 |
|---|--------------|-------|-------|------|
| 録 | 序 跋 :: | 盡心章句下 | 第十四 | 上 |
| | | | | |
| | | | | |
| | | | | |
| | • | | | |
| | 五 一 四 | 四九四 | 四九四 | 四七一 |

校點説明

N 書學的 子》的注釋因引用二程、程門弟子及他人之說較多, 作注,《大學》、《中庸》的注釋稱「章句」、《論語》、《孟 學》、《中庸》四書爲儒經中的獨立專門,並分别爲之 四 「集注」。 ,對後世産生了巨大的影響。 書集注》。 朱熹祖 四四 書 個 章句集注》是朱熹最有代表性的 後人合稱之爲《四書章句 歷史總結,是程朱學 述二程之説, ○四 書章句集注》是對 奉《論語》、《孟子》、《大 派 四 書體 集注》,簡 程倡導 系 著作 的 的 稱 核 之 四

的四書學的體系。 以《四書集解》和《四書集注》爲代表的兩個不同 了以《四書集解》和《四書集注》爲代表的兩個不同 四書注釋,以淳熙四年(一一七七)爲界,先後經歷 四書注釋,以淳熙四年(一一七七)爲界,先後經歷

促成朱熹由《四書集解》經學時期向《四書集

校

點

説

明

對 爲 就是説,正是在這個時候,朱熹纔第一次將 常平的時間有兩說,均不出淳熙十年至十三年。 二)按「勾倉」指浙東提舉勾昌 在彼,可就求之。」(《文集》卷五十八《答宋深之》書 的刻書說。「熹向在浙東刻本,見爲一 是單刻。 次同時刻印了《大學章句》、《中庸章句》、《論 之精髓寫成《論語集注》和《孟子集注》。 注》與《孟子集注》,但是並没有作爲一套書刊行, 本確立。 序定成《四書章句集注》,其四書學思想體 之會三次學 面 注》經學 見爲一編」之時,當在淳熙十年至十三年之間 的 删改《大學章句》和《中庸章句》,並取《論孟精 套書合編 「四書」纔 時 淳熙九年,時任浙東提舉的朱熹在婺州 後來他在給宋若水信中提到這次在婺州 期轉變的,是寒泉之會、 術論辯。 在 正式出現。 一起。 淳熙二年(一一七五),開 從此 ,經學史上與「五經」 泰。他 鵝 任職提舉浙 湖之會 編,恐勾 淳熙四 系至此 和三 四 語 倉尚 書 始 年 集 首 相 作 也 故 東 仍 全

他不斷反思中一次次修改。淳熙十二年(一一八隨着朱熹對理學的不斷求索。《四書集注》仍在

川成都。 朱熹對南康本又反復進行了修訂,慶元五年(一一 的定本,但在朱熹生前流傳最廣,影響最大。 時,但在慶元黨禁中書禁板毀。 (一一九二)秋,由曾集(致虚)刻印於南康,流行 想總結了進去。 這次修改把他自淳熙四年以來發展成熟的理學思 子分别由詹儀之刻印於廣西静江 九九)刻板於建陽,這就是他的晚年定本。 五)、淳熙十三年,有過兩次大的修改,改定後的 後朱熹去世,晚年定本的流傳已是他死後的事了。 淳熙十五年,朱熹又作了一次大的修改。 淳熙十六年正式序定,紹熙三年 南康本雖不是最後 ,趙汝愚刻印於四 幾個月 以後 本

句》一卷刻於淳祐十二年。均左右雙欄,半葉八行, 你在現存兩種。一爲當塗郡齋刻本,二十八卷的宋本現存兩種。一爲當塗郡齋刻本,二十八卷的宋本現存兩種。一爲當塗郡齋刻本,二十八卷的宋本現存兩種。一爲當塗郡齋刻本,二十八卷的宋本現存兩種。一爲當塗郡齊刻本,二十八卷的宋本現存兩種。一爲當塗郡齊刻本,二十八卷的宋本現存兩種。一爲當塗郡齊刻本,二十八卷的宋本現存兩種。一五四八)、十二年遞修,《大學章句》一卷、《中庸章二四八)、十二年遞修,《大學章句》一卷、《中庸章二四八)、十二年遞修,《大學章句》一卷、《中庸章二四八)、十二年遞修,《大學章句》一卷、《中庸章二四八)、十二年。均左右雙欄,半葉八行,

> 首頁有「瞿紹基藏書之印」、「罟里瞿鏞」、「鐵琴銅 諱弘、殷、匡、恒、讓、貞、桓等字。 經、注均爲大字,經文頂格,注文另行低 行十五字,雙魚尾,魚尾上記字數,下記 下稱「當塗郡齋本」)。 該本爲瞿氏鐵琴銅劍樓舊物,現藏國家圖 樓」三印,附頁有淳祐十二年金華馬 《大學章句》正文 光祖 刻 書館 工 跋 姓名, 則。 (以

宋本」)。 等藏書印。 同樣鈴有「嫏嬛妙境」、「南陽居士」、「百柳塘主人」 院」藏宋刻《大學章句》一卷,行款同上,與國圖藏本 魚尾,小黑口,今亦藏國家圖書館。 雙欄,半頁七行,行十二字,雙行夾注,行十五字, 子集注》十四卷、《序説》一卷、刊刻年代不詳。 所藏原爲一刻,唯《中庸章句》不知所歸(以下稱「殘 云,有《中庸》半部,已爲他人取去。 另一宋刻爲《論語集注》十卷、《序説》一卷。《孟 該本原爲鄧邦述群碧樓 可以確定兩 又臺灣「中研 舊 據 左右 鄧 雙 處

爲原本爲宋刻本,據陶湘考原本《大學序》後跋文,此外,還有清康熙中內府仿元刻本(世人多以

版心不記字數、刻 本行款與當塗郡齊本相 見陶湘《清代殿板書目》。 至正」被挖改作「淳祐」,元刻本冒充作宋刻本。 工。 同,版式字體幾無二致,唯 以下簡稱「仿元本」)。 是 詳

甚大。

十二年(一三六二)沈氏尚德堂刻本(以下簡稱「至 二跋(以下稱「元乙本」)。一爲山東省博物館藏 正本」)。 九卷本,即《大學章句或問》一卷、《中庸章句或問 目》著録有清蔣培澤、高望曾、丁丙跋,現僅見蔣、丁 口,魚尾上有字數,每卷後附《音考》。 葉七行,行十五字,雙行夾注,行十五字,雙魚尾,白 集注》卷三、四配清咸豐九年抄本)。左右雙欄,半 葉十一行,行二十字,雙行夾注,行二十二字,細黑 三十卷本(多《大學或問》二卷、《中庸或問》二卷,少 「元甲本」)。 論語序説》一卷、《孟子序説》一卷)。左右雙欄,半 卷、《論語集注》十卷、《孟子集注》七卷,元至正二 ,三魚尾。 現存元刻本有以下幾種: 據查校、朱熹晚年編纂的《儀 一爲南京圖書館藏二十八卷本(《孟子 有明魏校批,近人袁克文跋(以下稱 一爲上海圖 《中國善本書 禮 經傳 書館 通 解》 + 藏

> 多同至正本,且明初刻《四 監刻本(以下 稱「司 禮監 本」)均 書集注大全》、正 源 出於 此, 統 司 響 禮

頗有可取之處(以下稱「吴本」)。 忠父子校刻本,用多種舊本及宋、元人疏釋本相校! 數不勝數、優劣各異。 明、清兩代、官府、 、私家、坊肆競刻《四書集注》, 唯清嘉慶間吴縣吴英、吴志

底本《中庸章句》後附《補音釋》一葉,今删 學章句》末有馬光祖所作跋,今移作附 皆同之異文以「他本」概之,以省繁冗。 吴本一一對校,並以明正統司禮監本參校。 館與臺灣「中研院」藏本)、元甲本、元乙本、仿元本 劣處,一般不易獲見,故又取殘宋本(包括國家圖 早、錯誤較少的一個善本,且此本秘藏久之,故校 以當塗郡齋本爲底本。 經仔細勘比,確定宋當塗郡齋本是現存刻印最 現存其他宋、元本各有優 録第 底本於《大

校點者 徐德明

校 點

説

明

即

大學章句序

《大學》之書,古之大學所以教人之法也。蓋自天降生民,則既莫不與之以仁義禮也。蓋自天降生民,則既莫不與之以仁義禮也。蓋自天降生民,則既莫不與之以仁義禮此, 明睿智能盡其性者出於其間,則天必命之以 明睿智能盡其性者出於其間,則天必命之以 明衛智能盡其性者出於其間,則天必命之以 一有聰 此伏羲、神農、黄帝、堯、舜所以繼天立極,而 司徒之職、典樂之官所由設也。

掃、應對、進退之節,禮樂、射御、書數之文。下,至於庶人之子弟,皆人小學,而教之以洒及間巷,莫不有學。 人生八歲,則自王公以酒三代之隆,其法寖備,然後王宫、國都以

道。此又學校之教、大小之節所以分也。人大學,而教之以窮理、正心、修己、治人之公、卿、大夫、元士之適子,與凡民之俊秀,皆及其十有五年,則自天子之元子、衆子,以至

及也! 治隆 當爲,而各俛焉 者,無不有以知其性分之所固有,職 皆本之人君躬行心得之餘,不待求之民 用彝倫之外,是以當世之人無不學。 次第節目之詳又如此,而 於上,俗美於下,而 夫以學校之設,其廣如此,教之之術,其 以 盡其力。此古昔盛時 其所以爲教,則又 非後世之所 其學焉 分之所 生 所 能 以 日

修,教化陵夷,風俗頹敗。時則有若孔子之及周之衰,賢聖之君不作,學校之政不

■「性」下,司禮監本、吴本有「矣」字。

大學章句序

説 盡 存 發其意。 學之明 先王之法, 流餘裔,而此篇者 少 前 ,而曾氏之傳獨得其宗,於是作爲傳義 其節目之詳者也。 儀》、《内 知者鮮矣 法,外有 得 及孟 誦 君 則》、《弟子職 而 師 子 之位 以 傳之,以詔 没 ,則因小學之成功,以著大 極 而 以行 其 三千之徒,蓋莫不聞其 其 規模之大,而 傳泯 》諸 其政教,於是 後 世。 篇 焉, 一」固小 若《 則 其 學之支 曲 内 書 禮 獨 有 以以 雖 以 取

蒙至 名之説 於大學 於小學 之衰 充 塞仁 幸 不,而 前 治之澤 自 是 與與 義者,又紛然雜 前 而 不得聞大道之要,其 壞 無實。 以 無 亂極矣 夫百家衆技之流 來, 晦 用 9 俗儒 盲否塞 異端 其 他 記 虚 權 ,反覆沈痼 出 誦 謀 無 乎 詞章之習, 寂 術 其間 所 小人不幸 數, 滅之教,其 以 以 惑 切以 使其 世 其 及 而 誣 功 五 就 君 高 不 民 得 倍 季 子 功 调

> 之法 休 附 之次其簡 修己治人之方,則未必無小補云。 猶頗放失,是以忘其固 孟 二月甲子,新安朱熹序 踰 熹之不敏,亦幸 明。 氏 己 無所逃 之傳 意,補: 、聖經賢 天 於 運 實始 是河 循環 編 罪,然於國家化民成俗之意、 其 ,發其 傳 闕 南 私淑 尊 無 之指 略 程 信 往 歸 氏 以 不復。 而 此篇 趣 ,粲然復 兩 俟後之君 陋 與 ,然後古者大學教 夫子 有 ,采而輯之,間 而表章之,既 聞 宋德隆 出 明 焉 子。 於 而 淳熙己 # 顧 有 盛 極 其 以 學者 又爲 雖 接 治 亦 爲 知 教 西 僭 竊 書 以 平

革

其舊之謂也。

言既

自明

其

八明德

又當

朱熹章句

大學之道,在明明德,在親民,在止於至善。 學也。 然其· 獨賴 大 但 程子曰:「親,當作新。」〇大學者,大人之 必 天,而虚靈 人德之門也。」於今可見古人爲學次第者 子程子曰:「《大學》,孔氏之遺書,而 其 爲氣禀所拘,人欲所蔽 由 大,舊音泰,今讀 、本體之明,則有未嘗息者。 所 是 此篇之存,而《論》、《孟》次之。學者 明,明之也。 發 而學焉,則庶乎其不差矣。 而 不昧,以具衆理 遂明之,以復其初也。 如字。 明德者,人之所得平 ,則有時而昏; 而 應萬事者也 故學者當 新者 初學

> 理之極,而無一毫人欲之私 當然之極也。 者,必至於是而不遷之意。至善,則事 以及人,使之亦有以去其舊染之污 至善之地而 不遷。② 言明明德、新民,皆當 蓋 必其有以盡 也。此三者 也。止 夫天 止 理 於

知止而后 而 后能慮,慮而 有定,定 后 能 而后能靜 得 靜 而 后能安,安

大學之綱領也

處事 后 靜,謂心不妄動。安,謂所處 地,即至善之所在 ,與後同。 ·精詳。 得,謂得其所止 後放 也。 此。 知之,則志有 〇止者,所當止之 而 安。 慮,謂 定向

物 有本末,事有終始,知所先後 ,則近道矣。

「大學」、「朱熹章句」,吴本作「大學章句」。

止」,原作「至」,據司禮監本、吴本及正文改。

學

大

四

后

之意。 終。 明 德 本 爲 始 本 所先 新 民 ,末終所 爲 末。 知 止 此 爲 結上 始 文 能 兩 得 節 爲

格 其 欲 國 古之欲明明德於天下者,先治 物。 脩其 者 意 , 先齊其 9 身 欲 者, 誠 其 先 家 意 Œ 欲 其 者 齊其 心 先 ; 家 致 欲 者 E 其 其國; 其 先 知 心 9 脩 者 致 其 欲 知 先 治 身 誠 在 其

之知 實其 之所主也。 治 物 也。 不 使天下之人皆有以 平聲。 到 也。 識 心 致, 事 之 也。 欲 此 推 所 後放 其 誠 八者、《大學》之條 極 發, 窮 所 質也 也 此。 至 知 欲 事物之理、欲 明其明 無 其 知 不 意者, 明 盡 猶 於 明 德 識 也 德於 善 心 也 也 目 之所發也。 而 格 其 也 心者,身 天下者, 無 推 極 至 自 極 處 也 欺 吾 無

> 或 IE 治 心 國治 正 而 而 后 身脩, 后 天下平。 身脩 而 后家 齊, 家 齊 而

無不 矣。 得 知 治 家以下,新民之事也 既 去聲。 而 到 意誠以下,則皆得 IE 盡 也。 矣。 則 後放 意 脩 知至者,吾心之所知無 可 身以 此。 得 而實矣,意 上,明 ○物格者 物格 所 止之序 明德之事 知至 既 物物 實 一,則 也 理 則 之 知 也 盡 極 所 心 也 11: 齊 口 覤

自天子以至於庶人,壹是皆以脩身爲本。 齊家 壹是, 以下, 切也。 則 - 果 此 正 心以 而 錯 之耳。 上,皆 所 以 脩 身 也

其 所 本 薄 者厚,未之有 亂 而 末 治者, 也 否 矣。 其 所 厚 者 薄 加 其

文兩節之意。 本,謂身也。所厚,謂家也。此

兩

節

結

上

■「一於善」,司禮監本作「必自慊」。

物

格

而

后

知

至

知至

而

后意誠

意

誠

而

后

心

定,而更考經文,别爲序次如左。凡千五人記之也。舊本頗有錯簡,今因程子所凡二百五字。其傳十章,則曾子之意而門凡二百五字。其傳十章,則曾子之意而門

熟讀詳味,久當見之,今不盡釋也。接續,血脉貫通,深淺始終,至爲精密。

百四十六字。

《康誥》曰:「克明德。」

大甲》曰:「顧諟天之明命。」《康誥》、《周書》。克,能也。

審也。天之明命,即天之所以與我,而我之書》。顧,謂常目在之也。誤,猶此也,或曰大,讀作泰。誤,古是字。○《大甲》,《商

《帝典》曰:「克明峻德。」

大

學

所以爲德者也。

常目在之,則無時不明矣。

書》。峻,大也。◎《帝典》,《堯典》,《虞

皆自明也。

結所引書,皆言自明已德之意

右傳之首章。釋明明德。

「没世不忘」之下。 此通下三章至「止於信」,舊本誤

在

湯之《盤銘》曰:「苟日新之。又日新之,不可 盤,沐浴之盤也。 銘,名其器以自警之辭 整,如沐浴其身以去垢。故銘其盤,言誠 。苟,誠也。 湯以人之洗濯其心以去 。故銘其盤,言誠 其已新者,而日日新,日日新,又日新。」

《康誥》曰:「作新民。」

略有間斷

也。

鼓之舞之之謂作。言振起其自新之民也。

《詩》曰:「周雖舊邦,其命惟新。」

至於文王,能新其德以及於民,而始受天《詩》,《大雅‧文王》之篇。言周國雖舊,

命也。

自新、新民、皆欲止於至善也。是故君子無所不用其極。

《詩》云:「邦畿千里,惟民所止。」右傳之二章。釋新民。

止,知其所止 詩》云:「緡蠻黄 篇。 緡、一詩》作 都 以下,孔子説《詩》之辭,言人當知所當止 詩》、《商頌·玄鳥》之篇。 也。 緡蠻 止,居也,言物各有所當· 鳥聲。 緜。 一,可以· ○《詩 鳥,止于丘隅。」子曰: 人而不如鳥乎 丘 隅, 岑蔚之處。子 》、《小雅 邦畿,王者之 緜 止之處也。 | 輸 | 之 「於 Ħ

之處也。

《詩》云:「穆穆文王,於緝 孝,爲人父,止於慈,與國人交,止於信。 君,止於仁,爲人臣,止於敬,爲人子,止 所止 也。 之事,皆有以知其 精微之藴,而 穆穆,深遠之意。 於緝之於,音鳥。 五者,乃其目之大者也。 也。 熙,光明也。 引此 又推 而言聖人之止,無非至善。 所止而無疑矣。 敬止,言其無不敬 類以 於,歎美辭。 ○《詩》,《文王》之篇。 盡其餘 學者於此,究其 熙敬止 ,則於天下 緝, 上!! 」爲 而 安 於

慄也。 《詩》云:「瞻彼淇澳,菉竹猗 也。 不 有斐君子,終不可誼 如切如磋 可諠兮者,道盛德至善,民之不能 澳 ,於六反。 如琢如磨者,自脩也。 赫兮喧兮者,威儀也。 如如 琢如磨。 菉、《詩》作緑。 写生! 瑟兮僴兮,赫兮喧兮。 如如 瑟兮僴兮者,恂 猗。 切 有斐 如 猗,叶韻 有斐君可 磋者 君 志 子,終 ,道學 也 子, 詩
芸
:

「於戲

前

王不忘

!」君子賢其

賢

而

也。 其滑澤 質也 之盛。卒乃指其實而歎美之也 以 明德者之止於至善。 貌。 。 。 省察克治之功。 毅之貌。 緒,而益 道、言也。學、謂講習討論之事。 玉石者,既 ○《詩》,《 得之之由 諼 隈 切以 儀,可象也。 僴 也。 下版 也。 磋以 並 致其 赫喧,宣著盛大之貌。 刀 衛風·淇 况 琢 猗 治骨 鋸 鑢 精 晚 反。 而復 猗 琢 恂慄、威儀,言其德容 鐋 也。 反。 角 恂慄,戰懼 • 美 喧 引《詩》而釋之,以 以 磨之。 者 瑟,嚴密之貌。 磨 盛 澳》之篇。 《詩》作 椎 既 恂 道學、自脩,言其 以 貌。 鑿,皆裁物使成 切而復磋 皆言其 沙石,皆 鄭 興也。 也。 氏 咺 9 淇,水名。 諠,忘也。 讀 威,可 證,《 自脩者, 治物 治之有 之。 斐,文 作 僴,武 表 明 詩 峻 畏 使 形 裹 所 明 治

> 親其親 人樂其樂而 利 其 利 此 以 没 世 不

志 也

世而 歎淫泆,❷其味深長,當熟玩之。 於戲,音嗚呼。 能使天下後世無 後民也。此言前 文、武也。 頌·烈文》之篇。 人思慕之,愈久而 君子,謂其 樂,音洛。 王 於戲 一所以 物不得其所 後賢後王。 不忘也。 新民者止於 嘆 辭。 ○《詩》, ,所以 此 前 小 兩 至善, E 人 節 既 《周 没 謂 謂 咏

右 傳之三章。 釋止於至善。

此章内自引《淇澳》詩以下,舊本誤 在

誠意」章下。

子 日 0 聽 訟 吾 猶 人 也, 必 也 使 無 訟 乎

2 0 洪」,仿元本作「液」。 鐋」,原作 「鍚」,據仿元本及《韻會》改

無情者不得盡其辭,大畏民志。此謂 言,可以知本末之先後矣。 猶人,不異於人也。 之心志,故訟不待聽 之辭。蓋我之明德既明,自然有以畏 言,而言聖人能使無實之人不敢 情,實也。 耐 自 無 也。 引夫子之 盡 觀 知本。 其 於 服 虚 此 民 誕

右傳之四章。釋本末。

此章舊本誤在「止於信」下。

此謂知本, 程子曰:「衍文也。」

此謂知之至也。

此句之上别有闕文,此特其結語 右傳之五 章。 蓋釋格物、致知之義,而 耳。

閒嘗竊取 此章舊· 本通 程子之意以補之曰:「所謂致 下章,誤在經文之下。

今亡矣。

窮其理 久,而一 者即凡天下之物,莫不因其已知之理而 知在格物者,言欲致吾之知,在 益窮之,以求至乎其極。至於用力之 知有不盡 精粗無不到,而吾心之全體大用無 下之物莫不有理,惟於理有未窮,故 此謂物格,此謂知之至也。」 也。 旦豁然貫通焉,則衆物之表裏 也。 蓋人心之靈莫不 。是以《大學》始教,必 有 知 即 使學 而 物 不 明 其 而

好 所 謂 色,此之謂自謙。 發有 辭。自欺云者,知爲善以 惡、好,上字皆去聲。)誠其意者,自脩之首也。 誠其意者,毋自欺 未實 也。 慊,●快也,足也。 故君子必慎其獨也 謙,讀爲慊,苦劫反。 也。 如惡惡 去惡,而心之所 毋者,禁止之 獨者,人 臭,如好

0 慊」,吴本作「謙」。

其自 知 實與不實,蓋有 於己,不可徒 好好色,皆務决 所 爲 ,故必謹之於此 不 欺。 善 知 以 而 使其惡惡則 去 己 其 所 荷 悪 獨 他人所 去,而 且 知之地 以 則 徇 當 求必得之,以 如惡惡臭,好 不及知 外 實 也。 而 用 爲 言欲 其 人 而 力, 己 也 自快 自 獨 善 而 然其 脩 則 知 禁 之 足 者 如 11-

君 肺肝 然,揜其不善,而著其 小人閒居爲不善,無 子必慎其 然,則 何益矣。 獨 也 此謂 所 善。 不 誠於中、形於外, 人之視己,如見其 至,見君子 而 后 故 厭

者

以

審

其

幾

焉

其意。

卒不 耳。 閒 爲 爲 也 與 不 音開。 善,而 悪 可 然欲揜 厭 然外,銷 之當 詐 厭,鄭 則 陽欲揜之,則是非不知 其惡 去 沮 亦 也 閉 何益之有 氏 而卒不可揜 ,但不能 藏之貌。❶ 讀 爲 [] 實用 哉 欲 此 其 閒 言 此 詐 力 居 君 善 爲 以 小 子 之 善 至 獨 所 而 此 當 陰 處

> 以 重以 爲 戒, 而 必 謹 其 獨 也

曾 富潤 引此 子 善惡之不 ⊟ : 屋 以 一十目 德潤 明上文之意。 可 身, 揜如此 所視, 心 ,十手 廣 ,可畏之甚 言雖· 體 所 胖, 指 出出 其 故君子 一獨之中 也 、嚴乎 必 而 誠 其

平,而體常舒泰,德之潤身者然也。 實於中而形於外者如此,故又言此以結之。 矣,德則 胖,步丹反。 右傳之六章。 能潤 身矣,故心 ○胖,安舒 釋誠 意 也。 無愧作 言富 則 則 蓋善之 廣 能 大 潤 實 屋

所 經 力 未 曰:「欲 而苟 盡 知 至 焉 則 以自 而 其 誠 后 所 其 意 欺 發 意 者。 誠 必 。」蓋 先致 有 然或己 不 心 其 能 體 知。」 實 一明而 之 用 明 又 不 其 有

0 銷」。 他本作 消消 亦通

九

終,其序不可 爲 謹 加 通 進 乎 德 考之,然 此 之基 則 其 亂 所 後 故 而 明 有 此 功不 又 以 章 非 一之指 見 可 己有 其 闕 必必 用 如 力之 此 承 而 云 無 F 始 章 以

則 其 所 謂 不 īF. 得 , 脩 有 其 身 所 IE 在 恐 Ē 有 懼 其 所憂 八心者: 則 不 患 身有所 得 則不得其 其 正 忿懥,則 3 有 IE 所 好 不 得

勝 能 懥 反。 程 無者。 子 ,怒也。 而 懥, 曰:「身有之身,當作心。」忿, 其 敕 用之所行,或不能 然一有之而 蓋 值 是四者,皆心之用 反 好、 樂,並 不 能察, 不 失 去聲。 其 而 則 IE 欲 人 矣。 動 所 弗 粉 情 不 忿

其 心 乎 味 不 心 在 此 有 焉 而敬以直 不 存 視 則 而 無 不 之,然後 以 見 檢 聽 其 此 身, 而 心 不 常 是 聞, 以 存 食 君 而 身 而 子 不 必 無 不 察 知

脩也。

此謂脩身在正其心。

右 心 其 無 此 傳 之存 身。 之七 惡 亦 承 然或但 章。 實 否 上 有 章 則 善矣 釋 以 又 知 IE 起 無 誠意 所 心 下 以 章。 脩 以 首. 能 身。 而 内 蓋 存 不 而 意 能 是 脩 密 心 誠 身 「察此 以 則 也 檢 真

故 焉,之其所哀 辟 所謂 焉 鮮,上 常 好 辟 辟 人之情惟 而 齊 之其 猶 讀 知其 其 偏 聲。 爲 家 所 也 僻。 悪 在 矜 賤 其所 脩 恶 五 而 惡 惡 人, 其 者 辟 而 而 而 向 身 焉,之其所 知其美者, 謂 之惡 辟 在 而 者: 焉 衆 人 不 加審 本有 、敖、好, 之其 人之 天下 之, 焉 當然之則 敖 其 所 ,則必 惰 田 所 猶 並 鮮 而 敬 親 去 矣。 辟焉 於 陷 愛 而 聲。 然 也 辟 於 Mi

自

此

以

下

並

以

舊文爲

IE

一偏而身不脩矣。

之碩。」
之碩。」
「人莫知其子之惡,莫知其苗故諺有之曰:「人莫知其子之惡,莫知其苗

爲害,而家之所以不齊也。也。溺愛者不明,貪得者無厭,是則偏之諺,音彦。碩,叶韻,時若反。○諺,俗語

右傳之八章。釋脩身、齊家。此謂身不脩不可以齊其家。

所以使衆也。 大者,無之。故君子不出家而成教於國:孝 人者,無之。故君子不出家而成教於國:孝 所謂治國必先齊其家者,其家不可教而能教

乎 然而國之所以 矣,孝、弟、慈,所以 弟,去聲。長,上 此 此所以家齊於上,而教成於下也。 事 君 聲。 事 脩 身而 長、使衆之道,不外 ○身脩,則家 教於家者 也 可教

大

學

不遠矣。未有學養子而后嫁者也。《康誥》曰:「如保赤子。」心誠求之,雖不中,

之本不假强爲,在識其端而推廣之耳。中,去聲。〇此引《書》而釋之,又明立教

人貪戾,一國作亂:其機如此。此謂一言僨一家仁,一國興仁,一家讓,一國興讓,一

價,音奮。○一人,謂君也。機,發發事,一人定國。

也。價,覆敗也。此言教成於國之效。

從。 后非諸: 以暴,而民從之;其所令反其所好,而 堯、舜帥天下以仁,而民從之,桀、紂帥 未之有也 是故君子有諸己而 人。●所藏 乎身不恕,而 后求諸 能 人,無諸 喻諸. 民 天下 而 不

元本、吴本補。一無諸已而后非諸人」、原脱、據元甲本、司禮監本、

動所

由

四書章句 集注

民不從矣。 所謂恕也。 己,然後可以正人之惡。 有善於己, 好,去聲。 然後 〇此又承上文一人定國而言。 不如是, 喻,曉也 可以責人之善; 則所令反其所好,而 皆推己以及人, 無惡於

故治國在齊其家。

通結上文。

《詩》云:「桃之夭夭,其葉蓁蓁,之子于歸, 宜其家人。」宜其家人,而后可以教國人。 夭,平聲。蓁,音臻。○《詩》,《周南 桃

興也。之子,猶言是子,此指女子之嫁者 夭》之篇。夭夭,少好貌。蓁蓁,美盛 而言也。婦人謂嫁曰歸。 宜,猶善也 貌。

《詩》云:「宜兄宜弟。」宜兄宜弟,而后 可以

教國人。

《詩》、《小雅 蓼蕭》篇。

詩》云:「其儀不忒,正是四國。」其爲父子

兄弟足法,而后民法之也

詩》、《曹風 **鳲鳩》篇。** 忒,差也

此謂治國在齊其家

此三引《詩》,皆以詠歎上文之事

而

又結

之如此。其味深長,最宜潛玩。

上長長而民 所謂平天下在治其國者:上老老而民興孝, 右傳之九章。釋齊家、治國 興弟,上恤孤 而民不倍,是以君

子有絜矩之道也

絜,度也。 結反。○老老,所謂老吾老 不獲矣。 亦可以見人心之所同,而不可使有一夫之 行下效,捷 所感發而興起 長,上聲。弟,去聲。倍,與背同。絜,胡 是以君子必當因其所同,推以度 矩,所以爲方也。言此三者,上 於影 也。 響,所 孤者,幼 謂 家 齊 而無父之稱。 也 加 或 興,謂有 治 也。

物,使彼我之間各得分願,則上下四旁均

齊方正,而天下平矣。

毋以交於右:此之謂絜矩之道。從前;所惡於右,毋以交於左,所惡於右,毋以交於左,所惡於左,上,所惡於前,毋以先後,所惡於後,毋以上,所惡於上,毋以使下,所惡於下,毋以事

彼此 約 起 章内之意,皆自 皆然,則身之所處,上下四旁,長短廣狹, 不敢以此不忠事之。至於前後左右 下之不忠於我 度下之心,而亦不敢以此無禮使之。不欲 字之義。如不欲上之無禮於我,則必以此 惡、先,並去聲。 ,而所及者 馬者,又豈 如 一,而無不方矣。 廣,此平天下之要道也。 有一夫之不獲哉? ,則必以此度上之心,而 此 〇此覆解上文「絜矩」二 而推之。 彼同有是心而 所操者 「無不 故 興 亦

好之,民之所惡惡之,此之謂民之父母。

則是愛民如子,而民愛之如父母矣。 只,語助辭。言能絜矩而以民心爲己心,並同。○《詩》,《小雅·南山有臺》之篇。樂,音洛。只,音紙。好、惡,並去聲。下

民具爾瞻。」有國者不可以不慎,辟則爲天下《詩》云:「節彼南山,維石巖巖。赫赫師尹,

僇矣。

節,讀 若不能絜矩而好惡徇於一己之偏,則身弒 辟,偏也。言在上者人所瞻仰,不可不謹 國亡,爲天下之大戮矣。 高大貌。 ○《詩》、《小雅 爲截。 師尹,周太師尹氏也。 辟,讀爲僻。 • 節 南 山》之篇。 僇, 具, 俱也 與 節 戮 同

喪,去聲。儀,《詩》作宜。峻,《詩》作駿。殷,峻命不易。」道得衆則得國,失衆則失國。《詩》云:「殷之未喪師,克配上帝。儀監于

詩》云。「樂只君子,民之父母。」民之所好

○《詩》、《文王》篇。 師 衆 也

L 配 一帝也。 對 也。 監,視也。 配上帝,言其爲天下君,而 峻,大也。不易,言難 對 平

保也。 文兩節之意。 道,言也。 有天下者,能存此 引《詩》而言此,以結上 心 而 不

失,則 所以絜矩 而與民同欲者,自不 能

已矣。

是故君子先慎乎德。 土,有土此有財,有財 此 有德此有人,有人此有 有 用

所謂 先謹乎德,承上文不可 明德。 有人,謂得衆。 不謹 有土,謂得國。 加 言。 德,即

有 國,則不患無財用矣。

德者,本也; 財者,末也

本上文而

言。

外本内末,争民 施 奪

而 君以德爲外,以財 施之以劫奪之教也。 爲 内,則是争鬭其民, 蓋財者人之所同

> 欲,不 能絜 矩而 欲專 之, 則 民亦 起 而 争

奪 矣。

是故財聚則民散,財散則民 聚。 故

是,則有德 而 有人矣。

外本内

末

故

財

聚,争民

施

奪

民

散。

反

是故言悖而 出者,亦悖而入,貨悖而入者,

亦悖 而出

悖,布内反。 ○悖,逆也。此以言之出

大 明貨之出入也。自先謹 財貨以明能絜矩 與 不能者之得 乎德 失 也

《康誥》曰:「惟命不于常!」道善則得之,不

善則失之矣。

道,言也。 因上文引《文王》詩之意而申言

之,其丁寧反覆之意益深切矣。

楚書》曰 楚國 無 以 爲實,惟 善 以 爲寶。」

楚 書 楚 語 言不 寶 金 玉 而 寶 善

人也。

四

以下至此,又

舅犯曰:「亡人無以爲實,仁親以爲實。」

身犯,晉文公舅狐偃,字子犯。亡人,文公 時爲公子,出亡在外也。仁,愛也。事見 《檀弓》。此兩節又明不外本而内末之意。 《檀弓》。此兩節又明不外本而内末之意。 心休休焉,其如有容焉。人之有技,若己有 之,人之彦聖,其如有容焉。人之有技,若己有 是能容之,以能保我子孫黎民,尚亦有利哉。 是能容之,以能保我子孫黎民,尚亦有利哉。 不通,寔不能容,以不能保我子孫黎民,尚亦有利哉。 种哉。」

唯仁人放流之,迸諸 唯 也。 貌。 音冒。〇《秦誓》,《周書》。 个,古賀反、《書》作介。 仁人爲能愛人,能惡人。 媢,忌也。 彦,美士也。聖,通 違,拂 四夷,不 戾也。 斷,丁亂 明 與同 也。 斷 殆, 危 斷 中國。 尚,庶 誠 反。 也 之 幾 此

惡而痛絶之。以其至公無私,故能得好惡有此媢疾之人,妨賢而病國,則仁人必深迸,讀爲屏,古字通用。○迸,猶逐也。言

而不能退,退而不能遠,過也。 見賢而不能舉,舉而不能先,命也,見不善

之正如此

也

好人之所惡,惡人之所好,是謂拂人之性,菑是。遠,去聲。○若此者,知所愛惡矣,而是。遠,去聲。○若此者,知所愛惡矣,而

必

逮夫身。

臺》、《節南山》之意。○佛,逆也。好惡公私之極,以明上文所引《南山有仁之甚者也。自《秦誓》至此,又皆以申言哲。○共,之性也。至於拂人之性,則不當,古灾字。夫,音扶。○拂,逆也。好善

是故君子有大道,必忠信以得之,驕泰以

五.

大

生財有大道,生之者衆,食之者寡,爲之者 ,用之者舒,則財恒足矣。 語益 君子,以位言之。 王》、《康誥》之意 驕者矜高,泰者 人之術。發己自盡爲忠 加切,蓋至此而天理存亡之幾决矣。 18肆。 而 道,謂 言。 章内三言得失,而 居其 此因上所引《文 ,循物無違 位 加 脩 謂 己治 信

疾

財 之道在乎務 矣。」愚按:此因有土有財而言 時,則爲之疾 者衆矣;朝無幸位,則食者寡矣;不 恒,胡登反。〇吕氏曰:「國無遊民,則 可 聚也。 自此以至終篇,皆 本 矣; 前 節 用 量人爲 非 必外 出,則 本 以以 意 内 用之舒 明 也 末 奪 足 而 農 生 後 或

身以殖貨。 發,猶起也。 仁者散財以得民,不仁者亡 仁者以財發身,不仁者以身發財

家,不畜牛羊,百乘之家,不畜聚斂之臣。 與其有聚斂之臣,寧有盜臣。」此謂國不以利 孟 不終者也,未有府庫財 未有上好仁而下不好義者也,未有 獻 以事必有終,而府庫之財無悖出之患也 上好仁以愛其下,則下好義以忠其上。所 子曰:「畜馬乘,不察於雞豚, 非 其 財 者 也 好義 伐冰之 其

之言也。 大夫者也。 魯之賢大夫仲孫 畜,許六反。乘、斂,並 臣,而不畜聚斂之臣。 寧亡己之財,而 用冰者也。 百乘之家,有采地者也。 伐冰之家,卿大夫以上,喪祭 不忍傷民之力,故寧有盗 蔑也。 去聲。〇孟獻子, 此謂以下,釋獻子 畜馬 乘 ,士初試 君子 爲

之,小人之使爲國家,菑害並至。 長國家而務財 用者,必自 小人矣。 雖有善者 彼爲善

爲利,以義爲利也

大

學

利也。 亦無如之何矣!此謂國不以利爲利,以義 爲

之,其丁寧之意切矣。 此一節,深明以利爲利之害,而重言以結 長,上聲。「彼爲善之」,此句上下,疑有闕 文誤字。○自,由也。言由小人導之也。

右傳之十章。釋治國、平天下。 利,皆推廣絜矩之意也。能如是,則 要,第六章乃誠身之本,在初學尤爲當 章細論條目功夫。其第五章乃明善之 凡傳十章: 前四章統論綱領指趣,後六 親賢樂利各得其所,而天下平矣。 此章之義,務在與民同好惡而不專其 務之急,讀者不可以其近而忽之也。

大學章句畢

政郎提領江淮茶鹽所準備差遣劉夢高校正

中庸章句序

失 後 惟 中」者,堯 道 以三言者,則 禹 ん統之傳 其 微, 미 也 庶幾 傳 惟精惟 中 堯之一言,至矣,盡 而 ·庸》何 有 作 之所 也 自 也 所 一,允執厥 爲而 來 以 以 蓋自上古聖神繼天立極, 矣。 授 明夫堯之一 作也? 舜 其 也 中」者,舜之所以 見 9 矣 「人心惟 於經,則 子思子憂道學之 ! 一言,必 而 舜 介允 危 如 復 道 執 是 益 授 之 心 厥 而 而

者 形 而 不 以 氣之私 同,是 爲 蓋 有 嘗 人心、 論 以 或 之, 或 原 危 於 道 心 殆 性 心 之 之 命 而 虚 不安, 之正 異 靈 者 知 覺 或 則 而 微 所 以 以 其 妙 而 爲 或 而 己 生於 難 知 矣。 覺 見

> 心 耳。 過 聽 少間 者 二者雜於方寸之間 人欲之私矣。 愈危,微者 命 則守其本心之正 不及之差矣。 亦莫不有是性 然人莫 焉,則危者安,微者著, 斷,必使道 不 愈微 精則 有是 心常爲一身之主 而 察夫二者之間 而天 形,故 故 而 不 雖 不 離 理之公卒無以 下 知 雖 也。 而動靜 愚 所 上 不 以 從事 一智 治 能 而 不 而 云 之, 無 於 不 能 爲自 人心 道 斯 雜 則 勝 無 心 也 人 夫 危 無 每 無

之傳; 來,聖 之大事, 傳,天下之大事也。 伊 此,則天下之理,豈有以 傅、 夫堯、舜、禹,天下之大聖也。 聖相 若吾夫子 周、召之爲 而 其授受之際,丁寧告戒 承,若成湯、文、武之爲 則 臣 雖 一,既皆 以天下之大聖,行 不 加於此哉? 得 其 以 此 位 而 前 以 接 君 不 天 所 夫 泉 泉 自 過 天 下 以 道 是 陶 以 如 下 相 繼 統

則去 宗。 聖之統,及其 開 如 謂 則 命率 切 以 以 失 是 往 而 合符 平 其 聖、 又 也 精 詔 時 示 其慮 聖遠 再 性 緼 日 真 及曾 見 後之學者。 越乎言語文字之間 開 之謂 傳 節 奥 世之相後,千有餘年,而其言之不異, 所聞父師之言,更互演繹 也 來 而 則道 之也遠,故其説之也詳。 未有 氏 以 ,於是推本堯、舜以來 而 學 知 也; 得 歷 異 之再傳,而 没而 其 之者 選 心之謂 端起矣。 孟 若 其曰「君子時 蓋其憂之也深,故其言之也 氏,爲 前 功 遂失其 是 反 聖之書,所 惟 其 有 也 明 顔 能 復得夫子之孫子思, 賢 9 子思 傳 氏、 且 其 推 於 而 焉。 明 盡 日 堯、舜 曾氏 懼 異 中」,則 者 是 以 相傳之意 作,作爲 夫 端 擇 則吾 也。 書 提 之傳 之説 善善 愈久而 者。 其曰「天 挈 以 執 道 固 綱 此 之所 自 中之 執 得 然當 日 承 維, 質 新 先 是 愈 其

> 得其心 真矣。 老、 者出 月 則 氏 於是爲大, 有所 義 之所 雖 盛 雖 佛者 頭詳 據 ,得有 明,而微言 以 也。 以 然而尚幸此書之不泯,故 輯 ,亦有之矣。 至於老、 盡 録 斥 而微程夫子,則亦 所考,以 惜乎其 僅 而 夫二家似是之非 多所發 未析。 出 佛之徒 於其門人之所記 所以 續夫千載 明 至其門人 爲説者不傳 出 然倍其師 則 莫能 不 彌 蓋 傳 程 沂 所自 因 之緒 説 子 夫子兄弟 理 一面 是 其 思 而 而 爲 淫 以 凡 語 之 大 大 於 石 而 功

篇,以 復, 然後乃敢會衆説 蓋亦有 删 熹自蚤 竢 其繁亂 後 年,一 之君子。 歲即當受讀 ,名以《輯 日 圃 恍 折 其 然似 而 略 中, 而 二同志 有 既爲定著章句 竊 且 以 記 疑之,沉 得其 所嘗 復 要領者 取 論 潛 石 反 取 氏

●「其」,司禮監本、吴本作「之」。

舍之意,别爲《或問》,以附其後。然後此書金之意,别爲《或問》,以附其後。然後此書金之言,支分節解,脉絡貫通,詳略相因,巨細點,而各極其趣。雖於道統之傳,不敢妄議,獨學之士,或有取焉,則亦庶乎行遠升高 無關,而各極其趣。雖於道統之傳,不敢妄議,

「行遠升高」,司禮監本作「升高行遠」。

0

朱熹章句

常也 者,不偏不倚、無過不及之名。 庸 平

之,有不能盡者矣。 實學也。 理,中散爲萬事,末復合爲一 此篇乃孔門傳授心法,子思恐其久而差 中者,天下之正道 子程子曰:「不偏之謂中,不易之謂 彌六合,卷之則退藏於密」,其味無 也,故筆之於書,以授孟子。 善讀者玩索而有得焉 9 庸者,天下之定理。」 理,「放之則 其書始言 ,則終身用 窮,皆 庸。

> 於我。 所謂道 以爲 也。 下,則謂之教,若禮、樂、刑、政之屬是也 道 自不能已矣。❷ 所以爲教,原其所自,無一不本於天 蓋人之所以爲人,道之所以爲道,聖人之 人物之所當行者而品節之,以爲法於天 氣禀或異,故不能無過 日用事物之間,莫不各有當 一,猶路 於是 健 學者知之,則其於學,知所 也。 順 也。 五常之德,所謂性 人物之生,因 脩。品節 人物各循其性之自然 故子思於此首發明之,讀 之也。 各得 不及之差,聖人因 也。 性 行之路 其 道 所賦 雖 用 同, 是 則 之 循 力 而 理 也 其 而 備 而 則

「中庸」、「朱熹章句」,吴本作「中庸章句」。

所自無一不本於天而備於我學者知之則其於學知所 聖人之有教,而不知其因吾之所固有者裁之也」。 而不知其出於天; 用力而自不能已矣」,司禮監本作「蓋人知己之有性 「蓋人之所以爲人道之所以爲道聖人之所以爲教原其 知事之有道,而不知其由於性,

天命之謂性,率性之謂道,脩道之謂:

教。

2

命,猶令也。性,即理也。

天以陰陽

五

行

中

化生萬物,氣以

成形

が、而理

亦賦焉,猶

命令

者 所宜深體 而 默 識 也

君 道 見聞 非 以 子 也者,不可須臾離也,可離 性之德而 離 離 道矣。❷ ·戒慎乎其所不睹,恐懼乎 不可須臾離也。 ,去聲。 於須臾之頃 ,亦不敢忽,所以 具於心,無物不有,無時不然,所 ○道者,日用 是以君子之心常存敬畏,雖 也。 若其可離 存天理之本然,而 事物當行之理,皆 其 非道也。 ,則爲外物 所不 聞 是故 不 不 而

莫見乎隱,莫顯乎微,故君子慎其獨 見 者,人所不 見,音現。 雖不知而 之中,細微之事 而 於 明 此 顯 尤 而 加謹 過 己獨知之,則是天下之事 知 〇隱,暗 於 而 此 焉,所 跡 己所 者。 雖未 處 獨知之地 以遏 是以 也。 形而幾則已 人欲 君子 微, 也 細 於將 既 事 常 也 無有著 言 也 動,人 萌 戒 出 獨 暗 而

> 不使其 滋 長 於隱 微之中,❸ 以 至 離 道之

遠 也

之和。 喜怒哀樂之未發, 中也者,天下之大本 謂 之中; 發 也; 和 皆 也 中 者,天 節 謂

下之達道也

之和。 中。 情 樂,音洛。 此出,道之體也。 德 古今之所共由,道之用也。 也。 ,以明道不可離之意。 發皆中節,情之正也,無所乖戾,故謂 大本者,天命之性,天下之理 其未發 中節之中 則性 達道者,循性之謂,天下 去聲。 也,無所 偏倚,故謂 ○喜怒哀樂 此言性情之 皆 由 之

使

道之大原出於天,亦此意也」。 讀者所宜深 體而 默 也 禮 監 作 董 子 所 謂

0

2 哉」。 「則爲 外物 而 非 道矣」, 司禮 監 本 作 「則 豈 率 性 之

謂

6 滋長」,司禮監本作 「潛滋暗長」。

位矣。 然必其 矣。 遂 聖人之能事,初非 順矣,故其效驗至於如此。 地之心亦正矣,吾之氣順,則天地之氣 少差謬, 中 致 在其中矣。 网 事 無少 其生也 終言 首 右 備 蓋天地 第 於 明 也 而 道 體 自謹 偏 己 聖 加 極 章。 之本 故於此合而言之,以結上文之意。 \ 倚 神 而 之也。 無 是其 萬物 前 獨 自戒懼而約之,以至於至靜之 而 功 不 適 子思. 後 原 而精之,以 化 口 其守不失,則極 不然, 本吾 用 之極。 出 離 :有待於外,而脩道之教亦 位者,安其所也。 有以 於天而 體一用 述 ,次言存養省察之要, 一體,吾之心 則極 所傳之意以立言: 行 蓋 至於應物 不可易,其 雖有動靜之殊 ,則其實亦非有 此學問之極功、 其 欲學者於此 和 其 而 中 IE 之處 萬 而 育者 質體 則 物 天 育 反 亦 無 地 天

> 也。 充其 求 諸 本然之善 身 其下十章,蓋 而 自 得 一,楊氏 之,以 子思引夫子之言,以 所謂 去 夫 外 篇之體要是 誘 之 私 而

中庸者,不偏不倚、無過不及而平常之理仲尼曰:「君子中庸,小人反中庸。

終此

章之義

能體之,小人反是。

乃天命所當然,精微之極

致也。

唯君

子爲

也,小人而無忌憚也。」 君子之中庸 人之所 又無 其有君子之德,而 王肅本作「小人之反中庸也」,程子亦以 今從之。 所 忌 以 憚 反 也,君子而 中 也 〇君子之所以爲中庸者 庸 者,以 蓋中無定體 又能 時中; 隨 其 時 有 以 小人之心,而 隨 小人之中 處中 時 也。 而 以以 爲 庸

<u>_</u>

是乃

平常之

理

也

君子知其

在

我

故

能

戒

中

庸

二四

知有此,則肆欲妄行,而無所忌憚矣。謹不睹、恐懼不聞,而無時不中。小人不

右第二章。 此下十章,皆論中庸以釋首章之義。 此下十章,皆論中庸以釋首章之義。 此下十章,皆論中庸以釋首章之義。

之,今已久耳。●《論語》無「能」字。 解,上聲。下同。○過則失中,不及則未至,故惟中庸之德爲至。然亦人所同得, 至,故惟中庸之德爲至。然亦人所同得,

子曰:「道之不行也,我知之矣,知者過之,

右第三章。

知者之知,去聲。○道者,天理之當然,中而已矣。知愚賢不肖之過不及,則生禀之足行,愚者不及知,又不知所以行,此道之所以常不行也。賢者行之過,既以道爲不足知,不肖者不及行,又不求所以知,不足知,不肖者不及行,又不求所以道爲不此道之所以常不明也。

「人莫不飲食也,鮮能知味也。」

夫,音扶。○由不明,故不行。子曰:「道其不行矣夫!」

■「耳」,司禮監本、吴本作「矣」。

此 章承上 章 而舉其不行之端, 以 起 F

子曰 斯以爲舜乎 言,隱惡 : 「舜其大知 加 揚善,執 也 其兩端,用其中於民,其 與! 舜好 問 而 好

察

濔

中

庸而不能期月守也。」

類。 者則 知。 然 中 極 孰 以爲大知者,以其不自用而取諸人也。 知 言者,淺近之言,猶 致。 ,然後用之,則其 不樂告以 ,去聲。與,平聲。 播 在我之權 於善之中,又執其 然於其言之未善者則隱 蓋凡物皆有兩端,如小大、厚薄 而不匿,其廣大光明又如此,則人 善哉? 度 精 擇之審 必察焉 切 兩端 好,去聲。 不 (兩端 差,何以 ,謂衆論 ,其無遺 而 而不宣,其善 而量度以取 行之至矣。 〇舜之所 與此? 不 同 善 之 之 口 邇

> 此 知之所以無過 右第六章。 不及,而道之所以行

也

之中,而莫之知辟也。 子曰 :「人皆曰『予知」,驅 人皆曰『予知』,擇 耐 納諸 置 罟 擭 陷 平 阱

也。 所以 予知之知,去聲。 罟,音古。 以况能 罟,網也。 阱,才性反。 理,以求所謂中庸,即 揜取 期月,匝 擇 而 擭,機檻也。 禽獸者也。 不能守,皆不得爲知 一月 辟、避同。 也。 上章好問 擇 言知禍 陷阱 期, 乎 中 坑坎也。 居之反。 擭,胡化 庸 而 、用中之事 也。 不知辟 辨别 反。 衆

右第 七章

起 承上章大知 下章也 而言,又舉不明之端

中

拳拳服膺而弗失之矣。」子曰:「回之爲人也,擇乎中庸,得一善,則

所 服 口 能守如此,此行之所以 之間,言能守也。 以 ,孔子弟子顔淵名。 ,猶著也。 明也。 膺,胸 顔子 也。 蓋真知之,故能 無過不及,而道之 拳拳,奉持之貌 奉持而著之心 擇 胸

右第八章。

子曰 可 蹈 也 」,中庸 「天下國 不可能也。」 家 可均 也, 爵 禄 口 辭 也 白 刃

易 如三者之難 似者皆能以力爲之。 均,平治也。三者亦知、仁、勇之事 欲之私者,不能及 之至難也,然不必其合於中 而 難 ,此民之所以鮮能 · ● 然非 也 義精仁 若中庸 三者難 也。 熟 庸 則 而 而 ,則質之近 雖 無 易, 不必 一毫 *,天下 中 庸

右第九章。

亦承上章以起下章。

子路問强。

子路,孔子弟子仲由也。子路好勇,故

問强。

子

曰:「南方之强與? 北方之强與? 抑而

强與?

「寬柔以教,不報無道,」與,平聲。 〇抑,語辭。

居之。 居之。 居之。

不報無道,謂横逆之來,直受之而不報也。寬柔以教,謂含容異順以誨人之不及也。

若易能」。 若易能」。 若易能」。 若易能」。 若易能」,可能勉者,皆足以能之。至於中庸雖偏,故資之近而力能勉者,皆足以能之。至於中庸雖

0

而,

汝也。

君子之道 也

衽金革,死 而不厭,北方之强 也,而 强 者

强者之事也 衽,席也。 北方風氣剛勁 金,戈兵之屬。 ,故以果敢之力勝人爲 革, 甲胄之 屬。 强

無道,至死 强哉矯! 故君子和 不變,强哉矯!」 國有道,不變塞焉,强哉 而不流 ,强哉矯

!

中立

而

不

倚,

矯

或

擇 達 以 道,不變平生之所守也。 此四者,汝之所當强也。 不可能者 日 也。 是告子路者,所以抑 而 「矯矯虎臣」是也。倚,偏著也。 守 也。 或 ,非有以自勝其人欲之私 有道,不變未達之所守, 君子之强,孰 其 此則所謂中 矯,强貌。 大於是? 血 氣之剛 ,而進 不能 塞,未 《詩》 夫子 庸 或 之 無

之以德義之勇也。

右第十章。

子曰:「素隱行怪,後世有述焉,吾弗

爲

也。 素,按《漢書》當作索,蓋字之誤 行怪,言深求隱僻之理,而 稱述之者。此知之過而不擇乎善,行之過 而不用其中, 然以其足以欺世 不當强而强者也,聖人豈爲 一而盗 名,故後 過爲詭異之行 也。 索隱 或 有

之哉

「君子遵道而行,半塗而廢,吾弗能已矣。 力之不足也。 遵道而行,則能擇乎善矣;●半塗而 不逮,當强而 不强者也。 此其知雖足以及之,而行有 已,止也。聖人 廢,則

0 擇乎善矣」,司禮監本作「擇而行矣」。

二七

於 不能止 此 非 勉 也 焉 而 不敢 廢 ,蓋至誠 無 息,自 有

能之。」 君子依乎中庸, 遯世不見知而不悔,唯聖者

者,正吾夫子之事 庸 塗而廢,是以 不爲索隱行怪,則依乎中庸而已。不能 唯聖者能之」而已。 之成德,知之盡、仁之至、不 遯世不見知而 ,而猶不自居也 不 賴 悔 也 勇 而 故 裕 此 如 中 *

右第十一章。

淵、子路之事明之。 爲人道之門。 子思所引夫子之言,以明首章之義者 以造道而成德矣。 仁也,子路,勇也。 此。 蓋此篇大旨,以知 故於篇首,即以大舜、顏 餘見第二十章。 三者廢其 舜,知也; 、仁、勇三達德 則 顔淵 無

> 君子之道 費 而 隱

費 ,符味反。 費,用之廣 也。 隱,體之

微也。

其至 有所 焉;語小,天下莫能破焉。 夫婦之愚,可以與知焉,及其至也 也,人猶 也,雖聖人亦有所不能焉。 不知焉; 有所憾。 夫婦之不肖,可以 故君子語大,天下莫能 能行 ,雖聖人亦 天地之大 載

間,遠一 類; 類。」愚謂人所憾於天地,如覆載生成之偏 舉全體而言,聖人固 日 道中之一事,及其至而聖人不知不能。 以然,則 無外,其 與,去聲。 聖 所不能,如孔子不得位、堯舜病博施之 而至於聖人天地之所不能盡,其大 小無 人所 隱 而 〇君子之道,近自夫婦 不 莫之見也。 内,可謂 知 如 有 費矣。 孔 所不 子 蓋 能盡也 問 可 然其理之所 禮 知可 問 居 能 室之 官 侯氏 之 則

《詩》云:「鳶飛戾天,魚躍于淵。」言其上下

察也。

思 思 用 所及,所 詩以明化育流行,上下昭著,莫非 鳶,鴟類。戾,至 鳶,余專反。○《詩》,《大雅·旱麓》之篇 所謂 焉。 喫緊爲 謂 費 人處,活 隱也 也。 然其所以 也。 故程 潑潑地。」讀者 察,著也。 子曰:「此 然者,則 子思引此 非 此 節,子 其致 見聞 理之

君子之道, 造端 乎夫婦,及其至也, 察

乎

天 地

結上文。

之言以明之。 道不可離之意也。 右第十二章。 子思之言,蓋以 其下八章,雜引孔子 申明首章

> 子曰:「道不遠人。 人之爲道而遠人,不可

以 爲 道

也,故常不遠於人。若爲道者 以爲不足爲,而反務爲高遠難 道者,率性而已,固衆人之所能 ,厭其卑近 行之事 知能行 者 則

柯 「《詩》云:『伐柯伐柯,其則不遠。』 ,睨而視之,猶以 非所以爲道矣。 為遠。 故君子以人治人。

執

柯以伐

改而止。

人也 遠也 耳。 能 在當人之身,初無彼此 柯,斧柄。 睨,研計反。 柯伐木以 改,即 然猶有 ,即以其人之道還治其人之身。其人 若以人治人,則所以爲人之道,各 止不治。 爲柯者,彼柯長短之法 則,法也。 彼此之别,故伐者視之猶以爲 ○《詩》,《豳 蓋 睨, 邪視也。 責之以其所能 之别。故君子之治 風 • 伐柯》之篇 在此 言人執 知 柯

二九

中

庸

衆人望人,則易從」是也。 張子所謂「以行,非欲其遠人以爲道也。 張子所謂「以

「忠恕違道不遠,施諸己而不願,亦勿施

道 此 故己之所不欲,則勿以施之於人,亦不遠 之心,未嘗不同 亦勿施於人,忠恕之事也。 盡己之心爲忠,推己及人爲恕。 人,則盡 如《春秋 、以爲道之事。 一,即其 至彼,相去不遠,非背而去之之謂 仁是 不遠人者是也。 傳》齊師「違穀七里」之違。 也 1,則道之不遠於人者可見 張子所謂「以愛己之心愛 施諸己而 以己之心度人 違,去也 不 言自 願 也。

求乎弟 之,未能 父,未能 君子之道 以事 也。 也; 四、丘未能一 兄,未 所求乎 庸 德之行,庸言之謹 能 臣 也 以 焉: 所求乎子以 事 所 君,未 求 乎朋 能 有所 友 巾 先 9 不 所 事 施

> 足,不 言,君子胡 敢 不 不慥 勉,有 慥 餘 爾 不 敢 盡。 言顧 行 行,行 顧

此,豈 言矣。 益至。 常也。 不足 子、臣、弟、友,四字絶句。 責 遠人以爲道之事。 當然也,故反之以自責 道不遠人,凡己之所以 己,則盡道」是 而 不慥慥 謹之至則言顧行矣,行之力則 慥 慥, 行者,踐其實。 勉,則行益 乎 篤實 也 張子所謂「以責 力; 貌。 贊 美之也。 言有餘 謹者,擇其可。 而 責 言君子之言 自脩焉。 人者,皆道之所 ○求,猶 而 凡此皆不 訒 人之心 責 行如 則 平 也 謹 顧

右第十三章。

者,則至隱存焉。下章放此。 聖人所不能,皆費也。而其所以然 道不遠人者,夫婦所能,丘未能一者,

君子素其位而行,不願乎其外。

而爲其所當爲,無慕乎其外之心也。 素,猶見在也。言君子但因見在所居之位

夷狄,行乎夷狄;素患難,行乎患難,君子無素富貴,行乎富貴;素貧賤,行乎貧賤;素

人而不自得焉。

在上位不陵下,在下位不援上,正己而不求難,去聲。〇此言素其位而行也。

援,平聲。〇此言不願乎其外也。

於人則無怨。上不怨天,下不尤人。

故君子居易以俟命,小人行險以徼幸。

也。俟命,不願乎外也。徼,求也。幸,謂易,去聲。○易,平地也。居易,素位而行

所不當得而得者。

正,音征。鵠,工毒反。〇畫布曰正,棲皮

中

庸

子之言,以結上文之意。 日鵠,皆侯之中、射之的也。子思引此

孔

右第十四章。

子思之言也。凡章首無「子曰」字者

放此。

君子之道,辟

如行

遠必

自

邇,辟

如登

高

必

自卑。

辟、譬同

《詩》曰:「妻子好合,如鼓瑟琴。兄弟既

和樂且耽。宜爾室家,樂爾妻帑。」

琴,和也。翕,亦合也。耽,亦樂也。帑,洛。○《詩》,《小雅·常棣》之篇。鼓瑟好,去聲。耽,《詩》作湛,亦音耽。樂,音

子孫也。

子曰:「父母其順矣乎!」

夫子誦此詩而贊之曰:人能和於妻子、宜

之意。 於兄 《詩》及 弟如此,則父母 此 語 以 明 行 其安樂之矣。 遠 自 通、登 子思引 高 自 卑

右第十五章。

子 愚謂 性情 之靈 程子 日 而 也。」張子 歸 :「鬼神之爲德,其盛矣乎 功效 者爲鬼 也 以二氣言 曰:「鬼神,天 以 曰:「鬼神者,二氣之良 其實一 氣言,則至 「,則 鬼者陰之靈也 (地之功用,而 物 而 己。 而伸 者 爲 造 一神者 爲 德,猶言 能 化 神,反 也。」 之迹 陽

視之而弗見,聽之 鬼神 也 散之所爲,是其 下之人齊明盛 其言體物 無 形與聲 ,猶《易》所謂 ,然物之終始 爲 而 物之體,而 弗 聞 體物 幹 莫 物 而 事 祀。 所 非 不 不 陰陽合 可 能 遺 遺

使天

服,以

承

祭

洋

洋

乎 ! 如 在其 上,如在其 (左右

齊 此百 如此 齊而 曰:「其 充滿之意。 側 致其齊 乃 物之精也 皆 其 氣發揚于上爲 反。 「體物 能使 也。 ,神之著也。」正 齊之爲言 明,猶 人畏敬 而 不可遺」之驗也 潔也。 昭 奉承,而發見 齊 明, 也 謂 上,所以 焄 洋洋 此 蒿 爾 悽愴 流 孔子 昭 齊 著 動 不

射思 \sim 詩 ! **>** 日 『神之格思, 不可 度 思, 矧

况也。 度, 語解。 《詩》、《大雅 待 射,厭也,言厭怠 洛 反。 射, 抑》之篇。 音 亦, 而不敬也。 格,來 詩 **>** 也 作 矧, 斁。

夫微之顯,誠之不可揜如此夫!」 合散, 夫,音扶。 如 此。 無 非 實 誠 者。 者 真實無妄之謂 故 其 發見之不 可 陰 揜 陽

口

右第十六章。

章,兼費隱、包大小而言。 此後三章,以其費之大者而言。此一矣。此前三章,以其費之小者而言。 以表而言。此一

子曰:「舜其大孝也與! 德爲聖人,尊爲天

子,富有四海之内,宗廟饗之,子孫保之。

故大德必得其位,必得其禄,必得其名,必與,平聲。○子孫,謂虞思、陳胡公之屬。

舜年百有十歲。

得其壽。

「故天之生物,必因其材而篤焉。故栽者培

之,傾者覆之。

《詩》曰:『嘉樂君子,憲憲令德。宜民宜息爲培,氣反而遊散則覆。材,質也。篤,厚也。栽,植也。氣至而滋

中

庸

人,受禄于天。保佑命之,自天申之。』

嘉。憲,當依《詩》作顯。申,重也。《詩》,《大雅‧假樂》之篇。假,當依此作

「故大德者必受命。」

受命者,受天命爲天子也。

右第十七章。

之用廣也。而其所以然者,則爲體微此由庸行之常,推之以極其至,見道

矣。後二章亦此意。

蓋其所作,亦積功累仁之事也。 此言文王之事。《書》言「王季其勤王家」,父,以武王爲子,父作之,子述之。」

海之内,宗廟響之,子孫保之。下,身不失天下之顯名。尊爲天子,富有四武王纘大王、王季、文王之緒,壹戎衣而有天

=

下同之,推己以及人也。期以下,諸侯絶,大夫降,而父母之喪,上

右第十八章。

子曰:「武王、周公,其達孝矣乎」

達,通也。承上章而言武王、周公之孝,乃 天下之人通謂之孝,猶孟子之言達尊也。 「夫孝者,善繼人之志,善述人之事者也。 上章言武王纘大王、王季、文王之緒以有 天下,而周公成文、武之德以追崇其先祖, 此繼志、述事之大者也。下文又以其所制 祭祀之禮,通于上下者言之。

「春秋脩其祖廟,陳其宗器,設其裳衣,薦其

時食。

赤刀、大訓、天球、河圖之屬也。裳衣,先官師一。宗器,先世所藏之重器,若周之祖廟:天子七,諸侯五,大夫三,適士二,

使葬用死者之爵,祭用生者之禄。 喪服自

几 祖 之遺 時 之食, 衣服 有 祭 則設之以 其 物, 如 春行 授 P 羔 也。 豚、 時 食, 膳

膏、香之類是

也

以 賤 宗廟之禮,所以 速賤也 也 序事 9 燕毛,所以序 ,所以辨賢 序 昭 穆 也 也。 丛 也 旅酬 序爵,所以 ,下爲上,所 辨

貴

文兩節

,皆繼志、

述事之意也

祭畢 也。 故逮 長 其倫焉。 旅 有司之職 廟 昭 昭 方右爲 而 栖 ,則子姓、兄弟、羣昭、 如字。 及 衆 监 而 之禮,賓弟子、兄弟之子各舉觶於其 年 賤 相 燕 穆,而子孫亦以 者 酬。 爵,公、侯、卿、大夫也。 事也。 數 爲, 則 世 使亦得 以 蓋 去 毛 宗廟之中,以 聲。 旅,衆也。 一髮之色别 以 ○宗廟 申其 羣穆咸 爲 序。 長幼 敬 酬,導: 之次: 有事爲榮 也 有事 在 事 爲 而 宗宗祝 燕毛 飲 坐次 於大 左 不 也。 失 爲

踐其位 ,行其禮,奏其樂,敬其所尊, ,愛其所

中

庸

親 事 既葬則曰 先王之祖考、子孫、臣庶也。 踐 猶 死 履 如事生,事 也 反而亡焉 其,指 Ļ 如事存,孝之至 ,皆指先 先 王 也。 王 始死謂之死, 所尊、 也 此結上 也 所親

或 祀乎其先 郊社之禮,所 其如示諸掌乎!」 也。 以 明 乎 事 郊社 上帝也,宗 之禮、禘嘗之義,治 廟 之禮,所 以

見也。 也。 自出 也。 舉之,互文也。 郊,祀天。社,祭地。 禘,天子宗廟之大祭,追祭太祖 於太廟,而 四時皆祭,舉 此 與《論 示,與 語 以 》文意大同小異,記有詳 其 太祖 ___ 視 不言后土者 耳。 配 同 之也。 禮 視 必 諸 嘗,秋 有 掌,言易 義 之 省 当對 所 文

右第 九章 略耳。

哀公問政。

哀公,魯君,名蔣。

子曰:「文、武之政,布在方策。其人存,則

其政舉,其人亡,則其政息。

方,版也。策,簡也。息,猶滅也。有是

君,有是臣,則有是政矣。

夫,音扶。○敏,速也。蒲盧,沈括以爲蒲「人道敏政,地道敏樹。夫政也者,蒲盧也。

矣,而蒲葦又易生之物,其成尤速也。言葦是也。以人立政,猶以地種樹,其成速

人存政舉,其易如此。

故爲政在人,取人以身,脩身以道,脩道

道。仁者,天地生物之心,而人得以生者,人,謂賢臣。身,指君身。道者,天下之達《家語》作「爲政在於得人」,語意尤備。此承上文人道敏政而言也。爲政在人,

得人, 身, 則有君有臣, 而 所謂「元者善之長」也。 而 取 人之則 又 政 無不舉矣。 在 言人君爲 脩 身。 能 政 脩 在 其 於

大。親親之殺,尊賢之等,禮所生也。「仁者,人也,親親爲大。義者,宜也,尊賢爲善。」 具有君有目 而與知思多

宜者,分别事理,各有所宜也。禮,則節文自然便有惻怛慈愛之意,深體味之可見。殺,去聲。〇人,指人身而言。具此生理,

斯二者而已。

「在下位不獲乎上,民不可得而治矣!

鄭氏曰:「此句在下,誤重在此。」

事親, 思事親, 不可以不知人, 思知人, 不成君子不可以不脩身, 思脩身, 不可以不

爲政在人,取人以身,故不可以不脩身。

可

以不

知

天。

^{■「}脩」,原作「仁」,據仿元本改。

也 事 脩 又當知人。 ,故又當 親 身以 道 欲 盡 知 親親之殺,尊賢之等,皆天理 親 天 道 親之仁,必 以 仁,故 思脩 由尊賢之義,故 身,不可 以 不

達道 欲 下古今所同 此 親 知 有信」是也。 也。 去聲。 ,君臣有義,夫婦有别,長幼 ,即《書》所謂 達德 雖 勇,所 X 而 雖 所 〇達道者,天下古今所 德 得之理也。 共 以 知,所以 非 所 由 强 五典、《孟 其 同得 「然無」 、德矣。 此 也。 知 然 是三 此 9 子》所謂「父子有 謂之達德者,天 程子 也。 有 德 則 有 不誠 則 誠 曰:「所 而 序,朋友 無 共 已矣。 則 以 由 以 體 謂 之

「或生而知之,或學而知之,或困

而知之,及

其知之,一也。

或安而行之,或利

而

行 若 者,故 强 知 雖異,而 勇 者 知 不息,則 而一者勇也。 行,謂達道 、勉行 也。 也。」 也 乃企生知 知也,學知、利行者仁也, 上聲。 ,所以行者仁也 聞 蓋人性雖 謂 所至之域則 其 道有蚤莫,行道 不 也。 至一 〇知之者之所知,行之者之所 能 安行之資爲 以其等 也。 以其 有 無 成,此 不 ,所以至於知之、成 分而言 吕 同 而言 善 此 氏 有 道之所以不 不 日: 難 而 所 則 口 困 則生知、 易 氣 所 以 幾 知 然能 禀 所 爲 勉 及 以 有 入之途 輕輕 中庸 安行 明 行 不 知 自 者 困 强 功 口

三七

中

也。所以行之者一也。

天下之達道也。

知、仁、勇三者,天下之達德

父子也,夫婦也,昆弟也,朋友之交也,五者

天下之達道

五,所以行之者三。

 曰 君 臣

也

勉强而行之,及其成功,一也。」

乎勇。」 子曰:「好學近乎知,力行近乎仁,知耻近

勇之次 起儒。」 辭。 自私 通上文三知 「子曰」二字,衍文。 然 者徇人欲而忘反,懦者甘爲 故 〇此言未及乎達德 足 好 也 以 學 爲 非 吕氏 忘 知,三行爲仁, 知, 私 日 然 「愚者自 好、近乎 知 足以 耻 而 求 非 破 則 以 知之知 勇, 愚 是 此三近者 X 人下而不 然 而 德 力 不求 之 並 足 行 事 以 非 去

知 知 或 所 家 斯 矣。 以治 三者 則 知 知 所 所 以 以 脩 治 身 人),則 知 知 所 所以治天下 以 脩 身, 則

身之意,起下文九經之端也。天下國家,則盡乎人矣。言此以結上文脩斯三者,指三近而言。人者,對己之稱。

凡

爲

天下國家有九經,日

脩身也,尊賢也,親

親 工 也 也 敬大臣 柔遠 人 也 也 」,懷諸! 體體 羣 侯 臣 也 也,子 庶民 也 來 百

經 懷諸 故尊賢次之。 經之本。 氏 謂 也。子,如父母之愛其子也。 别 吾 臣 親 百 次之。 次之。 工次之。 曰:「天下國家之本在身,故脩身爲 也 四 無忘賓旅 常也 侯 體 次次之。 視百 然必 由 由家 體 者也。 由 朝 謂設 姓 此 道之 親 其 以 廷 猶 九 或 及 師 以 此列九經之目 吾 以身處其 經之序也。」視羣臣 朝 所 以 及 友,然後脩身之道進 子,此 其 及 廷,故敬大 進,莫先其家,故 天下,故柔遠人、 或 故故 視 地而察其 柔遠人,所 臣 子 臣 庶 也。 視民 一、體 民、 九 心 猶 來 羣 親

子 脩 不 身則道 庶民則百姓勸 怨 敬 大臣 7/ 則 尊 賢 不 來 眩 則 體羣 不 百 惑 工 則 臣 親 財 則 親 用足,柔遠 士之報禮重 則 諸 父 昆 弟

則四方歸之,懷諸侯則天下畏之。

之所 下 資 臣 謂 爲 此 加 而 - 畏之。 故故 言 不眩 ,則信任 民 願 不 施 出 疑 表 九經之效也。 財 者博 於其 也 於 ,所謂 「建 用足。 理。 專, 來 塗, 而 而小臣 百 不 柔遠 威之所制者廣矣,故 故 工 其 眩 四 道立,謂道成於己而 謂 有極」是 方歸。 人,則 則 不 通 得以間之,故 不 功易事,農末 迷 天下之旅 懷諸 於 也。 事 侯, 則 皆 臨 敬 大 天 悦 相 德 事 口

禄,同 色,賤 薄 以 齊 所 所 勸大臣 明 以 以 斂 ,所以 盛 柔 勸 其好 貨而 遠 百 服,非禮 也; 人也 I 勸 悪 貴 也 小,所 百 德 忠信 所 姓 不動,所以 繼絶 以 送 也 往 重 勸 以 一禄,所 世 迎 親 勸 日 親 賢 來 省 舉 也 也 月 脩身也; 廢 以 嘉 勸 或 試 善 官盛任 尊其 治 既 士也; 而 亂 矜 稟 位 去 使, 持 不 稱 時 讒 重 能 危 事 使 所 其 遠

> 朝 去聲。 聘 知其 齊 稟,稍食也。 臣不當親細事,故所以 官盛任使,謂官屬衆盛 稱,去聲。 重禄,謂 側 以 所賴乎上者如 時 皆反。 既,許 待之誠 厚 朝,音 往 氣反。 稱事 去 而 薄 而 潮。 上 來,所 養之厚,蓋以身體 如《周 此 聲。 稟,彼錦 也。 優之者如此。 ,足任使令也 此言九經之事 以 遠、好、惡、 禮 既,讀 懷諸 ・ 稟人職 、力錦二 侯 日 也 斂,並 之, 一、蓋大 忠信 反。 **>** 也 日 餼 而

貢薄。 五年一朝。」厚往薄來,謂燕賜厚而納 獻。

王

制

》:「比年

小小

聘,三

年

大聘,

謂

諸

侯

見於天子。

聘,

謂

諸

侯

使大夫來

授節以送之,來則

豐其

、委積

以

迎之。

考其弓弩,以

上下

其

食

是

也

往則

爲之

● 「建」上,司禮監本、吴本有「皇」字。

三九

中

凡 爲 者,誠 天下 國家有九經,所以行之者 也。 一有不誠 則 是九者皆爲 也 虚

也

前 凡 文矣。 誠 疚 達 跲 定 事豫則立,不豫則廢。 病 德、九經之屬。 ,如下文所推是也。 則不困 ,其劫反。 也。 此九經之實 ,行前定則不 此 行,去聲。 承 上文,言凡 豫,素定也 - 灰,道 言前定則不跲,事 〇 凡 事皆欲先立 前定則 事 ,指達 路,躓. 不 也。 道、 窮。 平

有道 有 明乎善,不誠 道 在下位不獲乎上,民),反諸 道 '不順乎親'不信乎朋友矣',順乎親 ,不信乎朋友,不獲乎上 身不 誠,不 乎身矣 順 不可 乎親矣;誠身有 得 而 治矣。 矣 信 乎朋 獲乎上 道 不 有 友

此 無 不 妄 誠 又以在 也。 反求諸身而 不明乎 下位者,推言素定之意。 善善 謂 所 未能 存 所 發未 察於人 能 心 反諸 真 天命 實 身 而

> 誠 之本然。 而真 知至善之所在 也

之者,擇善而固執之者也 不勉而中,不 者,天之道 思 也; 而 得 誠之者,人之道 ,從容中道 。聖人 也 也。 誠

然也。 中,並 不勉 渾 執 所謂 思 人欲之私,而其爲德不能皆實。 道,則亦天之道 實無妄之謂,人事之當然也。 身而言。 而 利 而 然天理,真實無妄,不待思勉而從容 中,安行也。 得,則必 丽 人之道也。 去聲。 行以 中 誠之者,未 ·, 則 誠者,真實無妄之謂 下之事 必 從,七容反。 擇 固執 擇善, 善善 也。 不思 也 能 然後 ,然後可 未至於聖, 真實無妄,而 而得,生知也。 學知以下之事 可以明 〇此 以誠 天 聖人之德 則 承 故 善 身,此 欲 理之 未 上 不 一文誠 未 能 能 其 本 勉 則 能 中 真 無 古

博學之,審問之,慎思之,明辨之,篤行之。

此 而 利 爲 誠之之目也。 知,學 而 行 也。 而 知 程子 也。 學、問、思、辨,所以 曰:「五者廢其一 篤行,所以 古 執 擇 而 非 善 爲

學也。」

知弗措 措 辨,辨之弗明弗措 有弗學,學之弗 也。 也; 人一能之,己百之,人十能之, 有 弗 能 思 也; 弗 ,思之弗得弗措 措 有弗行 也 9 有 弗問 ,行之弗篤 也; 問問 有 之弗 己 弗 弗

事也。百倍其功。此困而知、勉而行者也,勇之百倍其功。此困而知、勉而行者也,勇之君子之學,不爲則已,爲則必要其成,故常

果 能 明 强 德 日 勝 「君子 此 道矣, 不 ,擇善之功。 氣 質 勝之, 則 所以學者,爲 雖 愚 愚者 必 則 明,雖 雖 强 可 者。固 有 進 能 志 於 柔 次明,柔 於學,亦愚 變化氣質 必 執之效。 强 者 可 而 進 吕氏 不 於

> 明,柔 性 自 變,則曰天質不 學,或作或輟,以變其不美之質, 百倍其功 變其異也。 才也,人所 棄,其爲不仁甚矣! 也 不能立 所 ,不足以致之。今以鹵莽滅裂之 異 同 夫以不美之質,求變而 也。 而已矣。 也 美,非學所能變。 誠之者,所以 昏 明 强 蓋 弱 均 之禀 善善 而 反其同 無惡 不 及不 是果 美,非 者 者 於 而

右第二十章。

誠 十二章之意。 亦 此引孔子之言,以繼大舜、文、武、周 功一也」之下,有「公日 子家語》亦載 公之緒,明其所傳之一致,舉而 猶是耳。 者,實此篇之樞 至矣! 蓋 此 章内 寡人實固,不足以成之 包費隱、兼小大,以終 章,而 紐 語 也。 其文尤詳。 誠始詳,而 : 子之言 又按: 措之, 《孔 所謂 美 成

《家語 者,今當爲衍文也。「博學之」以下, 無此 思所補 思删其繁文以 也 問 》無之,意彼有闕文,抑此或子 故其下復以「子曰」起答辭。 也 詞,而猶有「子 附于篇,而所 曰二二字,蓋 刪有不盡 子 今

矣,明則誠矣。自誠明,謂之性,自明誠,謂之教。誠則明

於誠矣。 也 自 而後能實其善者,賢人之學,由 之德,所性 一人道 山曲 也。 也。 而 德 誠 有者 無 則無 不 實 也 一天道 不明矣, 而 明 無 也。 不 明則 照者, 先明 教 可 而 乎 聖人 以 人者 善 至

皆子思之言,以反覆推明此章之意。 人道之意而立言也。自此以下十二章, 有第二十一章。子思承上章夫子天道、

> 地之化 唯天下 盡 盡 物之性 人之性;能 至 育 一誠,爲 ,則可 則可 盡 以贊天地之化育 以與天地參矣。 能盡 人之性 其 性; ,則能盡 能 盡 物之性;能 其 可 性 以贊天 則 能

以所 也。 也。 自 知之無 毫髮之不盡 天下至 而天命之在我者,察之由之,巨細精粗, 誠 賦 與 盡其性者,德無不實,故無人欲之私 而 天地 形氣 明者之事也 誠,謂聖人之德之實,天下莫能加 不 明 多,謂 不同 也。 而 處之無 人物之性,亦我之性,但 而 與天地並立爲三也。 有異耳。 不當 也。 能 盡之者 贊,猶 助 謂 此

言天道也。

其次致曲。曲能有誠,誠則形,形則著,著則

明 明 化 則 動 一,動 則變,變則化。 唯天下至誠 爲

能

見之偏 性無 外。 其 自 無 性 致 而 越之盛也 7,推致 不致 變。 不能 之全體而盡之。 次,通大賢以下凡誠有 著,則 不 則 化 己。 同 也。 而 (德無 又加 悉 而 則有不知其 動者,誠能 積而至於 典, 氣則 推致之,以 不實,而形、著、動、變之功 顯 有異, 矣。 偏 其次則 也。 能 所以然者。 明 動 各 故 化 物。 ,則又有 未至者而言也。 形者,積中 造 必 惟聖人能 自其 則其至誠之 其 變者 極 蓋 善端 光 也 舉 人 輝 物 而 之 曲 其 從 發 發 發

右第二十三章。 言人道也。

妙

,亦不異於聖人矣。

至 誠 之道 9 可 以 前 知。 或 家 將興,必有禎

中

庸

祥; 几 體 國家將亡,必 禍 福 將 至: 有 善。必 妖 孽。 先 見 知 乎蓍 之 不 龜 善 動 必 乎

先知之。 故至誠如 神。

之萌。 類 動作 極, 見,音現。 有以察其幾焉。 而 凡此皆理之先見 威儀之間,如執玉高卑,其 無 蓍,所以筮。 毫私 ○禎祥者,福之兆。 僞留於心目之間者,乃 神 龜,所以 謂 者也。 鬼神 100 然唯 妖孽者 、容俯 四 誠 體 仰 之 能 至 之 謂 禍

右第二十四章。

言天道 也

誠 者自 成 也 而 道 自 道 也

本也; 成 道 前 也 之道 道者 道以 音導。 人之所 理言 用 當 也 自 言 行 誠 也 者物 誠 之所 以 以自

誠者物之終始,不 誠 無物。 是故 君子誠 之

爲貴。

在我者 人之心能無不實,乃爲 爲,亦如無有, 無有矣。 後有是物。 天下之物,皆實理之所爲,故必得 亦無不行矣。 故人之心一有 所得之理既盡 而君子必以 有以自成 不實 誠 ,則是物 爲貴 則 ,而道之 是 雖 也 亦 理 有 盡 蓋 所 而 然

也,故時措之宜也。 仁也,成物,知也。性之德也,合外内之道誠者非自成己而已也,所以成物也。成己,

措之,而皆得其宜也 體之存,智者用之發,是皆吾性之固 知 無内外之殊。既得於己,則見於事者以 成,則自然及 ,去聲。 〇誠雖所以成己,然既有 物 而道 亦行於彼矣。 有 仁者 以 時 自 而

言人道也。 言人道也。

故至誠無息。

既無虚假,自無間斷。

不息則久,久則徵。

久,常於中也。徵,驗於外也

之德,著於四方」者是也。存諸中者既久,此皆以其驗於外者言之。鄭氏所謂「至誠徵則悠遠,悠遠則博厚,博厚則高明。

博厚,所以載物也,高明,所以覆物也光明。

9

悠

積也

廣

博

而

深厚。

博厚,故其發也高

大

而

則驗於外者益悠遠

而

無

寫矣。

悠遠,故其

久,所以成物也。

遠致高厚,而高厚又悠久也。此言聖人與悠久,即悠遠,兼内外而言之也。本以悠

天地同用。

博厚配地,高明配天,悠久無疆。

此 聖人與 天 地 體

如 此 者,不見而章 不 動 而 變, 無爲 而 成

見 地 ,音現。 而言也。 ○見,猶示也。 不動 而 變,以 配天而言也 不見而章,以 無 配

爲 而 成 以 無 疆 一而言也

殖馬

其 天 生 地之道,可 物 不 測。 言 而盡也: 其爲物 不貳 則

地之道 有莫 此 不貳,所 以 知其所以然者 下,復以 以誠 可 言 也。 天地明至誠 而 誠故 盡 不息 不 過 無息之功用。 ,而生物之多, 日 「誠」 而 E, 天

天 也 地之道 博 也 厚也, 高 也 明 也 悠 也,

辭

害意

可也

有下 言天地之道 文生物 之功。 一,誠一 不貳,故能各極其盛, 而

繋焉 今夫天,斯 萬物 覆 昭 焉。 昭之多,及其 今夫 地 無窮 撮土之多,及其 也 一,日月 星 辰

中

庸

焉。 廣厚, 多 之,禽獸居之,寶藏 ,及其不測, 今夫山 載華 嶽 , 而 黿鼉、鮫龍、 卷 不 重 石之多 興馬。 一,振 河 7,及其 海 魚鼈 今夫水,一勺之 而 廣 不 生焉,貨 大 洩 草 萬 木 物 生 載

地、 貳 也。 其至也」之意,蓋舉 其一處而 夫,音扶。 市若反。 不息,以致盛 Щ 卷,區·][[言之。 實 也。 華、藏,並去聲。 昭昭 非 此 由 大 及其 猶 四條,皆 積 而 全體 累 耿 能 無窮,猶十二章「及 耿 生 而後大,讀者不以 而 物之意。 以 小明 卷,平聲。 言 發 也。 明 也。

《詩》云:「維天之命,於穆不已!」蓋 蓋 所以爲天也。「於乎不顯,文王之德之純! 曰 文王之所以爲文也,純 亦不已。 日 天之

於,音鳥。乎,音呼。 ○《詩》,《周 頌 維

四 Ŧi.

振,

收

此

指

勺,

由

其不

然天、

E 雜 此 顯 天 一,文王純於天道,亦不已。 ,不已則無間 以明至誠 ,猶言豈 不 無 顯 於, 息之意。 斷 也 先後。 歎 辭。 純, 程子 純 穆 曰 純 不 深 則 遠 雜 無 天道 也。 也 無 不 不 引

右第二十六章。 言 天道也。

大哉聖人之道 1

洋洋乎 包下 文 兩 發育 節 而 萬物 言。 峻 極于天。

峻, 高 大 也。 此 言 道 之極於 至 大 而 無

外 也

優優大哉 1 禮 儀 三百 一,威儀 三千。

儀 優優,充足有 曲 禮 也。 餘之意 此 言道 之人於至 禮儀 經經 禮 小 巾 而 威 無

間

也。

待其 人 而 後行

總 結 H 兩 節

故 E : 至德,謂 荷不 至德, 至道 至道, 凝焉。 指 兩 節

其人。

Ŀ

而

言

也

凝 聚 也 一,成 也

極 故 高 君 子尊 明 而 德性 道 中 庸 而 道問學,致 温 故 而 知 新 廣 大 敦 而 厚 盡 以 崇禮 精

微

天之正 尊 者 恭敬 理。 奉持之意 道,由 也。 温,猶 德性 者 燖 温之温 吾 所受於 謂謂

故學之矣,復時 習之 也。 敦, 加 厚 也 尊

學,所以致知 德性 ,所以 存 而 心 盡 而 乎道體之細也 極乎道體之大 也。 二者修 道 問

德凝道之大端 也。 不 以 毫私 意自 蔽,不

乎其所已能 以 毫 私 欲自累, 此 皆 存 涵 心之屬 泳乎 其 也。 所 已 析 知 理 敦 則 篤 不

有 理 毫 義 釐 則 之 日 差, 知 其所未 處 事 則 知,節 不 使 有 文則 過 日 不 及 謹 其

謬

使

方,莫詳於此,學者宜盡心焉。 句,大小相資,首尾相應,聖賢所示人德之致知,而存心者又不可以不致知。故此五致知,而存心者又不可以不致知。故此五所未謹,此皆致知之屬也。蓋非存心無以

明且哲,以保其身。」其此之謂與!以興,國無道,其默足以容。《詩》曰:「既是故居上不驕,爲下不倍。國有道,其言足

也。《詩》、《大雅·烝民》之篇。 倍,與背同。與,平聲。〇興,謂興起在位

言人道也。

非天子,不議禮,不制度,不考文。

中

庸

體也。度,品制。文,書名。此以下,子思之言。禮,親疏貴賤相接之

今天下車同軌,書同文,行同倫。

迹之度。倫,次序之體。三者皆同,言天行,去聲。○今,子思自謂當時也。軌,轍

下一統也。

鄭氏曰:「言作禮樂者,必聖人在天子其德,苟無其位,亦不敢作禮樂焉。雖有其位,苟無其德,不敢作禮樂焉,雖有

57

子曰:「吾説夏禮,杞不足徵也;吾學殷禮,

所用。孔子既不得位,則從周而已。此又引孔子之言。杞,夏之後。徵,證也。宋,殷之後。三代之禮,孔子皆嘗學之而宋,殷之後。三代之禮,孔子皆嘗學之而不,殷之後。三代之禮,孔子皆嘗學之而不,殷之後。三代之禮,孔子皆當學之而

四七

右

承上章爲下不倍而言, 亦人道

王天下有三重焉,其寡過矣乎 1

度、考文。 王、去聲。 惟天子得以行之,則國 氏 曰 : 「三重,謂 不異政, 議 禮 制制

上焉者雖善 家不殊俗,而人得寡過矣。」 無徵,無徵 不信,不信民弗從

下焉者雖善不尊,不尊不信,不信民弗從

而皆 L 焉者,謂 不可 考。 時 王以前 下焉者 ,如夏、商之禮 ,謂聖人在 下 雖 如孔 善

不厭。

不繆,建諸天地 故君子之道 子雖善於禮,而不在尊位也。 ,本諸身,徵諸庶民,考諸 而 不悖,質諸鬼神而 無疑,百 三王 丽

制 此 度、考文之事也。 君子,指王天下者 而言。 本諸身,有其德 其道 即即 議 也。 禮

世

以俟聖人而不惑

下者也

此 微諸 聖人復起,不易吾言者也。 造化之迹也。 而 參於 庶民,驗其所信從也。 彼 也。 百世以俟聖人而 天地 者 道 建,立也 也 不惑 鬼神者 心,所謂 一立於

不惑,知人也。

質諸鬼神而

無疑

(知天也, 百世以俟聖

人

而

是故君 法,言而世爲天下則。 知天、知人,知其理 子動 而 世爲天下道,行 也 遠之則有望,近之則 而 世 爲

法度也。 動,兼言、行而言。 則,準則 也。 道,兼法、則 而 言。

《詩》曰: 以永終譽 「在彼無惡,在 !」君子未有不如此而 此 無 射。 蚤有譽於天 庶 幾 夙 夜,

惡, 周 去聲。 頌 0 振鷺》之篇。 射, 音妒 《詩》作斁。 射,厭 也。 ○《詩 所 謂 此

天下

者,指本諸身以下 六 事 加

右第二十九章

承上章居上不驕而言,亦人道也。

水土 仲尼祖述堯、舜,憲章文、武,上律天時,下 襲

辟 如 其 律天時者,法其自然之運。 祖 天地之無不持載 一定之理。 述者,遠宗其 皆兼内外該 道。 無 憲章者,近守其 不覆幬,辟 本末 襲水土者 而言 如四四 也 法。 時 大

辟,音譬。 幬,徒報反。 〇 錯 ,猶迭也 此

之錯行,如日月之代明

言聖人之德。

111 萬物並育而不相害,道並行而不相悖,小德 流 而 悖,猶背也。 不相 ,大德敦化,此天地之所以 害 兀 天覆地載,萬 時 日月,錯 行代 物 爲 並 大也 明 一育於其 而 不 相 間

中

庸

並育並 之流 悖。 之分,大德者,萬殊之本。 之道,以見上文取辟之意也 厚其化,根本盛 脉絡 所以 一行者,大德之敦化。 不害不悖者,小德 分明 大而 而 往 出 不 無窮也。 息 也 小德者 之川][[流 敦 此言天地 者,如 流 化 者, 全體 所 敦][[以

右第三十章。 言天道也

執也 寬裕 足 唯天下至聖,爲能 以 有别也 温 齊莊 柔,足以有 中 Ē 足以 容 聰明睿知,足 也 有敬也 發强了 剛 9 以 文理 毅 有臨 ,足以有 密 也

知,去聲。 也 其下四者,乃仁、義、禮、知之德。 明睿知,生知之質。 理, 條 齊,側皆 理 也。 反。 臨 謂 詳 别,彼列反。 居 細 E 也。 而 臨 文,文章 下也 明 聰

四

辨也。

溥博淵泉,而時出之。

也 溥 博 出 周 ,發見也。 徧 而 廣 闊 言五 也。 者之德,充積 淵泉,靜 深 而 於中 有本

民莫不信,行而民莫不説。 溥博如天,淵泉如淵。見而民莫不敬,言而而以時發見於外也。

而發見當其可也。 〇言其充積極其盛。

照,霜 至,人 配 是以聲名洋溢乎中國 天。 力所 露 所 隊 通,天之所覆,地之所 八凡有 血 氣 施 者,莫不尊親 貊 載 舟 日 故 車 月 所 所 日

天也。極言之。配天,言其德之所及,廣大如施,去聲。隊,音墜。〇舟車所至以下,蓋

右第三十一章。

承上章而言小德之川流,亦天道也。

唯天下至誠,爲能經綸天下之大經,立天下 之大本,知天地之化育。 德極誠 人倫。 之事。 之,而天下之道千變萬化皆由 而皆 類而合之也。 夫,音扶。 至誠 其於所性之全體,無一毫人 妄者有默契焉,非但聞見之知而 立之也。 可 無妄,自然之功用,夫豈有所倚 大本者,所性之全體也。 經者,理其緒而 以爲天下後世 無妄,故於人倫各盡其當然之實, 其於天地之化育,則 焉,於虔反。 經,常也。 法,所謂經綸之也。 夫焉有所倚 分之; 綸者, 比 ○經、綸,皆治 大經者,五品之 欲之僞以 亦 此 惟聖人之 E 其 出 極 著 所 此 誠 其 絲 於 皆 謂 雜 無

一肫肫其仁! 淵淵其淵! 浩浩其天!

物

而

後

能

特 廣大貌,以知化而言也。 也 脏,之純 如之而 淵淵 反。 己。 ,靜深 () 肫 貌 以 脏,懇至 立本而言 其淵、其天,則非 貌 ,以經綸 也 浩 而言

苟 不固 聖 日 知 「唯聖人能知聖人 .聰明聖知達天德者,其孰能知之? 之 知,去聲。 也 古 __ 猶 實 也 鄭 氏

右第三十二章。

加矣。 此篇言聖人天道之極致,至此 然至誠之道 前章言 承上章而言大德之敦化,亦 非至 至聖之德,此 誠 不能 了,非至聖不能知,至聖之 爲,則 章言 亦 非二物矣。 至誠之道 天道 而無以 也。

闇 衣錦 然 而 日章, 尚絅」,惡其文之著也。 小人之道,的然而日亡。 故君子

之近 君子之道,淡 者形諸 《鄭》之《丰》,皆作「衣錦褧衣」。 感反。 者,則知 也。 至其 復自下學立心之始言之,而下文又推之以 衣,去聲。 言謹獨之事 自,著乎外者本乎内也。 則暴於外而無實以 章之實。 立心如此。 禪衣也。 而文且理焉,錦之美在中也。 ,知風之自,知微之顯,可 遠之近,見於彼者由於此 極 外也。 ○前章言聖人之德,極其盛 也。 所謹 尚,加也。古之學者爲己,故其 淡、簡、 納,口 而 《詩》,《國風・ 尚絅,故闇 而 不 有 可 厭,簡 温, 迥 爲己之心,而 入德矣。 繼之,是以 反。 絅之襲於外也,不厭 而 然; 惡,去聲。 文,溫 微之顯,有諸 故下文引《詩 與 衣錦 衛 的 人德矣。 小人反是 而 也。 又 褧、 然而 故 理 碩人》、 矣。 知 一、知遠 闇 絅同 此 風之 有 日 於於 内 H

唯人之所不見乎。 省不疚,無惡於志。君子之所不可及者,其《詩》云:「潛雖伏矣,亦孔之昭!」故君子内

祖》之篇。

奏,進也。

承上文而遂及其效,

獨之事也。 (《詩》,《小雅·正月》之篇。 惡,去聲。 (《詩》,《小雅·正月》之篇。

君子篤恭而天下平。

子不動而敬,不言而信。《詩》云:「相在爾室,尚不愧于屋漏。」故君

相,去聲。○《詩》,《大雅・抑》之篇。相, 根也。屋漏,室西北隅也。承上文又言君 故信,則其爲己之功益加密矣。故下文引 敬信,則其爲己之功益加密矣。故下文引 以言,則其爲己之功益加密矣。故下文引 以言,則其爲己之功益加密矣。故下文引

不賞而民勸,不怒而民威於鈇鉞。《詩》曰:「奏假無言,時靡有爭。」是故君子

假、格同。鈇、音夫。○《詩》、《商頌・烈

《詩》曰:「不顯惟德!百辟其刑之。」是故刀也。鉞,斧也。 言説而人自化之也。威,畏也。鈇,莝斫言進而感格於神明之際,極其誠敬,無有

《詩》、《周頌・烈文》之篇。不顯,説見二十六章,此借引以爲幽深玄遠之意。承上十六章,此借引以爲幽深玄遠之意。承上不顯其敬也。篤恭而天下平,乃聖人至德不顯其敬也。篤恭而天下平,乃聖人至德不顯其敬也。篤恭而天下平,乃聖人至德

《詩》云:「予懷明德,不大聲以色。」子曰:《詩》云:「予懷明德,不大聲以色。」子曰:

輔、由、酉二音。○《詩》、《大雅・皇矣》之

意,至深切矣,學者其可不盡心乎!

篇。 然後爲至也。 **篤恭之妙。非此德之外,又别有是三等,** 微妙,而猶曰無之,故唯此 不顯之至耳。 所言「上天之事,●無聲無臭」,然後乃爲 其不大聲與色也。 可比者,是亦未盡其妙。 可以形容矣。而又自以爲謂之毛,則猶有 不若《烝民》之詩所言「德輶如毛」,則庶乎 猶有聲色者存,是未足以形容不顯之妙。 色乃化民之末務。今但言不大之而已,則 引之以明上文所謂 蓋聲臭有氣無形,在物最爲 又引孔子之言,以 不顯之德者,正以 不若《文王》之詩 可 以 形容不顯 爲聲

一篇之要而約言之,其反復丁寧示人之贊其妙,至於無聲無臭而後已焉。蓋舉言之,以馴致乎篤恭而天下平之盛。又反求其本,復自下學爲己謹獨之事推而反求其本,復自下學爲己謹獨之事推而

中庸章句畢

「事」,司禮監本作「載」。

0

讀論語孟子法

其 治 爲 求之,晝誦 意,與聖人所以 而 氣 本。 吾之所以未至者,所以 而 ,闕其疑 明矣。 子 論 而 讀 ,則聖人之意可見矣。」 味之,中夜 》、《孟子》既 書者 用心 學者 當 ,聖人之所以至於聖人, 當 觀 而 以《 聖 治 未 思之,平其心,易 得者。 人所以 論 則《六經》可 語 \approx 句句 作經之 孟 子 而

聞 子 問 自然有得 若能於《語》、《孟 處便作自 程子曰: 己 雖 問問 學 孔 者須 聖人答處 孟復 》中深 將《 生, 求玩玩 論 便作 不過 語 味 **>** 中 今 將 此 H 諸 教 耳 弟

涵養成,甚生氣質。」

玩 意 自 話 意足。 便不足。」 説。 味。 程子曰 程 人只看得此二書切己,終身儘多也 須將聖人言語切己,不可 子 學者 日 0 . 領是玩 凡 「《論 看《語》、《孟》, 》、《孟》只 味。 若以 剩 語 只 且 言 讀 須 着 解 熟讀 便 場

洽 如 耳。 何 ? 或 問: 程 子 日: H. 將 ^ 論》、 固 是 好, **>** 但終是不浹 緊 要 處 看

子言語: 程 子曰 句 句 是 0 事實。_ 孔子 言 語 旬 句 是 自 然,

孟

自 子 然見得 如 程 子 尺 長 度 短 權 輕 衡 「學者先 重。 相 似 以 讀 此 去量 論 語 度 \approx 事 孟

道,所謂『雖多,亦奚以爲』。」程子曰:「讀《論語》、《孟子》而

不

知

論語集注序説

朱 熹①

弟子 尼。 子》所謂乘田 今從之。 本作季氏史。 子於魯昌平鄉 襄公二十二年庚戌之歲十一月庚子, 人》,讀爲樴,義與杙同,蓋繫養犧牲之所。 豆,設禮容。 益進。 其先宋人。父叔 一,而昭 史記 爲司 以 《索隱》云: 公奔 ·世家》曰 昭 適周。 及長,爲委吏,料量平; 職 通 公二十 唨 吏, 乎景公。 邑。 問 畜蕃息。職,見《周 「一本作委吏,與《孟子》合。」 禮於老子。 梁紇,母顔 亂 五年甲 爲兒嬉戲,常 「孔子名丘 有聞《韶》、 於是適齊 申, 氏。 孔子年 此官即《孟 問 既反,而 字字 禮 陳 委吏. 以 • 牛

> 年壬 語。 公欲 兵。 氏,召孔子,欲往,而卒不行。 庚子,孔子年五十一。 陽 巳,孔子年 年癸卯,使仲由爲季氏 定公會齊侯于夾谷,齊 之,遂爲司空,又爲大司 以 與聞國政。 詩》、《書》、《禮》、《樂》,弟子彌衆。 孟、吾老之語 虎 沮之,季桓子受之。 定公以 孟氏不肯墮成,圍之不克。 封 作 辰,孔子年四 以 亂 尼 專 三月,魯國大 五十六, 攝 孔子爲中都 谿之田 政。 孔子遂行,反乎魯。定公元 十三,而季氏强僭, 故孔 ,晏嬰不可,公惑之。 公山 行 宰、墮三都,收其 郊又不致膰 人歸魯侵地。 子不 寇。 辛, 相事, 治。 不 十年 仕 · 狃以費 年, 齊人歸 有答子路東 誅 十四四 辛 而 少 兀 俎 Œ 退 女樂 年乙 方 畔 九 其 於大 卯 年 修 臣 甲 則 季 有 周

」,今參前《大學》、 題 「論語序説 及署 名 原 以 《中庸 語 》序 爲題, 題 改。 署作 仿 朱 元本、吴本題 熹 集注 序

0

有異同 王 對 其 問 趙 亦 氏 事。 與之歎爲在此時,又以《孟子》所記歎詞爲主司 在 家 反 使人聘孔子,孔 此 淵 臣 不果。 家臣 於衛 簡 陳 沮 時。 司 後及文王既没之語 適 子, 耳。 一去,適 南 於子 子行。 馬 陳 之,康 佛 耦 季 對 至 靈公不能 子。 有答子 耕 桓 、肸以 孔 蓋《語》、《孟 桓子卒,遺言謂 调 荷藤丈 而 河 子 魋 陳, 王 子 有矢子路及未見 子將往拜禮, 行 而 妻 欲 如 中 路堅白語 世家 乃 反,又 主 牟畔, 匡 殺 兄 蔡及葉。 人等事。 復 召冉 用。 司 一》所記, 之。 顔 赏以 如 既 城 以 及荷費 濁 此 陳 主 有三年 求。 解 召 貞 有天生 以上 而陳、 爲 鄒 本皆 史記 遽 孔 子 有 康 據《論 陽 好 還 家 一皆爲 《史記 過門 子, 家。 伯 有 此 蔡大夫發徒圍之。 葉公問 子 德之語。 虎 德 衛 <u>Z</u>: 成之語。 玉 十二年 必 語 事。 《孟子》作 語 孔 而 以 時 家 居三 及微 》,則 子 拘 答 召 語 於 城貞 論 將 一, 之。 孔 欲 事 服 是 而 絶 晉 歲 語》歸 靈 西 楚 路 所 子 子 糧 往 過 顔 見 捎 而 適 玉 昭 記 當 滴 時 宋 有 讎

之語。 乃止。 安敢 辛 知 西 賢 繫、象、説卦、 然魯終不能用孔子,孔子 乃 得孔子爲 昭 按 故 三千焉,身通 丁巳,而孔 接輿之歌。 詩》正《樂》。有語太師 孔 西 召 狩 蚤 王 園之? 傳》、《 子 罪 死 獲 孔 將 絶糧 而冉 我等 子 《史記》云 時 後唯曾參得傳孔子之道。 子, 以 陳 路 於陳、 政。 ,有莫我 又反乎 書 且 語 求爲 禮 子年六十八矣。 蔡臣 而 死 據《論語》 社 文言。 記 有魯、 於衛。 論 六藝者七十二人。 孔 蔡之間。」有 丘服於楚 「書社地七百里」,恐無此 地 \approx 季 語 子歸 衛 知之歎。 封 》請 有杞宋、 氏 衛兄弟及答子貢夷齊 絕糧當在去衛如陳之時。 時 孔 有 將 若楚 討 及樂正等語 魯, + 假我數年之語 靈 子, 陳 愠 孔 恒事 與 六 王 公已卒, 見及告 實哀公之十 損 一來聘 令尹 子作《 亦不求仕 年壬 齊 有對哀公及康子 益 亦 戰 四 孔子 從 在 子 子 是年 有 年 序《易》彖 周 戌 貢 弟子 衛 理。 等 功, 西 陳 庚 子 兀 秋 君 弟 貫 語 不 顔 路 申 時 子 乃 之語 月 康 輒 明 大夫 П 則 미 Œ 年 語 年 叙 欲 己 删 子 有 最 名 有

子受業子思之門人。
生伋,字子思,作《中庸》。」子思學於曾子,而孟凡六年。孔子生鯉,字伯魚,先卒。伯魚乃;年。孔子生鯉,字伯魚,先卒。伯魚子,服心喪三年而去,唯子貢廬於冢上,丑,孔子卒,年七十三,葬魯城北泗上。弟

(齊)、《魯論》同。」 「《魯論語》二十篇。《齊論語》別有《問王》、《知道》,凡二十一篇,篇次不與 二十篇中章句,頗多於《魯論》。《古論》出 二十篇中章句,頗多於《魯論》。《古論》出 二十篇中章句,頗多於《魯論》。《古論》出 三十篇中章句,頗多於《魯論》。《古論》出

曾子之門人,故其書獨二子以子稱。」 程子曰: 「《論語》之書,成於有子、

之足之蹈之者。」
 程子曰:「讀《論語》,有讀了全然無理子句。」

程子曰:「今人不會讀書。如讀《論

人,便是不曾讀。」語》,未讀時是此等人,讀了後又只是此

等

長。」● 程子曰:「頤自十七八讀《論語》,當

■「意」,原作「氣」,據司禮監本、吴本改。《讀論語孟

論語卷第

朱熹集注

説。

謝氏

曰: 「時習

者

無

時

而

不

之也

時習之,

則

所

學者在

我,故

洽

於

中,

則説

也。」又

日

.

學者。將

以

程

子

日

習

重

習

也

時

復

思

浹

學而第一

凡十六章。 人道之門、積德之基、學者之先務也。 此爲書之首篇,故所記多務本之意,乃

子 飛 爲,乃 説 意 也。 也 悦 而 而覺有 可以 中心喜説,其進自不能已矣。 同 學而 學之不已, 學 先 明 時習之,不亦説 而 善而 後,後覺者 學之爲言 又 時 復其 如 時 鳥 習之,則 (初也。 數飛也。 效也。 必效先覺之 乎? 習, 人 所學 性 鳥 者 數 所 皆

「有朋自遠方來,不亦樂乎?習也。」

坐如尸,坐時習也

V.

如

齊,立

時

信從者衆,故可樂。」 近者可知。〇 〇朋,同 程 子 EI: 類 **地**。 又曰 以 自 遠 善及人,而 悦在 方 來 則

樂主發散在外。」

人不知而不愠,不亦君子乎?」 愠,紆問反。 而 謂及人 及人,不見是 人,何愠之有?」〇 難 故 一 惟成 尹 樂 、氏曰:「學在己,知不 者 ○愠,含怒意。 而 德者 順 無 而 悶,乃所謂 能之。 易,不)程子曰:「 知 而 君子 德 不 君 之 愠 子。 雖 所 樂 知 者 成 於 在 逆

也。 鮮矣, 不好犯上,而好作亂者,未之有有子曰:「其爲人也孝弟,而好犯上者,

弟、好,皆去聲。鮮,上聲。下同。○有事兄長爲弟。犯上,謂干犯在上之人。此言人能孝弟,則爲悖逆爭鬭之事矣。此言人能孝弟,犯上,謂干犯在上之人。必不好作亂也。解,上聲。下同。○有必不好作亂也。

仁之本與!」「君子務本,本立而道生。孝弟也者,其爲

仁。與者,疑詞,謙退不敢質言也。言仁者,愛之理,心之德也。爲仁,猶曰行與,平聲。〇務,專力也。本,猶根也。

孝弟爲本。論性,則以仁爲孝弟之本。 君 於愛,愛莫大於愛親,故曰: 智四者而已,曷嘗有孝弟來? 以至仁否?」曰:「非也。 上,豈復有逆理亂常之事? 之本,學者務此,則仁道自 其道自生。 者 也,孝弟是用也,性中只有箇 則 弟始,孝弟是仁之一事。謂之行 或問:「孝弟爲仁之本,此是由 及於物,所謂親親而仁民 立則其道充大。 程子曰: 子 ,其爲仁之本與!!」 可,謂是仁之本則不可。 凡 事 專 若上文所謂孝弟,乃是爲仁 「孝弟,順德也,故不好 用 力 孝弟行於家,而後仁愛 於 根 本, 也。 根 謂行 此 本 仁、義 德有本,本 故爲仁以 蓋仁是性 而 既 『孝弟也 然仁主 孝弟可 生也 V. 一之本 自孝 犯 則

子曰:「巧言令色,鮮矣仁!」

無 德亡矣。 飾 巧,❶好。 知巧言令色之非仁,則知仁矣。」 於外, 可知,學者所當深 務以悦 聖人詞不迫切,專言鮮 令,善 也。 人,則人欲肆而 戒 好其言,善其色, 也。 〇程子 本 則 心 絶 之 致

乎? 忠 乎 子曰: 「吾日三省吾身: ? 與朋 友交而 不信乎? 爲人謀 傳 不 而 習 不

子守約 忠信 忠。 謂 熟之於己。曾子以 則改之,無則加勉,其自治誠 子,孔子弟子,名参,字子輿。 省,悉井反。 得爲學之本矣。 子之學,皆出於聖人,其後愈遠 以實之謂信。 爲 故故 傳習之本 動 爲,去聲。 必求諸 也 而三者之序,則 傳謂受之於師 此三者日省其身,有 身。」〇謝 傳,平聲。 尹 氏 切 盡己之謂 曰 如 氏 習謂 此 又以 而愈 可可 曾 曾

> 失其 而 乎其嘉言善行,不盡傳於世也。 傳之無弊,觀 未泯者 真。 ,學者其可不盡心乎!」 獨曾子之學,專 於子思、孟子可見矣。 用 心 於内 其幸存 故

子曰: 愛人,使民以 「道千乘之國, 、時。 敬事 而 信, 節 用 而

此五 也。 之謂。 此三言者,若推 治其國矣。 道、乘,皆去聲。 地可出兵車千乘者也。 此 (百家出車一乘。)千乘,諸侯之國,其 言至淺,然當時諸 者,亦 時,謂農隙之時。 敬事 務本之意 聖人言雖至近,上下 而信者,敬其 :其極,堯、舜之治亦不過 ○道,治 侯果能 也。 言治國之要,在 敬者,主一 也。 事 此,亦足以 ~而信 程子曰 馬 氏 - 皆通 無 於 云: 民 滴

因 者 以 於 有 之心,而 財,不害民。」 身先之也。 疑,下慢而 此 存 其 政,不 而 害民,故愛民必先於節 氏 ,各有次第,讀者宜細推之。 時, 若常 已,未及 日 八皆 人不被其澤矣。 行 以 則 人之言近 上 疑 力 敬 焉 《易》曰 本 一蓋 事不立 爲 爲 一不敬 者 侈 政 主。 示 也。 用 胡 0 則 則 獲 則 愚 矣。 氏 「節 下 淺 荷 自 傷 謂 日 然此 用。 近 慢,不信 無 盡 財 敬 以 五 是 制 事 者 八凡 特 傷 雖 然使之 己 度,不 心 而 反 財 論 有 矣。」 此 復 則 則 愛 必 其 雖 數 所 相 至 以 下

子 愛衆,而親仁。 İ 泛 謹 弟子之弟,上聲。 者,行之有常也 廣 「弟子人則孝,出 也 衆 行有餘-謂 衆人。 則弟之弟,去聲。 信者、言之有實 力,則以學文。」 則弟,謹 親 近也 而 信 也。 泛

> 修其職一 有餘 本末 文 謂 失之於野 日 日 曰 0 理之當 而 仁 謂《詩 「爲弟子之職, 不學文 9 力 者。 未 知 而 德 而先文,非爲己之學也。」〇 所先後,可以入德矣。」 有餘 然,而 行, 而 不學文,則質勝 餘 己。 力, 本也。 則 力 書》 所 無 猶 而 行 以 六藝之文。○ 學文,則文滅 言 文藝, 力有餘 考聖 或 暇 出 H 而 賢 於 0 末也。 野。」愚謂 則學文,不 之成 私 以 意 〇洪 其 用 法 尹 程 質 窮 也 氏 子 氏 其 力 旧

事 子 未 學,吾必謂之學矣。」 君 夏 賢 子 委也 能致 ,而易其好色之心,好善有誠 夏,孔子弟子,姓 日 0 其身,與朋友交言而有信。 賢 委致其身,謂不有其身也。 賢 易色, 1, 事 父 名 13: 商 能 竭 也。 賢人之 其 川

如是而已。故子夏言有能如是之人,1皆人倫之大者,而行之必盡其誠,學

苟非生質之美,必其務學之至,雖或以求如是而已。故子夏言有能如是之人,

曰:「三代之學,皆所以明人倫也。能爲未嘗爲學,我必謂之已學也。○游氏

以加此? 子夏以文學名,而其言如此,是四者,則於人倫厚矣。學之爲道,何

古人之所謂學者可知矣。

故《學而》

「子夏之言,其意善矣。然詞氣之間,抑一篇,大抵皆在於務本。」〇吴氏曰:

若上章夫子之言,然後爲無弊也。」揚太過,其流之弊,將或至於廢學。必言,夏之言,其意善矣。然訴氣之間,其

子 嚴 外者,必 重 · 何 重。 所學亦不堅固 君子不重 不 能 威 威 堅 平 則不威, 嚴 内 也。 故 固 堅 學 不 則 厚重則 固 不 巾 古 無 輕 威 平

「主忠信。

出入 忠信,豈復有物乎?」 則 日 難 不 無時, ,故學者 忠信,則事皆無實,爲惡則 「人道 莫 催在 知其鄉者,人心也。 必 以 忠信,不 是爲 主 誠 焉 則 無 易 物, 若無 程子 爲 H. 善

「無友不如己者。

己,則無益而有損。無、毋通,禁止辭也。友所以輔仁,不

如

「過則勿憚改。」

爲質, 是也 無 過 爲 難 已。」〇程 勇,則惡日 主, 他 而 亦禁止之辭。 |。| ○游 荷 也 終 而 而 安也 無 學 以 知其 子 長、故 以 以 勝 氏 日 成之。 入德,而賢者 己 曰 : 不善,則 . 者 有過 程 憚 輔之。 君子自 子 「君子之道,以 學之道,必 則 E 畏 速 當 0 難 改 「學 速改,不 修 亦 也 或 以 Z 未 吝 從 必 以 道 問 自 忠 善 之 於 治 威 미 道 改 重 如 而

以善道,故以過勿憚改終焉。」

於厚。 之; 子 誠 謹 厚之道也。 下民化之,則其德亦 日 0 民德歸 遠者,人之所易忘 蓋終者,人之所易忽也,而 慎終追 喪 厚,謂 故以此自爲,則己之德 盡 其 遠 禮。 下 、民德歸厚矣 歸 民 於厚也 追遠者,祭 化之,其德 也, 而 能 追之, 盡 亦 謹 歸 其

聞 子 禽問 名亢。 是。 子。 其 之與之與,平聲。 政。 或 抑,反語辭 於子貢曰 求之與? 티 : 子貢,姓端木,名賜。 「亢,子貢弟子。」未知 . 下同。 抑與之與?」 「夫子至於是 〇子禽,姓 皆孔子 邦 也 陳 孰 必

夫子之求之也,其諸異乎人之求之與?」子貢曰:「夫子温、良、恭、儉、讓以得之。

則 過化 盛 温 五 善言德行矣。 矣。 學者所當潛 之耳,非若他人必求之而 容如是,故 儉 於親炙之者乎?」張敬夫曰: 政 是 學者觀於聖人威儀之間,亦 '他人也。 其 德光 邦 者想見其形 節 和 若子貢亦可謂善觀聖人矣, 德盛禮恭 存神之妙,未易 必 制 厚 聞 輝 蓋見聖人之儀形而樂告之者, 也 也。 其政 接 時 於人者 心 讓,謙 言夫子未嘗求之,但 君 良,易 一, 而 容,尚 今去聖人千五百年, 而 而 敬信 勉學也 不願乎外, 未 遜也。 直 也。 窺 有能委國 能 也。 測 自以其政就 使 其 後得也 ,然即此 人興起,一 諸 五者,夫子之 亦可 可以 謝 而 語 「夫子 莊 授之以 亦 氏 敬 見 而 其 聖人 進 而 而 以 可 矣。 也 間 德 謂 德 況 此

❶ 「謹」,係避宋孝宗趙昚(慎)諱,吴本作「慎」。下同

六四

不 彝 能 好 用 德 耳 之良 心 也 9 而 私 欲害之, 是 以 終

子 三年無改於父之道,可謂孝矣。」 道,雖 所 以 亦 \equiv 善,亦不得 於父之道,乃見其孝。 行,去聲。〇父在 日 可 年? 謂 知其人之善惡。 知。 不忍故也。」〇 在 終身無 所當 父在, 父没,然後其行可見,故觀 然則三年無 爲孝矣。 改而 觀 改可 其 可 游 子 志 也。 然又必能 以 氏 〇尹氏 改 未改者耳。」 H 不得自專, 不然, 者,孝子之心 如 : 父没, 其 티 : 「三年無改, 非道 則 \equiv 觀 所 年 其 而 如如 行 無 此 何 志 行 有 其 雖 改 足 則

斯爲美,小大由之。 有子曰: 「禮之用,和爲貴。先王之道,

禮者,天理之節文,人事之儀則也。和

可行也。」 有所不行 以爲美,而小事大事 而 者,從容不迫之意。 皆出 不迫,乃爲 於自然之理 知 和 可貴。 而 和 ";故其 ,不以禮節之,亦不 無不由之也 先王之道,此 蓋 禮 之 爲 爲 用 體 必 雖 其所 嚴 容

也 其 爲 則 反,而 其徒知和之爲 節 行。」〇范 承上文而 一行者, 美, 離 達 用 則 此 故故 則 和 而 亦 理之自然,禮之全體 亦 以 樂之本矣。」愚 者, 禮 不 非復 知 小 氏 言, 和 之用 可行 和 大 樂之所 티 : 爲 而 由 理之本然矣,所以 如 貴 貴。 和,不 和爲貴。 也。 之。 此 而 而 凡禮之體 由 敬 復有 樂勝則流, 〇程子日 於 以 生 者,禮 謂 禮節之,亦 和 也 先王之道 嚴 不復 所不行 也。 而 主於敬 之所 若 : 泰 流 有 故 以 以 釐 和 子 不 有 禮 禮 勝 有 可 7 口 所 斯 節 而 而

行均矣。 差,則失其中正,而各倚於一偏,其不可

也。」 於禮 子 日 遠 耻 信 辱 也 近於義,言 因 不失 可 其 復 親, 也 亦 可 恭 沂

所終。 勝 言 其 禮 事 近 而 言 中其節 其 人之言行交際,皆當謹之於始 可 約信而合其宜,則言 、遠、皆去 ,節文也 之宜也。 自失之悔者矣。 親之人,則亦 不然,則因仍 ,則能遠 復, 因, 踐 猶依 ()信 口 耻 言也。 以宗而 辱 荷 也。 約約 矣。 必可 且 之間 信 恭, 宗, 主之矣。 踐 所依者 也。 矣。 猶 致 將 而 敬 主 義 慮 不 也。 也。 其 失 恭 不

事 子 日 而 慎 「君 於言 子 就有 食 無 道 求 而 飽 IE 居 焉 無 口 求 謂 好 學 敏 也 於

己。

然不取 仁義 謂 是,而必就 暇及也。 好,去聲。 子之學,能 理,人之所共 言者,不敢 好學 好學矣。 而 可可 差者也 E 敏 於 乎?! 是四 盡 有道之人,以 凡言道者 於於 〇 不 有道,未免有 其 由 事 所 者 者,可謂 求安 其 者 也。 有 流 餘 勉 至於 飽 肾謂 其 〇 尹 也 者 篤志力行 IE 差, 所 無 其 氏 事 然猶 志 不 父 如 是 物 日 足 有 無 楊 非 當 不 在 、墨學 者 君 然之 敢 謹 則 而 矣。 君 É 於 口 不

子曰 也 子 ___ 貢 日 . 可 也 貧 而 未若 無 諂 貧而樂 富 而 無 富 驕 而 何 好 如 禮 ?

驕 知 所以自守,故必有二者之病 矜肆也。 音 洛 好, 常 X 去 溺 於 貧 (富之 諂 卑 中 無諂 屈 而 也 不 無

所已 故以 處善 也。 也。 貨殖,蓋先貧後富, 則 能。 「,樂循理,亦不 凡曰 此爲問。 樂則 知自守矣, 而勉其所未至也。 心廣體胖而忘其貧,好禮 「可」者,僅 而夫子答之如此,蓋許其 而未 自知 而當用 口 能超 而 其 有 力於自守者, 富 乎 所 貧 矣。子貢 未 盡 富 之 則 之 外 安 辭

磨。」 子 · 貢 曰 : 其斯之謂與?」 「《詩》云: 『如切 如 磋, 如 琢 如

磋, 風 也 而 無 理之無 復磋之; 0 故引是詩以明之。 淇奥》之篇。 治之已精,而 諂 多反。 無驕 窮,雖 爲至矣,聞 治玉 與,平聲。 有得 益求其精也。 石 言治骨角者, 者,既 焉 夫子之言, 而 未可遽 琢之而)《詩 子 既 自 又 貢 復 切 , < 足 知 衛 自 磨 之

子曰 諸 往 而知來者。」 賜也,始可 與言《詩》已矣! 告

> 待辨説 往 而 成 琢)愚按: 則 者 而 其 察切了 不 磨 求造道之極致,亦 無 而明矣。 所已言者。 己之實病 所 此 措。 章問答,其淺 然不切則 故學 也。 來者, 者 雖 不 其所 磋 深 不 可 高 無所施,不 可 鶩於虚 未言 F 安於 遠 1 不

子 日 尹氏 不己知。 故以爲患也。」 日 「不患人之不 不 君子求 知 則 在 是非 我者,故 知, 患 邪正 不 知 不 或不 患人之 也

爲 政 第

凡二十四章。

子 日 爲 政 以 德, 譬 如 北 辰 居 其 所 而

衆星共之。」

至静 爲而 也。 以 爲 兀 心 共,音拱, 爲 而 面 而 正人之不 政以 政 成。 . 旋 居其 天下歸之,其象如 而 不失之謂也。● 以 能 繞 德, 所守者至簡 所 制 德,然後無 而 亦作 歸向之也。 動,所務者至寡 IE 則 也。 拱。 不 動 動 也 德之爲言 而 〇政之爲 北辰,北 爲。」〇 而 化,不言而 共,向 此。 爲 能 御 政以德, 而 煩,所處 范 也,言衆星 極,天之樞 得 言 能 程子 服衆。」 也 IE 氏 信, 也 則 者 0 無 無 於

心 蔽,猶蓋 詩》三百十 悪者 凡《詩》之言,善者可 可以懲創 也 思無邪、《 篇,言三百者,舉 人之逸志 魯 以感發人之善 頌 其用歸 駠 大數 篇之 也 於

> 矣。 知要, 無邪 未 蔽之,2日 示人 且 使 三百篇,而 有若 或 者,誠 之意亦深切矣。 得 各 經禮三百 知要則能守 因 其 此 之明 情 毋不敬。」 一事 也。」〇范氏日 惟 性之正 此一言足以盡蓋 H 而 曲 一盡者。 發 禮 約 而 三千 求 己。 守約 其 故夫子 程子 0 (直指 然其 則 亦 可 學者必 足 ∃ : 全體 其義,其 言 言《詩 以 以 微 盡 婉 言 博 思 削 務

無

也。 道, 也。 音導。 政,謂法制 道之而不從者,有 下同。 禁令也 ○道, 刑 猶 以 齊, 引 一之也。 導, 所 以一 謂 先 之

0

2

言」下,司禮監本、吳本有「以

心」,殘宋本、元甲本、吳本無「之謂」二字。「得於心而不失之謂」,司禮監本作「行道而有得於

道之以德,齊之以禮,有耻且格。」 本也。 心。」〇 説: 禮, 者不可徒恃其末,又當深探其本也。 其淺深厚薄之不一者,又有禮以一之, 以率之,則民固有所觀感而興起矣,而 則有以使民日遷善 然政、刑能使民遠罪而已,德、禮之效, 法,德、禮則所以出治之本,而德又禮之 則民耻於不善,而又有以至於善也。 而 敢爲惡, 無 謂制 耻 格,正)愚謂政者爲治之具,刑者輔治之 此其 度品 調荷 而爲惡之心未嘗亡 相 也。 免刑 節 爲終始,雖不可以偏廢, 也。 《書》曰: 「格其非 罰而 而不自知。 格,至也。言躬行 無所羞愧,蓋 也 故治民 雖

此所謂學,即大學之道也。志乎此,則古者十五而入大學。心之所之謂之志。子曰:「吾十有五而志於學,

念念在此而爲之不厭矣。

「三十而立,

有以自立,則守之固而無所事志矣

「四十而不惑,

而無所事守矣。於事物之所當然,皆無所疑,

則

知之明

「五十而知天命,

而不惑又不足言矣。 物所以當然之故也。知此則知極其精,天命,即天道之流行而賦於物者,乃事

六十而耳順,

得也。聲人心通,無所違逆,知之之至,不思而聲人心通,無所違逆,知之之至,不思而

一七十而從心所欲,不踰矩。」

過於法度,安而行之,不勉而中也。○所以爲方者也。隨其心之所欲,而自不從,如字。○從,隨也。矩,法度之器,一言行心所為,之區矣。

優游 心而 即 萬 從 矣。」又曰 然,隨所意欲,莫 之學,循其序 後進,成章而後達耳。1○胡氏 日 於 命 程 生 日 用,體即 理 之教亦多術,然其要,使人不失其 未 心所欲, 斯 而 子 「孔子自言其進德之序如此者, 就 己。 知 涵 明盡之後, 必然,但爲學者立法,使之盈科 道 至 日 理盡 泳 安 月 也。 。欲得此 所 0 不 將 行 道,用 不踰矩,則 性 孔 不 不 可 固 而 也 勉 惑 子 躐 可 無 則 進 進 人言此,一 非 心 即 生 等 半 積 其日 焉。 者,惟志乎聖人所示 後 義 至 耳 則 而 、累之 而 途 ,聲爲 理。 ·順,所 人 無 不 知 而 進 用之間 至於 也。 所 之也 勉 廢 漸 蓋 疑 而 以 律 也。 聞皆 立,能自 二以示學 心即],0 ||| 矣。 中矣。」又 示學者 而 日 疵不存、 本心瑩 其 身爲 愚 0 1通也。 體, 謂 知 亦 本 天 度 欲 聖 而 聖

謂

不背於理。

實自 嘗自 獨 以 自 覺 聖而姑爲是退 意皆放此 名 其 謂 已 進 欲學者以 至 而 此 人 不 也 及知者 是爲 是 託 其 也 則 H 而 用之間 故 後 自 因 凡言謙 勉 其 非 近 必 似 詞

孟 孟 懿 懿 子問孝。子曰 子,魯大夫仲 0 孫氏,名何忌。 無 違。」

無

違

屬

對 樊 遲 日 無 御 違。 ,子告之日 . 孟 孫 問 孝 於 我, 我

樊 也 」,故語 不能 遲,孔子 孟孫,即仲孫 問,恐其 樊 弟子 遲以發之。 名須。 失 八指, 也。 而 夫子 以 從親 以 爲 懿 孔 之令爲 子 子 未 御 達 車

樊 遲 曰 : 何 謂 也? 子 日 : 生, 事 之

0 司 禮 監本 作「

六九

書章 句 集 注

以 於禮 得爲 也。 又若 禮 爲 無 理之節文也。 生 僭禮, 故 窮, 其所得爲者而 事 不專 、葬、祭, 而爲 而不苟,其尊親也至矣。 〇胡 而 死 分則有限。 夫子以是警之。 氏 爲三家發者,所以爲聖人之言 葬之以禮,祭之以禮 之,均於不孝。 日 事親之始終具矣。 : 人之事親,自始至終,一 「人之欲孝其親 已矣。」 得 爲 然語意渾然, 所謂 而 不爲,與不 是時三家 以禮者 禮, 心雖 即

孟 武 伯 問 孝。 子曰: 「父母惟其疾之

也。 凡 武 不 心 所以 伯, 可以爲孝乎? 無所不至,惟恐其 人子體此,而 懿子之子,名彘。 守 其 身者,自不容於不謹矣, 舊説人子能使父母 以父母之心爲 有 疾 言父母愛子 次病,常 以爲 之 憂 則

以

是深警發之也。」

乃 以 其 可 謂孝。 陷 於 不 亦通 義 爲 憂, 而 獨 以 其 疾 爲

乎? 養。 子游 皆能有 所以深警之也。 則與養 馬待人而 子,姓言,名偃 養,去聲。 弟,未必 流於不敬,則非小失 親,能養足矣。 至於犬馬、皆能 問 孝。 犬馬者何異? 以養之,若能養其 至此,聖人 子曰 食,亦若養然。 别,彼列反。〇子游,孔子弟 狎恩恃愛,而 養, 〇胡氏曰: 有養; 「今之孝者, 直恐其愛踰 謂飲 也 甚 食供奉也。 言 親 言人畜 不敬,何以 子游 而 不 「世俗 不知其 敬之罪, 敬不至, 於 聖門 是 犬馬 敬, 謂 漸 事 别 高 能 故

子 夏問孝。 子曰: 色 難。 有 事, 弟 子服

乎 其 ? 勞; 有 酒 先 生 饌 9 曾 是 以 爲 孝

也。」 其材之高下,與其所失而告之,故 敬,子夏能直義而 父 耳,服勞奉養,未足爲孝 者必有和 難 其人多可憂之事。 色者必有婉容。故事親之際,惟 食之也。 食,音嗣 告懿子,告衆人者也。 也。 母之色爲難。 食,飯 氣 曾,猶嘗也。蓋孝子之有深愛 ,有和氣者必有愉色,有 色難, 也。 亦通。 或少温潤之色。 先生,父兄也 謂 子游能養 事親之際, 對武伯者 也。 程 舊説 而 子 或 色 惟 , 不 各 失於 日 色 承 爲 因 難 愉 爲 同 順 以

省其私 子 Ė 口 孔子弟子,姓 ,亦足以 「吾與回言終日,不違如 發。 顔 П ,字子淵。 也不愚。」 愚。 不違 退 者 而

> 之言,默 明 疑,然後知其不愚也。」 皆足以 退省其私, 故終日言,但見其不違如愚人而已。 潛淳粹,其於聖人體段已 燕 意 所 居 不 言 獨 相 發 之理。 背 處 識 非 明夫子之道,坦 則 心 有 見 融 進 聽 愚聞 其 ,觸處洞然,自有 見 受 請 日 而 之 用 問 無 師 動 之 問 具。 日 静 時 然由 難 語默之間 也 其聞 「顔 發 之而 條 私 夫子 子深 謂 理。 及 發 謂 無

子 , 爲 也。 爲善者爲君子,爲惡者爲 //

曰

視

其

所以

觀其所由

觀,比 而意之所從來者有未善焉 視爲 詳矣。 由 從 也 則 事 亦不得爲 雖 爲 善

0 司禮監本、吴本作「告」。

士二

其所爲者也。」 君子矣。或曰:「由,行也。謂所以行

「察其所安。

能久而不變哉?善,而心所樂者不在於是,則亦僞耳,豈善,则又加詳矣。安,所樂也。所由雖

人焉廋哉? 人焉廋哉?」 聖人也。」 「在己者能 焉,於虔反。 廋, 匿也。 知言 重言以深明之。 廋,所留反。 「窮理, 則能 以 焉 此 程 子曰 察人如 何

子曰 若 得。 限 所 温 學在 夫記問之學,則 ,故《學記》譏 尋繹也。 言學能時習舊聞 「温故而知新,可以爲師矣。」 我,而其應 故者,舊 其「不足以爲人 不窮,故 無得於 所聞 丽 心,而 每 可 以 有新得, 新者,今所 爲 八師」, 所 人師。 知 Œ 有 則

與此意互相發也。

器者,各適其用而不子曰:「君子不器。」

士,體無不具,故用無不周,非特爲一才器者,各適其用而不能相通。成德之

子貢問君子。

子

日

.

先行

其言

而

後從

藝而已。

○范氏曰:「子貢之患,非言之艱而行前,而後從之者,言之於既行之後。」前,而後從之者,言之於既行之後。」

周,●普徧也。比,偏黨也。皆與人親厚子曰:「君子周而不比,小人比而不周。」

■ 「周」上,元甲本、司禮監本有「比必二反○」四字及一

其所 故 之意 舍之幾也。 而 爲 聖人於周比、 不 互言之,欲學者察乎兩 同, 但 以 分,則 周 如 公而 陰 在公私之際,毫釐之差耳。 陽 和同、驕泰之屬,常對舉 比 書 私 夜 耳。 每 每 間,而審其 相 君 反。 子小 然究 人所 取

子 不求 思 日 危 而 、明辨、 諸心 不安。○程 學而 篤行五者,廢其一,非學也。」 故 不 昏 思 而 子曰: 則 無得。 罔 思 「博學、審問、謹 而不學則殆。」 不習其事,故

子 父無 之工 范氏 日 程 子 端 君 「攻乎異端,斯害也已 日 日 ,如楊、墨是 攻。 0 專治而欲精之,爲害甚矣!」 佛氏之言,比之楊、墨,尤爲 異端,非聖人之道,而 攻,專治也,故治木石 也。 其率天下至於 _! 别 金 爲 無 玉

美色以遠之,不爾,則駸駸然入於其中近理,所以其害爲尤甚。學者當如淫聲

則以 道乎 路。子路好 此 女,音汝。〇 加 而 無自欺之蔽,亦 故夫子告之曰: ! 求之,又有可知之理乎? 爲 不知。如此, 但所知者則以 勇,蓋有强其所不知 由,孔子弟子, 不害其 則 我教女以 爲 雖 爲知矣。 或 知 , 所不 不 姓 能 仲 以 知之之 盡知 況由 知 字 爲 者 知 子

子張學干禄。

也。禄,仕者之奉也。 子張,孔子弟子,姓顓孫,名師。干,公

子曰:「多聞闕疑,慎言其餘,則寡尤也, 褚 作者以是七

多見闕殆,慎行其餘,則寡悔。言寡尤,行

寡悔

禄

在

其

中

矣。」

之失 餒 疑 子 不 則人爵至,君子言行 者,皆不 之精,謹言行者守之約。 也。」愚謂多聞見者學之博,闕 張學干 在 如 爲 未信 寡之行 其 此 利 而 罪自 中一, 亦 禄 進 求 之也。 有 動 禄,故告之以 外 殆者,所未安。」 去聲。 而 惟 不 若 至 自 理可爲者爲之而 · 得 者 至之辭。 顔 禄 也。 者,孔 〇吕氏 関 程 能 則 子 謹 悔, 此 凡言 無 言此 日 ,得禄之道也。 子 ,使定其 日 理 此 蓋 程 自 問 已矣。」 以 在 疑 E 「修天爵 救 矣。 内 殆 子 「耕 其 疑 心 子 者 出 日 中 而 張 也 或 者 擇 0

哀 舉直 不服。」 公問 錯諸 日 枉 何 則 爲 民 則 服 民 服 舉 ? 枉 孔 錯 子對 諸 直 則

> 貴 以 理 至情 服。」○謝氏 也。 對 哀 也。 窮 枉 公, 日 理 爲 也 者, 魯 也。 直 然 程 者 或 子 順 尊 之則 日: 多 無 티 : 君 名 矣。 道 蔣 也 以 服 0 好直而 舉 照之, 凡 是 錯 逆之則 錯 以 君 舍 君子 得 問 則 置 惡枉,天下 義 以以直 去,必 也。 皆 大居 • 稱 則人 爲枉 然之 孔 之 而 衆 子

子 季 而 教 曰 康 不 子 能 問 則 臨 勸 之以 ___ 使 莊 民 敬、 則 敬 忠 以 孝慈 勸 則 如 忠 之 何? 舉

貌端 於親 季 加 康 不 嚴也。 能 慈於衆 子,魯大夫季 者教之, 臨 則 民 則 以 民 孫氏 莊 民 忠 有 於 則 名肥 所 民 勸 敬 0 善者舉之, 而 於己。 莊,謂 樂於爲 孝 容

0

如 非 善。 爲 是 列則 欲 使民 張 其 敬 、應蓋 敬 夫 、忠以 日 有不 . 期而然者矣。」● 勸 此 而 皆 爲之也。 在 我所 當 然能 爲

弟,施于有政。』是亦爲政,奚其 子 外是。 E 之,言如 或人者,故託 爲爲政乎? 又能推廣此心,以爲一家之政。孔子引 友。《書》言君陳能孝於親,友於兄弟, 者,言《書》之言孝如 書》,《周 . 「《書》云: 此則 書 0 此 蓋 是 君 以告之,要之至 孔 亦 陳》 子 爲 『孝乎惟孝,友于 之不仕,有 政矣,何必 此也。善兄弟曰 篇。《書》云孝平 、爲爲政 難 居位 理 亦 以 兄 乃 語

> 子 輗 小小車 日 無 人而 軏 其何以行之哉?」 無 信 不不 知 其 口 也。 大 車 無

端上 者。 則 任 輗,五兮反。 不可以行,人而無信,亦猶是也。 載之車。 小車, 曲 鈎 謂 衡 輗,轅端横 軏,音月。〇 田 以 駕 車、兵車、 馬者。 木,縛 車 乘 大車 無 車 軛 此 以 謂 軏 駕 平 轅 4 地

陸氏曰: 「也,一作乎。」○ F 子張問: 「十世可知也?」

可前知乎? 命爲一世。子張問自此以後十世之事,陸氏曰:「也,一作乎。」〇王者易姓受

者 周 子 雖百世 因於殷 日 禮 殷因 可 所 知 於夏禮, 也 損 0 益 口 所 知 損益, 也 9 其 可 或 知 繼 也 唐

馬氏曰:「所因,謂三綱五常。所損

● 「期」下,司禮監本、吴本有「然」字

仁、義、 子 統,商 已乎 則自 過 \equiv 尚 文 由 不 者以明之也。 後 之遠,所 臣 益 而 子商 可一 爲 世 綱 綱, 不及之間, 不能變。 質,周尚 張之問 禮之本 謂 五常, 今以 ! 讖 或太 Œ 、禮、智、信。 文質三統。」 父爲子綱, 日 緯 聖 建 所謂 因 往,或 而 人 蓋欲 術 所 丑爲 禮之大體,三代相繼,皆因之 過 也 文。三統,謂夏正 其所 革,亦 無 天 數 所 而其已然之跡,今皆可見。 則 夫自 禮。 以知 地 地之常經也。 之 商 有 當 知 損 夫爲 愚按 統,周正建子爲天統。 不能 學 繼 損 來, 不 益,不過文章制 修身以 文質,謂 天叙天秩,人所 來者 周 也。 调 而聖人言其 或 妻 改 而 此 不 乎 蓋 王者, 綱 至於爲天下, ,豈但十 足 夏,周 夏 如 綱 若 胡 建寅爲 則 尚 此 五. 氏 雖 乃 謂 當當 常 忠 度 既 君 制 非 世 百 不 日 益 共 X 往 世 商 度 能 而 謂 爲

> 益 遠,不過 古今之 之損之, 通 如 義 此 與 而 也 時 已矣。」 宜 因 之,而 往 推 所 來 因 者不 雖 白 壞, 世 之 是

非其 日 0 鬼 非 謂 其 非 鬼 其 而 所當祭之鬼。 祭之,諂 也 諂 求 媚

子

也。

知而不爲,是無勇也。」

論語卷第一

論

也

」。」 蓋

深

疾之之辭。

范

氏

日

舞之數,自上

而下,降

殺

以

兩

而

已,故兩

之間,不可以

毫髮

僭

差

也。

孔子爲政

八 佾

凡二十六章。 通前篇末二章,皆論禮樂

三家者以《雍》徹。

子曰

相

維

辟公,

孔 子 可忍也?」 謂 季氏: 一八 佾 舞於庭, 是 可 忍 也

佾八人。」 未詳孰是。 用天子之樂,孔子言其 佾,舞列也,天子八、諸侯六、大夫四、士 何 音逸。 每佾人數,如其佾數。 不 可忍爲。 〇 季 氏, 或曰: 魯 季氏 大夫 此 事 以大夫 或曰 季孫 尚忍爲之, 「忍,容忍 氏 而 也。

> 氏曰 處,不忍故 先正禮樂, 父與君,亦何所憚而 君 則季氏之罪不容誅矣。」○謝 也。 子於其所不當爲不 而季氏忍此矣, 不爲乎?」

敢

須

臾

則雖

弑

天子穆穆』,奚取於三家之堂? 篇名。 徹,直列反。 取 孔子引之,言三家之堂非 遠之意,天子之容 孟 於此義而歌之乎? 一孫、叔孫、季孫之家也。《雍》、《周頌 相,助也。 則歌《雍》以 徹,祭畢而收其俎 相,去聲。〇三家,魯大夫 辟公、諸侯也。 也。 徹,是時三家僭而 譏 此《雍》詩之詞 也。 有此 其 無 天子宗廟 知 事 穆穆,深 妄作 丁,亦何 用

尼 使 伯 安 以 譏 得 功 季 禽 取 之。」 氏 之 獨 固 僭 僭 受,皆非 大 用 竊 矣,皆 八佾,三家 天 之 子禮樂哉? 罪 0 也。 臣 子之分 程子 其 僭《雍》 因 日 所 襲 成 之弊, 徹 王 當 一之賜, 故故 爲, 周 仲 遂 魯

如樂何?」 子曰:「人而不仁,如禮何? 人而不仁,

哉 疑 雖 IE 爲 游 日 如 之用 其 ? 玉 理。 禮 氏 、爲僭禮樂者發也 樂 日 然記 也。」〇 禮樂待 0 何 失正理,則無序 哉 錯, 者序 人 ? 程子曰: 鐘 而 人而後 此 言 鼓鏗 不 於 雖 八佾、《雍》徹之後, 欲 行,荷 鏘 而不和。」〇李氏 用之,而禮樂不 則人心亡矣, 「仁者,天下 非其 將 如之 何 則 其

林放問禮之本。

而疑其本之不在是也,故以爲問。 林放,魯人。見世之爲禮者專事繁文

子曰:「大哉問!

其中矣。 大其問。蓋得其本,則禮之全體無不在孔子以時方逐末,而放獨有志於本,故

戚。」「禮,與其奢也,寧儉, 喪,與其易也,寧

足耳。 其 之本 物 戚 痛 之 則 田 慘怛之實者也。 去聲。 疇。 也。 理 不 禮 及 ,必先有質而 在喪禮 貴 而)范氏 ○易, 質 得 中, ,二者皆未合禮。1 H 治 則節 奢、易則過於文,儉 戚 也。 後有文,則 則一於哀,而 文習熟, 夫祭,與 孟 子曰 質 . 其 而 然凡 乃禮 敬 文不 無 哀 易

食,故 能反本 數,所以節之也,則其本戚而已。 儉而 世方以文滅質,而林 喪不可以徑情 罍、爵之飾,所以文之也,則其本儉而已。 故爲禮之本。」○楊氏曰: 夫子大之,而告之以此。」 不文之愈也。 而 喪,與其 哀有餘 而禮有餘也,不若禮不足而敬有餘 不備之愈也。 〉汙尊 前 哀不足而禮 隨其末 也。 而抔飲,爲之簠、簋、籩、豆、 禮失之奢,喪失之易,皆不 儉者物之質,戚者心之誠, 而直行,爲之衰麻哭踊之 故也。 喪易而文,不若戚而 放 有餘 獨能問禮之本,故 禮奢而備,不若 也,不若禮不足 「禮始諸飲 周衰, 也。

亂,反無上下之分也。」○尹氏曰:「孔曰:「夷狄且有君長,不如諸夏之僭矣氏曰:「亡,古無字,通用。」○程子子曰:「夷狄之有君,不如諸夏之亡也。」

雖有之,不能盡其道爾。」子傷時之亂而歎之也。亡,非實亡

也

季氏 曾 救與?」對曰 之不可 子 謂 竊之罪。 川,季氏祭之,僭也。 山,山名,在魯地。 女,音汝。 明泰山之不可誣,是亦教誨之道也。」 冉有也。 欲季氏知其無益 名求,時爲季氏宰。救,謂救其陷於僭 人,盡己之心,安知冉 旅 豈不知其不可告也 泰山,不如林放乎? 於 諫也? 泰山。 嗚 〇范氏曰: . 與,平聲。 呼,歎辭。言神不享非禮 。子謂 「不能。」子曰 既 而自止,又進林放以厲 禮: 不能 冉 ,然而聖人不輕絕 冉有,孔子弟子 有之不能救、季氏 「冉有從季氏,夫 有 E 日 諸侯祭封内山 旅,祭名。 ,則美林放 嗚 女弗能 呼 1

子曰 升,下而飲,其 君子無 爭 所 也 爭 君 子。 必 也 射 乎 1 揖 讓

人之爭矣。 揖 者 揖 耦 飲 爭,惟於射 升,取 遜乃如此 降,②以 去聲。 進三揖 解立飲 俟衆 而後升堂 而 〇揖 則其 後 耦 也。 有 遜 皆 爭 爭。然其 而升者, 一大射之禮 也。 降 言君子恭遜不與 也 君子 下 勝者乃揖, 而 `,而非若 爭 飲 也 謂 雍 不 射 勝 容 // 显

爲絢兮』,何謂也?」子夏問曰:「『巧笑倩兮,美目盼兮,素以

倩 色,畫之飾 黑白分也。 而 此 又加以華采之飾 七練反。 逸《詩》也。 也。 素,粉地,畫 盼, 言人 倩 普莧反。 ''; 好 有 如有素地而加采色 此 П 一之質 倩 輔 絢,呼 盼 也 也 之美質, 絢,采 盼, 縣 反。 Ħ

子曰:「繪事後素。」也。子夏疑其反謂以素爲飾,故問之。

采,猶人有美質,然後可加文飾。事後素功。」謂先以粉地爲質,而後施五素,後於素也。《考工記》曰:「繪畫之繪,胡對反。○繪事,繪畫之事也。後

始可與言《詩》已矣。」曰:「禮後乎?」子曰:「起予者商也.

志意。 先。 禮 《詩》,子夏因 采,忠信之人,可以學禮。 言《詩》。」〇楊氏 不虚行。』此繪事後素之説 必以忠信爲質,猶 事後素,而 起,猶發 謝 氏曰: 也。 子夏曰禮後乎,可 論《詩》而知學,故 曰 : 起予,言能 「子貢因 繪 『甘受和,白 事必 荷 也。 無 以 起 論 其質, 學 發 粉 孔 我 素 可 而 受 爲 知 繼 與

八〇

❷ 「降」,原作「畢」,據仿元本、吴本改。 ■ 「遜」,係避宋英宗父允讓諱,吴本作「讓」。

謂 商 其 章句之末,則其爲《詩》也 、賜可 、志矣。 起予,則亦相長之義也。」 與言《詩》者以 非 得之言意 之表 此 古 者 若夫玩心 而 能 已 之乎 於

故也。足,則吾能徵之矣。」殷禮,吾能言之,宋不足徵也。文獻不足子曰:「夏禮,吾能言之,杞不足徵也,

獻 證 能言之,而二 文,典籍也。 吾言矣。 不足故也。 夏之後。 獻、賢也。言二代之禮 國不足取 宋,商之後。● 徵, 文獻若足 以爲 則我能取之以 證 ,以其文 證 也 我

矣。」子曰:「禘,自既灌而往者,吾不欲觀之子曰:「禘,自既灌而往者,吾不欲觀之

之大祭也。王者既立始祖之廟,又推始禘,大計反。〇趙伯循曰:「禘,王者

矣? 觀矣。 道 此 有可 也。 始 考之杞、宋已如 者,方祭之始,用鬱鬯之酒灌 祖 所出之帝,而周公配之,然非禮矣。」 魯重祭。 商道,是故之宋, 我 所以深歎也。 ,是故之杞,而不足證 謝 祖 所 而失禮之中又失 觀 觀,自此以後, 配之也 魯之君臣,當此之時,誠 自 氏 魯之郊禘非 周 蓋魯祭非禮,孔子本不欲觀 出 曰: 道 故得 一之帝 幽 成王以 禘於周 夫子 彼 祀之於始祖之廟 厲 而 ,考之當今又如此 禮 嘗 八禮馬, 則浸以 傷 不足證 也 公之廟,以 周 之,吾 日 公有 周 也; 0 故發此歎 公其 懈怠 也。」 地 大勳勞, 意未散, 舍 我 ,以降 衰矣 魯 我 欲 而無 文王 又 何 E 欲 觀 圃 也 至 灌 賜 足 爲 滴 猶 神 以 朝 夏

■「商」,係避宋太祖父弘殷諱,吴本作「殷」。下同

❷ 「證」,係避宋仁宗趙禎諱,吴本作「徵」。下同。

或 者之於天下 此 掌 先王 問 誠 者,故以不知答之。示,與視同。 也。 明且易也。 誠敬之至,不足以 党真 無不格, ,弟子記 褅 報本追遠之意,莫深於禘。 之説。 而不王不禘之法,又魯之所當 有所不知也 也,其 夫子言此而自指 子曰 而 蓋 治天下不難矣。 知禘之説 如示諸 0 0 與此,非或 哉? 斯 不 則 乎 知 也 理 其掌,言 人之所 指其 無 聖人於 非仁 知 不明 指 其 堂 其 其 説

祭如在,祭神如神在。

此門人記孔子祭祀之誠意。神也。祭先主於孝,祭神主於敬。」愚謂程子曰:「祭,祭先祖也。祭神,祭外

與,去聲。○又記孔子之言以明之。言子曰:「吾不與祭,如不祭。」

乎? 則 廟 曰 : 虚 所祭者,誠之至也。 攝之,●則 也。」 當祭之時,或 有 則人鬼享,皆由己 而此 吾不 其 「君子之祭,七日戒,三日 神, 心缺 不 與祭,如不祭,誠 無其 得致 然, 有 誠 如 其 故 則 是故 未嘗祭也。 如 以 不 在之誠 無 致之也。 得 其 郊 與, 神, 則 爲 而 實, 天神格 齋,必見 可 有其 故 使 禮爲 不 范 雖 它 誠 謹 氏

竈」, 王 孫 何謂 賈 問 也 日 ? 與 其 媚 於 奥, 寧 媚 於

迎 凡 隅 王 尸 爲 孫 祭五祀 而祭於奥,略如 奥。 賈 衛大夫。 皆先設 竈者,五祀之一,夏 主而 媚, 祭宗廟之儀。 親 祭於 順 也。 其 所祭也。 所 室 西 如 祀 後 南

■「它」,吴本作「他」。

常尊, 奥,以 賈,衛之權臣,故以諷孔子。 用 竈 事。 則 迎 而非祭之主; 設 喻自結於君,不 尸 主 也。 於竈陘,祭畢,而 故時 俗之語 竈 如 雖卑 冏 附權 因 賤 更設 以 而 臣 當時 奥 饌 也。 有 於

子 取 所能禱 當媚竈,亦不可媚 也。 日 此意,不爲無益 天,即理也,其尊無對,非奧、竈之可比 聖人之言 禍。」 逆理,則獲罪 「不然,獲罪於天,無所禱 而免乎? 逐而 不迫。 於天矣,豈媚於奥、竈 於奥也。 言但當 使其不知,亦非 使王 順 ○謝 理,非特 孫賈 也。 氏 所 而 以 知 0 不

也。言其視二代之禮而損益之。郁郁,郁,於六反。〇監,視也。二代,夏、商

大備,夫子美其文而從之。」 文盛貌。○尹氏曰:「三代之禮,至周

曰:「是禮也。」子知禮乎? 人大廟,每事問。」子聞之,子入大廟,每事問。或曰:「孰謂鄹人之

譏之。 於此。 哉?! 夫。 廟。 以爲禮也。 鄹,魯邑名。 大,音泰。鄹,側留反。○大廟,魯周 此蓋孔子始仕之時, 孔子自少以知禮聞,故或人因 雖 謂 知 孔子言是禮者,敬謹之至, 亦問 之不知禮者,豈足以 〇尹氏曰:「禮者,敬 孔子父叔梁紇當爲其邑大 ,謹之至也,其 人而 爲 助 知 敬 孔 莫大 乃所 此 而 子 而

司

猶

供

羊

故

子

貢

欲

去之。

能 孔 也。 所 商 有 但 所 皮,革也。 爲 强 主於 以正今之失。」 子歎之。 謂 力不同 散軍 力不可以强而 周衰禮 弱 鵠 聲 不 中 也 郊 科, 同等也。 射, 而 布 廢 科,等也。 侯 不 射 楊 列 而貫革之射息。」 È 而 不 子 氏 國 一於貫 棲 至。 主 《記》曰 日 解 兵 革 皮 爭 禮 於 古者 革 聖人言古之道 之意 中可 ', 蓋 其 復尚貫革, 鄉 :「武王 射 中 以 射 以 如 以 以學 正謂 人之力 禮 此 觀 爲 \Rightarrow 德, 的, 也 文。 mi 克 此 故

子 貢 欲去告朔之餼羊。

去, 廟 歲 〇告朔之禮: 十二月之朔於諸侯、諸 起吕 性 朔 也。 反。 則 魯自文公始不 告,古篤 以 古者天子常 特羊 告 反。 廟 侯 受 以 餼, 視 請 而藏之祖 季冬頒 朔 而 許 氣反。 而 有 來

> 子 羊存則 惜之。 然禮雖 日 命於君 此 若并去其羊,則 夫 子 惜 所以惜之也。」 賜 告朔之名未泯, 廢,羊存,猶 親 此 也。 楊氏曰 也 ,禮之大者。 爾 子 此禮遂 愛其羊,我愛其 · 貢 . (蓋惜: 得以 告朔,諸 亡矣。 其 魯 而 識 無 其 不 之 視朔 實 而 實 孔子所 侯所 禮。 大 可 而 矣, 復焉 妄費 口 以 禀 以

子 程子曰 諂。 日 人以 諂 道 黄 也 故孔 : 大 氏 如是 、德宏,此亦可見。」 爲諂 日 若他人言之,必曰 0 事 子言之,以明禮之當然 而 君 「孔子於事君之禮、非 而 後 盡禮,人以爲諂 聖人事 孔子之言 盡 爾。 君 時 止於如 盡 我 人不能 禮 事 也 當 君 此 盡 時 也 反 有 以 以 所 爲 爲 加

子對日 定 公問 欲自 其不忠,患禮 定公,魯君,名 忠。」 義合者也。 ,患忠之不 而已。 使 使 之不 足。」〇 臣 宋。 故君使臣 臣 以 臣 至 禮 二者皆理之當然, 氏 事 尹氏曰 更 E : 君 以 事 事 禮 着 以 如 君 当則 0 之何 「使臣 不患其 忠。」 臣 ? 事 臣 君 無 患 孔

以

子 EI : 《關 求 求之未 者 詩》之首篇 也。 而 雎 音洛。 雖 得之,則宜其有 「《關 **>** 深 得 傷 之詩,言 而 川則 者, 雎》, 不害於和 也。 哀之 不 關 樂而 能 后 淫者,樂之過 雎 妃 無 過 琴瑟 不淫,哀而 其樂 寤 之 丽 德,宜 周 寐 鐘 害 南 雖 反 鼓 於 之樂。 側 而 和 不傷。」 配 之憂; 或 而 失其正 者 君 不失 風 也

> 其正,故 辭,審其音,而 夫 子 稱之如 有以識其性 此。 情之正 欲 學者玩 也 其

哀公問 主也。 松,殷人以柏,周 用栗之意 宰我,孔子弟子,名予。 口者立社,各樹其 社 戰栗,恐懼貌 於 如 宰 此。 我。 人以栗, 豈以古者戮人於社 宰 我 土之所 對 宰 三代 ·我 日 日 使民戰栗。 . 又 之社 言 宜 木 周 以 所 不 后 故故 以 爲 百 氏

子 不 聞之,曰: 附 會其説 與? 成成 事不説,遂事 不諫,

既

往

遂事 殺伐 宰 此 也。 之心,而其 我 以深責之、欲使謹 「古者各以所宜木名其 所 事 宰我不知 對 雖 非 未 成 言已出,不可 7/ 而勢不能已者。 社 而 之本 妄對,故 其 後 意 也 心,又啓 復救, 社 · 非 尹 故 時 孔 取 氏 君 子 歷

之。

子 於王 管仲 褊淺、規模卑狹,不能正身脩德 道 ,言其不 齊大夫,名夷吾,相威公霸諸 管仲 之器 知聖賢大學之道, 小 哉 以 故 侯。 致 局 主 量

或 歸,官事不攝 焉,於虔反。 自 臣不能具官,一人常兼數事,管仲不然, 三歸,臺名,事見《說苑 「管仲儉乎?」曰: ,焉得儉? 〇或人蓋 疑器 攝 小之爲 管氏 兼 有 儉。

禮? 坫,管 管氏亦樹 然則管仲知禮 氏亦 塞 有反站,管氏 門; 乎?!曰 邦君 . 爲 而 兩 「邦君 知禮 君 > 孰不知 樹 好 塞門 有 反

好,去聲。

站,丁念反。

〇或人又疑

不

皆言其侈。

禮也。 大器。 所以 明其 設 知 故 以 深矣。或人不知 儉 自 言當深味 家以及於國,則其 程 治而 明其 屏 爲 ,威公内嬖六人,而霸 然,而 子曰 非 此皆諸 於 蓋器大,則自 知 兩 儉。 ○愚謂 不 揚雄 後 門,以蔽 楹 知禮。 也。 治 : 「奢 之間 其所 或又疑 侯之禮 所謂『大器猶規 屏, 人』者是 孔子譏管仲 ○蘇氏 以 獻 謂 蓋 而 内 而 本 知 小 其 疑 酬 之 外 雖 者,於此亦可見矣。 深 犯 禮 也 其 而管仲僭之, 樹 知 飲 不復 也 曰 : 禮,其器之小可 ,其及者遠,是 而 畢 禮,故又斥其 儉 天下,其本固 0 無此 之器 管仲三 ,故斥其 好, 塞 自 明言小器之 則 矩準繩 反 失矣。」此 謂 猶 脩身正 爵 好 蔽 不知 於 奢 其 也 以 其 僭 反 謂

■ 「威」,係避宋欽宗趙桓諱,吴本作「桓」。 下同

其器。 疑 蓋 霸之略混 淺 不 天下,其 世方以 以其爲儉 悟其 矣。 小,宜矣。」 楊氏曰: 蓋非王佐之才,雖能合諸 管 器不足稱 以 爲一途。 詭遇爲功, 仲 死 不儉告之,則 9 夫子大管仲之功 威公薨,天 也。 故聞管 而 道 不 知 仲 學不明,而 又 爲 疑 之器 下 之範 其 不 (知禮。 復 而 則 則 王

作、翕 子語 也 魯 成。 如也 大師 9 樂, 從之,純 0 如 樂 也,皦 其 可 知 如 也 也 繹 如 始

告 具,不足以 也 孔子教之。 也。大師,樂官名。 去聲。大,音泰。 終也。 皦,明 爲樂。 也。 翕,合也。 謝 繹,相 氏 翕 **=** 如 續不 從, 從,放 ,●言其合也。 時 「五音六律 音樂廢 絶也。 音 縱。 也 成, 缺, 純,和 不

> 乎? 倫 和 繹如也 音合矣, 故 不 \Box ,以成。」 相 清 純 皦 反而 如。 濁 如。 高 相 然豈 合 下 連,如貫 ·, 如 而 和矣, 一宫自 Ŧi. 味 珠 宫 欲 之 可 而 其 相 也 商 濟 無 故 自 相 而 商 奪 後 日

未嘗 三子 儀 天將以夫子爲木鐸 封 ,何患於喪乎? 人請 不得見也。」從者見之。 見, ⊟ : 「君子之至於斯 天下之無道 出 日 : 也久矣 也,

得見。 者。 請 於賢者, 而 見、見之之見,賢遍反。 隱 ○儀,衛邑。 至此皆得見之,自言其平日 於下位者也 而求 謂失位去國、《禮》 以 自 封人,掌封疆之官, 通 0 也。 君子,謂 見之, 日 喪,皆 當 謂 不 時 見 通 去 使 絶 賢

^{■「}如」,原作「然」,據司禮監本、吴本和《論語》本章改

教 路、言天使夫子失位、周流 間者深矣。 見夫子而遽以是稱之,其所得於 振 使夫子得位設教 ,如木鐸之徇於道路也。」 是 警衆者也。 也 木 或曰: ,不久失位 金 言 口 木鐸 亂 木 極當 舌 所 四 也 施 治 以 方 政 以 徇 觀 教 天 封 行 於 感 必 時 其 道 所

《武》:「盡美矣,未盡善也。」
子謂《韶》:「盡美矣,又盡善也。」謂

天下; 得天下 美。 之盛。 《韶》,舜樂。 盡 武王伐紂救民,其功一也,故其樂皆 成湯放桀,惟 然舜之德,性之也,又 ·,故其實有不同者。 善者,美之實 堯、舜、湯、武,其揆 武王之德,反之也,又以 《武》,武王樂。 有慚德,武王 也。 舜紹堯致治, 以揖遜 〇程子 亦然, 美者,聲容 也。 征 故 誅 日 而 征 伐 有 而

非其所欲,所遇之時然爾。」

吾何 子 日 爲 居 何 者而觀其所行之得失哉 本 E 以 , 臨喪以哀爲 主於愛人,故 觀之哉? 居 E 不 寬, 以 爲 本 寬 禮 爲 不 既 本。 敬 無 其本 臨 爲 喪 禮 不哀 則 以 以 敬

里仁第四

凡二十六章。

處,上聲。焉,於虔反。知,去聲。○里知?」 「里仁爲美。擇不處仁,焉得

則失其是非之本心,而不得 有 上聲。 厚之俗 焉, 爲美。 於 虔 擇 反 里 而 知、去聲。 不居於是 爲知矣。 里

處樂。仁者安仁,知者利仁。」子曰:「不仁者不可以久處約,不可以長

所見 視而 淫。 子 斯 存而 則 然未免於利之也。」 以上,去聖人爲不遠,不知此味 安仁則 「仁者心 同,然皆 利 雖 不 利於仁而 仁之人,失其本心,久約 ,猶貪也,蓋深知篤好而 音 Ė, 惟仁者則安其仁而 有卓 則 自 耳聽,手持而 洛。 可,謂、 一,利仁則二。 不亡,非有 非外 無内 有所 越之才,謂之見道不惑則 知,去 不易所守,蓋 物所能奪矣。 之有所得則未可。 外 理 遠 斯 足行 所 近 不 理 精 , 影,未 安仁者 也。 粗 而 無 之間 自 必濫 適不然,知者 必欲得之也 約 雖 ○謝氏 能 知者謂之有 不亂,如 深 窮 非 無 非 ,久樂必 淺 也。 有所 顔 意 困 之 有 日 可, 也 也 存 関 目 所

> 子 其公正 以 惡,天下之同情,然人每失其 無私心,然後好惡當 好、惡,皆去聲。● 日 所繫而 能好惡也。」 是也。 唯仁 不能自克也。 者能 ○游氏 好 〇唯之爲言獨 人,能惡人。」 於理,程 惟仁者無私心,所 日 正者,心 好 子所 善 世 謂 而 惡 有 得

子曰: 舉也 矣。○楊氏曰: 也。其心 惡,如字。 「然而爲惡則無矣。」 「苟志於仁矣,無惡 誠在於仁, 〇 苟,誠也。 「苟志於仁、未必 則 志者,心之所之 必 也。」 無 爲惡 無 之事 调

道得之,不處也。貧與賤,是人之所惡也,子曰:「富與貴,是人之所欲也,不以其

■「皆」,元甲本作「並」。

不 此 得 惡 不去,君子之審富貴 而 其道得之,不去也 去聲。 得之。 〇不以 然於富 貴則 其 道 而 得 不 安貧 處 之, 於於 賤 謂 也 貧 賤 如 當

必於是。」 君子無終食之間違仁,造次必於是,顛 君子去仁,惡乎成名? 仁,而無君子之實矣,何所成其名乎 惡,平聲。○言君子所以爲君子, 仁也。若貪富貴 不厭 貧 賤 ,則是自 ? 離 以 沛 其 其

用 君子爲仁,自 不但 覆流離之際。 之頃。造次,急遽苟且 造,七到反。沛,音貝。〇終食者,一 其 八力也。 食、造次、顛 富貴、貧 然取 賤 富貴、貧賤取舍之間 蓋君子之不去乎仁 取舍之間 舍之分明,然後存養之 沛之頃,無時 之 而 時。 已也。 無 顛 處 以以 沛, 如 〇言 而 此, 飯 至 傾

明矣。 存養之功密,則其取舍之分益

使不仁者加乎其身。 者,無以尚之, 惡不仁者,其爲仁矣,不子曰: 「我未見好仁者、惡不仁者。好仁

也。 其身。 必能 者真知不仁之可 可好,故天下之物 仁者、惡不仁者。 好、惡,皆去聲。● 絶去不 此皆成德之事,故 仁之事 恶,故其 蓋 〇夫 無 一一 好 仁 不 子 加 所以爲仁者 自言 者真 難 使 之。 得 少 有 丽 惡 知 未 仁 見之 及於 見 不 > 好

不足者。 「有能一日用其力於仁矣乎? 我未見力

言好仁、惡不仁者雖不可見,然或有人

而 力 果 而 志之所至,氣必至焉。故仁雖難 有 能 至之亦易也 不 旦奮然用力於仁, 足 者。 蓋 爲仁在 則 己,欲之則是, 我又未見其 能

「蓋有之矣,我未之見也。」

見耳。 肯用 者。 昏 也 見 不 難 蓋,疑詞。● 有之,謂 其 其 可 弱之甚、欲進 蓋人之氣質不同,故疑 至之理。 力於仁也 人焉,此 ,然學者苟 蓋不敢終 夫子 但 丽 用 以 能實 不能者, 所 力 此 爲易,而又歎 有用 而 章言仁之成 以 用其力,則 不至者,今亦 反 覆 力 但我 亦 而 而 容 歎 偶未 人之莫 力 或 借之 亦 有 不 無 此 雖 足

否

可

知

也

知仁矣。」
子曰:「人之過也,各於其黨。觀過,斯

黨,類也。〇程子曰:「人之過也,各

愚按: 薄 於其 故,受污辱之名』,所謂觀 矣。」〇吴氏曰: 氏 而 知其 曰:「於此觀之,則人之仁 類。 君 、厚薄。 此亦但言人雖 君 過於愛,小人過 子 非謂必 常 「後漢吴祐謂『 失 於 後其 厚 有 過 過 有 於 小 知仁 過 猶 忍。」 不仁 常 可 是 掾 加 後賢 即 失 世 以 可 此 知 親 尹 於

子 大矣! 日 其 道 順 皆實理 時 死 者 知道, 荷 之近。 安,無 事 朝 也 物 非 聞 得聞道, 復遺恨矣。 當然之理。 誠 道 八知而 有 ,夕死可 程子曰: 所 得,豈 信 雖 者爲 死 荷 朝 可 得 夕, 以夕 言人 難。 也。」又 聞 所 之, 死 不 以 死 爲 生 甚 則 日 可 亦 0 牛 以 口

「詞」,吴本作「辭」。下同。

九二

乎?

其 心 與 議 程子曰: 識 欲 也 求 趣之卑 ? 道 9 而 陋 以 志於道而 甚 \Box 矣 體 ,何足與議 之奉不 心役乎外,何足 若 於道 人 爲 哉

卒得罪 可也。 老之學所以 不肯 也。 適 道以主之,不幾於猖 丁歷反。 也。 春秋傳》日 莫,不 於聖人也 比,從 自謂 比, 可 也。 也。 心無所住 吾 必 聖人之學不然,於無 誰 狂 二反。 無 自 適從」是也。 口 謝 恣乎? 無 而 氏 ○ 適, 不 能 日 可, 應變 此 荷 專 適, ÷ 而 無

心,果有所倚乎?」

可

無不可之間,有義存

焉。

然則君子之

子 刑,小人懷惠。」 Í. 懷土 善,所以 私之間 懷惠,謂 懷,思念也。 一,謂溺 君子 而已。 爲君 貪 利。 其所處之安。 懷 子。 懷 德 君子、小人趣 德 尹氏曰: 苟安務得,所 小 謂 人 存 懷 懷刑, 其 固 向 樂 有 不 謂 、善惡 以 君 同、公 畏 之 爲 子 法。 懷 1 不

子曰: 怨, 放,上聲。 己,必害於人,故多怨。」 謂多取 放於利 怨。」〇) 孔氏 而 行,多怨。」 日 程子 「放,依 「欲利 世 於

子曰:「能以禮讓爲國乎? 何有? 不

能以禮讓爲國,如禮何?」

於爲國乎? 則其禮文雖具,亦且無如之何矣,而況 則其禮文雖具,亦且無如之何矣,而況 不然,真之實也。何有,言不難也。言

己知,求爲可知也。」 子曰: 「不患無位,患所以立, 不患莫

其在己者而已矣。」可以見知之實。○程子曰:「君子求所以立,謂所以立乎其位者。可知,謂

曰:「唯。」子曰:「參乎! 吾道一以貫之。」曾子

而泛應曲當,用各不同。曾子於其用速而無疑者也。聖人之心,渾然一理,子之名而告之。貫,通也。唯者,應之多,所金反。唯,上聲。○參乎者,呼曾

處,蓋 指,即應之速而無疑也。 得,是以呼而告之。 爾。夫子知其 隨 事精 察而 (真積 力行之,但 子果能默 力久,將 未 契其 有 知 所 其

明之,欲人之易 難言之,故借學者盡己、推己之目以著 法,而亦無待於推矣。 萬物各得其所也。 而泛應曲當,譬則天地之至誠 竭盡而無餘之詞 盡己之謂忠,推己之謂 各得其所者,道之用也,一 道之體也, 殊也。以此觀之,一以貫之之實可見 萬 殊之所以一本也; 曉 也。● 夫子之一理渾然 也。 自此之外,固無餘 曾子有見於此 恕。 蓋至誠無息者, 本之所以 而 無息,而 已矣者, 萬物 萬 而

「詞」,吴本作「辭」。

0

化,各正性命』,恕也。」又曰: 道 道 忠恕 子之告曾子也。《中 爲能達此,孔子所以 天之命,於穆 忠者體, 人各因其才,『吾道一以貫之』,惟曾子 也 義 日 9 遠』,斯乃下學上達之義。」 不遠異者,動以天爾。」又曰: 亦 『夫子之道 通 或 忠者 推己 日 以貫之: 恕者 0 及物, 無妄,恕者所以行乎忠 程子 用,大本達 中心 不 已」,忠也; 恕也,違道 忠恕而已矣」,亦 티 : 爲忠, 忠者天道,恕 庸》所謂『忠恕違 告之也。 「以 道 如 也。 心爲恕。」於 己 不 曾子告門 ·遠是也。 及物,仁 「乾道 聖人 此 者 猶 與 也 道 夫 教 變 維 違 9

子 日 喻 人情之所欲。 ,猶曉也。 「君子喻於義,小 義者,天理之所宜。利者 〇程子曰: 「君子之於 人 喻 於 利

> 故也。 哉 ? 生,所 義者。 義,猶 篤好。」○楊氏 其所 恶 小人之於利 小人反是。」 無甚於死, 利言之,則 喻者義 日: 而 也。 已,不 孰肯 人之所 君 唯 子 其 舍 知 有 深 欲 生 利 舍 喻 之 而 無 牛 爲 取 甚 而 是 義 於 取 利 以

子曰 也。 省,悉井反。 内自省者,恐 不徒羨人而甘自棄,不徒責人而忘自 「見人之善惡 見賢 思 己 不 齊 同 亦 思 焉, 前 有 齊 是惡。 者,冀 無 見 不反諸身者,則 不 己 賢 〇胡氏 亦有 内 是 日 : 自

子曰: 違 一,勞 而 不怨。」 事 父 母 幾 諫 見 志 不 從, 又 敬 不

矣。」

責

此章與《内則》之言相 表裏。 幾 微 也

省

勞而不怨,所謂「與其得罪於鄉黨州 以 微 敢疾怨,起敬起孝」也。 寧熟諫。 諫」也 諫 若不入,起敬起孝,悦 所謂「父母 父母怒不悦 見志不從,又敬 有 過 一,下氣 而 撻之流 則復 不違,所 怡 色, 諫 ÍЦ 也。 間, 謂

子 Ė 問 遠 即 我 「子能以父母之心爲心,則孝矣。」 不敢更適 不 疏,不惟己之思親不置,亦恐親之念 遊 召己則必至 ·忘也。 「父母 則去親遠而爲日久 遊必有方,如已告云之東, 在,不遠遊 西、欲親 而無失也。范氏曰 必知己之所在 遊必有 定省曠而 方。 而 無

喜,一則以懼。」子曰:「父母之年,不可不知也。一則以

能已者。 其壽,又懼其衰,而於愛日之誠,自有不知,猶記憶也。常知父母之年,則既喜

子曰: 言古者,以見今之不然。 言 其 言之如其所行,行之如其 之難也。 言也,不得已而後出之,非言之難,而行 不及言,耻耻之甚。古者所以不出 ,爲此故也。 必不易矣。」 「古者言之不出 人唯其不行也,是以輕言之。 ○范氏曰: ,耻躬之不逮也。」 逮,及也。行 所言 「君子之於 則出 其

之謂約。」〇尹氏曰: 「凡事約則鮮失,鮮,上聲。〇謝氏曰: 「不侈然以自放子曰: 「以約失之者鮮矣。」

非 止 謂儉約 也

子曰 所記也。」 「自吾道一 去聲。 力行 君子欲訥 貫至此十章,疑皆曾子門人 難 謝氏 故欲敏。」 於言 曰:「放言易, 而敏於行。」 胡氏 故欲 日

子 鄰, 日 有德者,必有其類從之,如居之有鄰也。 猶親也。 德不孤,必有鄰。」 德不孤立,必以 類 應。

故

子游日 疏矣。」 0 「事君數,斯 辱矣; 朋友數,斯

數, 也。」〇胡氏曰: 色角反。 則言者輕,聽者厭矣,是以求榮 導友,善不 程子 納, 「事君,諫不行, 則當止。 曰 : 數, 至 於 煩 而 則 煩 當 數 反

> 朋友,皆以義合,故其事同也 辱 求親 而 反 疏 也。」〇)范氏 日 .

> > 君 臣

論 語卷第二

論語卷第二

朱熹集注

公冶長第五

疑多子貢之徒所記云。 理之一端也。凡二十七章。胡氏以爲此篇皆論古今人物賢否得失,蓋格物窮

其罪也。」以其子妻之。 子謂公冶長,「可妻也。雖在縲絏之中,非

夫子稱其可妻,其必有以取之矣。又言也。縲,黑索也。絏,孿也。古者獄中也。縲,黑索也。絏,孿也。古者獄中也。然,黑索也。總,學也。古者獄中妻,去聲。下同。縲,力追反。絏,息列妻,去聲。下同。縲,力追反。絏,息列

已,豈以自外至者爲榮辱哉? 固無害於可妻也。夫有罪無罪,在我其人雖嘗陷於縲絏之中,而非其罪,

而

則

刑戮。」以其兄之子妻之。子謂南容,「邦有道,不廢, 邦無道,免於

及南 南 尤 避 避 妻容,蓋厚於兄 第十一篇。○或曰:「公冶長之賢不 能見用於治朝,免禍於亂世也。事又見 不廢,言必見用也。以其謹於言行,故 括,●字子容,謚敬叔,孟懿子之兄也。 嫌 不當有所避也。 嫌之有? 者 容,故聖人以其子妻長,而以 「此以己之私 孔子弟子,居南宫,名縚,又名 ,皆内不足也。 況嫁女必量其才而求配, 而薄於己也。」〇程子 若孔子之事 心窺聖人也。 聖人自至公,何 ,則其年 兄子

● 「括」,元乙本、司禮監本、吴本作「适

九七

斯焉取斯?」 子謂子賤,「君子哉若人! 魯無君子者,

也。 兄 所 歎 名不齊。 焉 賤蓋能尊賢取 其賢 師 取 ,於虔反。 友,厚之至也。」 以 蘇 成 上斯斯此 而 氏 此 又言若魯無君子,則 曰 : 德 友 〇子賤,孔子弟子 乎? 以 稱 成 人,下斯斯 因 人之善,必本其父 其德者 以 見 魯之多 故 此 , 姓 此 夫 子 賢 既 何 子

子 也 貢 者,有用之成材。 女,音汝。 問 日 0 瑚,音胡。 何器 賜 也 也?」曰 何 夏曰瑚 如? 二子 璉, . 力展 7,商 曰 瑚 反。 璉 璉 也。 周 〇 器

> 此。 貴者歟? 子許子賤 之貴重而 簠 簋 皆宗 然則子貢雖未至於不器,其亦器之 ,故以己爲問,而孔子告之以 華 廟 美者 盛 黍稷 也。 之器 子貢見孔 而 飾 以 子 玉, 以君

子曰: 或曰 雍, 也。 賢,故美其優於德,而 : 不知其仁,焉用佞?」 孔子弟子,姓 仲弓爲人重厚簡 「焉 雍也仁而不佞。」 用 佞? 冉 禦人以 病其 默 字仲弓。 ,而時人以 短於 П 給 佞, 才也 屢 憎 佞 \square 於 才

焉, 佞人所以應答人者,但以 實,徒多爲人所憎惡爾 於虔反。 也。 惡 禦,當 也。 也,猶 言 我 П 何 雖 取 用 未 辦 應 知仲 佞 m 乎? 無情 也

● 「辦」,殘宋本、吴本作「辨」。下同。

足以 古 病 三月之後,況 日 不 . 仲 也 得 當之。 弓之賢 「仁道 然其 而 再 言焉 輕許之也 不 如顔子亞 至大,非 而 仲弓雖賢,未及顔 佞 用 夫 乃 佞 子 所 全體 不 所 聖 以 以 許 爲 猶 深曉之。 其 而 賢 不 不息者, 能無違 不 子 何 足 」,聖人 也 以 於 不 ? 或 爲

信。」子説。 子使漆雕開仕。對曰:「吾斯之未能

此。一〇 之。」又曰 程 此 説 此,未可 子曰 人使之仕 音悦。 加 無 謝 以 毫 古古 氏 治 此 髪 一、必其 漆 日 人,故 理 之 漆 雕 0 而 人 開 疑 雕 材 言。 見道分明,故 已見大意 也 開 開 大子悦 口 9 之學 以 信 孔 開 公仕矣。 子 自 無 謂 其 弟 言 真 可 故 篤 子 以其言 未 考。 夫子 知 至於 志 其 能 字 説 如 如 如

> 可 以 此 術 量乎? 聖人 仕 之微 而 所不 其器 則 夫子所以説之也。」 能 不 毫 知 安於 不 自 而 小 開 得 不 成 自 他 知之。 ·害其 日 所就 爲未 其材 信 其 可

其 子 好 日 勇過 由 與? 我, 道不行, 無所取 子路 聞 材。 之喜。 乘 桴浮 於 子 海 日 . 從 我 由 也

設 也。 事 與己,故 程 材 桴 子曰: ,與裁 之言耳。 音爭。 理,以適於義也。」 子路勇於義 夫子美其 同,古字借 從、好, 「浮海 子路 之歎 以 故 勇 爲 用 並 謂 實 ,傷天下之無賢 去 而 其 然,而喜 聲。 譏 〇 桴,筏 能 其 從己,皆 與, 不 能 夫 也 平 子 裁 假 君 度

也。」 「子路仁乎?」子曰:「不知

九九

不能必其有無,故以不知告之。子路之於仁,蓋日月至焉者,或在或亡,

其賦也,不知其仁也。」 又問。子曰:「由也,千乘之國,可使治

則不能知也。○賦,兵也。古者以田賦出乘,去聲。○賦,兵也。古者以田賦出乘,去聲。○賦,兵也。古者以田賦出

長、家臣之通號。 千室,大邑。百乘,卿大夫之家。宰,邑百乘之家,可使爲之宰也,不知其仁也。」

朝,音潮。○赤,孔子弟子,姓公西,字朝,可使與賓客言也,不知其仁也。」朝,可使與賓客言也,不知其仁也。」

子謂子貢曰:「女與回也孰愈?」

對 賜賜 貢推測 也。 日 女,音汝。 ,數之始。 也聞 顏子明睿所照,即 賜 而 知 以 也 下同 因 知二。」 何 十,數之終。 敢 此 望 而 口 愈 識 彼。 勝 始 П 也 二者,一之對 「無所不悦 而 也 見終; 聞 以 知

子 Ĕ 其 子既語 與,許也。 告往知來」,是其驗矣。 道 然之,又重許之。 以其自知之明,而 資,學而 生 回,見其 介自知 知之 ,不特聞一知二而已也。」 之 弗 以 亞 知之之才也。子貢平日以 不 如何。 如 不暇, 也。 可 〇 胡 也 企及,故喻 闡 氏曰 又問 此 吾與女弗如 聞一知十、上知之資 一知二,中 又不 其 . 其 所以終聞性 難於 與回 「子貢方人,夫 之如 自屈 孰 人以 也 此 愈,以觀 上之 夫子 與

之牆不可杇也,於予與何誅?」宰予晝寢。子曰:「朽木不可雕也,糞土

不 教 雕 同。 刻畫 足責,乃所以 無 許久反。 杇, 音汙。 所 施 晝 也。 也。 寝, 杇,鏝也。 謂 與,語辭。 深責之。 當書 而 言其 寐。 與, 誅, 責 志氣昏 朽, 平. 也。 也。

是。」 今吾於人也,聽其言而觀其行。於予與改今吾於人也,聽其言而信其行;

然,則非 也。 夫子責之。」〇胡氏 不及也。 子之於學,惟日孜孜 子自言於予之事 帥 ()胡 ,居然而倦。 一日之言 宰予晝寢,自 氏 티 : 宰予 而 也。」〇范氏曰: 能言 三子 改此 %斃而 딛: 是宴安之氣勝 ・日」疑 棄 而 失,亦以重警之 「宰予不能 孰甚焉? 後已,惟恐其 行 不 衍 逮 文,不 故

> 耳。 後能 荒 教,以警羣 深責宰予 戒之志 寧 爲 亦非緣此而盡疑學者。 懼 惰 也。 也。 弟子 勵不息 聽言觀 古之聖 使謹 自强 行,聖人 於言 未 此 嘗 而 孔 特 不 不 大 子 於 所 此 是 懈 7 而 以

根。二 子 焉,於虔反。 日 物之下。 物之上; 欲 剛 得爲剛矣。 夫子之未見也。 子姓名。 所難能者,故夫子 剛則不 子曰 IE 相反。 吾未見 欲,多嗜 自古 「帳也 屈於欲。」〇謝氏 爲物掩 能勝物之謂 〇程 有志 剛,堅强不 根之欲不 剛 欲 子 之謂 欲 歎 者。」 者 也。 其 得 少,無志者 欲,故常 未 剛 或 岡川 「人有 多嗜欲 故故 見 屈之意,最 可知,其爲 ? 對 三剛 日 常 申 . 欲 屈 伸 多 則 則 於 於 無 不 與 萬 申 萬

岡川 得 非 ,然不知此其所以爲欲爾。」 | | | | | | 悻 自 好 者乎? 故 或者 疑 以 爲

子貢 無 諸 加諸 之謂,此所以爲仁、恕之别。

 □

 :

 所及矣。」愚謂無者自然而 人,恕也。 强 欲 子貢言我所 人,仁也。 ,故夫子以爲非子 以此加之於人。 日 : 人。」子曰: 「我不欲人之加諸 「我 恕則子貢或能勉之,仁則 不 不欲人之加諸我也,吾 施諸己而不願,亦 欲 賜也,非 加於我之事,我 此仁者之事,不待勉 貢 我,吾、 所 然,勿者禁止 及。 :爾所 亦 及也。」 勿 欲 施 程 亦不 亦欲 無 非 於 加

子貢 夫子之言性與天道,不可 也。 文章,德之見乎外者,威儀、文 曰 : 性者,人所受之天理; 「夫子之文章,可得 得 而 聞 天道者,天 也。」 而 辭皆是 聞 也

> 子貢聞夫子之至論而歎美之言也。」 得聞之,而歎其美也。 得聞者。 性與天道,則夫子罕言之,而學者 文章,日見乎外,固學者所共聞; 理自然之本體,其實一 蓋聖門教不躐等,子貢至是始 〇程子曰: 理 也。 言夫子之 有 至於 一此

子路. 行 若子路,可謂能用其勇矣。」 前 勇於必行,門人自以爲弗及也,故著之。 之不給也。 所聞 有聞,未之能行,唯 者,既 未及行,故恐復有 〇范氏 曰: 「子路聞善 所聞 而

恐有聞

子曰: 子貢問 「文」也。」 日 敏 「孔文子何 而 好學,不耻下問,是以謂之 以謂之『文』也?」

好,去聲。〇孔文子,衛大夫,名圉。凡 人性敏者多不好學,位高者多耻下問

其爲人. 其妻而 也。 亦足以 疑而 而行。 怒,將攻之。 亦 人所難 問 法》有 如此 蘇 妻之。 也。 爲『文』矣,非經天緯地之『文』 疾奔宋,文子使疾弟遺室孔姞。 氏 也 而謚曰『文』,此子貢之所以 以 孔子不没其 日 訪於仲尼,仲尼不對,命駕 孔圉 0 「勤 疾通 「孔文子使太叔 學 得謚爲「文」,以此 於初妻之娣, 好 問」爲「文」者 善言能如此, 文子 疾 而

恭 子謂子 産、「有君子之道 也敬,其養民 四四 也惠, 其 其行 使民 Ē 也 世

謹恪 子産,鄭大夫公孫 有章、上下有 也。 〇吴氏曰: 惠, 服 愛 利 田 僑。 也。 數其 有 封 恭, 使 事 洫 民 謙 廬 而責之者, 義 遜 井 也。 有伍 如 都 敬 鄙 其 之

節、

畫藻於棁

也。

當時

以

文仲爲

知

子言其不

務民

義,

而

諂

瀆

鬼

神

如

此

得

爲知?

《春秋傳》所

謂

作

虚器」,即

所善者 也,子産有君子之道 三是也。 言蓋一人,一事蓋一時,皆非也。」 多 數其 也,臧 事 文 而 仲不仁者 稱 四焉 之者 是 ·,猶有 也。 不 所 今或 知者 未 至

子曰: 晏平仲,齊 人交久則敬衰,久而能敬,所以爲善。」 「晏平仲善與人交,久而敬之。 大夫, 名嬰。 程 子曰 0

子曰: 知也?」 棁,章悦反。 梁上短柱 也。節,柱 夫臧孫氏,名 臧文仲居蔡, 也。 頭斗栱 辰。 知,去聲。〇 蓋爲藏 居, 也。 猶藏 Ш 龜 藻, 「節藻 之室 水草名。 也 臧文仲, 一,而刻 棁, 何 魯大 Ш 如 其 於

龜之室 此 事 也 祀爰 張 居之義,同 子 日 0 Ш 歸 節 於 藻 不 棁 知 爲 藏 宜

子張 告新令尹。 仁矣乎?」曰: 令尹 張疑 菟。 私 有其 知,如字。焉, 也 也 問 三已之,無愠 者,未知其 卿 日 ,是以夫子但許 其 或 其爲人也,喜怒不形,物我無間, . 執 而 何如 政者 不 令尹 然 知 ? 子曰: 其 於虔反。〇令尹,官名 有 也。子文,姓鬬,名榖於 「未知,焉得仁?」 皆出於天理而 子文三仕爲令尹 色。 其 所以三仕 身,其忠盛 其 舊令尹之政,必 忠 「忠矣。」 三巳 而 未 無 矣,故子 許 而告 1 欲 E 無喜 其 之 新 以 知

之。 崔子弑齊 至於 他 君, 邦 陳文子 則 日 有 「猶 馬 吾大 乘, 夫崔 棄 而 子 違

> 崔 也 子也。」違之。 也 抑 見 子 須 君 高 矣。」今以是而觀二子之事 苟 也 加 違之。 義 無。 宜 難 真 若 潔身去亂, ,莊公,名光。 愚聞之師 不 「仁矣乎?」曰 去聲。 無私 故孔 得已於利害之私,而 哉。 ,遂以小者信其大者,夫子 不 理 十乘, 可 之 之 及,然皆未有以見其 心也。子張 當然 讀者於此, 子 **E** 特 〇崔子,齊大夫,名杼。 可 四十匹也。 邦, 何 許 謂清矣。 而能 陳文子,亦齊大夫,名 如?」子 : 其清, 則 「當理而 「未知,焉得仁? 又 更以 未 脱然無所累乎 日 識 猶 Ė 然未知其心 丽 違,去也。 上章 無 . 雖 未 不 私 必 猶 其 免於怨悔 許 心 清矣。 吾 當 制 而 其 則 大 悦 於 行 夫 ? 果 許 於 理

所謀者無非僭王猾夏之事。文子之仕 齊,既失正 口 齊之事觀之,則彼 反於齊焉,則其不仁亦可見矣。 識矣。 仁則 今以它書考之,子文之相 君 討 吾 賊之義,又不數歲 不 此 知之語 交盡 ,而仁之爲義 并與 而 復 夷

斯可矣。」 季文子三思而後行。子聞之,曰:「再,

舉矣。 季文子 子曰: 則 禮 每 起 三,去聲。〇季文子,魯大夫,名行父。 之使 爲善矣。 以 事必三思而後行,若使晉 而 行, 反 冷齊 而 慮 惑 「爲惡之人 亦其 宣 而 事 矣,故夫子 然至於再 納賂 公篡 如 一事也。 此 可 焉,豈非 立,文子 (未嘗知 謂 則 譏 斯,語 詳 已審 之。二〇 乃不能 程子所謂 審 而 而 一三則 有 詞 求遭 思 宜 愚 討 喪之 私 有 無 按 反 私 思 程 调 意

者

比干是也。」

理 意 而 起 貴果斷 而 反 惑」之驗 不徒多思之爲尚 與 ? 是 以 君 子 務 窮

愚。 子曰 武子周 時。 凡其所 晦 者,而能 知之可及也。 《春秋傳》,武子仕衛,當文公、成公之 知,去聲。 其知可 :「甯武子,邦 以免患,故曰不可及也。 可及也。 文公有道,而武子無事 處 旋 卒保其身以濟 及也,其愚不可及 ,皆智巧之士所 其 ○ 甯武子,衛大夫,名俞。 (間,盡 成公無道,至 程 子曰 有道 心 . 竭力,不 則知, 其 「邦無道 深避 君 也 亦有不當愚 於 ,此其愚之 可見,此其 邦 而 避 失 無 不肯爲 一,能沈 或 艱 道 險。 按 則

子狂簡,斐然成章,不知所以裁之。」子在陳,曰:「歸與! 歸與! 吾黨之小

遠 得 是始欲成就後學,以傳道於來世。 其道於天下,至是 也。 方 與 正 指門人之在魯者。 可 中行之士而思其次,以爲狂士志意 觀 道 平. 而 者。裁,割正 斐,文貌。成章,言其文理 或陷 或可與進於道也。 不行而思歸之歎 聲。 於異端耳,故欲歸 斐, 音 匪 而知其終不用也 也。夫子 狂 簡,志大而略 也。 此 但恐其過中失 孔 初 而 吾黨小子 子 裁之也 成就,有 心,欲行 周 又不 於事 流 高 於 几

諸

伯夷、 所惡之人,能改即止,故人亦不甚 焉。」其介如 人立,其冠 不立於惡人之朝 叔 齊,孤竹君之二子。 不正 此,宜若無所容矣; ,望望然去之,若 ,不與惡人言」,「 孟 子 將 怨 與 稱 然 其 浼 鄉 其

> 子 $\dot{\Box}$ 之? 也 量。」又曰: 程子 孰謂微 日 「二子之心,非夫子孰能 生高 不念舊惡, 直? 或乞醯 此 清 焉,乞 者 知 之

其鄰 微 謂 大。」〇范 譏 無 有 醯 介之取予,而 有 程子曰: 直名者。 呼 事 有 其曲意徇物,掠美市恩,不得爲 無謂 斷之,所以教人不可不謹也。」 故乞諸鄰 而與之。」 西反。(氏 無 醯,醋 曰: 「是曰 千駟 微生高所枉雖 曰直。 微 家 萬 生姓 以與之。夫子言此 也。人來乞時,其家 鍾 聖人觀人於其一 從 高名, 是,非 可 知 小 焉。 日 害直爲 魯人,素 非,有 直也 故

丘亦耻之。匿怨而友其人,左丘明耻之,子曰:「巧言、令色、足恭,左丘明耻之,

丘亦耻之。」

使察乎此而立心以直也。」 之,蓋竊比老彭之意。又以 耻之,其所養可知矣。 足,將樹 左 二者之可耻,有甚於穿窬 丘 明, 反。 古 之聞 ○足,過 人也。」 夫子自言丘 也 也。 深戒學者 謝 程 左 氏 子 一亦耻 丘 明

子路曰: 顔 淵、 盍,音合。 季路侍。子曰: 「願車馬、 ○盍 一,何不 衣輕裘, 也 盍 各言爾 與 朋友共, 志? 敝

敝,壞也。憾,恨也。 衣,去聲。○衣,服之也。裘,皮服之而無憾。」

也。或曰:「勞,勞事也。勞事非己所意。勞,謂有功,《易》曰「勞而不伐」是伐,誇也。善,謂有能。施,亦張大之顏淵曰:「願無伐善,無施勞。」

安之,朋友信之,少者懷之。」子路曰:「願聞子之志。」子曰:「老

施勞。 夫羈 也。 路求仁。」又曰: 「子路、顔淵、孔子之 程子曰: 之,信我也; 之以恩。 萬 以勢利拘之哉? 又曰:「子路勇於義者,觀其志,豈 志,皆與物共者也,但有小大之差爾。」 老者養之以安,朋友與之以信,少者 不自私己 物 之化 在 而 至 乎 以 於 己 其志可謂大矣,然未免出於有],故無 一説: 御馬 夫子 不勞焉,此聖人之所爲也。 「夫子安仁,顏淵不違仁,子 亦猶 , 懷之,懷我也。 而 而 伐善,知同 是也。 不 則如天地之化工, 不 亞於浴沂者也。 知羈 以 安之,安我 制 先觀二子之言 勒之生由 牛, 人皆知羈 於人,故 亦通。 也; 於馬。 付 顔 與 無 可 意

一 〇 八

後 論 觀 語 聖 非 之言 但欲理 分 會文字,須 明 天 地 氣 要識 象 凡 得 聖 看

矣。 鮮。 已矣乎者, 者深矣。 能自知者鮮矣,知 自訟者,口不言 夫子自恐終不得見 能内自訟,則 恐其 而 終 其 過 心 不 悔 而 自 得 悟 咎 能 見 而歎之,其警學 深 内自 也 而 切 0 歎 而 訟 之 有 能 者 也 改 爲 過 必 尤 而 内

不如丘之好學也。」子曰:「十室之邑,必有忠信如丘者焉,

夫子生知,而未嘗不好學,故言此以勉小邑也。忠信如聖人,生質之美者也。焉,如字,屬上句。好,去聲。○十室,

人。 可 口 以 不勉哉 言美質易 爲 聖 人,不學則 得, 至 道 不 免爲 難 聞 學之至 鄉人而已。 則

雍也第六

與前篇同。 與前篇同。

意

子 日 南 重,有人君之度也。 0 面 者 雍 ,人君聽治之位。 也 可 使 南 面。 言仲弓 寬洪

簡

仲弓問子桑伯子。子曰: 子桑伯子,魯人,胡 面 稱子桑户 盡之辭 故問伯子如 者是也。 簡者,不煩之謂 何。 仲弓以 氏 可者, 以 可可 爲 夫子 僅 疑 也 即 可 簡 許 莊 而 周 有 南 所 所

仲

弓

日

居敬

而

行簡

以

臨

其民,不

亦

口 乎 則 人道於牛馬。 語》記伯子不 不失之大簡 而 自治嚴,如 大,音泰。 疑夫子之過許與? ? 中無主而 民 不擾,所 居 簡 是 而行簡 ,而無法度之可守 自治疏矣,而 。然則伯子蓋大簡者,而仲 衣冠 言 以 而 爲 行 自 簡 處 而 可。 無 以 以 乃 處,夫子譏其欲 若先 敬 臨 大簡乎?」 民,則 所 則 自 行又簡 乎? 中有 處 事 以 不 主 \wedge 簡 家 煩 同 而

子 仲 曰: 理,有默契焉者,故夫子然之。 善,故夫子云可 心 疏 中 略 簡 弓蓋未喻夫子可字之意, 無物。故 「子桑伯子之簡, 「雍之言然。」 可 則爲 謂 要直 得其旨矣。」又曰: 所 也。 行 自簡 内存乎 仲 弓因言 雖可 簡 居簡 加 而 取 内 其 簡 則先 而 居 È 所 程 敬 於 未 言 則 盡 有 敬 則 爲

哀公問 命死矣! 有顔回者好學,不遷怒 此,可 與焉 好,去聲。 之而 得也。〇程子曰: 學者,蓋深惜之,又以見真好學者 未嘗復行,不貳過也。」又曰: 在己,故不遷。 二而卒也。既云今也則亡,又言未聞 前者,不復於後。 貳,復也。 則 若舜之誅 ? 已,何遷之有?」又曰 謂真好學矣。 理之當喜怒者也,不在 今也則亡,未聞好學者也 如鑑之照物, 「弟子孰爲 亡,與 怒於甲者,不移於乙; 四 有不善,未嘗不知,知 [X] 顔子克己之功至 無 好學?」 也,可怒在 短命者,顔 同。 妍媸 顔子之怒,在 不貳 〇 遷, 在 . 過。 孔子對 彼 血 如如 彼 「喜怒在 子三十 不幸 移 之難 顔 物 己 則 物 於 過於 日 > 如 何 好 短 不

矣,外 奈何 子非 萌 焉。 情 性 者爲人。 於再。」或 道 必 地 . 作。」〇張 先 既 情 具焉,曰仁、義、禮、智、信。 位 也。 怒 使合於 熾 ? 日 不習 出 顔子 若 明 學 物觸其形 贵 貳過者,則 才差失 然其 顔 諸 而 焉 有 其本也真 日 : 之所 中,正 益 以 而 子之非 心 曰 子 未 至乎聖人 通 蕩 知知 善? 喜、怒、哀、懼、愛、惡 便能 「天地 也 日 ,其性鑿矣。故覺者約 好,果何學歟 「《詩》、《書》、六藝, 至於聖人者,守之也 而動於中 其 所 . 禮 其 而夫子獨稱顏子 心 往 知 而 所 勿 好 八之道 ,然後力行 ,養其性 儲精,得 静。 慊於己者,不 之,才知之便 謂 視 之 不 篤 矣。 、聽、言 其 善 也。」「學 而學之得其 ? (未發) 其中 五 只 而 行 形 已。 以求 是 也,五 ,之道 既 之 程 使 爲 動 七 更 微 牛 秀 子 前 其 好 至 而 有

> 學者 化 之學矣。」 乃 之 不 謂 也 過 聖 記 假 本 誦 之 牛 以 文辭之間 知 年, 非學可 則 不 其亦 日 至, 而 異 而 化 乎 所 矣 以 顔 爲 子 今

子華使於 之粟五 與之釜。」請 秉。 齊, 益 冉 子爲 0 其 母 與 請 之庾。」 粟。 一冉子 子 與

使,爲孔子 爲,並 ,使也。 去 聲。 釜,六斗四升。 子華, 公西 庾,十 赤 也

子曰 吾聞之也,君子問急不繼富 「赤之適齊也 乘 肥 馬, 衣 輕 裘

六斗。

秉,十

六斛

續有餘 也。 衣 去聲。 急, 窮 迫 也。 乘 肥馬, 周者,補不足。 衣輕裘,言其富

原 思爲之宰, 與之粟九百

原

思,孔子弟子,名憲。

孔子

爲

司

寇

0

言其量,不可考。時,以思爲宰。粟,宰之禄也。九百,不

子曰 非之。 其 求未 請 直拒 毋,禁止辭。 見 夫 鄰里鄉 萬二千五百家爲鄉 禄不當辭,有餘自可推之以 益 多 子之使子華,子華之爲夫子使, 請 達 人之用財 義 ,故又教以分諸 而冉子 人,故與之少,所以示不當與也。 一毋 而 矣。 也 而 蓋 黨有相 與 赤 自 之亦少,所以示 乃爲之請。 原 與與 荷 五家 以與爾鄰里鄉黨乎 矣。」)張子 思爲宰 八之多 至 周 乏 爲 之義。 ,五百家爲黨。 日 列則 鄰 則 鄰 0 ,則有常禄。 ,二十五家爲里, 夫子 E 聖人寬容,不欲 里之貧者,蓋 「於斯二者, 過 矣,故 周貧乏, 必自周之, 不當益 程 . 子 曰 言常 思 也。 辭 亦 口

> 子 勿 謂 用 仲弓, <u>ц</u> 川其舍諸 日 . 「犂牛之子 ? 騂 且 角, 雖 欲

犂,雜 神必 也。 仲弓云爾,非與仲弓言也。 如仲弓之賢,自當見用於世 以此譬之。言父之惡不 犂,利之反。騂,息誉 之過,變惡以爲美,則可謂孝矣。」 古之聖賢 以瞽瞍爲父而 不舍也。 角 Ш 文。 JIĮ, 角周 不係於世 , 山 騂, 正,中]]] 仲弓父賤 赤色。 有舜, 之神也。 ·犧牲· 類 以鯀爲父而有禹 反。 ,尚矣。 周 能 也。 而 人尚 言人雖 行惡,故夫子 廢其子之善 也。 用,用以)范 子能改父 上聲。 赤, 氏 然此論 不 牲 日 用, 祭 . 用

日月至焉而已矣。」 子曰:「回也,其心三月不違仁,其餘則

仁者, 三月,言其久。 ,或日一至焉,或月一至焉,能 私 欲 而 仁者, 有 其 德 也 之 日 月 1 造 其 至 不 違 域

我 使 便 月 斷矣。」張子 加 八,未達 是 變 違 心意勉勉 不 之 違』與『日 不仁。」〇 能 節 久 巾 間 是 循 日 者 無 其 循 0 尹 月 也,若聖 纖 久 「始學之要,當 程 而 氏 至 毫 也 不能 子 焉 日 私 日 0 過 已 内 欲 . 一此 此 過 外賓主之辨。 則 則 少 此 顔 渾 有 聖人矣。 月 幾非 然 子 知三 私 於 天道 無 欲 聖 在 間

從政 與?」曰 季 賜 0 康 與 曰 也 乎 子 可 達,通 問 何 由 伸 季康 有? 0 也 從 求也 果, ○從政,謂 政 事 子問 仲 也 理 日 於 藝,於從政 由 與 0 三子之才可以 從 ? 藝,多 口 「求也 政 使 日 爲 乎 從 大夫。 才 乎何 何 政 可 能 賜 有 也 使 ? 果,有决 有 從政 與 也 從 ? ? 達,於 政 程 日 乎 子 子 也

> 所 夫 長 子 答 能 以 取其 各 有 長,皆 所 長 可 非 用 惟 也 子 有

矣。」 爲 季 氏 我 使関 爵辛 焉 子 0 騫 如 爲 有 費 復 幸。 我 者 関 則 子 騫 必 H 在 0 汶 H 善

騫,孔 哉 聖人爲之依 不仕 當去之齊。 氏,令使者善 分,皆可以 已。」〇謝 名,在 音 ? 不啻 ()在聖人 大夫之家 子 秘 在聖人則 齊 0 弟 犬彘。 氏曰: 樂道 南 子 爲,去聲。 歸,彼 魯北 則 爲己辭,言若 ,名損。 程 者,閔 有 而 口 子 又從 不 志 竟 「學者能 其 然者 人之勢。 上。閔子不 汶, 自 視 費,季 而 子、曾 聖人以 季氏 臣 「仲尼之門, 蓋 音 再 小 之, 問 氏 來 居 不 子 況閔 知 召我, 下 亂 邑。 贵 數 一欲臣 義 内 其 之 外 剛 子 関 汶 季 子 得 之 而 能 則

子其賢 先見之知,又無克亂之才故也。 爲 而 必 季 豫 取 氏 待 禍 乎! 附益 之乎? 柔 則 夫 必 取 贵 如 辱。 由 其 本心 也 閔子 不 得 哉 豊 其 不能 死 然則閔 蓋 既 求 早 無 也 見

也而有斯疾也!」
之,命矣夫! 斯人也而有斯疾也! 斯人伯牛有疾,子問之,自牖執其手,曰: 「亡

之,是乃天之所命 天 此 牖 베 命 自 禮 一,病者居 F 而 ,音扶。○ 牖 尊孔子, ,使君得 有疾,先儒以爲 有以致之,亦可見矣。 執其 言此 北 (手,蓋 人不應 孔子不 以 伯 牖 南 牛, 下。 也 面 與 有此 敢當, 孔子弟子 視 癩 一之永 君視之, 然則 己。 也 疾, 訣 故 時伯牛 非 牖 也。 不入其室, 則遷 而 其 侯 9 姓 南 氏 今乃有 不 冉, 命, 牖 家 於 能 日 南 謹 謂 以

> 也 伯 孔 4 子尤痛惜之。」 以 德 行 稱 亞 於 顔 関 故 其 將

> > 死

哉 子 在 。 回 陋 日 巷。 也也 _! 賢 不堪其 哉 回 也 憂 1 口 也不 簞 食,一 改 其 瓢 飲

爾。 之泰 飯也。 之樂,非 不 處,所樂何 而 回也」以深 昔受學於周 敢妄爲之説。 而 不發,蓋欲學者深思 然, 『其』字當玩 改其 嗣。 瓢, 簞 不以害其樂,故夫子 樂 、所樂也 瓢 歎 館 事 瓠 樂, 陋 美之。 茂 剽 也 音洛。 巷 叔,每令尋仲尼、 陋 味,自有深 學者但 非 ,故夫子 顏子之貧 巷也,不 按: 可 〇程子 樂, 而 一當從 簞 自得之。 程子之言, 稱其 蓋 以 E 意。 如 再 竹 自 貧 事 言 此, 器 賢。」 於 有 又 窶 顔 其 賢 博 今亦 子 H 顔 而 樂 樂 又 其 處

約 則 庶 禮 乎 之 有 誨 以 以 得 之矣。 至 於欲 罷 不 能 而 竭 其 才,

日 冉 哉 ? 言。 説 求 之所以局於藝也 子 稱顔 不能。 ,音悦。女,音汝。 日 「力不足者,中道 如畫 則必 然使求 0 畫 口 將 地以 而 非不 不 畫者,能進 不 盡 説夫子之道,誠 改其樂,冉 進, 自 力 説子之道,力不足也 [限也。 以 則日 求之, 而廢。 退 而 〇力不足者, 〇胡氏 求聞 不欲。 而已矣, 何 今女畫 患力之 如 之,故 E 謂 之説 此 0 不 有 之 欲 足 進 子 是 求 芻 夫

子

游

爲

武

城

宰。

子

女

得

人

焉

爾

儒。」 「女爲君子儒,無爲小人子謂子夏曰:「女爲君子儒,無爲小人

己,小人儒爲人。」○謝氏曰:「君子、儒,學者之稱。○程子曰:「君子儒爲

學 自 者 小人之分, 子語之以此。」 雖 便,凡可 ,豈必殖 有 餘 ,然意其 以害 義 貨 財 與 之 利 天 之間 理 謂 遠 者 ? 者大者或昧焉, 皆利 而 以 私 也。 滅 子夏 所 適 謂 文 利

乎?」曰 公事 邑。 IE 爲 由 小 可 女,音汝。 ,未嘗至於偃之室也。 問。 知。 大之情可見矣。 徑 而 而無枉己徇人之私可 捷者。 澹臺姓,滅明 爲 則 非 如 「有澹 動 公事 政以人才爲 滅 必 澹, 公事 明 以正 者 不見 徒甘 臺 滅 如 名,字子羽。 前 觀 後世 %明者 邑宰, 飲射讀 反。 其二 先,故孔子以 無見 有 見矣。 事 不由 小小欲 則 法之類。 一之小 武 不 其 徑,路 城, 由 徑者 有 速 徑 之 以 楊 意 非 自 氏

非 必 以子游爲法,則無邪媚之惑。 身 孔 以 以 氏 爲 之徒 滅 迁 明 爲 其孰 不 法, 至 則 能 其 無 知 室 荷 而 人 取 賤之羞 必 之?」愚謂 以 爲 簡 取

其 子 (馬,日 殿。 知學者欲上人之心無 也。」伐,誇 胡 日 可可 奔而殿, 氏 可 一人之心,則人欲日消,天理日明,而 十一年。 以矜己夸人者,皆無足道矣。 策,鞭 티 : 以爲法矣。」 「孟之反不伐,奔而殿,將入門, 『非敢後也 故以此言自掩其 功也。 也。 「反即 孟之反 ○謝氏 戰 莊周 敗 奔,敗走 ,馬不進也。」」 ,魯大夫,名側。 時 而 所 티 : 還, 而 稱孟 忘也,若孟之 (功也。 也。 「人能 以 子反者是 後 軍 操 事在 後 無 策

難乎免於今之世矣!」子曰:「不有祝鮀之佞,而有宋朝之美,

之也。○祝,宗廟之官。鮀,衛大蛇,徒河反。○祝,宗廟之官。鮀,衛大

道

耶? 人,人自遠爾。」 知出必由户,而 言人不能 怪而 出 歎之之 不 由 不 辭。 户 知行必 何 故 洪 由 乃 道。 氏 不 日 由 非 0 道 此 遠 道

野,野 習事,而 人,言鄙略 誠 或不 足也。 也。 史, 彬彬,猶 掌 文 書 班 班 聞 物

野。」 楊氏 也。 有 勝文,猶言 不 相 足,至 文,將安施 雜

 □

 文勝而 而 適 於成德, 均之貌。 「文質 甘可以受和,●白可以受采 至 乎? 於滅質, 不 則 言學者當 可 然則 不 以 期 則其 然 相 與其 勝。 而 本亡矣。 損 然矣。 (史也 有餘 然質 之 雖 寧 補

子 日 程 亦生者,幸而免爾。」 子 日 「人之生也直, 罔之生也幸而 :「生理本直。 罔,不直 也, 免。」 而

以

子曰 知之者不如好之者,好之者不 如

好, 夫曰 也。 之者,知有此 去聲。 樂之者,有所得 「譬之五 樂,音洛。 道也。好之者 穀,知者知 而樂之也。」〇 〇尹氏 其 好 日 可 而 食 張 未 敬 得 知

> 好之而 者也。 也 古之學者所以自强而 一, 好 者食而嗜之者 未 知 而 及於樂,則是好之未至 不能 好, 則是知之未 也 不息者與? 樂者 嗜之 也 至 也 而 此 9 飽

子曰 下,不可以語上 施教 其言易入而無躐等之弊也。 也 於下而已矣。 將妄意躐等, 之質,驟 日 . 上之上,上聲。語,去聲。〇 「中人以上, 言教人者當隨其高下而告語之, 使之切問 「聖人之道,精粗雖無二致,但 則必因 而 語 其材一 而有 之太高,非惟不能以 故就其所及而語之,是乃 近 也。 思 而篤焉。 叮 不切於身之弊,亦 一而漸 以 語 進於高遠 E 蓋中人 也 ○張 人, 以以 敬 中 其 則 人 終 下 夫

⁰ 言。 殘 宋 本、 元甲 本、 元乙 本、 司 禮 監本、 吴 本 作

遠之, 加 遲 獲, 問 知。 謂 可謂仁矣。」 知矣。」問仁。 子曰 務民之義 仁者先 敬 鬼 神 難 而

敬。 難 難,克己也。 此 所 鬼神之不 得 知 必因 也。 遠, 9 難 也。」吕氏 多信鬼神, 能敬能遠, 知力行所知 而後其效之所得,仁者之心 專用力於人道之所宜 樊遲之失而告之。 皆去聲。○民, 可知,知者之事也。 以以 日 惑也。 可謂 所難爲 ,不憚所難爲。」 當 知 先,而 而不信者又不能 矣。」又曰: 務爲急,不求 亦人 〇程子曰 也。 不計所獲, ,而不惑於 先其事之 獲, 所 謂

知,去聲。樂,上二字並五教反,下一字仁者静,知者樂,仁者壽。」 知者樂,仁者壽。」 知者動,

故樂 動 於 周 静 義 流 洛 以體 理 無 静而 智之深者,不能如此形容之。」 而 滯 言,樂壽以效言 厚重不遷,有似 有常故壽 有似 喜 好 於 也。 水 故 知者 〇程子曰 樂 也 於 水。 Ш 達 於 動 故樂山 而 事 者安 不括 理 非 而

政之餘 道。」孔 矣,故 也, 惡,故其變而之道有難易。 道 子 「夫子之 王之遺風 日 爲從 則先王之道也。言二國 0 變則至於先王之道也。」愚 魯 習。 子之時,齊俗急功利, 齊一 變乃 簡 時,齊 猶 焉 魯則重禮教,崇信義,猶 尚功之治,太公之 存周 ,但人亡政息,不能 能 變, 强魯弱 至魯。 公之法 至於 魯 魯則 孰不 制 魯 之 喜夸詐, 以 修 遺 齊 無 政 爲 由 程 舉 法 變, 廢墜 俗 威 齊 廢 戀 易 勝 公之 日 有 國之 墜 有 至 爾。 魯 美 先 霸 於 杰 0

八

以 俗 惟 考之,則其施 夫子 爲 能 爲緩急之序,亦略 變之而 不 得 試 可 然 因 見 其言

子 君; 則 范氏曰: 得 時 不皆然。 制 木簡,皆器之有棱者也。 失其 不 爲 ,音孤。 國矣。」 觚 臣 非 制 觚 也 而失其臣 故君 觚 「人而 而 不 也 觚 不爲棱 觚 程子曰: 而失其君 觚哉 舉 不仁則非人,國 棱 一之職 也。 器,而 也 ! 或或 則 觚 觚哉 之道 哉 不觚 日 天 觚 爲 ! 酒 觚 虚 下 而 9 者, 哉 則 Ż 失 而 位 物 爲 其 言 蓋 不 或 治 莫 不 形 \Box

子

日

君

子博學於文,

約

之以

禮

亦

口

以

子可逝也,不可陷也; 焉。』其從之也?」子曰 我 劉 聘 問 君 日 . 日 : 「仁者, 「有仁之仁當作人。」今從 雖告 可欺也,不可罔也。」 「何爲其然也 之 日 井 有 君

> 所無。 理甚明,人所易曉。 逝 道 不私其身,然不應如此之愚也。 人,若從之於井,則不復能 謂誑之以理之所有。 不篤,而 ,謂使之往救。 從, 蓋身 謂 隨 憂 在 之於井 爲 井 上 陷, 一之蹈 仁者雖 罔,謂 而 乃 謂 害, 救 陷 叮 之也。 之於井。 以 切 救 昧之以理之 故 、之矣。 救井中之 於救 有此問 宰我信 人 而 此

弗畔 矣。 故其 學欲其博,故於文無不考, 守欲其要, 夫,音扶。〇約,要也 禮 、動必 矣夫 必至於汗 程 以禮。 子 漫。 如此,則可以不背於道 博學於文 博學矣,又能 背也。 而 不 ·約之 守禮 君

「蹈」,司禮監本、吴本作「陷」。

0

而由於規矩,則亦可以不畔道矣。」

子見 所 哉? 類。 否者,天厭之! 見惡人,固謂 所,誓辭 見此淫亂之人爲辱,故不悦。 其國,有見其小君之禮。 孔子辭謝,不得已而見之。 説,音悦。否,方九反。○南子,衛靈公 不善,我 棄絶也。 之夫人,有淫行。孔子至衛,南子請見, 南子,子 否,謂不合於禮,不由其道也。 故重言以誓之,欲其姑 何與 也,如云「所不 聖人道 路 不説。 馬。 在我有 天厭之!! 大德全,無可不可。 然此豈子路 夫子矢之日 可見之禮 與崔、慶者」之 而子路以夫子 蓋古者仕於 信 矢,誓也。 則彼 此 所 . 能 而 子子 其 深 測 之

子貢

티 :

如如

有

博施

於

民

而

能

濟

何

子曰:「中庸之爲德也,其至矣乎! 民

以

得之也

鮮久矣。」

也。 鮮,上聲。 民不興於行,少有此德久矣。」 言民少此德,今已久矣。〇 之正道,庸者天下之定理。 「不偏之謂中,不易之謂庸。 庸,平常 中者, 也 至,極 無 過 也。 無 自世教衰 程子曰 不及之名 鮮 中者天下

也聖乎 如 ? 言此何止於仁,必也聖人能之乎 上下。聖以地言,則造其極之名也 施、去聲。 者,疑而未定之辭。 可謂 堯、舜其猶病諸 仁乎?」子曰: ○博,廣也。 病,心有所不足 仁以 何 理言 事於仁,必 通 也。 則 平 平

■ 「也」,原脱,據元乙本、司禮監本、吴本補

雖堯、舜之聖,其心猶有所不足於此

夫仁者,己欲立而 夫,音扶。 於此觀之,可以見天理之周流 是求仁 狀仁之體 一,愈難 〇以己及人,仁者之心也。 ,莫切於此 而 立人,己欲達 愈遠矣。 而達人。 而無 間

能近取譬,可謂仁之方也已。」 仁者以 欲 至難 相 也 推 欲 譬,喻也。 加 己。 全其 其所欲 達 爲 以手足痿痹爲不仁,此言最善名狀。 譬之他人,知其所欲亦猶是 而達人,能近取譬,可謂仁之方也 言 於此 一,何 C, 故止 天 故博 如手足之不仁,氣已不貫,皆不 天 地 以及於人,則恕之事而仁之術 理之公矣。 勉焉,則有以 方,術也。近取諸身,以 所 施 萬 不 曰: 濟衆,乃聖人之功用。 物爲一體,莫非己也。 至,若不屬己,自與己 〇程子曰: 勝其 欲立而立人, 人欲之私, 也。 己所 然後 不 認

> 子教 不及 不欲 非 非 贍 夫 己。 日 足,則便不是聖人。」〇日 不 聖人之所欲? 爾 乃 博 之方,雖博施濟衆,亦 有志於仁,徒 衣帛, 以於己取之,庶近 爾,此病其濟之不衆也 ,此病其施之不博 欲四海之外亦兼濟 少者亦衣帛 欲令如是 以安百姓,則 施 《論論 者,豈非聖人之所欲 語》言 七十乃食 觀 事 食肉 堯、 然治 爲 高 可 病 舜 遠 肉。 也 以得仁之體。」 可 其猶 而 由 也。 不 一,顧其養有所 世 可人。 未知其 知 此 過 聖人之心,非 氏 進。」 顧 九 濟衆者, 豈 ? 病諸者二。 其治 苟 推此 州 然必 是乃 方。 吾 聖人 以 有 爲 又 Ŧi. 求 所 不

論 語卷第三

論語卷第四

朱熹集注

述而第七

行事之實。凡三十七章。此篇多記聖人謙己誨人之辭及其容貌

也。 傳述者也。 老彭,商賢大夫,見《大戴禮》,蓋信古而 樂》,贊《周 故作非聖人不 竊比,尊之之辭。 未嘗有所作也,故其自言如 孔子删《詩》、《書》,定《禮》、 〇述,傳舊而已。 (易》,修《春秋》,皆傳先王之 能,而述 我,親之之辭。 作,則 則 賢 者 創始 此。 可

> 自附 不可不知也。 者略備,夫子蓋 下 蓋 不自知其辭之謙也。 不 其事雖 於古之賢人。 唯 不敢當作者之聖,而 述, 而 集 功則倍於作矣,此 蓋其 羣聖之大成 德 然當 愈 亦 盛 不 是時 而折 而 敢 心 顯 又 衷 作 愈

何有於我哉?」子曰:「默而識之、學而不厭、誨人不倦

識 謂 言何者 極至,而猶不敢當 言而心 ,音志,又如字。 不言而存諸 能 解也。 有 於我 心 前説 也。 也。 則謙而又謙之辭也。 近是。 識。記 三者已非聖人之 説: 也。 何有於我 識 默識 知也

徙,不善不能改,是吾憂也。」 子曰:「德之不脩,學之不講,聞義不能

尹氏曰:「德必脩而後成,學必講而後

乎?」 之要也。苟未能之,聖人猶憂,況學者明,見善能徙,改過不吝,此四者,日新

子曰: 之時,不怠惰 申 燕 之燕居,申申如也,夭夭如 著此四字不得,怠惰 申字説不 居, 得,唯聖人便自有中和之氣。」 ,其容舒也。 「此弟子善形容聖人處也,爲 閒暇無事 盡 ,故更著夭夭字。 放肆 夭夭,其色愉 之時。 ,必太嚴 放肆時亦著此 ○楊氏 也 厲。 今人 也。 日 嚴 0 八燕居 兀 厲 字 時 申 程 申

之道,故夢寐之間 復,扶又反。 而 不能行也,則 孔 無復是心,而亦 如如 子盛時, 或見之。 志 欲 至 行 無復 其 周 是 老

> 矣。 道。 子曰 道者身,老則衰也。」 夢矣,故因此 0 蓋存道者心,無老少之異; 及其老也,則志慮衰而 「孔子 而自歎其衰之甚 盛 時, 寤寐常存行周 不可 也 以 公之 有 而 行 爲 程

子曰:「志於道,

則所適者正,而無他歧之惑矣。 之間所當行者是也。知此而心必之焉, 志者,心之所之之謂。道,則人倫日用

「據於德,

失,則終始惟一,而有日新之功矣。心而不失之謂也。❷ 得之於心而守之不據者,●執守之意。德,則行道而有得於

0

[「]德則行道而有得於心而不失之謂」,殘宋本「據」上,司禮監本有「據音倨○」三字及一圏。

謂」,司禮監本作「德則行道而有得於心」。 本、元乙本、吴本作「德者得也得其道於心而不失之本、元乙本、吴本作「德者得也得其道於心而不失之罪」,殘宋本、元甲

「依於仁,

存養之熟,無適而非天理之流行矣。德之全也。功夫至此而無終食之違,則依者,不違之謂。仁,則私欲盡去而心

「游於藝。」

後之序、輕重之倫焉,則本末兼該 常用而物欲不行; 德,則道得於心而不失; 立 此章言人之爲學當如是也,蓋學莫先於 趣,則應務有餘,而 射御書數之法、皆至理 游者,玩物適情之謂。藝,則禮樂之文, 容,忽不自知其人於聖賢之域矣。 交養,日 加 志。 可闕者也。 動息有養。 志道,則心存於正 用之間, 學者於此 朝夕游焉 無少間隙,而 1 游藝,則小 亦無所放 有以 所 以博其義理之 寓 而不他; 依仁,則德 而日用之 不失其 物 涵 矣。 内 泳

> 子曰 贄以爲 故苟以禮來,則無不有以教之也。 人於善。 生,同具此 也 禮,束脩 但不 十脡 理,故聖人之於人,無不欲其 東 脩 知 爲束。 其 以 來學,則無往教 至薄者。 古者相見,必執 蓋 無誨 人之有 之禮

以三隅反,則不復也。」 欲言 此,欲學者勉於用 者也。待其誠至而後告之。 上章已言聖人誨 三。反者,還以相證之義。 程子曰: 憤者,心求通而 達其辭。 ,房粉反。 而 未能之貌。 。物之有 「憤、悱,誠意之見於色辭 悱, 芳匪反。 人不倦之意,因 力,以爲受教之地也 未得之 四隅者 啓 謂 意。 舉 開 復,扶又反。 復,再告也。 既告之,又 其 作者, 口 意。 可知其 并記

子曰:「不憤不啓,不悱不發,舉一

隅不

憤 憤 必 悱 其 而後發 而 自 發 得 則 乃 則沛然矣。」 復告 知 之 不 爾。」又曰 能 堅 古 待 不 其 待

子 食 臨 喪 於有喪者之側 哀 不能 甘 也 嘗 飽 世

子 於是 日哭,則 不歌

能 性 哭,謂弔哭。 可 見聖 然後 歌 也 人情 口 以 謝氏 性 學道 之 日 E : E 之内, 也。 學者於此二者, 餘 能 哀 識 未 聖人之情 忘 自

我 子 與 謂 爾 顔 有是夫! 淵 目 . 「用之則行, 舍之則藏 唯

也 舍 舍 無 上聲。夫,音扶。 顔 與於己,行藏 子幾於聖人 安於 ,故亦能之。」 所 尹氏 遇, 命 曰 不 . 足 道 用

子

路

日

「子行三軍

則誰

與?

0

孔子 \equiv 萬 軍 必必 千五 獨 美 與己 白 顔 人爲 淵 同 自 軍 負 其 大國三 勇 意 軍 夫 0 子 子 若 路 行 見

也。 子 謀。 日 救 則 者 顔 則 行 要實 馮 馮 之。 0 河,徒 其論益 子 不 非 必 皮冰 圃 也 言此 爲 用 貪 不 「暴虎 況於行三軍乎?」 未 夫 位 臨 聖人於行 外 可 而 沙涉。 能 反。 卑矣。 一其藏 不 皆 事 求行, 此 無 謀 子, 以抑 而懼 馮 與 懼, 固 好, 於此。 河 無 必 舍之而 非 好好 路 謂 其 夫子之言,蓋因 藏 去聲。 成 也 死 獨 之間 敬 不懼 蓋 勇 謀 而 善 至以 子路 而 其 不 而 不藏 也。 無 教之,然行 事 知 成者 無意 必 悔 行 也。 雖 暴 若有 敗 成,謂 者, 矣,是以 三軍 也 虎, 非 無 其 有 吾 必 欲心 徒 爲問 謝 欲 0 師 成 失 不 搏 出 惟 其 而 氏 與

。如不可求,從吾所好。」 「富而可求也,雖執鞭之士,吾亦

子曰

可不可 可求 義理 若可求,則雖身爲 好,去聲。 加 0 不求,以其在天,無可求之道也。」 然有 爾。二〇楊氏 而 「聖人未嘗有意 哉? 已矣,何必徒 命 焉, 爲此語者,特以 執 鞭 非求之可得也 티 : 賤役以求之,亦 ,賤者之事。 取 於求富也,豈 「君子非 辱 哉? 明 則 其 恶 設 所 言 决 蘇 富 問 安 於 貴 其 氏 富

子之所慎: 齊,戰,疾。

謹也。○尹氏曰:「夫子無所不謹,弟齊,側皆反。○齊之爲言齊也,將祭而齊,側皆反。○齊之爲言齊也,將祭而齊其思慮之不齊者,以交於神明也。誠齊其思慮之不齊者,以交於神明也。誠齊其思慮之不齊者,以交於神明也。誠

子記其大者耳。」

圖爲樂之至於斯也!」子在齊聞《韶》,三月不知肉味,曰:「

人不足以及此。 文之備,而不覺其歎息之深也。 舜之作樂至於如此之美,則 味,蓋心一於是而不及乎他也。 月,不知肉味, 美又盡善,樂之無以 、史記》三月上有「學之」二字。 而歎美之如此。 〇范氏 加 此 티 : 也。 有以 故學之三 「《韶》盡 誠之至 不 蓋非 極 其 不 知 情 意 聖 肉

「諾。吾將問之。」 冉有曰: 「夫子爲衛君乎?」子貢曰

也。 爲,去聲。 V 蒯 靈公逐其世子 聵之子輒,於是晉納 〇爲, 猶助也。 蒯 聵 公薨, 衛君 蒯 聵 而 出 或 公輒 輒 拒

應辭 而 輒 孔 也 嫡 子 孫 居 當 衛 V. 衛 故 冉 以 有 蒯 疑 聵 而 得 間 罪 於

之賢 得仁,又何怨?」出,曰 人,曰 齊爲問 紂 倫 況其君乎 怨,猶悔 耻 遺 미 伯 而 曰 食周 夷、 IE. 爲 逃之, 知 0 命立叔 夷、叔齊,孤竹 人也。」曰: 0 矣。 · 而 重 「父命 一伯 栗, 齊扣 即乎 也。 或 ? 其 蓋 夫子告之如 齊。 去,隱 夷、 人立 孫 伯 故子 也。 馬 君子 人心之安。 國 夷 叔 父卒,叔 而 其 以 也 君 遂 怨乎?」 於首 齊 諫 貢 居 当,皆求 父命 中子。 逃 之二子。 何 不斥 是 0 此 人 去。 武 陽 「夫子不爲 邦,不非其大夫, 齊 爲 也 王 既 則其 Ш 所 衛 日 遜 ? 尊 其後 滅 叔 而 以 君 伯 其父將死 遂 齊 合乎 各得 商 叔 不 夷。 日 「求仁 餓 而 武 亦 齊 爲 夷、 而 以 也。 伯 王 衛 夷、 死。 君 伐 夷 理

> 齊遜 以 同 若 焉 爲 年 衛 則 賢 或 輒 而 視 之 ,故知其 語 棄 明 據 逃 其 矣。 國 諫 或 拒 不與輒 伐 猶 父 而 敝 程 而 餓 蹝 子 惟 也 爾 終 曰 恐 無 0 失之,其不 何 怨悔,夫 伯 怨之有 夷、叔 子 可

其 Ħ 無不 音洛。 無 聖人之心, 飯 日 八中矣。 改 0 有 其 在 "晚反。 漠 焉 又曰 非 樂 飯 然 不義 樂 疏 也 飯, 渾 : 無 其 疏 食,飲水, 然天理 食,音 視 而 所 食 不 須 富且 之也。 . 義 飲 動 不 之富 知所樂者 水 於 義 嗣。 雖 貴 曲 之 也 其 於 貴,視 雖 富 肱 處 疏 中 枕, 丽 木 我如 食 也 疏 何 去 枕 極 之 食 如 事 聲。 之, 粗 浮 輕 飲 浮 而樂亦 飯 雲。 雲之 樂亦 程 如 水 也 子 浮 不

子曰:「加我數年,五十以學《易》,可以

在子

無大過矣。」

無 故 幾七十矣,五十字誤無 「假」,而 年,若是我於《易》則彬彬矣」,「加」正 愚 劉 則明乎吉凶 近 按: 窮 可 而 聘 又不可以易而學也 前 以 誤 加 君 讀,卒與五 無 見 言此 此 無 元 大 假 章之言,《 五 消 過。 五. 城劉忠定公,自言嘗 以教 十字。 長之理,進 十作 蓋聖人深見《易》道之 人,使知其 十字相 蓋是時,孔子年已 史記 卒。 疑 也。 退存亡之道, 似 蓋 》作 不可不學, 而 加 學《易》, 「假 誤 假 分也 我 讀 數 他

子 所 用之實 雅 所 書》以 執守而 雅言、《詩》、《書》、執禮, 常 也。 道 ,故常言之。 言 政事 執, 非徒誦 ,禮以 守 世 説 禮獨 謹 而 節文,皆切 詩》 已也。〇 皆雅言 言執者, 以 理 也 情 程子 以人 於 H

耳

然深味之,則見其全體至極純

亦

與天 語 識之也。」 而 道 類記之。」 則 孔子雅素之言 ○謝 有 不可 氏 日 得 而 止於 聞 此 者 因學《易》之 如 要 此 在 默 若性 而

樂以忘 子曰 葉公問孔子於子路,子路不 字子高 未 聖人之德,實有未易名言者與? 有 葉,舒涉反。 而 忘憂。 得 非 知年數之 · 所問 , 憂,不知老之將至云爾。」 「女奚不曰,其爲人也,發憤忘食 則 僭稱公也。 而問者,故子路不對。 以是二 發憤 不足,但自言其好學之篤 ○葉公,楚葉縣尹 而忘 者俛焉, 食 葉公不知孔子, 對 H 有孳 得,則樂之 沈諸 抑亦 以 必 而

■「未」上,元甲本有「女音汝〇」三字及一圈

之自言類如此,學者宜致思焉。 已之妙,有非聖人不能及者。蓋凡夫子

之者也。」 之者也。」 一人,我非生而知之者,好古,敏以求

者 汲 必待學而後有以驗其實也。」 每云好學者 理 好,去聲。 義理 也。 昭著,不待學而 爾,若夫禮樂名物、古今事變,亦 〇 尹 〇生而 氏 非惟 日 . 知 知之者,氣質清 勉人 「孔子以生知之聖, 也。 也、蓋生而可 敏,速· 也,謂 明, 知 汲 義

子不語怪、力、亂、神。

然非窮 以 怪 不 語怪 所不 語 異、勇力、悖亂之事,非 一,語德 語。 也 理之至,有 鬼 而 神,造化之跡, 謝 不語力,語 氏曰: 未易 明者,故亦 理 治而不語 聖人 之正 雖 非不正, 語 固 不 亂, 輕 而

語人而不語神。」

而從之,其不善者而改之。」 子曰: 「三人行,必有我師焉。擇其善者

進善其有窮乎?」
齊,見不賢而内自省,則善惡皆我之師,者,皆我師也。○尹氏曰:「見賢思一惡,則我從其善而改其惡焉。是二人三人同行,其一我也。彼二人者,一善

子曰: 魋,徒 奈我何? 孔子言天既 出於威公,故又稱 雷反。 「天生德於予,桓魋其如予 言必不能違天害己。 賦 我 威 以 威氏。 魋,宋 如是之德 司 魋 馬 欲 ,則威 害 向 何? 孔 魋 魋 子 也 其

爾。吾無行而不與二三子者,是丘也。」子曰:「二三子以我爲隱乎? 吾無隱乎

乎? 者 誠以 諸 其 獨使資質庸下者勉思企及,而才氣 親炙而冀及之,然後知其 也 〇程子曰: 「 聖人體道無隱, 第子以 有隱 亦 ,故夫子以此 常以示人,而人自不察。」 爲不可及,則趨 不敢躐易而 故聖人之教,常俯而就之如此,非 而 夫子 不 知聖 聖人之道猶天然,門弟子 ,之道 言 與天象昭然,莫非至 進 一人作 曉之。 高 也。」〇目 向之心不幾於怠 深 止 不 高且遠也。 與,猶 可 語 幾及, 默 氏 無 示也。 非 高 故 使 教 浦 疑

行,去聲。○程子曰:「教人以學文脩子以四教:文、行、忠、信。

君子者,斯可矣。」子曰:「聖人,吾不得而見之矣,得見

有恒者,斯可矣。 子曰:「善人,吾不得而見之矣; 得見

恒矣。」
「亡而爲有,虚而爲盈,約而爲泰,難乎有「亡而爲有,虚而爲盈,約而爲泰,難乎有貳其心。善人者,志於仁而無惡。」
「以改之意。○張子曰:「有常者,●不恒,胡登反。○「子曰」字,疑衍文。恒,

門,可謂深切而著明矣。 矣,然未有不自有恒 此者,必不能守其常也。 故章末申言有恒之義,其示人入德之 亡,讀爲無。〇三者皆虚夸之事 言。」愚謂有恒者之與聖人,高下固 聖人、君子以學言,善人、有恒者以 加 能至於聖者也。 ○張敬夫 凡 懸 日 質 若 絶

●「常」,係避宋真宗趙恒諱,吴本作「恒」

商青。○共氏曰:「日瀬者也。弋,以生絲擊射,食亦反。○綱,以大子的而不綱,弋不射宿。

繩

屬

網

絶

流

然盡 與祭,或不得 宿 知 口 見仁人之本心矣。 鳥。 9 物取 〇洪氏 者如此,大者可知。」 之,出 已 H 其 而 不 釣 待物如此,待人 意 繫 孔子 to 矢 亦 如 少 而 不 獵較 貧 射 爲 (賤,爲 也 也 是 也。 口 此

多聞 子 次 也 日 擇 0 其 善善 蓋 有 者 不 而從之,多見而識之, 知 而作之者, 我 無 是 知之 也

參考。 從 作 識 於 不 亦 也 可 可 知之者 如 不 見 孔子自言未嘗妄 此 其 擇 無 也 者 記 不 雖 所 知 則 不 善惡皆 而 能 知 作, 實 也。 知 作 不 當 其理,亦 識 知 存 記也 蓋 其 之,以 亦 理 謙 而 辭, 所 妄

> 互 鄉 不善。 見 難與 難與言善。 遍 (言,童 反。 子見" 互 惑者,疑夫子 鄉 門人感。 鄉名 其 不 人

當

習

見於

之也。

子曰 人潔己 之意。 疑此章 此。 與,許也。 逆 其 之善惡 但許其能 字,當在「 其 既 以 F 將 退 「與其進 進 有 而 也 來 疑又有闕 一,與其 程子 自潔 與其 爲 9 錯 ,以是心至,斯 往,前 不善 簡 但 也,不 進 耳 潔 許 也 日 也」之前。 「人潔」至「往 也,不保 固 其 文,大抵 也。 與其 不能保其前 進 蓋 聖人待物 而 不追其 言人潔 退 受之耳。 其 來見耳,非 也 往 亦 潔,修治 也 不爲 唯 也十 既 己 之 日所 何 往,不 而 洪 E 其 唯 也 許 爲 川 甚 如

子曰:「仁遠乎哉? 我欲仁,斯仁至

矣。」

仁者,心之德,非在外也。 己,欲之則至,何遠之有?」 矣,夫豈遠哉? 有以爲遠者。 反 而 〇程子曰 求之, 放 則 0 而不求, 即 爲仁 此 而 由 在 故

「知禮。」 陳司敗問:「昭公知禮乎?」孔子曰:

陳,國 子 如 以 公、魯君、名稠。● 退,揖 此 爲 知禮。 名。 孤 馬 司 敗, 故司 期 而 敗 官名,即 進 習於威儀之節 以 之,日 爲問,而孔子答之 0 司 寇 吾 也 當當 聞 0 君 時 昭

謂之吴孟子。 子不黨,君子亦黨乎? 孔 非 取,七住反。 弟子,名施。 黨。 禮 君而 不娶同 司 敗揖 巫 知禮 馬,姓; 姓 而進 孰 君取於吴爲同姓, 而 之也。 不知禮?」 魯 期,字,孔 與 吴皆 相助 姬 居

姓。謂之吴孟子者,諱之,使若宋女子

姓者然。

先君 德 姓爲 者,可以爲萬世之法矣。」 爲 知禮爲 日 孔子不可自謂諱君之惡,又不可 不正言其所以過,初若不 有黨, 無 也。 知禮,故受以爲過而 「魯蓋夫子父母之國。 所 問 不 而夫子受以 ,其對之宜如此 司敗又未嘗顯言其 可 也 然其受以爲過 爲過,蓋夫子之盛 也。 不辭。 知孟子之事 (事, 而 昭公, 及司 〇吴氏 以 也, 敗 魯之 遽 娶 以 同 亦 以

和,去聲。○反,復也。必使復歌者,欲子與人歌而善,必使反之,而後和之。

■ 「稠」,仿元本、吴本作「裯」。

誠 其 口 如 得 此。 詳 勝既者焉,讀者宜詳味之。 意懇 其 而 蓋 至 與 而 其 取 ____ 而 其 事之微 善 其謙 善 也 也 遜 此 而 審密,不掩人善又 見 而 衆善之集,有 聖人氣象從容 後 和之者,喜得 不

華

日

「正唯弟子不能學也。」

吾未之有得。」 子曰:「文,莫吾猶人也。躬行君子,則

子,斯 人,無 之詞。 及人。 莫,疑 者 之勉其 三、我無能焉。」 可 辭。猶人,言不能過人,而 不 而足以見言行之難易緩急,欲 未之有得,則 實 以 與 也。 人 人同,故不 聖,故不居。 謝 氏 全未 逐; 티 : 有 猶 得 能躬 「文,雖 言 君 皆 尚 行 自 叮 君 聖 以 謙

不 子 厭 日 ,誨人不倦, 若聖與 仁,則吾 則 可 謂 云爾已矣。」公西 豊 敢? 抑 爲 之

> 辭之而 也。 謂爲仁聖之道。 以弟子不 仁,則心德之全而人道之備 此 之,其亦深知夫子之意矣。 已矣者, 爲之不厭、誨人不倦 能至矣。 有稱夫子聖且仁者,以故夫子辭之。苟 下之善,將使聖與仁爲虚 亦 然不 夫子之謙 Ë 無 能學 故孔子 厭 焉,則無以 他 不倦,非己有之則不能,所 之辭也。 也。 辭 誨 雖 也 不 自 人,亦謂 進天下之材,率 晁氏 聖者,大而 居仁聖, 處 公西 也。」可謂 器 曰 : 也。 以 華 而 人終莫 此教 仰 而 爲之, 化之。 「當 必 而 云 天 時 歎 爾 以

路對曰:「有之。誄曰:『禱爾於上下子疾病,子路請禱。子曰:「有諸?」子

神祇。」」子曰:「丘之禱久矣。」

行禱五 也。 子之於子路,不直拒之,而但告以 自 故曰「丘之禱久矣」。又《士喪禮》,疾病 禱者,悔過遷善,以祈神之佑 問 過,無善可遷。 理則不必禱,既曰 已者,初不請於病者而後禱也。 有此理否。 力軌反。 上下,謂天地。天曰神,地 祀,蓋 臣 誄者,哀死)禱,謂禱於鬼神。 子迫切之至 其素行固已合於神明, 有之,則聖人未嘗有 而述其行之詞 情,有不能 也。 日 無 故孔 無其 一祇。 所

子

也,寧固。」 子曰:「奢則不孫,儉則固。與其不孫

「不得已而救時之弊也。」 儉俱失中,而奢之害大。○晁氏曰: 孫,去聲。○孫,順也。固,陋也。奢、

> 子 坦, 心廣體胖。」 故多憂戚。」○程子曰: 「君子循理、故常舒 0 也。 君子坦蕩 蕩蕩,寬 廣 小人長 貌。 「君子坦蕩蕩 小人役於物, 戚 戚 程子曰: __

如此。 温 學者所宜反復而玩心也。 心之密矣。 陽合德,故其中和之氣見於容貌之間 質所賦 厲 行 ,嚴肅也。 而 不能 厲。威而 巡鮮 有 門人熟察而詳記之,亦可見其用 記 不偏。 抑非知足以知聖人 ❷故程子以爲曾子之言。 不猛 人之德性 恭而 惟聖人全體 安。 本無不備, 渾 而善言 而 者 氣

●「詞」,吴本作「辭」。

② 「行」下,司禮監本、吴本有「者」字

表 伯 第 八 一十一章。

子曰 以 天下 志,而 及昌。 無得 極, 泰 於是大王乃立季歷,傳 歷 大王之時,商道寝衰,而周 大王三子: 立、遂克商 天下有其二,是爲文 ,伯之德,當商、周之際,固足以朝諸 伯, 又生子昌,有聖德。 無 讓 而 「泰伯, 以復 泰伯不從,大王遂欲 周大王之長子。至德,謂德之至 泰伯知之,即 稱 民無得而稱焉。」 而 其遜隱微 加者 其 長泰伯, 有天下,是爲武 可 也。 謂至 與 王。 三讓 次仲 大王 無跡 仲 或 德 文王 至 雍 也 雍,次 傳位季歷 可 因 日彊大。 昌 謂 已矣! 逃之荆蠻。 見 王。 有翦商之 固 崩,子發 ,而三分 也。 季 遜 夫 也 以 \equiv 以 季

> 其德之至 有 夫子之歎息而 扣馬之心, 天 下 矣,乃 極爲 棄 而 贊 如 事之難 不 美之也。 何 取 哉 而 處 又泯 0 有甚焉 蓋 泰 其 伯 其 心 跡 不 者,宜 從 焉 即 則

見《春秋傳》。

子曰: 勇 貌。 而 葸 四者之弊。 無禮則亂 絲里反。 絞,急切 「恭而 直 無禮 也。 而 則勞,慎 無禮 古卯反。 無禮則無節 則絞 而 ○ 恵, 無 文,故 禮 則葸, 畏 有 懼

民不偷。」 [君子篤於親,則民興於仁,故舊不遺,則

也。 君子,謂在上之人 不勞、謹不葸、勇不亂、直 ○張子 Ĭ: 也。 人道知 興, 不絞,民 所 起 先後,則 也 偷 化 恭 薄 m

爲 節 德 與上文不相蒙,而 厚矣。」〇 章,乃曾子之言 吴氏 日 與首篇謹 也。 君 愚 子 按: 下 追 遠 此 自

意

相

類

,吴説近是。

.

1

子 予 如 死,而 手 子 戰 子 夫,音扶。 履 履 身體受於父 也。 冰 戰 開 有 ,其警之也 薄 而 其 疾,召門弟 冰。 恐陷 言 後 詩 衾 懼 知 其 畢 而 〇啓, 也 而 所 其 而 母,不 視之。 深矣。 今而 兢兢,戒 以 得 V 曾子以其 保 子曰 免 呼 開 敢毁 戰 於毁 之之難 後, 之,以 《詩》、《小旻》之篇 也。 〇程 戰 謹 吾 兢 傷,故 傷 曾 一路 子 致 所保之全示 兢 知 如 也 臨 反復 子 如如 Ħ 免 此 子 淵,恐墜; 平. 於 小子 ,至於將 夫 臨 足 丁寧之 此 日 ! 深 君 使 以 淵, 啓 子 門 弟 爲 小 門

> 曾子臨 終其 於道 日 猶 氏 終, 日 不 事 可 能 0 小 終而 也 虧 如 父母全而生之,子 也 ,故曾子 日 是乎?」〇 啓手足,爲 、況虧其行 死。 以 君 全 子 以辱 范 是 歸 保 氏 故 爲 其 其親乎?」 也 免矣。」〇 全 身以 而歸之。 非 没, 身體 有 尹 得

曾 子有 孟 敬 疾 子 孟 魯 大夫仲五 敬 子問之。 孫氏, 名

捷。

問之者

間 其 疾 也 死,其 鳴 也 哀

曾子 言 日 鳥之將

之將 言 本,故言善。 死, 自言 其言 也 也 善 此 鳥畏死, 曾子之謙辭, 故 鳴 哀。 欲 敬 窮 知 反

矣; 鄙 君子所貴乎道 倍矣。 正 顔 籩豆之事,則有司 色, 斯 者三: 近 信 矣; 動 容 存。」 出 貌 辭 斯 氣 遠 斯 暴 遠 慢

其所言之善而識

之也

曰 : 木豆。 信 禮 數之末,道之全體 造 政 信 遠 可 者,在此三事 有 存。」 者正 子蓋 矣。 ,暴慢斯遠矣。 司之守, 次顛沛之違者 之本,學者所當操 與與 實也 身而 「動容貌 言道 語 細 身而 出 U 並 同 尹 則 言。 脩 辭 一去聲。 而 IE 氏 不外 己 氣 謂 雖 非君 有 顔色 而 暴 日 ,舉一身而言也。 背理 爲 司 無 聲 른 Œ 0 求 也 爲 存 所 而 粗 子之所重矣。 氣 E 古 故 由 焉。」 也。 政之本。 貴 「養於中 不 近信 厲 顔 無 是皆脩身之要,爲 存省察,而 若夫籩 在 也。 色則 不 猶 **籩**,竹 籩 豆 之 事 該 然君 鄙, 則非 重 慢 8,然其 斯 不 則見於外, 豆之事 也 若 妄,斯 遠 凡 豆豆。 色 放 乃器 子 不可 周 鄙 莊 肆 容 分則 所 則 旋 程 也 也。 豆, 也 貌 有 中 沂 重

> 有若無 事 於 子 之有間 校,計校也。 有 、斯矣。」 餘 子之心, 在 實若 故能 我, 不足在 以 虚 惟 能 如 知 友, 問 犯 此 義 於 而 馬 理 不 不 人,不必 氏 > 能 校 謝 以 無 ,昔者吾 以 氏 爲 窮 多問 日 一得爲 顔 不 : 淵 見物 友嘗從 於 示不 在 是 寡 世 知 我

之命 子 臨 也 日 . 大節 口 而 以託 不可奪也,君子人與? 六尺之孤 可 以寄 百 里

失爲在人,非幾於無我者不能也。」

矣。 與 其節至於死生之際 平聲。(與, 深 著其 疑詞 〇其才可 必 2 然 也 也 而 以輔 决 不 詞 可 程 幼 奪 子 君 設 日 可謂 爲 攝 問答, 或 政 節

0

[「]我」,司禮監本、吴本作「已」。

② 「詞」,吴本作「辭」。下同。

操如是,可謂君子矣。」

遠。曾子曰:「士不可以不弘毅,任重而道

仁以爲己任,不亦重乎? 死而後已,不勝其重,非毅無以致其遠。洪,●寬廣也。◎ 毅,强忍也。非洪不能

亦遠乎?」

行之,可謂重矣。 仁者,人心之全德,而必欲以 後能勝重任而遠到。」 陋 毅,則無規矩而難立; 少懈,可謂遠矣。 而無以居之。」又曰: 〇程子曰: 一息尚存,此志 毅而 「洪大剛毅,然 不洪,則隘 身體 「洪 不 而 而 容 力

子曰:「興於詩,

言既易知,而吟詠之間,抑揚反復,其感興,起也。詩本人情,❸有邪有正,其爲

善惡惡之心,而不能自己者,必於是而人又易入。故學者之初,所以興起其好

得之。

立於禮,

物之所摇奪者,必於此而得之。 學者之中,所以能卓然自立,而不爲事詳,可以固人肌膚之會、筋骸之束。故

成於樂。」

邪穢,消融其查滓。故學者之終,所以八音之節,可以養人之情性,⑤而蕩滌其樂有五聲十二律,更唱迭和,以爲歌舞

2 0

0

[「]洪」,係避宋太祖之父弘殷諱,吴本作「弘」。下同。

[「]也」,原脱,據司禮監本、吴本補。

③ 「人」,殘宋本、元甲本、元乙本、司禮監本、吴本作

[「]是」,元乙本、司禮監本、吴本作「此」。

[「]情性」,元乙本、司禮監本、吴本乙倒。

之而 乃大學 其 其 不 儒 + 此 至 喪祭,莫不 興於詩 之詩,如今之歌曲 以道學不明,故不得有所成就。 後學禮 -年學幼 尚 血 目 之樂,聲音所以 明,治家 程子曰: 而 於 以古之成材也易,今之成材也難。」 歌 脉。 得 義 知其説 不能 也。 終身所得之難易、先後、淺深也。 精仁 之,是學之成 詠 今皆 則此三者,非小學傳授之次, 儀,十三學樂誦《詩》,二十而 曉其義,況學者乎? 所 無 有 古人 熟而 故故 「天下之英才不爲 禮。 以 法,是不得 無之,是不得 養其 自 能 自 養其 今皆 灑 雖 和 興 性情 也。 掃 間 順 起 「廢壞,是 耳,采色所以 於道 應 里童稚 立於 〇按《内 對 今雖 舞 一,以 德者 成 蹈 禮 於樂 皆習聞 少矣,特 是不 老 夫古人 以 至冠 所 世 師 .則》, 必 也。 養 養 得 宿 於 倫 香

> 子 知其 日 教 民 人之心乎?」 民知,則是後世 之知,但能使之由之爾。 7,非不 可使之 介所以 民 欲人家喻 由 然也 可 使由 於是理之當然,而 朝 之,不可 四暮 而户 程子曰: 曉也,然不 三之術 使 若日 知之。 聖人 不能 也 聖人 不使 能 岩 使 設 聖 使

子曰 之已甚, 亂也 惡不仁之人而使之無所容, 好,去聲。 二者之心,善惡雖殊,然其生 : 好 勇疾 好 貧, 勇 加 亂 不安分, 也。 人 亂 而 則 則 不仁, 必 心 也 作 致 亂 0 亂 疾

驕者也 矣。」又 若但 驗之天下之人,未有驕 蓋 謂 鄙 美謂 驕吝 可也 驕者吝之枝葉,吝者驕之本根。 嗇 有 也 雖 日 周 智能 有 . 蓋有周公之德,則 公之才而驕吝焉 盈 程 「驕,氣盈。 技藝之美。 歉 子 ⊟ : -之殊,然其 而 此甚言驕吝之 吝, 氣 不吝,吝而 自 (勢常 , 亦不足 無 歉 驕 相因 故 吝 嘗 愚 觀

子 日 不 禄 也 爲學之久 至於穀,宜不易得也。」 爲 去聲。○穀, 問 〇楊氏曰: 「三年學,不至於穀,不易得 況其下者乎 而不求禄,如此之人,不易得 「雖子 禄 也。 ? 張之賢,猶以 至,疑 然則三年 當作志。 也 學

子曰:「篤信好學,守死善道。

功。 然守死 或 好,去聲。 非 能 其正。 蓋守死者篤信之效,善道者 好 學 而 不足以善其道 不守死 ○ 篤,厚 然篤 信 而 則 而 力 不能 不 也 則 好 以 學 不 亦 善 篤 徒 則 好學之 其 信 死 所 道 而 信 則

道則隱。 「危邦不人,亂邦不居。天下有道則見,

無

邦未危 邦者無可去之義 見,賢遍反。 道者能之。 其身而不見 去之。天下,舉一世 而刑政 也。 〇君 紀綱紊 此 ,在外則不 子 惟 見 而 篤信 言。 危授 矣,故潔 好學、守 人可 無道。 命, 其 則仕 也 身 死 則 善 隱 而 危

貴焉,耻也。」 邦無道,富且

節,碌碌庸人,不足以爲士矣,可耻之甚世治而無可行之道,世亂而無能守之

也。〇晁氏曰:「有學有守,而去就之也。〇晁氏曰:「有學有守,而去就之

子 $\dot{\Box}$ 若 程 君 子 大夫問而告者, 日 「不在其位,不謀其政。 「不在 其 位 則有矣。」 ,則不任 其 事 也

美盛 摯, 在 師,名摯也。 官之初,故樂之美盛如此 . 音至。 意。 「《關雎》之亂以爲《風》始。」洋洋 孔子自衛反魯而 雎,七余反。 亂,樂之卒章也。 IE 師 樂, 摯, 《史記 適 師擊 魯 樂

信,吾不知之矣。」 子曰: 「狂而不直,侗而不願,悾悾而不

> 蘇氏曰 也。」 必 材以 是德,故馬之蹄齧者必善走,其不善者 者,甚絕之之辭,亦 願 侗 謹 馴 音 下, 厚也。 通 有是病 有是德則有是 「天之生物,氣質不齊。 悾, 悾腔,無 而 音 無是德 空。 不 屑之教 能 病,有是 貌 則天下之棄 侗 誨 吾不知之 無 病 也 知 必 其 貌 中 1 有

子 Ħ: 也。」 也。 之,不得放過。 猶 言人之爲學, 竦然,惟恐其 學如不及 程子曰: 既如有所不及矣,而 或失之,警學者當 ,猶恐失之。」 才説姑待明日, 「學如不及, 猶 便 恐 如如 其 失 是 1 口

不與焉。」 舜、禹之有天下也,

而

言不相關,言其不以位爲樂也。 與,去聲。○巍巍,高大之貌。不與,猶

稱也。 唯,猶 獨堯之德能與之準。 如天之不可以言語形容也。 獨 言物之高 也。 則,猶準 大, 莫有 故其 也 0 過於天者,而 、德之廣遠,亦 蕩蕩,廣遠之

焉。所可名者,其功業文章巍然焕然而願。○尹氏曰:「天道之大,無爲而爾。○尹氏曰:「天道之大,無爲而爾。○尹氏曰:「天道之大,無爲而成。唯堯則之以治天下,故民無得而名成。唯堯則之以治天下,故民無得而名

舜有臣五人而天下治。

治,去聲。○五人,●禹、稷、契、臯陶、

伯

武王曰: 「予有亂臣十人。」益。

孔子曰: 際,於斯爲盛。 畢公、榮公、太顛、閎夭、散宜生、南宫 《書·泰誓》之辭 内。或曰: 號。際,交會之間。言周室人才之多, 者,德之用 稱孔子者,上係 母之義,蓋邑姜也。 适,其一人謂文母。 也。」十人,謂周公旦、召公奭、太公望、 才難,蓋古 才難,不其然乎? 唐、虞之 也。 「亂本作乿,古治字也。」 有婦人焉,九人而已。 語 武 唐、虞,堯、舜有天下之 王君臣之際、記者謹 〇馬氏曰: 而孔子然之也。 劉侍讀以爲子無臣 九人治外,邑姜治 「亂,治

■「五人」,原脱,據司禮監本、仿元本、吴本補

難得也。皆不能及,然猶但有此數人爾,是才之皆不能及,然猶但有此數人爾,是才之惟唐、虞之際,乃盛於此。降自夏、商,

可謂至德也已矣。」 「三分天下有其二,以服事殷。周之德,其

豫、徐、 約。 蓋 《春秋傳》曰 矣。」或曰 德,且與泰伯,皆以 與之,人歸之,乃不取而服事焉,所以 至德也。)范氏曰: 起之,而自爲一章。」 揚也。 天下歸 : 孔子因武王之言而及文王 「文王之德,足以代 :「文王率 「宜斷三分以 文王 惟青、兖、冀,尚屬 者六州 至德稱之,其指 商 下,别以 之畔 荆、 或 商 紂 耳。 微 之 事

孝乎 子 日 鬼神 ,而盡力乎溝洫。 禹, 惡 吾 衣 無 服 間 然矣。 禹,吾無間然矣。」 而致美乎 菲 飲 黻 食, 冕; 而 致 卑

> 之。 豐潔。 域反。 儉, 間 然之有?」 議之也。 廷之禮,所謂 再言以深美之。 水道,以正疆界、備旱 各適其宜,所 去 而所勤者民 冕,冠也。 聲。 衣服 間, 菲, 菲, 常服。 有 薄 罅 音 皆祭服也。 隙 也 之事 天下而 以無罅隙之可 匪 也)楊氏 黻、蔽 ,所 致孝鬼 - 潦者 謂 黻 不與 指 致 日 膝 音 也。 其 飾 神, 溝 也 也 者宗 罅 一,夫何 洫 議 薄 或 謂 隙 洫 也 豐 廟 於 田 韋 享 而 改故 間 祀 非 呼 Á 或 爲 間 朝

論語卷第四

論語卷第五

朱熹集注

子罕第九

子罕言利與命與仁。

名也。 成名,蓋美其學之博而惜其不成一藝之成名,蓋美其學之博而惜其不成一藝之

、 專 內 也 。 时 、 即 旨 一 瘞 , 而 知 乎 ? 執 射 乎 ? 吾 執 御 矣 。 」 子 聞 之 ,謂 門 弟 子 曰 : 「 吾 何 執 ?

執

御

乎? 執 孔子之大,意其所學者博, 之以謙也。 僕,所執尤卑。言欲使我 然則吾將執御矣。」 故孔子曰、欲使我何所執 德備,不可以偏長目之也。 善得名於世、蓋 專 然則吾將執御矣。 執 也 〇尹氏曰: 射、御 慕 皆一 聖 1 藝, 何所執 而得爲名乎? 「聖人道全而 聞 而 達巷黨 而惜其不以 人譽己,承 不知者也 而 御 以 成名 爲 見

子曰:「麻冕,禮也,今也純,儉。吾從

縷,則 麻冕, 約。 不如用絲之省約 緇布 其經二千四 緇 冠 布 冠 ,以三十升 也。 百 純, 縷 布爲 矣。 絲 也。 之,升八 細密難 儉, 謂 成, 十

四四

音從下。 」 拜 禮 也 今拜 乎上, 泰 也 雖 違 衆

害於義 子 升 臣與 處 成 拜。 世 君 行 則不可從也。」 事 禮 之無害 當當 驕 慢 拜於 也。 於義者 堂下。 程 從俗 子曰 君 辭 可 之, 也 君

於必 意 我 絶 絶 在 私 私 者 事 几 無之盡 則 前,固 「此毋字,非 何用禁止 留 物 己 意 於固 也。 毋 欲 也 意 牽引 者 我常 四者相爲終始, 必, 毋 而 毋、《史記》作 必 成於我也。 期 循環不窮矣。 禁止之辭。 在 必 毋 事後,至於 也。 固 毋 固, 蓋意、必 我 起於 聖 無, 執 我 人 意 滯 是 程 又 絶 也。 也 生 常 此 遂

> 視 而 默 識 之 不足 以 記 此

子 , 畏於 王

畏 云 者, 有 陽 戒 虎曾暴 心 之謂。 於 匡, 王, 夫子 地名。 貌 似 史記 陽

日 道之顯者謂之文,蓋禮樂制度之謂 匡 「文王既没,文不在兹乎

0

子

也; 天之將喪斯 自 文,則必不使我 没,故孔子自謂 日 道 於此文, 謂 與,皆去聲。1 天之未喪斯文 而 日 文,亦謙 則 文也 是 得 天 後 也 後 未 與 死 辭 死者 三、医 於此 者。 也。 欲 馬 喪 氏 人 兹,此 言天若 不得與 此 文。
 □

 :
 其 文也 如 子 也,孔 於 我 文王 欲 何 天 既 喪 斯 ? 既 既 得 此 文

0 皆 司 禮 監本作「並」。 張

子

四者有一

焉,

則

與

天

地

不

相

楊氏曰

非

知足以

知聖人,詳

不 未 能 欲 違 喪 天 此 害己也 文 則 匡 人 其 奈 我 何 ? 言 必

多能也?」 大宰問於子貢曰: 「夫子聖者與? 何其

疑辭。大宰蓋以多能爲聖也。字,官名。或吴或宋,未可知也。」與者,字,音泰。與,平聲。○孔氏曰:「大

子貢曰:「固天縱之將聖,又多能也。」

謙若不敢知之辭。聖無不通,多能乃其縱,猶肆也,言不爲限量也。將,殆也,

故多能鄙事。君子多乎哉? 不多也。」子聞之,曰:「大宰知我乎! 吾少也賤,

餘

事

,故言又以兼之。

故 言 聖 又言君 由 而 少 無 賤 子不必多 不 故 通 多 也 能 前 能 Ħ. 所能 以 多 曉之。 能 者鄙 非 所 以 事 率 爾

牢曰: 「子云,『吾不試,故藝』。」

試 牢, 此言之時,子牢因言昔之所 用用 而 孔 通之。 (意相近,故并記之。 也。 子 弟 言 子, 由) 吴氏 不爲 琴, 日 字子 世 . 用 開 故故 弟 聞 子 得 字子 記 有 以 習於 如 此

問 子 於我 教 精 則 高 如 也。 叩,音口。 曰 而 不 兼 可 此 人,俯就 粗 人,雖於至愚,不敢不 不 親也。 見矣。二〇 一、空空如 盡 則 兩端 「吾有. 如此 無所 ,猶言 不 即其近,衆人皆 則道 之若此 不 〇 孔 聖人之道,必 知 親 盡 也,我叩 尹氏 乎 兩 不尊 子 哉 賢 頭。 〇程 謙 ,猶恐衆人以 日 ? 人 言 其 . 言終始 八之言 子日 觀於孔子、孟子 無 兩 己 盡 知 降 端 可 聖人之言,上 無 耳 0 也 知 而 與 則引 而 竭 自卑 「聖人之 叩, 識 知 爲 有 焉 而 發動 高 但 鄙 不 遠 其 夫

端。 餘 其 べ藴矣。 至 ,則豈聖人之言哉?」 如答樊遲之問 則 雖 若夫語上 聖人亦 無以 而 遺 知 加 F 焉,是之謂 兩 端 語 竭 理 而 遺 無 兩

夫!」子曰:「鳳鳥不至,河不出圖,吾已矣

張子 其已矣。」 羲 時 夫,音扶。 羲、舜、文之瑞不至,則夫子之文章, 鳴 時 於岐 出 ,皆聖王之瑞 Ш 鳳 鳳 河 至圖 啚 靈 鳥 出,文明之祥。 河 也 中 舜 己,止 龍 時 馬 來 負 儀 也。 圖 文 伏 知 伏 Ŧ.

必作,過之,必趨。子見齊衰者、冕衣裳者與瞽者,見之,雖少

衰,喪服。冕,冠也。衣,上服。裳,下齊,音咨。衰,七雷反。少,去聲。〇齊

目者。 服。 盖有 聖人之誠心,内外一者也。」 哀有喪,尊 「少,當作坐。」〇范氏 不 冕 期然 作 而 衣裳,貴者之盛 有爵 起 而然者。」〇 也 ,矜不成人。 趨,疾 尹 行 服 氏曰 「聖人之心, 也。 其 也。 作與 或曰 趨 此 無

瞻之在前 顔 淵 喟 然 忽焉 歎 日 : 在後 仰 之彌 高 鑽之 彌 堅

禮。 「夫子循循然善 喟 子之道無窮 前在後,恍惚 仰 苦位 彌 高 不 反。 可 盡 鑽,祖官反。 不 及。 誘人,博我 、無方體,而歎之也 可 鑽 爲象。 彌 堅, 此 以 不 顔淵 文,約 門, 歎 可 深 知夫 我 在 以

禮,教之序 循 八有序也。 循, 有次 序貌。 也。言夫子道 侯氏 日 誘,引 博 進 雖 我 也 高 以 文 妙, 博 (), 致 而 約 知 教

格 子 日 物 也 惟 此二 此 約 顔 我 事 子 以 而 禮,克 稱 己。 聖人 己 最 復禮 切 當處 也 聖人 程

欲從之,末由也已。」「欲罷不能,既竭吾才,如有所立卓爾。雖

得。」○楊氏 位 謂 親,而又無 卓,立貌。 至於大,力行之積 之所至也。 而 而 所 之故 喟 程 善學之者 行所及矣,此 ,功夫尤難 窈冥昏默者。」〇 謂卓爾 子曰: 然 歎 後 末,無 得 此顏子學既 所用 日 亦在 蓋悦之 也。 一此 ,直是峻絶,又大段着 之由 0 顔子 「自可 乎日 其 顏子所以爲 也 也。 深 力 0 程 胡 所以 而 用 此 也 而 子 氏 歸 大而 有 欲之謂 行 力之盡,所 **E**: 日 顔 未達 功於聖人也 得 事之間, 子自 化 故 旲 深 一間 之, 善 氏 言 無 到 述 知 其 L 孔 也 則 充 力 此 非 見 其 非 而 地 所 學

> 者之赴 忽,未 抑 能,盡 約我 博 高、 違 蓋 所立之卓然,雖欲從之,末 我 斯 不怠 之時乎?」 堅、前、 歎 以 以 心盡 領其 文, 家 禮 也 所 ,食者之求 從,必 使我 其 使我 力,不少休 要 後 在 也 語 知 請 尊 欲 古 惟 道 所 事 至乎卓立之地 今, 夫 體 飽 聞 斯語之後, 廢。 子循 , 是 行 也 達 事 然 以 所 由 仰、 循 變 欲 也 後 知 善 見 罷 鑽 已 誘, 也。 月 夫子 而 如 行 不 不

子 治其 夫子 疾病 也 子路 喪, 時已去位, 其意實 使門, 人爲 無家 尊聖人 臣 臣。 而未 子路 知 欲

所

以

尊臣

以

家

病間,曰:「久矣哉,由之行詐也! 無臣

●「欲」,司禮監本作「求」。

也

而 欺天 自 既 間 皆知之,不可欺也。 差乃知 有 歸,其責子路深矣。 ,如字 八而已。 臣。 其 吾誰 人而欺天,莫大之罪。 事,故 病 欺 間 ? 言 少差也。 欺天 我之不 而爲 平 有 當 病 臣 有 時 家 不 引以 則 臣, 知 是

路乎?」 子之手乎 且予與其死於臣之手也,無寧死 且予縱不得大葬, 子 於 死 於 道

簣, 曰: 故。 路,所以警學者也。」〇楊 無 至 於言動,雖 臣,是以 路欲尊夫子, 道 路 而意 寧, 寧 誠 范 陷於 棄而 也 氏 則用 吾 0 微 得 티 : 行 不 大葬, 不 而 葬。 作,罪 IE 智自私 口 不 而 不 知 謂 曾子 又曉之以 斃焉 無 謹。 至 君 臣 不 欺 氏 臣 將 之不 夫 斯 知 天。 日 禮 死 子 行 己 0 葬 不 深 矣。」 其 君 可 起 心 所 懲 子 爲 然 非 而 死 於 子 之 無 知 子 易 有

> 事 其子路之謂 往 自陷 平 於行 ? 詐 欺 天 而 莫之知

之哉 善 貢 賈 日 0 而 我待賈者也。」 沽諸?」子 有 美 玉 於斯 Ē 0 韞 沽之哉 賣 而 藏 諸 沽

求

子

於海 也。 耳。 子言 韞 必 又惡 孔子有道 鞋, 紆粉反。 滅藏 不 ·枉道以 若伊 固當 濱 不 ○范氏 也。 由 世 尹 其 賣 不仕 賣 無成 之耕 從 道。 티 : 之,但當待賈, 匵,徒木反。 人,街玉 匱也。 ,故設此二端 湯、文 士之待禮 於野,伯夷、太公之居 君子未嘗不欲仕 沽 一而求售· 王 賣也 賈,音嫁。 則終焉 ,猶玉之待賈 而 以 也。 不當 問 也 子貢 加 求之 也 孔 以

子 欲 居 九 夷。

方之夷有 九 種 欲 居之者,亦乘 桴 浮

海之意。

《頌》各得其所。」 子曰: 「吾自衛反魯,然後《樂》正、《雅》、

孔子 周禮· 晚 魯哀公十一年冬,孔子自衛反魯。 知 道終不行,故歸 周 在魯、然《詩》、《樂》亦頗 流 四方,參互考訂,以 而 正之。 殘 知 缺 其説。 失次。 是時

子曰 不敢不勉,不爲 切矣。 説 見第七篇 「出則事 然此 酒 公卿, 困 則 何有於我哉?」 人 其 則 事 事 愈卑 父兄, 前 意 喪 愈 事

子在川上,曰:「逝者如斯夫! 不舍書

夜。」

義。 暑來 也。 於此 也。 過,來者續 焉。」又曰 法之,自强不息。及其至也,純 爲體,運乎晝夜,未嘗已也。 皆勉人進學不已之辭。 其要只在謹 毫髮之間 不已,乃天德也。有天德,便可語 此見聖人之心,純亦不已也。 ,水流而不息,物生而不 天運 發以示人, 然其可指 :「自漢以來,儒者皆 斷 而 無 舍,上聲。 也。 獨。 不已,日往則月 而易見者,莫如 一息之停,乃道體之本 欲學者時時 |愚按: 〇程子曰: 〇天地之化,往 自此 來, 省 窮, 是 一此 川流 至篇 察, 寒 不識 亦 以 皆與 王道 往 道 而 純亦 不 君 故 體 無 此 道 則

好,去聲。○謝氏曰:「好好色,惡惡子曰:「吾未見好德如好色者也。」

過之。」孔子醜之,故有是言。 公與夫人同車 民 鮮能之。」○《史記 誠 也 好 德 ·,使孔子爲次 如 好 色,斯 》:
「孔 誠 乘 子 好 居衛 德矣, 招 摇 市 然

也。 子曰 簣,其進者,吾自往耳。 簣,其止者,吾自止耳。 夫子之言,蓋出 也 息,則積少成多; 譬如平 求位 《書》曰: 其止其往,皆在我而 譬 反。 地, 如如 爲山 雖覆 覆,芳服反。(於此。 「爲山九仞, 未成一 一簣,進,吾往也 中道 言山 而止,則 不 平地 蓋 簣,止, 學 在人也。 功虧 成 者自 而 而 簣, 方 前 但 _ 覆 簣。」 吾 彊 少 土 功 籠 盡 不 止

子 日 范氏曰: 語 之而 「顏子聞夫子之言,而心解 與,平聲。 不惰者, ○ 惰, 懈 其 П 也 與 怠 ! 也。 力

子所不及也。」雨之潤,發榮滋長,何有於惰? 此羣弟行,造次顛沛,未嘗違之。如萬物得時

未

而孔子惜之,言其方進而未已也。「進」、「止」二字,説見上章。顏子既死

子 者有矣夫!!」 Ē 成穀曰實。 夫,音扶。 一苗 而 ○穀之始 不秀者有矣夫! 蓋 學 而 生日 不 至於 苗 成,有 吐 秀 華 而 日 如 不 秀, 此 雷

者,是以君子貴自

勉

也

子曰 己。 也? 0 四 後 十、五十 生可 而 畏, 無 焉 聞 焉 知 斯斯 來 者 亦 之 不足 不 畏 如 世 今

其 乎 亦 以警人,使及時 勉 焉 力彊,足以積學而有待 已矣。 至於老而 、將來不如我之今日乎? 然或不 ? 尹氏曰:「少而 而 知之焉,於虔反。○孔子言後生 不以善聞,則不聞矣。」蓋 是可畏也。」 自少而進者,安知其不至於極 無聞,則不足畏矣。 勉學也。 不勉,老 ,其勢可畏, 曾子曰: 而 述此 無 闡 言 能 安 年 五五 此 知 則

説 子 而 日 巽 : 「法語之言, 不 繹, 與之言, 從而不改, 能無説 能 吾末如之何也己 無 乎? 從 乎? 改之爲 繹之爲貴。

必 也。 所 從; 乖 語 者, 繹 故故 然不 尋 正言 必説; 其 改 緒 之也。 也。 則 面 法言 巽言者,婉 不繹,則又不足 從 而 人所 己。 敬 巽言. 而 憚, 導 無 以 故 之

> 焉 達, 言 知 聖人其如之何哉?」 若其論好貨、 而 若孟 其 不改、釋焉, 則尚庶幾 微 拒之而不受,猶之可 意 子論 之所 其 好色之類是 行 則是終不改、繹 在 、能改、繹矣。 王 也。 政之 類是 楊 也。 也。 氏 語之而 也。 從且說矣, 日 也已, 其 巽言 或 喻 未

憚改。」 "主忠信,毋友不如己者,過則勿子曰" 「主忠信,毋友不如己者,過則勿

重出而逸其半。

也。」 子 日 \equiv 軍 可 奪 帥 也 9 兀 夫 不 可 奪 志

侯氏 己。 E : 故 帥 可 奪 軍 而 一之勇 志 不 在 可 奪 '', 如 兀 夫之志 可 則 在

● 「未」,司禮監本作「不」。

亦

不足謂之志矣。」

耻者,其由也與?子曰:「衣敝緼袍,與衣狐貉者立,而不

道矣,故夫子稱之。 此,則能不以貧 袍,衣有著者也,蓋衣之賤 與,平聲。 貉之皮爲裘,衣之貴者。 聲。 緼, 敝, 紆 富動其心 壞 粉 反。 也 前 者。 貉, 子路、 緼 叮 枲 胡 狐貉,以 以 之志 著 各 進 也。 反。 於 如

『不忮不求,何用不臧?』」

之,以 乎? 忮,之豉反。 善也。言能 此《 美子路 衛風 也。 0 ○ 忮,害也。 不忮不求,則 雄 吕氏 雉》之篇 **⊟** • 求, 何 貧 孔 爲 貪 子 不 也。 富 引 善

臧?」子路終身誦之。子曰:「是道也,何足以

交,强者必忮,弱者必

求。」

則 矣。 日 道 終 人遠矣。 身 存,蓋 矣, 非 0 所以進 子路之賢 誦之,則自喜其 耻 故 由於 然以 夫子 惡 於日新也 衣 此。 宜 悪 復 衆人而能此 言 食,學者之大病。 不止此, 子路之志如此 此 改激 能, 以 警 而 則 而終身誦之, 之。 而進之。」 不復 可以 求 爲善 其 善心 謝 進 调 於

子 i i 異。 世 守 范 氏 亂 可 見 惟臨 識 日 忠臣。 也。 0 歲寒,然後知松柏之後彫 「小人之在 利 害 欲學者必周於德。」 謝 遇 氏 事變,然後 日 0 治 世 「士窮見節義 或或 君 與 也。」 子 君 之所 子無

●「篇」,司禮監本、吴本作「詩」

序 明 不 憂。 足 也 以 氣 燭 足以 理 故 配 不 道 惑。 義 故 理 不懼 足 以 勝 此學 私 之 故

適 子 道 日 義 輕 可 立 口 道 而 適 日 《異》以 重者 一、未可 與 篤 道 而 也 與者、言其可 不 權。」〇洪氏 變 「可與 可 然後 知所往 學足 也。 權 行 也。 與立 楊 子曰 權 與 可 八共學, 以 氏 權 共學, 可 9 也。 與 明 日 權者,聖人之大用。 與 與 未能 稱 7/0 善 0 口 日 權 共 知所以求之也 錘 可 與 未 . 漢 然後 爲 與 知時 立 謂 立 知 也 口 儒 八立者 此 一,所 「《易》九卦 能權 未 與 而 爲 以反經合 可 事 措之宜 欲 適 己 可 以 與 也 行,鮮 輕 道 與 稱 篤志 適道 則 重 物 口 道 不 然 頣 使 古 程 未 m 口 可 於 後 共 執 與 與 知

> 是矣。 按: 是 權 章,故有反 經 也。 。然以 權與經 先儒誤 有 權 自 變、權 孟 漢 以 經合道之説。 亦當 子 此章連下文 以 ,嫂溺 術之論 下 有 ,援之以手之義 無 皆 人識 介偏其 非 程子非 權 也 字 反 而 權 之, 推 愚 爲 只

遠而。」 「唐棣之華,偏其反而。 豈不爾思? 室是

之辭 棣,大計 也 義 摇 屬 動 興。 也 耳。 翩 0 反。 上兩 其 而 然 所 語 則 旬 謂 助 反 唐 無 爾, 也 亦 棣 意 當 義 亦 郁 與 此 不 但 李 逸 翻 . 知 以 也 詩 口 其 起 也 言 何 偏 F 於 華 , , 所 兩 指 晉 旬

子曰 夫,音扶。 篇仁遠乎哉之意。 未 之思也)夫子 夫 借 〇程 何 其 遠 言 之有 子曰 而 反之,蓋 ? 前

此言 未 八之進。 嘗 言 極 有 易 涵 但 以 蓄 未之思 人之志 意思深遠 也,夫 亦 未 何 嘗 遠 之 難 有 以 BH

鄉黨第十

用之間 舊説 耳。 世。 哉 在目 容色言 楊 甚 ? 氏 矣,孔門諸子之嗜學 今讀 皆 日 凡一章,今分爲十七 學者欲潛心於聖人,宜於 也 蓋盛德 動 . 也 審 無 其 雖 視 然, 聖人之所謂道 書 故 之至,動 不謹 而 夫 詳記 即 聖 子 其 書 人 之 事,宛 而 之。 贵 容 平 備録之,以 周 拘 也 節 H 旋 者 拘 然 尹 如 於聖 而 不離 此 自 動 氏 聖 爲 求 中 人 一人之 乎 之 貽 乎日 焉 日 後

> 孔 恂 子 能 貌 於 黨,父兄宗族之所 言 詞氣 者,謙 鄉 倫 黨 反 如 恂 卑 此 恂 孫 如 恂 順 也 怕 在,故孔 不 ,信實之貌。 似 以 不 賢 能 言 知 子居 者 先 似 也。 不

其 節 問 便 朝 在 政 百 宗 事之所出,言 而 極言 廟 孔子在 也。 遥 朝 反。 之, 宗 廷 鄉黨、宗廟 但 廟 下 便 不可 同 謹 便 禮 言 而 法之 便, 不 唯 不 放 所 旁 謹 朝 明 連反。 爾。 爾 辩。 在 廷言貌 9 故 朝 必詳 此 便

言 朝 誾誾 與 下 如 大 也 夫 言 侃 侃 如 也 與 上 大 夫

侃 朝 時 也 旦 反。 \wedge Ŧ. 制 誾 魚 巾 諸 反。 侯 上大夫卿 此 君 未 下 視

也。誾誾,和悦而諍也。」 大夫五人。許氏《説文》: 「侃侃,剛直

君 如字。 在 也。 踧,子六反。 寧之貌。 節,記孔子在朝 ,踧踖如 「與與,不忘向 君 與與,威儀中適之貌。 也 在,視朝 與與 踖,子亦反。 與與 如也 廷事上接下之不 君 也。 也。」亦通 踧踖,恭敬 與,平聲, 〇張子 〇此 同 不 或

君召使擯, 辟貌。皆敬君命故 君所使出接賓者。 擯 7、必刃 反。 色勃如 躩,驅若 也 足足 也 勃,變色貌。 躩 反。 如 也 ○擯,主國 之

揖 ·所與立,左右手,衣前後,襜 襜 擯用命數之半,如上公九命, 次傳 ,赤占反。○ 命。 揖左人,則左其 所與立,謂 同 如 手 則用 爲擯 也 者 五人, 揖 也 右

人,則右其手。襜,整貌

趨進,翼如也。

疾趨而進、張拱端好、如鳥舒翼。

紓君敬也。○此一節,記孔子爲君
賓退,必復命曰:「賓不顧矣。」

擯

相

鞠躬,曲身也。公門高大而若不容人公門,鞠躬如也,如不容。

立不中門,行不履閾。

閾 長闖之間,君出 ,於逼反。 中 入處 門, 也 中 於 閾 門 也。 門 限 謂 當

閾。○謝氏曰:「立中門則當尊,行履禮: 士大夫出入君門,由闑右,不踐

閾則不恪。」

者。過位,色勃如也,足躩如也,其言似不足

敬

之處 肆 不 敢以 也 君之 ,所謂宁 虚位 虚 位 而 也 慢之也。 謂 君 門 雖 屏 不 之間 言似不足,不敢 在,過之必敬 君 宁立

攝 出 禮 齊升堂,鞠 息 躡 齊 出 之 音咨。 人者也 而傾跌失容 將升 躬如也 堂 攝 近至尊, 兩 手摳 也 摳 屏氣 也 氣 屏,藏 衣 似 容肅 使 不息者。 去 衣下 也 也 地 尺, 息, 縫 也 鼻 恐

翼 如也 誤 降 遠 陸 一所尊, 也。 氏 日 等, 之餘 盡 復其位 〇 等, . 階 舒 逞 也。 也 氣 趨 顔 解 階之級也。 ,踧踖如 色,怡怡 下 趨,走 顔。 本無 此一節, 怡怡 就 進 也 如 字,俗 也 逞, 記孔 也。 和 説 放 没 本 子在 復 階, 也 也 有 位 趨 踧 没 漸 朝

> 圭, 勃如 鞠 躬 戰 如 色 一,足 也 蹜 如 蹜 不 勝 如 有 循 L 如 揖 下 如

圭。 緣物也。 循、《記》所 心 也 勝 而 不 勝, 齊。高 色 平聲。 聘問 上如揖 懼 執主器, 也 不過揖 鄰 謂 蹈, · 下 國 舉 蹜 卑不 執 色 如 則 前 蹜 授, 使 六 曳 輕 舉 大夫執 踵 如 反 過授 謂執圭平衡,手 足 言 不克 促 行不 也。 狹 以 圭, 敬 也。 通信 離 戰 謹 諸 色, 地 之 如 侯 有 戰 與 至 如 命 如

享禮,有容色。

容。」 享,獻也。 有容色, 和 既 也 聘 ^ 而 儀 享 禮 用 **>** 曰 丰 0 壁, 有 發 庭 氣 滿

私覿,偷偷如也。

私 巾 此 覿 晁 節 氏 私 曰 : 記 禮 孔 見 孔 子 世. 子 爲 君 , 定公九年仕魯 愉 聘 愉 於 則 鄰 又 國之禮 和 矣 繙」是也

事 至十三年 疑使 擯 適 "、執 齊,其 兩 間 條, 絶 無 但 朝 孔 子 聘 嘗 往 言其 來 之

君子不以紺緅飾。

禮當如

此

爾。

也。 色。 古暗 紺,深青揚 三年之喪, 反。 緅,側 以飾練服 赤 色, 由 反。 齊 服也。 也。)君子, 飾, 領 孔

紅紫不以爲褻服。

朝祭之服可知。也。褻服,私居服也。言此,則不以爲紅紫,間色不正,且近於婦人女子之服

當暑,袗絺綌,必表而出之。

表 於外,欲其 而出之,謂先著裹衣,表 單也。 不見 葛之精 體 也 者 絲, 詩》所謂 締絡而出 粗 者 「蒙彼 絡 之

震,研奚反。○緇,黑色。羔裘,用黑羊魔,研奚反。○緇,黑色。羔裘,用黑羊

褻裘長,短右袂。

必有寢衣,長一身有半。 長,欲其温。短右袂,所以便作事

此條與 『齊,必 蓋以覆足。 又不可著明衣而 長,去聲。 裘、狐貉亦得 有明衣,布』之下。」 明衣、變食既得以 ○齊主於敬,不 〇程子曰: 以類相從矣。 寢。故别有寢衣 類 此錯 可 愚謂 相從, 解 簡 衣 如 當當在 其 而 此 而 半 則 蓺

狐貉之厚以居。

去喪,無所不佩。 狐貉,毛深温厚,私居取其適體

礪之屬,亦皆佩也。去,上聲。〇君子無故,玉不去身。

觹

五上

變食,謂不飲酒,不茹葷。

常

處

○楊

〇此一節,記孔子謹齊之事

齊所以交神,故致潔變常以

盡

非帷裳,必殺之。

縫矣。 深衣,要半下,齊倍要,則無襞積 ●要有襞積,② 去聲。○朝 祭之服 而 旁 無 殺 裳 縫 用 其餘 IE 而 幅 殺 若 如

羔裘玄冠不以弔。

吉月,必朝服而朝。 喪主素,吉主玄。弔必變服,所以哀死。

子事也。」○此一節,記孔子衣服之制。○蘇氏○此一節,記孔子衣服之制。○蘇氏吉月,月朔也。孔子在魯致仕時如此。

齊,必有明衣,布。

下脱前章「寢衣」一簡。明衣,所以明潔其體也,以布爲之。此齊,側皆反。○齊,必沐浴,浴竟,即著

齊,必變食,居必遷坐。

食不厭精,膾不厭細。

敬氏也。

非謂必欲如是也。人,膾粗則能害人。不厭,言以是爲善,與魚之腥,聶而切之爲膾。食精則能養與魚之腥,聶而切之爲膾。食精則能養

食。臭惡,不食。失飪,不食。不時,不食饐而餲,魚餒而肉敗,不食。色惡,不

反。飪,而 食饐之食,音嗣。 味變也 甚 魚爛 反。 日 饐,於冀反。 餒。 饐 肉 飯傷 腐 熱濕 餲,烏邁 敗。

^{●「}裳用」,仿元本乙倒。

② 「積」,元甲本、仿元本作「吴」。

熟之類。此數者皆足以傷人,故不食。生熟之節也。不時,五穀不成,果實未惡、臭惡,未敗而色、臭變也。飪,烹調

割 爲 苟食耳。 也。 不正,不食。不得其醬, 割 漢陸續之母,切肉未嘗不方,斷葱 肉 度,蓋其質美,與此暗合也。 各有所宜,不得則不食, 此二者,無害於人,但不以嗜味 不方正者不食,造次不離於正 不食 惡其不備 食肉 以 也。 用 而

肉 雖多,不使勝食氣。 氣 食,音嗣。 不使肉勝食氣 0 亦 但以醉爲節 不可使亂 不及亂 量,去聲。 ,但浹洽而已可 者,非唯 而 酒以爲 不 惟酒無量,不及亂。 及 〇食以穀爲主, 不使亂 人合歡,故不 亂 耳。 也。 志,雖 程 子 爲 恤.

古河, 近夏见。 弘下青河沽酒市脯, 不食。

沽、市,皆買也。恐不精潔,或傷人也

與不嘗康子之藥同意。

不撤薑食。

薑,通神明,去穢惡,故不撤。

不多食。

祭於公,不宿肉。祭肉不出適可而止,無貪心也。

日

出

日,不食之矣。

助祭於公,所得 比君所賜胙, 敗,而人不食之,是褻鬼神之餘 過三日,皆以 經宿者,不留 分賜。 可少緩耳。 神 惠 胙 也。 肉, 蓋 歸 過三日 家之祭肉 即 頒 賜 則 也 肉 則 不 俟 旧 心 不

食不語,寢不言。

主 言語 恐傷之也。」亦通 答述日 聖人存心不他,當食而 而聲 非其 出 語。 焉 時 也。」〇楊氏 自 寢食 言 則 日 氣 言。 室而 日 不 當 范 通 寢 氏 肺 語 而 티 : 寢 氣

雖疏食菜羹,瓜祭,必齊如也。

也 記 窮 祭,其祭必敬,聖人之誠 忘 飲食如此,非 必。」〇古 豆間之地, П 以傷生,當 孔子飲食之節。 本 音嗣。 腹 也。 者 人飲 或反食之,欲心 齊,嚴敬 以 如 極 祭先代始 陸 食, 此 П 氏 腹之欲,蓋養氣 每 貌 然聖人之所不食。 種 : 謝 爲飲食之人,不 各 也。 孔 氏 $\overline{\sim}$ 出 勝 子 日 魯論 少許 〇此 雖 而 不 薄 **>** 一節 暇 聖人 體 物 瓜 置 必 之

席不正,不坐。

正者,雖小不處。」謝氏曰:「聖人心安於正,故於位之不

杖者,老人也。六十杖於鄉,未出不敢鄉人飲酒,杖者出,斯出矣。

先,既出不敢後。

鄉 人難, 其誠 儺 之神,欲其依己 近於戲,亦 相氏掌之。 孔子居鄉之事 乃多 敬也。 朝 反。 服 必朝 阼階; 或曰 而 立於作階 儺 而 服 . 東階 ,所以 安也。」〇此 加 「恐其驚先 臨 也 之者, 逐 疫, 儺 無 雖 周 祖 所 古 節 禮 Ŧi. 不 禮 **>** 祀 用 方 Mi

敢嘗。」 康 問 子 拜送 饋 於 使者 他 藥 邦, 拜 如親見之,敬也。 再拜而送之。 而 受之。 日 丘

未

達

不不

不飲 故告之如此。 達,則不敢嘗。 范 有賜,拜 氏 ,皆在其 . 而受之,禮也。 凡 中矣。」〇楊氏曰: 然則可飲而 賜 受 食, 而 不飲 必 未達不敢嘗, 嘗 飲,不可飲 則 以 虚 拜 人 0 八之賜 大夫 藥 未 耐

で 具へざい残焦。疾也。必告之,直也。」○此一節,記孔

子與人交之誠意。

蓋貴人賤畜,理當如此。非不愛馬,然恐傷人之意多,故未暇問。廐焚。子退朝,曰:「傷人乎?」不問馬。

薦之, 君賜生,必畜之。 君賜腥,必熟而

對 腥,生肉。 食 畜之者,仁君之惠,無故不敢殺. 君 恐 或餕餘、故不以薦。 也。 言先嘗,則餘 熟而薦之祖考,榮 當 正席 以 也。 君 頒 先 賜 賜 嘗 矣。 如

侍食於君,君祭,先飯。

不敢當客禮也。○《周禮》:「王日一舉,飯,扶晚反。○《周禮》:「王日一舉,

疾,君視之,東首,加朝服,拖紳。

服見君 氣也。 首,去聲。 病卧不能著 ,故加朝服於身,又引大帶於上 拖,徒 我 衣 反。 東 ○東首,以 帶,又不 口 受生 以 褻

也。

隨

此

重出。

朋 朋 友死 祭肉 友之饋,雖車馬,非祭肉,不拜。 朋 朋友以義合, 友 此一節,記孔子交朋友之義 則 有通財之義,故雖車馬之重,不 無所歸,日 拜者 敬 死無所歸,不得不殯。 其祖 於我殯。」 考,同 於己 親 拜。 也。

户,居

夭是也 但 體 也 儀 不若奉祭祀 謂偃 而亦未嘗肆 范氏 惰慢之氣 卧 티 : 似 死 不 人也。 見賓 耳。 寢不 設於身體,雖 户,非 客 居 居。 而已。 不容 居 悪 其 舒 非 申 類於死 布其 申、 夭 四

見齊衰者,雖狎,必變。 褻,必以貌 見 冕 者與 (瞽者 雖

貌。 狎,謂素 餘見前 親 篇 狎。 褻, 謂 燕 見。 貌 謂 禮

M 服者、式之。 式負版者

式 之所天也, 喪,重民數 負 版,持邦國 車 - 前横 況其下者,敢不敬乎? 故《周禮 也 木。 圖 「籍者。 人惟萬物之靈 有所 ||| 獻 敬 式 民 此 則 數 俯 於 者 王 而 憑 王 王 哀 之。 者 有 拜

> 有 盛 敬 主人之禮,非 饌,必變色 而 作 其 饌

也

迅雷 風烈、必變。

之怒。《記》曰: 迅,疾也。烈,猛也。 雨則必變,雖 夜必 「若有疾 興,衣服 必變者, 冠 風 迅 而 所以敬 甚 天

升 車 必正立執綏。

此

節,記孔子容貌之變。

也。」 綏 蓋君子莊敬無 立執綏,則心體無不正,一 ()挽以 上車之索也。 所 不 在 一,升 ○范氏 而 車 誠 意肅恭矣。 則 티 : 見於此

車 中,不内 子升車之容。 \equiv 内 者皆失容, 顧 口 顧 視 也。 且 疾言,不親指 感人。 《禮》曰 〇此 不 節 過 記 孔

色 斯 舉 矣, 翔 而 後 集。 論

語

卷第五

曰 : 之,三嗅而作。 視 處,亦當如此。 言鳥見人之顔 而 「山梁雌雉、時哉 後下止。 人之見幾 色不 然此上 善則 下, 時哉 飛去。 而作,審 必有闕文矣。 」子路共 口 擇所 翔審

邢氏 之。 字當爲拱執之義。 見《爾雅》。」愚按: 共,九用反,又居勇反。嗅,許又反。 强爲之説。 云: 啄得其時。子路不達,以爲時物 孔子不食,三嗅其氣而起。」 日 「嗅,當作臭,古闃反。 「石經嗅作夏,謂雉鳴也。」劉聘君 「梁,橋也。 姑記所聞,以俟知者。 然此必有闕文,不可 如後兩説,則「共」 時 哉、言雉之飲 張兩翅也。 〇晁氏 而共具

論語卷第六

朱熹集注

先進第十一

直稱閔子,疑閔氏門人所記也。」曰:「此篇記閔子騫言行者四,而其一此篇多評弟子賢否,凡二十五章。胡氏

禮樂,君子也。子曰:「先進於禮樂,野人也,後進於

文學:

子游、子夏。」

語

宰我、子貢。 政事:

冉有、季路

樂,文過其質,今反謂之彬彬,而以爲君謂之質朴,而以爲野人。後進之於禮郊外之民。君子,謂賢士大夫也。○程郊外之民。君子,謂賢士大夫也。○程然,後進,猶言前輩、後輩。野人,謂

自知其過於文也。」 子。蓋周末文勝,故時人之言如此,不

「如用之,則吾從先進。」

又自言其如此,蓋欲損過以就中也。用之,謂用禮樂。孔子既述時人之言,

「德行: 顔淵、閔子騫、冉伯牛、仲弓。言之,蓋不忘其相從於患難之中也。 之,蓋不忘其相從於患難之中也。 之,蓋不忘其相從於患難之中也。

者固不止此。曾子傳道而不與焉,故知人,而并目其所長,分爲四科。孔子教人,而并目其所長,分爲四科。孔子教人,而并目其所長,分爲四科。孔子教

+

説。 子 回 也 非助我者也,於吾言無所 不

問 若有憾焉,其實乃深喜之。○胡氏 識 説,音悦。 人之謙德,又以深贊顔氏云爾。」 , 去子之於回, 豈真以助我望之。 J. 而有以相 通 無所 〇助我,若子夏之起予,因 長也。 疑問 ,故夫子云然。 顔子於聖人之言, 其 蓋 聖 辭 疑

謹

謹

175

子曰 昆弟之言。」 「孝哉閔子騫 人不 間 於其 父母

間 實,有以積 孝友,人皆信之 去聲。 於中 〇胡 氏 而著 無 曰 : 異 於外,故夫子 詞 者 「父母 蓋 其 兄 孝 弟 友之 歎 稱 而 其

> 南容三復白圭,孔子以其兄之子妻之。 篇 曰: 子以兄子妻之。〇范氏曰: 事見《家語》,蓋深有意於謹言也。 之玷,不可爲也。」南容一日三復此言, 三、妻,並去聲。 有道所以不廢,邦無道 於行者。南容欲謹其言如此,則必 之表,行者言之實,未有易其 「白圭之玷,尚可磨也 〇《詩·大雅·抑》之 所以免禍, 「言者行 9 而 此 能 故孔 能

邦

季 日 康 0 則亡。」 子問 有 顔 口 者好學,不幸短 弟 子 孰 爲 好學?」 命 孔 死 矣! 子對

好 口 去聲。 而對有詳 ○范氏 略者,臣之告君,不可不盡 「哀公、康子問

0 司 禮監 本作「子」。 句末原行 一圈,今删去。

論 語

椁,欲賣車以買椁也。 子始教而受學焉。椁,外棺也。請爲 預路,淵之父,名無繇。少孔子六歲,孔 顔淵死,顏路請子之車以爲之椁。

子曰:

「才不才,亦各言其子也。

鯉

也

吾從大夫之後,不可徒行也。」 死,有棺而無椁。吾不徒行以爲之椁。 鯉,孔子之子伯魚也,先夫子卒。● 言鯉 椁,駿可以脱 夫之列,言「後」,謙辭。 之,則皆子也。 之才雖不及顏淵,然己與 命車不可以與人而鬻諸市也。 今乃不許顔路之請,何耶? 葬可以無 孔子遇舊館人之喪,當脱驂以賻之矣。 而復求,大夫不可以徒行, 孔子時已致仕,尚從 顔路以父視 胡 氏 且爲所 大

> 心 識 可 吾之有無 與 窮 否,豈獨視有無而已哉?」 (直道 乏者 哉? 加 得 E, 我 或者以 而 夫君子之用 勉 强 爲 以 君子行禮, 副 其 財 意 視義之 視 誠

天喪己也。○噫,傷痛聲。悼道無傳,若予!」 ○噫,傷痛聲。悼道無傳,若予!」 天喪予! 天喪予! 天喪

從,去聲。○慟,哀過也。 顔淵死,子哭之慟。從者曰:「子慟矣。」

曰:「有慟乎?

非夫人之爲慟而誰爲!」哀傷之至,不自知也。

夫,音扶。爲,去聲。○夫人,謂顏淵。

■「夫」,司禮監本、吴本作「孔」。

胡 其 之正 氏 死 日 口 也。 . 惜,哭之宜 痛惜之至, 慟 非 施 他 當其 人 之 可 比 也

顔 淵 喪具 故 夫子止之。 死 稱家之有無,貧而厚葬,不循 門人欲 厚葬 之,子曰 0 示 可 理 0 也,

門人厚葬之。

蓋顔路聽之。

也。非我也,夫二三子也。」子曰:「回也視予猶父也,予不得視猶子

歎不得如葬鯉之得宜,以責門人也。

死 季 路 鬼?」「敢 問 事 鬼神。 問 死。 子曰 日 . . 「未能」 未知 事 生, 人, 焉 能 知

祭祀之意。而死者人之所必有,不可不焉,於虔反。○問事鬼神,蓋求所以奉

初無二 鬼,一 必 必 知 子 告子路,不知此乃所以深告之也。」 事人之道,則盡 告之. 之道也。 不能 不 能 而二,二而一者也。或言夫子 切 如 反 理,但學之有序,不 事 問 此。 終 神 也。 知生之道 而 〇程子曰: 知所 非 事鬼之道。 原 非 以 始 誠 ,則知死之道。 死 而 敬 足 知 可躐等 蓋 「晝夜者 死、生, 所 以 出出 以 事 明 故夫 始 生, 人 則 則

冉有 閔子侍側, 音洛。 誾、侃,音義 英材而教 、子貢 行行,剛强之貌。 、侃侃. 誾 育之。 誾 見前篇。行, 如 如 也; 也。 子樂。 子路,行行 子樂者, 胡 浪 反。 如 也

若由也,不得其死然。」

理,故因以戒之。其後子路卒死於衛孔尹氏曰: 「子路剛强,有不得其死之

『曰』字之誤。」
上有『曰』字。」或云:「上文『樂』字,即性之難。」○洪氏曰:「《漢書》引此句,

魯人爲長府。

長府,藏名。藏貨財曰府。爲,蓋改作

之善。」 作勞民傷財,在於得已,則不如仍舊貫仍,因也。貫,事也。〇王氏曰:「改

當理,惟有德者能之。 夫,音扶。中,去聲。○言不妄發,發必子曰:「夫人不言,言必有中。」

程子曰:「言其聲之不和,與己不同子曰:「由之瑟,奚爲於丘之門?」

門人不敬子路。子曰:「由也升堂矣,未和,故其發於聲者如此。

之也。 之也。 之也。 之也。 之也。 一門人以夫子之言,遂不敬子路,故夫子 一門人以夫子之言,遂不敬子路,故夫子 一門人以夫子之言,遂不敬子路,故夫子

也過,商也不及。」 子貢問:「師與商也孰賢?」子曰:「師

子夏篤信謹守,而規模狹隘,故常不及。

子張才高意廣,而好爲苟

難

,故常過

中。

與,平聲。○愈,猶勝也。曰:「然則師愈與?」

子曰:

「過猶不及。」

道 故聖人之教,抑其過 過與不及 日 道 肖之不及,然其失中則一也。 圃 以 中庸 「中庸之爲德也,其 约均 爲至。 也。 差之毫釐,繆以千里。 智之過 ,引其不及,歸於中 至矣乎 雖若 〇尹氏 勝 於 夫 愚

之。 季氏富於周公,而求也爲之聚斂而附益

以益其富。○周公以王室至親,有大功,爲,去聲。○周公以王室至親,有大功,

可也。」 子曰: 「非吾徒也。小子鳴鼓而攻之,

門人聲其罪以責之也。聖人之惡黨惡非吾徒,絶之也。小子鳴鼓而攻之,使

也。 已也。 術不明,不能反求 施於季氏,故爲不善至於如此,由 之,而猶使門人正之,又見 而 害 民 ○范氏 也 如 此 日 . 然 諸身,而 一冉 師 嚴 有以政事之才 而 以仕 友 其愛人之無 親 故 爲 急故 其 己 1 絶

柴也愚,

寶」。 影 血三年,未嘗見齒。 不足而厚有餘。《家 柴,孔子弟子,姓高, , 啓蟄不殺, 方長不折。 可以見其爲人矣。 避難 字子 語 》記其「足不 執親 羔。 而行,不徑 之喪,泣 者 履 知

參也魯,

道,乃質魯之人爾。 門學者,聰明才辨,不爲不多,而 之。」又曰: 魯,鈍也。 〇程子曰 「曾子之學,誠 : 故學以 參 也 篤 誠實 竟 而 卒 E, 以 爲 傳 魯 其 聖 得

也 也 確 所以能 尹 氏 深造乎道也。」 曾子之才 魯 故 其 學

師 也 辟

止 婢 一誠實也 亦 反。 辟 便 辟 也 謂 習 於 容

由 也 喭。

喭,五 語 之首 當 謂俗論 在此章之首, 之使知自 ,脱了日二二字。 旦反。 也。 勵 楊氏 也。」〇 而 喭 通爲 粗 日 俗)吴氏 或疑下章『子日 也 章。 四四 日 者 傳 性之偏 稱 喭者, 此 章

子 也 其庶乎,屢空。

也。 近 不 也。 言其近 ·以貧 言 窶 近 動 道 ,又能安貧 心而求富 也。 屢 空, 故故 數 屢 至 至 於 空 空 貴

中 不受命, 而 ○命,謂 殖 焉 億 天命。 則 屢 貨 中。 殖 貨 財

生

貴

也

道

也

矣。」 中者 若後 安貧 爲 其 絶 子貢 殖 而 1 中 也 樂道 少時 之不貴言也如是。」 『賜 者 ○范氏 人之豐財,但此心未忘耳。 也 不改其樂也。 則是不能安受天命 哉 而 事 意度 然其 幸言 已,非 程 至 日 貧富 子 也。 聞 才識 而 E 窮理 中,是 在天,而子 性與天道 屢空者,簞 天下之物, 言子 之明, 樂 子 天者 貢 使 矣。 貢之貨殖 賜 亦 不 能 貢 如 多 也 其 贵 食 則 然此 言 料 有 爲 事 貨 也 夫子 口 飲 而 此 殖 動 屢 亦 非 名

子張 八於室。 問 善 人 之道 0 子 日 : 不 踐 跡, 亦 不

踐 跡 而 質 自 如言 美 不爲惡 而 循 未 涂 然 學 守 者 轍 亦 也 不 善 能 人 聖 雖 程 不 子 之室 必 踐

聖人之室也。」 於惡,有 也 也 諸 欲 子 **此**仁,故 也。 0 雖不 由 善 不 人欲 踐 學,故無 成 法, 而 自 亦 未 不 志 而 蹈 於

乎? 子曰 與, ? 則 如字。 言不可以言貌取人也。 未 論篤是與,君子者乎? 知 其 〇言但以 爲 君 子者 其言論 乎? 篤 爲 實 色 色莊 莊 而 者 與 者

之。 在 子路問: ,如之何 諸?」子曰: 赤也惑,敢問 由 求 由也 也問 也 聞 其 問 兼人,故退之。」 聞 斯 二間 聞 斯 行 斯行 斯行 子子 行 諸?」子曰: 之? 聞 諸」,子 諸」,子曰 斯 日 : 行之。」公 一冉有 日 求 「有 問 『有 也退, 聞 父兄 斯 西 父兄 聞 故 行 華

> 專者。 中 所當爲者逡巡畏縮 資禀失之弱,不患其不禀命 過,而於所當禀命者有闕耳。 當爲不患其不能爲矣,特患爲之之意 子路有聞,未之能行,惟恐有聞 古 兼 當 人, 而使之無過不及之患也。」 進之,一退之,所以約之於義 勇 若不禀命 爲,然有父兄在 勝 人也。 而 行,則反傷 而 張 爲之不勇耳。 敬 則 夫 有 日 也, 不 若冉 0 於義 則於 患 求之 得 理之 其 聞 聖 於 或 所

矣。」曰: 子畏於匡, 王之制,民 在 「則致 不赴 子 死焉。 顔淵後。子曰: 而 〇後 生於三,事 在,回 必 死 謂 況顏淵之於孔子, 也。 何 相失在後。 敢 之如一。 死 ? 胡 一吾以 氏 日 惟其 何敢死 女爲 0 恩義 所

子而 捐生以赴之,幸而不死,則必上告天子, 孔 兼 之鋒乎?」 ·告方伯 子不幸而 盡 在,則 ,又非他人之爲師弟子者而已耶。**●** 清請 口 遇 討以 何爲 難 ❷回必捐生以赴之矣。 而 復讎,不但已也。夫 不愛其死,以犯 匡

家得臣二子,故問之。與,平聲。○子然,季氏子弟。自多其季子然問:「仲由、冉求可謂大臣與?」

季然也。 曾,猶乃也。 輕二子以抑異,非常也。 曾,猶乃也。 輕二子以抑

者,必行己之志。 以道事君者,不從君之欲。不可則止「所謂大臣者,以道事君,不可則止。

「今由與求也,可謂具臣矣。」

曰:「然則從之者與?」具臣,謂備臣數而已。

氏之所爲而已。○意二子既非大臣,則從季與,平聲。○意二子既非大臣,則從季

子曰:「弑父與君,亦不從也。」 知其不 深許 從也 意其 時 氏 折 則聞之熟矣,弑逆大故,必不從之。 言二子雖 季 季 專 氏 ,其庶乎二子可免矣。」 可 氏 權 二子以死難不可奪之節,而 不 使從己 已 可 僭 不足於大臣之道,然君 而 有 竊,二子仕其家而 臣之心也。〇尹 無 不能止也, 也,故曰弑父與君,亦不 君之心,故自 可謂具臣矣。是 氏 多其得 不能 曰 : 又以 臣之義 Œ 也 陰

句。

^{● 「}耶」,元甲本、元乙本、司禮監本、吴本作「即」,屬下

②「孔」,司禮監本、仿元本、吴本作「夫」。

於治人,其説具於方册。

讀

而知之,然

子路使子羔爲費宰。

子路爲季氏宰而舉之也。

子曰:「賊夫人之子。」

質美而未學,遽使治民,適以害之。夫,音扶。下同。○賊,害也。言子羔

書,然後爲學?」子路曰:「有民人焉,有社稷焉,何必讀

子曰: 「是故惡夫佞者。」 言治民、事神皆所以爲學。

耳。 慢神 未嘗學,而使之即仕以 惡,去聲。○治民、事神,固學者事, 政學者也。 本意,但 必學之已成,然後可仕以行其學。 范氏曰: 而虐民者幾希矣。子路之言,非其 故夫子不斥其非 理屈詞窮,而取 蓋 「古者學而 道之本在 ,而特惡其佞也。 爲學,其不至於 於脩身,而後及 後人政,未聞 辦於口 以禦人 若 以 初 然

> 也。 後能 不知其過而以口給禦人,故夫子惡其佞 使子羔以 行 何 政 可 爲 以 學,失先後本末之序矣。 不 讀 書 也 ? 子 路 乃欲

子曰: 以哉?」 子 居則日 長,上聲。〇言我 路、曾皙、冉有、公西華侍坐。 志,而聖人和氣謙德 勿以我長而難言。 坐,才卧反。 0 「以吾一日長乎爾,毋吾以 『不吾知也!』如或知爾,則 ○皙,曾參父,名點。 雖年少長於女,然女 蓋誘之盡言以觀 ,於此亦可見矣。 也。 其 何

子路率爾而對曰: 「千乘之國,攝乎大國汝,則汝將何以爲用也? 言女平居,則言人不知我。如或有人知

❶ 「辦」,吴本作「辨」。

一七三

哂之。 之,比及三年 加之以 師 可 旅, 使 有 因 一之以 勇 且 饑 知方 饉 也 由 夫子 也 爲

之貌。 菜不 也 五. 问 一反,下同。 義 百 去 熟日 列則 人爲: 聲。 攝 能 管 旅。 饉。 親 饑, 其上、死 東也。 哂,詩忍反。 方,向 因, 音 機。 二千 仍也。 也, 其長矣。 饉 謂 穀 五. 音 向 不 百 僅 率 義 哂,微: 熟 爾 也 爲 日 比 饑, 師 笑 民 心

如其 五六十,求 | 求 ! 禮樂,以俟君子。 爾 何 也 如?」對 爲 之,比 日 及三 年, 方 六 可 七十, 使 足 如

見 六十里,則 方六七十里, 言 哂 以故其 非 爾 己 何 又 詞 所 如?!孔 益 能 小 小 遜 國 矣。 冉 也 有 足, 子 謙 如 問 富 猶 退, 也 足 又以 或 也 下 也 放 子 俟 此 路 君 五.

> 學焉。 相 赤 焉 1 宗 爾 廟 何 之事 如 ? 如 對 會 日 . 端 非 章 甫 日 能 願 之 爲 小 願

服。 諸 「小」,亦謙 言 以 相,去聲。 未能 君子自 侯 時 章甫 而 見 居。 願學也。● 辭 日 〇公公 禮冠 會,衆 故將言己 西 華 相, 宗 覜 志 爾之事 費 日 於 志 君之禮者。言 同 禮 而 樂 先 端,元端 之 謂 爲 祭祀 事 遜 詞

作,對 浴乎 者,春服既 點 何 . 傷乎? 沂 「吾與點也 日 爾 風 : 何 乎舞 成,冠者 如? 「異乎三子者之撰。」 亦各言其 雩, 1 鼓瑟 五 詠 六人,童子六七人, 志 而 希, 歸。」夫子喟然歎 也。」曰: 鏗 爾, 子 舍 「莫春 瑟 日 mi

苦 耕

反。

舍,

上

免反。

0

也, 元甲本作 馬

[「]元」, 係避宋太祖始祖 玄朗諱。吴本作「玄」。

歌也。 蓋 深許之。❸ 之末者,氣象不侔矣,❷所以夫子歎息而 初無舍己爲人之意。 其動静之際,從容如此。 又 處,天理流行 雩,祭天禱雨之處,有壇墠樹木也。 除是也。 春服 也 以 有温泉焉,理或然也。 莫、冠,並去聲。沂,魚依 亦 不 方鼓瑟,故孔子先問求 四子侍坐,以 有以識 地 過即其所居之位,樂其 自見於言外。 ,單給之衣。 希,間歇也。 曾點之學,蓋 萬 沂,水名,在魯城南,地志 物上下同 而門人記其本 此 隨處充滿 矣。 监 浴,盤濯也,今上 作,起也。 流, 視三子規規於事爲 爲 而其 有 序,則點當次對。 各得其所之妙, 風,乘 以 無少欠缺。 末獨 反。 胸次悠然,直 而其言志,則 、赤而後及點 見夫人欲盡 撰, 具也。 日用之常, 雩,音於。 凉 加詳 也。 以爲 已被 故 舞

> 夫,音扶。曰:「夫子何哂由也?」 之言何如?」子曰:「亦各言其志也已矣。」 三子者出,曾皙後。曾皙曰:「夫三子者

請其説。點以子路之志,乃所優爲,而夫子哂之,故

曰:「爲國以禮,其言不讓,是故哂之。」

夫子蓋許其能,特哂其不遜。

六十而非邦也者?」「唯求則非邦也與?」「安見方六七十、如五

貶詞,蓋亦許之。 國而不見哂,故微問 與,平聲。 下同。 〇 曾 點 之。 以 冉 夫 子 求 之答 亦 欲 爲 無

此亦曾皙問而夫子答也。孰能爲之大,何? 赤也爲之小,孰能爲之大?」「唯赤則非邦也與?」「宗廟會同,非諸侯而

2

[[]也]下,司禮監本有「莫春和煦之時」六字。

[「]氣」上,司禮監本、吴本有「其」字。

[「]所以」,司禮監本、吳本作「故」。

言無 意。」 之。若達,却便是這氣象也。」又曰: 點也」。」又曰: 子之志。 點,狂者也,未必能爲聖人之事, 子皆欲得國 小,子路只爲不達爲國以 不掩焉耳,此 堯、舜氣象也。 如人游心千里之外,然自身却只在此。」又 如子路、冉有、公西赤言志如此,夫子許 安之,朋友信之,少者懷之,使萬物莫不遂 言樂而得其所 亦以此自是實事。 能 「古之學者,優柔厭飫,有先後之序。 「孔子與點,蓋與聖人之志同 曾點知之,故孔子喟然歎 出 故曰浴乎沂,風乎舞雩,詠 其右者, 而治之,故孔子不取。• 所謂 也。 誠異三子者之撰,特行 「曾點、 狂 亦許之之詞。 孔子之志,在於老者 也。 漆 後之學者好高。 禮道理,是以 子路等所見者 雕 開,已見大 而能知 曰『吾與),便是 而歸 程 子 哂 有

顔淵第十二

凡二十四章。

克已

復禮,天下歸仁

馬。

爲仁由己,而

顔淵問仁。

子

Ħ

.

克己復禮爲仁。

而由人日

乎哉?」

也。 私欲也。 天理,而 德,莫非天理,而 爲仁者,所以 爲仁者必有以 與其仁,極言其效之甚速而至大也。 者,本心之全德。 又言一 本心之德復 復,反也。 日克己復禮,則天下之人皆 全其 勝私 亦 心之德也。 不能 禮者,天理之節文也 克,勝也。 全於 欲 而復於禮 不壞於 我矣。 蓋 己,謂身之 人欲。 則 歸,猶與 心之全 事 皆 故 X

「孔」,吴本作「夫」。

事 意 則 言 一,須從 皆仁,故曰天下歸仁。」○謝 程 私 在 爲 方始是仁。」又曰 子曰 欲 我 何 净 而 由 性偏難克處克將去。」 得 盡 無 己 仁? ,天理 難 而 非 也 非 禮處便是私意。 須是克盡 流 他 日 行 人 0 日 ,而仁不可 所 「克己 克之,不以爲 能 己 預 氏曰 私 復禮 又見 皆 勝 既 用 歸 是 其 則 矣 難 事 於 私 機

顔淵 口 禮 雖 勿 日 不敏 聽 請 非 「請問 禮勿言,非禮勿 事 斯語 其目。」子曰 矣。」 . 動。 非禮勿視 顔淵

中 直請 事 私復禮之機 欲之際,已判然矣,故不復有 條件 ,禁止之辭。 其 事 而 條 也 事之事 H 目 用之 也。 也。 顏淵聞夫子之言,則於天 是人 間 私 非 請 莫 勝 禮者,己之私 事 心之所以爲主, 非 則 斯語 天理之流 動容周 顏子默識 所疑問 旋 也 行 無 而 其 不 勝 理 ጠ

矧是 悖 來 於外, 勿言 心之動,因言以宣。 閑 誘 視爲 宜 禮之目 召 其《聽箴》曰 日 M 理,又自 而 邪 物化,遂亡其正。 服 斯 應 不 之則。 樞 存 乎外, 疑 違 傷易 膺而勿失也。 語 『心兮本虚 非禮 以安其内。克己復禮、久而誠 誠,非 機 所 子子 也。 知 則誕,傷 非 哲人知 其 興 以進於聖人。 勿動」四者,身之用 日 制 蔽交於前,其 法 『非禮. 力有 戎 禮勿聽。』其《言箴》曰 於 程 不 『人有秉彝,本乎天性。 出 外 子 道, 以勝 幾,誠之於思。 應物 煩 好 所 因箴以自警,其《視箴 勿視, 日 卓彼先覺,知止有定。 發禁躁妄,内斯静 則支。 欽哉 以 之,故直 吉凶榮辱,惟 無 養其 後之學聖人者 非禮 跡。 中 訓 顔 己肆 則遷。 中 淵 辭 也 操之有 勿 問 也 以 物件 聽 克 志士 由 爲 制之 矣。」 顔 乎 己 其 非 己 要 專。 動 中 復 所 知 禮 任

之言。 者 致其 不可以不勉也 歸。』」愚按 次克念,戰兢 尤宜深 ,守之於爲。 决。 非至明不 玩 故惟 自 此章問 顔 順理 持。 能 程子之箴, 子 察其 得聞之,而 則裕、從欲 答,乃傳授 習與 八幾 性 非至 發明親 成 凡學者 惟 心 健 聖賢 法 危 切 不 切 亦 能 要 口

仲弓 怨,在家無 如承大祭。 語矣。」 間仁。 怨。」仲弓曰 己所不欲, 子 E : 出門 勿施於人。 「 雍 雖 如 見大賓, 不 敏,請 在 邦 使 無 事 民

出 自考也。 德全矣。 敬以持己,恕以 便是守之之法。」或問: 如見大賓,使民如承大祭。 須 心 内外無怨,亦以其效言之, 〇程 廣體 子曰 照胖,動 及物,則私意無所容 . 容周 「孔子言仁, 旋 一出門、 中 看 其 使民 只 使 惟 而 心

以此。

使其於此

而

謹

之,則

所以

爲

不外是矣。

克矣。 其高 之時 事於敬恕之間而有得焉,亦將無己之可 道 民,然後有此敬也。」愚按 此,則前乎此者敬可知矣。 之何?」曰 後見於外。 也 下淺深,於此 如 主敬 此 可 觀 行恕,坤道也。 也 「此儼若思時 其出門、 可見。 未 出 使民 門、 然學者誠能 之時,其 使 也 非因出門、 克己復禮,乾 顏、冉之學, 有諸 民 之時 敬 中 從 使 如 而 如

司 馬牛 問仁。

子曰 訒 不放,故其言若有所忍 司 ,音刃。 馬 端也。 牛,孔子弟子,名 「仁者其言也 夫子以 ○ 訒,忍也 訒 牛 難也。 多言 而 向 不 而躁, 易發,蓋 仁者 故 心 告之 其 存

德

而

爲之難,言之得無訒乎?」曰:「其言也訒,斯謂之仁已乎?」子曰:

者之身,而皆爲人德之要,則又初不異也。 讀者其致思焉。 之言,雖有高下大小之不同,然其切於學 無自以入德矣。故其告之如此。蓋聖人 則以彼之躁,必不能深思以去其病,而終 以其病之所切,而泛以爲仁之大概語之, 止此爲是。」愚謂牛之爲人如此,若不告之 再問之語,牛之易其言可知。」〇程子曰 之而不出也。〇楊氏曰: 事不苟,故其言自有不得而易者,非 子又告之以此。 牛意仁道至大,不但如夫子之所言,故夫 雖爲司馬牛多言故及此,然聖人之言,亦 蓋心常存,故事不 「觀此 及下章 强閉 荷

向魋作亂,牛常憂懼,故夫子告之以此。司馬牛問君子。子曰:「君子不憂不懼。」

去,音扶。○牛之再問,猶前章之意,故復曰:「内省不疾,夫何憂何懼?」曰:「不憂不懼,斯謂之君子已乎?」子

自得,非實有憂懼而强排遣之也。」
憂不懼,由乎德全而無疵。故無入而不可遽以爲易而忽之也。○晁氏曰:「不無愧於心,故能内省不疚,而自無憂懼,未無愧於心,故能内省不疚,而自無憂懼,未

子夏曰:「商聞之矣:中有兄弟而云然者,憂其爲亂而將死也司馬牛憂曰:「人皆有兄弟,我獨亡。」

蓋聞之夫子。

爲而爲,非我所能必,但當順受而命禀於有生之初,非今所能移,「死生有命,富貴在天。

皆兄弟也。君子何患乎無兄弟也?」「君子敬而無失,與人恭而有禮。四海之内

八〇

且 辭,●讀者不以辭害意可 子夏欲以 文 能 既 而 意,意圓 子夏四海皆兄弟之言,特以),則天 持己 昧於理,是以不能踐其言爾。」 子夏知此 安 於 命 以敬而 而 下之人皆愛敬之,如兄 又當 寬牛之憂,而爲 語滯者也,惟聖人則無此病矣。 而 以哭子喪明,則以 不間斷,接 脩 其在 己 也。 人以 者。 是 廣 不得已 恭)胡氏 弟 司 故 馬牛之 蔽 又言 矣。 而 日 有 之 節 荷

子張問 不行焉, 明。 叮 謂明也已矣。浸潤之譖,膚受之 子曰 「浸潤之譖,膚受之愬

譖。莊 ,不行焉,可謂遠也已矣。」 浸灌滋潤 所謂 之冤 膚 蔭反。 受, 也。 「剥牀以 漸漬 謂 愬,蘇路反。○浸潤,如水之 肌 毁人者漸漬而不驟, 而 膚 膚,切近災」者也。 不驟也。 所受,利害切 譖,毁人之行 身。 則聽

> 遠惟明。」 又謂之遠,遠則明之至也、《書》 潤之譖、膚受之愬不行,然後謂之明。 身者,不行焉,有不待明者能之也 之,故其詞繁 二者 而 者不覺其 不蔽於近矣。 〇楊氏曰: 切 3身,則 難 察 人,而信 而能察之,則可 聽者 而不殺, 驟而 此 不 亦必因 及致詳, 之深矣。 語之,與利害不切於 以致丁寧之意云。 子張之失而 見其心之明 而發之暴矣。 冤 日 者 故浸 急 視 而 而 迫

子貢 問 政。 子 日 足 食, 足兵, 民 信

於我,不離叛也 言倉廪實 而 武 備脩, 然後教 化 行 而 民 信

子貢 曰: 「必不得 己 而 去, 於斯 者 何

先?」曰:「去兵。」

¬貢曰:「必不得已而去,於斯二者何兵而守固矣。(○言食足而信孚,則無去,上聲。下同。○言食足而信孚,則無

立。」先?」曰:「去食。自古皆有死,民無信不先?」曰:「去食。自古皆有死,民無信不子貢曰:「必不得已而去,於斯二者何

之,不以危急而可棄也。 民無食必死,然死者人之所必不免。無民無食必死,然死者人之所必不免。無 是心爲政者,當身率其民而以死守 也。是以爲政者,當身率其民而以死守 言,則信本人之所固有,非子貢不能問, 間,直窮到底,如此章者,非子貢不能問, 問,直窮到底,如此章者,非子貢不能問, 問,直窮到底,如此章者,非子貢不能問, 問,直窮到底,如此章者,非子貢不能問, 問,直窮到底,如此章者,非子貢不能問, 是以爲政者,當身率其民而以死免。無 民無食必死,然死者人之所必不免。無

棘子成曰: 「君子質而已矣,何以文爲?」

文猶質也,質猶文也。虎豹之鞟猶犬羊之則駟馬不能追之,又惜其失言也。言子成之言,乃君子之意。然言出於舌,

鞟。」

之弊,又無本末輕重之差,胥失之矣。 矯當時之弊,固失之過,而子貢矯子成其質,則君子小人無以辨矣。夫棘子成其質,則君子小人無以辨矣。夫棘子成尊,其郭反。〇鞟,皮去毛者也。言文質

何?」 (年饑,用不足,如之

蓋欲加賦以足用也。

稱有若者,君臣之詞。

用,謂國用。

公意

有若對曰:「盍徹乎?」

取二 用 自宣公税 大率民得 加 以厚民 與 通 矣。 同 也 溝 也 畝、又逐畝 其 共 故有若請但 均 井之人通力合作,計畝 九、公取其 也 周 制 什取其一,則爲 專行徹法,欲公節 一,故謂之徹 夫 受 田 均 百 什 收。 畝 而

故言此以示加賦之意。二,即所謂什二也。公以有若不諭其旨,曰:「二,吾猶不足,如之何其徹也?」

足,君孰與足?」對曰:「百姓足,君孰與不足? 百姓不

欲其死,是惑也。

政必 爲人上者所宜深念也。 禄平,而軍國之須皆量是以 有若深言君民一 民富則君不至獨貧,民貧則君 一徹 猶 不足而教之徹,疑若迂矣。 而 自經界始。 白 度舉矣,上下寧 經界正 體之意,以止公之厚斂, 〇楊氏曰: ,而後井地均 憂不足乎? 爲出焉。① 不能 然什一, 獨 、穀 富 故

> 當務 費出 後世不究其本 天下之中 而 無 不爲迂 經 而 Ē 乎? 上下困矣。 多則 前 唯 桀,寡則 末 之圖 又惡 故征斂 貉 不 知 可 盍 無 改 徹之 藝, 也

張問崇德、辨惑。子曰:「主忠信,徙

子

義,崇德也。

「愛之欲其生,惡之欲其死。既欲其生,又主忠信,則本立。徙義,則日新。

死,則惑之甚也 欲其生死, 之生死有命, 恶,去聲。 則惑矣。 ○愛惡 非可得 人之常情也 既欲 而欲也。 其 生,又欲 以愛惡 然人 其 而

『誠不以富,亦祇以異。』」

此《詩・小雅・我行其野》之詞也。舊

則非誠 當在第 説 此。 大 適足以取異也。 使之生死。 此 日 下文亦有 夫子引之,以 善 十六篇 堂堂 補 如此詩所言,不足以 過 一乎張 、不蔽於私者,故告之如 齊景公字而誤也。」○楊 齊景 〇程子 明欲 也,難與並爲仁矣。 公有馬 Ĭ: 其 生死者 千駟之上。 此 致 錯 不能 富 簡 mi

齊景公,名杵臼。魯昭公末年,孔子適齊景公問政於孔子。

孔子對曰: 「君 間 多内嬖,而 公失政,而大夫陳氏 人道之大經,政 ,皆失其道,故夫子告之以 「善哉 不立太子。 君,臣臣,父父,子子。」 信如君不君,臣不臣,父 事之根本也。 厚施於國。 其君臣 此 父子 景公又 是時景 之

> 不父,子不子,雖有 所以 景公善孔子之言而 曰 : 嗣不定,啓陳氏 也。」 然,蓋悦而不繹者,齊之所以 公知善夫子之言,而不知 父,子之所以子,是必 「君之所以君,臣之所以 弑君篡國之禍。 栗,吾! 不能用,其後果以 得 而 食諸 反 有道 《求其所 臣,父之 卒於 矣。 楊 亂 以 景 氏 繼

信服之,不待其辭之畢也。折,斷也。子路忠信明决,故言出而人折,斷也。子路忠信明决,故言出而人于言,半言。○片言,半言。子曰:「片言可以折獄者,其由也與?」

子路無宿諾。

也。○尹氏曰:「小邾射以句繹奔魯,子路之所以取信於人者,由其養之有素其諾也。記者因夫子之言而記此,以見宿,留也,猶宿怨之宿。急於踐言,不留

信 前 於人可知矣。 ,不信其盟, 也。 ,人自信之故也。 使季路要我,吾無盟矣。』千 而 言 信子路之一言,其 不留 而 折獄者, l諾, 所 以 信 全 在 見 乘 主

乎!」子曰:「聽訟,吾猶人也,必也使無訟

以 孔子之言,以 遜 正 范 氏 使 爲 其 民 國 本, 日 「子路片言 無訟爲貴。」 ,則未能使 0 清 其 聽訟者,治其末,塞其 見聖人不以 源 可 民 則 以 無訟者 折 無 訟 獄 聽訟 矣。」〇 也 而 不知 爲 故 流 楊 又 以 也 記 而 禮 氏

忠。」 子曰: 「居之無倦,行之以子張問政。子曰: 「居之無倦,行之以

居,謂存諸心。無倦,則始終如一。行,

謂 而 \Box 發 不 於事 盡心,故告之以此。」 「子張少仁。 0 以 忠, 則表裏如 無 誠 心愛民 則 必 程 侏

矣夫! 不成人之惡。 子 Ħ 人,所存既 成 善惡之異。 者,誘掖 重出 博學於文, 有厚 故其用 獎勸 小人反是。」 〇子曰: 薄之殊,而 以 約之以禮,亦 心不 成其 同 君子成人之美 事 如 其所 也。 此 君子小 可弗 好 又 有 畔

季 正 康 也 子 子帥 問 政 於 IE 孔 孰 子。 敢 孔子對日 不 Ė ?. 0 政者

之故。 臣 范 胡 是告之,欲康子 效 氏 尤 氏 日 據邑 : 惜乎康子 日 未 背叛,不 有己 魯 自 之溺 以 中 不 Œ 葉,政 Ī Œ 自 於 甚矣。 而 克,而 利 能 由 欲 正人者。」 大夫,家 故 而 改三家 孔 不 能 子

子之不欲,雖賞之不竊。」 季康子患盗,問於孔子。孔子對曰: 「苟

矣。」 康子 言子 反其 知 耻 奪嫡事見《春秋傳》。 本 奪 而 不貪欲 耶 不竊。 嫡 ? ,民之爲 ,則雖賞民使之爲盗 孔子以不欲啓之,其旨深 〇胡 盗 氏 一,固其 日 「季氏 所也 竊 盍 民 柄 亦 亦

用殺? 就 季 小人之德草。草上之風,必偃 康子 有 道 ,何如?」孔子對曰: 問政於 子欲善,而民善矣。君子之德 孔 子, 曰:「如殺 「子爲政,焉 無道 風

言,豈爲人上之語哉? 以身教者從,以也。偃,仆也。○尹氏曰:「殺之爲殺爲? 欲善則民善矣。上,一作尚,加焉,於虔反。○爲政者,民所視效,何以

「教者訟,而況於殺乎?」

達者,德孚於人而行無不得之謂。子張問:「士何如,斯可謂之達矣?」

子曰:「何哉,爾所謂達者?」

子張

務外,夫子蓋

已知其發問之意

子張對曰:「在邦必聞,在家必聞。」反詰之,將以發其病而藥之也。

言名譽著聞也。

子曰:「是閩也,非達也。

學者不可不審也。故夫子既明辨之,下聞與達相似而不同,乃誠僞之所以分,

文又詳言之。

「夫達也者,質直而

好義,察言

而觀色,

慮

主忠信,而所行合宜,審於接物,而卑以夫,音扶。下同。好、下,皆去聲。○内以下人。在邦必達,在家必達。

自牧,皆自脩於内,不求人知之事

然

一八五

念。 德脩於己而人信之,則所行自無窒礙

邦必聞,在家必聞。」「夫聞也者,色取仁而行違,居之不疑。在

者,大抵爲名。 則 皆篤實之事 張之學,病 何 行,去聲。〇善其 同,然其利心則一也。」〇尹氏曰: 不要近名。 務實而專務求名者,故虚譽雖隆 實背之,又自以爲是 病矣。 事 人親受聖人之教,而 後世乎 爲名而學,則是僞 在乎 , 充乎内而發乎外者也。當 有意)程子曰: 不務 爲名與爲 近名,大本已 顔 實。 而 「學者須是務實, 色 無 以 所忌憚。 利, 取 故孔子告之, 差失有 也。今之學 於仁, 雖清濁 失,更學 而 如 實德 此 而

脩慝、辨惑。」

從匿,蓋惡之匿於心者。脩者,治而去慝,吐得反。○胡氏曰:「慝之字從心

之。

子曰:「善哉問!

之惡,非脩慝與? 一朝之忿,忘其身,「先事後得,非崇德與? 攻其惡,無攻善其切於爲己。

以

及其親,

非惑與?」

及其親 與,平 皆所 也。 惡無所匿矣。 心 不自知矣。 故德不崇。 爲所當爲 以 遲 爲 救 粗 其 其 〇先 而 專於治己 鄙 大, 失 下利 知一朝之忿爲甚微, 而不計其功, 惟不自省己 近 也 事後得,猶 則 利 也。 有 ○范氏 故告之以 而 以 不責 辨惑 唯 過 日 則 (人,則 有 而懲 德 先 而 此, 利 難 知 「先事 其 後 積 欲 而 者 忿 獲

樊

遲

從遊

於舞雩之下,

敢

問

崇

大惑矣。故懲忿所以辨惑也。」 者必起於細微 忘其身以及其親,惑之甚者也。 過 改数 慝 不脩。 ,能辨之於早,則 感物 而 易 動者莫如 不至於 惑之甚 忿

樊 遲 問仁。 「知人。」 子曰: 「愛人。」問 知。 子

仁之施。 上「知」字,去聲; 。知人,知之務。 下如字。

樊遲未達。

知 曾氏曰:「遲之意,蓋 有所擇,故疑二者之相悖爾。」 以愛欲其周, 而

子曰 如此 舉直錯枉者,知也。 0 '則二者不唯不相悖'而反相爲用 「舉直錯諸枉 ,能使枉者直。」 使枉者直 ,則仁矣。

樊遲退,見子夏, 뻬 問 「知」,子 『舉直錯諸 曰: 也吾見於夫子 枉,能使枉者

> 何謂 也 ?

者直之理。 言,專爲知者之事。 鄉、去聲。見、賢徧反。 又未達所以能 〇遲以夫子之 使枉

子夏曰:「富哉言乎!

歎其所包者廣,不止言知。

湯有天下,選於衆,舉伊尹,不仁者遠矣。」 「舜有天下,選於衆,舉皋陶,不仁者遠矣。 語,因 他人之言,語近則遺 仁、知而言矣。〇程子曰: 使枉者直也。子夏蓋有以知夫子之兼 尹,湯之相也。 選,息戀反。陶,音遥。 包含無所不盡 爲仁,不見有不仁者,若其遠去爾,所謂 人而變化。雖若有淺近 ,觀於此章可 不仁者遠,言人皆化而 遠 。遠,如字。○伊 語 遠則不 見矣。 「聖人之 者,而 非若 知 其

0 如字」,原作「同」,據吴本改

也。 方,又必欲爲 時學者之務實也如是。」 必將復問矣。 諸子夏,然後有以知之。 焉,而猶未知其何以爲之也。及退而 也,夫子告之盡矣。 聞 其説 尹氏 又必欲 日 其事。 既問於師, . 知其方; 學者之問 樊遲未達,故又 如樊遲之問仁、知 使其未 又辯諸友,當 不獨 也,不 欲 喻 知 獨 問 其 問 則 欲

論語卷第六

則德日進。

則止,無自辱焉。」 子貢問友。子曰:「忠告而善道之,不可

疏,則自辱矣。 義合者也,故不可則止。若以數而見故盡其心以告之,善其説以道之。然以故盡其心以告之,善其説以道之。然以

講學以會友,則道益明, 取善以輔仁,曾子曰: 「君子以文會友,以友輔仁。」

論語卷第七

朱熹集注

子路第十三 凡三十章。

子路問政。子曰 勞之,則雖勤不怨。」 身先之,則不令而行。 勞,如字。 ○蘇氏 「先之,勞之。」 티 : 凡民之事,以 「凡民之行,以 身

請益 曰:「無倦。」

無,古本作毋。○吴氏曰: 有爲而不能持久,故以此告之。」〇程子 「子路問政,孔子既告之矣。 「勇者喜於 及請

> 仲弓爲季氏宰,問政。 子曰: 「先有 司

使之深思也。」

則

日

無倦

而

未嘗復

有

所告,

姑

赦 小過,舉賢才。」 有司,衆職也。 宰兼 宗衆職,

舉而用之,則有司皆得其人而政益脩 於彼,而後考其 人心悦矣。賢,有德者。 害,不得不懲; 過,失誤也。大者 成功,則己 小者赦之,則刑不濫 於事或有所 一不勞 才,有能者。 然事必先之 而 事畢 而

日: 焉,於虔反。舍,上聲。○仲弓慮 盡知一時之賢才,故孔子告之以 「焉知賢才而舉之?」曰: 爾所不知,人其舍諸?」 舉 此 無 爾 以 所

程子曰: 仲弓曰『焉知賢才而舉之』,子曰 「人各親其親,然後不獨親其

之間 仲弓 心可 不不 臣 以 爾。二〇 與聖人 職矣; 不舉賢 可 所 興邦 以 知 爲季氏宰,況天下乎?」 范氏 用 爾 才, 所 心之大小。 心 赦 日 不知,人 則 可 小 百 以 過, 職 「不先有司, 喪 廢矣。 其舍諸』, 則下 推 邦,只在 此義 無 失 此 公私 則 則 便 君

先?」 「衛君待子而爲政,子將奚子路曰: 「衛君待子而爲政,子將奚

子曰:「必也正名乎!」

Œ 此爲先。 時 名雖 故孔子 出公不父其父而 爲 衛 以正名爲先。 君 而言,然爲政之道 禰 其 祖, 謝 氏 名 皆 實 日 當 紊

政

事皆失其

道

故刑罰

不中

子路曰:「有是哉,子之迂也! 奚其

正 ?

子曰: 蓋闕 迁 如 ,謂遠於 世 野 哉 事 由 情 言 也 非 君子 今日 於其 之急 、所不 務 也 知

野,謂鄙俗。責其不能闕疑,而率爾

妄

對也。

成; 「名不正,則言不順; 言不順,則事不

楊氏 以 考 日 實 · 「名 而 事 不成。」 不 當其 實, 則言 不 順 則

罰不 事不 中,去聲。 中 物得其 和,故禮樂 成 則 刑罰 禮樂不 和之謂 ○范氏 不中 不興。 則 興; E : 樂。 禮樂不 民 事不 事 無 禮 所 樂 得其 成 措 興, 不 則 手 興, 序 無 則 户 施 之謂 序 則 之 而 刑

君子於其言,無所苟而已矣。」「故君子名之必可言也,言之必可行也。

矣。 食 難 子 言 子 其 夫蒯 皆荷 拒父,皆無父之人 之,又辭。 其 靈 程 輒 路 順 郢 事 公欲立 母 子 聵欲 之 徒 終 而 而 之本末,告諸天王 夫子爲政 南 矣。」 日 知 立之。 食爲 事 子 不 0 成矣。 之 食 公子 殺母,得 乃立 喻 非 焉 淫 也。 胡 名 義 而 不 則人倫正,天理 郢, 亂 氏 實 前 也。」 夫子告之之詳 避其難之爲 故 日 相 欲 以 聵之子 也 罪 郢 0 須 事 殺 其 於父, IF. 辭。 一,請於 之, 輒 名爲 衛世 不 輒, 不去, 公卒,夫人立 事 不果 可 而 先,必 義 方 荷 以 有 輒 得, 伯 拒蒯 如 而 卒 或 據 蒯 而 則 出 死 名 將 或 不 命 其 世 奔 其 知 正 具 明 耻 餘 以 而

用

稼

樊 遲 種 圃 請 五. 穀 學 日 稼 稼 子曰 種 吾 蔬菜日 不 0 如 老圃 吾不 圃 如 老農

> 夫 莫敢 上好 如 遲 是,則 不 禮 服 謂 則 子 細 四 民莫 民 方之民襁負 . 孟 一好信 敢不 子 小 所 人 敬; 則民莫 謂 哉 樊 其 小人之事者 子 須 好義 敢 而 彻 不 至 矣, 用 則 也 情 民

則 者 蓋 闢 遊 以 情 義 於虔反。 好,去聲。 削 不 之 約 其 懼 能 至 於 聖人之門, ,蓋各以其 則事 失 矣。 其 미 以 小兒於背 其 也。 \equiv 問 愈遠矣。 終 合 不 隅 須之學疑 也 ○禮、義、信 宜。 夫, 待其 喻 反 類 而 自 矣, 者。 也 音 問 謂 而 情, 故復言之,使 出 扶。 稼 應也 故 求老農老 農圃之不 而 誠 不 圃 不復。 後言其 ,大人之事 及 楊 實 襁, 志則 此 也。 氏 襁 居 曰 丈反。 及 如 而 非 阪 織 圃 敬 知 其 矣,辭 縷爲 不 而 則 也 何 前 服 能 既 學 樊 拒 也 之, 問 焉, 之 須 好

之。

者意有在也。」

爲?」 使於四方,不能專對,雖多,亦奚以好行。「誦《詩》三百,授之以政,不達,

句之末耳,此學者之大患也。」 者,必達於政 使,去聲。 能從政而專對乎? 物理,可以驗風俗之盛 窮經將以致用也。 其言温厚和平,長於風諭。 ○專,獨 而 能言也。 也。《詩》本人情,該 世之誦《詩》者,果 然則其所學者,章 衰,見政治之得 〇 程 故誦之 子曰:

之國,而是時衰亂,政亦相似,故孔子歎魯,周公之後。衛,康叔之後。本兄弟

矣』。少有,曰『苟完矣』。富有,曰『苟美矣』。少有,曰『苟完矣』。富有,曰『苟合

欲易足故也。」 子荆皆曰苟 不以欲速盡美累其 公子荆,衛大夫。苟, 「務爲全美,則累物 合,聚也。完,備也。 而已,則不以外物爲心,其 而驕吝之心生。公 言其循 心。 聊且 粗 序 楊 略之意。 而 氏曰 有節 :

子適衛,冉有僕。

僕,御車也。

九二

放人了\cdots 底而不富,則民生不遂,故制田里,薄賦

斂以富之。

之。 曰:「既富矣,又何加焉?」曰:「教

平 戚 無聞 也 增 明,唐之太宗,亦云 明 富 之後,能舉此職者 民,立之司)政事 0 禮義以 廣 子弟莫不受學; 而 生員 焉。 三代之教,天子公卿躬 不 皆 教,則近 ,教亦至矣,然而 明帝尊 教之。 미 牧,而寄 師 法。 於 師 百 庶且富 禽)胡氏 重 以三 彼二君者,其 唐 獣。 無一二。漢之文、 傅 太宗 事。 日 故 臨 矣,西京之教 未知 : 大石 行 雍拜老,宗 必立學 然自三代 於上, 「天生斯 所 1名儒, 能 以 校, 教

年有成。」 年有成者,期月而已可也,三

然。」愚按《史記 期 而 日 緇 發。 月 紀 布 謂 孔子 也 周 歎 有 歲 當 成 >,此 之 時 治 月 蓋 莫 也 功 爲 能 成 衛 口 用 也。 靈公不能 己 也 僅 故 尹 氏 云 用

矣。 子 日 誠哉是 . 善 言 人 也 爲 邦 百 年 亦 可 以 勝 殘 去 殺

子曰: 惡也。 厚 殺 勝 功 也。 如 而 平聲。 幾致刑措, 久也。 止 是。 此 勝 蓋古 去殺 殘 漢 去,上聲。〇爲 若夫聖人,則不 去 消謂 自 有是言, 勝殘,化殘暴之人,使 高 殺 庶 民化 惠 ,不爲惡 乎其近之矣。」○ 於善 至於文、景,黎 而夫子稱之。 可以 · 待 百 而 邦百 已,善人 年? 年, 不 其 尹 用 民 不 氏 醇 程 刑 相

一九三

子 世。 Ė 王者 興,所謂仁也。 義 紀綱有成而化行也。 何也?」程子曰: 也。」〇或問: 自文、武至於成王,而後禮樂興,即 ,使之浹於肌膚, 仁、謂教化浹也。 謂聖人受命 如有 王者,必世 此非積久,何以能致?」 「三年、必世,遅 「三年有 而興 淪於骨髓 漸民以 而後仁。 〇程 也。三十年爲 子 成,謂 仁,摩民 ,而禮樂可 速不同 其效 法 以 度 周

與聞 不能 曰 : 子 Ė 日 「其事・ IE 其身,如 「苟正其身矣、於從政乎 何 也。 晏也?」對 E 如有政,雖不吾以,吾其 人何?」 E.)冉有 有 退 政。」子 何 朝。 有?

宰。 朝 政 音潮。 事, ,季氏之私 家事。 與,去聲。 以 朝 也。 ,用也。 冉有 晚也。 時 爲 季氏 大夫

> 政,我嘗爲大夫, 知者而言,此必季氏之家事 而 魯,其於國 雖不治事 氏,而教冉有之意深矣。 今既不聞 獨與 陵之對略相似。 、家臣謀於私室者。 7, 猶 ,則是非 政 蓋 得 與 有不與 雖不見用,猶當與聞 開 國政 其所以正名分,抑季 國政。 也。 同 列議於公朝 故夫子爲 是時 語 耳。若是 意與魏徵 季 氏 國 車

子對曰: 定公問: 人之言曰: 如知爲君之難 易,去聲。 言之間,未可以 幾,期也。 一言 言不可以若是其幾 『爲 詩》)當時 而 也,不幾乎一言 君 如此 日 可 難,爲 有此言也。 以 而必期其效。 「如幾如式。」言 興 臣不易。」 邦, 也。 有 諸 加 ? 興 孔 邦

●「有」,殘宋本、元甲本、司禮監本、吴本作「子」。

言,故不及臣 也 大 臨 深履 此 言 不可 薄,而無一事之敢忽。 而 知 以 也。 爲君之難,則 必期於興邦乎? 必 戰 爲定公 然則 戰 兢兢 此言

൬ 如其善而莫之違也,不亦善乎? 敬謹以 莫之違也 面 者也。」○謝氏 范氏曰 至於耳。 諛之人至矣。 持 分於此。 之。 君日 ,不幾乎一言而 「言不善 驕 惟 日 然此 邦未 其言 0 而 臣 而莫之違,則忠言 「知爲君之難, 必 非 日 而 路,未 識 遽 莫予違,則讒 喪邦乎?」 興 微之君子 喪也 有 不喪 如 前 則 不 興 必 邦 諂 善

葉公問政。

子曰:「近者説,遠者來。」音義並見第七篇。

然必近者悦,而後遠者來也。説,音悦。○被其澤則悦,聞其于曰:「近者説,遠者來。」

風

則來

成。」無見小利。欲速則不達,見小利則大事不無見小利。欲速則不達,見小利則大事不子夏爲莒父宰,問政。子曰:「無欲速,

爲利, 行之以忠」; 成,則急遽 病常在近小,故各以切己之事告之。」 無見小利」,子張常過 程子曰: 父,音甫。 則 所就者小,而所失者大矣。(「子張問政,子 無序,而 〇 莒父,魯邑名。 子夏問 反 政,子曰『無欲速, 高而未仁,子夏之 不達。 曰『居之無倦 見小者之 欲事之速

程

子

日

此

是

徹

上

徹

F

語

聖

人

初

而盗曰攘。〇直躬,直身而行者。有因語,去聲。〇直躬,直身而行者。有因

其 父 也。 逃,遵海 爲,去聲。 於直不直 隱 : 故不求爲直, 於於 「順 理 濱 理 〇父子 而 順 爲直。 一,何暇 處 邪 ? 計哉?」 當是時,愛親之心 父不爲子隱,子 而 相 瞽瞍殺 直在 隱 、天理 其 人,舜竊 中 人 情 不 謝 之 負 爲 而 氏 至

樊 忠。 恭主 遲 問 雖之夷 容 敬主 子 八狄,不 日 事 可 恭 棄 居 見 也 處 於外 恭 敬主 執 事 乎 敬 中。 與

之夷狄不可棄,勉其

固

守

而

勿失也。

其 遲問 無 則 篤 最 問 仁者 語 後乎?」 恭 日 也 而 : 天下 充之則 何 平矣。」 如 此 最先,先難次之,愛人 斯 醉 可 面 謂 盎背, 胡 之 氏 士 推 矣? 而 達 子 之 樊

謂士矣。」曰:「行己有耻,使於四方,不辱君命,可曰:「行己有耻,使於四方,不辱君命,可子貢問曰:「何如斯可謂之士矣?」子

黨稱弟焉。」 日 足以 使,去聲。 「敢問 蓋 有爲者也 爲使之難 其 次。 此 其 ,不獨貴於能言 子貢 日 志 有 能 宗族 所 言 不 故 爲 稱 以 孝 而 使 而 焉 己。 事 其 材 鄉

其穴。○此本立而材不足者,故爲

果,硜 硜 敢 然小 問 人哉 其 次。 日 抑 亦 言 可以爲次矣。」 必 信 行 必

市井之人,不復可爲士矣。 其爲自守也,故聖人 淺 行 狹也 ,小石之堅確者。 去聲。 此其本末皆無足觀,然亦 硜, 苦耕 反。 猶 小人,言 有取 〇果,必行也 焉。 其識 下此 量 不 則 害

斗筲之人,何足算也。」曰:「今之從政者何如?」子曰:「噫!

之事。」 也。子貢之問每下,故夫子以 斗二升。斗筲之人,言鄙 平聲。斗,量名,容十升。筲,竹器,容 之從政者,蓋 筲,所交反。算,亦作筭,悉亂 ,聞於人者。夫子告之,皆篤實自得 程子曰: 「子貢之意,蓋欲爲皎皎之 如 魯三家之屬。 細 也。 反。 噫, 是 警之。 算,數 不 今

狂者進取,狷者有所不爲也。」子曰: 「不得中行而與之,必也狂狷乎!

子豊 人本欲 次 得 行 之,是狷也,是又其次也。」 者又不可得,欲得 古之人!』夷考其行 與其終於 因其志節 7,而徒 不掩。 狂 也。 有爲 也。 不欲 也。 如琴張、曾皙、牧皮者,孔子之所 得 得 其志 狷者,知未及 中道哉? 此 ,而激厲裁 中道之人而教之, 故不若 謹厚之人,則未 〇行,道也。狂者,志 而 嘐嘐然,曰:『古之人 已也。 得 不 不可必得,故思 而不掩焉者也。 抑之以 此狂狷之人,猶 屑不潔之士 〇孟子曰: 而守有 必能 進於道 然既 餘 自 極 而 振 不 蓋 高 非 其 拔 與 狂 孔 口 可 而

以作巫醫。』善夫!子曰:「南人有言曰:『人而無恒,不可

人。恒,常久也。巫所以交鬼神,醫所恒,胡登反。夫,音扶。○南人,南國之

常,●孔子稱其言而善之。 以寄死生,故雖賤役,而尤不可以無

「不恒其德,或承之羞。」

子曰:「不占而已矣。」此《易•恒卦》九三《爻辭》。承,進也。

占而已矣。」意亦略通。○楊氏曰:「君子於《易》苟玩其占,則復加「子曰」,以别《易》文也,其義未詳。

人尚利,安得而和?」○尹氏曰:「君子尚義,故有不同。小和者,無乖戾之心。同者,有阿比之意。子曰:「君子和而不同,小人同而不和。」

曰:「未可也。不如鄉人之善者好之,其曰:「未可也。」「鄉人皆惡之,何如?」子子貢問曰:「鄉人皆好之,何如?」子

不善者惡之。」

好之實。 好、惡者惡之而善者不好,則必其無可 者好之而惡者不惡,則必其有苟合之 矣,然其間亦各以類自爲好惡也。故善 矣,然其間亦各以類自爲好惡也。故善 好、惡,並去聲。〇一鄉之人,宜有公論

其使人也,求備焉。」事而易説也。 説之雖不以道,説也。 及其使人也,器之。小人難道,不説也。 及其使人也,器之。小人難子曰:「君子易事而難説也。 説之不以

易,去聲。說,音悦。○器之,謂隨其材易,去聲。說,音悦。○器之,謂隨其材

● 「尤」,吴本作「猶」。

欲,故反是。 君子循理,故安舒而不矜肆。小人逞子曰: 「君子泰而不驕,小人驕而不泰。」

子 Ī 外馳 几 程子曰: 剛、毅則不屈於物欲,木、訥則不至於 者,質之近乎仁者也。」〇 ,故近仁。」 「剛、毅、木、訥,近仁。」 「木者,質樸。訥 楊 者 氏 遲 日 鈍。 0

子路 朋 日 友切切、偲偲,兄弟恰恰。」 問 切 日 切 . 偲 「何如斯 偲, 怡 怡 可謂之士 如 也 可謂士矣。 矣?.」子

之。 之禍, 告之。 也。 胡 氏 怡怡, 日 又恐其混於所施,則兄弟有賊 朋友有善柔之損,故又别而 「切切,懇到也。 和説也。皆子路所不 偲偲,詳 言 恩 勉 故

> 子曰 之法。 月、三年、百年、一世、大國五年、小國 上,死其長,故可以即戎。〇程 教民者,教之孝悌忠信之行,務 年之類,皆當思其作爲如何乃有益。」 「七年云者,聖人度其時可矣。 即,就也。 善人教民 七年,亦可 戎,兵也。 以 即 民 戎矣。 農 知 如 子 講 親 云 武 期 其

亡之禍,是棄其民也。 以,用也。言用不教之民以戰,必有敗子曰:「以不教民戰,是謂棄之。」

憲問第十四

七章。 切氏曰:「此篇疑原憲所記。」凡四十

一九九

有爲 言 可 可 耻 爲,邦無道不能獨 之,以 耻 原原 耻 也。 也。 則 固 思名。 憲之狷介,其於「邦無道 未必知也。 知之矣; 廣 其 志, 使知所以 禄 善,而 至於「邦 故夫子 也 0 但知 邦有 自勉 因 有 食禄,皆 道 其問 道 ~,穀」 不 而 能 進 而 之 於 並 口

克、 伐 此 亦 伐、怨、欲不行焉, 自矜。 原憲 以 怨,忿恨。 其 所 能 可以爲仁矣?」 而 欲, 間 貪欲 也 克,

子曰 矣。 行 有 不 是 伐、 足 四 則 者 可 以 以爲難 言 怨、欲,惟仁者能之。 天 而 之也。 理 能 渾 制 矣,仁則吾不 之,使 然 自 程 無 不得行 子 几 **=** 者之累,不 知 可謂 也 有之 而 而 難

> 若 得 禮 其所以求仁之功,益親切而無滲漏矣。 求仁之謂哉? 意 不 能 能再 但制 則 爲仁 ,而容其 之方乎?」曰: 「克 則 制 未 其 私 矣。 問 也。 情 而 欲 也。」或 不行,則 潛藏 不 使 此 · 留 聖人 不行,斯 亦 學者察 隱伏 一; 而 豊 日 是未 非所謂克己之事 0 開 天 於胸 理 「四者不行,固 示 亦 於二者之間, 之深 去己 之本 有 難 中 拔 能 也 然者得矣。 私 去 情乎 也 以 病根之 豈克 復 憲 謂 平 己 求 不 則

居,謂意所便安處也。 子曰:「士而懷居,不足以爲士矣。」

行言孫。」 子曰:「邦有道'危言危行',邦無道。

危

順 行、孫,並 也。 尹氏 去 聲。 日 . 「君子之持身不可 危 高 峻 也 孫 戀 卑

然則爲國者使士言孫,豈不殆哉?」也,至於言則有時而不敢盡,以避禍也。

德; 子 Ħ 有德也 氏 義 或 有 便佞 必 日 德者,和順 仁者必 爲 0 「有德者必有言,有言者不必有 П 有德者必有言,徒能言者未 仁者志必勇,徒能 勇者,或血氣之强而 給 有 而 積 勇,勇者不必有仁。 己。 中,英華發外。 仁者,心 勇者未必 無 己。 私 能言者, 累, 必 尹

俱 夫子不答。 南 不 宫 得 适 尚德哉若人!」 其 問 於 死 南宫适出 然。 孔 子 禹、 日 稷躬 · 子 曰: 羿善 稼, 射, 「君子哉若 而 有天下。」 奡 盪舟

也。」

盪,土浪反。○南宫适,即南容也。羿,适,古活反。羿,音詣。奡,五報反。

至周 不 謂 子 奡 稼 作 其 后 有 與。 也。 君子 比 穡之事。 少康所誅。禹平水土 澆, 浞之子 臣 窮 武 寒浞又殺 當 之君 故俟其 王亦 之人 世之有 故孔子不答。 善善 禹受舜禪而 有天下。 也,力能 羿 射 出 而有尚德之心矣,不可以 權力者, 河,滅 而贊美之。 而 代之。 然适之言如此,可 夏后 陸 适之意,蓋以羿、 而以 暨稷 有 地 奡,《 相 行 天下, 稷之後 播 而 禹、稷比 舟 春秋傳 篡 種,身親 ,後爲夏 其 位 孔

仁也。」 矣,然毫忽之間,心不在焉,則未免爲不夫,音扶。○謝氏曰:「君子志於仁

子曰:「愛之,能勿勞乎? 忠焉,能勿誨

乎?

也 其爲愛也深矣。 蘇 而 大矣。」 勿誨,婦寺之忠也。 氏 日 . 愛而 忠而. 勿勞, 知誨、 禽犢之愛也 愛而 之,則其爲 知勞之, 忠 則

行 子 也。 裨 日 傳》作子太叔。 謂 也 几 命,必更此 所長。 造爲草 人,皆鄭大夫。草, 子羽脩飾 飾, 婢之反。 行人,掌使之官。 潤色,謂 謂增損之。 爲 命 稿 四 之,東 以 諶, 也。 賢之手 裨諶 加以文 應對諸 討,尋究也。 時林反。 里子 世 草 東里,地名,子産所 ,而成 采 創 叔,游吉 侯 産潤 也。 略 子羽,公孫揮也。 之,世叔討論之, 也 鮮有敗事 色之。 鄭國之爲 裨諶 也、《春秋 創,造也 論, 講 居 下

子産之政,不專於寬,然其心則或問子産。子曰:「惠人也。」

問子西。曰:「彼哉!彼哉!言也。

八爲主。

故孔

子以爲

惠人、蓋舉

其

重

而

以

愛

矣。 子西, 後卒召 改紀其政,亦賢大夫也 王之號。 彼哉者,外之之詞。 楚公子申,能 白 日 昭王欲用孔 公以致禍 遜 亂 子,又沮 楚 則其 或 不能革 爲 止 昭 人可 之。 其 其 僭 知 而

飯疏食,没齒無怨言。」問管仲。曰:「人也。奪伯氏駢邑三百

邑以與 疏 者 仲之功 邑,地名。 所 謂 也 食,没齒無怨言。」 ,猶言此人也。 此 與之書社 八管仲, 放故 事 窮 也 齿, 年 0 約 伯 三百 以 氏 也。 或 終 自 問 而 身而 知己罪,而 伯 蓋 氏,齊大夫。 富 威 無 「管仲、子産 人莫之敢拒 、怨言。 公奪伯 心 服 氏 荀 卿 管 之

子言此,蓋善之也。

則 子産之才,不勝 孰 優? 概乎其未 日 0 有聞 其 管 也。 德。 仲 之德 然於 聖 不 人之學, 勝 其 才。

子 日 去聲。 然人當勉其 貧 而 無怨 處 難 貧 難 前 富 難,處 不可忽其易也。 加 無驕 富 易,人之常 易。

爲 子曰 滕、薛大夫。」 日 蓋 薛國小政繁,大夫位 滕、薛,二國名。 家老望尊,而無官守之責。 家臣之長。大家勢重,而 公綽,魯大夫。趙、魏,晉 廉静 人矣。此君子所以 0 「孟公綽 寡欲,而 知之弗豫,枉其 爲趙 大夫,任國 短 於才者 高 魏 患 責重。 老則優,不 才而用之,則 不 無諸侯之事; 卿 知 也 優,有餘 「政者。 人也。 然則公綽 楊氏 可 滕、 也。 老 爲 以

此,則孔子之用人可知矣。」

禮樂,亦可以爲成人矣。」 綽之不欲,卞莊子之勇,冉求之藝,文之以子路問成人。子曰:「若臧武仲之知,公

之也。 之跡; 不足以 乎外。 言,非其至者,蓋就子路之所可及 之以禮,和之以樂,使德成於內,而 心,勇足以力行,藝足以泛應。 此四子之長,則知足以窮理,廉足 大夫,名紇。 知,去聲。 い語此。 而其爲人也亦 若論其至,則非聖人之盡人道 則材全德備,渾然不見一善成 中正和樂,粹然無復 莊)成人,猶言全人。武仲, 子,魯卞邑大夫。 成矣。 然「亦」之爲 偏 倚 而 而 以 駁 文 又 名 見 節 兼 雜 眷

■「楊」,吴本作「胡」。

見危 成 E 矣。」 授命, 「今之成人者何必然? 久要不忘平生之言,亦 見 利 可 思 爲

禮樂, 能 也。 之 止 亦 公綽,仁也; 篤,行之果,天下之達德 雖 也 言 復 正矣。」又曰: 謂成人,亦不出此三者。 於此。 之? 次 其才 知 可以爲成人矣。 不愛其 加「曰」字者, 非 也。 平生 則 須是合此四人之能,文之以 知禮樂有 孟子曰 又其次者也。]又曰: 正 若今之成人,有 平, 生,持 也 程 日 卞莊子 子 若文之以 也。 以 既 語成人之名 所未備 然而 與 答 惟聖人然後 有是忠 ,,勇 人 而 也。 論 復言 忠信 也。 也; 武 亦 禮 知之明,信之 其大成 可以爲成 樂 仲, 信 久 若孔 非聖人 也 而 之實, 要,舊 「臧 冉 口 則 不 知 禮樂, 求,藝 ~,則 授 子 武 及 也 無 命 , 所 仲 於 不 則 約 不

> 形 不復 日 聞 如 今 斯 此 之成 行之之勇,而 方 可 以 以 稱 下, 成 人之名。」〇 乃子路 有終身誦之之固 之言。 胡 氏

矣。

未詳是否?」

子問 不言、不笑、不取乎?」 公叔文子於公明 賈 日 0 信 乎 夫 子

姓; 者 詳不可知,然必廉静之士,故當時 公叔文子,衛 1稱之。 賈,名; 大夫公孫拔 亦衛人。 文子爲 也。 公明

後言 公明賈對曰: ,人不厭其言 義然後取, 以 人不厭 告者 樂然後笑,人 调 其取。」子 也。 夫子 時 厭 日 然 其

吴

注改。

² 0 本補。 拔」,原作 冉 求 藝 也 枝 原 脱 據仿元本、 據 殘 宋 本、 吴刻本、《禮記 元甲 本 司 禮 監 檀弓》鄭

「其然,豈其然乎?」

厭者 豈其然乎」,蓋疑之也。 或 人爲善,不欲正言其非 不能。文子雖賢,疑未及此,但君子與 言也,非禮義充溢 則人不厭 過,而以爲不言、不笑、不取也。 ,苦其多而惡之之辭。 ,而不覺其有是矣,是以 於中、得時措之宜者 也。 故曰 事適 」「其然, 稱之。 其可, 然此

要君,吾不信也。」子曰:「臧武仲以防求爲後於魯,雖曰不

受之於君。得罪 則將據邑以 如防,使請立後而避邑,以 要,有挾 要,平聲。 要君者無上,罪之大者也。武仲之邑, 所得專也 而 求 ○防,地名,武仲所封 叛,是要君也。 也 而據邑以請 出 武仲 奔,則立後 得 罪 ,由其好智 示若不得請, 〇范氏曰: 奔 在 邾 君,非 自邾 邑 也 而

之言,亦《春秋》誅意之法也。」後,其跡非要君者,而意實要之。夫子不好學也。」〇楊氏曰:「武仲卑辭請

譎。」
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一

不

君他 隱。 主,攘夷狄以尊周室者也。 以致楚,而陰謀 不由詭道 仁,心皆不正,然威公伐楚,仗義 譎,古穴反。 公,名小白。 事 亦多類此,故夫子言此以發其 ,猶爲彼善於此。 譎, 詭也。 〇晉文公,名重 以 取勝,其譎 二公皆諸 文公則伐衛 雖其以 甚矣。 耳。 執言, 力假 侯 齊 盟 威

仲不死。」曰: 「未仁乎?」

糾,居黝反。召,音邵。○按《春秋傳》,

不 相 威 奔 及 齊 魯。 無知 得爲仁 襄 子路 公 仲請 使魯殺子糾而請管、 魯人納之,未克, 弑 無 也。 疑管仲忘君事讎 襄 道 囚。 公、管夷吾 鮑 叔 鮑叔牙言於威 牙奉 公子小白 而小白人,是 召 忽奉公子糾 忍心害理 召,召忽 公以 奔 爲 爲 死

之力也。如其仁! 如其仁! 」子曰:「桓公九合諸侯,不以兵車,管仲

未得爲 ,其仁者,又再言以深許之。 兵車,言不 春 秋 仁人,而 傳》作糾 假 其 威 力也。 ,督也,古字 利 澤及人,則有仁之 如其仁,言 蓋管仲 通 用 誰 雖

糾,不能死,又相之。」 子貢曰:「管仲非仁者與? 桓公殺公子

與,平聲。相,去聲。〇子貢意不死猶

可,相之則已甚矣。

民到於今受其賜。微管仲,吾其被髮左衽子曰:「管仲相桓公,霸諸侯,一匡天下,

莫之知也。」 豈若 也。 皆所以正 被,皮寄反。衽, 同,長也。 匹夫 被髮左衽,夷 匹婦之爲諒也,自經於溝 匡,正 天下也 也。 狄之俗 而 微, 審反。 尊 無 周 也 也。 室 衽,衣 霸 攘 夷 與 瀆 衿 伯 而

字。 之爭 弟也 也。 始與 也。 故 ,小信也。 《後漢 (之同 爲 威公殺之雖 仲私 不 不 程 義 謀 責 子 書 其死 將 於所 曰:「威公,兄也。子糾 經,縊 》引此文,「莫」字上 自 與 過,而糾 事 而 之同 免 也。 ,輔之以 稱 以 其 圕 死 莫之知, 功。 之死實當。仲 後 , 可 功,亦 爭國,非 也 若使威弟 有「人」 人不 可也 知 知 輔

臣之賤

而引之使與己並,有三善

知人,一也; 忘己,二也;

獨稱其功; 不以相掩可 贖哉?」 太宗,可謂害於義矣。 若計其後功 之,則管仲之與 而 如唐之王珪、魏徵,不死建成之難,而 乃害義之甚,啓萬世反覆不忠之亂乎? 糾兄,管仲所 愚謂管仲有功而無罪,故聖人 也。 而 王、魏先有罪而後有功, 與其事威,聖人之言, 輔者正 威,不可 後雖有功,何足 ,威奪其國 同 世之讎 而 也。 從 殺 則 無

謂「錫民爵位曰文」者。○洪氏曰:

文者,順理而成章之謂。《謚法》亦有所

对者,順理而成章之謂。《謚法》亦有所

八五三,「可以爲文矣。」

漢之與已同進爲公朝之臣也。

四、公朝。謂

《叔文子之臣大夫僎,與文子同升諸公。

君,三也。」

是,奚而不喪?」子言衛靈公之無道也,康子曰:「夫

如

王孫賈治軍旅。 孔子曰:「仲叔圉治賓客,祝鮀治宗 仲叔圉 《詩》曰: 未 夫,音扶。喪,去聲。 宜喪也,而能用此三人,猶足以保其國 當其才。 而況有道之君,能用天下之賢才者乎? ·必賢,而其才可用。靈公用之,又各 即孔文子也。 『無競維人,四方其訓之。』 尹氏曰 夫如是,奚其喪?」 0 〇喪,失位 三人皆衛臣, 「衛靈公之無道、 也 廟 雖

能否矣。欲踐其言,豈不難哉? 大言不慚,則無必爲之志,而不自度其子曰:「其言之不怍,則爲之也難。」

陳成子弑簡公。

君,請討之。」 孔子沐浴而朝,告於哀公曰:「陳恒弑其

猶請哀公討之。 誅之, 況鄰國乎? 其君,人倫之大變,天理所不容,人人得 朝,音潮。〇是 齊戒以告君,重其 時 事 孔 故夫子雖已告老 而 子 致 不 敢忽也。 事 居魯, 臣 沐 浴 弑 而

公曰:「告夫三子!」

孔子告之。也。時政在三家,哀公不得自專,故使夫,音扶,下「告夫」同。○三子,三家

所必討,大夫謀國,義所當告,君乃不能也。君曰告夫三子者?」也。君曰告夫三子者?」

命三子,而使我告之耶

之後,不敢不告也。」 之三子告,不可。孔子曰: 「以吾從大夫

矣。 哉? 從 告方伯,而率與國 孔子之志,必將正名其罪,上告天子,下 之言。誠若此言,是以 魯之衆, 而 君之心,實與 以君命往告,而三子魯之彊 尼此舉,先發後聞可也。」 秋》之法: 正之,周室其復興乎? 齊者,孔子之餘 之,可 夫子復以 當是時,天下之亂極矣,因是足 陳恒弑其君,民之不予者半。以 程 勝惜哉!... 加齊之半,可克也。」此非孔子 子曰: 弑君之賊,人得而討之。 (陳氏 此應之,其所以警之者 事 「左氏記孔子之言 聲勢相 以討之。至於所以勝 也,豈計魯人之衆 力不以義也。若 胡氏 魯之君臣,終不 倚,故沮其謀。 日 : 臣,素有 無 寡

子路 以先勿欺而後犯也。」 犯 路之所難 問 事君。 犯顔諫 也 子曰 一,而以 爭。 0 不欺爲 〇范氏 勿 欺 難。 日 : 也 故 「犯非子 而犯之。 夫子教

人欲,故日究乎汙下。 君子反天理,●故日進乎高明, 小人徇子曰:「君子上達,小人下達。」

對日:

「夫子欲寡其過而未能也。」使者

孔子與之坐而問焉

, 曰: 「夫子何

. 爲?.

出,子曰:「使乎

使乎

蘧伯玉使人於孔子。

魯,故伯玉使人來也。 瑗。孔子居衛,嘗主於其家。既而反使,去聲。下同。○蘧伯玉,衛大夫,名

又曰 其進德之功,老而不倦。 稱「伯玉行年五十而 夫子再言「使乎」以重美之。 謂深知君子之心而善於詞令者矣。故 之言愈自卑約,而其主之賢益彰,亦 省身克己,常若不及之意可見矣。使者 伯玉也。言其但欲寡過 與之坐,敬其主以及其使也。 夫子, 「伯玉行年六十而六十化。」蓋 知四十九年之非」。 而猶未能 是以踐 按: 門則其 履 莊周 口

「反」,殘宋本、元甲本、司禮監本、吴本作「循」

信之也。 實,光輝宣著,不唯使者知之,而夫子亦

子曰:「不在其位,不謀其 重出 (政。)

氏曰: 矣。故君子所思不出其位,而君臣、上 之,記者因上章之語 此《艮卦》之《象辭》也。● 曾子蓋 下、大小,皆得其職也。」 「物各止其所,而天下之理 「君子思不出其位。」 而類記之也。 嘗 得 范 稱

子曰: 欲有餘之詞。 行,去聲。〇耻者,不敢盡之意。 「君子耻其言而過其行。」 過者,

子曰: 「君子道者三, 我 無能 焉 仁者

> 子貢曰:「夫子自道也。」 不憂,知者不惑,勇者不懼 知,去聲。 日 : 道,言也。自道,猶云謙辭。 故夫子之言,其序有不同者以此。」 「成德以仁爲先,進學以智爲先。 ○自責以勉人也。

尹氏

子貢方人。子曰: 則不暇。」 之。 疏矣。 專務爲此,則心馳於外,而 方人物而 夫,音扶。〇方,比也。 而意已獨至如此。」 ○謝氏曰: 故褒之而疑其詞,復自貶以 較其短 「聖人責人,辭不迫切 長,雖 賜 也 乎哉 亦窮理之事 賢 乎哉? 所以自治者 疑辭。 深 夫 抑 我

子 曰 言之,其丁寧之意亦可見矣。 見,而文皆有異,則聖人於此 文 凡 小異者 章 指 「不患人之不己知 同 屢言 而 文不異者, 而各出 一言 也。 患其 而 此 不 事 重 能 章 出 也 Ā 也。 屢 兀

是賢乎!」 「不逆詐,不億不信,抑亦先覺者,

語辭。 足 雖 子 自 詐,謂人欺己。不信,謂 逆,未至而迎之也。億,未見 夫不逆不億而卒爲 不逆詐 然先覺,乃爲賢也。 觀 也已。」 於誠而已,然未有誠 言雖不逆不億, 、不億不信, 小人所罔 〇楊氏 而常先覺 而於 人疑己。 而 不明者。 人之情 而意之 焉,斯亦 日 也 抑,反 一君 也

微生畝謂孔子曰:「丘何爲是栖栖者

與? 無乃爲佞乎?」

人也。 與,平聲。 栖、依依也 夫子而辭 甚 〇微生姓 倨, 蓋 爲佞,言其務 有 战 畝 德 名 爲 而 也 П 隱 者 給 畝 以 名 悦 栖 呼

孔子曰: 於達尊, 疾,惡也 禮恭而言直如此 非 固,執 敢爲佞 也,疾 而不通 固 其 也 也 警之 聖 亦深 人之

子曰 無德 티 : 善馬之名。 則亦奚足尚哉?」 「驥雖有 驥 不 稱其 力,其 德, (力,稱: 謂 稱 調 其 在 德 德。 良 也。 人 有 尹 氏 而

也。 或人所稱,今見《老子》書。德,謂恩惠或曰:「以德報怨,何如?」

子 Ė 何以 報 德

言於 於我者 其所 ,又將何以報之乎? 怨, 既 以德報之矣, 則人

以直報怨,以德報 德

矣。 無 曲 報之,不可忘也。 然怨有 如夫子之言,然後二者之 意之私 私,所謂直也。 於其所怨者,愛憎取舍,一 也。 折 然以聖人之言觀之,則見其 反 ,學者所宜詳玩 ,而怨德之報皆不得其平 復,如造化之簡 不讎,而 此章之言, 德 於其所德者, 無 明 也。 白 或人之言, 不 報 易 簡 約,而 易 報各得 ,則又未嘗 以 知 至公而 則 其指 必 出 也。 而 可 其所。 於有 妙 意 厚 無

子 我 〇夫子自歎,以發子貢之問 知 也 夫

也。

天乎! 子貢 「不怨天,不尤人,下學而上達。 日 . 「何 爲 其 莫 知 子 也 ? 知我 子 者其 \Box

習而 此。 子曰: 自有 日: 不得於天 以發之。 孔門,唯子貢之智幾足以及此,故 而 反己自修,循 致其知 ,但知下學而自然上達。 又曰: 不察? 人不及知 蓋凡下學人事 「學者須守下學上達之語,乃學之 惜乎其猶 「不怨天,不尤人,在 也。 丽 則亦不能以上達矣。」 「下學上達、意在 不 序漸 然深味其語意,則 而 怨天,不合於 天獨知之之妙 進 ,便是上達天理。 有所未達 耳,無 此 以 也 甚 旧 言表。」 理 異 而 自 見 於 當 其 不 蓋 尤 又 其 如 程 在 中

公伯 寮愬 「夫子固有惑志於公伯寮,吾力猶能 子 路於季孫。 子服 景伯 以

肆諸市朝。」

也。 孫。 ,伯字,魯大夫子服何也。 音潮。 言其 言欲誅寮。 有疑於寮之言也。 〇公伯寮, 魯人。 子服 夫子,指 肆, 氏, 陳 P 季 景

子曰: 廢也與? 也。 於利 以 亦 與,平聲。○謝氏曰: 命也。 曉景伯,安子路,而警伯寮耳。 害之際,則不待决於命而後 「道之將行也與? 命也。公伯寮其如命何!」 其實寮無如之何。」愚謂言此 「雖寮之愬行, 命也。 道之將 泰然 聖人

辟,去聲。下同。○天下無道而隱,若子曰:「賢者辟世,

去亂國,適治邦。

伯夷、太公是也。

「其次辟色,

禮貌衰而去。

「其次辟言。」

遇不同爾。」雖以大小次第言之,然非有優劣也,所雖以大小次第言之,然非有優劣也,所

子曰:「作者七人矣。」

以實之,則鑿矣。」 今七人矣。不可知其誰何。必求其人李氏曰:「作,起也。言起而隱去者,

之者與?」曰:「是知其不可而爲曰:「自孔氏。」曰:「是知其不可而爲子路宿於石門。晨門曰:「奚自?」子路

之不可而不爲,故以是譏孔子。然不知其何所從來也。胡氏曰:「晨門知世門,蓋賢人隱於抱關者也。自,從也,問舉,平聲。○石門,地名。晨門,掌晨啓

四

而

天下, 無 不 可 爲之時 也

子 日 擊 則 荷 草器也。 磬於 亦非常人矣。 未嘗忘 「有心 衛 哉 天下, 此荷蕡者,亦隱士也。 ○磬,樂器。荷,擔 有 荷 擊磬 此人聞 費 乎 而 過 其磬聲 孔 氏 之門 而知之, 也。 聖人之 者

斯 既 而 而 日 已矣。 0 鄙哉! 深則厲,淺則揭 硜 硜 乎 ! 莫己. 知 也

子人 兩句。《衛 揭,起例反。 硜 ,苦耕反。 以 不知己 衣 涉 風 水 而 0 莫己之己,音紀,餘 Ė 不止,不 匏有苦葉》之詩 硜 厲 ,攝衣涉 硜,石聲, 能適淺深之宜。 水 亦專確 也。 日 揭 音以。 譏 此 之 孔

子曰

「果哉

末之難矣。」

果

哉

,歎其果於忘世也。

末,

無

也

聖

心同天地,視天下猶一家,

中

國猶

此,則 人,不 歎其果於忘世。 能 亦無所難矣。 日忘 且言人之出 也 故 聞 荷 費 處,若但 之言, 如

張 曰 「《書》云: 高 宗 諒 年 不

子

言。」何謂 也?

子曰:「何必高宗,古之人 高宗, 未詳其義 商王武丁也。 諒 陰, 皆 天子 然。 居 君 喪之

百 之喪, 官總己以聽於冢宰三年。 君得 職 有 言 君 ,殆以爲人 貴賤,而生於父母無以異者。 以三年不言也。 冢宰,大宰 薨,則諸 自 天子達於庶 君三年不言, 侯 也。 亦然。 人。 百官聽 總己 胡 子張 則 氏 調調 於 臣 曰 : 冢宰 故 總 非 攝 無 疑 年 位 故 此 所

冢宰,則禍亂非所憂矣。」 禀令,禍亂或由以起也。孔子告以聽於

分定,故民易使。」好、易,皆去聲。○謝氏曰:「禮達而子曰:「上好禮,則民易使也。」

如 0 姓 告之,無他道 知 蓋聖人之心 有 脩己 斯 加於此 之,故再以其充積之盛、自然及物 ,則盡乎人矣。 問 如斯 以敬,夫子之言至矣盡 海 而 君 以安百姓、堯、舜其猶病諸 E 之内 子。 而已乎?」 乎 無 ? 三 曰 以抑子 子 也 窮 無 堯、舜 人者,對己而言。 路,使反求諸 日 雖 物 脩己 : 「脩己以安百 極治,然豈 猶病,言不可 脩己以 不 - 得其 矣。 以 敬。」 所 安 而子 哉 人。」 能 日 也 者 心 路 百

> 「君子 達順之道 育,氣無 足, 唯上下一於恭敬 天饗帝。」 故堯、舜 脩 非 不 己 猶 所 以安 和 聰明睿 以 以 安百 爲 加 百姓 聖人矣。 四靈 知皆由 則天地 姓,篤 位爲病。 畢至 恭 是出 自 矣。 若 而 位 程 天下 萬萬 子 此 吾 體信 此 物自 日 治 平。 事 E

述焉 原 夷,蹲 壤夷俟。子曰 人之名。 蹲踞以待之也 而 久生於世 脛,其定 歌、蓋老氏 老而不死,是 踞 脛,足骨 並去聲。 反。 也。 ,徒足以敗常亂 以其自幼至長, 之流 〇原 俟,待也。言見孔子來 也。 爲賊 述,猶稱也。 壤,孔子之故人,母 ,自放於禮法之外者。 長,上聲。 幼 以以 孔子既責之,而 而 不孫弟,長 俗 無一 杖叩 **П** 則 善狀 賊者 其 是賊 音 脛 而 而 丽 因 無 而

以所曳之杖微擊其脛,若使勿蹲踞然。

定也。○闕黨,黨名。童子,未冠者與,平聲。○闕黨,黨名。童子,未冠者與,平聲。○闕黨,黨名。童子,未冠者與,平聲。○闕黨,黨名。童子,未冠者與,平聲。○闕黨,黨名。童子,未冠者與,平聲。○闕黨,

論

語

卷第七

論語卷第八

曰

君

有

窮

乎?」子

0

衛靈公第十五 凡四十一章。

之事 衛靈公問陳於孔子。 也。」明日遂 ,則嘗聞之矣; 行。 孔子對 軍旅之事,未之學 日 : 「俎 豆

而 君也,復有志於戰伐之事,故答以未學 陳,去聲。 豆,禮器。 去之。」 尹氏 ○陳,謂軍師行伍之列。俎 日 . 「衛 靈 公,無道之

在陳絶糧,從者病,莫能興。

〇孔子去衛適陳 起

朱熹集注

子 日 路 處困 通。 非。」程子曰:「固窮者,固守其 言君子固有窮時,不若小人窮則放溢爲 見,賢徧 宜深味之。 「君子固窮,小人 愠 ○愚 而 亨, 反。 謂聖人當行 無所怨悔,於此 何 氏 第 子 日 而 亦 斯濫矣。」 行,無所顧慮, 「濫,溢 可見。學者 (窮。」 亦 也

與? 子曰: 賜也,女以予爲多學而識之者

所本也,故問以發之。 女,音汝。識,音志。與,平聲。 〇子貢之學,多而能識矣。 夫子欲其知 F 同

對日: 方信 「然。非與?」 而忽疑,蓋其積學功至,而亦將有

也。

曰:「非也。予一以貫之。」

之載, 子所學之淺深,又可見矣。 發之,而他人不與焉。則顏、曾以 先發其疑而後告之,而子貢終亦不能 能徧 可見。」愚按: 曾子之『唯』也。 此,曾子復深喻之曰『唯』。 形,匪物物 也 説 以貫之。』『德輔 也 孔子之於曾子,不待其問而直告之以 見第 然聖人豈務博者哉? 無 謝 四 而 聲 氏 盡 刻 無臭。』至矣! 日 識, 而雕之也。 然彼 夫子之於子貢,屢 二子所學之淺深,於此 如 宜其 「聖人之道大矣,人 毛,毛猶 以 以 行 爲 言,而此 故 多學 有倫。 若子貢,則 一尹氏 如天之於衆 日 . 而 子子 以 下諸 識 有 上天 日 知 如

德,謂義理之得於己者。非己有之,不鮮,上聲。○由,呼子路之名而告之也。子曰:「由!知德者鮮矣。」

疑皆一時之言。此章蓋爲愠見發也。能知其意味之實也。○自第一章至此。

爲哉? 子曰 敬德之容。 故尤不見其有爲之迹也。 稱舜者,紹堯之後,而又得人以任衆職 人德盛而民化,不待其有所作爲也。 與,平聲。 恭己 無 爲 正南 夫,音扶。 既無所爲,則人之所見如此 而 治者,其舜 面 而已矣。」 〇 無 恭己者,聖人 也 爲 與? 而治者 夫 何 聖

而

矣; 言不忠信子照問行。

也

哉? 矣; 言不忠信,行不篤 「言忠信,行篤 敬 敬 雖 雖 蠿 州 貊 里 之 邦 行 行 平

行篤、行不之行,去聲。貊,亡百反。○

蠻,南 子張 則見其 意 蠻。 答 在 干禄 得行於外,故 參於前 ,北狄。二千五百家爲州 問 達之意 也 9 夫子 在興,則見其倚 也 ·反於· 篤 厚 身而言 也。

於衡也。

、夫然後行。

言 於忠信、篤敬念念不忘,隨 參,七南反。夫,音扶。 可行也。 有見,雖 信、篤敬而言。 參」,言與我 行,自然不離 欲頃 刻離之而 相參也。 參,讀如「毋往參焉」之 於忠信、 不可 衡, 軛也。 〇其者, 篤敬 其 得。 所在 前 然後 常常 言 鑾 指 其 忠 貊

子張書諸紳。

紳, 己。 見 其 程子 ,行篤敬 大帶之垂者。 倚於衡; 博學而 日 · · 篤 立則 志 學 只此是學。● 要鞭 切 見 書之,欲其不 問 其 辟 多於 而 近 近 裹,著 前 思 質美者 在 志 輿 言 也 忠 而 明 則

> 得 次 惟 盡 莊 查 敬 滓 以持養之,及其至則一 便 渾 化 却 與 天 地 百 也。 體 其

無道,如矢。 子曰:「直哉史魚! 邦有道,如矢;

邦

猶以 史,官名。魚,衛 語》。 也。 尸 諫, 史魚自 故 夫子 以不能進賢退 大夫,名鰌。 稱 其 直。 不肖,既 事 如 見《家 矢, 死

道,則可卷而懷之。」 邦有道,則仕, 邦

蘧伯玉 氏曰:「史魚之直,未盡 放弑之謀,不對而出 卷,收也 伯 玉出 一,然後可免於亂世。 處,合於聖人之道 懷,藏也。 如於孫林父 亦其 君子之道。 事也 若史魚之如 故曰 君子。 ()、育 ○楊 殖

■「只」,司禮監本作「即」。

無

則 雖 欲 卷 而懷之,有 不 可 得 也。

不 可 子 失言。」 與言 日 圃 與 口 之言, 與 言 而 失言。 不與之言, 知者 失人; 不失人, 亦 不

知,去聲。

身以 子 回 成 志 士 仁人, 無 求 生 以 害 有 殺

安於 别。 全矣。 如 古 害其 志 理 此 當 士 箇是而 死 ? 有 心 死 ,有志之士。 實 也 之德也。 捐 丽 理 須 者, 程 軀 求 是實 故有殺 隕 子 生 命 日 ,則於 (見得: 見 當死 : 者 身 得 人, 生 若 其 是 U 而 實 不 不 成 死 心 則 9 理 實 重於 有不 實 成德 則心安而 見 見 者 之於心 得, 得 安矣, 義 之人也 非 是 惡 生 成 能 自 不

> 其 利 子 士之仁者。 其 貢 問 爲 居 是 邦 子 日 也 事 其 T 大夫之賢 欲 善 其 事 必 友

問 切 不若 爲 磋 以 仁,非 三者 事言 而 以 成 1,故以 其 問 德 也。 是告之。 德言 也 故 孔 程 夫子 子 子告之以 欲 日 其 嘗 有 謂 子 所 子 爲 嚴 貢 貢 憚 悦

顔 淵 問 爲 邦

邦 顔 者 子 王佐之才,故問治天下之道 謙辭 日

子 日 「行夏之時

三代 斗 也 地 夏 時 柄 īF. 迭用 建此 天開 周 謂 以子爲天 以 三辰 於子 之,夏以 斗 柄 之月 初 闢 寅 正 肾可 昏 於 爲 也 建 \mathbb{H} 人 寅 以 然 Œ 人生於寅 之月 爲 育 時 歲首。 爲 丑. 歲 故 首 而

屬 得 又以告顔 則 夏 歲 蓋 時 月 取 焉 自 其 子 當 也。 時 而 以 之正 説 人爲 者 與其令之善, 以 紀,故 爲 謂《 孔 夏 子 小 嘗 而 E 日 於 **>** 此 之 吾

「乘殷之輅,

素渾堅而等威已辨,爲質而得其中也。 商 者,大車之名。 輅,音路,亦作 金玉,則過侈而 而有輅之名 ,蓋始異其 路。 古者以 易敗, 商 木爲 輅, 不若商 制 也 木輅 車 而 略之 周 也 E X 飾 樸 至

「服周之冕,

後有 體之上,故 儀等,至周始備 唐 冕有五, 旒。 韶 夫子取之,蓋亦以爲文而得其 》、《舞》。 黄帝以 雖 祭服 華 之冠 加 來, 然其爲物 不爲 蓋 也 靡, 己)。冠上有 有之, 小 雖 費 而加 而 而 中 覆 於衆 制 不及 度 前

取其盡善盡美。

放鄭聲,遠 此。 也 業可大。 壞 聲,遠佞人,法外意也。 也。 此。 故放遠之。」尹氏 以爲之兆 斟酌先王之禮 也,不能無弊。 之音。佞 矣。 程子曰 孔、顔 又 曰: 大 張子曰: 蓋三代之 可 虞、 法。 得 0 人,卑諂辯給之人。殆, 佞 鄭 爾。 而見矣。」 雖 「法立 夏 人。 聲 孔子之作《 放 不 君 問政 制,皆因時損 佞 ,立萬世常 「禮樂,治之法也。 謂 由 得行之於時, 周衰,聖人 鄭聲 臣 人 日 是求之,則 多矣,惟顔淵告之以 禁絶之。 更 而 能 淫 能 相 此 使 佞 春 守,則德可 飭 日不謹, 人喪 行之道, 不作,故 秋 人殆。」 所謂 戒,意 益 鄭聲, 》,蓋 餘皆 然其 一,及其 其 白 、所守 危 蓋 爲治 王不 發此 孔 此 則 放 叮 鄭 子 法 鄭 久 或 意 如 考

里之外,則患在几席之下矣。」蘇氏曰:「人之所履者,容足之外,皆蘇氏曰:「人之所履者,容足之外,皆

也。 〇已矣乎, 歎其終不得而見好, 去聲。 〇已矣乎, 歎其終不得而見

之賢,而不與立也。」 子曰:「臧文仲其竊位者與? 知柳下惠

也; 惠,魯大夫展獲,字禽,食邑 加 者與之與,平聲。 臧文仲爲 有愧於心,如盜得 與立,謂與之並立於朝。 知而不舉,是蔽賢也。 政 於魯,若不 ○ 竊 而陰據之也 位,言不稱 知 賢,是 柳下,謚 范氏 不明之罪 不 其 柳 日 明 位 \Box 下

以爲竊位。」 以爲竊位,以爲不仁,又小,蔽賢之罪大。故孔子以爲不仁,又

薄,故人易從。所以人不得而怨之。遠,去聲。○責己厚,故身益脩, 責人子曰:「躬自厚而薄責於人,則遠怨矣。」

如之何也已矣。」子曰:「不曰『如之何,如之何』者,吾末

不如是而妄行,雖聖人亦無如之何矣。如之何,如之何者,熟思而審處之辭也。

難矣哉!」

之,信以成之。君子哉 君子義 以爲質, 禮以 行之,孫 以

信以 孫出 日 義爲本。」又曰: 成之必在誠實,乃君子之道也。 : 成之。」 此 「義以 而行之必有節文,出之必以退遜, 義以爲質 ,信成此。 〇義者制事之本,故以 爲質,如質幹然; 則禮以行之,孫以出之, 敬 此四 以直· 句只是一事,以 内,則義以方 ○程子 禮行此,

焉。」 也。二〇 子 子曰 「君子病無能焉,不病人之不己知 君子疾没世 而名 不 稱

然没世 范氏 日 : 而名不稱焉 君子學以爲己,不求人知 則 無爲善之實可知

> 子 没世 然所以求者,亦反諸己而已。 謝 ,故違道干譽, 氏 而名 「君子雖不病人之不己知,然亦疾 此君 日 而義實相足,亦記言者之意。」 君子求諸 不稱也 子 「君子無 小 人所 己,小人求 無所不至。三者文不 雖 不反求諸己,小人反 以分 疾没世 也。」 諸 而名不稱 小人求諸 人。 楊 氏

子曰 不黨 爭。 莊 以 持己 和以處衆曰 「君子矜而不爭,羣而不黨。」 日 矜。 然無 然無阿比之意,故 乖 戾之心,故

不

者乎?」子 子 施於人。」 子貢問 日 「君子不以言舉人,不以 有一言而 其恕乎 可以終身行之 己所不欲, 人廢言。

推 終身行之,不亦宜乎?」 推 可 謂 尹氏 而 己 及 極之,雖聖人之無我,不出乎此。 知要矣。孔子告以求仁之方 티 : 物 其 「學貴於知要。 施不窮,故可 以 子 終 貢 身 行 之 問問 也。 之。

子 所譽者,其有所試矣。 E 「吾之於人也 誰毀誰 譽? 如 有

荷如此 有 也。 而 譽,平聲。○毁者,稱人之惡而損其真。 譽者,揚人之善而 知其將然矣。 以前知其惡,而終無 然或有所譽者,則必嘗有以試之, 若其惡惡,則已緩矣。 聖人善善之速,而無所 過 其 所毀 實。 也。 夫子無是 是以 雖

斯民 也。 民者, 也,三代之所以直道而行也。」 直道 今此之人 以此 無私曲也。 民,即三代之時所以 也。三代,夏、商、 言吾之所以無 善 所 周

> 哉? 其善 也。 亦 容私於其間哉?」 不 斯民 得 、惡其惡 其所以譽之者,蓋試 「孔子之於人 而 也,三代所以直道 枉其 而無 是 所私曲之民。 也 非之實也。 ,豈有意於毁 而 而 知 其 美故 譽之 尹 岩. 我 氏 得 今

子曰: 今亡已夫! 「吾猶及史之闕 文也,有馬者借人

氏 蓋 人,此二事孔子猶及見之。 夫,音扶。○楊氏 悼時之益偷 日 雖細故,而時變之大者可 此章義疑,不可强解。 也。」愚謂 曰:「史闕文、 此 必 知矣。 有 今亡已夫, 爲 而言。 馬 胡

子曰: 巧言 小不忍,如婦人之仁、匹夫之勇皆是。 「巧言亂德,小不忍則 變亂 是非,聽之使 人喪其所守。 亂大

惡人。衆好惡之而不察,則或蔽於私矣。」好、惡,並去聲。○楊氏曰:「惟仁者能好

過遊成,而將不及改矣。過而能改,則復於無過。唯不改,則其子曰:「過而不改,是謂過矣。」

子曰:「吾嘗終日不食,終夜不寢,以思,

句。無益,句。不如學也。」

子非思而不學者,特垂語以教人爾。」 不如 此 爲 遜 思 志 而 不學者言之。蓋勞心以必求, 而 自得 也。 ○ 李 氏 日 「夫

受貧。」中矣,學也,禄在其中矣。君子憂道不子曰:「君子謀道不謀食。耕也,餒在其

战?」
战?」
一次要不得乎道而已,非爲憂貧之故,而也,憂不得乎道而已,非爲憂貧之故,而也,憂不得乎道而已,非爲憂貧之故,而也,憂不得乎道而已,非爲憂貧之故,而也,憂不得乎道而已,非爲憂貧之故,而

失之。 子曰:「知及之,仁不能守之,雖得之,必

知,去聲。〇知足以知此理,而私欲間

知及之,仁能守之,不莊以莅之,則之,則無以有之於身矣。

民

不敬。

有不 莅,臨也。 不嚴於外者,是以民不見其 間之,則 莊 下句放此。 者。蓋 所 謂 知 臨 氣習之偏 者 民 在我 也 0 知 而 或或 此 不 有 可 失 理 畏 厚 矣 而 於 而 無 内 慢 然 私 猶 而 欲

禮,未善也。」「知及之,仁能守之,莊以莅之,動之不以

之也 爾。 知德愈全 莊 動之,動民 仁,則善 亦非 ,動之不以禮, 禮 盡 謂義理之節 有 則 善之道 諸 也。 責 己 愈備,不可以爲小節而 猶 而 乃其氣禀學問之小疵 也 大本 日 文。 故夫子歷言之,使 鼓 舞 7 矣。 而 愚 作 謂 莅 興 學 之不 之云 至於 忽

> 子 人不 所受 德足 此 無 言 也。 以 觀 可大受,而可 一長可取。 任 君 人之法。 蓋君子於細事未 子 重 9 不 可 小人 知, 小知也。」 小 、雖器 知 我知之也。 9 而 量 必 口 淺 可 大受 狹, 觀,而 而 也 未 材 彼

吾 子 見蹈 日 失其 其 民 0 於 日 之 日 於水 「民之於仁 嘗 心。 無 而死者矣,未見蹈仁而死者也。」 無水火,不過害人之身,而 也。 殺 也 此夫子 是仁有甚於水 亦然。 火,所賴以生,不可一 況水火或有 亦 何憚 勉人爲仁之語。」下 也 但水火外物,而仁 而 於 不 火,而尤不 時 爲 水 火。 哉 而 殺 ? 不 日 水火, 仁 可 無 則 在 以 李

放此。

子曰 在 子曰:「爲仁在己,無所 當仁,以仁爲己任也。 而自爲之,非有爭也,何遜之有? 言當勇往而必爲也。 外,則不可不遜。」 「當仁,不讓於師。」 蓋仁者,人所自 雖 與遜。 師 亦 無 若善名 所 遜 程 有

子曰 信。 貞,正而固也。 「君子貞而不諒。」 諒,則不擇是非而 必於

子曰: 禄之心也。 其忠。皆以敬吾之事而已,不可先有 後,與後獲之後同 之仕也,有官守者修其職,有言責者 「事君 「、敬其事而後其食。」 ○食,禄也。 君子 求 盡

> 子曰: 「有教無類。」

之染也。 善,而不當復論其類之惡矣。 人性皆善,而其類有善惡之殊者 故君子有教,則人皆可以 復於

氣習

子曰: 爲,去聲。 「道不同,不相爲謀 〇不同,如善惡邪正之異。

子曰:「辭達而已矣。」 詞,取達意而止,不以富麗爲工。

□: 斯,某在斯。」 師冕見,及階,子 「席也。」皆坐,子告之曰: 日 : 「階也。」及席, 「某在 子

師冕出。子張問曰: 見,賢徧反。 與,平聲。〇聖門學者,於夫子之一言 再言某在斯 , 歷舉在坐之人以詔之。 ○師,樂師,瞽者。冕,名。 「與師言之道與?」

一動,無不存心省察如此。

子 矣。」〇范氏曰: 日 得其所矣。」 無告,可見於此。 之,但盡其道 其道如此。 相 有志於學者,求聖人之心,於斯 處己爲人,其心一致,無不盡其誠故也。 ○相,助 蓋聖人 而 相師之道 己。 「聖人不侮鰥寡,不 推 也。古者瞽必有 於此,非作 〇尹氏 之天下,無 也。」 日 . 意 亦 「聖人 可 加 相 虐 見 爲

季氏第十六

四章。 洪氏曰:「此篇或以爲《齊論》。」凡十

季氏將伐顓臾。

嗣,音專。 臾,音俞。○顓臾,國名,魯

附庸也

冉有、季路見於孔子曰: 「季氏將有事於

顓

臾。」

孔。○按《左傳》、《史記》,二子見,賢徧反。○按《左傳》、《史記》,二子見,賢徧反。○按《左傳》、《史記》,二子

衛也。

與,平聲。○冉求爲季氏聚斂,尤用事孔子曰:「求! 無乃爾是過與?

故夫子獨責之。

之中矣,是社稷之臣也。 夫顓臾,昔者先王以爲東蒙主,且 之中。 益 國,季氏取其二,孟孫、叔孫 於此山之下,使主其祭,在魯地七 夫,音扶。○東蒙,山名。 獨附庸之國尚爲公臣,季氏又欲取以 故孔子言顓臾乃先王封國, 社稷,猶云公家。 何以伐爲?」 是時 先王 各有 封 四 在 則不 其一 分 百 顓 邦 魯 里 可 自 臾 域 0

之臣 非 當,不易之定體 聖人不能也 一,則 在邦 非 季 域之中,則不必 氏 所當 ,而一言盡其曲折如此 伐也。 伐; 此 事 ,理之至 是社 稷

之,故歸咎於季氏。 夫子,指季孫。冉有實與謀,以孔子非

焉用彼相矣?列,不能者止。』危而不持,顛而不扶,則將孔子曰:「求!. 周任有言曰:『陳力就

當 任 位 同。○周任,古之良 陳,諫 也。 ,平聲。焉,於 相 而不 ,瞽者之相 聽則當去也 虔 也。 史。 反。 言二子不 陳,布也。 相, 去聲。 一欲則 下

中,是誰之過與?」「且爾言過矣。虎兕出於柙,龜玉毀於櫝

兕,徐履反。柙,户甲反。櫝,音獨。

櫝,匱· 與,平 則季氏之惡,己不得不任其責 者不得辭 也。 其過。 言在柙而) 兕, 野 明二子居其位而 逸,在櫝 4 也。 而 柙, 也 毁 ~,典守 不去, 檻 也。

取,後世必爲子孫憂。」 冉有曰:「今夫顓臾,固而近於費。今不

實與季氏之謀矣。 之私邑。此則冉求之飾辭,然亦可見其夫,音扶。○固,謂城郭完固。費,季氏

必爲之辭。 孔子曰:「求! 君子疾夫舍曰欲之,而

夫,音扶。舍,上聲。〇欲之,謂貪其

利。

安無傾 均,不患貧 「丘也 聞: 而患不安。 有國 有家 者 蓋 不不 均 無 患 貧 寡 和 而 無寡 不

分。安,謂上下相安。季氏之欲取顓寡,謂民少。貧,謂財乏。均,謂各得其

嫌 和則不患於寡而安,安則不相疑 隙,則不安矣。 公無民, 傾覆之患。 寡 與 則不均 貧 耳 均 矣。 然 則 是 君 不 時 患 弱 季 於 臣 氏 貧 强 據 五、互生 忌。 而 或 和 而 面

既來之,則安之。 「夫如是,故遠人不服,則脩文德以來之。

也,邦分崩離析而不能守也。「今由與求也,相夫子,遠人不服而不能來不服,則脩德以來之,亦不當勤兵於遠。夫,音扶。〇内治脩,然後遠人服。有

不得爲 分崩 路 離析 雖 無 不 ,謂四分公室,家臣 罪 與 ,故並責之。 、謀,而 素不能輔之以義,亦 遠 人,謂 一屢叛。 顓

在顓臾,而在蕭牆之内也。」「而謀動干戈於邦内。吾恐季孫之憂,不

均不和,内變將作。其後哀公果欲以越干,楯也。戈,戟也。蕭牆,屏也。言不

與? 益之。 伐 子之言而救 凡季氏所欲 三家也。」〇洪氏 一家强 ,不見於經傳,其以夫子之言而止 魯 而 夫子所以 ,公室弱,冉 去季 爲 氏。 止者,宜亦多矣。 ,必以告於夫子。 深罪之,爲其 曰: 二子仕於季氏 謝 求 Ţ 氏 欲伐 曰 伐顓臾之 瘠 顓 當 則因夫 臾以 魯 是 以 肥 附 也

五世希 失矣。 出 孔子曰: 自諸侯出,蓋十世希不失矣; 9 天下 不失矣; 無道 天 下有 則禮 陪臣 道 樂 則禮樂征伐自天子 執 征 國命,三世希不 伐 自大夫出 自諸 侯出

天下有道,則政不在大夫。 先王之制, 臣,家臣 大約世 也。 諸 數 不過 侯 逆 不 理 得 如此。 愈甚, 變禮 樂,專 則其失之愈 征伐。

言不得專 政

天下有道,則庶人不議。」 敢言也。 上無失政 ,則下無私議。 〇此章通論天下之勢。 非箝 其 П 使不

於大 孔 子 夫,四世矣; Ė 「禄之去公室,五世矣; 故夫三桓之子 政 微 逮

宜 此 此 陽 國政,歷 定,凡五公。逮,及也。 赤,立宣公,而君失其政。 夫,音扶。 之强 章專 蘇 以前章之説推之,而知其當然。● 虎 氏 所執。 夫 論 入之 强 日: 也。 悼、平、威子,凡四世,而爲家臣 〇魯自文公薨,公子遂殺子 三威,三家,皆 事,疑與 而魯以 也 禮樂征 而 失 三威 前章皆定公時語。 伐自 八政,政 自季武 以 諸 歷成、襄、昭 威公之後。 微 逮 侯 何 出 於大夫, 子始專 了,宜諸 也?

> 故皆不久而失之也。」 侯、大夫皆陵 强生於安,安生 其 上,則無以令其 於上下之分定。 八下矣。

便佞,損矣。」 友諒,友多聞,益矣。 子曰: 「益者三友,損者三友。 友便辟,友善 1柔,友 友

孔

不直。 過。 明。 益 至於庶人,未 損 便,平聲。辟,婢 佞,謂習於口 益,正 有如是者,可不謹 便,習熟 友諒, 善柔,謂 相反也。 則 有不 語,而 也。 進於誠。 工於媚説 亦反。○友直 須 便辟,謂習於 哉?」 無 友 尹 氏 聞 以 友多聞, 見 成 日 之實。 而 0 不 自 諒 則 威 則 而 \equiv 其 天子 進 聞 於 其 損 便

司 禮監本、

樂,樂佚遊,樂宴樂,損矣。」樂,樂道人之善,樂多賢友,益矣。樂驕孔子曰:「益者三樂,損者三樂。樂節禮

之節。 樂之樂,音洛。 樂,五教反。 則惰慢而惡聞 君子之於好樂,可不謹哉?」 三者損益, 驕樂, 禮樂之樂,音岳 則侈肆 善。 亦相反也。 ○節,謂辨其 宴樂 而 不知節。 則 淫溺 制度聲 尹 氏 而 佚遊, 狎小 티 : 容 宴

未見顏色而言,謂之瞽。」而言,謂之躁, 言及之而不言,謂之隱; 孔子曰:「侍於君子有三愆: 言未及之

後言,則無三者之過矣。」目,不能察言觀色。○尹氏曰:「時然君子,有德位之通稱。愆,過也。瞽,無

孔子曰:「君子有三戒: 少之時,血氣

得。」
 我之在鬭, 及其老也,血氣既衰,戒之在未定,戒之在色; 及其壯也,血氣方剛,

其 定、 爲 得,貪得 血 而 色、戒於鬭、戒於得者、志氣 有 於人者血氣 時 德彌邵也。」 志氣,故不爲血氣所 M 氣,形之所 壯 加 氣 而 衰, 所 也 剛、老而衰者, 使 志氣 也,異於人者志氣 也。 隨 待 時 以 則 知 ○范氏 生 無 戒,以 者, 時 動 血 血 而 日 3,是以 理 陰 衰 氣 也。 勝之 而 也。 也。 世 「聖人 氣 年 君子 陽 彌 戒 少 血 則 高 氣

人,畏聖人之言。 人,畏聖人之言。 是天命,畏大

Œ 有不能 理 也。 已者。 深 憚 之 知其 意 而付 可畏,則 也。 畀之重,可 天 其 命 戒 者 謹 天 恐 以不 所 賦 失 自 之

矣。大人、聖言、皆天命所當畏。知畏

· 人下印户,市下县也,甲七人,每天命,則不得不畏之矣。

侮,戲玩也。不知天命,故不識義理,而之言。」

脩己之誠當 則何畏之有?」 無所忌憚如 侮,戲玩 也 然也。 此。 不 知天命 尹 小人不務脩身誠 氏 日 故 0 不 識 「三畏者, 義 理,而

而不學,民斯爲下矣。」之者,次也, 困而學之,又其次也, 困而學之,又其次也, 困和知

也。 約 後爲下。」 木 以 至困 有此 謂 故君子惟學之爲貴。 有 四等。 學, 所 雖 不通。言人之氣質不同, 其 〇楊氏 質不同,然及其知之一 曰 0 「生知、學 困 而不學, 知 大

> 問,忿思難 聰,色思温 孔 子 日 : 見 一,貌思 君 得思義 子 恭,言思忠 有 九 思 視 事 思 思 敬 明 疑 聽 思 思

難 不存焉者,寡矣。此之謂思誠 至於從容中道,無時 日 則 貌,舉身 聽無所壅, : 忿 ,去聲。 必懲。 「九思各專其一。」〇謝氏曰: 而言。 則聰無 思 視無所蔽, 義 思問,則疑不蓄。 不 則 而不 聞。 得 自省察也 不 色,見 則 荷。 明無 於 一。雖有 不 思 面 程 者。 難 見 子

吾見其人矣,吾聞其語矣。 孔子曰:「見善如不及,見不善如探湯。

語也。 〇真知善惡而誠好惡之,探,吐南反。 〇真知善惡而誠好惡之,

語矣,未見其人也。」「隱居以求其志,行義以達其道。吾聞其

其 隱 求 可 (所求之志 以當之。 其 而 未見, 志 守其所 又不 當 也。 時 達之道 幸 若顔子,亦 蓋 惟 加 伊尹 蚤 也。 死,故夫子 、太公之流, 庶乎此。 達 其道,行 然

駟,四馬也。首陽,山名。伯夷、叔齊餓于首陽之下,民到于今稱之。齊景公有馬千駟,死之日,民無德而稱焉。

其

斯之謂與?

也。」愚問 上。 與,平聲。 此章之首。今詳文勢,似當 二字? 誤。 篇錯簡 言人之所稱,不在 蓋 謂 闕 此説近是, 一誠 〇胡氏 文 不以 耳。 富 大抵此書後十 而 亦祇 章首 於富 程 子以 以 當 在 而 異 有 此 二,當 爲第 在 孔 句 篇 於 名 子 異 在 之

> 陳亢問於伯 亢 厚其子。 音剛。 魚曰 〇
> 亢 0 以 「子亦有異聞 私 意窺 聖人 乎? 疑 必 陰

學《詩》 對 日 0 日 理通達,而心 0 學《詩》 無以言。」鯉 未 也。 乎?]對 氣 嘗 和平,故能言。 退而學《詩 獨 三 : 7/ 鯉 趨 未 也 而 過 庭

鯉退 乎?』對日 他日又獨 . 立 示未 鯉 趨 也 。」『不學 而 過 庭。 禮 曰 : 無無 以 學禮 7

品節詳明,而德性堅定,故能立。鯉退而學禮。

「聞斯二者。」

可知。當獨立之時,所聞不過如此,其無異聞

禮,又聞君子之遠其子也。」陳亢退而喜曰:「問一得三,聞《詩》,聞

子,無異於門人,故陳亢以爲遠其子。」遠,去聲。○尹氏曰:「孔子之教其

声,那人稱之曰君夫人,夫人自稱曰小邦君之妻,君稱之曰君夫人,稱諸異邦曰寡命,謀辭。○吴氏曰:「凡《語》中所載如此類者,不知何謂。或古有中所載如此類者,亦曰君夫人,稱諸異邦曰寡之,或夫子嘗言之,不可考也。」

論語卷第八

三三六

論語卷第九

水熹集注

其

寶

加

迷

其

邦

9

可

謂

乎?

日

凡二十六章。

陽 子 貨 子 名 時 歸 有 虎。 賜 來見己,而孔子不往。 其亡也 欲 ,如字,一作 故矙 見 於 嘗囚季威子 孔 士,不得受 · 而 子,孔 孔子之亡而 往拜之,遇諸塗。 饋 子不見,歸 於 而 歸之豚 陽貨,季氏家臣, 其 專 國政。 家 貨 孔 以 欲 則 子 禮「大夫 欲 往 令孔 拜 令孔 其 孔

謂

FL

子

曰

來

予

與

爾

言。」目

1

來

拜

而

見

之也。

可。二 不可。」「日月 時,謂 必 辯,若不 不仕於貨 孔子固未嘗如 必之辭。 也 也 直 不 故孔子不見者 子,雖其善意,然不過 藏道德,不救 時其亡 避者 也 好 亟、知,並 吾將仕矣。」 敬 從 不 所不敬,爲 對 楊 諭 及 事 不終絶也。 一而往 而 氏 貨 耳。 事 而 其 逝矣。歲 不辨者, 日 語 去聲。 意者。 幾 亟失 或 此,而 者,欲其 ,義也。 故 之會。 一之迷 温身 直 譏 時 揚 言之 據 孔子 不我與。」孔子曰 可 隨 亦 亂。 〇懷 欲 以 雄 其 理 稱也 非 將 問 使助 陽貨之欲 謂 信 謂 孫 往拜者, 禮也 答之,不復 者 不 而 而 呕 知 孔子 道 而 欲仕 ,且然而 誳 迷邦 對 乎?」 己爲亂耳 數 遇諸 亦 使 者, 也 非 於 無 速仕。 也 見 謂 陽 知 所 理 塗 \Box 未 孔 與 懷 詘 貨 而 旧 孔

而可以信道,吾未之信也。」 子者。蓋道外無身,身外無道。身詘矣

子 若言 之言性善是也。 習於惡 性 此 日 E . 「則皆 固 所 「此言氣質之性 其本,則性即是理,理無 謂 性相 則 性 不甚 美 惡,於是始 悪 兼 近 相 之 氣 也 何相近之有哉?」 遠 習相 不 質 也。 同 而 相遠耳。 矣。 言 ,非言性之本也。 遠 但 者 也。 一習於 然以 也 不善,孟 善則善, 其 氣質 程 初 子 子 而

子 才 可 能 相 知 日 移者。 則 移者,何也 近之中,又有美惡 有 惟 下愚之不移。 F 〇程子 () 此 知 ? 與 承上章而言。 語 Ĭ: 下 愚 其 性 一定,而 不 人 所 移 則 0 性 皆善也,語 謂 本善, 下 人之氣 非習 愚愚 之 有 所

> 也。 當合爲一、『子曰』二字、蓋衍文耳。」 也 以 無不 考其歸,則 也 尼之所謂下愚 ,往往 殭戾 不 聖人以其自絕於善,謂之下愚,然 爲,雖聖人與居,不能化而人也,仲 可 惟自暴者拒之以不信 自暴、 移 誠愚也。」或曰: 雖 而才力有過人者,商辛是 昏愚之至,皆 棄 也。 也 然其質非必 人 荷 ,自棄者絶 以 可 「此與上 善 漸 自 香且 磨 而 愚 之 進 則

爲教,故邑人皆弦歌也。 弦,琴瑟也。時子游爲武城宰,以禮子之武城,聞弦歌之聲。

夫子莞爾 莞,華 此大道也 喜之也。 版 而笑, 曰: 反。 焉,於虔 因言其治小邑,何 割雞 反。 焉 用 莞 牛 力? 必 笑 用

子游對曰:「昔者偃也聞諸夫子曰:

曹樂。 曹来。○君子、小人,以位言之。子 易,去聲。○君子、小人,以位言之。子 以大學道則愛人,小人學道則易使也。」」

戲之。 自實其戲 治有大小,而其治之 嘉子游之篤 也。 故夫子驟聞 而 子 也 但衆人多不能 信, 游 以 又以 而 E 深喜之,因反其言 對,故復是其 解 必 門人之惑 用 用 禮 而 樂, 子 則 游 也 其 以 爲 而

弗擾,季氏宰。與陽貨共執威子,據公山弗擾以費畔,召,子欲往。

邑

子路不説,曰:「末之也已,何必公山氏

五者之目

蓋因子

張所

不足而

以

叛。

之之也。」

我者,吾其爲東周乎?」 子曰:「夫召我者,而豈徒哉? 如有用所往矣,何必公山氏之往乎?

知其必不能改故 東周,言興 夫,音扶。 可改過之人,故欲往。 聖人以天下無 〇豈徒哉,言必 周 消 不可有爲之人,亦無不 也。 於東 方。 然 而終不往者 用 程 我 子曰 也。

子張問 於天下,爲仁矣。」請問之。 任焉,敏則有功,惠則足 信、敏、惠。 行是五 [無適] 仁於孔子。 而 者 恭則不 不然, 則 心 猶 存 孔子曰: 侮,寬則得衆,信 所謂雖之夷 而 理 以使人。」 得 티 : 矣。 「恭 能 (狄不可棄 於天下 行 則人 五者

敬夫 耳。 氏曰:「此章與六言、六蔽、五美、 公平而周 類 任,倚 日 ,皆與前後文體大不相似。」 偏可 「能行 仗 也。 知 矣。 此五者於天下,則 又言其 然恭其本與 效 如 此 ? 其 四 惡 心 張

佛肸召,子欲往。

趙氏之中牟宰也。○佛肸,晉大夫佛,音弼。肸,許密反。○佛肸,晉大夫

牟畔,子之往也,如之何?」 於其身爲不善者,君子不入也。』佛肸以中子路曰: 「昔者由也聞諸夫子曰: 『親

不磷; 子曰 之行。 子路恐佛肸之浼夫子,故問 「然。 不曰白乎,涅而不緇 親,猶自也。不入,不入其 有是言也。 不曰 此以止 堅乎 黨 夫子 磨 也 而

涅,染皂物。言人之不善,不能浼己。磷,力刃反。涅,乃結反。○磷,薄也。

可 涅,其不磷緇 無 楊 氏 不 可。 日 0 堅白 也者幾希。」 磨 不磷, 不 足, 涅 而 不 欲 緇 自 試 面 於 後 瘞 無

吾豈匏瓜也哉 夫曰: 者,以 常法。 權也。 焉,於虔反。 則 處 而 也。 知人之智也。」 而 事之終不可爲耳。 不 天下無不可變之人,無不可爲之 能飲 然夫子於公山 其卒不往者, 夫子今日之所言,聖人體 「子路昔者之所 食,人則不如是也 ? ○ 匏,瓠 焉能繫而不食?」 知其人之終不可變 、佛肸之召皆欲往 也。 聞, 則生物之仁, 匏瓜 君子守 繋於 道 身之 之 張 敬

曰:「未也。」 子曰:「由也,女聞六言六蔽矣乎?」

居! 吾語女。 ○蔽, 遮掩也。

三

也亂 直不好學,其蔽也絞; 其蔽也蕩; 好仁不好學,其蔽也愚; 所止。 曰 : 若可陷可罔之類。 好學以明之也,故告之以此。 之而不學以明其理,則各有所蔽。 剛者,勇之體。狂,躁率也。 好、知,並去聲。 、曰信、曰直,又皆所以救其偏也。」 故孔子喻子路,使還坐而告之。 「子路勇於爲善,其失之者,未能 好剛不好學,其蔽也狂。」 賊,謂傷害於物。勇者,剛之發。 好信不好學,其蔽也賊; 〇六言皆美德,然徒好 蕩,謂窮高極廣 君子問更端,則起而 好勇不好學,其蔽 好知不好學。 范 而無 好 氏

子曰: 《詩》,可以興, 夫,音扶。〇小子,弟子也。 「小子! 何莫學夫《詩

> 可以觀, 感發志意。

可以羣, 考見得失。

和而不流。

可以怨。

怨而不怒。

邇之事父,遠之事君。

多識於鳥獸草木之名。」 人倫之道、《詩》無不備,二者舉重而言。

此章盡之。讀是經者,所宜盡 其緒餘又足以資多識。○學《詩》之法 心也。

乎? 子謂伯魚曰: 面 而立也與?」 人而 不爲《周南》、《召南》,其猶正牆 「女爲《周 南》、《召 南 》矣

《周南》、《召南》,《詩》首篇名。 女,音汝。 與,平聲。 〇爲,猶 所言皆 學也

近之地,而一物無所見,一步不可行。脩身齊家之事。正牆面而立,言即其至

樂云,鐘鼓云乎哉?」子曰:「禮云禮云,玉帛云乎哉? 樂云

序便乖 者 道 是 且 則豈禮樂之謂哉? 敬而將之以玉帛, 順,乃能爲盗 含畜多少義 要須識 鐘鼓 日相聚而 · 2然亦有禮樂。 如置此兩 箇序,樂只是一箇 ,則爲樂。 乖便不和。 得。」 爲 倚,●一不正 理。 盗 不然,則叛亂 也。 天下無一 遺其 則爲 蓋必 〇程子曰: 禮 又如 和。 本而 一,便是 樂 有總 禮 (賊 盗 無 物 只此 專 屬,必 處 無統,不能 無序。 和 無禮 事 無之,學 至爲 「禮只 丽 兩字, 其 相 發之 末, 聽 無

子曰:「色厲而内荏,譬諸小人,其猶穿

窬之盗也與?」

在,柔 也。 瑜牆。 而 弱 審 反。 也 言其無實盜名,而常畏人知 小 與,平聲。 人,細民 也。 厲 威 穿,穿壁。 嚴 也。

子曰:

「鄉原,德之賊也。」

之。 鄉者, 願者也。蓋其同流合汙以媚於世,故在 德,而反亂乎德,故以 鄉人之中 原慤」, 詳見《孟子》末篇。 鄙 注讀: 一,獨以 俗之意。 作願是 願稱。 原 也。 與 爲德之賊 夫子以 願 鄉 原,鄉 其 《荀子 似 而 深 德 惡 非

子曰:「道聽而塗説,德之棄也。」

0

2

[「]賊盗」,元甲本、司禮監本、吴本乙倒。

其德,道聽塗説,則棄之矣。」
○王氏曰:「君子多識前言往行以畜雖聞善言,不爲己有,是自棄其德也。

「苟患失之,無所不至矣。」
「以曰:「患得之,謂患不能得之。」
「其未得之也,患得之, 既得之,患失之。
「其未得之也,患得之, 既得之,患失之。

孔子所謂鄙夫也。」
孔子所謂鄙夫也。」

八則吮癰舐痔,大則弑父與君,皆生於小則吮癰舐痔,大則弑父與君,皆生於 小則吮癰舐痔,大則弑父與君,皆生於 小則吮癰舐痔,大則弑父與君,皆生於

子曰:「古者民有三疾,今也或是之亡

也。

应。 昔所謂疾,今亦無之,傷俗之益衰氣失其平則爲疾,故氣禀之偏者亦謂之

私 則 古人異矣。」 暗昧不明。 稜 狂者,志願太高。 豈惟賢者不 角哨 妄作矣。 踰大閑矣。矜者,持守 厲。 直,謂 如古哉? 忿戾,則至於 范氏曰: 肆,謂 徑行自 民 不拘 太嚴。 「末世滋僞。 遂。 性之蔽,亦 爭矣。 小節。 詐,則 廉,謂 愚者, 挾 與

子曰:「巧言令色,鮮矣仁。」重出。〇子

也,惡利口之覆邦家者。」曰: 「惡紫之奪朱也,惡鄭聲之亂雅樂

紫,間 悦 是 惡之也。 勝 傾 敗也 而 ,以賢爲不肖,以不肖爲賢。人 者常少,不正而勝者常多,聖人 去 信之,則國家之覆也不難矣。」 色。 利口之人,以是爲非,以 ○范氏 雅,正也。 覆, 芳服 E : 反。 「天下之理,正 利口, 捷給。 朱, 所以 君 非 荷 爲 而

子曰:「予欲無言。」

流行 學者多以 其言,而不得其所以言, 之實,有不待言而著者。 語言 觀聖人,● 故夫子發 而 不 察其 是 以 此 徒 天 以 得 理

子曰:「天何言哉? 四時行焉,百物生子貢曰:「子如不言,則小子何述焉?」

焉,天何言哉?」

哉? 顯哉? 實 疑問,故曰 日星之明,猶患門人未能盡曉,故 不 非妙道精義之發,亦天而 四 欲無言。 喻也。 不待言 時行,百物生,莫 四時行焉,百物生焉 愚按: 此亦開示子貢之切,惜乎其 若顔子則便默 〇程子日 小子何述。」又曰: 而可見。 此 與 : 「孔子之道, 非 聖 前 識 篇 理 ,其他 已, 豈待言 無 一發見 則 動 隱 可 天 流行 謂 則 何 意 日 譬如 至 未 終 予 明 免 而 相

户,取瑟而歌,使之聞之。 孺悲欲見孔子,孔子辭以疾。將命者出

孺悲,魯人,嘗學《士喪禮》於孔子。當

■「語言」,司禮監本、吴本及下條注文作「言語」

知其 是時 此 孟 必必 非疾,以 子所謂不屑之教誨,所 有 以 得罪者,故辭 警教之也 以疾,而 以 程 深 子 教之 日 又 使

樂,樂必崩。 「君子三年不爲禮,禮必壞, 三年不爲期,音基。下同。○期,周年也。宰我問, 「三年之喪,期已久矣。

矣。| 舊穀既没,新穀既升,鑽燧改火,期可已一恐居喪不習而崩壞也。

也。 柞 夏 燧,取火之木也。 物皆變,喪至此 鑽,祖官反。○没,盡 楢之火,冬取槐檀之火,亦一年而 取棗杏之火,夏季 己,止 也。 可止也。 言期年則天運 改火,春取榆柳之火, 取 桑柘之火,秋取 也。升,登也。 〇尹氏曰: 一周,時 周

而不敢强焉爾。」 聖人之門,而以是爲問者,有所疑於心聖人之門,而以是爲問者,有所疑於心

子曰:

「食夫稻,衣夫錦,於女安乎?」

曰

粗衰。 下同。 夫,音扶。 求諸心,自得其所以不忍者。 而小祥,始食菜果,練冠縓緣 安。」 無食稻、衣錦之理。 ○ 禮 : 既葬,疏食、水飲,受以成 下同。 父母之喪,既殯,食粥 衣,去聲。女,音汝。 夫子欲宰 故問 要 布 經 我 反 之以 期

安,則爲之!」甘,聞樂不樂,居處不安,故不爲也。今女甘,聞樂不樂,居處不安,故不爲也。今女

此,而宰我不察也。

樂,上如字,下音洛。○此夫子之言也。

再言 旨, 亦甘也。 女安則爲之以深責之。 又發其 不忍之端,以警其不察, 初言女安則爲之,絶之之 而

乎? 宰 年,然後免於父母之懷。夫三年之喪,天 下之通喪也。予也有三年之愛於其父母 我出 。子曰: 「予之不仁 也 ! 子生

報 故 及之爾。」 無 懷,特以責宰 氏 聞之,或能反求 所以不忍於親,而喪必三年之故。 愛親之薄如此 之,故深探其本 宰我既出,夫子懼其真以 E : 其 窮 必 也。 俯 親 而 也 喪 就 特以聖人爲之中制 之。 雖 所謂 我之無恩,欲其有以 也。 1 而 而終得其本心也。 一於三年,然賢者之情 非以三年之喪,爲足 三年 斥之,言由其不仁,故 懷,抱也。 而後 爲可安而遂 免 而不敢過, 於父 又言君 跂 使之 母 則 范 行 而

> 子曰 不 博,局 有博弈者乎? 言無所用心之不可爾。」 李氏曰: 「聖人非教人博弈也 . 戲也。 飽食終日 弈, 爲之,猶賢乎已。 圍 無 棋 所 也 用 0 己,止 心 難 一所以甚 矣哉! 也 0

子路曰 義以 而 則 位 尚 其 其 而言者也。 ,上之也。 無義爲盗。」 爲上。 0 失 、勇也大矣。子路好 也。」〇 君子尚 君子有勇 君子爲)胡氏 尹氏 勇乎?」子 而 日 亂,小人爲盗 日 無義爲亂 0 0 勇,故夫子以此 「疑此 Ē . 以 子 爲尚 路 君子

勇

惡勇 恶: 子 · 貢 而無禮者,惡果敢而窒者。」 日 惡稱人之惡者,惡居 君子亦 有 惡 乎?」子 下流 而 訕

見孔子時問答也。」

作 也。 忠敬之心,勇 訕 故夫子惡之。 稱 去 諫反。 聲。 人惡則 下 無 無 同 禮 則 厚之意 惟 謗 爲 惡 毁 亂,果 者 也。 下訕 之 而窒則妄 室,不 惡 上則 如 字 通 無

惡不孫以爲勇者,惡訐以爲直者。」曰: 「賜也亦有惡乎?」「惡徼以爲知者,

察也。 反。 徼,古堯反。 一〇侯氏 子貢之有是心也,故問焉 計,謂 惡徼以下,子貢之言也。 一者無 日 攻發人之陰 知、孫,並去聲。 計, . 不 「聖賢之所惡 愛, 則君子 私 疑 以質其 如 若 〇楊 此 無 居 是 惡 謁 所 伺

不孫,遠之則怨。」子曰:「唯女子與小人爲難養也,近之則

唯

者能惡人也。」

近、孫、遠,並去聲。〇此小人,亦謂僕

慈以畜之,則無二者之患矣。 隸下人也。君子之於臣妾,莊以莅之

子曰 恶, 其爲誰也。」 也。 人,則止於此 去聲。 ○蘇氏 「年四十 日 而已。 四 而見惡焉,其終也 + 「此亦有爲 勉人及時遷 成德之時, 而言,不 己。 見惡於 善 改 過 知

微子第十八

此篇多記聖賢之出處。凡十一章。

道,去之以存宗祀。箕子、比干皆諫,紂兄。箕子、比干,紂諸父。微子見紂無微、箕,二國名。子,爵也。微子,紂庶微子去之,箕子爲之奴,比干諫而死。

受季。 殺比干,囚箕子以爲奴,箕子因佯狂而

受辱

孔子曰: 「殷有三仁焉。」

三,去聲。焉,於虔反。○士師,獄官。黜? 枉道而事人,何必去父母之邦?」去乎?」曰:「直道而事人,焉往而不三柳下惠爲士師,三黜。人曰:「子未可以

以其道,而 意,則有確 雍容如此, 黜,退也。 此 必有孔子斷之之言,而亡之矣。」 乎其 不 可謂 柳下惠 自失焉者 和矣。 不可拔者。 三點 也。 然其不能枉道之 不去,而其辭 是則所 胡 氏 謂 日 氣 必 0

> 用也。」孔子行。 以季、孟之間待之。」曰:「吾老矣,不能齊景公待孔子,曰:「若季氏,則吾不能,

能用也」,故孔子去之。 待之,則禮亦至矣。 隆,然非所以待孔子也。 程子曰: 重,特以不用而去爾。」 子,蓋自以告其臣,而孔子聞之爾。 去之,事見《世家》。 魯三卿,季氏最貴,孟 「季氏强 然復曰『吾老矣,不 然此 臣, 氏爲下卿。 君待之之禮極 蓋不繫待之輕 言必 以季、孟之間 非 面 孔 語 子 孔

子

懼,歸女樂以沮之。」○尹氏曰:「受女四年,孔子爲魯司寇,攝行相事。齊人子,魯大夫,名斯。按《史記》,「定公十婦,如字,或作饋。朝,音潮。○季威歸,如字,或作饋。朝,音潮。○季威

與 幾 行,所以明中 此 有 而 而 篇記 爲 作, 怠 口 於 仁賢之出 不俟終 知 政 矣。 事 庸之道也 如 日 夫子 此 者 處 與? 其 所 而 簡 以 折 賢 行 中 棄 也 以 范 所 聖人之 氏 謂 不 見 足

追。 楚 狂 也 不 見,無道 故 接 可 下, 隱去。 能隱爲 已而 接輿 接興歌 輿,楚人,佯狂辟 何德之衰? 接輿 欲與之言。 歌 則 蓋 德 已,止也。 加 已而 而 隱 知尊孔 衰 過 過 也。 孔子, 接 其 往者不 與以 車 趨而 子而 來者 今之從政者殆 世。夫子時 而, 前 日 比孔子 也。 辟之,不得與 趨 可 0 語 可 不同 追,言及今尚 諫,來者猶 助 鳳 辭。 鳳 者 將 分 有 殆, 而譏 也 而 適 道 楚, 則 之 危 其 口 鳳

辟,去聲。○孔子下車,蓋欲告之以出

江、桀溺耦而耕、孔子過之、使子路問津之也。處之意。接輿自以爲是、故不欲聞而辟

焉。 長沮、桀溺耦而耕,孔子過之,使子路問

津,濟渡處。 者。耦,並耕也。時孔子自楚反乎蔡。沮,七余反。溺,乃歷反。〇二人,隱

長沮 是也。」曰: 爲孔丘。」 日 : 「夫執 曰: 是知津矣。」 「是魯 平聲。 輿者 爲 孔 誰 執 丘 ?」子路 輿 與? 執 日 曰 在 車

蓋本子路御

耐

執轡,

今下問

津

故

問 日: 於 處 夫子代之也。 仲 桀溺 由 桀 溺 知津,言數 「滔滔 是魯 者天 孔 子 丘 爲 周 之徒 下 - 皆是 誰 流 與 自 也 ? 知 曰 對 津 而

若從辟世之士哉?」耰而不輟。誰以易之? 且而與其從辟人之士也,豈

與 有 子路行以告。 夫子憮然曰: 道 同 之? 桀溺自謂。 徒 ,丘不與易也。」 羣,吾非斯人之徒與而誰與? 與 ,猶與也。 耰,音憂。 之與,平聲。 而,汝也。辟人,謂孔子。 耰,覆種也。 言天下皆亂,將誰與變易 〇滔滔,流而不反之意。 滔,吐刀反。 亦不告以津處。 「鳥獸不可 辟 辟世, 天下

惜其不喻己意也。 也。」〇張子曰 下若已平治, 聖人不 一一己 天下而棄之也。」 無道 ,音武。與,如字。),豈可 ,故欲以道易之耳。 敢有 絶人 則我無用變易之。 忘天下之心,故其言 . 「聖人之仁,不以 逃世 言所當與同 以爲潔 憮 然, 〇程子 哉? , 羣者 猶悵 正 一爲天 無 如 斯斯 此

> 子 勤,五穀不分。孰爲夫子?」植其 日 路從 遊也。 者。 言不辨菽麥爾,責其不事農業而從師 蓧,徒弔反。植,音值。 「子見夫子乎?」丈人曰: 蓧,竹器。分,辨也。 而 植,立之也。 後,遇丈人,以 芸,去草也。 杖 荷 五穀)女人, 蓧 く、杖 不 子 四 而 分,猶 亦隱 路問 體 遠 不

子路拱而立。

止子路宿,殺雞爲黍而食之,見其二子焉。知其隱者,敬之也。

子路反見之。至,則行矣。明日,子路行以告。子曰:「隱者也。」使

食,音嗣。

見,賢偏反。

義。而丈人意子路必將復來,故先去之孔子使子路反見之,蓋欲告之以君臣之

也, 君臣之義,如之何其廢之? 欲潔其子路曰: 「不仕無義。長幼之節,不可廢

滅其

跡

,亦接輿之意也

道之不行,已知之矣。」身,而亂大倫。君子之仕也,行其義也。

身之 反 以 潔 行 也 有義 也 不 因 長,上聲。 有 丈人之接子路甚倨, 見其二 惑 羣 此 或 身 而 可 去就 則 以 大姨婦 廢矣 也 仕 爲 初 仕 不 人之大倫 者 范 亂 所以行 子 時 口 决 是 亦自 一子焉 爲 氏 倫 故故 路 寫 廢。 〇子 性 有别 以 通 日 本 反而 命 依 亦 大 君 然謂 有 長 路述 之 故 非 有 乎 其 則 臣之義,故 路下 夫子言之也 五. 中 情 溺 忘 不 於 所 隱者 幼 之義 義 庸 以 可 夫子之意 而 而 長 明 有 荷者。 饕 者 不 以 有 爲 父子 幼 以 子 序 則 止 徇 爲 富 「反子」二字 Ź 路 高 曉 貴。 禄 難 雖 朋 有 節 故故 事 之。 益 不 是以 友 知道 也 如 之可 親 恭 未 此 惟 與 往 有 固 此 之不 君 鳥 知 而 雖 信 知 福 否 是 不 X 淵 州 是 臣 序 其

> 或 不 廢 處 君 而 終 臣 不 之 離 義 於道 而 必 也 以 其 IE 所 以 或 出

下惠、少連。 逸民: 伯夷、叔齊、虞仲、夷逸、朱張、柳

蠻者。 夷 位之稱。 人。 ,去聲。 夷 逸、朱 虞仲, 下 同 張,不 即 仲 逸, 雍 見 經 遺 與 逸。 大 伯 少 民 同 連 者 竄 荆 東 無

與!」 「不降其志,不辱其身,伯夷、叔齊

與,平聲。

謂 倫 中慮,其 柳下 惠、 斯 少 而 E 連 矣。 降 志 辱 身矣。 言 中

中, 記 有 義理 去聲。 意 稱 義 其 之次 合 善 下 人 第 居 同 心。 也 喪 少 慮 柳 連 H 思 下 事 不 慮 惠 怠 不 世 一三月 可 事 考 見 中 慮 不

可見矣。解,期悲哀,三年憂」。則行之中慮,亦

之權。 乙權。 之權。 之清。放言自廢,合乎道 一種居吴,斷髮文身,裸以爲飾。隱居

我則異於是,無可無不可。 行能 齊,天子不得臣,諸侯 孟子曰: 不求合,其心有不屑也。 下惠、少連,雖降 離羣矣,下聖人一等,此其最 不汙則同,其立心造行則異。 미 止,可以久則久,可 無不可 合先王之法者多矣,然清而 中慮。 「孔子 也。 虞仲、夷逸,隱 志而 可以仕則仕 謝 氏 以 不 不 速 枉 得友,蓋已遯 則 居放 故言能中倫, 己,雖 「七人隱 速。」所 可 高 伯夷、 不汙也 言,則言 與! 辱身 以 謂 IF. 而 世 叔 柳 遯 無 則

> 人。 之徒 氏 權 日 倫 而 是以 也。 可, 此所以常適 者 適 「七人各守其 殊 宜 科 也, 揚雄 孟 子 與 是以 日 : 語 方 外之士 夷、惠, 均 「觀乎聖人則 一節 其可,而 謂之逸民。」 害 孔 亦必以 義 子則 異 傷 於 教 孔 逸民 見賢 無 〇 尹 而 蜀 可

大師摯適齊,

斷之。」

大,音泰。〇大師,魯樂官之長。摯,其

名也。

樂侑食之官。干、繚、缺,皆名也。飯,扶晚反。繚,音了。○亞飯以下亞飯干適楚,三飯繚適蔡,四飯缺適秦。

以

鼓方叔人于河,

鼓,擊鼓者。方叔,名。河,河内。

● 「孔」上,司禮監本、吴本有「而」字

播 武 人于

武 旁有耳,持其 名也。 刀反。 漢 漢中 柄 而 播 摇之,則旁耳還自 摇 也 鼗 小 鼓 兩

陽、擊磬襄人于海

治之。 助 四 益 必 日 島也。此記賢 少,去聲。 二人名。 方,踰 語 0 衰,三威僭妄,自大師以下,皆知散 夫子之言 「周衰樂廢,夫子自 化如此。 其後,伶人賤工識樂之正。 河蹈 襄即孔 也。 少師,樂官之佐。 海 如 八之隱 以去亂。 子所從學琴者。 有 末章 用 遁 我, 放 以 衛 期月 此 附 聖人俄 反 前 魯 而 章 海,海 口 張 頃 然 及 之 魯 子 未

周 臣 公謂 怨乎 不 魯 公日 故舊無 君 子不 大 放故 施其 親 棄 不使 世 大 無

> 求 備 於 人。」

用也。 嘗與門弟子言之歟?」 辭。 氏曰: 施 可不用。 魯公,周公子伯 四者皆君子之事 魯 氏 大臣非其 人傳 「此伯禽受封之國,周 本作 大故, 誦,久而不忘 弛 謂 人 詩 也。 忠 惡 則去之,在其 紙 逆。 厚之至 弛 反。 也。 遺 福 李氏 也。 其 公訓 本 也。 或 位 同 夫子 戒之 〇胡 日 則

周 有八士: 伯達、伯 适、 仲 突、仲忽、 叔

夜、叔夏、季隨 、季騎

師 也。」〇愚按: 可 王時人。 考矣。 、沮、溺、丈人,又每有惓惓 ,烏瓜反。 摯、八士,既皆稱 蓋 張子 母 此篇 或 四 日成 日 乳 贊 孔 而 而品列之; 子 王時人,或 生 於三仁、逸民 記 1 子 接引之意 善人之多 也, 於接 然 日 官

則其所立,豈止於此而已哉? 聖人之道,以裁其所過而勉其所不及,數君子者,亦皆一世之高士。若使得聞數君子者,亦皆一世之高士。若使得聞數。

論語卷第九

論語卷第十

朱熹集注

子張第十九

記之詳焉。凡二十五章。) 有曾子以下,篤實無若子夏,故特次之。蓋孔門自顔子以下,穎悟莫若子此為問題。

敬,喪思哀,其可已矣。」子張曰:「士見危致命,見得思義,祭思

故言士能如此,則庶乎其可矣。 立身之大節,一有不至,則餘無足觀。 致命,謂委致其命,猶言授命也。四者

> 子張 有 ? 信之不篤,則道 焉,於虔反。亡,讀作無。 所得而守之太狹,則德孤 日 焉能爲亡?」 執德 不 廢。 弘,信道 焉能爲有亡, 不篤, 下 有所 同。 焉 猶 聞 能 有 爲 而

不足爲輕重。

之,其 所聞: 夏云 子夏之門人問 與,人將拒我,如之何 我之大賢與,於人 病。 張譏 賢與之與,平聲。 何?」對 不可者拒之。」」子張 之是也。 君子尊賢 蓋大賢雖 티 : 交於子張。 但 而容衆,嘉善 何 無 一子夏 其所言 所不 所 〇子夏之言迫狹,子 其拒人也?」 不 容? 容,然大故 日 日 子 亦有 張 0 而矜不能 我之不 可可 日 「異 過 0 者 高 乎 亦 吾 與 之 所

當 所 當遠。 絶 9 不 學者不可 賢 古 不 不 可 以 拒 人, 然 損 友 亦

遠恐泥,是以君子不爲也。」子夏曰: 「雖小道,必有可觀者焉, 致

也 非 猶 泥 泥 不通 無 耳 去聲。 可 目 觀 鼻 也 也 П 致遠 , ●皆有 小道 ○楊 則 氏 一,如農 泥 所 明 矣 . (),故 圃 耐 不 百 醫 君子 家 能 1 相 衆 之 不 技, 屬。 通。 爲

可謂好學也已矣。」 子夏曰:「日知其所亡,月無忘其所能,

新而不失。」
己之所未有。○尹氏曰:「好學者日亡,讀作無。好,去聲。○亡,無也。謂

子夏曰:「博學而篤志,切問而近思,仁

在其中矣。」

問近 則勞 博則不能守約,志 言 所 學而志不 此,便是徹 爲 四 近思者,以 者 存 思在 也 而 自 皆學問 在其 博學 無 熟 功。」 篤 己者,則 然從 中矣? 上徹 故曰 則 思 丽 類 辨之事耳,未及乎力行 篤 事 而推。」 大 下之道。」又曰: 仁在其 於 志 仁 不篤 而 學者要思得之。 此 在 無 切問 則 ○蘇 則不 成 其 中 中 J) 丽 矣。 氏曰: 矣。」 能 近 不 泛問 力行。 思 外 又曰 馳 遠 程 學不 何 思 子 博 切 以 0 7 而

肆,謂官府造作之處。致,極也。工不

■「鼻口」,司禮監本作「口鼻」

愚按: 其事。 居 學 則 肆 所 以 奪於外誘 則 君子之於學, 一説相須,其義始備。 致其 遷 於 道 異 而志不篤 也 物 而業不 百 可不知 I 居肆 精。 〇尹氏 所 務哉?」 必 君 務 子 成 不

過,而不憚於自欺,故必文以重其過。文,去聲。○文,飾之也。小人憚於改子夏曰:「小人之過也必文。」

· 强然等,总之甚。显新,引之阳。属新,之也温,聽其言也厲。」 子夏曰:「君子有三變: 望之儼然,即

温 辭 儼然者,貌之莊。 也 曰 之確。 ,如良玉温潤 0 温 則 此 不厲,惟孔 非 有意於變,蓋並 程子曰: 而栗然。」 温者,色之和。 子全之。二〇 他 人儼 行 而 不 然 謝 厲 相 則 悖 氏 不

> 子 爲 則 以 夏 爲 日 也。 厲 己 君 也 子 信 信 而 而 後 後 勞 諫 其 民 未信 未 則 信

以有爲。 也。 謂誠 事上使下 意 惻 怛 皆 而 必誠 人信之也。 意交孚,而 厲 後 猶 病 口

子夏曰 者,則 者詳之。」 所以止物之出 大德、小德,猶言大節) 吴氏日 小价節 大德 雖 或未 此章之言,不能無弊。 不 人。 踰 閑, 盡 言人能先立 小小 合理,亦 小 德 節 出 入可 閉,闌也 無 一乎其 派害也。 也 大

之何?」對、進退,則可矣。抑末也,本之則無。如對、進退,則可矣。抑末也,本之則無。如子游曰:「子夏之門人小子,當灑掃、應

灑

色賣反。

掃,素報反。

〇 子

游

譏

子

夏弟 意 小 之事 學之 子 ',於威 ,則無 有。 儀容 推 其 節之間 本 如《大學》正 則 口 矣。 心 然 誠 此

之道 始有卒者,其惟聖人乎! 木,區以别矣。 夏聞之,日 ,孰先傳 焉? 君子之道,焉 噫! 孰 後 言游 倦 焉 過 可 ? 誣 矣 也? 譬 君 草 子 有

其 者 道 别 則 贵 强 後 草木之有大小,其類固有别矣。 淺深,不問 非 近 程 惟聖人爲然,豈可責之門人小子 可 而 而 不倦之倦。 ,彼列反。● 倦 子 語 如 以 此? 教。 之,則是誣 其 而後教以大者遠者。 末爲先 但學者所至,自有淺 其 若 君子教人有序 區,猶 焉,於虔反。 夫 生 之而 熟 始終 而傳之,非以 類 而 本末 己。 也 概以高 先傳 君子之道, 言君 非 以 倦 若不量 且遠者 其本 先 貫之, 乎? 子 傳 如 誨 爲 如

> 之道 也。 皆以 對 所 掃 近 本。 末 可 分本 以 神 即 條 應 學者當 説 一,便 然如 通 明 是本,但學其末而 蓋 故君子 對 有 更 加 貫 精 與 末 無精 後不 此 所 口 何。」又曰: 第 爲 粗 只一 便 章文意最 到 以 循 只 是 本 兩段事。 · 教 粗 然。」又曰: 聖 序而 條之意 在 末。 理。 形 以 X 從 慎 遠 而 事。」愚按 漸 灑 獨。 大 其 雖 E 爲 進 「凡物 本便 灑 掃、 也 詳 者 分 灑 實 又曰 掃、 掃、 一。又日 盡 不 雖 應 相 自 在 理 可 對, 其 表 有 應 應 無 此 0 厭 灑掃、 本末, 裹, 對, 後 大 也 而 與 0 末 程 四 小故 子 是 聖 理 非 只 mi 其 不 義 求 應 看 則

子夏曰:「仕而優則學,學而優則仕。」

「彼」,吴本作「必」。

0

及其 深; 故當 優 有 餘。 其 學而仕,則所以驗其 餘 事 然仕 力 者 也 必先有以 而學 仕 則 與 學 所以資其 盡 學者益 理 其 事 同 而 仕者 而 廣 事 後 異。 益 口

子 有過 游 致 有餘 喪,與其易 極其哀,不 於 之 高 意。」 喪致 遠 愚按: 也 而 乎 寧 簡 尚文飾 哀 戚 略 而 , 細 止。 而止二二字 不若 微之弊。 也 禮 不足 楊 學者詳 氏 亦微 而 日 哀

子 子 游 ,張行過 日 0 吾 高。 友張 而 少誠 也, 實惻怛之意。 爲 難 能 也, 然 而 未

堂堂,容貌之盛。言其務外自高,不可曾子曰:「堂堂乎張也,難與並爲仁矣。」

范 訥近仁。 輔 皆不 矣。」 氏 而 日 爲 與 仁, 八其爲 寧 「子張外有 亦 外不足而 不能 有以輔人之仁也 子曰 内有餘, 餘 . 而 内不足,故門 剛、毅、木、 庶可以爲

也 曾子曰: 者。 致,盡 也親喪乎 其極也 尹氏 吾聞諸 日 _! 0 蓋 夫子: 親 人之真情 喪固 人未有自致者 所 所 自 不 盡 能自 也 E 於

此不用其誠

".恶乎

,用其誠

?

政,是 也 ,其 子 曰: 難 他可 能 也。」 能 吾 也 聞 9 諸 其不改父之臣 夫子: 孟 莊 與父之 子之孝

孟莊子,魯大夫,名速。其父獻子,名

蔑。 此 其政。故其他孝行雖 事之爲難 獻 子 有 賢 德 丽 莊 有 子能 可 稱 用 而皆不若 其 臣 守

而勿喜。」「上失其道,民散久矣。如得其情,則哀矜孟氏使陽膚爲士師,問於曾子。曾子曰:

陽膚,曾子弟子。 則哀矜而勿喜。」 於不得 之無道,教之無素。 相維繫。 已,則陷於不知也。 ○謝氏 民散, 故其犯法也,非迫 「民之散 謂情義 故得其情, 也 乖 使

亦惡名之所聚也。子貢言此,欲人常自處,衆流之所歸。喻人身有汙賤之實,思居之惡,去聲。○下流,地形卑下之以君子惡居下流,天下之惡皆歸焉。」以君子惡居下流,天下之惡皆歸焉。」

紂本無罪,而虚被惡名也。 警省,不可一置其身於不善之地,非謂

過也,人皆見之, 更也,人皆仰之。」子貢曰:「君子之過也,如日月之食焉:

更,平聲。

朝,音潮。焉,於虔反。○公孫朝,衛大衛公孫朝問於子貢曰:「仲尼焉學?」

夫。

師之有?」
文、武之道焉。夫子焉不學? 而亦何常賢者識其大者,不賢者識其小者,莫不有賢者識其小者,莫不有

之者。識,記也。在人,言人有能記道,謂文王、武王之謨訓功烈與凡周之識,背志。下焉字,於虔反。○文、武之

名州仇。 ○武叔, 魯大夫, 語, 去聲。朝, 音潮。○武叔, 魯大夫,

牆,賜之牆也及肩,窺見室家之好。子服景伯以告子貢。子貢曰:「譬之宫

夫子之牆數仞, 牆卑室淺。

之美、百官之富。「夫子之牆數仞,不得其門而入,不見宗廟

有,言牆高而宫廣也。 七尺曰仞。不入其門,則不見其中之所

此夫子,指武叔。母其門者或寡矣。夫子之云,不亦宜乎!」

仲 叔 口 孫武叔 踰 也 不 可 ,毁也。 毀仲尼。 仲尼,日月也,無得 他人 子貢曰: 之賢者 「, 丘 而 「無以 踰 陵 焉。 也,猶 爲 也,

> 知量也 雖欲 量 自 ,去聲。 絶, 1 其 何 傷 無 於 以 日月 爲, 猶言 乎? 無 多見 用 爲 其 不

自 同 土高曰丘,大阜曰陵。 絶 適也。 謂以謗毀 不知量,謂不自知其分量。 自 「絶於孔 日月,喻其 子。 多 與與 至高 此 祇

於子乎?」
陳子禽謂子貢曰:「子爲恭也,仲尼豈腎

知,言不可不慎也。 子貢曰: 「君子一言以爲知,一言以爲不爲恭,謂爲恭敬推遜其師也。

不可階而升。● 不可階而升。● 本,去聲。○責子禽不謹言。 知,去聲。○責子禽不謹言。

● 「升」下,司禮監本有「也」字。

行,綏之斯來,動之斯和。 夫子之得邦家者,所謂立之斯立 如之何其可及也?」 其生也榮,其死 ,道之斯

人語 焉,●此殆難 鼓影響。 夫子之得邦家者,其鼓舞 程子曰: 「此聖人之神化,上下與天地 榮,謂莫不尊親。 於變時雍,言其感應之妙,神速 來,歸附也。 也,謂教之也。行,從也。 變化也。 同流者也。」〇 ,乃知晚年進德,蓋極於高遠 蓋 人雖見其變化 〇立之,謂植其生也。 不離於聖,而 以 動,謂鼓舞之也。 思勉及也。」 謝 氏 哀,則如喪考妣 티 : 「觀子貢稱聖 有 而莫窺其所以 羣 不可知者 動 綏,安也。 和,所謂 捷於 如此。 道,引 也。 存

堯曰第二十

凡三章。

堯曰: 允執其中。 及之名。 此 矣,戒之也。 節之先後也。 堯 命舜, 曆數,帝王相繼之次第,猶 四海 四海之人困窮, 丽 允,信也。 爾 禪以 困 舜 窮 帝位之辭。 ,天禄永終。」 天之曆數 則君禄 中者,無 在 歲 亦 爾 永 過 時 嗟 歎 氣 焔

舜亦以命禹。 舜後遜位於禹,亦以 此

「予小子履,敢用玄牡,敢昭告於皇

虞書·大禹謨》,比此

加詳

辭 命

之。

今見於

0 馬」下, 司 禮 監 |本有「聖而進於不可知之之神矣」十

六

罪 帝 在 心 后 朕 帝 朕躬 躬 有 有 罪 罪 不 無 敢 以 赦 萬 方; 帝臣 不 萬 蔽,簡 方有 在

其告諸侯之辭 爲,見其 言君 命。 桀有罪,己不敢 此 帝之臣,己不敢 베 日 夏尚 引《商 告 」上當有「湯」字。 此述其 有 諸 罪 黑、未變其 侯 原於責己、薄於責人之意 書 非 也 • 湯 初請 也 民 蔽。 赦。 與《 許 所 命 八禮也。 》之辭。 致,民 而 書 簡 履、蓋湯名。 而天下賢 伐桀之詞 **>** 在 文 有 簡,閱 帝 大 蓋 罪 心 湯 同 人,皆 實君 惟帝 也。 也。 既 小 用玄 放桀 所 所 此 又 L

周有大齊,善人是富。

子 賚 也 也。武王克商, ·武成》篇 來代反。〇此 《詩序》云「賚,所以錫予善人」,蓋 此 言 大齊 以 其 下 所 於 述 富 川 武 者 海。 王 事 皆善 見《周

本於此。

雖有周親,不如仁人。百姓有過,在予一

人。

此《周 周 至 書 世 言 泰 紂 誓 至 **>** 親 之 雖多 詞 0 一,不 孔 如 周 氏 家之 E

多仁人。」

權,稱錘也。量,斗斛也。法度,禮樂、謹權量,審法度,修廢官,四方之政行焉。

制度皆是也。

焉。 興滅國,繼絶世,舉逸民,天下之民歸心

位。 後。 興 滅 三者皆人心之所欲 舉 繼 逸民 絶, 謂 謂釋箕子之囚 封 黄 帝 堯、 也 舜、 復商 夏、 容 商 Z 之

所重民: 食、喪、祭。

寬則得衆,信則民任焉,敏則有功,公則《武成》曰:「重民五教,惟食喪祭。」

説。

次 所以 終篇,亦歷 答命之言 事者,以明聖學之所 以明斯道 語 説 或泛言帝 》之書,皆聖人微言 音 著明二十篇之大旨也。《孟子》於 此 悦 意 王之道 湯、武 者 也。」 叙 也。 堯、舜、 此 於武 誓師之意,與 也 故於終篇, 傳者,一於是而已, 湯、文、孔子相承之 \pm 之 而其 楊 事 氏 具 徒 無 \Box 夫施諸 載 傳 :「《論 所 堯、舜 守之, 見 政

加 政矣。」子張曰: 君子 張 騙 問 速而 威 於 孔 而 : 「尊五 不 不猛 費,勞而 子 日 0 美,屏 何 不怨, 謂 何 五. 四惡 如 美? 欲 斯 而不貪 斯斯 可 子 以 可 以 從 從 政

子張 所利 日 而 何 利 謂 惠 斯 而 不 不 費?... 亦 惠 子 而 不 - 費 乎 ? 大

(, 芳味

反。

乎? 瞻視 焉 擇 不 亦 貪 可 泰 ? ,儼然人望而畏之,斯不亦威 勞 而 而勞之, 君 不 子無衆寡 驕 乎? 又 誰 無無 怨? 君子 小大, 正其 欲仁 衣 無 而 冠 敢 得 而 慢, 不 尊 其 斯 又

期謂 殺謂 有 子張曰: 司 之賊; 之虐; 何謂 猶之與人也,出納之吝, 不戒視 四 恶 成謂 ? 子曰 之暴 慢 不 令致 教 謂

而

焉,於虔反。

吝 刑之,是賊 意 出 均之以物與 遽 而 無 去聲。 緩於前 ,有功當封 所與 不果,則是有司 漸 雖 致期, 害之也。 ○虐,謂 多 而 人,而於其 急於後,以 人亦 刻 刻印 期 殘 猶之,猶言均之也 不懷其惠矣。 之事 也 酷 刓,忍弗能 出 不 誤其 納之際,乃 賊者 而非爲政之 民, 暴, 子, 害之 而 謂 項 或 羽 必 卒

以繼帝王之治,則夫子之爲政可知也。」政者多矣,未有如此之備者也。故記之以取敗,亦其驗也。○尹氏曰:「告問

「不知禮,無以立也。

不知禮,則耳目無所加,手足無所措。不知禮,則耳目無所加,手足無所措。○尹氏言之得失,可以知人之邪正。○尹氏子記此以終篇,得無意乎? 學者少而讀子記此以終篇,得無意乎? 學者少而讀子記此以終篇,得無意乎? 學者少而讀者乎? 夫子之罪人也,可不念哉?」

論

語卷第十

序説●

朱 惠

氏曰: 贵 也。』故知《易》者莫如孟子。 思,未知是否。 亡、《詩》亡然後《春秋》作。」又曰:「春秋無義戰。」又 止則止,可以久則久,可以 長於《詩》、《書》。」程子曰:「孟子曰: 字,而趙氏注及《孔叢子》等書亦皆云孟子親受業於子 人。子思,孔子之孫,名伋。 翳人也,翳,亦作鄒,本邾國也。 族孟孫之後。」《漢書》注云:「字子車。」一説:「字子輿。」 史記 • 列傳》曰:「孟軻,趙氏曰:「孟子,魯公 知 『《春秋》,天子之事。』故知《春秋》者莫如 孟 「以此而言,則趙氏謂孟子長於《詩》、《書》而已 子者哉?」 道既 游 事 通 齊 ,趙氏曰:「孟子通《五 速則速。」『孔子、聖之時 又曰:『王者之迹熄而 宣王,宣王不能 《索隱》云王 受業子思之門 『可以仕則仕,可以 一劭 孟 以 人爲衍 「經》,尤 子。」尹 用 《詩 者

> 二説 《史記》、《荀子》等書皆不合。 軻既没,其徒萬章、公孫丑 四千六百八十五字。」韓子 作《孟子》七篇。」趙氏曰:「凡二百六十一章,三萬 異》亦無它據,又未知孰是也。 梁惠王、襄王、齊湣王。」獨《孟子》以伐燕爲宣王時事, 伐燕,而孟子在齊。」故古史謂「孟子先事齊宣王,後乃見 闊 而 述唐、虞、三代之德,是以所如者不合。 方務於合從連衡,以攻伐爲賢。 鞅,楚、 王十九年,則是孟子先游梁而後至齊見宣王矣。 子始至梁。 適 與萬章之徒序《詩》、《書》,述仲尼之意, 於事 梁,梁惠 不同、《史記》近是 情。 魏用吴起,齊用 其後二十三年,當齊湣王之十年丁未,齊 王不果所言,則見以 按《史記》: 相與記軻 「梁惠王之三十五年乙酉 曰:「孟軻之書,非 而《通鑒》以伐燕之歲爲宣 孫子、田忌。 當是之時,秦用]所言焉耳。」愚按: 爲迂遠 而孟 天 然《考 自著。 軻 退 商 而 14 與與 人

今參前《大學》、《中庸》序題 篇題及署名,原以 「孟子」爲題,署作「朱熹集注序説」,

0

孟

子集注序説

偏駁 惟 博 傳者何事。」〇 韓 孔 國,又各以其所能 皆得其性之所近。 性,更說甚道?」〇又曰:「孔子之道 非見得孟子意,亦道不到。 與 前人,又非鑿空撰得出 之死不得 也 文、武、周公傳之孔子,孔 禹 子没,獨 孟 ,門弟子 楊、大醇 以 子 只 然顔子没後,終得聖人之道者,曾子 道者,必自《 是 軻 日 焉 一句『性惡』,大本已失。 師子思,而 傳 而不詳。」程子曰: 「堯以 之湯 其 不能 孟 而 又 傳 軻 小 H 焉。 湯 是傳之舜 氏之傳 疵。」程子曰: 徧 孟 ,必有所見。 子思之學出於曾子。 授弟子 「孟氏 觀 以 其後 子》始。」程子 荀 其論荀、楊 是傳之文、武 而 得 與 盡 離散 醇 楊子雖少過 其宗。 源 「韓子 楊 子傳之孟 識 舜 若無所見,不知言 乎醇 「韓子論孟子甚善 也 也 以 遠 ,分處諸 則非 此語,非是 Ė: 故故 是 也。 圃 擇 者 故求 也。 孔 末益 傳 大 ,然亦不 焉 學 也 觀其啓手 之 周 軻 荀 子言參 而 侯之 焉 而 觀 分。 蹈 公 禹 子 自 聖 能 荀 軻 而 不 識 極 所 襲

> 子辭 廢。 只説 至 程子曰:「未敢 氏 則皆服左衽 於千百,安在其 皆亡滅 氏,崇仁義,貴王 足 日 或問於程子曰:「 何 又曰: 時之言 補 處。」愚按: ,以爲功不 孟 而 一箇『仁』字 孟子 而不救 子雖賢聖,不得位,空言 闢 然賴其言,而今之學者尚知宗孔 可 「揚子雲 之, 以見 有 「至」字,恐當作 而言侏離矣。 功於 在 廓 矣。 壞爛 能 便 禹下者,爲 ,0孟 展 如 E : 所 廓 聖門,不 道 孟 霸 也。」夫楊、 傳 如 而 他 子 『古者楊、 者子思、 子開 而 不收。 也? 是 還 己。 「聖」字。 聖 可 此 П 故愈嘗推 可 孟 人, 謂 其大經大法 也 然 便説『仁義 所謂 勝 子 墨 墨塞 聖人否?」 向 無 然學 言。 皆其 行, 施 無 存 程 一路。孟 /學也 孟氏 正 + Ė 尊 雖 仲 子 道 到 孟 切 又 尼

●「字」,原作「義」,據仿元本、吴本及上文改。

楊氏

曰:「《孟

子》

書,只是要正人心

教

作

處

天

地

懸隔

存

心

養

性

收

其

放

心

至

論

義、禮

則

惻

隱

羞

惡

辭

遜

是

非之心

爲之

見。 子大賢 有 甚處?」曰:「但 子 發。二〇 以 子 才有英氣 孟 時,不足 仲 出 ,在焉。 便渾 温 道 尼 來 子 潤 且 自 只 孟 有大 含蓄 説 如 厚不 任 又曰 只 以言學。 子 亞聖之次也。」或曰 便有 冰 ? 若孟子之時 此二字, 性 功於世 箇『志』,孟子便説許多『養 氣 同,顏子去聖人只毫髮間 與 善、養氣之論,皆前 象, 水 圭 學者 又 以孔 精 無許 角,英氣 顔 ,以其言性 日 其 非 子 二二孟 全要識 功 不光,比 子之言 多光耀 世既 陋 甚 巷自樂, 多。」 甚 子 「英 無 也 害事。 時 比之, 善 之玉 有 人,安可 也。 此 氣 若 聖 以 又 英 自 便 見 所 如 不 有 氣。 氣 於 可 孟 顔 不 識 未 孔 又

> 數 己。 子遇 端。 添 人能 教人,性非 身、齊家、治國、平天下,其本只 政」。 意而已。 君 、假饒 而 物,堯、舜 人便道性善。 所謂率性,循 正心,則事無足爲者矣。 國定」。 論邪説之害,則 論事 立 心得 得 所先」, 君 功業 其 千變 所以爲萬世法 則 正,然後知性之善。 旦 可謂 ,只是人欲 天理是也。 萬 歐陽永叔 曰『生於其心,害於其 格君 化 誤矣。 只 小户 説 之私 之非。了一正 却言『聖人之 《大學》之修 外邊 人性 亦是 從 是正 心上 率 E 用 與 一心、誠 故 聖 計 性 不 來 孟 用 而 口

二六七

孟子卷第

朱熹集注

言之。後多放此。

梁惠王章句上

凡七章。

孟子見梁惠王。

梁惠王,魏侯罃也。 都大梁,僭稱王,謚 日

惠。 以 招賢者,而 《史記》:「惠 孟軻至梁。」 王三十五 年,卑禮 厚 幣

王 乎? 日 :「叟,不遠千里而來,亦將有以利吾

或

叟,長老之稱。 王所謂利,蓋富 或 彊 兵

孟 子對 日: 「王何必 日 利? 亦 有仁 義 而

已矣。

之宜也。此二句乃一章之大指,下文乃詳 仁者,心之德、愛之理。義者,心之制、事

取千焉,千取百焉,不爲不多矣。苟爲後義 家,千乘之國,弑其君者,必百乘之家。 家』?士庶人曰『何以利吾身』?上下交征 「王曰『何以利吾國」?大夫曰『何以利吾 而 而國危矣。 先利,不奪不饜。 萬乘之國,弑其君者,必千乘之 萬 利

取乎下,下取乎上,故曰交征。 以明上文何必曰利之意也。征,取也。上 乘,去聲。曆,於豔反。○此言求利之害, 有弑奪之禍。乘,車數也。萬 乘之國者, 國危,謂將

⁰ 下各卷首行同 孟子卷第 一」、「朱熹集注」,吴本作「孟子集注卷一」。

若又以義爲後 盡 者,天子之公卿 之於君,每十分 大夫也。 千乘之國,諸 天子畿内地方千里,出車萬乘。千乘之家 奪之,其心未肯以爲足也 弑,下殺上 侯之國。 而以 采 而 地方 取 利爲先,則不弑其君而 也。 其 百里,出車千 百乘之家,諸侯之 饜,足也。 言臣 分,亦已 了多矣。 乘也

者也。「未有仁而遺其親者也、未有義而後其君

行仁義 仁者必愛其 已之意 此言仁義 而 也。 未 無 嘗 親,義者必急其君。 遺 求利之心,則其下化之,自 猶 不利 棄也。 以 明 上文亦 後,不急 故人 有仁 也。 /君躬 義 親 言 而

義根於人心之固有,天理之公也。利心生重言之,以結上文兩節之意。○此章言仁王亦曰仁義而已矣,何必曰利?」

戴於己也

言仁義 於利 始也。 《孟子書》,至梁惠王問何以 弊,此聖賢之心也。」 之人惟 不廢 不求 則不求利而未嘗不利也。 嘗不欲利,但專以利爲心則有害。 利之弊,何以異哉?」〇程子曰: 所宜精察而明 此《孟子》之書所以造端託始之深意,學者 於物我之相形,人欲之私也。 而害已隨之。 而 書 利 而 利 夫子罕言利,常防其源 行,多怨。 而 而 不言 是求,而不復知 自 歎 無 也。 辨 所 不 利,所 謂 利 也 自天子以至於 曰: 毫釐之差,千里之繆。 以 徇 嗟乎 〇太史公曰 拔 人欲 有仁義。 當是之時,天下 本塞源 利吾國,未嘗 則 也。 利,誠 循 求 「君子 天 庶人,好 :「余讀 故 惟仁 故 而 利 理 救 亂 未 孟 其 放 則

孟子見梁惠王。王立於沼上,顧鴻鴈麋鹿。

日 賢者亦 樂 此 乎?!

大者。 洛 麋,鹿之大者。 内 同。 沼 池 也 鴻, 鴈之

不樂也 孟 子對曰: 賢者而後樂此,不賢者雖 有 此

此一章之大指。

樂其 在 靈 之,不日成之。 《詩》云:『經 也 靈 囿 民歡樂之,謂 有 沼 麀鹿攸伏。 麋鹿 於於 物 魚鼈。 魚 始 其臺曰 經始勿 躍 靈臺, 麀鹿 。」文王 古之人與民 靈臺,謂 濯 亟 經 一,庶 以 濯 之 · 白 民 營之。 民 力爲 其沼 了子來。 鳥 偕 鶴 樂,故 臺 日 庶 鶴 三爲 靈 Ŧ 民 沼 沼 王 能 在 攻

賢者而後樂此 反。 亟 於,音鳥。 經,量 麀,音憂。 度 之意。 〇此 也。 引《詩》而釋 靈臺, 《詩》、《大雅 鶴、《詩》作翯,户 文王臺名也。 之,以 靈 明 角

> 所有。 亟,速 中 子來趨父事 歎 動 而文王亦得以享其樂也 力,而民 美 有沼 也 謀 辭。 也。 爲 也。 蓋 濯 反歡樂之,既 也 濯 由文王能愛其 牣,滿也。 言文王 0 磨, 牝 也。 ,肥澤貌。 攻, 靈囿 治 鹿 戒 也 也。 以 孟子言文王 加 靈沼,臺下 鶴 勿亟 以美名,而又樂其 不 民,故民樂其 伏,安其 鶴 日 | 潔白 也 不 · 有 子 所 終 貌。 雖 不驚 來 有 用 民 有 如

《湯誓》曰 欲與之偕亡,雖有臺池鳥 《書》而釋之,以明 下, 也。 害,音曷。 虐,故因 指夏桀。 如天之有日,日 《湯誓》,《商書》篇名。 一一時 其自言而目之曰:「此 害, 吧, 何 Ħ 去聲。 害喪? 也。 不賢者雖有此 亡吾乃亡耳。」 桀 獸,豈能獨樂哉?」 女,音汝。 嘗 予及女偕亡。」民 自 時 言 是 日 不樂之意 也。 吾 何 民 此 時 怨 有 其 天 引

之甚 乎 民 ? 則 也 若亡 民 怨之而 孟 子 則 引 我 不能 此 寧 與 保 以 之 明 其樂也 俱 君 亡。 獨 樂 蓋 而 欲 不 恤 其 其

者。 何 河 梁 河 也 東 内 惠 鄰 M X 王 或 亦 日 則 然。 * 之民 移 寡 其 察鄰 不 民 人 加 之於 於 或 少,寡 之政 河 或 東 無 也, 人之民 移 如 其 盡 寡 粟 心 人之用心 不 於 焉 加 河 耳 多, 矣。 内

末

矣。」

東,皆魏 寡 X 諸諸 侯自 地 凶,歲 稱 言寡 不 德之人 熟 也 移 也。 民 以 河 内 就 食, 河

如 日 五 兵 孟 ? + 刃 子 移 既接、 對 粟以 步 王 E 如 而 0 給 示不 知 棄甲 後 其 王 此 止 可 老 好 曳兵而走, 則 稚之不 戰 以 無 直 請 望 五 不 民 百 以 能 + 之多於鄰 或百 步 戰 移 北 耳 喻。 者。 笑 是 步 百 而 填 亦 步 或 後 然鼓 走 也 止 則 或 何

> 能行 好,去 或 鼓 日 王]:「移 進,以 道 不 先 恤 王 養其民 其 民 金退 一之道 、民,惠 移粟 填, 不可 音 流荒 直 王 而 田 能 猶 0 政之 徒 以 行 以 旧 此 小 填,鼓 所 也 是 而 惠 不 爲 笑 然皆 言 廢 彼 盡 音 此 也。 也 巾 心 以 不 能 譬 然 楊 兵 鄰 以 氏 行 不

憾 用 魚 口 「不違農時,穀不可 勝用 鼈 ,王道之始 ,是使民 不 可勝 也 養 食 穀 也 生 與 也 喪 魚 斧斤 勝 死 鼈 食 無 不 口 以 憾 也 時 9 勝 也 數罟 食 人 C Ш 材 養生 林 不 木 喪 木 材 洿 死 可 木 池 勝 無

地 言多也。 作,不違 勝,音升。)農時, 水 所 此 謂 聚 數 春 時,至冬乃役之也。 數,音促。 也 密 耕、夏耘、秋收之時。 也。 古者網罟 罟,網 罟, 音古。 必 也。 用 不 四 洿,窊下之 洿,音鳥。 寸之目 可勝 凡有興 食

皆 爲 飲 因 斧斤人焉。 澤 魚 食宫 [天地自然之利,而撙節愛養之事 王道 民所 無所恨矣。 ,與民共之,而 不滿尺, 之始 急 [室所 而 市 此皆 不 以 不 可 王道以得 養 · 得粥; 無者。 爲治之初,法制 有 生,祭祀棺椁所以 厲 禁。 人不得食。 今皆有以資之,則 民心爲 草木零 本,故以此 未 落 也。 Ш 送 備 然 林 死 然 且. 後 111

飢矣。 矣。 不 者 雞 五畝之宅,樹之以 不負戴 飢 豚 狗彘之畜,無失其 不寒,然而不王 百畝之田 謹庠序之教,申之以孝悌之義, 於道 路矣。 勿奪 桑,五十者可以衣帛矣。 者,未之有 其時 七十者 時 數口 七十 衣帛 也 之家 者 食肉 可 口 以 頒 以 黎 食 É 民 無 肉

去 衣 聲。 去聲。 據 其身臨 凡 有 畜,許 天 天下而 下者 六反。● 言曰 人 稱 王,則 數, 之 日 去 去聲。 王 聲。 則 王 後 平

> 老人頭 事父母 衰,非 孝悌 在首。 界正 也。 之類 也。 皆放此。 皆學名也。 在 飽 五穀,故 負 戴 煖 田 井 也。 時 無教 則 百畝之田 於道路矣。 帛 半 爲孝,善事兄長爲悌。 夫民衣食不足,則 畝 地 謂孕字之時,如 不煖,未五十 於牆 人知 白 七十非肉不飽,未七十者不得 ,則又近於 半 均,無不受田之家 Ħ. 申,重也,丁寧反覆之意。 黑者 愛親敬 在 下 ,亦一夫所受。 畝之宅,一夫所受,二 植桑 邑。 也。 衣帛、食 禽 田 長 者不得衣 以 負 響。 中 供 而 任任 孟 不暇治禮義; 不 代 肉但言七十 蠶 春 故 得 其勞,不使之 在 事。 犧 矣。 頒,與 既 有 背。 至 也。 牲 富 木, 此 五 庠、 毋 戴 班 + 恐 畝 用 則 教 任 同 始 妨 半 經 食 牝 養 以 而

^{■「}許」,殘宋本、司禮監本、吴本作「敕」。

道 肉 猶 重 之詳,極 之成成 ,然亦不至於飢寒也。 秦言黔 以 見 也 輕 財 首 也。 成 也 輔 黎, 相之道,●以 少壯之人,雖 黑 也。 此言盡法制品 黎民 左右民,是王 ,黑髮之人, 不得衣帛食 節

發 歲 刺人而殺之,曰:『非我 狗彘食人食而 罪於歲 之殺 ,斯天下之民至焉 所 意 謂 莩,餓死人也。 莩,平表反。刺,七亦 狗彘得以 人死 移特 、異矣。 歲之豐 人也。 7,則日 M 民 N 間 至 食人之食 是知刃之殺 不罪 之粟 於民 也。 . 不 『非我也 發,發倉 歲,則 惠 知檢, 而 飢 己。 王不 ,則與先王制度品 而 死,猶 必能 也,兵 人,而 反。 乃以 能制 原以 歲 塗有 自 也 不 民 賑 也。」王 餓 民之産,又使 不知 反 知發,則其 不加 貸 檢 莩 是 加 也。 而 操 益 何 制 多, 節之 無 修 刃 異 不 歲, 也 其 者 歸 罪 於 知

> 梁之君 行王道 周,而生民之塗炭已極。 本。 下 謂 亦何心哉? 政,天下之民至焉 猶知尊周 實矣。」又曰:「孔子之時,周室雖 程子曰:「孟子之論 至孟子 也。 則 可 時,七國 蓋王者,天下之義主 之爲義,故《春 視天命之改與未改耳。」 以 王 矣。 則 争雄,天下不復 不 王 此 但多於 道 當是 孟 不不 1秋》以 子 之時,諸 所 過 鄰 也。 以 如 或 尊 勸 微 此 而 聖賢 侯能 知 周 天 己。 齊 有 爲 可

梁惠 孟 子 承 對 上章言願安意以受教 \pm 曰:「寡人願安承 日 [: 「殺 人 以 梃 與 教。 刃

9

有

以

異

乎

挺,徒頂反。○挺,杖也。

日

:

無以

異

也。

■ 「財」,司禮監本作「裁」。

「以刃與政,有以異乎?」曰:「無以異也。」

孟子又問而王答也。

餓莩,此率獸而食人也。曰:「庖有肥肉,廢有肥馬,民有飢色,野有

異於驅獸以食人矣。厚斂於民以養禽獸,而使民飢以死,則無

率獸而食人,惡在其爲民父母也?「獸相食,且人惡之。爲民父母,行政不免於

者,民之父母也。惡在,猶言何在也。惡之之惡,去聲。惡在之惡,平聲。○君

仲尼曰: 『始作俑者 而用之也。 芻靈 也。 有 ,而言其必無後也。 面目機發 ,音勇。爲,去聲。 ,略似人形 古之葬者,東草爲人,以爲從衛,謂之 如之何其使斯民飢而死也?」 前 而 太似人矣。 己。 ,其無後乎!』爲其 \bigcirc 中古易之以 孟子言此作俑者,)俑,從 故孔子惡其不 葬 木偶 (俑,則 象

> 之。夫父母之於子,爲之就利 其民,則其流必至於此。 有率獸食人之心。然徇一己之欲 但用象人以葬,孔子猶惡之,况實使 頃刻而忘于懷,何至視之不如犬馬乎?」 而死乎? 〇李氏 曰:「爲人君者 故以爲民父母告 避害 · 何 固 1,未嘗 不恤 未 民 嘗 飢

洗同。 惠 長,上聲。喪,去聲。比,必二反。 十七年,秦取 共分晉地 又與楚將昭陽戰,敗,亡其七邑。 王三十年,齊擊魏,破其 ○魏本晉大夫魏 號 魏 曰 三 晉 少梁 後 ,故惠王猶自謂 魏 斯 又數 與與 軍 虜 韓 獻 太 氏 比 地 於秦。 子 趙 洒, 7,猶爲 晉 申 國。 氏 與

也。言欲爲死者雪其耻也。

百里,小國也,然能行仁政,則天下之民歸孟子對曰:「地方百里而可以王。

之矣。

甲利兵矣。
足,出以事其長上,可使制梃以撻秦、楚之堅
耨。 壯者以暇日修其孝悌忠信,人以事其父
耨。 壯者以暇日修其孝悌忠信,人以事其父

凍餓,兄弟妻子離散。 「彼奪其民時,使不得耕耨以養其父母,父母

養,去聲。〇彼,謂敵國也。

彼陷溺其民,王往而征之,夫誰與王敵?

吾尊君親上之民往正其罪,彼民方怨其上虐之意。征,正也。以彼暴虐其民,而率夫,音扶。〇陷,陷於阱。溺,溺於水。暴

故曰:『仁者無敵。』王請勿疑!」

而樂歸於我,則誰與我爲敵哉?

「仁者無敵」,蓋古語也,百里可王,以此而已。恐王疑其迂闊,故勉使勿疑也。○孔已。恐王疑其迂闊,故勉使勿疑也。○孔子之論,

孟子見梁襄王。

襄王,惠王子,名赫。

曰:『定于一。』 畏焉。卒然問曰:『天下惡乎定?』吾對出,語人曰:「望之不似人君,就之而不見所

二七五

告也。 必合于一,然後定也 也。 之符,其外如此, 語 王問列國分争,天下當何所定。 ,去聲。 卒然,急遽之貌。 不似人君,不見所畏,言其 卒,七没反。 則其 蓋容貌 中之所存者 恶, 平 詞氣 聲。 孟子對以 無 可 乃 威 知 語 德 儀

『孰能一之?』

王問也。

對曰:『不嗜殺人者能一之。』

嗜,甘也。

『孰能與之?』

之? 如有不嗜殺人者,則天下之民皆引領而望之 然下雨 七、八月之間旱,則苗 對 \pm 曰:『天下莫不 復問也。 今夫天下之人牧,未有不嗜殺 ,則苗浡然興之矣。 與,猶歸 與 福矣。 也。 也。 其 天油 王知 如 是 然作雲, 夫苗 孰能 人者也。 乎 禦 ? 沛

能禦之?」」矣。誠如是也,民歸之,由水之就下,沛然誰

矣。 也。 也。 用。 多,而天下愈亂。 四君,皆以 氏曰:「孟子之言,非苟爲大而已。然不 故人君不嗜殺人,則天下悦而歸之。 夫,音扶。浡,音勃。 唐太宗,及我宋太祖皇帝,●能一天下者 深原其意而詳究其實,未有 興起貌。 而 好殺不已,故或合而復分,或遂以亡國。 後多放此。○周七、八月,夏五、六月 予觀孟子以來,自漢高祖及光武,及 領,頸也。 油然,雲盛貌。 禦,禁止也。 不 嗜殺人 蓋 秦、晉及隋,力能合之, 好生惡死,人心所同 沛然,雨盛貌。 、致之。 由,當作猶,古字借 人牧,謂牧民之君 不以 其餘 為迂 殺 浡然, ○蘇 人愈 者

❶ 「宋」,原作「○」,原脱,據殘宋本、司禮監本、仿元本改。

齊宣王,姓田氏,名辟彊,諸侯僭稱王也。齊宣王問曰:「齊桓、晉文之事可得聞乎?」

齊威公、晉文公,皆霸諸侯者。

廢也

?

以羊易之。』不識有諸

?

王乎?」以後世無傳焉。臣未之聞也。無以,則以後世無傳焉。臣未之聞也。無以,則孟子對曰:「仲尼之徒無道桓、文之事者,是

不止也。王,謂王天下之道。此意也。以、已通用。無已,必欲言之而羞稱五伯。爲其先詐力而後仁義也。」亦道,言也。董子曰:「仲尼之門,五尺童子

王,莫之能禦也。」曰:「德何如,則可以王矣?」曰:「保民而

保,愛護也。

可。」曰:「何 「若寡 人 者, 由 知 可 吾 以 可 保 也]? 民 乎 哉? 一臣聞之 日

孟子卷第

梁惠王章句

死地。』對曰:「然則廢釁鐘與?」曰:「何可足之,曰:「舍之! 吾不忍其觳觫,若無罪而就見之,曰:「牛何之?」對曰:「將以釁鐘。」● 朝齕曰,王坐於堂上,有牽牛而過堂下者,王

懼貌。 果有此事否 成,而殺牲 與,平聲。 齕,音核。舍,上聲。 孟子述所聞 取 〇 胡齕,齊臣也。 血 以 塗其釁郄 胡齕之語 觳,音斛。 釁鐘 也。 而問 觫 觳 王,不知 新鑄鐘 觫, 音 速 恐

以王爲愛也,臣固 曰:「有之。」曰:「是心足以 矣。 心,仁之端也。 王見牛之觳觫 故孟子指而言之,欲王察識於 而 擴 知王之不忍也。」 不忍殺,即 而充之,則 王矣。 所謂 口 以 百 此 保 惻 隱之 姓 而 兀 擴 海 皆

❶「鐘」,原誤作「鍾」,本章下同,今據他本正

充之也。愛,猶吝也。

地 何 王 ,故以羊易之也 日 一 牛 ? 「然。 即 誠 不 有 忍其 百 姓 觳觫 者 若 齊國 無 雖 罪 褊 而 小 就 死 吾

者。然我之心不如是也。言以羊易牛,其迹似吝,實有如百姓所譏

愛 非 牛羊何擇焉?」王笑曰 大,彼惡知之? 曰 也 愛其 「王無異於百姓之以 財 而 易之以羊 王若隱其 1:「是 也 宜 王 無罪 爲 誠 乎 愛 何 百 而 也 心 就 姓 哉? 死 之謂 以 地 小 我 我 則 易

分也。 得 惡,平聲。 羊易牛乎? 之言也 其本心。 言牛羊皆無 王不能然,故卒無以 異, 孟 子故設此 怪 罪 也。 而 死 隱, 難 何所 痛 欲 也 王 分 自 反 解 别 擇, 於 求 而 百 而 以 猶

曰:「無傷也,是乃仁術也,見牛未見羊也。

君子 其聲,不忍食其肉。 禮 雖發而 害 遠,去聲。 蓋 所以爲仁之術也。 故以羊易牛,則二者得 忍,釁鐘又不可 術 而 必遠庖廚 之於禽 也。 不可 ,而不忍之心施於見聞之所及。 人之於禽獸,同 也 術,謂 遏,未見羊則 終不得施矣。 熠 者,亦以 〇無傷,言雖有百姓之言,不 也, 法 廢,於此 之巧 見 是以君子遠庖 其 聲,謂 預養是 生 其 生 者。 然見牛 而 不 以 理 無以 異 未 將 兩 蓋 類。 心 忍 死 全 形 處之,則 則此 殺 而廣 見 而 而 而 牛 故 廚 其 無 無 哀 其 既 爲 用 心 也 死 害 鳴 所 所以 之 己 此 所 9 此 妨 也 爲 聞 發 以 心

之。」 心之所以合於王者,何也?」 不得 王 一説 吾心。 夫子 , 曰:「《詩》云:『他 之謂 夫子言之,於我 也 夫 我 乃 行 人 心 之,反 有 有 戚戚焉。 心, 而 子 求之, 忖 度 此

心復萌,乃知此心不從外得,然猶未知所戚戚,心動貌。王因孟子之言,而前日之之夫,音扶。○《詩》,《小雅・巧言》之篇。説,音悦。忖,七本反。度,待洛反。夫我

反其本而推之也

及禽獸,而功不至於百姓者,獨何 輿薪。』則王許之乎?」曰:「否。」「今恩足 王之不王,不爲也,非 不用明焉, 百姓之不見保, 爲不用恩焉。 不足以舉 一羽之不舉,爲不用力焉; 曰:「有復於王者曰:『吾力足以舉百鈞 一羽,明足以察秋毫之末,而不 不能也。」 輿薪之不見,爲 與? 然則 故 以 見 而

羽。 秋而 鈞,三十斤。 與,平聲。爲不之爲,去聲。 而 易見 末銳,小 羽,至 也。 ,而難 一輕易 百 許 鈞 見 舉 猶 ,至重難 也。 也。 口 也。 輿薪,以車 秋毫之末,毛 舉 今恩以下,又 ○復,白 也。 載 羽, 也 至

> 保民而王,非不能也,但自不肯爲 發,則於民切 之與 民易而愛物難。 孟子之言也。 人,又爲 而 同 蓋 今王 於物緩;推 類 天 地之性 而 此 相 心能 親 一人爲 廣仁術, 及物矣 是 以 耳。 惻 則 則仁 隱 故 其

超北海之類也,王之不王,是折枝之類 爲 能也。爲長者折枝,語人曰『我不能』,是不 曰:「不爲者與不能者之形何以 挾太山以超北海,語人曰『我不能」,是誠 之有? 也。 也 不待 之命,折草木之枝,言不難 折,之舌反。 語 ,非不能也。 ,去聲。爲長之爲,去聲。長,上聲。 超,躍而過也。 外求, 擴而充之,在我 \bigcirc 故王之不王,非 形 狀也。 爲長者折枝,以 也。 挾,以 而 異?! 是心 挾 己, 腋 太 固有, 也。 日 何 長 持 Ш 物 難

老吾老,以及人之老,幼吾幼,以及人之

所爲 子。 幼。 百姓者 至于 故推 古之人所 天下 而已矣。今恩足以及禽獸,而功不 兄弟,以 ,獨何與? 恩 可 運 足 御于家邦。』言舉斯 以 於 以 大過人者,無他焉,善 掌。 保 兀 海,不推 詩》云:『刑于 恩 心 無 加諸 以 寡 至於 推 保 彼 妻 其 妻 而

然後 親 雅 畜之也。 之父兄。人之老,謂人之父兄。 與,平聲。 難 妻,謙辭 人之子弟。 由 親 離 氣、又非 • 思齊》之篇。 故無 親推 及於愛物。 今王反之,則必有故矣。 也。 吾幼,謂我之子弟。人之幼 之,然後及於仁民;又推其餘 但若 〇老,以老事之也。吾老, 以 運於掌,言易 御,治也。 保 妻子。 人之同 皆由 刑,法 近以 類 蓋骨 不能 也 而已。 及遠 也。 肉 推恩,則衆 寡妻,寡德之 故復推 之 ,自易 《詩》,《大 故古 幼,以 親,本 謂 本而 人必 以 同 叛 謂 幼 我 及

再問之。

然,心爲甚。王請度之!「權,然後知輕重,度,然後知長短。物

然之序 之心 若心之應物,則其輕重長 短,人所難齊,必 尺也。度之,謂 度之之度,待洛 王恩及禽獸 可不度以 重 而 且 不自 長,而 本然之權度 而 知 反。 稱 仁民 功不至於百姓,是其 也。 以權度度之而 量之也。 ○權? 之心輕 故上 ,又有甚於物者。 に短之難 稱錘也。 文既發其端 言物之輕 且. 短, 後可 齊,而 失其 度, 愛 重 丈 物 不 當 而

抑王興甲兵,危士臣 於此請王度之也。

構

怨於諸侯

後

快

於心與?」

者 構 與,平聲。 結 ,必其以 也。 是三者爲快也。 孟 子 抑 以 \pm 發 愛民之 語 辭。 然三 心 士, 所 一事實非 以 戰 輕 士 且 也 短

心之所快,有甚於殺觳觫之牛者。故指以

問王,欲其以此而度之也。

欲 王 世 日 0 否。 吾 何 快 於 是? 將 以 求 吾 所 大

尚 誘 以 不 之也 快 輕 明 於 於 短 他 此 而 欲之所 者, 而 功 獨 不 心 暗 至 之 誘 於 於 E 者獨 此。 百 也 姓 9 在 此其愛民之心 忧 於是 而 必 ,是以 爲 此 者 其 所 欲 心

미

得。

聽於 與? 曰 「王之所 耳 爲 抑 與? 肥 爲 甘 采 大 不 便 色 欲 足 嬖 不 可 於 不 足 得 足 視 \Box 闡 與 使 於 與 令於前 ? 目 ?」王笑而 與 輕 ? 煖 與? 聲音 不 足 不言。 於 王 不 之 足 體

魚 미 諸 夷 也 也 知 己。 吾 皆 以 不爲 足 若 欲辟 以 所 是 供 爲 也。 之, 地 求 朝 而 日 若 秦、楚,莅 \pm 所 贵 然則 欲 爲 是 猶 王 中 哉 緣 之所 或 ? 木 而 而 大 日 撫 欲 求 几

> 音潮。 去聲。 與,平 楚, 爲 助 辭。 指 皆 興 聲。 大 辟,開 便、令,皆 兵結怨之事 國。 便嬖,近習嬖幸之 爲肥、 廣 莅 也 抑爲、豈 平 臨 聲。 朝 也 0 緣 致其 辟, 若, 木 求 人 與 來 不爲之爲 如 魚,言 朝 也 闢 此 也 同 也 E 必 朝 不 所 語

八,何 勝? 海 敵 聞 所 木 王 内 與 欲 求 日 大 甚 辭 ? : 與 之地方千 魚 日 以 寡 盡 鄒 若 聞 異 :「楚人 雖 心 固 日 是 於 力 與 不 小 不 其 鄒 而 或 之 得 可 里者 鄒 敵 魚 甚 爲之,後必有災。」 與 勝。」曰 以 人 與? 楚哉 楚,大國 平 ,無後災。 敵 與 九 衆, 聲。 齊 楚 ? . 日 人戰, 弱 集 0 蓋 然則 古 有 亦 以若所爲,求 齊 殆、 殆 不 其 集 反 則 有 小 可 蓋 其 有 日 \pm 固 甚 〈本矣。 一一可 皆 以 其 以 以 馬 不 敵 發 口 爲 彊 服 以 孰 得 緣

反本 也 集 合 ,説見下文。 以 齊 服 地 其 八,必 方千 里, 不能 是 勝,所 有 天下 謂 九分之一 後災也

之市,行旅皆欲 君者皆欲赴愬於王。 朝,耕者皆欲 今王發政施仁,使天下仕者皆欲立於王之 章意同 所論 得 之本也。 朝,音潮。 9 商,居貨日 能反其本,則所欲者 矣。 近者悦,遠 蓋力 賈,音古。 耕於王之野,商賈皆欲藏 賈。 出於王之塗,天下之欲 求 所欲 發 其若是,孰能禦之?」 者 政 恕,與 則 來,則大 施 不求 仁,所 所欲者 訴 而 同。 小 至。 以 反 彊 王 〇行 與首 不 弱 天 疾 於 貨 Ŧ 可 非 下 其

志 王 明明 曰:「吾惛 以 教 我 不能 我雖 進 不 於是矣。 敏 ,請嘗試之。 願夫子 輔 吾

曰:「無恒産而有恒心者,惟士爲能。若民,

與唇

同

無 則 民 也。 不 無 爲已。 恒 焉有仁人在位 産 因 及陷於罪 無 恒 心。 一,罔民 然後 苟 無 而可 恒 從 心 而 爲 刑之,是 放 也 辟 邪 图

之也 問 也。 不能然矣。 恒 恒,常也。産,生業也。 ,胡登反。 知義理,故雖 常心,人所 罔,猶 辟,與 常有之善 無常 羅 僻同 網 産 常産,可常生之業 ,欺其不見 而 焉,於虔反。 心 有 也。 常常 心 而 嘗 民 取 則 學

然後驅而之善,故民之從之也輕。足以畜妻子,樂歲終身飽,凶年免於死亡。是故明君制民之産,必使仰足以事父母,俯

民有常産而有常心也。○輕,猶易也。此言畜,許六反。下同。○輕,猶易也。此言

惟救死而恐不膽,奚暇治禮義哉? 畜妻子,樂歲終身苦,凶年不免於死亡。此

足也。此所謂無常産而無常心者也。爲已理之義者,去聲。後皆放此。○膽,治,平聲。凡治字爲理物之義者,平聲,

王欲行之,則盍反其本矣。

盍,何不也。使民有常産者,又發政施仁

之本也。説具下文。

彼而已。然雖有仁心仁聞,而民不被其澤之也。」楊氏曰:「爲天下者,舉斯心加諸之本,常生之道,故孟子爲齊、梁之君各陳氏曰:「八口之家,次上農夫也。此王政氏曰:「八口之家,次上農夫也。此王政

告,精切 之政而已。齊王非無此 之。」〇此章言人君當黜 者,不行先王之道故 私,不能擴充以行仁政。 王道之要,不過推其不忍之心,以行不忍 如 此 而蔽固已深,終不能 也。 心,而奪於功利之 霸功,行 雖 故以 以孟子反覆 制 王 民之産告 道。 悟 而 曉

孟子卷第一

可歎也。

孟子卷第一

朱熹集注

梁惠王章句下

凡十六章。

見於之見,音現,下見於同。語,去聲,下曰:「王之好樂甚,則齊國其庶幾乎!」樂,暴未有以對也。」曰:「好樂何如?」孟子莊暴見孟子,曰:「暴見於王,王語暴以好

也 諸?」王變乎色,曰:「寡人非能好先王之樂 他日,見於王 」,直好世俗之樂耳。」 也。 同。 好,去聲,篇内 庶幾,近辭也,言近於治 曰:「王嘗語 並 同。 莊子 〇莊暴,齊臣 以 好 樂,有

曰:「可得聞與?」曰:「獨樂樂,與人樂樂,今樂,世俗之樂。古樂,先王之樂。

亦音洛。○獨樂不若與人,與少樂不若與與衆樂樂,孰樂?」曰:「不若與衆。,則與之與,平聲。樂樂,下字音洛。孰樂,與衆樂樂,孰樂?」曰:「不若與人。」曰:「與少樂樂,

「臣請爲王言樂:

衆,亦人之常情也。

「今王鼓樂於此,百姓聞王鍾鼓之聲、管籥之爲,去聲。 〇此以下,皆孟子之言也。

妻子離散。』今王田獵於此,百姓聞王車馬之夫何使我至於此極也? 父子不相見,兄弟音,舉疾首蹙頞而相告曰:『吾王之好鼓樂,

病

與之

與,平

同

樂

之樂,音洛。

與

不相見 王之好 音 見見 也 羽 元兄弟 田 旄之美,舉 獵 ,
夫
何 妻子離散。』此無他,不與民 使我 疾首 至 [蹙 於此 頞 而 極 相 告日 也 ? 語語 父子 同

恤 額 舉,皆也。 旌,旌屬 樂,音洛。 蹙,子六反。 也。 其民,使之窮 憂戚 不與 疾首 頞,音遏。夫,音扶。 鐘、鼓、管、籥,皆樂器 則 困 民 頭痛 蹙其 也 同 樂 也。 額。 謂 蹙,聚 獨樂其 極, 窮 也 (身而 也 同 也 頻 不 羽

然有喜色 此,百姓聞 無疾病與 音,舉欣 何 今王鼓樂於此,百姓 能 田 欣 獵 而 王車馬之音,見羽旄之美,舉 然 也?」此 相告曰:『吾 有 何 以 喜 能鼓 色而 無他 聞 樂也?」今王 相 王鐘鼓之聲、管籥之 王庶幾無 ,與民同樂也 告 曰: 『吾 疾 田 王 病 欣 獵 庶 與 ? 幾 欣 於

> 民同 其所 樂者, 也 推好樂之心以 行仁 政, 使 民

今王與百姓同樂,則王矣。」

得

《 韶 好樂而 鼓、管、絃之 之正 欲以 樂猶古樂。 樂,開導其善心,深勸其與民同樂,而 矣,所謂 同。」楊氏 但與民同樂之意,則無古今之異耳 孟子告齊王以此, 自奉其身。 戰國之時 咸》、《英》、《韶》、《濩》, 》、《舞》,必放鄭聲。 道,孟子之言,救時之急務,所以 禮樂治天下,當 能 齊 與 日 ,民窮財盡 其 孟子切於救 其實今樂、古樂, :「樂以 白 音 庶幾者如此 姓 而 同 姑 疾 之,則 Œ 和 人君 首 如孔子之言, 其本 爲 蓋孔子之言,爲邦 民,故因 無補 蹙 主, 天下 頻 獨 前 何 己。 以 於治也 使 則 范 之 可 齊 南 人聞 雖 民 氏 同 王 面 一之好 之樂 必 若必 歸 謂 日 也 用 以

齊宣 王問 . 日 "「文王之囿方七十里,有諸?」

宜乎? 日 : 焉,雉兔者往焉,與民同之。 也?」曰 孟 子 三分天下有其二之後也與? 曠之地以爲囿。 事 之所。古者四時之田 有 「寡人之囿方四十里,民 「若是其大乎?」曰:「民猶 ,然不欲馳騖於稼穡 對曰:「於傳有之。」 ,音又。傳,直戀反。 :「文王之囿 然文王七十里之囿,其 方七 ,皆於農 場 ○囿者。蕃育鳥 十里, 芻蕘者 圃 民以爲小,不亦 猶以爲 之中, 傳,謂古書 以爲小也。」 隙 故 以 大, 度間 講 往 何 亦 騰 武

蜀,音 初。 蕘, 音 饒。 0 芻, 草 也。 蕘

也

郊關之内,有囿方四十里,殺其麋鹿者 臣始至於境 ,問國之大禁,然後 敢 如 臣 殺 聞

> 爲大,不亦宜乎?」 人之罪。 則是方四十里,爲阱 於國 中。 民

阱,才性反。 里爲郊,郊外 ○ 禮 : 有關 阱,坎 人 國 而 地以陷 問 禁。 獸者,言 或 外

百

陷民於死

齊 葛、文王事 大王事獯鬻,句踐 曰:「有。 宣 王 問 惟仁者爲 昆夷; 曰:「交鄰 事吳。 惟 智者爲 能 國 以 有道乎?」孟 大 能 事 以 小 ·, 是 小事 故 大,故 子 湯 對 事

能已。 故小國雖或不恭,而 心,寬洪 獯,音熏。 侵陵,而 智者明 惻 吾所以 鬻,音育。 恒,而 義 事之之禮尤不 理 無 識 較計 吾 句,音鉤。 所以字之之心自不 時 勢。 大小 敢 故 彊 大國 廢 〇仁人之 弱之私 雖 湯 事 見

⁰ 〇」,原脱,據仿元本補。

見後章。所謂狄人,即獯鬻也。句踐,越見後篇。文王事見《詩・大雅》。大王事

者也。樂天者保天下,畏天者保其國。「以大事小者,樂天者也,以小事大者,畏天

王名,事見《國語》、《史記》。

度,不敢縱逸,保一國之規模也。 一樂天。不敢違理,故曰畏天。包含徧曰樂天。不敢違理,故曰畏天。包含徧 可樂天。不敢違理,故曰畏天。包含徧

「《詩》云:『畏天之威,于時保之。』」

言以好勇,故不能事大而恤小也。王曰:「大哉言矣! 寡人有疾,寡人好勇。」《詩》,《周頌•我將》●之篇。時,是也。

勇也。

也。王請大之! "彼惡敢當我哉!"此匹夫之勇,敵一人者對曰:「王請無好小勇。夫撫劍疾視曰:

而視也。小勇,血氣所爲。大勇,義理夫撫之夫,音扶。惡,平聲。○疾視,怒目

所發。

王一怒而安天下之民。 以篤周祜,以對于天下。」此文王之勇也。文《詩》云:『王赫斯怒,爰整其旅,以遏徂莒,

答也,以答天下仰望之心也。此文王之大阮徂共之衆也。篤,厚也。祜,福也。對,爰,於也。族,衆也。遏,《詩》作按,止也。爰,於也。族,衆也。遏,《詩》作按,止也。

天下曷敢有越厥志?」一人衡行於天下,武曰其助上帝,寵之四方,有罪無罪,惟我在,仁書》曰:『天降下民,作之君,作之師。惟

^{■「}詩」,原脱,據元甲本、司禮監本、吴本補。

安天下之民。 王耻之。此武王之勇也。而武王亦一怒而

也。 意 者,我得而誅之;無罪者,我得而 亂者乎? 我既在此 衡,與横同。○《書》,《周書·泰誓》之篇 如此,而言武王亦大勇也 然所引與今《書》文小異,今且依此 寵之四方,寵異之於四方也。 ,則天下何敢有過越其 衡行,謂作亂也。 孟子釋《書》 心 志而作 安之。 有罪 解

好勇也。」
「今王亦一怒而安天下之民,民惟恐王之不

怒以除 能 之不好勇耳。 王若能如文、武之爲,則天下之民望其 除暴救 恤 血氣之怒也。 民,以 事 暴 亂 大, 以交 安天下。張敬夫曰:「小勇 而拯己於水火之中,惟恐王 〇此章言人君能懲小忿,則 鄰 大勇者, 國 能 理義之怒也。 養 大 勇,則 能

此,則可以見性情之正,而識天理、人欲之血氣之怒不可有,理義之怒不可無。知

分矣。」

樂乎?」孟子對曰:「有。人不得,則非其齊宣王見孟子於雪宮。王曰:「賢者亦有此

上矣。

「不得而非其上者,非也,爲民上而不與民

下不安分,上不恤民,皆非同樂者,亦非也。

亦憂其憂。樂以天下,憂以天下,然而不王「樂民之樂者,民亦樂其樂;憂民之憂者,民下不安分,上不恤民,皆非理也。

此於先王觀也?』 朝舞,遵海而南,放于琅邪。吾何脩而可以 育者齊景公問於晏子曰:『吾欲觀於轉附、 「昔者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、 「世者齊景公問於晏子曰:『吾欲觀於轉附、

而補 王不遊,吾何以休? 吾王不豫,吾何以助? 職,述職者,述所職 狩,巡狩者,巡所守也。 晏子對曰:『善哉問也 遊 也。 朝 轉附、朝儛,皆山名也。 不足,秋省斂而 一豫,爲諸侯度。」 音潮。 琅邪,齊東南境上邑名。 放,上聲。〇晏子,齊臣 也。 助 不給。 ! 天子 諸侯朝於天子 無非事 遵,循也。 夏諺 者。 適諸侯 觀,遊也。 티 : 春省耕 一,名嬰。 放,至 日 日 吾 沭 巛

省,視也。斂,收穫也。給,亦足也。夏狩,舒救反。省,悉井反。○述,陳也。

孟子卷第二

梁惠王章句

民也 諺 循行郊野,察民之所不足而補助之。 職 行諸侯所守之土也 而諸侯皆 諺,夏時之俗語也。 以爲 也。 皆無有無事 王 取 者 法焉 一遊 不敢 豫 圃 豫, 述 ,皆有恩惠以及民 空行者。 無 樂 所職,陳其所受之 事 也。 慢 巡所守,巡 遊 而又春秋 以 故夏 病 其

若流。流連荒亡,爲諸侯憂。 息。睊睊胥讒,民乃作慝。方命虐民,飲食「今也不然:師行而糧食,飢者弗食,勞者弗

也,二千有五 睊,古縣 「君行師從。」糧,謂糗糒之屬。 胥,相. 反。〇今,謂晏子 也。 百 讒,謗 人爲 師。 也。 慝,怨惡也,言 春 時 也。 睊 秋 傳 睊 師, **>** 側 日 目 衆

遭·夏官·司馬》改。「二千有五百」,原作「千二百五十」,據仿元本及《周

邑之長。 連荒亡,解見下文。 王 民 命 不 勝其 也 若流 勞 而 起謗怨也。 ,如水之流 諸侯,謂附庸之國 無 方,逆也 窮 極 也 、縣 命, 流

連,從獸無厭謂之荒,樂酒無厭謂之亡。 從流下而 酒 謂 厭,平聲。 放舟隨 爲樂也。 從獸 忘反謂之流,從流 水而 ,田獵也。荒,廢也。 〇此釋上文之義 亡,猶失也,言廢時 下。 從流上 ,謂挽舟逆水 上而 也。 失事 樂酒,以飲 忘反謂 從流 也。 下, 前 之

行,去聲。

先王無流連之樂,荒亡之行。

「惟君所行也。」

行耳。 言先王之法,今時之弊,二者惟在君所

補不足。召太師曰:『爲我作君臣相説之「景公説,大戒於國,出舍於郊。於是始興發

君何尤?』畜君者,好君也。」樂!』蓋《徵招》、《角招》是也。其詩曰:『玄

《招》,舜樂也。 也。 倉廩 告命也。 不同 釋之,以爲臣能畜 也。 里反。招,與韶 説,音悦。● 謂 君者也。 宜爲君之所尤,然其 深切矣。 尤,過也。 樂有 也。 ,然其心未始有異 出舍, 五聲,三日角爲民,四 太師, 齊王不能推 尹氏 爲,去聲。 其詩、《徵招》、《角招》之詩 樂官 同。畜,敕六反。② 言晏子能 自 日 : 責 IŁ 八心則 以 也 其君之欲,乃是愛其 君之 省民 也。 樂, 而用之,惜哉!」 何 畜 君 如字。 臣, 與 也。 過 止 孟子之言, 哉 民, 其君之欲 曰徵爲事。 Z 興 ? 〕與晏子 貴賤 徵, 陟 、發,發 孟子 雖 口

^{● 「}悦」下,元甲本有「大音泰」三字。

齊宣王問曰:「人皆謂我毀明堂。毀諸?

已乎?」

也 趙 守朝諸侯之處,漢時 氏 蓋以天子不復巡守 王問當毀之乎? 티 : 「明堂,太 Ш 遺 明堂。 址尚 且 *,諸 止 乎? 侯又不當居之 在 周 天子 人欲 毀之 東 洲

行王政,则勿毁之矣。」 孟子對曰:「夫明堂者,王者之堂也。王欲

毁哉? 所也。能行王政,則亦可以王矣,何必夫,音扶。○明堂,王者所居以出政令之

此 而 征 之治岐也,耕者 王 四者,天下之窮 無夫曰寡,老而無子曰 ,澤梁無禁,罪 曰:「王政 可得聞 九一,仕者世 人不孥。 民 加 與?」對曰:「昔者 無告 獨,幼 老 而 禄 而 無 開 文王 妻 無父曰 市 日 一發政 譏 鰥 文 而 孤 施 老 王 不

榮獨。』」 (詩》云:『哿矣富人

哀

此

之。 可反。 與,平 子 梁,謂魚梁。 言之人,而 譏,察也。 也。 世嘗有功德於民,故報之如此 世,仕者之子孫皆教之,教之而 田 爲私田。 中,爲田 九百畝。 也。 ,是九分而 者,井田之制 如不足用,亦使之不失其禄。 關,謂道 聲。 悪悪 榮,音瓊。 百畝 中畫 八家各受私田 不征 征 孥,音奴。 止其身,不及妻子也。 與 税 税 路之關。 井字,界 、民同 商賈之税也。 中百 其 也。 也。 利,不設禁也。 也。 畝 方一里爲一井,其 岐,周之舊國 關市之吏,察異服 鰥, 爲 市, 爲 百畝 公田 姑 世禄 九 謂 頑 品 澤,謂 都 者,先 外外 反。 ,忠厚之至 而 成 邑之市 屈 蓋其 材則官 同 八 也 孥,妻 瀦 王 養 百 先 畝 之 異 田 九

者有裹糧也,●然後可以 乃裹餱糧,于 爲 張,干戈戚揚,爰方啓行。」故居者有 曰:「昔者公劉好貨。 王 與與 不 雅 則 不 民 之政: 幸而 行?」王曰:「寡人有疾,寡人好貨。」對 尤 百姓同之,於王何 正月》之篇。 宜 善哉言乎 有 憐 導其 一鰥寡孤獨之人,無父母 恤 橐于囊。 故故 妻子,使之養其老 必 哿,可也。 以 曰:「王如善之,則 《詩》云:『乃積乃倉。 有? 思 爲 爰方啓行。 先 戢 用 也。 榮,困悴貌。 光。 而恤 妻子之養 《詩》,《小 積倉,行 弓矢 王如好 其幼 斯 何

雅 此 也。 也 王政。 王自以 戢 無底 公劉》之篇。 ,安集也。 公劉,后稷之曾孫也。 日 爲好貨,故取 橐,音托。 橐 有 言思 底 積,露 戢、《詩》作輯 安集其民 囊 民 皆 積 無 也 制 所 以 《詩》,《大 而 餱,乾 人,以光 盛 音集 不能 餱 糧 行 糧

> 王 朝 大王好色, 愛厥妃。 王 來胥字。』當是 走 日 也。 也。 大其 如 貨,而能推己之心以及民 劉九世孫。《詩》,《大雅·縣》之篇也。 惑 大,音泰。 亦能如此,則 公,大王之本 「寡人 ,用度奢侈 好色,與百姓同之,於王何有 馬,率西水滸,至于 (國家 孟子言公劉之民 啓行,言往遷于 也。 有 時 疾,寡人好色。」對 一,而 王又言此者,好 其於王天下也 號,後乃 戚 也,内 ,斧也。 不能行王 《詩》云:『古公亶 豳 ,岐下。 富足如 無怨 追 也。 揚 尊 也。 一政也。 女,外無曠 一,何 鉞 爲 何 此,是公劉 爰及姜女 色則 大 有, 今王好貨 也 日 難之有? 王 大王,公 :「昔者 言不 心 也 爰,於 一甫,來 志 好 難 蠱

父,大王名 仿元本作「囊」。 也 來朝 走馬 避狄 人之難

也

0

糧」

皆所以遏人欲 故 者,衆人之所以滅其天也。二者之間,不 率,循 能以髮,而其是非得失之歸,相去遠矣。 之所以盡其 欲,同行異情。循理 之所有,而人情之所不能無者。 心,不止就事論事。若使爲人臣者論事每 之樂,與夫好勇、好貨、好色之心,皆天 如此,豈不能堯、舜其君乎?」愚謂 與人君言,皆所以擴充其善心而格其 也。 育章至此,大意皆同。蓋鍾鼓、苑囿 能推己之心以及民也。○楊氏曰:「孟子 也。曠,空也。無怨曠者,是大王好色,而 了,其事 孟 子因時 姜女,大王之妃也。 也。 似 易 滸,水厓 君之問 性 而 而 實難。 也; 存天理。 ,而剖析於幾微之際, 也。 而公於天下者,聖賢 學者以身體之,則 総欲 胥,相也。宇,居 岐下,岐 其法似疏而實 而 私 然天理人 於一己 山之下 此 一、遊 篇自 理 觀 非

復禮之端矣。有以識其非曲學阿世之言,而知所以古

則如之何?」王曰:「棄之。」友,而之楚遊者。比其反也,則凍餒其妻子,孟子謂齊宣王曰:「王之臣有託其妻子於其

比,必二反。〇託,寄也。比,及也。棄

絶也。

「已之。」曰:「士師不能治士,則如之何?」王曰:

師皆當治之。已,罷去也。士師,獄官也。其屬有鄉士、遂士之官,士

而言他。曰:「四境之内不治,則如之何?」王顧左右

治、去聲。○孟子將問此而先設上二事以

■「賢」,司禮監本作「人」。

二九三

氏 乃安其身。」 耻 發之,及此 曰:「言君 於下問如此,不足與有爲 而王不能答也。 臣 上下各勤其任 可 其憚於自責 知矣。 無墮 其 ○趙 職

者所進,今日不知其亡也。」木之謂也,有世臣之謂也。王無親臣矣,昔孟子見齊宣王,曰:「所謂故國者,非謂有喬

矣。 親 用 此言喬木、 世 爲故國者,則在此而不在彼也。 臣,累 臣,君 之人,今日有亡去而 況世臣 所 世 世臣 親 勲 乎? 信之臣,與君 舊之臣,與國 ,皆故國 不知者,則 所宜. 同 同 有 休 休戚者 昨日 戚 無 然 者 所以 親 所進 也。 也。 臣

王曰:「吾何以識其不才而舍之?」

之人。我初不知而誤用之,故今不以其去舍,上聲。〇王意以爲此亡去者,皆不才

爲意耳。因問何以先識其不才而舍

之耶?

踰戚,可不慎與? 曰:「國君進賢,如不得已。 將使卑踰尊,

疏

之。 也; 焉,然後去之。 可,勿聽;國人皆曰 「左右皆曰賢,未可也;諸大夫皆曰賢,未可 賢,則必進疏遠之賢而用之。 尊 尊, 疏者踰 與,平聲。 國人皆曰賢,然後察之,見賢焉,然後 左右皆日 尊親親,禮之常也。 戚,非禮之常,故不可 〇如不 不可,勿聽; 不可,然後察之,見不 得已, 然或尊者親者 言謹 諸大夫皆 是使卑者 之至 不謹 也。 未 也 可 用 踰 必 不

也。 去,上聲。〇左右近臣,其言固未可 者、蓋人有同俗 諸大夫之言,宜可信矣,然猶恐其 至於國 人, 則其論 而 爲 衆 所悦者,亦 公矣,然 猶 有 必 蔽 特 於私 察 7 之

後殺之。故曰,國人殺之也。聽,國人皆曰可殺,然後察之,見可殺焉,然「左右皆曰可殺,勿聽,諸大夫皆曰可殺,勿

謂進賢如不得已者如此

「如此,然後可以爲民父母。」

謂民之父母。」● 傳曰:「民之所好好之,民之所惡惡之,此

孟子對曰:「於傳有之。」齊宣王問曰:「湯放桀,武王伐紂,有諸?」

弑之罪

也。

傳,直戀反。○放,置也。《書》云:「成湯

孟子卷第二

梁惠王章句下

放桀于南巢。」

曰:「臣弑其君,可乎?」

桀、紂,天子;湯、武,諸侯。

人謂之一夫。聞誅 曰:「賊仁者謂之賊,賊義者謂之殘,殘 賊,害也。殘,傷也。 海歸之,則爲天子,天下叛之,則爲 不復以爲君也。《書》曰:「獨夫紂。」蓋四 傷敗彝倫,故謂之殘。 滅絕天理,故謂之賊。 者有桀、紂之暴則可。 所以深警齊王,垂戒後世也。 斯言也,惟在下者有湯、武之仁,而在上 一夫紂矣,未聞弑 害仁者,凶暴淫 一夫,言衆叛 害義者,顛 不然,是未 〇王勉曰 倒 君也。」 免於篡 獨夫。 親 錯 賊 虐, 離 亂 之

■「謂」上,司禮監本、吳本有「之」字。

二九五

也。 大木。 孟 女所學而從我」,則 子 夫人幼而學之, 壯而欲行之, 王曰 『姑舍 見 匠 工 齊宣 師 王,曰 而 得 小之,則王怒,以 大木 0 何如 「爲巨 則 王喜 一室,則 以 爲 爲 必 不 使 能 勝其 勝 I. 其 師 任 求

者大,而王欲小之也。 匠人,衆工人也。姑,且也。言賢人所學匠人,衆工人也。姑,且也。三賢人所學匠人,衆工人也。姑,且也。三賢人所學。矣,音汝。

何以異於教玉人彫琢玉哉?」至於治國家,則曰『姑舍女所學而從我』,則「今有璞玉於此,雖萬鎰,必使玉人彫琢之。

鎰 賢,是愛國 者,愛之甚 兩 古之賢者 也。 音溢。 玉人,玉工也。不敢自治 〇璞,玉之在石中者。 ,常患人君不能行其所學;而 也。 家 不 治 如愛玉 國 家 則徇 也 私 范 欲 而付之能 鎰,二十 氏 而 不 任

不遇,蓋以此耳。」 世之庸君,亦常患賢者不能從其所好。 是世之庸君,亦常患賢者不能從其所好。 是

齊人伐燕,勝之。

大亂。齊因伐之。燕士卒不戰,城門不按《史記》,燕王噲讓國於其相子之,而國

閉,遂大勝燕。

乘,去聲。下同。○以伐燕爲宣王事,與不至於此。不取,必有天殃。取之,何如?」以萬乘之國伐萬乘之國,五旬而舉之,人力以萬乘之國伐萬乘之國,五旬而舉之,人力

則勿取。古之人有行之者,文王是也。人有行之者,武王是也。取之而燕民不悦,孟子對曰:「取之而燕民悦,則取之。古之

商

· 紂之世,文王三分天下有其二,以服

事

《史記》諸書不同

,已見《序

説

306

未 子曰 侯 然命之絶否, 商。 絶, 不 一。 至武王十三年,乃伐紂 期 則 而 是 事 君 會 間 何以知之? 臣。 者 不容髮。 八百, 當 日 命 武 人情而已。 絶, 王 而有天下。 日 安 則 之間 爲 得 天 獨 而 諸 止 命 張

師。 火益熱,亦運 以萬乘之國伐萬 豈有他哉? 而已矣。」 乘 避 之國, 水 火 也 簞食壺 如 漿 水 益 深 迎 王 如

后

來其蘇。

道 轉 也 而望救於他 音丹。 ,當順民 運,轉 心。 也。 食,音嗣。 人矣。○趙氏 言齊 民心悦,則天意得矣。」 若 〇 館 更爲 暴虐, 竹 日 器。 :「征伐之 則民 食, 將 飯

齊人伐 曰 侯 臣 多謀 燕,取之。 聞 七 伐 + 寡 · 里 爲 人 諸 者 侯 「, 何 政 將 於 謀 以 天下者, 救 待之?」 燕。 宣 湯是 孟 E 子 日 也 對 :

未聞以千里畏人者也

『東 也。 民,若時 曰 : 「《書》 千里畏 面 『奚爲後我?』民望之,若大旱之望雲霓 歸市者不止,耕者不變。 而 曰:『湯 雨 征 降, 西 民大悦。 夷怨; 齊王 一征,自葛始。』天 也 南 《書》 面 而 Ĕ: 誅其 征 『徯我后 下信 君而弔其 北 狄 怨。

《商 霓,五 雨,虹 不先來 小異。 君 之所以七十里而 我君,而待 在救民,不爲暴 也。 書 見 稽反。徯,胡禮反。 0 蘇, 征 一征 則 仲虺之誥》文 我之 其 復 止。 初初 來,使 生 國 也。 征 也。 變, 爲政於天下也 也 也。 己 動 奚爲 他國之民,皆以 也。 也。 得 霓, 天下信之,信其 蘇 後我,言湯 ○兩引《書》, 徯,待也。 虹 與今《書》文亦 息 也。 也 雲 此 合則 何 湯 皆 志 爲

之何 地 父兄,係累其子弟,毀其宗 水火之中 今燕虐 而 其可 不行仁政,是動天下之兵 其 也? 也,節 民,王往 天下固畏 食壺 而 漿 征之,民 以以 齊之彊 廟,遷 迎 也 王 以 也。 師 爲 其 將 重器,如 若 今又倍 拯 殺 己 其 於

之望而 畏人也 葛,則燕人悦之, 重器 今乃不行仁政 ,力追反。 倍之地也。 寶器 服 諸 也。 侯之心 〇 拯 而肆 齊之取 畏,忌也。 而齊可 救救 ,是以一 爲殘 也。 燕,若能 虐 不免乎以千里而 爲政 倍地 係累,繁縛 則 無 於天下矣。 ,并燕 如 以 湯之征 慰 燕民 而 也 增

口

王速出令,反其旄倪,止其 君而後去之,則猶 可及止 也。」 重 器 謀 於 燕 衆

旄 旄 也。 與與 人也。 猶 同 尚 也。 倪, 倪, 小兒 五 及止,及其未 稽 也 反。 謂 所 反 發而止之 虜 略 還 之老 也

> 武,則是 德 治民不法堯、舜,則是 也 0 則 必 ○范 稱 爲亂 堯 氏 日 0 豈 孟 論 可 征 子 謂吾君 伐 爲 事 暴 則必 齊、 不 行 梁之 稱 能 師 湯 君,論 ,而舍所 不法湯、 武。 道

學以徇之哉?」

人,而 誅,則疾視其長上之死 鄒 與 也 ? 、魯鬨。 民莫之死 穆公問 也。 曰 : 誅 之, 而不救 吾 則 有 不 司 可 死 如之何 者 勝 誅 + 9 則

怨其 言人衆不可 鬨 ,胡弄反。勝,平聲。長,上聲。 上,故疾視其死 聲 也 盡 誅 穆公,鄒 也。 而不救也 長上, 君也。 謂 有 不 司 可 也 下 勝 同 誅 民

倉廩實,府庫充,有司莫以告,是上慢 壑,壯者散 孟 子 對 日 0 而 之四 M 年 飢 方者,幾千人矣; 歲 君之民 老弱 轉 而 而 殘下 乎 之 溝

爾者 也。 曾子曰:『戒之戒之! 也。」夫民今而後 得 反之也。 出乎爾者,反乎 君 無

尤

馬

過也 也。 幾,上聲。夫,音扶。 充,滿也。 上,謂君及有 ○轉,飢餓輾轉 司 也。 而死 尤,

死

而

君行仁政,斯民親其上、死其長矣。」 誤 也。 民。 穆公不能 救之,如子弟之衛父兄,手足之捍頭 救其疾苦。 邦本,本固邦 亦愛之矣。 君不仁而求富 故君行仁 豐年則斂之,凶年則散之,恤其 反 是以民親愛其上,有危難 ○范氏曰:「《書》曰:『民 寧。」有 己,猶 一政,則 ,是以 欲 有 倉 有司 司 廩 歸 知 皆愛其民,而 府庫,所 罪於民,豈 重斂 而 以 不 飢 目 知恤 則 爲 寒, 也 不 赴 惟 民 民

不可饒

倖

而

荷

免。

滕文公問曰:「滕,小國 也,間於齊、楚。

事

齊乎? 事 楚乎?」

間

,去聲。

○滕,國名

孟子對 有 民弗去 焉 日: 鑿斯 「是謀 ,則是可爲 池 也 非吾所能及也。),築斯 也 城 也,與民守之,效 無 已,則

不能也 也。 無已,見前篇。 亦爲之死守而 國君 死 〇此章言有國者當守義而愛民 社 一稷,故 不去,則非 ,謂一 致 死 説 以 有以深得 守國。 也。 效, 其 至於民 猶 致

何 滕文公問 則 可? 日 0 「齊人將築薛,吾甚恐。 如之

以 薛,國名,近滕。 其 福己 而 恐也 齊取其地而城之,故文公

孟子 對 "昔者大王居邠,狄人侵之,去之

彼何哉? 垂統,爲 岐 苟爲善,後世子孫必有王者矣。 ĺЦ 下爲善,擇取 邠 之下 與與 豳 可 居 彊爲善而已矣。」 繼 同 焉 也。 而居之也。 非 若夫成功,則天 邠 擇 而 地 取之,不 名。 詳見 言大 下 得 也 王 君子 章 E 一非以 也 創 君 業 如 岐

所 彼 人君但當竭 爲善,使其可繼 前 遂有天下,乃 言能爲善,則 夫,音扶。 可 難 加 繼續而行耳。 必。 也。 垂統緒於後,但能 彊 君之力既 力於其所當爲,不可徼幸於其 Ŀ, 如大王雖失其地,而 天 而俟命於天耳。 若夫成 理 一聲。 也 無如之何 ○創,造。 然君 功,則豈可 不失其正,令後世 子 則 造 統,緒 基業 必乎? 其後世 此 但 章言 彊 也。 於 於

> 君? 得 之者如歸 下居 以 人之所欲者,吾土地也。 則 玉,不得免焉。 「昔者大王居邠 其 不 免焉,事之以犬馬,不得免焉,事之以 焉。邠人曰:『仁人也,不可失也。』從 所以養人者害人。二三子何 得 我將去之。』去邠,踰梁山,邑于 免 市。 焉。 如之 ,狄人侵之。 乃屬其耆老而告之曰:『狄 何 則 吾聞之也: 君子不 可 ? 事之以皮幣,不 孟 子 患 對 ,岐山 乎 日 無 珠 之 0

勿去。」 或曰: 屬 人,今爭地 幣,帛也。 也。 ,音燭。 『世守也,非身之所能 邑,作邑也。 屬,會 而 ○皮,謂虎、 殺 人,是以 集 也。 歸 市 豹、麋、鹿之皮 土 其 ,人衆 所以 地本生物以 爲 而爭先也 也。 養 人者 效死 也 害 養

非己所能專。但當致死守之,不可舍去。又言:或謂土地乃先人所受而世守之者,

滕

文公問曰:「

滕,小國

也。

竭力以事大國,

此 之,正 國君死社稷之常法。 也」,正謂 此 也 傳所謂 或 滅, 君

君請擇於斯二者。」

凡事求了 循 故又請 從,而 正也。 者,不過 國以 自世俗觀之,則 得已也。 「孟子之於文公,始告之以效死而已,禮之 審 能如大王則避之,不能則謹守常法。 天理之正者,非聖賢之道也。」 己量力,擇而處之可也。 圖 遂 可,功求 擇於斯二者。」又曰:「 至其甚恐,則以大王之事告之,非 存者,權也; 如 至於亡,則又不若效死之爲愈。 然無大王之德而 此。 舍此 可謂 成 守正 取 則 無謀 心爲儀、 必於智謀之末而不 矣。 而 俟 去,則 然理之可爲 〇楊氏 、秦之爲矣。 死者,義也。 孟 子所論 民或不 蓋遷 日

魯平 公將 出 了,嬖人! 臧 倉者請 曰:「他 日君 出

> 乎? 哉? 所之。 則必命有司所之。 君無見焉!」公曰:「諾。」 禮義 君所 敢請 由賢者出 爲 。」公曰:「 輕 身以 今乘輿已駕矣,有司 ,而孟子之後喪踰 先 將見孟 於 兀 一夫者, 子。 日 以 前 「何 爲 未 喪。 賢 知

薄 孟子前喪父,後喪母。 乘,去聲。 父也 諾,應辭 ○乘 八輿,君 也。 車 踰,過也,言其厚母 也。 駕 駕 馬 也。

樂正 前以 是以 與?」曰:「否。 「非所謂 曰:「或告寡人曰: 子人 士,後以大夫; 不往見也。」曰: 踰也,貧富 見,曰:「君奚爲不見 謂 不同 棺椁 『孟子之後 前以三鼎, 「何哉,君 也。 衣衾之美 喪踰 而 所 孟 也 後 謂 軻 以 前 踰 也? 喪」, 者 五. 鼎 ?

大夫祭禮 子弟子也 人見之見,音現。 ,仕於魯。 與,平聲。 三鼎,士祭禮 〇樂正子,孟 Ŧi.

予不遇哉?」 也。吾之不遇魯侯,天也,臧氏之子焉能使也。嬖人有臧倉者沮君,君是以不果來也。」 曰:「行或使之,止或尼之。行止非人所能 曰:「行或使之,止或尼之。行止非人所能

盛衰,乃天命之所爲,非人力之可及。 爲哉? ○此章言聖賢之出處,關時運之 則固有天命,而非此人所能使,亦非此人 則固有天命,而非此人所能使,亦非此人 則固有天命,而非此人所能使,亦非此人 則固有天命,而非此人所能使,亦非此人 以此,必有人尼之者。然其所以行所以止, 以之,以之行,必有人使之者。其 為哉? ○此章言聖賢之出處,關時運之 爲哉? ○此章言聖賢之出處,關時運之

孟子卷第二

312

朱熹集注

公孫丑章句上

凡九章。

功可復許乎?」 公孫丑問曰:「夫子當路於齊,管仲、晏子之

313

也。 嘗得政,丑蓋設辭以 吾,相威公,霸諸侯。 復,扶又反。〇公孫 當路,居要地也。 問問 許,猶期也。 孟子未 丑,孟 管仲,齊大夫,名夷 也。 子弟子,齊 人

孟 子曰:「子 ,誠齊 人也,知管 仲、 晏子 而

齊人但知其國有二子而已,不復知有聖

孟子卷第三

公孫丑章句

曾比 行乎國政,如彼其久也,功烈,如彼其卑也。 子與管仲孰賢?」曾西艴然不悦,曰:『爾何 蹵然曰: 『吾先子之所畏也。』曰: 『然則 或問乎曾 予於管仲? 西 曰:『吾子 管仲得君,如彼其專 與子路孰賢?」曾

吾

西

也

爾何曾比予於是?」」 卑也。 也。 也。 也。 蹩,子六反。艴,音拂,又音勃。曾,並音 於施爲,如 曰: 『千乘之國,可使治其賦也。』使其見 西,曾子之孫。 蹵,不安貌。 增。○孟子引曾西與或人問答如此。曾 天下,固有所不逮也。 管仲不知王道而行霸術,故言功烈之 威公獨任管仲四十餘年,是專且久 艴,怒色也。 楊氏 是 而 曰:「孔子言子路之才, E, 曾之言則也。 其於九合諸侯,一正 然則曾西推尊子路 先子,曾 烈,猶光 子

= 0 =

管仲之事 遇 路 如 而 則 此 獲禽 範 加 我 羞 耳。 馳 比 驅 管仲者何哉? 而 曾 不 西,仲尼之徒也,故 獲者也 9 管仲 譬之御者 之功, 詭 不道 子

望也。 子爲之爲,去聲。〇曰,孟子言也。願,

晏子猶不足爲與?」曰:「管仲以其君霸,晏子以其君顯。 管仲、

與,平聲。 〇顯,顯名也。

曰:「以齊王,由反手也。」

是法與?」

正,去聲。由、猶通。○反手,言易也。

王,去聲。由、猶通。○反手,言易也。

大行。 下 易,去聲。 王三分天下才有其二;武王克商,乃有天 文王九十 周公相成王,制禮作樂,然後 七 下 而崩,言百 同 與,平聲。 年,舉 成 數 滋 也 益 教 也 文

皆賢 者; 尺 武丁 王 武丁未久也,其故家遺俗,流風善政 之君六七作,天下 曰:「文王何可當也? 猶 地莫非 人也 又有微子、微仲、王子比干、箕子、膠鬲 朝諸侯、有天下,猶運之掌 方百里起,是以 其有 相與輔 也,一民莫非其臣 歸 相之,故久而後失之也。 難 殷 也。 久矣,久 由湯至於武 也。 也 則 」,然而 難 Ţ ,猶有存 紂之去 變也 ,賢聖 文

去聲。 商自 朝 乙、盤庚皆賢聖之君。作,起也。 音潮。 成 猶 湯 方之猶 至於武 鬲,音隔,又音歷。 與與 丁,中間 由 通 太 甲、 輔 太 猶 相 自武 戊戊、祖 之 敵 相 也 T

至紂凡九世。故家,舊臣之家也。

鎡基,不如待時。」今時則易然也。「齊人有言曰:『雖有智慧,不如乘勢,雖有

之時。○鎡基,田器也。時,謂耕種

仁政而王,莫之能禦也。齊有其民矣。地不改辟矣,民不改聚矣,行有其地矣,雞鳴狗吠相聞,而達乎四境,而有其地矣,雞鳴狗吠相聞,而達乎四境,而了夏后、殷、周之盛,地未有過千里者也,而齊

之百里。又雞犬之聲相聞,自國都以至于時,王畿不過千里,今齊已有之,異於文王辟,與闢同。○此言其勢之易也。三代盛

食,渴者易爲飲。 憔悴於虐政,未有甚於此時者也。飢者易爲「且王者之不作,未有疏於此時者也; 民之

四境,言民居稠密也

此言其時之易也。自文、武至此七百餘

異於紂之猶有善政。易爲飲食,言飢渴之年,異於商之賢聖繼作,民苦虐政之甚,

甚,不待甘美也。

郵,音尤。○置,驛也。郵,馹也。所以傳「孔子曰:『德之流行,速於置郵而傳命。』

命也。孟子引孔子之言如此。

時爲然。」解倒懸也。故事半古之人,功必倍之,惟此「當今之時,萬乘之國行仁政,民之悦之,猶

行速也。 半於古人,而功倍於古人,由時勢易而德乘,去聲。○倒懸,諭困苦也。所施之事,

雖 公孫丑問曰:「夫子加齊之卿 由 此 霸 王,不異 矣。 如 此 ,則動 相 得 心 否 行 乎? 道焉

相,去聲。〇此承上章,又設問孟子,若得

孟

子曰:「否。

我四十不動

心。

時。 足怪 動 位 其 而 孔子四十而 心 。任大責重如 行 乎? 道 則 四 雖 十彊仕 由 不惑,亦不動 此 此 而 亦有所恐懼疑 君子道 成霸王之業, 心之謂 明 德 立之 惑 亦 而 不

難。告子先我不動心。」曰:「若是,則夫子過孟賁遠矣。」曰:「是不

動心,則此亦未足爲難也。 查費血氣之勇,丑蓋借之以贊孟子不動心 五費血氣之勇,丑蓋借之以贊孟子不動心 動心,則此亦未足爲難也。 告子,名不害。

程子曰:「心有主,則能不動矣。」曰:「不動心,有道乎?」曰:「有。

豪挫於人,若撻之於市朝。 亦不受於萬乘之君。 北宫黝之養勇 無嚴 諸 侯。 也,不膚撓,不 恶聲 視刺萬乘之君 至,必 反之。 不受於 · 目逃 褐寬博 ,若刺褐 思 以

懼

爲主,而不動心者也

黝,伊糾反。撓,奴效反。朝,音潮。乘,

去聲。 也。 動心者也 侯 刺,殺也。 刺 衣,賤者之服 也。 而 挫 撓 猶 黝蓋刺客之流 〇北宫,姓; 屈 也。 辱 嚴,畏憚 也。 也。 目 褐,毛 逃 不受者,不受其挫也。 也。 黝,名。 目 以必 布 言無 被 刺 ~勝爲 膚撓 寬博,寬大之 而 可畏憚 轉 主,而不 睛 肌 之諸 膚 逃 避 被

量敵 舍豈能爲必勝哉? 孟施 而後進,慮勝 舍之所養勇 也, 而 能無懼而 後 日 會 . 『視不 是畏三軍 已矣。」 勝 猶 者 勝 也

勝,亦無所 是無勇 舍,名也。 舍,去聲。 而畏三軍矣。 下同。 懼。 會,合戰也。 若量 敵 孟 舍蓋· 慮 姓。 舍自言其 勝 力戰之士,以 而 施,發 後 進 戦 戰 語聲。 雖 則 不 無

勇,未知其孰賢,然而孟施舍守約也。「孟施舍似曾子,北宫黝似子夏。夫二子之

似。 勇,則未 子、子夏雖非等倫,然論其氣象,則各有 夫,音扶。 得其要也 信聖人,曾子反求諸己。 賢,猶 知誰 〇 黝 勝 也。 勝 務 論其所守, 約,要也。 敵人,舍專守己。子夏 故二子之與 言論二子之 則舍比於黝 所 曾

不惴焉,自反而縮,雖千萬 大勇於夫子矣: 自反 昔者曾子謂子 之也。 也。 衡縫。」又曰:「棺 縮,直也。 好,去聲。 子襄,曾子弟子也。 往,往而敵之也 《檀弓》曰:「古者冠縮縫,今也 惴 之瑞 襄曰:『子好勇乎 東縮二衡三。」惴,恐懼 而不縮 反。 〇此言曾子之勇 人,吾往矣。」 夫子,孔子也。 雖褐 ? 寬博,吾 吾嘗 聞

焉。 氣之帥 心; 於氣 可得聞與?」「告子曰:『不得於言,勿求於 曰:「敢問夫子之不動心,與告子之不動心, 動之速 心; 末 不得於心 必更求其助 達,則當舍置其言,而 以己意而告之也。 聞與之與,平聲。夫志之夫,音扶。 一節,公孫丑之問,孟子誦告子之言,又斷 不得於心,勿求於氣。」 故曰:『持其志,無暴其氣。』」 ,猶之可 可,不得於言,勿求於 於心有所不安,則當力 也; 也 氣,體之充 而 也 於氣。 孟子既誦其言 勿求諸氣者,急於本而 謂不得於言而不求諸心, 此 告子謂:於言有 也。 所以固守其 不必 夫志 不得於心, 心不可。 而斷之曰,彼謂 制其 反 至焉 求 心, 其 心 氣灰 夫志 〇此 理於 緩其 所 而 勿求 而 不 不

若 略 所 蓋 卒 然 帥 則 徒 論 以 其 古 9 凡 既 也 内外 然氣 當敬 者 未 其 曰 失 也 極 於 嘗 叮 亦人之所以 守 本末,交相培 者 外 必 則 其 故 而 其 志 亦 志 志 遂 不 古 僅 然亦 古 遺其 動, 心 口 爲 之所 充滿於身,而 而 内, 至 養。 而 不可 有 極 自 之, 其 所 此則孟子 不致 不 然 未 而 而 氣 可 盡 不 爲 養其 即 也 之 動 氣之將 爲志之 詞 次 必 之大 之心 氣。 之。 矣。 耳

其 動志 其 (氣」者 心 心 也 志 何 至 今 也? 焉 夫 蹶 氣 者趨 曰:「志壹則 次 為一 者, 又曰 是 氣 動 持 也, 氣 其 志 而 氣 反 壹 無 則 動 暴

次,故 夫,音扶。 也 其 趨 氣 問問 走 何 如 也 也 此 ? 孟 孫 則 子言 壹 專 Η. 持 見 專 志 其 孟 之所向 志 子言 也 可 矣, 志 蹶 專 至 又言 一,則 而 顛 躓 無 氣

> 者什 也。 其 之 氣 (心焉。 動 固 從 〇程 0 之; 如 子 所 人 然氣之所 以 顛 Ħ 既 躓 持其 趨 志 走 動 在專 志 則 氣 氣 者 加 又 專 什 必 則 在 九, 無暴 是 志 氣 亦 m 動 其 反 反 爲 志 氣 動

養

也。 識 性 以 恶,平聲。 孟 下 然,失養故餒,惟 行 而 之貌。 其 異於告子如此 ,於凡天下之言, 之事 子又詳告之以 於天下之事 是非 蓋 惟 無 得失之所 知 氣, 所 ○公孫 言 疑 即 無所懼 則 所 其 養 者 孟 **H**. 有 無 謂 以 故 氣 子 一復問 有何 以 然也 不 此 也 體 爲善養之以 則 明 有以 之 其所以當大任 孟子之不 有 夫 所 知 充 長 道 以 究極 言者 浩然,盛 者。 義 而 配 其理 夫 能 復 本 盡 動 而 然, 道 自 其 大 心 於 心 流 浩 所 天 初 知 而 而 而

動心,殆亦冥然無覺,悍然不顧而已爾。不動心也。告子之學,與此正相反。其不

敢問 氣可知矣。」 而 論 孟 無 志 子先言知言, 程子曰:「觀此一言,則孟子之實有是 何謂浩然之氣?」曰:「難言也 氣 形聲之驗,有未易以言語形容者故。 而 言 也。 而丑先問 難言者 一、蓋其 氣者,承上文方 心所獨得

于天地之間。「其爲氣也,至大至剛,以直養而無害,則塞

矣。 天 浩然之氣,乃吾氣也。 所作爲以害之,則其本體不虧而充塞無間 也 地之正氣 至大,初無限 地。 惟其 0 程 爲私意 自反 前 子曰:「天 量。 人得以 而 所蔽 縮 至剛,不可 人一 則得其所 生者,其體段本 則飲 養 而 也 然而 無 ,更不分 屈 養,而 害 撓。 餒, 則 塞 又 如是 蓋 知 别。 其 乎 無 天

> 其 小 也。 正 時 識 ○謝氏日 取。」 又 . 曰 「浩然之氣,須於 * 浩 是 無 心得 虧

欠時。」

其爲氣也,配義與道;無是,餒 飢乏而氣不充體也。 者,人心之裁制。 餒,奴罪反。 則亦不免於疑懼,而 爲雖未必 决,無所 其氣合乎義道 疑憚。❸ 不出 〇配者,合而有助之意。 於道義 而爲 若 道者,天理之自然。 不足以 無 之助,●使 言人能養成此 7,然其 此 氣, 有爲矣。 體 則 也 有所 其 其 行 氣,則 不充 時 之 勇 所

慊於心,則餒矣。我故曰,告子未嘗知義,以「是集義所生者,非義襲而取之也。行有不

2 1

8

[「]知其」,仿元本、吴本作「却甚」。

[「]義道」,司禮監本、吴本作「道義」。

[「]憚」,元甲本作「懼」。

其外之也。

也。 言 不 理,乃曰 不 只行一事偶合於義,便可掩襲於外 以 其養之之始,乃 慊 義,而自反不直,則不足於心,而其體 齊侯襲莒之襲。 善、蓋欲事事皆合於義也。 一,勿求 充矣。 能集義以 無 慊,快也,足也。 所愧怍,而 箩 仁内義外,而不復以 反, 於心,即外義之意,詳 然則義豈 生浩然之氣矣。 又 \Box 由事皆合義,自反常直 此 言氣雖可 劫 氣自然發生於中 在 反。 外哉? 言所行 以配乎道義 襲,掩 集 義爲事 上文不得於 一有不 告子不 義, 見《 取 猶 而 ·, 非 也 告子 合於 知 有 得 則 河而 ,如 是 必 此 所 由 積

芒然歸。謂其人曰:『今日病矣,予助苗長宋人然。宋人有閔其苗之不長而揠之者,芒「必有事焉而勿正,心勿忘,勿助長也。無若

者也 助苗 矣。』其子趨 長者寡 助之長者 矣。 而往 視之,苗則槁矣。 以 揠苗者也。 爲 無益 而 舍之者,不耘苗 非 徒 天下之不 無 益 前

又害之。」

當勿忘 如作正 疲倦 也。 乃集 焉,有所事也,如 世或并下文「心」字讀之者,亦通 事焉而勿正,趙氏、程子以 長,上聲。 助之長者,正之不得而妄有作爲者也。 義爲事,而 心者語意自 預期也。《春秋傳》曰「戰不正 芒芒,無知之貌 也 義 其 心 養 義 舍之不耘者,忘其所有 氣 所有事, 握,烏八反。 勿預 不同 之節 亦同。 期 也。 有事於顓臾之有事。 度 其 而 此與《大學》之所謂 也。 效。 此言養氣者,必以 不可 其 舍,上聲。 人,家人也。 其 作 閔,憂也, 七字爲句。 或未 爲 以 一勝」是 事。 充 助 必有 〇必 揠,拔 則 其 IĘ, 長 也 病 近 事 有 集 然 旧 IF. 而

之病。 集義。 者 不 「則氣 耘則 而 失養 其於所謂 得其 欲 彊 而 養 制 己, 而 其 浩 無 揠 心,則必不能免於 然者,蓋不惟不善養 則反 所 害 矣。 以害之。 如 告子 無是 IE 不能 助

何謂

知言?」曰:

「詖辭知其所蔽

《經解

知

而

又反害之矣。

於其 其所 聖人復起,必從吾言矣。」 也。 問 詖 病 乎 之失也。 叛去也。 言之病也。 Ě 彼寄 ιĻ, 陷 而孟子答之也。 邪,邪 苟 理 ,邪辭知其 害於其 爲不然,則必有是 而 反。 窮,困 無 人之有 僻 蔽 蔽,然後其言平正 復,扶又反。〇 也。 政 遮隔 屈 所 言 遁,逃 也。 詖,偏 發於其 離 1,皆本 也。 遁 四者 避 辭 陷,沉 四者之病矣 於 陂 政,害 也 知 心 亦相 也 此 其 溺 四者 0 公孫 通 所 l於其· 淫,放 因, 也 達 其 窮。 相 而 心 則 丑. 事。 因 離 明 心 蕩 復 即 無 生

> 德行。 也。』然則夫子既聖矣乎?」 宰我、子貢善爲説辭,冉牛 事之决 未 正如人在堂上,方能辨堂下人曲直。 孟 乎道,然後能辨 之説,則自不免於四者之病 者,不得於言而 其言之病 下之言而 而無疑於天下之理,其孰能 免雜於堂下衆人之中 子所謂 孔 然而 子 兼之, 知言是也。」又曰 無 而 不 所疑哉? 知 可易者如 是非 不肯求之於 其心之失, 曰:『我於辭 如持 〇程 此 ,則不能辨 、閔子、顔淵 權 二二孟 又知 其 心,至 之? 非 衡 子曰:「心 命 心 以 其 何 子 較 通 彼告子 以 爲 害 則 决 知言 於道 輕 若猶 於 不 善言 矣。」 知 義 能 通 天 政

■「本」,司禮監本作「出」。

之問是也。

説辭

言語

也。

德行,

得於

心

行,去聲。

〇此

節,林氏

以爲皆公孫

丑.

各有所 聖 務 辭 日 氣 之,故言之親 矣 :「孔子自謂 本而 則 命。 於行 乎? 是兼言 長,而 己。 今孟 事 此 者也。 子乃 語 切 孔子 夫 不能於辭命者, 而 子 德 自謂 兼之, 有 7,指 行而 三子善言德行者 味 我能 也 孟 有之,然則豈 然猶自謂 子 公孫 知 也。 言,又 欲使學者 丑言 不 善養 程 身有 能 不 數 於 子 既

矣!』夫聖 厭 能 日 曰 一二一夫子 悪! 智也; 我學 不 教不倦,仁也。仁且智,夫子既聖 聖矣 是何言也? 昔者子 ,孔子不居,是 厭 而 教 乎?』孔 不倦也。」子貢 子 何言 日 也? : 貢 日 聖 問 :『學不 則 於 吾 孔 不 子

也。 孔 惡 指 孔 子、子貢 平聲。 子也。 昔者以下, 問答之辭 夫聖之夫,音扶。 學不厭者 孟子 不 以 ,智之所以自明,教 告 敢當丑之言 之 也 ○惡,驚 此 夫子, 而 歎 引 辭

以深拒之。不倦者,仁之所以及物。再言是何言也,

一體,冉牛、閔子、顔淵則具體而微。敢問昔者竊聞之:子夏、子游、子張皆有聖人之

所安?」

子,既 此一 但 一未廣 體,猶 節,林氏 不 大耳。 一肢 敢 比 亦以爲皆公孫丑之問 也。 孔子 安, 具 , 處 則 體 也 於 而 此數數 微 公孫 謂 子 丑. 有 欲 是是也 復 其 問 何 全體 所 孟

處也?

티 :

「姑舍是。」

舍,上聲。〇孟子言且置是者,不欲以數

進 夷 其君 曰:「伯夷、 一,伊 也 子所至者自 不事, 尹也。 何 事 非其民 伊 非 可以仕則仕 尹 處 君 也 何 不使 何 如?二曰 使 治治 非 可 民 則 0 以 進 「不同 治 止 亦 則止 亂 進 則 道 可可 退 亂 一,伯 以 亦 非

吾未能有行焉,乃所願,則學孔子也。」 久則久,可以速則速,孔子也。皆古聖人也。

於湯。 人事 武 遜 治 湯聘而用之,使之就桀。 王伐紂 國,避紂 ,詳見此篇之末及《萬 如是者五,乃相湯而伐桀也。 去而 隱 〇 伯 居,聞文王之德 餓 夷,孤 死 竹 伊 君之長子。 尹 桀不能用,復歸 章下》篇 ,有莘之處士。 而歸之。 兄弟 三聖 及

自有生民以來,未有孔子也。」「伯夷、伊尹於孔子,若是班乎?」曰:「否。

殺 而君之,皆能 曰 :「然則有 與 一不辜而得天下,皆不爲也。 百 平聲。 而 E 天下, 同 朝,音潮。 以 朝諸侯、有天下。 與?」曰 德之盛 「有。 也 有,言有同 行 是則 得百里之地 行 一不義 一不義、 也。 同。 殺 以

> 者,●惟在於 聖人之所 一不辜而得天下,有所不爲,心之正 以 此。 爲 聖人,其 於 此 不 同,則 本 根 節 亦 目 不 足以 之大 也。

爲聖人矣。

若 曰:「敢問其所以異?」曰: ,智足以知聖人。 汙,音蛙。好,去聲。 好而空譽之,明其言之可信 足以知夫子之道。 汙,不至阿其所 假使汙下,必不 〇汗,下也。 三子智 「宰我、子貢、 也 好。 呵 私 有 所

遠矣。』 「宰我曰:『以予觀於夫子,賢於堯、

程子 道 子賢於堯、舜, - , 夫子 一,非得 · 日 : 「 又推 孔 子,則後 語聖則不異,事 其 語 道 事 以 世 功 垂 亦 也。 教 何所據哉 萬 功則有 蓋 世。 堯、 堯、舜 舜治 異。 天 夫

■「本根」,司禮監本作「根本」。

舜

德。 自生民以來,未有夫子 貢 由 百 世之後,等百世之王,莫之能違 見其 禮 而 知 也。」 其 政 聞 其 樂 而 知 也 其

以百里。

類也。 乎其萃,自生民以來,未有盛於孔子也。」」 凰之於飛鳥,太山之於丘 有若曰: 道上 也。 長。 人,然未有如孔子之尤 垤,大結 :「《孟子》此章,擴前聖所未發,學者所 萃,聚 無源之水也。 鳳凰,羽蟲之長。 垤,蟻封 聖人之於民,亦類也。 『豈惟民哉? 麒麟之於走獸,鳳 反。 也。 潦,音老。 言自古聖人, 出,高 垤,河海之於行 盛者 出 麒 出 也。 也。 固 麟,毛蟲之 於其類,拔 也。 「皆異 拔 (特起 行潦, 程 於衆 子

宜潛心而玩索也。

德行仁者王,王不待大。湯以七十里,文王孟子曰:「以力假仁者霸,霸必有大國。以

是也。 之,無適而非仁 力,謂土地甲兵之力。 而 借其 事 以 以 德行仁,則自吾之得於心者推 爲 功者也 也 假仁者,本無是心 霸 若齊 威 、晉文

服。』此之謂也。」
也。《詩》云:『自西自東,自南自北,無思不人者,中心悦而誠服也,如七十子之服孔子以力服人者,非心服也,力不贍也,以德服

不同 贍,足也。《詩》,《大雅·文王有聲》之篇 有意於服人,而人不敢不 王霸之心 亦 如 ,誠僞 此。 不同 鄒 氏 故 E 人所以應之者,其 一、以 服 力服 以 德 人者 服人

來,論 者, 無意於服 王 霸 者 人,而· 多矣,未 人 有 不 若此 能 不服。 章之深 從古以 切 而

著

明

也

侮之?!

在職。 國,必畏之矣。 如惡之,莫如貴 然徒惡之而不去其得之之道,不能免也。 惡,去聲。 國家閒 下同。 暇 德 及是時 而 〇好榮惡辱,人之常情 尊士,賢者在位 明其 (政刑。 一,能者 雖大

時 足 以 其人而言之。 彊 閒 仁之事 也 以 IE 音開。 修 君 詳 政 而 善俗 也。 而 味「及」字 V.)此因 賢,有德者,使之在位 事 貴德,猶尚 能,有才者,使之在職,則 其 國家閒 則 恶 辱之情, 惟 德 暇 日 也。 可 不 足之意 以有爲之 而進 士 則 則 之以 可 足 指

今國

家

閒

暇,及是時般樂怠敖,是

自

求

見矣。

牖户。 此詩 詩》云:『迨天之未 者,其知道 今此 下民,或敢 乎! 陰 侮予?』孔子曰 能治 雨 徹 其國 彼 桑 家, 土 一。『爲 誰 綢 敢 繆

之,以 予者乎? 備 彪反。 爲國,亦當思 之通氣出 根之皮也。 之所作也。 徹,直列反。土,音杜。 患詳 爲 ○《詩》,《豳風 密 知道 人 如 周公以鳥之爲巢如此,比 迨,及· 處 綢繆,纏綿 此 也。 患 也。 ,今此在 而 也。 予,鳥自謂也。 預防之。 徹,取 0 補 下之人,或 鴟 綢,音稠。 葺 鴞》之篇,周 孔子 也。 也。 牖 桑 讀 言我之 敢 戶,巢 土,桑 繆, 君之 而 有侮 公 誊 武

❶ 「明」下,司禮監本有「者」字。

禍也。

欲偷安,亦惟日不足也。 ○言其縱般,音盤。樂,音洛。敖,音傲。○言其縱

禍福無不自己求之者。

結上文之意。

之謂也。」

之謂也。」

之謂也。」

《詩》云:『永言配命,自求多福。』《太甲》

求,長也。言,猶緩也。此言禍之自己永,長也。言,猶念也。配,合也。命,悉 書》篇名。孽,禍也。違,避也。活,生也, 書》作逭。逭,猶念也。配,合也。命,天 。, (表甲), 《商 書》作逭。逭,猶念也。配,合也。命,天 。, (本甲), 《商 。, (本甲), 《百 。, (本甲

皆悦而願立於其朝矣。孟子曰:「尊賢使能,俊傑在位,則天下之士

願藏於其市矣。 「市廛而不征,法而不廛,則天下之商皆悦而朝,音潮。○俊傑,才德之異於衆者。

其廛。蓋逐末者多則廛以抑之,少則不必而不征其貨;或治之以市官之法,而不賦廛,市宅也。張子曰:「或賦其市地之廛,

廛也。」

關譏而不征,則天下之旅皆悦而願出於其

路矣。

解見前篇。

「耕者助而不税,則天下之農皆悦而願耕於

其野矣。

「廛無夫里之布,則天下之民皆悦而願爲之但使出力以助耕公田,而不税其私田也。

布。民無職事者,出夫家之征。」鄭氏謂:氓,音盲。○《周禮》:「宅不毛者有里

氓矣。

之布,非先王之法也。氓,民也。 之布。民無常業者,罰之使出一夫百畝之之。市宅之民,已賦其廛,又令出此夫里 之。市宅之民,已賦其廛,又令出此夫里 之。市宅之民,已赋其廛,又令出此夫里

者,天吏也。然而不王者,未之有也。」者也。如此,則無敵於天下。無敵於天下率其子弟,攻其父母,自生民以來,未有能濟率其子弟,攻其父母,自生民以來,未有能濟

三政,則赤子爲仇讐。

○此章言能行王政,則寇戎爲父子,不行亡,惟天所命,不敢不從,若湯、武是也。」

古,惟天所命,不敢不從,若湯、武是也。」

天地生物之心以爲心,所以人皆有不忍人天地以生物爲心,而所生之物,因各得夫孟子曰:「人皆有不忍人之心。

之心也。

以不忍人之心,行不忍人之政,治天下可運「先王有不忍人之心,斯有不忍人之政矣。

之掌上。

不忍人之政也。 電景人雖有不忍人之心,然物欲害之,存 言衆人雖有不忍人之心,然物欲害之,存

也,非惡其聲而然也。

立於孺子之父母也,非所以要譽於鄉黨朋友

交於孺子之父母也,非所以要譽於鄉黨朋友

也。言乍見之時,便有此心,隨見而發,非臀。下同。○乍,猶忽也。怵惕,驚動貌。聲。下同。○乍,猶忽也。怵惕,驚動貌。聲。下同。○乍,猶忽也。怵惕,驚動貌。以,音點。內,讀爲納。要,平聲。惡,去

乃真 心。 **①** 惻隱 之私矣。」 自然也。 由 此 八心也。 \equiv 之心。二〇 方乍見孺子人井之時 一者而 内交、要譽、惡其聲而然,即 非思 然 也 謝 而 氏 得, 日 程 . 非 子 勉 反 日 而 . 須 中,天 其心怵 滿 是 識 腔 人欲 理之 子 其 真 是

之心,非人也。 心,非人也 由是觀之,無惻隱之心,非人也, 無 辭讓之心, 非人也 無羞 9 無是 悪 非 之

乎是 知其 無 推以與 惡,憎人之不善也。 惡,去聲。 此 (四者,故因論惻隱而悉數之。 悪 ,則不得 人也。 而 以爲 下 謂 同。 是知其善而以爲 非 之人 也 〇羞, 耻 辭,解使去己 ,所以明 人之所以 己之不善 其必 爲 是 有 也 也 心,不外 言人若 也 非, 讓, 也。

> 端 也

其情之發,而性之本然可得 智,性也。 惻隱、羞惡、辭 在中而緒見於外 心,統性情 讓、是非 也 者也 情 也。 端,緒 而見,猶 仁、 也。 義 有 物 大

端而, 者 「人之有是四端也,猶其有四體也。 賊 自謂 其 君 者也。 不能者, 自賊 者 也 謂其 君 有是 不 能

四

者,物欲 四 體,四支,人之所必有者也。 蔽之耳。 自謂 不 能

苟不充之,不足以 「凡有四端於我者,知皆 始然,泉之始達。 苟能充之,足以保四海 事父母。」 擴 而充之矣,若火之

端在我,隨 擴,音廓。 處 ○擴 **發見**。 ,推廣之意。 知皆即 充 此推 滿 廣 也 而充 四

0 「反」,他本作「人」。

也

辭讓之心,禮之端

也,是非之心,智之

惻

隱之心,仁之端

也;

羞惡之心,義之端

故 專 端之信,猶五行之土,無定位,無成名 此。 有誠心爲四端,則信在 在 之所以與 情,心之體用,本然全具,而 遠 不能然者,皆自棄 事之至近而不能矣。 自 滿 氣,而 我而 土於四行無不在 ,亦吾度内, 其本然之量,則其日新又新 「人皆· 學者於此,反求 已矣。」又曰:「四端 水、火、金、木,無 我者 有是心,惟 能 無難保者。 「, 可 由 此 也。 以 於四時 默識 而 君子 無 〇此章所 遂 其中矣。」愚按: 然其 不 充之, 不待 爲 不能充之,則 而擴充之,則天 盡 則寄王 不言信者 充與不充,亦 能 各 矣。〇程 將有 是 擴 則 有 論人之性 以 而 條 焉。 兀 生 充之。 理 不 海 無無 既既 其 子 兀 如 能 雖 雖

孟子曰:「矢人豈不仁於函人哉? 矢人唯

理

亦猶

是

也

恐不傷人,函人唯恐傷人。巫、匠亦然。故

術不可不慎也。

巫者爲人祈祝,利人之生。匠者作爲棺之,是矢人之心,本非不如函人之仁也。函,音含。○函,甲也。惻隱之心,人皆有

智?』夫仁,天之尊爵「孔子曰:『里仁爲难,利人之死。

美。

擇

不

處

焉

得

也,人之安宅也。

禦而不仁,是不智也

物之心,得之最先,而兼統 禮、智,皆天所與之良貴。 者,猶以爲美。 焉,於虔反。夫,音扶。 之德,有 善之長也,故曰 安得爲智乎? 人當常在其中,而 天理 自然之安,無 「尊爵。 人擇所以自處而 此孔子之言 不可 在人 須臾離 〇里有 而 人欲 四者,所謂 八則爲 也。 仁 者也 陷溺之危 者 仁厚之俗 本心全體 不於仁 天地 故时 元 者 牛

由,與猶通。○以不仁,故不智。不智,故爲役,由弓人而耻爲弓,矢人而耻爲矢也。大如此,而自不爲之,豈非不智之甚乎? 大如此,而自不爲之,豈非不智之甚乎? 安宅。此又孟子釋孔子之意,以爲仁道之

「如耻之,莫如爲仁。

不知禮義之所在。

者在其中矣。不言智、禮、義者,仁該全體,能爲仁,則三此亦因人愧耻之心而引之,使志於仁也。

人以爲善。

中,去聲。○爲仁由己,而由人乎哉?怨勝己者,反求諸己而已矣。」

曰:「仲由喜聞過,今名無窮焉。今人有喜其得聞而改之,其勇於自修如此。周子孟子曰:「子路,人告之以有過,則喜。

雷澤。

以有過則喜,亦可謂百世之師矣。」無悟也。噫!」〇程子曰:「子路,人告之無悟也。噫!」〇程子曰:「子路,人告之過,不喜人規,如諱疾而忌醫,寧滅其身而

「禹聞善言,則拜。

「大舜有大焉,善與人同。舍己從人,樂取於屈己以受天下之善也。

舜之側微,耕于歷山,陶于河濱,漁于「自耕、稼、陶、漁,以至爲帝,無非取於人者。

「取諸人以爲善,是與人爲善者也。故君子

莫大乎與人爲善。」

於此? 有 此之間。故其在人者有以裕於己,在己者 使 則 與 以 彼 天下之人皆勸 及於人。 益 許 勸於爲善矣,是我助其爲善也 〇此章言聖賢樂善之誠,初無 也 ,助也 於爲善,君子之善,孰 取彼之善而爲之於 我 能 彼 大

者,不受也。 之,若將浼焉。 惡惡之心, 思與鄉 朝 孟 不立於惡人之朝,不與 ",與惡人言,如以 子 曰:「伯 夷, 不受也者,是亦不屑就 是故諸 非 人立,其冠不正,望望然 其 朝衣朝冠坐於塗炭。 君 侯雖有善其 惡人言。 不事,非 立於惡人之 其 解 Ë 友不 命 而 友, 推 去 至

罪反。 朝,音潮。 去 ○塗,泥 加 悪悪悪 不 顧 之貌 也。 ,上去聲,下如字。 鄉 浼,污 鄉 也 里之常人 屑 浼 莫 也。

> 也 氏 一、不 日 0 屑就 潔 也。」《 言 不 説 以 就之爲 文》 日 0 潔 動 而 作 切 切 切 於 切

是也。己,語助辭。

焉 爾 不屑去已。」 曰:『爾爲爾,我爲 必以其道。 柳 焉能 ,援而止之而止。 下惠,不 浼我哉?」故 遺佚 羞 汙君,不卑 而 我, 不 由 援 怨,阨 由 雖 而 然與之偕 袒 小官。 止之而 裼 裸 而 裎 止 進 而不自失 者,是 於 不 憫。 隱 我 側 故 亦

失其 之言 也。 佚,音逸。 隱賢,不 反。程,音程。 由 下惠,魯大夫 由 E ,自得之貌。 也。 憫,憂也。 也。 枉 袒 袒,音但。 道 援而· 裼 展 也。 焉能之焉,於虔 禽,居 爾 露 止之而 偕 爲 臂 遺 並 爾至 人供,放 柳 也 裼,音錫。 止者,言欲去而 處 下 焉 也。 裸 而 棄 能 裎 益 不自失,不 浼 也 露露 反。〇 惠 裸, 我 也。 阨, 身 哉 魯 也 柳 果 惠 木

留也。

益,狹窄也。不恭,簡慢也。夷、惠之行,君子不由也。」益,柳下惠不恭。隘與不恭,

無弊,故不可由也。 固皆造乎至極之地,然既有所偏,則不能

孟子卷第三

朱熹集注

公孫丑章句下

凡十四章。 自第二章以下,記孟子出處行

孟子曰:「天時不如地利,地利不如人和 和也。 利,險阻、城池之固也。 人和,得民心之 天時,謂時日支干、 孤虚王相之屬也。地

天時不如地利也。 環而攻之,必有得天時者矣,然而不勝者,是 三里之城,七里之郭,環而攻之而不勝。 夫

夫,音扶。 〇三里、七里,城郭之小者。

孟子卷第

四

公孫丑章句

久,必有值天時之善者。 郭,外城。環,圍 也。 言 四 面 攻圍 曠 日

持

也,米粟非不多也,委而去之,是地利不如人 城非不高 也 池非不深也,兵革非 不堅利

和也。 革,甲也。粟,穀也。 委,棄也。言不得民

心,民不爲守也。

失道者寡助。寡助之至,親戚畔之,多助之 至,天下順之。 之險,威天下不以兵革之利。 故曰:域民不以封疆之界,固國不以 得道者多助, Ш

域,界限也。

以天下之所順,攻親戚之所畔,故君子有不

戰,戰必勝矣。」

得天下者,凡以得民心而已。」 言不戰則已,戰則必勝。〇尹氏曰"「言

孟子將朝王,王使人來曰: 「寡人. 如就見者

造朝。」 寡 也 人得 有有 寒 見 疾 乎? 不 可 對 以 風。 日 . 「不幸 朝將視朝 而 有 不識 疾 不 可 能 使

章 疾 王 到 主 辭 反。 内朝並 也。 不 下 知 音 同 而 潮 託 疾以 唯 Ē 朝將之朝 齊 召 王 孟 也 子 故故 如字。 孟子 孟 子亦 本將 造,七 以 朝

以 今日 明 病 日 ,今日弔,或者 愈,如之何不弔?」 出 弔 於 東 郭 氏。 不可 公孫 乎 ? 丑. 티 : 日 0 一昔者 昔者 辭

取 者,疑辭。 東 瑟 郭氏,齊大夫家 而 歌 同 辭 意 疾 而 出 也。 弔 昔者 與 孔 子 昨 不 日 見 也 孺 或 悲

敬

王也。」

王使 造 於 命 朝 人問 ,有采薪之憂,不能 請 必無 我 疾 不 醫來。 歸,而 識 能至否乎?」使數 造於朝 孟 仲子 造 朝 對 日 -今病 人要於路 小愈,趨 一昔者 有

> 子,外 言者, 豈以仁義爲不美也 曰 : È 不 堯、舜之道不 與言仁義也。云爾 一敬。 能采薪 得已而之景 要孟子,令勿歸 要,平聲。 昆弟,學於 悪悪 則君臣,人之大倫也。 丑見王之敬子也,未見所以敬王 ! 謙 是 敢 孟 辭 何言 丑氏 以 子者 孟仲子, 也。 而 陳於王前 也 宿 則不敬莫大乎是。 造朝 仲子 也。 ! 焉。 趙 齊 ? 采薪 權 以實己言 景子曰 氏 人無以 辭 故 其心 父子主恩, 以 以對, 之憂,言 爲孟 齊 日『是 人莫 内内 子 又 義 之從 使 如 也。」 病 我 何 與 君 則 非 Ŧ 不 我 足 父

景 召 無諾。 子 景子,景丑 之小者也; 惡,平聲。 日 . 君命 否,非 也。 下 孟子所言,敬之大者 同。 召 此 惡 ,不俟駕。』 之 歎 ○景 謂 辭 丑 也。 也 氏 固將朝 齊大 景 禮》 H 也 也 所 夫 日 言 家 聞 也 敬 父 Ŧ.

止 外不俟車。」言孟 而 一,似與 不諾。」又曰:「君命召,在官不俟屢 ,音扶。下同 此禮之意不同 子 ○《禮》 本 欲朝 也。 日 王,而 :「父命呼 聞 命 唯 在 中

二哉? 可及 輔世長 言之? 我以吾義,吾何慊乎哉?』夫豈不義 曰:「豈謂 一,齒一,德 也。 民莫 是或 彼以 是 與? 如 0 其富,我以吾仁,彼以 道 德。 朝 也。 曾子曰 延莫 惡得 如 天下有 三晉、 爵, 有 其一以 鄉 達尊三 黨莫 楚之富,不 而曾子 其 如 慢 爵, 其

有爲

也。

耳。 恨 足、爲恨、爲 然則嫌亦 與,平聲。慊, 也,少也。 孟子言 但 我 爲 少 或作赚 之意 一,則 口簟反。長,上 心 有 因其 非 所銜之義 ,字書以 如 事 景子之所言者。 而 爲 所 其 一聲。 П 銜 銜 爲快、爲 有不同 物 () 慊 也。

> 通 因 之説,蓋以德言之也。 子肯以爲言,是或别有 也。 引 曾 蓋通天下之所尊,有此三者。 子之言, 而 云 夫 今齊王 此 種 贵 道 是 一但有 理 不 也 義 爵耳 曾子 而

謀焉,則就之。其尊德樂道,不如是不足與「故將大有爲之君,必有所不召之臣。欲有

安得以此慢於齒

一、德乎

君致敬盡禮而後往者,非欲自爲尊大也,之君也。○程子曰:「古之人所以必待人樂,音洛。○大有爲之君,大有作爲,非常

爲

是故

耳。

而霸。 王,桓公之於管仲,學焉而後臣之,故不勞而「故湯之於伊尹,學焉而後臣之,故不勞而

「今天下地醜德齊,莫能相尚,無他,好臣其先從受學,師之也。後以爲臣,任之也。

三五五

所教,而不好臣其所受教。

之所從學者也 謂 好 聽從於己, ,去聲。 可役使者 醜 類 也。 也。 尚, 過 所受教 也 謂 所教, 己

仲且猶不可召,而况不爲管仲者乎?」「湯之於伊尹,桓公之於管仲,則不敢召。管

高 順 故 子之於齊,處賓師之位,非當仕有官職 交而德業成矣。 不爲管仲,孟子自謂也。○范氏曰 以其言 富 爲 貴 恭 ,而以 爲 如此。」〇此章見賓師 重 前 責 難陳善爲 以貴德尊 敬; 土 爲賢,則上下 人君 不以趨走承 不以崇 . 二孟 者,

陳臻問 而受。 受,於宋,餽七十鎰 日之受是 前 日 一前日 ,則前日之不受非也。 日之不受是,則今日之受非 於齊,王餽兼 而 受 於薛 金 夫子必居 魄 一百 五. 也; + 而 鎰 不

於此矣。」

於常者。一百,百鎰也。陳臻,孟子弟子。兼金,好金也,其價善

倍

孟子曰:「皆是也。

皆適於義也。

當在宋也,予將有遠行。行者必以贐,辭

曰:『餽贐。』予何爲不受?

「當在薛也,予有戒心。辭曰:『聞戒。』故爲贐,徐刃反。○贐,送行者之禮也。

孟子設兵以戒備之。薛君以金餽孟子,爲爲兵之爲,去聲。○時人有欲害孟子者,

兵魄之,予何爲不受?

兵備,辭曰:「聞子之有戒心也。」

也。焉有君子而可以貨取乎?」

若於齊,則未

有處

也

無

處

而

餽

之,是貨之

所處也。取,猶致也。○尹氏曰:「言君焉,於虔反。○無遠行、戒心之事,是未有

日 孟子之平陸,謂其大夫曰:「子之持戟之士, 而三失伍 ,則去之否乎?」曰:「不

也。 去,上聲。〇平陸,齊下邑也。大夫,邑宰 去之,殺之也。 戟,有枝兵也。 士,戰士也。伍,行列

民,老羸轉於溝壑,壯者散而之四方者,幾千 人矣。」曰:「此非距心之所得爲也。」 然則子之失伍也亦多矣。 凶年饑歲,子之

政使然,非我所得專爲也 幾,上聲。〇子之失伍,言其失職,猶士之 失伍也。 距心,大夫名。 對言此乃王之失

其人乎? 爲之求牧與芻矣。 曰:「今有受人之牛羊而爲之牧之者, 抑亦立而視其死與?」曰:「此則 求牧與芻而不得,則反諸 則必

孟子卷第四

公孫丑章句下

距心之罪也。」

爲,去聲。死與之與,平聲。 得自專,何不致其事 也。牧、牧地 也。 **芻**,草也。 ,而去。 ○牧之,養之 孟子言若不

曰 : 焉。知其罪者,惟孔距心。爲王誦之。] 王 他日,見於王曰:「王之爲都者,臣 「此則寡人之罪也。」 知五人

「孟子一言,而齊之君臣舉知其罪,固足以 也。邑有先君之廟曰都。 見,音現。爲王之爲,去聲。 而不繹,從而不改故耶?」 興邦矣。 爲王誦其語,欲以風曉王也。 '然而齊卒不得爲善國者,豈非 孔,大夫姓也 〇爲都,治邑)陳氏 日

337

言與?」 孟 也,爲其 子謂 蚔 口 鼃 以言也。 ☐ : 「子之辭靈丘 今既數月矣,未可 而 請 士師, 似

三七

近 似 蚔 王,得以諫刑罰之不 也,言所爲 音遲。 〇 蚔 鼃 龍, 烏 近 齊 似 大 花 有理。 夫 反。 也 中 者。 爲, 叮 靈 以言,謂 去聲。 丘 齊 與,平 下 邑。 師

蚔鼃諫於王而不用,致爲臣而去。

致,猶還也。

則吾不知也。」齊人曰:「所以爲蚳鼃,則善矣;所以自爲,

公都子以告。○譏孟子道不行而不能去也。

還也。

行事,使事

也

公都子,孟子弟子也。

裕 我 曰:「吾聞之也:有官守者, 哉? 無 言責 有言責者,不得其言則去。 也 ,則吾進 退, 豈不綽綽 不 我 得 無 然有餘 其 官 職 守, 則

綽綽,寬貌。裕,寬意也。孟子居賓師之官守,以官爲守者。言責,以言爲責者。

〇尹氏曰:「進退久速,當於理而已。」位,未嘗受禄。故其進退之際,寬裕如此

爲輔 孟 子 爲 行。 卿 王 於齊,出 驊 朝暮 弔 見,反齊、滕之路,未嘗與 於滕,王 一使蓋· 大夫王 驩

王驩,王嬖臣也。輔行,副使也。反蓋,古盍反。見,音現。○蓋,齊下之言行事也。

公孫丑 也?」曰:「夫既或治之,予何言哉?」 路,不爲近矣。反之而 小人,不惡而嚴 夫既或治之,言有司已治之矣。 夫,音扶。 日 : 「齊卿之位,不爲 〇王 薩 如 蓋攝 此 未嘗與言行 卿 以 小矣; 行 1,故曰 孟子之待 齊、滕之 齊卿。 何

孟子自齊葬於魯,反於齊,止於嬴。充虞請

往

邑也

且比化者,無使土親膚,於人心獨無恔乎?

虞不敢請。今願竊有請也,木若以美然。」曰:「前日不知虞之不肖,使虞敦匠事。嚴,

恨乎?

人心。 自天子達於庶人。非直爲觀美也,然後盡於曰:「古者棺椁無度,中古棺七寸,椁稱之。

厚久遠,非特爲人觀視之美而已。制禮時也。椁稱之,與棺相稱也。欲其堅稱,去聲。○度,厚薄尺寸也。中古,周公

得之而又爲有財也。或曰:「爲當作而。」不得,謂法制所不當得。得之爲有財,言之爲有財,古之人皆用之,吾何爲獨不然?「不得,不可以爲悦,無財,不可以爲悦。得

近其肌膚,於人子之心,豈不快然無所者,死者也。恔,快也。言爲死者不使土比,必二反。恔,音效。○比,猶爲也。化

愛惜此物,而薄於吾親也。 送終之禮,所當得爲而不自盡,是爲天下吾聞之:●君子不以天下儉其親。」

噲。 可。 於子,則可乎? 沈同以其私問曰:「燕可伐與?」孟子曰 之吾子之禄爵。 有仕於此, 子噲 不得 與人燕,子之不得受燕於子 而子悦之,不告於王 夫士也,亦無王命而 何 以異於是?」 而 私受之 私與

伐與之與,平聲,下伐與、殺與同。夫,音

扶。○沈同,齊臣。

以私問,非王命也。

❶ 「之」下,司禮監本有「也」字。

之? 燕,何爲勸之哉?」 應之日 今有殺人者 日 齊 應之日 『可』,彼然而伐之也。 :「未也。 人伐燕。 可可。 則將應之曰『爲天吏,則可 士 ,或問之曰『人可殺與』? 沈同 或 師 彼如 問 則 問 日 日『孰可以 -可 「燕 以 勸 可 殺之」。 彼 齊伐 伐 如 與 ? 殺 曰『孰 燕, 之? 今以 以伐 有 吾應之 可 諸 燕 之。 以 則將 則將 ? 伐 伐

矣 蓋 民 以 天吏,解 傳聞 燕伐燕也。 故 何不可之有? 孟 此 子 見上篇。 説之誤。 曰 可。 《史記》亦 言齊無 使齊 〇楊 乃殺其父兄,虜其子 王 謂 氏 道 能 孟 日 一,與 誅 -子 其 勸 燕 燕固 君 齊 無 弔 伐 異 可 其 伐 如

言,則誤矣。」 弟,而後燕人畔之。乃以是歸咎孟子之

解之。 陳賈 燕 公未之盡 不仁 公使管叔監殷,管叔 且智?」王 人 齊 也; 畔。 日 破燕後 :「王無患焉。 不知 王曰 曰 也, 一年 . 而使之,是不智也。 : - 悪! 而 吾 燕 况 人共立 甚 於王 以殷畔。 是何言 王自 慚 於 乎? 以 太子 孟 子 爲 也?三曰 知 與周 平 賈 而使之, 仁、智, 爲 請 公敦 王 見 周 周

惡、監 監 紂,立紂子武庚,而使管叔與弟蔡叔、霍 叔,名鮮,武王弟 其 國。 皆平聲。 武王崩 周 ,成王幼 陳賈,齊 公兄 也。 周 公攝 大夫 武 王 政 也 勝 商 叔 殺

^{■「}哉」下,元甲本有「與並平聲」四字。

叔與武庚畔,周公討而誅之。

之過,不亦宜乎? 與?」曰:「周公,弟也,管 與?」曰: 諸?」曰:「然。」曰:「周公知其將畔 見 也。」曰: 孟 子 , 問 「不知 「使管叔監殷 曰:「周 也。」「然則 公何 ,管叔以 人也?」 叔,兄也。 聖 人且 殷畔 曰: 「古 而 也,有 周 有 使之 過 公 聖

惡 之,其過有所 管叔之事 志其才皆非象比也,周公詎忍逆探其兄之 得以是而全之。 管叔,不如舜 周公之兄,然則周公不知管叔之將畔 與,平聲。○言周 象之惡已著,而 而 棄之耶? 公誠 ,聖人之不幸 信而任管叔,此 之處 不免矣。 周公愛兄,宜無不盡者。 若管叔之惡則未著,而 其志不過富貴而已,故舜 公乃管叔之弟,管叔 象,何也?」 或曰:「周公之處 也 天理人倫之至 舜 游 誠 信 氏 而 日 而 喜 其 使 乃

> 我用心 一也。」

順之,又從爲之辭。」
「且古之君子,過則改之,今之君子,過則順「且古之君子,過則改之,今之君子,過則順

爲之辭 後通。 辯也。 則義 章之後、此章之前,則孟子之意,不待論説 事 非 曲 氏 以遷善改過,而教之以遂非文過 更,平聲。○順,猶遂也。更,改也。 能自已者。 散 拒 曰:「齊王慚 爲 辯説 諫 不可勝用矣。 出而無先後之次,故其説必參考 更之則無損於明,故民仰之。 若以第二篇十章 ,則其過愈深矣。 之惡,故 前 使其臣有能因是 沮 於孟 其遷善改過之心,長 孟 而陳賈鄙 子深責之。 子 ,蓋羞惡之心,有不 責賈不能勉其君 、十一章,置於前 夫,方且爲之 心而將順之, 然此 也。 (其飾 〇林 順 而 而

而 自明矣。

孟 子致爲臣 而 歸

願 此 日 王就見孟子,曰:「前 也 朝 而 孟 甚喜。 子久於 得 見 乎? 齊 今又棄寡 而道 對 不行 티 : 日願見而不可得,得侍 人而歸,不識 ,故去也 不 敢 請 耳 可 固 以 所 繼

朝,音 潮

他日 子盍爲我言之?」 養弟子以萬鍾,使諸大夫國人皆有所矜式。 ,王謂時子 曰:「我欲中國而授孟子室,

中 斛 爲,去聲。 也。 四 斗。 萬鍾,穀禄之數 〇時子,齊臣也。 矜, 敬 也。 也。 式, 法 鍾,量名,受六 中國,當國之 也。 盍, 何

時 子因陳子而以告孟子,陳子以時子之言告

不

也。

孟 子

陳子, 即 陳臻 也。

使予欲富,辭十萬而受萬,是爲欲富 孟 子曰:「然。 夫時 子 悪 知其 不 可 也? 乎

如

之饋,是我雖欲富,亦不爲此也。 夫,音扶。 前日爲卿,嘗辭十萬之禄,今乃受此 又有難顯言者。 而去,則其義不可以復留,而時子不 惡,平聲。 故但言設使我欲富 ○孟 子既以道不行 則 知 萬 我 則 鍾

貴? 則亦已矣,又使其子弟爲卿。人亦孰不欲富 季孫曰:『異哉子叔疑! 而獨於富貴之中,有私 使己爲政,不用 龍斷焉。」

而高 孫、子叔疑,不知何 龍,音壟。 而又欲求得於彼,如下文賤丈夫登龍斷者 而使其子弟爲卿。 也,義見下文。 〇此 孟子引季 季孫譏其既不得 蓋子 叔疑者嘗不用 龍 孫之語也。 斷。岡 壟之斷 於此

之所爲也。孟子引此以明道既不行,復受

其禄,則無以異此矣。

之,以左右望而 司者治之耳。 加 古之爲市者 征之。征商,自此賤丈夫始矣。」 ,●以其所有,易其 有賤丈夫焉,必求龍 罔 市 利。 人皆以 所 爲賤 無者, 斷 故從 而 登 有

也。

客坐而言,孟子不應而

卧

也

訟。 利 謂罔 實非欲尊孟 孟 而 可,孟子亦非不肯爲國人矜式者。 故就 不受。」 程子曰:「齊王 子釋龍斷 羅 左右望者,欲 取之也。 征 其 之説 子,乃欲以利誘之,故 税, 從 後世 如 所 得 而 此。 以 此 緣此 征之,謂 處 而 治之,謂治 孟 又 子者 遂 取 征 彼 X ,未爲不 商 也 但齊王 悪 **S孟子拒** 人也。 其爭 其 罔 專

孟子去齊,宿於畫。

畫,如字,或曰:「當作畫,音獲。」下同。

○晝,齊西南近邑也。

爲,去聲。下同。隱,於靳反。○隱,有欲爲王留行者,坐而言。不應,隱几而即

子思 子。昔者魯繆公無人乎子思之側,則不 安其身。 不聽,請 客不悦,曰:「弟子齊宿 9 泄 勿復 柳、申詳,無人乎繆公之側,則 敢 見 矣。」曰:「坐! 而 後 敢言,夫子 我 明 能 卧 語 能 安 而

之不 泄 候 宿 齊,側皆反。復,扶又反。語,去聲。○ 在其君之左右維持調 1,齊戒 柳,魯人。申詳,子張之子也。 伺 如子思,然二子義不苟 道達誠意於其側,乃能安而留之也 越 宿 也。 繆公尊 護之,則亦不能安其 禮 容,非 子思,常使人 繆公尊 有賢者 齊

■ 「者」,司禮監本、仿元本、吴本作「也」。

身矣。

者絶子乎?」「子爲長者慮,而不及子思,子絕長者乎,長

也。我之臥而不應,豈爲先絶子乎?我謀者,不及繆公留子思之事,而先絶我不使子來,而子自欲爲王留我,是所以爲長,上聲。○長者,孟子自稱也。言齊王

而後出畫,是何濡滯也? 士則兹不悦。」則是干澤也。千里而見王,不遇故去。 三宿爲湯、武,則是不明也;識其不可,然且至,孟子去齊。尹士語人曰:「不識王之不可以

澤,恩澤也。濡滯,遲留也。語,去聲。○尹士,齊人也。干,求也。

高子以告。

曰:「夫尹士惡知予哉? 千里而見王,是予高子,亦齊人,孟子弟子也。

行道也。今道不行,故不得已而去,非本夫,音扶。下同。惡,平聲。○見王,欲以

幾改之。王如改諸,則必反予。 「予三宿而後出畫,於予心猶以爲速。王

庶

欲如此也。

用予,則豈徒齊民安,天下之民舉安。王庶予雖然,豈舍王哉? 王由足用爲善。王如所改,必指一事而言,然今不可考矣。

幾改之,予日望之。

人,是人終不可與人堯、舜之道矣,何善之爲善。若乃其心不然,而謬爲大言以欺俗之樂,皆以直告而不隱於孟子,故足以俗之樂,皆以直告而不隱於孟子,故足以

則怒,悻悻然見於其面 「予豈若是小丈夫然哉 ? 去則窮日之力而後 諫於其君而不受,

宿哉?」

悻,形頂反。 見,音現。 ○悻悻,怒意也。

窮 盡 也

尹士聞之,日 :「士誠 小人也。」

子 澤民,惓惓之餘意。李氏曰:「於此 此 章見聖賢行道 ·憂則違之之情,而荷蕢者所以爲果也。」 濟 時,汲汲之本心,愛君 見君

尤人。 孟子去齊。 前日虞聞諸夫子曰: 『君子不怨天,不 充虞路問曰:「夫子若有不豫色

此二句實孔子之言,蓋 路問,於路中問 也。 豫,悦也。 孟 子嘗 稱之以 尤,過也。 教

孟子卷第四

公孫丑章句

人耳。

曰:「彼一時,此 時 也。

彼,前 日。 此,今日

「五百年必有王者興,其間必有名世者。 自堯、舜至湯,自湯至文、武,皆五 而聖人出。 世者,爲之輔佐,若皋陶、 名世,謂其人德業聞望 稷、 契、 白 可 伊 名於 餘 尹 年

萊朱、太公望、散宜生之屬

「由周而來,七百有餘歲矣。 以其數則過矣。

以其時考之則可矣。

時,謂亂極思治可以 周 謂文、武之間。 有爲之日。於是而 數, 謂五 百年之期。 不

得一有所爲,此孟子所以不能無不豫

夫天未欲平治 天 下也。 如 欲平治天下,當

今之世,舍我其誰 夫,音扶。舍,上聲。 也? 吾何 ○言當此之時,而使 爲 不 豫哉?」

三五五

哉? 有並行而不悖者,於此見矣。 嘗不豫也。 意 我 未可知,而 不遇於齊,是天未欲平治天下也。 然則孟子雖若有不豫然者,而實未 蓋聖賢憂世之志,樂天之誠 其具又在 我,我 何 爲 不 然天 豫

禄,古之道乎?」

孟子去齊,居休。

公孫丑問曰:「仕而不受

休,地名。

曰:「非也。於崇,吾得見王。退而有去志,

不欲變,故不受也。

崇,亦地名。孟子始見齊王,必有所不合,

故有去志。變,謂變其去志。

師命,師旅之命也。國既被兵,難請去也。

以一端裁之,不亦誤乎?」義也。義之所在,禮有時而變。

〇孔氏曰:「仕

而受禄,禮

也;

不受齊禄

公孫丑欲

孟子卷第四

朱熹集注

何嘗不善? 發而中節,即無往而不善,

理,原其所自,未有不善。

喜怒哀樂未發

旨如此。

〇程子曰:

「性即理也。

天下之

於用力也。門人不能悉記其辭,而撮其大

滕文公章句上

凡五章。

滕文公爲世子,將之楚,過宋而 世子,太子也。 見孟 子。

孟子道性善,言必稱堯、舜。 道,言也。性者,人所禀於天以生之理也

異,但衆人汩於私欲而失之,堯、舜則 知仁義不假外求,聖人可學而至,而不懈 言,每道性善,而必稱堯、舜以實之。 欲之蔽,而能 渾然至善,未嘗有惡。 充其 性 爾。 人與堯、舜初無少 故 孟 子與 欲其 世 無 私 子

是非,皆先是而後非。」 先善而後惡,言吉凶,皆先吉而後凶,言 發不中節,然後爲 不善。 故凡言善惡,皆

世子自楚反,復見孟子。孟 子曰:「世子 疑

吾言乎? 夫道一而已矣。

子之言不能無疑,復來求見,蓋恐別 復,扶又反。夫,音扶。〇時人不知性之 此,以明古今聖愚本同 近易行之説 本善,而以聖賢爲不可企及。 也。 孟子知之,故但告之如 一性,前言已盡 故世子於孟 有卑 無

吾何畏彼哉?」顔渊曰:『舜何人也,予何人 成覸謂齊景公曰:『彼丈夫也,我丈夫也

復有它説也。

孟子卷第五 滕文公章句上

師也,周公豈欺我哉?』也? 有爲者亦若是。』公明儀曰:『文王我

王我師 舜也。 也 爲 也。 覸 不當復求它說也。 三言以明之,欲世子篤信力行,以師聖賢, 必可師,故誦周公之言,而歎其不我欺 ,古莧反。 有爲者亦若是,言人能有爲, 孟子既告世子以道無二致,而復引此 也、蓋周公之言。 公明,姓,儀,名,魯賢 〇成覵,人姓名。彼,謂聖 公明儀 人 亦 則皆 也 以文王 文 如 賢

國。《書》曰:『若藥不瞑眩,厥疾不瘳。』」「今滕絶長補短,將五十里也,猶可以爲善

瞑, 自克 滕 孟子之言性善,始見於此,而詳具於《告 書》,《商書·説 國 莫甸 雖小,猶足爲治,但恐安於卑近,不能 ,則不足以 反。 眩,音 去惡 命》篇。 而爲善也。 縣。 瞑眩, 慣 絶, ○愚按: 猶 亂。言 截 也。

於聖人之門,程子之言信矣。無非此理。其所以擴前聖之未發,而有功子》之篇。然默識而旁通之,則七篇之中,

乎 以禮,死,葬之以禮,祭之以禮 諸侯之禮,吾未之學也,雖然,吾嘗聞之矣。 然友之鄒,問 庶人,三代共之。」 三年之喪,齊疏之服,飦粥之食,自天子達於 ! 親喪固所自盡也。 於 孟 子。 孟 曾子曰:『生,事之 子 日 ,可謂孝矣。」 : 不不 亦 善

時諸侯莫能行古喪禮,而文公獨能以此爲齊,音資。疏,所居反。飦,諸延反。○當

也。 非自外 問 也。 者,子生三年,然後免於父母之懷。故父 之心所自 葬,乃疏 母之喪,必以三年也。 豈曾子嘗誦之以告其門人歟? 緝 了故孟子善之。又言父母之喪,固人子 飦, 但所引曾子之言,本孔子告樊遲者 斬衰,緝之日 至,宜乎文公於此有所不能自己 食。 麋也。● 盡者。 此古今貴賤 蓋悲哀之情,痛疾之意 喪禮:三日始食粥。 [齊衰。 齊,衣下縫也。 通行之禮 疏,麤 三年之喪 也 也 不 既 布

欲,曰:「吾宗國魯先君莫之行,吾先君亦莫 然友反命,定爲三年之喪。 曰:『喪祭從先祖。』」曰 之行也,至於子之身而反之,不可。 父兄,同 而 國 魯祖周公爲長,兄弟宗之,故滕謂 姓老臣 然謂 二國不行三年之喪者,乃其 也。 滕 :「吾有所受之也。」 與 魯俱文王之後 父兄百官皆不 且《志

> 者,蓋爲上世以來,有所傳受,雖或 後世失禮之甚者也 舊俗所傳禮文小異而可以通行 不可改也。 也,引《志》之言而釋其意 後世之失,非周公之法本 然《志》所言,本謂 然也 以爲 先 者耳,不謂 所以 王之世 志 不 如此 》,記

也; 事,子爲我問孟 謂然友曰:「吾他日未嘗學問 有 位而哭,百官有司,莫敢不哀,先之也。」上 曰: 『君薨,聽於冢宰。 孟 今也父兄百官不我足也,恐其不 在世子。」 好者,下必有甚 子曰:「 小人之德, 然。 不可 草 子。」然友復之鄒 也。 焉者矣。 以 草尚之風必偃。」 他 歐粥 求 『君子之德 好好 面面 者 馳 能 也。 問問 深 馬 孟子。 孔 試 於 子 風 即

● 「麋」,司禮監本、吴本作「糜」。

深 好 言但在世子自盡其哀而 之於己。 然其「不我足」之言。 論 墨,甚 不我足,謂 語》作上 ,皆去聲。 冢宰,六卿之長 黑 一,古字 色也。 不 以 復,扶又反。 通 我 即, 也。 滿 不可他求者 己。 足 就 偃,伏 其 也 也。 意 歠 也 尚 歌,飲也 也 了; 川 言當責 然者 加 悦 孟 也 子

者大悦 居 然友 至葬,四 廬 反命。 未 有 方來觀之,顏色之戚,哭泣之哀, 命戒。 世子 曰:「然。 百官族人,可謂 是 誠 在 我。」五 知 及 弔 月

外。 然三年之喪 禮 諸 心之所固有者,初未嘗亡也。 日 也。」〇林 知 侯,五月而 疑 居喪 有闕 不 门,惻 氏 言 誤。 葬。 日 故 隠之心 :「孟子之時 未有命 或曰 未葬,居倚廬於中門之 ,痛疾之意 0 令教 「皆謂 喪禮 惟其溺於流 戒 世子 也 , 出 既 之 於 可 壞 人 知 謂

問

之。

發其 見孟 期然而然者。 者,自我發之,而彼之心悦誠服,亦有所 學問之力,亦不可 其父兄百官之心。 責,悼其前行之不足 焉。及其父兄百官皆不欲 俗之弊,是以 而遠近見聞無不悦服 良 子 心 而 聞 矣,是以 性 喪其良心而不自知 人性之善, 豈不信哉?」 善、 誣 堯舜之説 雖其資質有過人者, 至此 也。 以取 則 而 以 及其 信 行,則 哀 人心之所同 痛之 則 而 斷然行之, 亦 固 不 耳 誠 敢 有 反 躬 以 文公 有 心 自 然 非 發 而

滕文公問爲國。

文公以禮聘孟子,故孟子至滕,而文公

于茅 孟子曰:「民 紬 了,宵爾 音 陶 索 事 綯 亟 ,紀力反。 不 哌 可 其 緩 乘 也。 屋 〇民 其 詩》云: 始 事 播 謂謂 白 農事 畫 爾

人,每

相反而

引《詩》言治屋之急如此者,蓋以來春將復言農事至重,人君不可以爲緩而忽之。故綯,絞也。亟,急也。乘,升也。播,布也。《詩》,《豳風・七月》之篇。于,往取也。

人在位,罔民而可爲也? 恒心。苟無恒心,放辟邪侈,無不爲已。及恒心。苟無恒心,放辟邪侈,無不爲已。及

始播百穀,而不暇爲此也。

音義並見前篇。

恭則能以禮接下,儉則能取民以制。是故賢君必恭儉禮下,取於民有制。

孟子引之,恐爲富之害於仁也。君子小容並立。虎之言此,恐爲仁之害於富也,陽虎,陽貨,魯季氏家臣也。天理人欲,不陽虎曰:『爲富不仁矣,爲仁不富矣。』

藉也。而徹,其實皆什一也。徹者,徹也。助者,「夏后氏五十而貢,殷人七十而助,周人百畝

之徹。 井。 復税其 夫 周 家各授 商人始 爲常數,惟 用貢法,十夫有溝; 畫爲九區,區七十畝。中爲公田,其外八 田五十畝,而每夫計其五畝 制民常産與其取之之制也。 徹,敕列反。藉,子夜反。○此以下,乃言 制 分而取其 所耕公田實計十畝。 則 耕則通力而作,收則 公田 其實皆什一者,貢法固以十分之一 私 爲 田。 區,但借其 井田之制,以六百三十畝之地 助法乃是九一,而商 一,蓋又輕於十一矣。 百畝,中以二十畝爲 周時 都鄙 力以 夫授田 通私 用 助 計 助 耕公田,而 畝 之人以爲貢。 田 夏時一夫受 百畝。 法,八家 而 制 百畝,爲十 分 廬 不可考。 竊料 ,故謂 舍,一 鄉 遂

也 制 實耕公田 均均 亦 當 也。 如 七畝,是亦 此, 藉,借也 而以十四 不 過什 畝 爲 也。 廬舍, 徹 夫 通

之,使老稚轉乎溝壑,惡在其爲民父母也? 將終歲勤動,不得以養其父母,又稱貸而 不足,則必取盈焉。爲民父母,使民盻盻然, 取之而不爲虐,則寡取之,凶年,糞其田 者,校數歲之中以爲常。 龍子曰: 『治地莫善於助, 莫不善於貢。』 貢 塘也。❷ 苦也。 稚 出 子,古賢人。 莧反者,非。 樂,音洛。盻,五禮反,從目從兮。或音普 ,幼子也 息以償之也。 稱,舉也 盈,滿也。 狼戾,猶 去聲。 益之,以足取盈之數也。 貸,借也。 **盻**,恨視也。 樂歲,粒米狼戾,多 狼藉,言多也。 惡,平聲。 取物於 勤動 〇 龍 糞, 益 而

> 耳。 言助法。 人各有定業,而上下相安者也,故下文遂 之人,實與助法相爲表裏,所以使君子、 滕已行之,惟助 夫,音扶。 一,仕者世 蓋世禄者,授之土田,使之食其公田 一禄,二者王政之本 〇孟子嘗言文王治岐,耕者九 法未行,故取 於民 也。 者 今世 無 野 制 禄

公田。 「《詩》云:『雨我公田,遂及我私。』 不 雨,于付反。 田 雨,降雨也。 先公而後 存, 由此觀之,雖周 惟 有 此 〇《詩》、《小雅·大田》之篇 私 言願天 詩, 也。 可 亦 當 雨於公田 見 助 時 周 也 助 亦 法 用 前 盡 惟助爲有 助 廢 遂 故 及私 典

之也。

루|

夫世禄,滕固行之矣。

⁰ 殘宋本、元乙本、司禮監本、吴本作「似」。 據仿元本改

教也 庠,學則三代共之,皆所以明人倫也。 設 爲 庠序學校以教之。 序 者 射 也。 夏 日 庠者,養也; 校, 殷曰 序 校者 人倫 周 日

明於上

,小民親

於下

也。庠、序、學、校、皆以明此而已。 爲義、皆鄉學也。學、國學也。共之、無異爲義、皆鄉學也。學、國學也。共之、無異所以,以與明,以與明,以與明,與學也。共之,無異所以,以與明,以與明,以與明,以與明,以以

制

禄

可坐而

定也

有王者起,必來取法,是爲王者師 爲王 及天下矣。 滕國褊 一者師, 小,雖行仁政,未必 則 聖 雖 一 賢 至 不 有 天下, 一公無 能興 我 而 之 其 (王業。 澤亦 心 也。 足 於 此 以 然

也。子力行之,亦以新子之國。」 (《詩》云: 『周雖舊邦,其命惟新。』文王之謂

可見。

《詩》,《大雅·文王》之篇。言周雖后稷以

夫滕

壤地褊小

,將爲君子焉,將

爲野人焉

是故暴君汙吏必慢其經界。 經界始。 使畢戰問 政,選擇 王 來,舊爲諸侯,其受天命 始 也。 而 經界不正,井地 井地。 使子 子,指文公,諸侯未踰年之稱 ,子必勉之! 孟子曰:「子之君 不 而 ·鈞,穀禄不平。 有 經界既正,分田 夫仁政 天下,則 將行仁 7,必自 自文 也

此始 修 穀禄有不平。 有不鈞; 地分田、經畫其溝塗封植之界也。 問其詳 言,而使畢 夫,音扶。 》, 則 田 正之,則分田 前 也。 暴君汙 無定分,而豪強得以 賦無定法,而 ○畢戰,滕臣。 戰主爲 井 地, 此欲行仁政者之所以必 制 逆則! 禄,可不勞而定矣。 即 井 必欲慢而 地之事,故 井 貪暴得以多取 田 也 文公因 兼并 廢之也。 經界, 又使之來 が故井 此法 孟 子之 謂 故故 從 不 治 地 有

子莫治 野人,無野人莫養君子。

請野九一而 耕者,是以分田制禄之法,不可 間 夫,音扶。 亦必有爲君子而仕者,亦必有爲野人 養,去聲。 7,國中 什一使自賦 ○言滕地雖 偏 一廢也 小 然其 而

助

此。 也。 之地也。 公田 此 賦其一,蓋用貢 亦不止什一矣。 分田 而 野,郊外都鄙之地也。九一而 以此推之,當時 制禄之常法,所以治野人使養君子 行助 田 法 不井授,但爲 也。 、法也。 或 非 中,郊門之内 周所謂徹法者 惟 助法 溝洫 一,使什 不 行 助 其 鄉 蓋 而 爲 貢 如 自 遂

卿以下必有圭田 主 田 Ŧi. + 畝

也。 者,滕已行之,但此未備耳。 此 世禄常制之外,又有圭田,所 圭,潔也,所 以 奉 祭祀 也 以 不言世禄 厚 君 子

餘夫二十五畝

八口 之外,又有餘夫之田 然後更受百畝之田。」 年十六,别受田二十五畝,俟其壯 程子曰:「一夫上父母,下妻子, 爲率,受田 百畝 ,以厚野 愚按: 如有弟,是 人也 此 百 以 餘 而 畝 有室 夫 五 常 也 制

助,疾病相扶 死徙無 出鄉 、持,則 鄉田 百 同井,出入相 姓親 睦 友,守望 相

私百畝,同養公田。 方里而井,井 家也。 死, 謂葬也。 友,猶伴也。 九百畝 徙,謂 公事畢,然後敢治私 徙其 ,其中爲公田 守望,防寇盗 (居也。 同 ,并者, 也 八家皆

所以别野人也 别君子、 體之制,乃周之助法也。 禄,而私 養,去聲。 而 言,省文耳。 野 田 别,彼 野 人之分也。 人之所受。 上言野及國中二法,此 列反。 不言 〇此 公田 先公後 君子,據 詳 以爲君子之 言 私 井 所 田 獨 以 形

所

病者

,特上之未

行耳。」乃言曰:『縱不

行之天下

,猶可驗之一

鄉。」方與學者議

處之有

術

期

以數

年,不刑一人而

可復。

詳於治野者,國中貢法,當世已行,但取之

過於什一爾。

子矣。」
「此其大略也。若夫潤澤之,則在君與

界始。 我者, 荷 人之田 於人情,宜於土俗,而不失乎先王之意也。 夫,音扶。〇井地之法,諸侯皆去其籍,此 制,粲然備具。 論治人先務,未始不以經界爲急,講求法 特其大略而已。 〇吕氏曰:「子張子慨然有 而 己。 舉 戸爲 貧富不均,教養無法,雖欲言治,皆 而措之耳。 辭。 世之病難行者,未始不以亟奪富 然茲法之行,悦之者衆。 要之可以行于今,如有用 潤澤,謂因時 嘗 曰: 『仁政必自 意三代之治。 制宜,使合 荷 經經

> 能因略 可行。 亞聖之才矣。 當禮法廢壞之後,制度節文不可復考,而 界兩章,見孟子之學,識其大者。 古之法,買田一方,畫爲數井。 往之迹,而能 厚本抑末。足以推先王之遺法,明當今之 斂法,廣儲蓄,興學校,成禮俗,救菑恤 家之賦 以致詳 有志未就 役,退以其私,正經界,分宅里,立 合乎先王之意,真可謂命 推舊 而 卒。」〇愚按: 而 爲 新 不屑屑於既 上不失公 喪禮、經 是以 雖 世

捆屨、織席以爲食。 而爲氓。」文公與之處,其徒數十人,皆衣褐,文公曰:「遠方之人聞君行仁政,願受一廛有爲神農之言者許行,自楚之滕,踵門而告

氏,始爲耒耜,教民稼穡者也。爲其言者,衣,去聲。捆,音閩。○神農,炎帝神農

説 法也。 也。 毛布 踵 史 5,失其 門 也 遷 行所謂 以 所 賤者之服 足至門也。 爲 廛,民所居也。 謂 義 農家 食,賣 神農之言,乃後 理者耳,猶陰陽、 者 以 也。 流 供 也 政 食 捆, 氓,野人之稱。 也 許, 上章所言井 扣 世稱述上古之 醫 姓 拯之,欲 方稱 9 程子 行 黄帝之 名 其 地之 日 也 0 堅

滕,曰 陳良之徒 爲聖人氓。」 「聞君行聖人之政,是亦聖 陳 相 與 其弟辛, 負 耒 耜 而 人 自 也 宋 之 願

柄也。 陳良,楚之儒者。耜,所以起土。耒,其

饔飱 也。 見 陳相 孟 、而治。 見許行 雖 子 ',道 然,未聞道也。 許 今也滕有倉廪府庫 而 行之言 大悦 盡棄其學 賢者與 滕 ,而學焉 君 民 則是厲 並 則 一耕 誠 而 賢 民 陳 食, 君 而 相

以自養也、惡得賢?

以鐵 織?」曰:「害於耕。」曰:「許子以釜 曰:「否。 「奚冠?」曰:「冠素。」曰: 許子衣褐。」「許子冠乎?」曰:「冠。」曰: 孟子曰:「許子 「然。」「許子 否。 言,蓋欲陰壞孟子分别君子、野人之法。 熟食也。 饔 爲食,而 音 耕乎?」曰:「然。」「自爲之與?」曰: 以粟易之。」 雍。 以粟易之。」曰:「許子奚爲不自 兼 朝日 必織 治 飱,音孫。 民 必 饔,夕日 布 事 種 而 也 粟 後 惡,平 飱。 而 厲 衣 後 乎?」曰: 「自織之與?」 病也。 言當自炊爨 聲。 食乎?」 許行此 餮 甑爨 「否。 日 以

所以炊。 衣,去聲。 八反,皆 孟子問 與,平聲。 然火 而陳 也。 相 ○ 釜, 所 對 鐵 也 耜 屬 以 也 煑。 此 甑 語

「以粟易械器者,不爲厲陶冶。陶冶亦以其

紛然 爲 日 械器易粟者, 豈爲厲農夫哉? 陶 「百工之事,固 冶,舍皆取 與 百 工 交 易 諸 其宫中 不可耕且爲也。」 何 許子之不 而用之? 且許子何 憚 何爲 煩? 紛 不

之處 者。舍,止也,或讀屬上句。 器,釜甑之屬 舍,去聲。 也。 也。 此 孟 陶 子言 爲 甑者。 加 陳 舍,謂作陶冶 相 冶,爲釜 對 也。 鐵 械

爲哉

者治於人。 故曰:或勞心,或勞力。 備,如必自 天下之通義 有小民之事 然則治天下獨可耕且爲與? 爲 0 也。 治於人者食人,治人者食於人。 而 且一人之身,而百工之所爲 後 用 之,是率天下而路也。 勞心者治人,勞力 有大人之事

也。 與,平聲。食,音嗣。 人者,見治 路,謂 奔 於 人 走道路 也。 食 〇此以下,皆孟 無時 人者, 休息 出 賦 也 税 治於 子言 以 給

> 夫、陶 非所 飢 皆古語, 公上也。食於人者,見食於人也。 ,小人無君子 以 冶 相 以 而 粟與械器 病 孟 也。 子 則 引 亂。 之也。 治 天 相易,乃 以 下者 君子 此 相易, 所以 豈 無 必 此 相 IE //\ 耕 濟 猶 四 旬 農 則 Ħ. 而

偪人。 天下。 中 注諸 之,舉舜 加 當堯之時,天下猶未平,洪水橫流 或 過其門而 焚之,禽獸 海 可 獣蹄 得 草木暢茂,禽獸繁殖 而敷治 决汝、漢、排淮、泗,而 而 食也。 不人,雖欲 鳥跡之道,交於中國。 逃 焉。 匿 當是 禹 舜使益掌火,益 耕 疏 時 九 得 也,禹 五 河,瀹 乎? 穀不 注之江 八年 濟 登。禽 氾濫 堯 潔, 烈山 於外 一,然後 獨 澤 潤 於 憂 而

瀹,音藥。濟,子禮反。漯,他合反。〇天

■ 「民」,殘宋本、元甲本、司禮監本、吴本作「人」。

而

振

王

别

徒

教

E

此 漢 泗 水 盤 也。 獸多 也。 大也。 下 也。 濫 疏 水人 ,亦皆水名 謂 馬頰 横 迭興,漸次 通 四 禽獸 道,路 也 未 五穀,稻、黍、稷、麥、菽也。登,成 鬲津 流 也 决、排 江 水皆入于江,記者之誤 横流,不由 平 日 之貌 耳 分 敷,布 逃匿, 覆金, 也。 也。 皆 也。 瀹 除治 洪 汝、泗 獣蹄 暢 荒 也。 去其 然後 亦疏 日 九 據《禹 茂,長 其 至此 之世 胡蘇 河 則 道而 鳥跡 壅 益 禹 通 À 塞也。 盛 尚 之意。 貢》及今水路 生 淮 日 得 舜 散溢妄行也 交於 也 未盡平也。 民 徒 前 簡 施 臣 之害 駭, 也 治水之功。 名。 中 淮 繁殖 汝、漢、淮 日 濟、漯,二 國 自 潔 日 多矣 太史, 烈, 一,衆多 日 言 海 氾 鉑 熾 禽 熟 聖

后

稷教民稼穡

樹藝

Ŧi.

一穀,五穀熟

人之有道也

,飽食、煖衣、逸居

而 而 無 民 以 之。」聖人之憂民如此, 之直之,輔之翼之,使自 幼有序,朋友有信。 則 故聖人 樹,亦 言 五. 道之耳。 之性也。 稼穑; 辭,孟子因以 官名,棄爲之。 契,音薛。 司徒,官名也。 勞、來,皆去聲。 人 近 惇哉。」此 倫 於 勞者勞之,來者來之,邪者正之,枉者 禽 種 衣食足,然後得以 父子 、設官而教以 鷽。 也。 《書》 然 别,彼列 有親 之謂 無 藝 聖 爲堯號 教 曰 人 人之有道,言其皆有秉彜 然言教民,則 〇言水土平 君臣· 也。 則 殖也。 :「天敘 有 放 人倫 憂之, 反。 而 勲 亦放 也。 放 得 暇 有義,夫 曰:「勞之來之, 勲,本史臣 ,亦因其 契,亦舜 耕乎 長、 德,猶 有 逸 施 之,又從 使 典 怠 教化。 契 ,然後得以教 放,皆 亦 敕 惰 非並 婦 爲 惠也 固 臣 而 有 司

耕

矣。

名

也

后

有者

而

失之,

我

五

典

堯

之

逸怠惰而或失之。蓋命契之辭也。矣,又從而提撕警覺以加惠焉,不使其放直之,輔以立之,翼以行之,使自得其性

所以憂民者其大如此,則不惟不暇耕,而之憂民,非事事而憂之也,急先務而已。夫,音扶。易,去聲。○易,治也。堯、舜憂。夫以百畝之不易爲己憂者,農夫也。「堯以不得舜爲己憂,舜以不得禹、臯陶爲己「堯以不得舜爲己憂,舜以不得禹、臯陶爲己

得人難。 得人者謂之仁。是故以天下與人易,爲天下「分人以財謂之惠,教人以善謂之忠,爲天下

亦不必耕矣。

教化無窮矣,此其所以爲仁也。 陶,乃所謂爲天下得人者,而其恩惠廣大,限而難久。惟若堯之得舜,舜之得禹、皐限而難久。惟若堯之得舜,舜之得禹、皐郡人以善,雖去聲。○分人以財,小惠而已。

豈無所用其心哉? 亦不用於耕耳。巍巍乎有天下而不與焉!』堯、舜之治天下,堯則之,蕩蕩乎民無能名焉! 君哉舜也!

與,猶曰不相關,●言其不以位爲樂也。君哉,言盡君道也。巍巍,高大之貌。不與,去聲。○則,法也。蕩蕩,廣大之貌。

也。子之兄弟事之數十年,師 方之學者,未能或之先也。 楚産也,悦周公、仲尼之道,北學於中國。 吾聞用夏變夷者,未聞變於夷者也 也。 夏禮義之教也。 此以下,責陳相倍師而學許行也。 變於夷,反見變化於蠻 陳良生於楚,在中國之南,故北遊 變夷,變化蠻 夷之 彼所謂豪傑之士 死 人 而 也。 夷之人也。 遂倍之。 産,生 夏,諸 陳 良, 北 而

● 「曰」,司禮監本、吴本作「言」。

三四九

夏、子張、子游以有若似聖人,欲以所事孔子 揖於子貢,相嚮而哭,皆失聲,然後歸。 反,築室於場,獨居三年,然後歸。 昔者孔子没,三年之外,門人治任將歸,入 學於 之稱 言陳良用夏變夷,陳相變於夷 中 ,言其能自拔 或 也。 先,過 於流 也 俗 也。 豪傑,才德出 倍 也 他日,子 與 子貢 同 衆

杲。 是也。 之乾也。 江 任,平聲。 有若似聖人,蓋其言行氣象有似之者 而 檀弓》所記子游謂有若之言似夫子之類 無服也。任,擔也。 、漢水多 〇三年,古者爲師心喪三年,若喪父 所 皜皜 事 彊,上聲。 ,言濯之潔 孔 ,潔白貌。 子,所 也。 暴,蒲木反。 以 場,冢上之壇場也。 事 尚,加也。 秋日燥烈,言暴 夫子之禮 **皜**,音 言夫 如如 也。

> 子道 也 或 德明著, 日 . 此 光輝潔白 \equiv 語者,孟子贊 ·; 非 有 若 美 所 曾 能 子之 彷 彿

「今也南蠻鴃舌之人,非先王之道,子倍子之辭也。」

師

而學之,亦異於曾子矣。

之鳥。南蠻之聲似之,指許行也。 鴃,亦作鵙,古役反。○鴃,博勞也,惡聲

之,秋陽以暴之,皜皜乎不可尚

己。

事之, 彊曾子。

曾子曰

『不可。

江、漢以

濯

嚶嚶。出自幽谷,遷于喬木。」 《小雅·伐木》之詩云:「伐木丁丁,烏鳴

方且膺之,子是之學,亦爲不善變矣。 「《魯頌》曰:『戎狄 《魯頌》、《閟宫》之篇也。 按: 本號 之,亦斷章取義也 今此 也。 詩爲僖公之頌,而 舒 ,國名,近 是膺,荆、舒是懲。」周 楚 膺,擊也。 者 孟子以 也。 懲 周公言 ,艾也 荆,楚

多寡 五尺之童適 從許子之道 (相若; 同 則賈相若 麻縷 市 一,則市 絲絮輕 ,莫之或欺。 賈不 屨大小 重同 貮 同, 國中 則賈相若 布 則賈相若。 帛 無 長 僞。 短 同 五 雖 穀 則 使

賈

,音價。

下

同。

陳

相

又言許子之道

如

競爲濫惡之物以相欺耳。

也。 曰: 之道 相 什 惡 此。 許 「夫物之不齊,物之情也 ~,相率 ·伯,或 一,但以 行欲 有是 巨屨、小 蓋神農始爲市井,故許行又託 使 説 長短 而 相 市 也。 屨 爲僞者也 千 中 同 萬。 、輕重、多寡、大小爲價 五尺之童,言幼 所 賈,人豈 粥之物 子比而 。惡能 爲之哉? 從許 皆不論 同之,是亂 治國家?」 或 相倍 小 無 精粗 於神農 蓰 也 知 天下 也 子 美 或

也。 反。 夫,音扶。 孟 子言物之不齊,乃其自然之理,其有 惡,平 什、伯、千、萬,皆倍 蓰,音 聲。 師, 倍 又山 一倍 數 綺 也。 也。 反。 比 蓰, 五 比,必二 次也 倍

> 粗 同價,是使天下之人皆不肯 豈肯爲其大者哉? 猶 其 有大小也。 若 大屢、 今不 爲 論 小 其 精 屨 精 粗 同 ,使之 價 而 則

墨者 吾固 夷之,因徐辟 願見,今吾尚 而求 病 病 見孟 愈, 子。 我 且 孟子曰 往 見。 夷

子不來!」

辟,

音壁,又音闢。

〇墨者,

治墨

翟之道

夷子 思以 子墨者,墨之治喪 見矣。不直,則道 他日,又求見 者。 子稱疾,疑 葬其 易 夷,姓; 天下,豈 親厚,則 亦託辭以觀其意之誠 孟 之,名。 子。 以 是 不 爲 也 以 孟 一,以薄爲其 非 見,我且 所賤 徐辟, 是 子曰:「 而 事親 不 直 孟 貴也 之。 吾今則 道 子 也。 也 否 弟 ? 子。 吾 聞 夷 可 子 孟 夷 以 Щ

不見之見,音現。○又求見,則其意已誠

學 也。 者,故孟子因 棺 矣 正 於墨 三寸 也 故 易天下,謂移易天下之風俗也 因 莊子 氏 而 徐辟 無 而 日 椁。」 不 以 以 從 質之如 其教 之。 是墨之治喪,以 墨子生不 ,其心必有 此。 歌, 直 死 盡 無 言 所 薄 服 夷子 爲 不 以 安 道 相 桐

將 之一本,而夷子二本故 親其鄰之赤子乎? 日:「夫夷子信 無差等,施由 人『若保赤子』,此言何謂 徐子以告夷子。 入井,非赤子之罪 親 以爲 始。」徐子 夷子曰 彼有取爾也。 也。且天之生物也 人之親 也 -也? 以告孟子。 儒 其兄之子 者之道 之則以 赤子 ,爲 有匍匐 孟 爲 古之 愛 使 若 子

者之言也 夫,音扶。 〇「若保赤子」、《周書 ,以拒孟 下 子之非己。 夷子引之,蓋 同。 匍,音蒲。 · 康 語 又曰 欲 「愛無差等,施 援 匐, 》篇 儒 文,此 蒲 而 北 反。 於 儒

> 哉? 葬其親 其施之之序,姑自此始耳。非二 子之言,則是視其父母本無異於路 入井耳。 譬,本爲 本心之明有終不得而 由此立, 二,乃自 愛其兄子與鄰之子,本有差等。 由 親 始 然其於先後之間 之意 小民 而 然之理,若天使之然也。 且人物之生,必各本 則 推 皆 推 以 無知而 墨 所謂 及人,自有 而 附 犯法, 遁 於儒 息者,此其所以 猶 辭 也。 知 差等。 如 以 所擇 於父母 赤 釋 孟 《書》之取 子 子言 己 則 本 今如 故其 無 所 人,但 而 以 又其 人之 而 知 厚 愛 何 夷 無 而

受命而自覺其 非 也

之。 之誠是也,則孝子仁人之掩其 泚,中心達 委之於壑。 蓋上世嘗 其顙 有 於 有不葬其親者。 泚 他日過之,狐狸 面 目。 睨 而 蓋 不 歸 視。 反虆 夫泚 其 食之,蠅 梩 親 親 而 也 死 亦亦必 掩 蚋 之。 非 則 爲 舉 姑 有 嘬 人 而

於是歸一 爲親 起 矣。反,覆也。 見之而然也。 不能 也。 反。 不忍之心,而其哀痛迫切,不至若此之甚 泚然汗出之貌。❶ 螻蛄也。 山水所趨 本之意。 蚋,音汭。 音詣。爲,去聲。 也。 所以 切。 爲心之甚也。 不能不視,而又不忍正視,哀痛迫切 〇因夷子厚葬其親而言此,以深 掩其親者,必有其道 此掩其親者,若所當 而掩覆其親之尸,此葬埋之禮所由 蓋惟至親故如此,在他人則雖有 也。 嘬,攢共食之也。 上世,謂太古也。委,棄也。 嘬,楚怪反。 所謂一 蚋,蚊屬。姑,語助聲,或曰 虆,土籠也。 虆,力追反。 非爲人泚,言非爲他人 睨, 邪視也。 本者,於此見之,尤 泚, 顙,額也。 加 然, 此 梩,土轝也。 禮 不以薄爲 則孝子仁 框, 視,正視 反。 明一 力知 泚 睨

貴矣。

之矣。」
之矣。」
、夷子憮然爲間,曰:「命

易解 其所學之蔽,是以吾之言易入,而彼之惑 言孟子已教我矣。 貌。爲間者, 無, 音武。 也 間,, 有頃 如字。 Ż 蓋因其本心之明,以攻 間 ○憮然,茫然自失之 也 命,猶 教也。

孟子卷第五

「泚」,原脱,據元甲本、元乙本、司禮監本、吴本補

0

三五三

孟 子卷第六

朱熹集注

滕文公章句下

凡十章。

大則 陳 直尋。』宜若可爲也 代曰 以 王,小 :「不見諸 則 以霸 侯, 宜若 且《志》曰 小然; :『枉尺而 今一見之,

枉尺直 節 王,去聲。 也。 ,所屈者小,所伸 尋,猶 枉,屈 ○陳代,孟子弟子也。 屈己 也。 者大也 一見諸 直,伸也。八尺曰 侯, 而 可 小, 以致王 謂 小

孟 將殺之。 子曰:「 『志士不忘在溝壑,勇 昔 齊景公田 「招虞 人 士不 以 旌 ·忘喪其 不 至

其不可也

霸

待其 元, 孔 招 子奚取焉? 而 往 何哉 取 非其招不往 也 不

且夫枉尺而直尋者,以利言 言。 不恨。 也。 邪? 也。 而不 喪,去聲。 往,况君子,豈可不待其 顧 夫虞人,招之不以其物,尚 志 招大夫以 此以上,告之以 士 勇士輕生,常念! 也 固 窮,常念死 此二句,乃 旌,招虞 獵 也。 不可 無棺 戰 人以 虞人,守苑 孔 也。 鬭 往 招 子 皮冠。 椁,棄溝壑 見之意。 而 而 歎 死, 如 自 美 守 以 往 虞 喪其 死 元,首 囿之吏 利 見 人之 而 之 而 則

枉尋直尺而 雖 則爲之者,計其 枉尺直尋之非。 夫,音扶。 枉多伸 利,亦可爲與? 少 與,平聲。 而 有 利耳。 夫所謂枉 利, 亦將爲之邪? 〇此以下, 有計 小而 利 所 正 之 伸者 其 心, 甚言 所

則

大

稱

之詭遇, 可,日 簡 舍矢如破。」我不貫與小人乘,請 而獲十禽。 告王良。 昔者趙簡子使 子曰:『我使掌與女乘。』謂王良。 : 『吾爲之範我馳驅,終日不獲一,爲 嬖奚反 一朝 良曰:『請復之。』殭而後可 嬖奚反命曰: 『天下之良工 而獲十。 命曰:『天下之賤工也。』 王良 與嬖奚 《詩》云:「不失其馳 乘, 辭。 終 日 而 ,一朝 良 也。 或 不 不 以 獲

雅 正 時 爲之御也。 良,善御者也。嬖奚,簡子幸臣。 乘,去聲。 舍,上聲。 也。 獲 不肯, 彊之而後肯也 而 與 車 廢 禽遇 掌,專主也。範,法度也。 攻》之篇。 彊,上聲。 〇趙簡子,晉大夫趙 也。 復之,再乘 詭 遇 言奚不善射 而 言 後 御 女,音汝。 中 也。 者 也。 不 彊 朝,自晨至食 失其馳 以 而 鞅 詩 法馳驅 爲,去聲。 詭遇,不 與之乘, 後可,嬖 也。 驅 之 小 順 王

法,而射者發矢皆中而力,今嬖奚不能也

貫,習也。

矣,枉己者,未有能直人者也。」 陵,弗爲 御者且羞與射者比。 比,必二反。〇比,阿黨也。 也。 如 枉道 而 從 比 彼 而 得禽獸 何 若丘陵,言多 也 ? 雖若丘 且 子過

使不卹 其能 矣。」 輕其 也。 時,而進必 之矣。孔、孟豈不欲道之行哉?」 一一中節,欲 直 〇或曰:「居今之世,出 去就,是以孔、孟 〇楊氏 其 人 乎? 去就 以 日 正,以 其一一中節 :「何其不 而可 古之人寧道 以行道、孔、 至 終 雖 不 在 自 · 得 春秋、戦 之不 重 則 處 行 也 道 孟當 去 圃 一就 不 死 國之 得 先爲 枉 不 而 也。 必 行 不

一怒而諸侯懼,安居而天下熄。」景春曰:「公孫衍、張儀,豈不誠大丈夫哉

則說諸侯使相攻伐,故諸侯懼也。景春,人姓名。公孫衍、張儀,皆魏人。怒

乎? 戒,無違夫子!』以順爲正者,妾婦之道也。 孟子曰:「是 命之,往送之門,戒之曰:『往之女家,必敬 丈夫之冠 焉 也,父命之。 得 爲大丈夫 女子之嫁 乎? 子 未 也,母 學 禮 心

夫家,以 焉,於虔反。 竊 人,以顺爲 取 加冠於首日冠。 權 勢, 嫁爲 乃 IE 冠,去聲。女家之女,音汝 妾婦 道 歸 也。 也。 順從之道耳,非丈夫之 女家,夫家也。 夫子,夫也。 蓋言二子阿 諛苟 女子從 婦人内

大丈夫。」
「居天下之廣居,立天下之正位,行天下之大信居天下之廣居,立天下之正位,行天下之大

也

廣居,仁也。正位,禮也。大道,義也。與

盛。 其所 遂以 婦之道耳 國之時,聖賢道 節 民由之,推 也。 但見 得 爲大丈夫。 屈 於 ,何足道哉! 姦巧之徒,得志横行,氣焰 己 挫 其所得於人 也。 其 否,天下不復見其德業之 志 不知由君子觀之,是乃 淫, 也。 蕩 也。 其 何 心 叔 獨行 也 京 其道, 移 日 Ⅰ: 「戦 變其 守

周霄 出 君 仕。 則 疆 平。」 必 問 傳 載質。」 曰:「古之君子仕乎?」孟 Ħ 0 『孔子三月無 一公明 儀日 :『古之人,三月無 君, 則 皇皇如 子曰 也

出 如 魏 傳,直戀反。 國 有求 疆 也 載 無 質,所執 之者,將 而 君 弗得 謂 質,與 之意。 以 不 以 見 得 贄 見 人者,如 同。 仕 所 出 而 適 疆 下 事 , 謂 或 同。 士 君 之 則 失 也。 執 君 位 雉 周 而 皇 而 也 事 去

三月無君則弔,不以急乎?」

足弔乎?」 Ш. 以爲衣服。 不敢以祭。 《禮》曰 曰:「士之失 、衣服不備,不敢以祭,則不敢以宴,亦不 周霄問 『諸侯耕 也。 惟 犧牲不成,築盛不潔,衣服 位 以、已 士 無 也 助,以共築盛。 田 通,太也。 猶 ,則亦不祭。」性殺、器 諸 侯 之 後章放此 失 夫人蠶 或 家 不 備 繅, 也

日 韓受之,繅三盆手,遂布于三宫世婦,使繅 室,奉繭以示于君,遂獻于夫人。夫人副 廪,以供宗廟之粢盛。 秉耒以 盛,音成。 ○《禮》曰 為輔 士有 耕 黻文章,而 田 而 「諸! 「則祭, 繅, 庶 侯爲 人助 素 無 服 刀 藉 以 田 以 反。 終畝。 百畝, 使世婦 則 祀先王先公。」又 薦。」黍稷曰粢, Щ, 冕而青紘,躬 蠶于公桑 收而藏之御 武 永 反。

之。

古之人未嘗不欲仕也,又惡不由

「其道。

言,鑽穴隙相窺,踰牆相從,則父母、國人皆賤

在器 日 盛。 牲殺 性性 心特殺 也。 Ш 所 以

覆器者

出疆必載質,何也?」 周霄問 也。

出疆舍其耒耜哉?」

爲,去聲。

舍,上聲。

曰:「士之仕也,猶農夫之耕

也。

農夫豈

爲

母之心,人皆有之。不待父母之命、媒妁之 生而願爲之有室,女子生而願爲之有家。 如此其急也,君子之難 曰:「晉國亦仕國也,未嘗聞仕如此 仕,何 也 ?」曰:「丈 其急。 夫

不由其道而往者,與鑽穴隙之類 聲。 爲,去聲。 臣之國。 晉國,解見首篇。 霄意以孟子不見諸 妁, 音酌。 隙,去逆 仕 國,謂 侯爲 也。 反。 難 君子 惡,去 故 游

三五七

孟子卷第六

滕文公章句下

亂 家 也。 先 也 問 倫 而 言 古之君子 男以女爲室,女以 亦惡其不由 而 爲 亦不徇利而忘義 父母 者 仕 非 道。 否,然後 不 蓋君子 男爲家。 願 也 言此 其 男 雖 女之 以 妁, 風 潔 有 身以 切之 亦 室 媒

天下,不以爲泰,子以爲泰乎?」 則 食 彭 於 更問 諸 簞食不可受於人; 侯 曰:「後車數十乘,從者數百人,以傳 不以 泰乎?」 如其道 孟 子 \Box 則舜受堯之 非 其 道

也。泰,侈也。 ②彭更,孟子弟子節,音丹。食,音嗣。○彭更,孟子弟子更,平聲。乘、從,皆去聲。傳,直戀反。

言不以舜爲泰,但謂今之士無功而食人之曰:「否。 士無事而食,不可也。」

曰:「子不通功易事,以羨補不足,則農有餘

也

則子

食之乎?」

曰:「否。」曰:「

然則

子

日

有

於

此

毁

瓦

書

墁,

其

志

將

以

求

食

食

,則不

可

也

食於子。 粟,女有餘布; 何尊梓匠輪輿 王之道,以待後之學者, 於此 加 有人焉 子 輕爲仁義者哉?」 如通 之, 人則 而 則 不得食於子。 孝 梓 出 匠 則 輪 悌 興 守 皆 先 得

羡,延 而 交易其事。 八、興 積於無用 人人,車 面 反。 羨,餘 İ 也。 也 通 梓人、匠人,木工 也。 功易 事 有 謂 餘。言 通 人之 無 所 也 功 貿 輪 而

其志 且子食志乎? 爲道 티 : 求食; 音 與,平聲。 「梓匠輪輿,其 嗣 爲 也,其志亦將以 哉? 自彼 下同。 可 其 而 食 食功乎?」曰: 有功於 言,凡 而 孟子言: 志將以求 求 食、 有功者則當食之。 食與 子, 食志、 ? 口 自 食也。 食 「食志。」 食功之食,皆 我而言,固 **三**: 加 食之矣。 「子何以 君 子之

壁之飾 匠 既曰食功,則以士爲無事 墁,武安反。子食之食,亦音 輪 輿 也。 而 輕爲仁義者矣。 毁瓦畫墁,言無 而 功而 食者 嗣 「真尊 有害 〇墁 牆 也。 梓

惡 萬 而 章 伐之,則如之何?」 問 日 :「宋,小國 也,今將行王政,齊、 楚

惡 即 滅 此 滕伐薛,敗齊、楚、魏之兵,欲霸天下,疑 ,去聲。 時 也 〇萬章, 孟子弟子。 宋王偃嘗

老弱 以供 祀。 不 孟 以 子 (犠牲 饋食。 湯使 日 祀 無 :「湯居亳,與 以 也。』湯使遺之牛羊。 人問之曰 湯 供築盛 葛伯率其民 又 使 人問之曰:『何爲 也。』湯使亳]: [何 葛爲鄰 ,要其有酒食黍稻者 爲 不 祀? 葛伯 衆 葛伯食之,又 往 爲 不祀?」 日 放 之耕 而 無 不

> 奪之。《書》曰: 奪之,不授者殺之。 遺,唯 亮反。 放縱 《書》、《商書 其民,葛 饋食、酒食之食,音嗣。 無道,不祀先祖 季反。盛,音成。 ○葛,國名。 民 也。 0 「葛伯仇餉 仲虺之誥 授, 有童子以黍肉 伯, 與 也。 也。 爵 往爲之爲,去 要,平聲。餉、式 也 也。 亳衆,湯之民。 此 餉, 之謂 放而 仇 亦 育,殺 餉 也 饋 ,言與 不祀, 也。 而

餉者爲仇 也

富天下也,爲匹夫匹 爲其殺是童子 而征之, 婦 復雠 四海之内皆曰: 也。 非

爲,去聲。 下爲富而欲得之也 〇非 富 天下,言湯之心非以天

東 『湯始征,自葛載』,十一 面 而 征 ,西夷怨; 南 面 征 而 而 征 北 敵 於天下。 狄怨,

無

0 秋, 原作「夷」,據司禮監本、仿元本、吴本改

三 五 九

孟子卷第六

滕文公章句下

后來其無罰。」
民,如時雨降。民大悦。《書》曰:『徯我后,也。歸市者弗止,芸者不變。誅其君,弔其也。歸市者弗止,芸者不變。誅其君,弔其曰:『奚爲後我?』民之望之,若大旱之望雨

以 子實玄黄于匪以迎其君子,其小人簞食 黄,紹我周王 『有攸不惟臣,● 迎其 小人。救民於水火之中, 見休,惟臣 東 征 附于大邑周 綏 厥 士 女, 取其 匪 。』其君 虚漿 殘 厥 玄 而

其 同。 《書》文不類,今姑依此文解之。 臣,謂助紂爲惡,而不爲周 食,音嗣。 之言,孟子約其 士女以匪盛玄黄之幣,迎武王而 玄黄 、幣也。 ○按:《周 文如 紹,繼也 書 此。 ·武成》篇 然其 臣者。 ,猶言 有所 辭 事 匪 時 載 也 與與 事之 與 不 武 惟 飵 今 王

首

而

望之,

欲

以

爲君。

齊、楚

雖

何

人。小人, 也。 者誅之,而不爲暴虐耳。 者,以武王 其意,言商 之者皆見休也 也 休,美也 商 人而曰 謂細 能 人 捄 聞 我周 言武 臣附 民 周 民 也。 於水火之中,取 師之來,各以 王 王能 一,猶《商 ,歸服也。 君子,謂 順 天 書 休 其 孟 所 命 在 其 子又釋 類 謂 位之 殘 相 而 我 民 事 后 迎

殘,殺伐用張,于湯有光。』
「《太誓》曰:『我武惟揚,侵于之疆,則取于

「不行王政云 《太誓》,《周書》也。今《書》文亦小異。 有光 武王威武奮揚,侵彼紂之疆界,取其殘 而殺伐之功因 焉。 引 爾 此 以 以張大,比於湯之伐桀,又 苟行王政,四海 證 上文取其 八殘之義。 之内皆 賊 駆

■「惟」,司禮監本作「爲」。

心 死。 强弱之勢言之,是可畏而已矣。」 也 宋實不能行王政,後果爲 , 尚何强國之足畏哉? 則天下皆將歸往之,恨其征伐之不早 〇尹氏 曰:「爲 國者能 苟不自治,而 齊所滅,王 自治 而 得民 偃走 以

與,平聲。 語 語也。 齊 人語 咻, 莊嶽 音休。 也 ,齊街里名也。 傅, 〇戴 教 也。 不勝, 咻, 宋 楚,楚語 讙 臣 也。 也。

孟子卷第六

滕文公章句

也。此先設譬以曉之也。

三所者,長幼卑尊,皆薛居州也,王離與爲不 在王所者,長幼卑尊,皆薛居州也,王離與爲不 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。○居州,亦宋臣。言小人衆而 是,上聲。一次,以表言,以表言。

不爲臣,謂未仕於其國者也,此不見諸侯「古者不爲臣不見。

「段干木踰垣而辟之,泄柳閉門而不内,是皆

之義也。

已甚。迫,斯可以見矣。

辟,去聲。

内,與納同。

〇段干木,魏文侯

見此二人,而二人不肯見之,蓋未爲臣也。時人。泄柳,魯繆公時人。文侯、繆公欲

拜之。 得受於其家 也,而饋孔子蒸豚 陽貨欲 甚 當是時,陽貨 過 見 孔 其 列則往拜 子 也 而 迫,謂 惡 先 其門。 孔子亦矙其亡 無 贵 禮 求見之切 得 大夫有 陽 不見? 貨矙孔子之亡 賜 世 也 於 一,而 士,不 往

以己爲 先 不 家 孔 此 貨於魯爲大 欲見之見,音現。 來 在 也 子,欲召孔子來見己也。 又引孔子之事 而 加 禮 饋之,欲其來拜而 無禮也。 其門,大 也 夫,孔子爲 夫之門也 受於其家 以 惡,去聲。 明可見之節 士 一,故 見之也。 對使人拜受於 關, 惡無 職, 音勘 以 此 也。 窺 禮 物及 也 先,謂 畏 欲 O 其 陽 人 見

未同 是觀之, 而 日 言,觀 則君子之所 脅肩 其 赧,奴簡反。 諂 色赧 笑,病于夏畦。」子 赧 養 然,非 可 知 已矣。」 由 之所 **竦體**。 路 知 也。 日

虚業反

○脅肩

切而 也。 知,必不肯不俟其禮之至,而 由 合而强與之言也。 其勞過於夏畦之人也。 諂 孟子言由此二言觀之,則 此章言聖人禮義之中正 ,子路名。 笑,强笑。 不洪,不及者淪於污賤 夏畦,夏 言非 皆小 月治 人侧 己 畦 赧 所 之 赧 知 媚之態 人 未同 慚 也。 ,過之者傷於 甚惡之之辭 二子之所養 而 輒往見之也 而 而 可 言 也。 言 面 耻 赤之貌 爲 與人未 病,勞 此 也 口 i白

請 戴盈之曰:「什一,去關 去,上 止 輕之,以待來 田之法也。 也 聲。 〇盈之,亦宋大夫也 關市之征 年,然後已, 市之征,今兹 商賈之税 何 如 什 未

孟 子曰: : 『是非君子之道。』曰: 『請損之,月攘 「今有 人日 攘 其 鄰 之雞者, 或告

曰:「洚水警余。」洚水者,洪水也。

雞,以待來年,然後已。」

減也。○攘,物自來而取之也。損,

以異哉?知義理之不可而不能速改,與月攘一雞何知其非義,斯速已矣,何待來年?」

警,戒也。

此一

亂

也。

已也。 公都 也?」孟 子曰 子]: 「外 曰: 人皆 「予豊 稱 好 夫 辯 子 哉 好 辯, 子 敢 不 間 得 何

居之。

好,去聲。下同。

民無所定。下者爲巢,上者爲營窟。《書》「當堯之時,水逆行,氾濫於中國,蛇龍居之,化盛衰,人事得失,反覆相尋,理之常也。 化盛衰,人事得失,反覆相尋,理之常也。 一治一亂,氣

書·大禹謨》也。洚水,洚洞無涯之水也。上,高地也。營窟,穴處也。《書》,《虞下流壅塞,故水倒流而旁溢也。下,下地。淬,音降,又胡貢、胡工二反。○水逆行,

之菹。 阻既遠,鳥獸之害人者消,然後 使禹治之。 水由地中行,江、淮、河、 禹 掘 地 而注之海, 人得平土 漢 驅蛇龍 是 也 而 放 而 險

菹,侧 水之氾濫 生草者也。 魚反。 也。 地中。 ○掘 遠,去也。 地,掘 兩 涯之間 去壅 消,除也。 也 塞 也。 險 阻,謂 菹 此一 澤

沛澤多 使民 室以爲汙 「堯、舜既 治也 不得 而 池、民 衣食。 禽潤至。 没,聖人之道衰。 無 邪 所安息; 及紂之身,天下又大亂 說 暴 行又作,園 棄田 暴君代作, 以 囿 爲 、
汙
池 袁 壞宫 囿

澤, 類也。 壞 及約 暴君 音 水所鍾 怪 宫室,民居也。 而又一大亂 謂夏太康、孔 行,去聲。 也。 自 善、舜没至此,治亂非 也 甲、 沛,草木之所生也。 下 同 履癸、商武 沛 蒲 内 乙之 反。

哉,文王 犀、象而遠之。 廉於海 人,咸以 周公相武 隅 Œ 謨 而 無缺 ! 王,誅紂伐奄,三年討 戮 、天下大悦。 丕承哉,武王烈! 之。 滅國者 《書》 五. 一十,驅 其君, 曰: 『丕 佑啓我後 虎 教 驅飛
顯

篇 缺 皆紂黨虐民者 繼 紂爲虐者 相,去聲。 也。 壞 丕,大也。 也。 烈, 也。 此 奄,平聲。 光 也。 也。 飛 治也 顯 廉,紂幸臣 《書》、《周書 佑 明 也。 ○奄,東方之國 助 也。 謨,謀 也 • 啓, 也。 君牙》之 Ŧi. 開 + 助助 也。 承, 或

世衰道微,邪說暴行有作,臣弒其君者有

之,子弑其父者有之。

東遷之後,又一亂也。○此周有作之有,讀爲又,古字通用。○此周

室

是故孔子曰:『知我者其惟《春秋》乎! 罪「孔子懼,作《春秋》。《春秋》,天子之事也。

我者其惟《春秋》乎!』

聖王不作,諸侯放恣,處士横議,楊朱、墨翟 典、重 胡 也。 賊 肆 横 事 則 也。 則 氏 年南面之權 流 罪孔子者,以謂無 日 庸禮、命德、討 致治之法垂於萬世,是亦一 戚 存天理 :「仲尼作《春 知孔子者,謂 矣。」 愚 於既 使亂臣 謂 FL 滅 罪,其大要皆天子之 此 子 秋》 賊子 其位 爲 書之作,遏 作《春 後 以 禁其 一而託二 世 寓 秋 慮 王 欲 治也。 至 人欲 以 百四四 法。 而 討 深 不 遠 於 厚 蜀 得

^{■「}厚」,係避宋光宗趙惇諱,吴刻本作「惇」。

淵 率獸食人,人將相食。 著,是邪說誣民,充塞仁義也。 肉,廢有肥馬,民有飢色,野有餓莩,此率 無父無 而食人也。」楊、墨之道不息 爲我 盈 君,是 天下。 ,是無君也; 禽獸 天下之言,不歸楊, 也。 墨氏兼 公明儀曰: 愛,是無父 仁義充塞,則 ,孔子之道 則歸 『庖有肥 墨。 也 禽 不

其

邪說者不得作。

作於其心,害於其事;作於

陷 言 謂 父。 子愛無差等,而 愛身,而不復知 横、爲,皆去聲。 又相 邪 於禽獸 ,以明楊、 公明儀之言,義見首篇。 說 無父無 食 徧 也 ,而大亂將起,是亦率獸食人而 滿 君 墨道行,則人皆無父無君,以 ,妨於仁 此 則人道滅 視其至親無異 有致身之義,故無君。 莩,皮表反。 又一 亂 義 也 也。 絶,是亦禽獸 孟 ○楊朱但 充塞仁義 衆人,故 子引儀之 無 知 而

吾爲此懼,閉先聖之道,距楊、墨,放淫辭,

甚也。 事 體 以爲害尤甚。」 爲我疑於義,墨氏兼愛疑於仁,申、韓則 於申、韓; 是亦一治也。 驅而遠之也。作,起也。事,所行。政,大 爲,去聲。 陋易見。 自是滅息,而 也。 ,害於其政。 孟子雖 佛氏之言近理,又非楊、墨之比,所 故孟 復,扶又反。○閑,衛也。 佛氏之害,甚於楊、墨。 君臣父子之道,賴 〇程子曰:「楊、墨之害,甚 子止闢楊、 不得志於時,然楊、墨之害 聖人復起,不易吾言矣。 墨,爲其惑世之 以 蓋楊 不 港 H

說見上篇。承,當也。

承三聖者。 我亦欲正人心,息邪說 能 也,所以深致意焉。 深懼而力捄之。 水猛獸之災,慘於夷狄篡弒 孔子也。蓋邪說横流 者,說之詳也。 行、好,皆去聲。 真知其所以不得已之故哉 豈好辯哉? 承,繼也。 再言豈好辯哉,予不得已 ○詖、淫 然非知道之君子 距 ,壞人心術,甚於洪 予不得已也 詖 解 三聖,禹、周 行 之禍,故 見前 ,放淫辭 篇。 孟 公、 子 辭 以

能言距楊、墨者、聖人之徒也。」

此。 討之,不必士師也。 子既答公都子之問,而意有未盡,故復言 正矣,雖未必知道,是亦聖人之徒 言苟有能爲此 如《春秋》之法,亂臣賊 蓋邪說害正,人人得 距楊、墨之說者, 聖人救世立法之意, 耐 子,人人得 攻之,不 則 也 其 必聖 所 趨 而 孟

> 其切如 目之,是以常人之心而度聖賢之心也。」 以爲承三聖之功也。 及於後世。 於是非之原,毫釐有差 徒、亂賊之黨可知矣。 而 又唱 爲 此 不 故孟子辯邪說 必 若以 攻討之說者,其爲邪詖之 此意推之, 當是時 一,則害 〇 尹 如是之嚴,而 則 氏 ,方且以好辯 流 於 不 曰:「學者 能 生 民 攻討 自

有聞、目有見。」 食實者過半矣,匍匐往將食之,三咽,然後耳三日不食,耳無聞,目無見也。井上有李,螬三日不食,耳無聞,因無見也。井上有李,螬

荷取 匐 於,音鳥,下於陵同。 ○匡章、陳仲子,皆齊 ,言無力不能行 也。 於陵, 地 也。 名。 螬,音曹。 人。 咽 螬 吞 蠐 廉,有分辨,不 也 螬 咽, 也 音宴。

孟子曰:「於齊國之士,吾必以仲子爲巨擘

焉。雖然,仲子惡能廉? 充仲子之操,則蚓

而後可者也。

也。 然後可以爲廉耳。 若滿其所守之志,則惟丘蚓之無求於世, 中有大指也。 擘,大指 擘,薄厄反。 蚓,丘蚓也。 言齊 惡,平聲。 充,推 言仲子未 人 中 而滿之 有 蚓,音引。 仲 得爲 也。 子, 如衆 廉 操,所守 也,必 小指 巨

樹與? 所食之粟,伯夷之所樹 室,伯夷之所築與? 夫蚓,上食槁壤,下 是未可知 也。」 飲黄泉。 抑 與? 亦盗 抑亦盗 跖 仲子所居之 之所築 跖之所 無與?

來 泉,濁水也。抑,發語 夫,音扶。 或有非義 而自足,而仲 與,平聲。 則 是未能 子未 免居室食粟,若 ○槁壤,乾土 辭 如蚓之廉也 也。 言蚓 無 也。 所 求 從 於 黄

曰:「是何傷哉? 彼身織屨,妻辟纑以易

之也。」

辟,音壁。纑,音盧。○辟,績也。纑

練

麻也。

也。 之食之。 他 以兄之禄爲不義之禄而不食也,以兄之室爲 用是鶃鶃者爲哉?』他日,其母殺是鵝 不義之室而不居也,辟兄 曰:「仲子, 日歸,則有饋其兄生鵝者,己頻頗 出而哇之。 其兄自 齊之世家 外至,曰:『是鶃 也。 離 兄戴,蓋禄 母、處於於陵。 鶃 萬 也 之 」,與 悪悪 鍾 肉

其兄受饋爲 己,仲子也。 采於蓋,其入萬鍾 哇,音蛙。○世家,世卿之家。 蹙同,子六反。 蓋,音閣。辟, 不義也。 鶃 音避。 鶃, 恶, 也。 鵝 平聲。 哇,吐之也 聲 頻,與 也。 歸, 自於陵歸 、顰同。 頻願 鶃, 兄名戴 魚 而 一反。 願, 言 也。 與

「以母則不食,以妻則食之,以兄之室則弗

言中子从母之食、己之香爲下食而下食下若仲子者,蚓而後充其操者也。」居,以於陵則居之。是尚爲能充其類也乎?

贵 兄離母,無親戚、君臣、上下,是無人倫也 食之居之, 豈爲能充滿其操守之類者乎? 人之所以爲大者,以其有人倫也。 得爲廉耳,然豈人之所可爲哉? 必其無求自足如丘蚓然,乃爲能滿其 之類耳。今仲子於此則不食不居,於彼則 所居之室,既未必伯夷之所爲,則亦不義 居,其操守如此。至於妻所易之粟、於陵 言仲子以母之食、兄之室爲不義而不食不 曰:「天之所生,地之所養,惟人爲大。 有無人倫 而可以爲廉哉?」 仲子避 范 志 氏 而

孟子卷第六

「惟」,原作「無」,據司禮監本、吴本改。

0

孟子卷第七

朱熹集注

離婁章句上

凡二十八章。

矩,不能成方員,師曠之聰,不以六律,不能 孟子曰:「離婁之明,公輸子之巧,不以 五音, 堯、舜之道, 不以仁政, 不能平治 規

方之器也。 人也。規,所以爲員之器也。矩,所以爲 離婁,古之明目者。公輸子,名班,魯之巧 六律,截竹爲筩,陰陽各六,以節五音之上 黄鍾、太蔟、姑洗、蕤賓、夷則、無射 師曠,晉之樂師,知音者也。

政者,治天下之法度也。」 ○范氏曰:「此言治天下不可無法度,仁

爲陽;

大昌、夾鍾、仲昌、林鍾、南吕、應

鍾,爲陰也。

五音:

宫、商、

、角、徴、

羽 也

今有仁心仁聞而民不被其澤,不可法於後

世者,不行先王之道也。

故 羊易之,可謂有仁心。 聞,去聲。○仁心,愛人之心也。 故何哉? 時,齊國不治,武帝之末,江南大亂。其 天下知其慈仁,可謂有仁聞。然而宣王之 素,宗廟以麪爲犧牲,斷死刑必爲之涕泣 也。范氏曰:「齊宣王不忍一牛之死,以 有愛人之聲聞於人也。先王之道,仁政是 也。」 有仁心仁聞而不行先王之道 梁武帝終日一食蔬 仁聞者

故曰:徒善不足以爲政,徒法不能以自行。 徒,猶空也。 有其心,無其政,是謂徒善,

子卷第七 離婁章句上

平價 有 麟趾》之意 爲 其政, 政須要有綱 ,皆不可 無其 ,然後可以行《周官》之法度。」 闕。二 心,是謂徒法。 紀文章 圃 又曰:「必有《關 謹權 審量 程子嘗言: 讀法 雎》、

法而過者,未之有也 詩》云:『不愆不忘,率由舊章。』遵先王之

IE

謂

此

也

者,以其循 循也。章,典法也。所行 詩》、《大雅·假樂》之篇。 用舊 典故 也 不過差、不遺忘 愆,過 也。 率

員平直,不可 聖人既竭目 不忍人之政,而仁覆天下矣。 正五音,不可 勝用 力焉,繼之以規矩準 勝 也; 用 既竭 也 9 既 耳 竭 力 心 焉 繩 思焉 ,繼之以 以以 爲方 繼

直。 勝 心 思之力,然猶以爲未足以 平聲。 覆,被 也。 準, 此 所以爲平。 言 古 之聖 **徧天下、及後** 人 既既 繩,所 竭 以 耳 目 爲

> 世,故制爲法度以 繼續之, 則其用不 窮 而

仁之所被廣 矣。

政不因先王之道, 一故曰: 爲高必因 丘 可謂智乎? 陵,爲下必因][[澤。 爲

此,論以仁心仁聞行先王之道。」 力少而 丘 陵本高,川澤 惟仁者宜 成 功多矣。 在 本下,爲高下者因之,則 高 位。 鄒氏 不仁而 티 : 自 在 高 位 一,是 至 用

播其惡於衆也 是以

信度, 「上無道揆也,下無法守 仁者,有仁心仁聞 王之道者也。 君子犯義, 播惡 小人犯刑,國之所 而 於 能 衆 也 擴 ,朝不信道,工 謂 而充之,以 貽患於下 存者 行先 也 不

朝 音潮。 〇此言不仁而在高位之禍也。 幸

也。

⁰ 被」下,司禮監本、吴本有「者」字。

悦從之貌。

言天欲顛覆周室,羣臣無得泄

下無學,賊民興,喪無日矣。 田野不辟,貨財不聚,非國之害也。 故曰:城郭不完,兵甲不多,非國之災也, 道,義 此六者,其國必亡。 君子、小人,以位而言也。 謂以法度自守。工,官也。 揆,謂以義理度量事物而制其宜。 下無法守。 無法守,則工不信度而小人犯刑。 理 也。 無道揆,則朝不信道而君子犯 揆, 度 其不亡者,僥倖而已。 也。 法, 由上無道揆,故 度,即法 制 度 上無禮 也。 法 也。 有 道

曰:「自是以惟仁者至此,●所以責其君。」以教民,下不知學,則易與爲亂。鄒氏辟,與闢同。喪,去聲。○上不知禮,則無

雅·板》之篇。蹶,顛覆之意。泄泄,怠緩蹶,居衛反。泄,弋制反。○《詩》,《大

泄然不急救正之。

泄泄,猶沓沓也。

沓,徒合反。○沓沓,即泄泄之意。

蓋

孟

事君無義,進退無禮,言則非先王之道者子時人語如此。

雅, 祗毀也。

吾君不能謂之賊。」 「故曰:責難於君謂之恭,陳善閉邪謂之敬,

者,敬君之至也。 禁閉君之邪心,唯恐其君或陷 堯、舜之君者,尊君之大也。 范氏曰:「人臣以難事責於君,使其君爲 以告者,賊害其君之甚也。」〇鄒 自《詩》云『天之方蹶』至此,所 謂其君不能行善道 開陳善道 於有 以 氏 過 責 之地 而 日 其 以 不

■「惟」,原脱,據元甲本、司禮監本、吴本及上文補。

其責也。」○鄒氏曰:「此章言爲治者,當有仁臣。」○鄒氏曰:「此章言爲治者,當有仁

至也。 孟子曰:「規矩,方員之至也;聖人,人倫之

「欲爲君盡君道,欲爲臣盡臣道,二者皆法爲方員之理,猶聖人盡所以爲人之道。至,極也。人倫,説見前篇。規矩盡所以

民者也。不以堯之所以治民治民,賊其堯、舜而已矣。不以舜之所以事堯事君,不

員之極,此孟子所以道性善而稱堯、舜也。法堯、舜以盡君臣之道,猶用規矩以盡方

舜,則慢君賊民而不仁矣。二端之外,更法堯、舜,則盡君臣之道而仁矣,不法堯、

孔子曰:"道二:"仁與不仁而已矣。"

無他道。出乎此,則入乎彼矣,可不

謹哉?

能改也。 削。名之曰『幽」、『厲』,雖孝子慈孫,百世「暴其民甚,則身弒國亡,不甚,則身危

或

謂也。」
「《詩》云『殷鑒不遠,在夏后之世』,此之

人以幽、厲爲鑒也。 者,近在夏桀之世。而孟子引之,又欲後 《詩》、《大雅·蕩》之篇。言商紂之所當鑒

● 「政」,仿元本作「道」。

也以不仁。

得之;桀、紂、幽、厲以不仁失之。三代,謂夏、商、周也。禹、湯、文、武以仁

「國之所以廢興存亡者亦然。

國,謂諸侯之國。

言必死亡。

今惡死亡而樂不仁,是猶惡醉而强酒。」

章之意而推言之也。 一章之意而推言之也。 一章之意而推言之也。

其智, 禮人不答, 反其敬。 孟子曰:「愛人不親, 反其仁, 治人不治, 反

治人之治,平聲。不治之治,去聲。○我

未至也。智、敬,放此。 愛人而人不親我,則反求諸己,恐我之仁

歸之。 歸之,其身正而天下

敬也。如此,則其自治益詳,而身無不正是也。反求諸己,謂反其仁、反其智、反其不得,謂不得其所欲,如不親、不治、不答

解見前篇。○亦承上章而言。 《詩》云:『永言配命,自求多福。』」

矣。天下歸之,極言其效也

所謂「自天子至於庶人,壹是皆以修身爲下之本在國,國之本在家,家之本在身。」下之本在國,國之本在家,家之本在身。」本乎身也。此亦承上章而言之。《大學》本乎身也。此亦承上章而言之,而又以家本乎身也。此亦承上章而言之。《大學》本乎身也。此亦承上章而言之。《大學》本乎身也。此亦承上章而言之。《大學》

本」,爲是故也。

故沛 之所 孟 子 貌。 爲 氏 之難服者先服,而無一 服 此 服 也 無 怨怒也。 巨 而 日:「 前 得罪於羣臣 ,而患吾身之不修。 或 室 然德教溢乎四 慕 曰 患甚矣。 亦承上章 心悦 溢 0 吾德教之所 一、充滿 素所 戰 誠服 或 爲 臣大家也。 麥丘邑人祝齊威公曰: 慕 政 國之世,諸 一而言。 然或者不修其本而遽欲勝之, 取 之 也。 不 之謂 信 百姓。」意 難 海 施 蓋巨室之心,難以力服 也。 不 蓋 今既悦 國之所慕 得罪, 侯失德 可以無遠 得 君子不患人心之不 人之不服矣。 吾身既 沛然,盛大 罪 蓋 謂 於 服 如 身不 巨室。 ,巨室擅 ,天下慕之, 則 修,則 此。 而不至矣。 流 或 願主 正 慕, 人心 人皆 行 而 巨室 〇林 之 向 君 取

> 所謂 言 服 則 朝廷之力能 之德教 未必 其 ,惟務修德 心故爾」, 『韓洪 無 能 所 勝 興 留 制 而 疾 以 政此 礙 其 適 討賊 服 可, 以 死命,特以 其 類 取禍。 以及乎天下矣。 ●承宗斂手削 心。 也]° 彼既 故 處置 孟 悦 子推 得 服 地 裴度 則 本 非 吾 而

也,順天者存,逆天者亡。賢。天下無道,小役大,弱役强。斯二者天孟子曰:「天下有道,小德役大德,小賢役大

而已。天者,理勢之當然也。小。天下無道,人不修德,則但以力相役小。天下無道,人不修德,則但以力相役有道之世,人皆修德,而位必稱其德之大

❷ 「政」,吴本作「正」。

也。』涕出而女於吴。

等这而以女與之。 等之國也。景公羞與爲昏而畏其强,故 等之國也。景公羞與爲昏而畏其强,故 等之國也。景公羞與爲昏而畏其强,故 等之國也。景公羞與爲昏而畏其强,故 等之國也。景公羞與爲昏而畏其强,故 等之國也。景公羞與爲昏而畏其强,故

耻受命於先師也。「今也小國師大國而耻受命焉,是猶弟子而

得也。 效大國之所爲者,而獨耻受其教命,不可 言小國不修德以自强,其般樂怠敖,皆若

小國七年,必爲政於天下矣。「如耻之,莫若師文王。師文王,大國五年,

天下雖無道,然修德之至,則道自我行,而五年、七年,以其所乘之勢不同爲差。蓋政,布在方策,舉而行之,所謂師文王也。此因其愧耻之心而勉以修德也。文王之此因其愧耻之心而勉以修德也。文王之

皆當思其作爲如何,乃有益耳。」年,聖人度其時則可矣。然凡此類,學者大國反爲吾役矣。〇程子曰:「五年、七

夫國君好仁,天下無敵。』 膚敏,裸將于京。』孔子曰:『仁不可爲衆也。命,侯于周服。 侯服于周,天命靡常。殷士尽,矣严,因,

○《詩》、《大雅·文王》之篇。孟子引此詩
○《詩》、《大雅·文王》之篇。孟子引此詩及孔子之言,以言文王之事。麗,數也。 古之孫子衆多,其數不但十萬而已。上帝 商之孫子衆多,其數不但十萬而已。上帝 商之孫子衆多,其數不但十萬而已。上帝 商之孫子衆多,其數不但十萬而已。上帝

● 「灌」,殘宋本、仿元本作「貫」。

也。 云爾 大 德故 不能當之。 裸獻之禮 于 讀 周 不可爲衆,猶 矣。 此 也 詩, 是以商 ,助王祭事于周之京師 所以 故國 而言有仁者則雖有十萬之衆, 然者 君 士之膚大而 所 好仁,則必無敵於天下 ,以天命不常,歸 謂 難 爲 敏 兄 達者 難 也。 皆執 爲 孔子 于有 弟

亡

國敗家之有

以濯?」」
「今也欲無敵於天下而不以仁,是猶執熱而「今也欲無敵於天下而不以仁,是猶執熱而

天命在我 言 持熱物,而 雅 大國 耻受命於大國,是欲無敵於天下 不能 0 桑 而不師文王 自 柔 强 》之篇。 不以水自 則 聽 ,是不以仁也。 逝,語 天 八所命; 濯其 辭 手乎? 也。 修德行仁,則 言誰 《詩》,《 也; 此 能 乃 大 章 執 師

> 其 孟 子曰 菑 ,樂其所以亡者。 :「不仁者可與言哉? 不仁 而 可 安其 與言 危 則 而 利 何

者 於敗亡也 亂至於如此,所以 仁之人,私欲 亡者,謂荒 菑 ,不知其爲危菑而反以爲安利也 ,與灾同。樂,音洛。 淫暴虐,所以致亡之道也。不 固 蔽,失其本心,故其 不可告以忠言 〇安其危 顛 利 而 卒 倒 所 其 菑 至 錯 以

纓;滄浪之水濁兮,可以濯我足。』「有孺子歌曰:『滄浪之水清兮,可以濯我

「孔子曰:「小子聽之! 清斯濯纓,濁斯濯浪,音郎。○滄浪,水名。纓,冠系也。

足矣,自取之也。」

通,無非至理,此類可見。
言水之清濁,有以自取之也。聖人聲入心

「夫人必自侮,然後人侮之,家必自毀,而後

人毀之,國必自伐,而後人伐之。

夫,音扶。 ○所謂自取之者。

可活。」此之謂也。」 《太甲》曰: 『天作孽,猶可違, 自作孽,不

之來,皆其自取。 失之幾,不存則無以辨於存亡之著。 解見前篇。 〇此章言心存則有以審夫得 禍福

爾也 矣,得其心有道,所欲與之聚之,所惡勿施 得天下矣,得其民有道,得其心,斯得 其民者,失其心也。得天下有道,得其民,斯 孟子曰:「桀、紂之失天下也,失其民也,失 民

然。民之所惡,則 惡,去聲。○民之所欲,皆爲致之,如聚斂 莫不欲富,三王厚之而 「人情莫不欲壽,三王生之而 勿施於民。 不困,人情莫不欲 不傷 **鼂**錯 人情 所 謂

> 安,三王扶之而不危,人情莫不欲逸,三 王節其力而 不盡 」,此類之謂 也。

「民之歸仁也,猶水之就下、獸之走 演 地

走,音奏。〇壙,廣野也。言民之所以歸

乎此,以其所欲之在乎此也

故爲淵歐魚者,獺也,爲叢歐爵者,鸇也

爲湯、武歐民者,桀與紂也。

爲,去聲。 歐,與驅 同。獺,音闥。 與

魚者也。 雀同。鸕,諸延反。○淵,深水也。 叢,茂林 也。 鸇,食雀者 也。 獭,食

民之所以去此,以其所欲在彼而 所畏在

「今天下之君有 好仁者, 則諸侯皆爲之歐矣。

此也。

雖欲無王,不可得已。

好、爲、王,皆去聲。

苟爲不畜,終身不得。 「今之欲王者,猶七年之病求三年之艾也 苟不志於仁,終身憂

辱,以陷於死亡。

謂 《詩》云:『其 也。 辦,™然自今畜之,則猶或可及。不然, 善。 病 王 日益深,死日益迫,而艾終不可得矣。 去聲。 夫病已深而欲求乾久之艾,固 〇艾,草名,所 何能 淑,載胥及溺。」此之 以灸者,乾 卒 久 則 難 益

則相引以陷於亂亡而已。則也。胥,相也。言今之所爲,其何能善,則也。胥,相也。言今之所爲,其何能善,

身不能居仁由義,謂之自棄也。不可與有爲也。言非禮義,謂之自暴也,吾孟子曰:「自暴者,不可與有言也,自棄者,

見信也。自棄其身者,猶知仁義之爲美,知禮義之爲美而非毀之,雖與之言,必不暴,猶害也。非,猶毀也。自害其身者,不

進也。 則無 不能 但溺 所謂下愚之不移也。」 以不爲,雖聖人與居,不能化而 不可移者,雖昏愚之至,皆可 勉 於怠惰,自謂必 惟自暴者拒之以不信,自棄者絶之 也。 程子曰 不能行,與之有爲,必 :「人苟以善自治 人也。 漸 磨 此 而

曠安宅而弗居,舍正路而不由,哀哉!」 仁,人之安宅也;義,人之正 行,無人欲之邪曲 仁宅,已見前篇。 聖賢之深戒,學者所當猛省也。 舍,上聲。 言道本固 有 〇曠,空也。 而人自絶之,是可哀已。❷ 義者,宜也,乃天理之當 一、故曰 由,行也。 正路 路 也 〇此章 此

已」,殘宋本、司禮監本、吴本作「也」。

[「]卒難」,仿元本、吴本作「難卒」。

難。● 人人親其親、長其長而天下平。」 孟子曰:「道在爾而求諸遠,事在易而求之

其長,則天下自平矣。 遠 甚易,而道初不外 爾、 且 親、長在人爲甚爾,親之、長之,在人爲 邇,古字通 難而反失之。 用。 是也。 但人人各親其親、各長 易,去聲。 舍此 而它求,則 長,上 聲。

君

,以下則可以得民矣。」

悦親 治也 道 矣"信於友有道,事 孟子曰:「居下位 ,不明乎善,不誠其身矣。 有道,反身不誠,不悦於親 獲於上有道,不信於友,弗獲 而 親 不獲於上,民不 弗悦 ,弗信於 矣;誠 可得 友 身有 於 矣 E 而

真 實 身不誠,反求諸身而其所以爲善之心 獲於上,得其上之信任也。 也。 知 善 不明乎善,不 之所 在 也 能 游 即 氏 事 誠,實也。 以 日 窮 理, 欲 誠 無 有 反 其 以 不

則順乎親,以外則信乎友,以上則可以得至於誠身,則安往而不致其極哉? 以内意,先致其知,不明乎善,不誠乎身矣。學

偽,人道之當然也。、人道之當然也。思誠者,欲此理之在我者皆實而無偽,天道之本誠者,理之在我者皆實而無偽,天道之本是故誠者,天之道也,思誠者,人之道也。

至,極 曾子 本,而明善又爲思誠之本。 章述《中 獲乎上、信乎友、悦於親之類是也。」○ 也。 而 ·庸》孔子之言,見思誠 孟 子 所受乎子思者,亦與《大學》 楊氏 티 : -動,便是驗 乃子 爲脩身之 恵 所聞於 處,若 此

■「之」,司禮監本作「諸」。

相表裏,學者宜潛心焉。

興,曰 孟子曰:「伯夷辟紂,居北海之濱,聞文王作 太公辟紂,居東海之濱,聞文王作興,曰: 盍歸乎來! 名尚。 老、皆無凍餒。故伯夷、太公來就其養,非 得專征伐,故 西伯,即文王也。 辟,去聲。 『盍歸乎來 文王發政,必先鰥寡孤獨,庶人之 ○作、興,皆起也。 吾聞 稱 西伯。 西伯善養老者。』 紂命爲西方諸侯之長 吾聞西伯善養老者。」 太公,姜姓,吕氏 盍,何不 也

皆尊,如衆父然。既得其心,則天下之心焉,於虔反。〇二老,伯夷、太公也。大爱歸之也。天下之父歸之,其子焉往?

求仕也。

辨,學者又不可以不察也 下」者,暗與此 不 能 外矣。 蕭 何 合,●但其意 所 謂 「養 民 致賢, 則有公私之 以 圖 天

天下矣。」 「諸侯有行文王之政者,七年之内,必爲政於

中矣。 七年,以小國而言也。大國五年在

其

鳴鼓而攻之可也。』 賦粟倍他日。孔子曰:『求非我徒也,小子孟子曰:「求也爲季氏宰,無能改於其德,而

之也。鸣鼓而攻之,聲其罪而責止。賦,猶取也,取民之粟倍於他日也。京就,猶取也,取民之粟倍於他日也。

● 「暗」上,司禮監本有「其意」二字。

野 者也 食人肉,罪不容於死 由 此觀之,君不行仁政而富之,皆棄於孔 争城以戰,殺 况於爲之强戰? 人盈 城。 争地以 此所謂率土 戦 殺 人盈 地 而 子

肉。 之也。」 人,使其肝腦 財 耳,而夫子猶惡之。 去聲。 其罪之大,雖至於死 〇林氏日 塗 地,則是率土地而 0 「富其君者, 况爲土地之故 猶 不足 食人之 奪 以 而 民 容 殺 之

任土地者次之。」「故善戰者服上刑,連諸侯者次之,辟草萊、

如李悝盡地力、商鞅開阡陌之類也。任土地,謂分土授民,使任耕稼之責,連結諸侯,如蘇秦、張儀之類。辟,開墾辟,與闢同。○善戰,如孫臏、吴起之徒。

僞者。

孟子曰:「存乎人者,莫良於眸子。眸子不

正,則眸子眊焉。 能掩其惡。胸中正,則眸子瞭焉;胸中

木

而昏。 也。 目 蒙目不明之貌。 眸,音牟。 一故胸 眸子,目瞳子也。 中正 瞭,音了。 則 神精 蓋人與物接之時,其神 眊,音耄。 而 瞭,明也。 明,不 Ė 眊者 則 良, 神 散 在

聽其言也,觀其 匿矣。 心之所發,故並此以觀 焉,於虔反。 然言猶可 廋,音搜。 眸子,人焉廋哉?」 以 僞 爲,眸子則有 則 ○ 廋,匿 人之邪 也。 īF 不容 言亦 不 口

可以聲音笑貌爲哉?」 人之君,惟恐不順焉,惡得爲恭儉? 恭儉豈孟子曰:「恭者不侮人,儉者不奪人。侮奪

惡,平聲。○惟恐不順,言恐人之不順己。

聲音笑貌,僞爲於外也。

禮也,嫂溺,援之以手者,權也。」曰:「嫂溺不援,是豺狼也。男女授受不親,曰:「禮也。」曰:「嫂溺,則援之以手乎?」淳于髡曰:「男女授受不親,禮與?」孟子

者也。權而得中,是乃禮也。 也。權,稱錘也,稱物輕重而往來以取中也。權,稱錘也,稱物輕重而往來以取中也。權,稱廷受,以遠别也。援,救之與,平聲。援,音爰。○淳于,姓,髡,

之,不可守先王之正道也。 言今天下大亂,民遭陷溺,亦當從權以援曰:「今天下溺矣,夫子之不援,何也?」

言天下溺,惟道可以捄之,非若嫂溺可手子欲手援天下乎?」曰:「天下溺,援之以道,嫂溺,援之以手。

以濟時,枉道徇人,徒爲失己。 合,則先失其所以援之之具矣。是欲使我 援也。今子欲援天下,乃欲使我枉道求

公孫丑曰:「君子之不教子,何也?」

教我以正,夫子未出於正也。』則是父子相夷行,繼之以怒;繼之以怒,則反夷矣。 『夫子孟子曰:「勢不行也。教者必以正;以正不不親教也。

也。父子相夷,則惡矣。

夷,傷也。教子者,本爲愛其子也,繼之以夷,傷也。教子者,本爲愛其子也,繼之以夷,傷也。教子者,本爲愛其子也,繼之以夷,傷也。教子者,本爲愛其子也,繼之以

易子而教,所以全父子之恩,而亦不失其

大焉。」
「父子之間不責善。責善則離,離則不祥莫

當不義,則亦戒之而已矣。」則争之而已矣。父之於子也如何? 曰:則争之而已矣。父之於子也如何? 曰:責善,朋友之道也。○王氏曰:「父有争

五子曰:「事孰爲大? 事親爲大,守孰爲 太? 守身爲大。不失其身而能事其親者, 孟子曰:「事孰爲大? 事親爲大,守孰爲

足以爲孝矣。 其身,則虧體辱親,雖日用三牲之養,亦不守身,持守其身,使不陷於不義也。一失

守身,守之本也。 「孰不爲事? 事親,事之本也,孰不爲守?

孟子卷第七

離婁章句

正,則家齊國治而天下平。 事親孝,則忠可移於君,順可移於長。

問有餘,必曰『有』。 曾子,則可謂養志也 矣」,將以復進也。此所謂 有酒 曾子養曾皙,必有酒肉。將徹,必請 肉。 將徹,不請所與。 曾皙死 養 ,曾元養曾子,必 問 有餘,日『亡 體者也。若 所 與。

子也。 言之。 無。 此 父問:「此物尚有餘否?」必曰:「有。」恐 將徹去,必請於父曰:「此餘者與誰?」或 養,去聲。復,扶又反。〇此承上文事親 親意更欲與 但能養父母之口體而已。 其意將以復進於親 曾皙,名點,曾子父也。 曾子養其父,每食必有酒肉。 人也。 曾元不請 ,不欲其與 曾子則能承 所 曾元,曾子 與,雖有言 人也。 食畢

■ 「聞之」,元甲本、元乙本、司禮監本、吴本作「之聞」。

順父母之志,而不忍傷之也。

事親若曾子者,可 體。 有 至矣,而孟 當爲,無過分之事也。 言當如曾子之養志,不可如曾元但養 餘哉?」 〇程子曰:「子之身所能 子止 日 也。 可也 故事親若曾子可 贵 以曾子之孝 爲者 皆 爲 謂 所 口

不 大人 孟 心。」 義,君正莫不正。 子曰:「人不足與適 也。 君 者,物之所 適 非 一,音謫 間。 用 爲能格君心之非。 間,非也。 人之非 愚謂「間」字上亦當有「與」字。 惟有大人之德 間,去聲。 取 ,不足過 正也。 格,正也。」〇徐氏日 一正君而國定矣。」 也,政不 謪 《書》 君仁莫不仁,君義 ,則能格其君心之不 ○趙 行政之失,不足 氏曰:「適, 曰:『格 足間 也。 其 言人 格格 非 過 莫 惟

> 心存焉 昔者 勝其 者 人之非,知者能 之, 面孟子曰: 『我先攻其邪心, 心既 心之非,即害於政,不待乎發之於外也。 心之非,然後無所 不勝其去矣。 後天下之事可從而理也。』夫政事之失,用 德之人,正 正 「天下之治 ,非有大人之德,則亦莫之能也。」 以歸於正 更矣,人人而去之,後復用其 孟子三見齊 則事事而更之,後復有其事 己 亂,繫乎人君之仁與不仁 而 是以 而 或 更之,直者能 物 不正。 E 無不治矣。 輔相之職,必在乎格 IE 者也。 而 不言 而欲格君 諫 事 大人者,大)程子曰: 之。 門 心 人,將 ,將不 正 然 人 之非 一,而 耳。 疑 君 非

本、仿元本、吴本刪。本、仿元本、吴本刪。

孟子曰:「有不虞之譽,有求全之毀。」 自足而不復有進矣,此人之大患也。」

實,脩己者不可以是遽爲憂喜,觀人者不 毁,是謂求全之毀。言毀譽之言,未必皆 虞,度也。〇吕氏曰:「行不足以致譽而 偶得譽,是謂不虞之譽。 求免於毀而 反致

可以是輕爲進退。」

孟子曰:「人之易其言也,無責耳矣。」 必俟有責而後不敢易其言也。 易,去聲。〇人之所以輕易其言者,以其 於前,則無所警於後。非以爲君子之學, 未遭失言之責故耳。 蓋常人之情,無所懲 然此豈亦

子曰:「人之患在好爲人師 己,不得已而應之可也。 有爲而言之與? 好,去聲。 〇王勉曰:「學問有餘,人資於 若好爲人師,則

孟

樂正子從於子敖之齊。

者乎?」 出此言也,不亦宜乎?」曰:「舍館未定。」 乎?」曰:「先生何爲出此言也?」曰:「子 樂正子見孟子。 曰:「子聞之也,舍館定,然後求見長 來幾日矣?」曰:「昔者。」曰:「昔者,則我 子敖,王驩字。 孟子曰:「子亦來見我

早見長者,則其罪又有甚者焉。故孟子姑 以此責之。 樂正子乃從之行,其失身之罪大矣,又不 長,上聲。〇昔者,前日也。館,客舍也。 王驩,孟子所不與言者,則其 人可 知矣。

曰:「克有罪。」

陳氏曰:「樂正子固不能無罪矣。 然其勇

乎 子之罪人也。」 於受責如 ? 世有强辯 此,非 飾 好善 非 而篤信之,其能若是 聞 諫 愈甚者,又樂正

啜 孟 子謂 食耳。 也 餔 餔 ,食也。 博 樂正 我不 孤 此乃正其罪而切責之。 反。 意子學古之道,而以餔啜也 子曰 啜,飲 啜,昌悦反。 . 也。 「子之從 言其不擇所從,但求 於子敖來,徒 徒,但也。 ! 餔

孟 者之中,無後爲大。」 從 趙 子曰:「不孝有三,無後爲大。 仕,二也。 心, 陷親 氏曰:「於禮 不義,一 不娶無子,絶先祖祀,三也。 有不孝者三事,謂 也。 家貧親 老,不爲 阿 意曲 禄

舜不告而娶,爲無後也,君子以 爲無之爲,去聲。 〇舜告焉則不得娶,而 爲 猶告也。」

> 正矣。 告,言與告同 終於無後矣。 不告而娶,則天下之罪人也。」 得已者也。若父非瞽瞍,子非 正者萬世之常,權者一時之用。 可守,權非體道者不能 〇范氏曰:「天下之道,有正有權 也。 告者禮也,不告者權 蓋權 用 而 也。 得 中 蓋權出 大舜 則 常道人皆 也 一而欲 於不 離 猶 於

孟子曰: 也; 「仁之實,事親是也,義之實,從兄

是

爲爲仁之本,其意亦猶 心之發,最爲切近而精實者。 廣 仁主於愛,而愛莫切於事親;義主於敬 而敬莫先於從兄。 ()而其 實不越於 事親 故仁義之道,其用 此 、從兄之間 也 有子 以孝弟 蓋 良 至

斯二者是也,樂之實,樂斯二者,樂則 智之實,知斯二者弗去是 也; 禮之實,節 生

生意 固 天下之道,皆原於此。然必知之明而守之 惡可已也。 自知矣。〇此章言事親、從兄,良心真切, 生矣,謂和順從容,無所勉强,事親 明而守之固矣。節文,謂品節文章。 者、指事親、從兄而言。 樂斯、樂則之樂,音洛。 之意油然自生,如草木之有生意也。 ,然後節之密而樂之深也。 '則其暢茂條達'自有不可遏者'所謂 其又盛,則至於手舞足蹈而 知而弗去,則見之 惡,平聲。 〇斯二 、從兄 既有 樂則 不

言舜視天下之歸己如草芥,而惟欲得其親以爲人;不順乎親,不可以爲子。歸己猶草芥也,惟舜爲然。不得乎親,不可孟子曰:「天下大悦而將歸己。視天下悦而

始有違,尤人所難也。爲人蓋泛言之,爲而已。順則有以諭之於道,心與之一而未而順之也。得者,曲爲承順以得其心之悦

謂大孝。」
下化,瞽瞍厎豫而天下之爲父子者定,此之「舜盡事親之道而瞽瞍厎豫,瞽瞍厎豫而天

子則愈密矣。

也。 於天下,可傳於後世,非止一 所,而無不安其位之意,所謂定也。 孝,至於其親亦低豫焉,則天下之爲父者 所以事之者未若舜耳。 下之爲子者,知天下無不可事之親,顧吾 豫,悦樂也。 底,之爾反。 亦莫不慈,所謂化也。 底豫焉。《書》所謂「不格姦,亦允若」是 蓋舜至此而 瞽瞍至頑,嘗欲殺舜,至是而 ○瞽瞍,舜父名。底,致 有以順乎親 子孝父慈,各止其 於是莫不勉而爲 矣。 身一家之孝 是以 爲法 也 天

而已,此所以爲大孝也。○李氏曰:「舜 高子職,●不見父母之非而已。昔羅仲素 爲子職,●不見父母之非而已。昔羅仲素 聞而善之曰:『唯如此而後,天下之爲父 子者定。彼臣弒其君、子弒其父者,常始 於見其有不是處耳。』」

孟子卷第七

「共」,吴本作「其」。

0

朱熹集注

離婁章句下

凡三十三章。

條,東夷之人也。 孟子曰:「舜生於諸馮,遷於負夏,卒於鳴

諸馮、負夏、鳴條,皆地名,在東方夷服

之地。

文王生於岐周,卒於畢郢,西夷之人也。 岐周,岐山下,周舊邑,近畎夷。畢郢,近

餘歲。得志行乎中國,若合符節。 地之相去也,千有餘里,世之相後也,千有

孟子卷第八

離婁章句下

豐、鎬,今有文王墓。

左右相合以爲信也。

刻文字而中分之,彼此各藏其半,有故則

若合符節,言其

得行其道於天下也。

符節,以玉爲之,篆

得志行乎中國,謂舜爲天子,文王爲方伯,

同也。

先聖後聖,其揆一也。」 揆,度也。其揆一者,言度之而其道無不

後遠近之不同,然其道則一也。」

399

同也。○范氏曰:「言聖人之生,雖有先

子産聽鄭國之政,以其乘輿濟人於溱、洧。 而度之。 子産見人有徒涉此水者,以其所乘之車載 産,鄭大夫公孫僑也。溱、洧,二水名也。 乘,去聲。溱,音臻。 洧,榮美反。〇子

孟子曰:「惠而不知爲政。

惠 ,謂私恩小利。 政,則有公平正大之體

綱紀法度之施焉。

涉也。 「歲十一月徒杠成,十二月輿梁成,民未病

《夏令》曰:「十月成梁。」蓋農功已畢 於徒涉,亦王 用民力,又時將寒沍,水有橋梁,則民不患 十一月,夏九月 者。梁,亦橋 杠,音江。〇杠,方橋也。 政之一事也 也。 也。 輿梁, 周十二月,夏十月 可通車 徒杠,可 輿 者 通徒 ·, 可 也。 周 行

君子平其政,行辟人可也,焉得人人而

辟,與 如《周 政 不爲過。 (,則出 乘輿濟 禮 闢 行之際,辟除 閣 同。 之哉 况 或 人》爲之辟之辟。 焉,於虔反。 中 之水 當當 行 人,使之避己,亦 涉者衆,豈能 〇辟 言能平 辟除 也 其 悉

「故爲政者,每人而悦之,日亦不足矣。」

以大德,不以小惠」,得孟子之意矣。少,亦不足於用矣。諸葛武侯嘗言「治世言每人皆欲致私恩以悦其意,則人多日

視君 或 孟子告齊宣王曰:「君之視臣如手 孔氏曰:「宣王之遇臣下,恩禮衰薄,至 賤之,然猶有豢養之恩焉。 心 謂邈然無敬矣,故孟子告之以此。手足 昔者所進,今日不知其亡,則其於羣臣,可 矣,斬艾之 人,言無怨 讎之報,不亦宜乎?」 力,相待 如腹 君之視臣如土芥,則臣視君如 ,<u>'</u>; 體,恩義之至也。 而 無德也。 君之視臣 已矣,其 土芥,則踐踏之而 如 賤惡之又甚矣。 犬馬 或 則 如犬 人,猶 臣 足, 馬 寇讎 視 君 則 則 腹 於 如 臣 E 寇 輕

服矣?」 王曰:「禮,爲舊君有服,何如斯可

爲

去君 言太甚,故以 爲,去聲,下爲之同。 而未絶者 此禮爲問 ,服齊衰三月。」王 儀 禮》 日 疑 孟 以 子 之 道

此,則爲之服矣。 起,然後收其田里。此之謂三有禮焉。如 君使人導之出疆,又先於其所往,去三年不 君使不尊之出疆,不完於其所往,去三年不

里居,前此猶望其歸也。 其賢,欲其收用之也。三年而後收其田禄 導之出疆,防剽掠也。先於其所往,稱道

於民; 所往 寇讎 今也爲臣,諫則不行,言則不聽,膏澤不下 何服之有?」 有故 去之日,遂收其 而 去,則 君 搏 田 里。 執之,又極之於其 此之謂 寇讎。

猶 盈 極 也。 ,窮也。 子 對定公之意 〇潘 窮之於其 興嗣 日 也 所 孟 往 而 其 之 子告齊王之言 言有迹,不若 國 如 晉 錮 灓

> 其臣 之言蓋如此。」 孟子 深言報施之道,使知爲君者不可 氏 孔子之渾 曰:「君臣以 耳。 日 . 『王庶幾改之,予日望之。』君子 若君子之自處,則 然 也。 義合者 蓋聖賢 也 之 别 故 豈 處 如 孟 其 不 此 子 薄 以 爲 乎 禮 齊 ? 遇 王

罪 孟子曰:「 言 而 戮民 君子當見幾而 則 無 士可 罪而殺士,則大夫可 以 作, 徙。」 禍 已迫 ,則不能去矣 以 去; 無

孟子 以 張 異 耳。 氏 日 Œ :「君仁莫不仁,君義莫不 君 日 「此章 爲 急,此 重出。 章 直戒人君,義 然上篇主言人臣當 義 亦小

孟子曰:「非禮之禮,非義之義,大人弗爲。」

順理,因時而處宜,豈爲是哉?察理不精,故有二者之蔽。大人則隨事而

則賢不肖之相去,其間不能以寸。」有賢父兄也。如中也棄不中,才也棄不才,益子曰:「中也養不中,才也養不才,故人樂

樂,音洛。○無過不及之謂中,足以有爲 賢,謂中而才者也。樂有賢父兄者,樂其 賢,謂中而才者也。樂有賢父兄者,樂其 賢,謂中而才者也。樂有賢父兄者,樂其

所爲邪?」
爲,是以可以有爲。無所不爲者,安能有程子曰:「有不爲,知所擇也。惟能有不孟子曰:「人有不爲也,而後可以有爲。」

此亦有爲而言。 孟子曰:「言人之不善,當如後患何?」

能以是稱之。」
 分之外,不加毫末。非孟子真知孔子,不已,猶太也。○楊氏曰:「言聖人所爲,本孟子曰:「仲尼不爲已甚者。」

果在其中矣;主於信果,則未必合義。」○當不信果也。○尹氏曰:「主於義,則信期於信果,但義之所在,則必從之,卒亦未期於信果,但義之所在,則必從之,卒亦未

人爾。」 ●:「若不合於義而不信不果,則妄

極其大也。 極其大也。 極其大也。 極其大也。 極其大也。 極其大也。 極其大也。 極其大也。 一無偽而已。然大人之所以爲大人,正以其 是以擴而充之,則無所不知,無僞之本然。 是以擴而充之,則無所不知,無僞之本然。

以當大事。」
孟子曰:「養生者不足以當大事,惟送死可

事,而必誠必信,不使少有後日之悔也。 事親,舍是無以用其力矣。故尤以爲大常耳。至於送死,則人道之大變,孝子之

之深,則取之左右逢其原,故君子欲其自得自得之,則居之安,居之安,則資之深,資孟子曰:「君子深造之以道,欲其自得之也。

之也。」

也。 摇 也。 不值其所資之本 藉者深,則日用之間取之至近, 持循,以俟夫默識心通,自然而 言君子務於深造而必以其道者,欲其有所 藉也。左右,身之兩旁,言至近而非一處 不已之意。 造,七到反。 而 自 處之安固 得 自得於己,則 逢,猶值也。 者,乃自得也。 道,則其進爲之方也。 ○造, 詣 則所藉者深遠而 也。 原,本也,水之來 所 以 也。 〇程 有安排布置者,皆 處 深造之者,進 子曰 之者安 無所往 得之於己 無 「學不言 古 盡 資,猶 處 而 9 也 而 愐 所

●「○」,據仿元本補。

己 間 非 然後 自得 而已,終不足以得之也。」 也 可 以有得。 然必 潛 心積 若急迫 慮 優 求之,則是私 游 厭 飫 於 其

孟 言 子曰:「博學而詳説之,將以反説約也。」 非 説到至約之地耳。 誇多而 所以 欲其徒博,而亦不可以徑約也。 鬭 博學於文,而詳說其 靡 也,欲其融 蓋承上章之意而 會貫 《通,有 理 者 非欲以 以 反而 學

者,未之有也。」以善養人,然後能服天下。天下不心服而王以善養人,然後能服天下。天下不心服而王孟子曰:「以善服人者,未有能服人者也,

而人之嚮背頓殊。學者於此,不可以不人者,欲其同歸於善。蓋心之公私小異,王,去聲。〇服人者,欲以取勝於人,養

審

也。

當之。」 實不祥。不祥之實,蔽賢者

是,疑或有闕文焉。 故蔽賢爲不祥之實。」二説不同,未知孰 故蔽賢爲不祥之實。」二説不同,未知孰 以曰:「天下之言無有實不祥者,惟蔽賢

哉!』何取於水也?」徐子曰:「仲尼亟稱於水,曰:「水哉,水

之辭。○巫,數也。水哉水哉,歎美

進,放乎四海。有本者如是,是之取爾。孟子曰:「原泉混混,不舍晝夜,盈科而後

盈,滿也。科,坎也。言其進以漸也。放,混,湧出之貌。不舍晝夜,言常出不竭也。混

本

乎?

海,如 至 極 也。 也 人有實行,則亦不 言水有原本,不已 Ė 而 而 漸 漸進 進 以 以 至于 至 于

耻 涸 苟爲無本,七八月之間雨集,溝澮皆盈, 之。 也, 可 7 而待也。 故 聲 聞 過 情 君 子 其

則 以 取 聞 集,聚 氏曰:「孔子之稱水,其旨微矣。 將不繼也。 有躐等干譽之病,故孟子以是答之。」○鄒 人無實行,而 澮,古外反。涸,下各反。 聞 此者,自徐子之所急者言之也。 ,名譽也。 無 本 達 也。 之謂 告子張矣,0達者有本之謂也,聞 澮,田間 情,實也。 耻者,耻其無實 〇林氏曰:「徐子之爲 也。 暴得虛譽,不能長 然則 水道 學 也。 者其可以不 聞,去聲。 涸,乾 久 孟子 孔子嘗 也。 也。 人,必 獨 務 如 而 聲

> 去之,君子存之。 孟子曰:「人之所以異於禽獸者幾希,庶民

子知此一 有以全其所受之理也 之,則名雖爲人,而 之所以分,實在於此。 以全其性,爲少異耳。 地之理以爲性,同得天地之氣以爲形。其 幾希,少也。庶,衆也。 不同者, 而存之,是以戰 獨 人於其間 實 得形氣之正 無以 雖 衆人不知此 人物之生,同 兢 日 惕 異 少異, 勵,❷ 於 禽 獣 然 而 而 卒 而 人 能 得 物 能 君 去 天 有

物,事物也。明,則有以識其理也。人倫,義也。」

「孔」,司禮監本作「夫」。

0

) 「勵」,仿元本、吴本作「厲」。

天 者,君子也。 理 説 待存之而無不存矣。 之,所謂 行皆從此出。 有詳略之異。 、理也。 .義行,非行仁義,則仁義已根於心,而 固 見 非 前 度外 安而 由仁義行,存者能之。」 ,而人倫尤切於身,故其知之 存者,聖人也。 行之也。 非以仁義爲美,而後勉强行 在舜,則皆生而知之也 則 有以盡其 此則聖人之事,不 〇尹氏曰:「存之 其 。 君子所存,存 (理之詳 也 由 所 物

孟 子 Ĕ: 「禹惡旨 酒而 好善言。

國 酒 恶 昌言。」 者。』遂疏 ,禹飲而甘之,曰:『後世必有以酒亡 、好,皆去聲。 儀狄 ○《戰國策》曰:「儀狄作 而 絶 旨酒。」《書》曰 「禹 其

湯執中,立賢無方。

謂 守 而不失。 中者, 無 過不及之名。

以繼之,而各舉其一事,以見其憂勤

厲

方,猶 不問其類 類 也。 也。 立賢無方,惟賢則立之於位

文王視民如傷,望道 之猶若有傷,道已至矣,而望之猶若 見。聖人之愛民深而求道 而,讀爲如,古字通用。○民已安矣,而 加 未之見 切 如 此 不自

未

視

武王不泄邇,不忘遠。

滿足,終日乾乾之心也

泄,狎也。

而思之,夜以繼日,幸而得之,坐以待旦。」 周公思兼三王,以 思而 之事 急於行也。 三王,禹也,湯也,文、武也。四事 人所易忘而不忘。德之盛,仁之至也。 [得之,則其理初不異矣。 也。 時 邇者,人所易狎而不泄。遠者 〇此承上章言舜,因 異勢殊,故其 施 兀 事 ,其有不合者,仰 事 或 有 坐以待旦, 歷 所不合。 ,上四條 敘 羣 聖

之意。 泄 人亦無不盛。」 不死也。 邇忘遠 事而言 蓋天理之所以常存,而人心之所以 也。 非 〇程子曰:「孟子所 謂武王不能執中 人謂各舉其盛,亦非 立 稱,各因 賢 湯 也 聖 其 却

後《春秋》作。 孟子曰:「王者之迹熄而《詩》亡,《詩》亡然

王者之迹熄,謂平王東遷,而政教號令不 及於天下也。《詩》亡,謂《黍離》降爲《國 風》而《雅》亡也。《春秋》,魯史記之名,孔 国》一、雅》亡也。《春秋》,魯史記之名,孔 至之四十九年也。

晉之《乘》,楚之《檮杌》,魯之《春秋》,一也 乘,去聲。檮,音逃。 義未詳,趙氏以爲興於田賦乘馬之事。 取 記 載 當 時 行 机,音兀。 事 而 名之也。」《 ○《乘》, 或 檮

也。古者列國皆有史官,掌記時事。此三以首事。年有四時,故錯舉以爲所記之名惡垂戒之義也。《春秋》者,記事者必表年既垂戒之義也。《春秋》者,記事者必表年机》,惡獸名,古者因以爲凶人之號,取記

義則丘竊取之矣」。」 「其事則齊桓、晉文,其文則史。 孔子曰『其

者,皆其所記冊書之名也

贊一辭」者也。 子之事莫大於《春秋》,故特言之。 上章歷敘群聖,因以孔子之事繼之。 定天下之邪正,爲百王之大法。]○此 秋》,亦以史之文載當時之事也,而其義 之在己,所謂 史官也。 春秋之時,五霸迭興,而威、文爲 「其辭則丘有罪焉爾」,意亦如此。蓋言 竊取者,謙 「筆則筆,削則削,游、夏不能 〇尹氏曰:「言孔子作《春 辭也。 《公羊傳》作 盛。 又承 而 史, 孔 則 斷

五 孟 世 子 而 日 斬 君子、 之澤 Ŧi. 世 而 斬 人 之 澤

也 世 澤,猶言流 五世而斬 小人之澤,五 三十年亦爲 而 六世親屬竭矣。 恕, 服之窮 風 餘韻 世而絶 世。 也 也。 斬 9 也。 服窮則遺澤寖微 ,絶也 Ŧi. 父子相 世 〇楊氏 袒 免, 繼 大約 爲一 日 : 殺 君 百 世, 故故 子、 姓 四

予未得爲孔子徒也,予私 也。 子而自謙之辭也。 子之道於人,而私 之澤尚存,猶有能傳其學者。 言,予雖未得親受業於孔子之門,然聖 子游梁時,方百 私,猶竊 然則孟子之生,去孔子未百年也。 人,謂子思之徒也。 也 淑,善也。 四 竊以善其身,蓋推 十餘年, 〇此又承上三章,歷 淑諸 李氏以爲方言是 自孔子卒,至孟 而 人也。」 故我得聞 孟 子已老。 故孟 尊 孔 敘 孔 子

> 者矣。 舜、 謙,●然其 禹 至 於 所 周、 以 自任之重,亦有不 孔 而 以 是 終之。 · 得 其 而 詞 辭 雖

與,可 孟子曰:「可以取,可以 傷勇。」 以 無與。 與傷惠 9 無取,取 可以 死 可可 傷廉; 以 無 可以

死

惠也。 以 先言可以者,略見而自許之辭也。 受五秉之粟,是傷 蓋 廉,然過 過猶不及之意也。 無者,深察而 子路之死於衛 與亦反害其 自 疑 廉 之辭 惠 也。 是是傷 〇林氏曰:「公西華 過死 也。 冉 勇 子與之,是傷 亦反害其勇 過 也。 取 後言 固 害於 口

逄蒙 學 射於羿,盡 羿之道,思天下 惟羿 爲 愈

0 詞」 他本作「辭」。

公明儀 己,於是 日 殺 羿。 「宜 若 孟 無罪 子 Ē 焉 :「是亦羿有罪 薄乎 焉。」 爾

恶

無罪

立 也 逄 差薄耳。 ,後爲家衆所 薄江 反。 羿 之家衆也 恶, 殺。 平. 聲。 愈 猶 羿 羿,有 勝 善 也 射, 薄,言 窮 夏 后 其 自 羿

子何 執 之他 生, 子濯 死 弓。』曰:『小人學射 也 :『庾公之斯,衛之善射者也,夫子曰「吾 矣夫!』問其僕 人使子濯孺子侵衛,衛使庾公之斯追 」,其取, .爲不執弓?』曰:『今日 ,尹公之他學射於我。 何謂也?」曰:『庾公之斯學射於尹 孺子曰:『今日我 庾公之斯 友必 端矣。』庾公之斯至,曰:『夫 也。 曰 . 曰:『吾生矣。』其 『追我者 疾作,不 於尹公之他 1我疾作 夫尹公之他 可 誰 以執 也]?]其 不不 尹公之 弓,吾 可 公 以 僕 僕

> 子。 矢扣 他 學 輪,去其金 射於夫子。 雖然,今日 之事 一,發乘矢而 我不忍以夫子之道 君. 事 後 也 反。 我 不 敢 反害 廢 夫

叩輪 其 賊 矢 御 他 言 而 必不害己。 子以尹公正人,知 去,上聲。 蒙乃 教之, 耳。 也。 也。 事 徒 皆 出鏃,令不害人,乃以射 河反。 尹公他 孟子言使羿如子濯 逆 無 則必無逢蒙之禍。 乘,去聲。 足 儔 小人,庾公自稱也。 論 矣夫、夫尹之夫, 心,亦衛 庾斯 者 其 孟 雖 人也。 取 全私 〇之,語 子 友必 蓋 孺 恩 然夷羿篡弑之 端 正 特 子, 也 故 助 以 亦廢公義 正 金 得尹公他 乘矢, 並 也。 取 度庾公 鏃 也 友 僕 扶 也 而 几

西子,美婦人。蒙,猶冒也。不潔,污穢之子曰:「西子蒙不潔,則人皆掩鼻而過之。

孟

雖有惡 日 物 :「此章 ,側皆反。 也 人,齊 掩 鼻。惡 戒人之喪 戒沐 ○悪 其 浴 臭 人,醜貌 則可 也 善 以 者 祀 而 也。 勉 帝 人以 尹 自 氏

新

也。」

其 性 善、水之下,非有所矯 自 無 也 然之跡,若所謂 而易見。 可語其 人之爲惡、水之在山 所謂故者,又必 明 形 者,人物所得以生之理也。 ,猶所謂善言天者必有驗於人也。 而 難 自然之勢也 故天下之言性者,但言其故 知 ,然其發見之已然,則必 天下 本其自然之勢,如人之 之故 「則非 揉造: 言事 者 作 物之理 也。 自然之故矣。 故者 而 然者 利 頭雖 猶 其 而 有 也。 理 迹 若 順 己

> 大矣。 無 水 所惡 事 也 則 也。 於 智者 無惡 如 智者 「爲其 於 智矣。 亦行其所 ン製 也。 禹之行· 如智者若 無 水也,行 事,則 禹 其所 之行

爲害 穿鑿 水,則因其自然之勢而導之,未嘗以 小智之人,務爲穿鑿,所以失之。 惡、爲,皆去聲。 也 而 有所事 ,是以水得其潤下之性 〇天下之理,本 皆 禹之行 順 而 私 利

至,可坐而致也。」 天之高也,星辰之遠也,苟求其故,千歲之日

天雖 言日 半冬至爲曆元也。 豈 運 而 得。 有 有 至者 常。 不 高 得 况於事物之近,若因 星辰雖遠,然求其 , 造曆者以上古十一月甲子朔 雖千歲之久,其 其 理 者 〇程子曰:「此章專爲 而 何 以 日 穿 已然之跡 其故 鑿 至之度 爲 哉? 而求之, 可可 則 华 夜 其

則害於性而反爲不智。程子之言,可謂深循之,則爲大智。若用小智而鑿以自私,智而發。」愚謂事物之理,莫非自然。順而

得此章之旨矣。

公行子,齊大夫。右師,王驩也。與右師言者,有就右師之位而與右師言者。公行子有子之喪。右師往弔,入門,有進而

與驩言,孟子獨不與驩言,是簡驩也。」孟子不與右師言,右師不悦,曰:「諸君子皆

簡,略也。

不踰階 簡 孟子聞之,日 不亦異乎 而 相 揖 :「禮,朝廷不 也。 我欲行禮,子 歷位了 而相 敖以 與 我爲 言,

職喪涖其禁令,序其事,故云朝廷也。歷,有位次。若《周禮》,凡有爵者之喪禮,則朝,音潮。○是時齊卿大夫以君命弔,各

至哉?

子、右師之位又不同階,孟子不敢失此禮,位而就與之言,則右師歷己之位矣,右師已就更,也矣。 五世,他人之位也。右師未就位而更涉也。位,他人之位也。右師未就位而

故不與右師言也。

「仁者愛人,有禮者敬人。

以仁禮存心,言以是存於心而不忘也。

此仁禮之施。

愛人者人恒愛之,敬人者人恒敬之。

恒,胡登反。〇此仁禮之驗。

也 有人於此,其待我以横逆,則 我 必不仁 也 必 無 禮 也, 君子 此 物 必 奚 自 宜

横,去聲。下同。○横逆,謂强暴不順理

也 物 事 也

也,君子必自反也:我必不忠。 其自反而仁矣,自反而有禮矣,其横逆由是

心也。 我必不忠,恐所以愛敬人者,有所不盡其 ,與猶同,下放此。 〇忠者,盡己之謂。

於禽獸又何難焉?』 亦妄人也已矣。 自反而忠矣,其横逆由是也,君子曰:『此 如 此 則與禽獸奚擇哉?

不足與之校也。 難,去聲。○奚擇,何異也。 又何難焉,言

也。 則可 若所憂則有之:舜人也,我亦人也。 君子所患則亡矣。 於天下,可傳於後世,我由未免爲鄉人也,是 是故君子有終身之憂,無一朝之患也。 憂也。 如 有 憂之如何? 朝之患,則君子不患矣。」 非仁 無 如舜而已矣。 爲 也 一,非禮 舜爲法 若夫 無 乃

> 存心不苟,故無後憂。 夫,音扶。 ○鄉人,鄉 里之常人也。

禹、稷當平世,三過其門而不入,孔子賢之。

事見前篇

顔子當亂世,居於陋巷,一簞食,一瓢飲,人

不堪其憂,顏子不改其樂,孔子賢之。

食,音嗣。 樂,音洛。

孟子曰:「禹、稷、顔回同 聖賢之道,進則救民,退則脩己,其心一而 道

已矣。

有飢者,由己飢之也,是以如是其 禹思天下有溺者,由己溺之也; ●稷思天下 責 由,與猶同。 而救之急也。 ○禹、 稷身任其職,故以 急也 爲己

⁰ 也 原脱,據殘宋本、司禮監本、仿元本、吴本補

「禹、稷、顔子,易地則皆然。

樂,使顏子居禹、稷之任,亦能憂禹、稷之故使禹、稷居顏子之地,則亦能樂顏子之聖賢之心無所偏倚,隨感而應,各盡其道。

之,可也。「今有同室之人鬭者,救之,雖被髮纓冠而救

憂也

不暇束髮而結纓往救,言急也。以喻

禹、稷。

雖閉户可也。」「鄉鄰有鬭者,被髮纓冠而往救之,則惑也,

後聖,其心一也,故所遇皆盡善。」同也。○尹氏曰:「當其可之謂時,前聖所遭或異,然處之各當其理,是乃所以爲所額子也。○此章言聖賢心無不同,事則

公都子曰:「匡章,通國皆稱不孝焉。夫子

與之遊,又從而禮貌之,敢問何也?」

匡章,齊人。通國,盡一國之人也。禮貌

敬之也。

不孝也。章子有一於是乎?

好、養、從、皆去聲。很,胡懇反。○戮、羞

辱也。很,忿戾也。

「夫章子,子父責善而不相遇也。

夫,音扶。〇遇,合也。相責以善而不相

頁善,朋友之道中合,故爲父所逐也

四〇三

害天性之恩也。

已矣。」 設心以爲不若是,是則罪之大者。是則章子罪於父,不得近,出妻屏子,終身不養焉。其罪於父,不得近,出妻屏子,終身不養焉。其

表章之夫,音扶。爲,去聲。屏,必井反。 養,去聲。○言章子非不欲身有夫妻之 配、子有子母之屬,但爲身不得近於父,故 配、子有子母之屬,但爲身不得近於父,故 如此,則其罪益大也。○此章之旨,於衆 如此,則其罪益大也。○此章之旨,於衆 好惡而必察焉,可以見聖賢至公至仁之心 矣。○楊氏曰:「章子之行,孟子非取之 也,特哀其志而不與之絶耳。」

退,則 曾子 諸?」曰 居武 日 0 城,有 「修我牆屋,我將反。」寇退,曾子 無 寓 越寇。 人 於我 室、毀傷 或曰:「寇至,盍 其 薪木。」寇 去

之禍,從先生者七十人,未有與焉。」
沈猶行曰:「是非汝所知也。昔沈猶有負芻至則先去以爲民望,寇退則反,殆於不可。」

夫事曾子忠誠恭敬也。 與,去聲。 賓不與臣同 氏,曾子率其弟子去之,不與其難。 舍於沈猶氏,時有負芻者作亂 而效之。 左右,曾子之門人也。 沈猶行 〇武 城,魯邑名。 ,弟子姓名也。 忠敬,言武城之大 爲民望,言使民望 盍,何 言曾子嘗 來攻沈猶 不也 言師

諸?」子思曰:「如伋去,君誰與守?」子思居於衛,有齊寇。或曰:「寇至,盍去

兄也;子思,臣也,微也。曾孟子曰:「曾子、子思同道。

曾子

師

曾子、子思易地則

皆然。」

皆能 低 者知此,則因 不 之心,不繫於利害,惟其是而已,故易 微 昂屢 其 同,事業亦異,而其道未始不同 猶 爲之。」〇孔 事 賤 變, 不 也 而 同 所遇 不害其 者,所處之地 尹 氏 而應之,若權衡之稱 氏 (爲同 曰:「古之聖賢 日 . 也 不同 _ 或 遠 也。 害, 也。 言 地 君 或 學 行 死 則 子

乎? 儲 人同耳。」 瞷 子 ,古莧反。 日 孟 : 子 日 \pm 使 人 何 儲 以 瞷 子, 夫子, 異 於 齊 人哉? 人 果 也。 有 以 瞷 堯、 異 於 舜 竊 與 人 視

也 聖人亦人耳 ,豈有異 於人哉

齊人有 饜酒 貴 巾 肉 其 而 妻告 後 妻 反 妾而 其 其 妾 妻問 日 處 : 室者,其 所與飲 良 人 出 食者 良 人 則 則 出 必 饜 盡 則 酒 富 必

此

人耳。

使其妻妾見之,不羞

一而泣

者

少

他,此 嘗有 肉 之知也,施施從外來,驕其妻妾。 與其妾訕其良人,而相泣於中庭。 東郭墦間,之祭者,乞其餘; 施從良人之所之,徧國中無與立談者。卒之 曰:「良人者,所仰望而終身也。今若此 而 顯者來。 後 其爲曆足之道也。 反; 問 其 吾將瞷良 與 飲 食者,盡 人之所之也。」蚤起 其妻歸,告其 不足,又顧 富 貴 而良人未 也 而 而 妾 之 未

妻妾不羞 由君子觀之,則人之所以 夫也。 也。 施而 孟 施、音迤、又音易。 子言自君子而觀,今之求富貴者,皆若 章首當有「孟 訕 行,不使良 ,怨詈也。 曆,飽也。 也,而不 相泣 人 子 知 施施,喜悦自得之貌 顯者,富貴 日」字,闕 播,音燔。 者 也。 1,幾希 求富貴利 播 矣。 人也。 文也。 冢 施 也 施 達者 施 良 顧 如 「, 其 字。 望 邪

之,而以驕人於白日,與斯人何以異哉?」求富貴者,皆以枉曲之道,昏夜乞哀以求矣。 言可羞之甚也。 〇趙氏曰:「言今之

孟子卷第八

朱熹集注

萬章章句上

凡九章。

號泣也?」孟子曰:「怨慕也。」 萬章問日 「舜 往于田,號泣于旻天,何爲其

泣也。 己之不得其親而思慕也 覆閔下,謂之旻天。 號,平聲。 事見《虞書·大禹謨》篇。怨慕,怨 〇舜往于田,耕歷山 號泣于旻天,呼天而 時 也。仁

勞而 萬章曰:「父母愛之,喜而不忘;父母惡之, 公明高曰:『舜 不怨。然則舜怨乎?」曰:「長息問於 往于田,則吾既 得聞 命矣;

孟子卷第九

萬章章句上

矣,父母之不我愛,於我何哉? 心,爲不若是恝,我竭力耕田,共爲子職而 曰:『是非爾 所 知也。」夫公明高以 孝子之 已

號泣于旻天,于父母,則吾不知也。」公明高

惡,去聲。夫,音扶。恝,苦八反。共,平 以爲孝,則非孝矣。」 「非孟子深知舜之心,不能爲此言。 聲。○長息,公明高弟子。公明高,曾子 惟恐不順於父母,未嘗自以爲孝也。若自 己有何罪耳,非怨父母也。○楊氏 也。恝,無愁之貌。於我何哉,自責不 弟子。于父母,亦《書》辭,言呼父母 而 蓋舜 日 知 沙

417

所歸。 天下而遷之焉。爲不順於父母,如窮人無 舜於畎畝之中。天下之士多就之者,帝將胥 帝使其子九男二女,百官牛羊倉廪備,以 事

爲,去聲。 〇帝,堯也。《史記》云:「二女

也。 歸,言其怨慕迫切之甚也 年成都。」是天下之士就之也。 妻之,以觀 史記》言:「一年 遷之,移以與之也。 其内; 所居成聚,二年 九男事之,以 如窮人之無所 觀其外。 胥,相視 成邑,

憂。 憂,貴,人之所欲,貴爲天子,而不足以 順於父母,可以解憂。 憂,好色,人之所欲,妻帝之二女,而 解憂;富,人之所欲,富有天下,而不 天下之士悦之,人之所欲也,而不足以 人悦之、好色、富貴,無足以解憂者, 足 不 以 足 解 惟 解 以 解

解憂。 下之欲,不足以 孟子推舜之心如此,以解上文之意。 解憂,而惟順於父母,可以 極 天

孟子真知舜之心哉

子,則慕妻子; 大孝終身慕父母。 人少,則慕父母; 仕 則慕君,不得於君則 五十而慕者,予於大舜見 知好色,則慕少艾,有妻 熱中

之矣。」

也。 爲己憂。非聖人之盡性,其孰能之? 得衆人之所欲爲己樂,而 慕,則其終身慕可知矣。 言五十者,舜攝 同。 遷,惟聖人爲能不失其 少、好,皆去聲。 《楚詞》、《戰國 不得, 失意 政 也 〇言常人之情, 時 策》所謂幼艾、義與此 年五 熱 本心 中 〇此章言舜 以 十也。 不順乎親之心 躁 也。 急 艾,美好 心 五十而 因 熱也 不 物 有

娶,何也?」孟子曰:「告則 父母。』信斯言也,宜莫如舜。舜之不 父母,是以不告也 室,人之大倫也。 萬章問曰:「《詩》云:『娶妻如之何? 如告,則廢人之大倫 不得娶。 男 以 告 必告 女 居 懟 而

篇 懟 也。 ,直類反。 信,誠 也,誠如此詩之言也 ○《詩》,《齊 或 風 南 Щ 懟 学

萬 帝之妻舜而不告,何也?」曰 章曰: 其 怨 娶,是廢人之大倫 也。 「舜之不告而娶,則吾既得聞 舜父頑母嚚 ,常欲害舜。 以 讎怨於父母 「帝亦知告焉 告則 命矣。 不 聽

今之官府治民之私者亦多。」曰:「堯妻舜而不告者,以君治之而已,如妻,去聲。○以女爲人妻曰妻。○程子

則

不得妻也

舜曰: 宫,舜 我績。 使浚井 知象之將殺己與?」曰 琴,朕; 萬 .'章曰:「父母使舜完廪,捐階,瞽瞍焚廪。 憂,象喜亦喜。 在牀 牛羊,父母; 出,從 弤,朕,二嫂,使治朕棲。』象往入舜 惟兹臣 琴。 而揜之。 象 曰: 庶,汝其于予治。』不 倉廪,父母。 「鬱陶 象 奚而不 日 思君 0 『謨蓋都 干戈,朕 知 爾。」忸怩 也? 識 君 象 不 咸

弤,都禮反。忸,女六反。怩,音尼。與,

平聲。 既出即 揜,蓋 得 羊、倉廪與父母,而自取此物也。 也。 三年成都 去,得不死。 怩 二女也。 彈五弦琴也。 爲己功也。 母弟也。 井,舜從匿空出,去。」即 空旁出。 叟從下縱火焚廪,舜乃以 往舜宫,欲分取 「慚色 伸 舜既 也 也。 〇完,治也。 潛 也。 棲, 牀 舜 謨, 謀 歸 象言己思君之甚 入井,象不知 ,故謂之都君。 按《史記 干,盾 其宫也 既 後又使舜 臣 弧, 瑪弓也。 人深,瞽叟 所有,見舜 也,象 庶, 也。 也。 **>** 謂 蓋,蓋 日 捐, 鬱陶 欲 其 戈, 戟 舜 穿井,舜 其事 使 去也。 百 咸,皆也。 己出 使舜 兩笠自 與 一,故來 生在牀彈琴,蓋 爲己 井 官 思之甚 象欲 也。 也。 象 也。 也 , 欲以殺 上 共 階, 穿 妻也 見 二嫂,堯 以舜之牛 琴,舜 象,舜 捍 塗 下 井 舜 象素 爾。 而 績 梯 而 所 土 爲 也 舜 實 署 異 忸 功 居 所

喜,人情天理,於是爲 辯也。● 然舜之心 所不能已耳。 其憂則憂,見其喜則喜。 舜,不至其宫 臣 庶也。 〇程子曰:「象憂亦憂,象喜 ,則 孟子言舜 ,故舜見其 孟 萬章所言,其有無 子有以知之矣,它亦不足 非 至。」 不 ·知其將 來而喜,使之治 兄弟之情,自 殺 记,但 不可 知 亦 有 見 其

其所哉 既 焉; 之道 饋生魚於鄭子産,子産使校人畜之池。 日: 烹之,反命曰:『始舍之,圉 子可欺以其 烹 攸然 「然則舜僞喜者與?」曰:「否。 來 而 ,故誠信 食之, 曰: !」校人出, 而逝。」子産 方,難罔以 而喜之,奚僞焉? 得其 曰:『孰 曰:『得其 所 非其道 哉 得 謂 圉 「焉,少 子 其所哉。」故 産 所 彼以愛兄 智? 哉 則 昔者有 校人 洋 子 洋 得

放

則

萬

道 欺以其方,謂誑之以理之所 自得 之貌 故實喜之,何僞之有? 來,所謂欺之以 人倫之變,而不失天理之常也 謂 而 昧之以 2 遠 洋 去也。 洋, 理之所無。 則 其 方,亦 稍 (方也。 縱 矣。 道 〇此章又言舜 也 舜本 象以愛兄之道 有。 攸 罔 然 不知其僞 罔以 蒙 而 蔽 逝 非 者 也 其 漕

與,平聲。

校,音效,又音教。

畜,許六反。

)校人,主池沼小吏也。

幸

幸

困

而未紓

[「]辯」,仿元本、吴本作「辨」。

② 「舒」,司禮監本作「舒」。

使彼有庫

之民

無罪

而遭

象之虐,非仁

人之

心

也

藏

怒,謂

藏匿

其怒。

宿

怨,

謂

留

也。 其貴也,愛之欲其富也。封之有庳,富貴之 誅之,在弟則封之。」曰:「仁人之於弟也,不 之人奚罪焉? 服 藏怒焉,不宿怨焉,親愛之而已矣。親之欲 殺三苗于三危, ,誅不仁也。 章曰:「舜流 之人也。 兜,人名。二人比周,相與爲黨。 庫 地 地名也。 鯀,禹父名,方命圮族,治水無功。 名,負固 音鼻。 身爲天子,弟爲匹夫,可謂親愛之乎?」 也。」未知是 不服。 幽州 或曰 共工于幽州,放驩兜于崇山 殛 仁人固 象至不仁,封之有 流,徙也。 否? 、崇山、三危、羽山、有庫,皆 :「今道州鼻亭,即 鯀 殺,殺其君也。 于羽山 萬章疑 如是乎? 共工,官名。 四 舜 罪 不當封象 在他 庫。 殛,誅 三苗 而天下 有庫之 皆不仁 人則 有 也 國 庫 咸

> 庫, 故謂之放。 爲於其國,天子使吏治其國 而見之,故源源 敢問 此之謂也。」 或日 放者, 豈得暴彼民哉? 而 何 來。 謂 『不及頁,以政接于有 也 ? 日 加 雖然,欲常常 納 . 其 貢税焉 得 有

於象。 引以證 至不仁,處之如此,則既 國,天子使吏代之治, 孟子言象雖封爲有庳之君, 恩 此 接于有庳 政事接見 相繼也。 而彼亦不得虐有庳之民 也。 ,亦不以私恩害公義。 有似於放,故或者以爲放 源 〇吴氏 調調 源而 有庳之君。 來,謂來朝 不待及諸 曰:「言聖人不以公義廢私 來之意,見其親愛之無 覲 蓋古書之辭,而 而納其所收之貢稅 也。 侯朝 也。 不失吾親愛之心 舜之於象,仁之 貢之期 不及貢,以政 然不 源 源,若水之 也。 . 得 而 治 蓋象 孟 已 其 如 子

至,義之盡也。」

老而 岌岌乎 是二天子矣。」 既爲天子矣,又帥天下諸侯以爲堯三年 八音。』孔子曰:『天無二日,民無二王。』舜 勳乃徂落 其容有蹙。 咸 面 臣,父不得 而 丘蒙問日 舜 朝之,瞽瞍亦北 此非君子之言,齊東野人之語也。 攝 ! 不識 也。 ,百姓如喪考妣。 而 孔子曰 0 <u></u> 子。 「語云:『盛德之士,君不得 此 堯典》曰: 『二十有八載,放 語 舜 :『於斯時也,天下殆哉 面 誠然乎哉?」孟 南 而朝之。 面 而 三年,四 立、堯帥諸 舜見瞽瞍 海遏 子曰 侯 喪 密 堯 而 北

也。 岌岌,不安貌 子。 朝,音潮。岌,魚及反。 齊東,齊國之東鄙也。 語者,古 也。 語 也。 言人倫 蹙, 颦 〇咸 乖亂,天下將 孟子言堯但老 蹙 丘蒙,孟子弟 不自 安 也 危

> 未嘗即 堯死也。 木,樂器之音也。 密,靜也。 升而魄降,故古者謂 二篇,或合爲一耳。 書》篇名。 引《書》及孔子之言以明之。《堯典》,《 不 治 事 天子位 而 徂,升也。 今此文乃見於《舜 八音、金、石、絲、竹、匏、土、革 舜 攝 - 堯何 天子之事 言舜攝位二十八年 死 落,降 由 爲徂 北 耳 面 也。 落 而 典》, 朝 堯 人 遏 在 乎 死 蓋古 時 止 則 也 虞 魂 舜 而 書 又

事,我 已矣、《雲漢》之詩曰:『周 《詩》云:『普天之下,莫非 以辭害志。 於王事,而不得養父母 莫非王臣。』而舜既爲天子矣,敢問瞽瞍之非 臣,如何?」曰:「是詩也,非是之謂 咸丘蒙曰:「舜之不臣堯,則吾既 獨賢勞也。」故説詩者,不以文害辭 以意逆志,是爲得之。 也。 王 餘黎民,靡 曰:『此莫非 士; 得聞 率土之濱 如以 也。 命矣。 有孑 Ŧ. 而

遺。』信斯言也,是周無遺民也。

而非真 惟 則如《雲漢》所言,是周之民真無遺種矣。 作者之志,乃可 不可以一句而害設辭之志,當以己意迎取 言説詩之法,不可以一字而害一句之義 《大雅》篇名也。 文,字也。辭,語也。 詩者自言,天下皆王臣,何爲 文亦云:「大夫不均,我從事獨賢。」乃作 率,循也。此詩今毛氏序云:「役使不均, 《詩》、《小雅·北山》之篇也。 才而勞苦乎? 己勞於王事而不得養其父母 以意逆之,則知作詩者之志在於憂旱, 臣 堯, 無遺 不 民 以 也 堯 得之。 非謂天子可臣 子,獨立之貌。 爲 臣 逆,迎也。 若但以其辭而 使 北 獨使我以賢 焉。」其詩 面 普, 遺,脱也。 《雲漢》, 其父也 而 徧 朝 也 也 下

孝子之至,莫大乎尊親;尊親之至,莫大乎

養,養之至也。《詩》曰:『永言孝思,孝思維以天下養。爲天子父,尊之至也,以天下

則。」此之謂也

一次一

允若。』是爲父不得而子也。」「《書》曰:『祗載見瞽瞍,夔夔齊栗,瞽瞍亦

善及其子,而 而 敬事瞽瞍、往而見之、敬謹如此、瞽瞍亦信 謹恐懼之貌。 篇也。祇,敬也。載,事也。 見,音現。 不得而子者,而非如咸丘蒙之説 順之也。 齊,側皆反。 孟子引此而言瞽瞍 反見化於其子,則是 允,信也。 ○《書》、《大禹謨》 若,順 夔夔齊栗,敬 不能 也。 所謂 言舜 以 父 不

「否。天子不能以天下與人。」 萬章曰:「堯以天下與舜,有諸?」孟子曰:

萬章問而孟子答也。

意也。

天與之者,諄諄然命之乎?」

之貌。 〇萬章問也。諄諄,詳語

與之之意耳。 ○行之於身謂之行,措行,去聲。下同。○行之於身謂之行,措曰:「否。天不言,以行與事示之而已矣。」

薦人於天子,不能使天子與之諸侯;大夫能子能薦人於天,不能使天與之天下;諸侯能曰:「以行與事示之者,如之何?」曰:「天

要,是因舜之行與事,而示之以與之之 薦,步卜反。下同。○暴,顯也。言下能 暴,步卜反。下同。○暴,顯也。言下能 暴,步卜反。下同。○暴,顯也。言下能 不言,以行與事示之而已矣。」」

田:「敢問薦之於天而天受之,暴之於民而 民受之,如何?」曰:「使之主祭而百神享 民受之,如何?」曰:「使之主祭而百神享 民受之,如何?」曰:「使之主祭而百神享

治,去聲。

舜,訟獄者,不之堯之子而之舜,謳歌者,也。堯崩,三年之喪畢,舜避堯之子於南河也。堯崩,三年之喪畢,舜避堯之子於南河

之子,是篡也,非天與也。 後之中國,踐天子位焉。而居堯之宫,逼堯不謳歌堯之子而謳歌舜,故曰:天也。夫然

不决而訟之也。 在冀州之南,其南即豫州也。訟獄,謂獄相,去聲。朝,音潮。夫,音扶。〇南河,

聽。民之歸舜如此,則天與之可知矣。自,從也。天無形,其視聽皆從於民之視

者舜 畢 也。 於賢 堯崩之後,不從堯之子而 萬章問曰:「人有言:『至於禹而德衰,不 十,禹 薦禹於天,十有七年,舜崩。 加 天與 避 傳於子。」有諸 舜之子於陽 賢,則與賢,天與子 城。 ?」孟子曰:「否,不 從舜 天下之民從之,若 也。 則與子。 三年之喪 禹 薦益於 昔 然 · 傳

曰:『吾君之子也。』 謳歌者不謳歌益而謳歌啓,箕山之陰。朝覲訟獄者不之益而之啓,曰: 天,七年,禹崩。 三年之喪畢,益避禹之子於

但 朝 見堯、舜、禹之心,皆無一毫私意也。」 谷中可 日 音潮。 :「此語 云天與賢則與 藏 處 孟 ○陽城,箕 也。 子必有所受,然不 賢,天與子則與子,可 啓, 禹 山之陰,皆嵩 之子 也。 可 Ш 考矣。 楊 下 以 深

承繼 者,天也;莫之致而至者 肖,皆天也,非人之所能 民 之相舜也,歷年多,施澤於民久。 丹朱之不肖,舜之子亦不肖。 未久。 禹之道。 舜、禹、益,相 益之相禹 去 爲也。 也,歷年少,施澤於 命也 久遠。 舜之相 其子之賢 莫之爲 啓賢,能 堯、 敬 禹 爲 不

舜之子皆不肖,而舜、禹之爲相久,此堯、之相之相,去聲。相去之相,如字。○堯、

薦之者,故仲尼不有天下。 匹夫而有天下者,德必若舜、禹而又有天子 舜 謂之天,自人言之謂之命,其實則一 自爲,非人力所致而自至者。 而 禹 [之子賢,而益相不久,此啓所 益不有天下也。 之子所以不 有天下, 然此皆非 而 舜、 禹 人力所爲而 蓋以 有天下 以 有 一而已。 理言之 天下 也

子薦之者,故不有天下。之。言仲尼之德,雖無愧於舜、禹,而無天孟子因禹、益之事,歷舉此下兩條以推明

故益、伊尹、周公不有天下。「繼世以有天下,天之所廢,必若桀、紂者也,

伊尹、周公雖有舜、禹之德,而亦不有聖,但能嗣守先業,則天亦不廢之。故益、啓及太甲、成王雖不及益、伊尹、周公之賢民,故必有大惡如桀、紂,則天乃廢之。如繼世而有天下者,其先世皆有大功德於

天下。

歸 桐 尹放之於桐。 丙二年,仲壬 伊尹相 于亳。 處仁遷義。 湯以王於天下。 一四年。 三年,太甲 三年 以以 太甲顛 聴伊尹 湯崩,太丁未 悔 過 覆 ,自怨自艾,於 之訓 湯之 己 典 也 刑 立),復 伊伊 外

湯之太子,未立而死。 伊尹不有天下之事。 刑,常法 之也。」二説未知孰 丙方二歲,仲壬方四歲,惟太甲差長,故立 立四年,皆太丁弟也。 相、王,皆去聲。 ○程子曰: ●「古人謂歲 説文》云「芟草也」;蓋斬絶 也。 桐,湯 **艾**,音乂。○此 是。 墓 〇趙氏曰:「太丁 外丙立二年,仲壬 所 太甲,太丁子也。」 爲 顛 在。 年。 覆 壞亂也 艾,治 自新之意。 湯崩 承上文言 游時,外 也; 典

亳,商所都也。

周公之不有天下,猶益之於夏,伊尹之於

殷也。

此復言周公所以不有天下之意。

孔子曰:『唐、虞禪,夏后、殷、周繼,其義

也。」

與子則與子。1知前聖之心者,無如孔子。 其義 也。 禪,音擅。○禪,授也。或禪或繼,皆天命 曰:「孔子 聖人豈有私意於其間哉? 一也。」孟子曰:『天與賢則與賢,天 ·曰:『唐、虞禪、夏后、商 周繼, 尹 氏

萬章 問 日 . 「人有言『伊尹以割烹要湯』,

繼孔子者,孟子而已矣。」

有諸?」

伊 要,平聲。下同。〇要,求也。按《史記》, 尹欲行道以致 君而無由,「乃爲有莘氏

孟子卷第九

萬章章句上

之媵臣,負鼎 俎,以滋味説湯,致於王道

蓋戰國時有爲此説者。

義也,非其道也,一介不以與人,一介不以取 以天下,弗顧 樂堯、舜之道焉。 孟子曰:「否,不然。伊尹耕於有莘之野,而 也,繫馬千駟,弗視也。 非其義也,非其道也,禄之 非其

諸人。

聘幣爲哉? 湯使人以幣聘之,囂囂然曰 與,無大無細,一以道義而 匹也。 樂,音洛。 誦其詩,讀其書,而欣慕愛樂之也。 介,與草芥之芥同。 我豈若處畎畝之中,由是以樂 〇莘,國名。樂堯、舜之道者, 不苟也。 :『我何以湯之 言其 辭受取 駠,四

427

堯、舜之道哉?』

囂,五高反,又戶驕反。 ○囂囂, 無欲自得

湯三使往聘之,既而幡然改曰:『與我處 畎

民哉? 吾豈若於吾身親見之哉? 爲堯、舜之君哉? 吾豈若使是民爲堯、舜之畝之中,由是以樂堯、舜之道,吾豈若使是君

已也。 之身親見其道之行,不徒誦説向慕之而 幡然,變動之貌。於吾身親見之,言於我

覺也。 斯民 天之生此民也,使先知覺後知,使先覺覺後 覺者? 覺,如 然。 此 先覺者也。 之先覺,謂 理當然,若使之也。 也。 亦 予,天民之先覺者也,予 伊尹之言也。 呼 覺 非予覺之而誰 寐者而使之寤也。 及彼之覺,亦 ,謂悟其 我乃天生此 既爲先覺之民,豈 理之所以 知,謂 也? 非 程子 民 分 中, 我 然。 識 言天使者,天 曰:「予天民 將以 所 盡 可 其 覺 得民 有 不覺其未 事之當 以予之 後 斯 道 知 道覺 後 而

此,故就湯而説之以伐夏救民。若己推而内之溝中。其自任以天下之重如有思天下之民匹夫匹婦有不被堯、舜之澤者,

克俾厥后爲堯、舜,其心愧耻,若撻于市。」 推,吐回 堯、舜之道。堯、舜揖遜,而伊尹説湯以 使湯伐夏以救之。 取諸此。 曰:「昔先正 夏者,時之不同 一夫不獲,則曰『時予之辜』。」孟子之言蓋 反。 是時,夏桀無道,暴虐其民,故 内,音納。説,音税。 保 義 衡,作 則 ○ 徐 我先 也。」 氏 王,曰: 曰:「伊 ○《書》 『予弗 尹 伐 欲

不去,歸潔其身而已矣。 者乎? 聖人之行不同也,或遠或近,或去或吾未聞枉己而正人者也,况辱已以正天下

行,去聲。〇辱己甚於枉己,正天下難於

也

被自有此理,我但能覺之而已。」

^{● 「}之」下,吴本有「所」字。

在 君也。言聖人之行雖 以 正 潔 人。 Ē 天下乎? 其 若伊 身而 尹 以割烹要湯,辱己甚矣, 遠 ,謂隱 伊尹 不必同, 遁 · 豈肯 也。 以割烹要 然其要,歸 近 調仕 近 何

「吾聞其以堯、舜之道要湯,未聞以割烹也。「吾聞其以堯、舜之道要湯者,非實以是 要之也,道在此而湯之聘自來耳。猶子貢 要之也,道在此而湯之聘自來耳。猶子貢 語亦猶前章所論父不得而子之意。

於亳也。伊尹言始攻桀無道,由我始其事皆始也。伊尹言始攻桀無道,由我始其事民之事也。今《書》牧宫作鳴條。造、載,

自亳。」」

好事者爲之也。 侍人瘠環,有諸乎?」孟子曰:「否,不然也。 萬章問曰:「或謂孔子於衛主癰疽,於齊主

應,於容反。疽,七余反。好,去聲。○ 整也。侍人,奄人也。瘠,姓,環,名。皆 醫也。侍人,奄人也。瘠,姓,環,名。皆

重與侍人瘠環,是無義無命也。 以禮,退以義,得之不得曰『有命』。而主癰得也。』子路以告。孔子曰:『有命。』孔子進,衛卿可能也。彌子謂子路曰:『孔子主我,衛卿可

進以禮;義主於制斷,故退以義。難進而彌子瑕也。○徐氏曰:「禮主於辭遜,故也、《史記》作顏濁鄒。彌子,衛靈公幸臣讎,如字,又音犨。○顏讎由,衛之賢大夫

所

得,則有命存焉。」
易退者也。在我者,有禮義而已,得之不

子,爲 之,微 孔子不悦於 陳 服 侯周 而 過 宋。 臣 魯、衛。 是時孔子當阨,主司 遭宋桓司馬將要 城 而 貞 殺

孔 子 行。 子爲魯司寇,齊人饋女樂以間之,孔子遂 之賢者也。 馬,宋大夫 要,平聲。 子雖當阨 之時,豈 ,孔子去至陳,主於司 適 衛月餘,去衛適 有主 向 〇不悦,不樂居其國 難, 陳 魋 侯,名周。 癰 然猶擇所主,况在齊、 也。 疽 侍 司 宋。 城 人之事乎 城 Œ 按《史記 正子。」孟 司 子 馬魋 亦宋 也。 *****: 欲 子言 大 威 衛 殺 孔 夫 無 孔 司

主。 孔子?」 吾聞 若孔子 觀近 臣 主癰 一,以其 疽 八所爲、 與 侍 主,觀遠 人瘠環,何 臣,以 以 其 爲 所

近臣,在朝之臣。遠臣,遠方來仕者。君

不諫。 孟 萬 之乘,假道 者,五羊之皮,食牛 百里奚,虞人也。 章問 之賢臣。 食,音嗣。 子曰:「否,不然。好事者爲 五羊之皮,而爲之食牛,因以干秦穆公也 日 : 於虞以伐號,宮之奇 人言其自賣於秦養牲者之家,得 好,去聲。 或 日 : 晉 以 百 人以垂棘之璧 要秦穆公。」信 下同 里 奚 自 之也 鬻 7諫,百 百 於 里奚, 與 乎? 里 養 屈 虞 牲 産

欲伐虢 并 屈,求勿反。 乘,屈地 垂 取虞。 棘之璧,垂棘之地 道經於虞 所 宫之奇,亦虞之賢臣。 生之良 乘,去聲。 放以 馬 所出之璧也 也 ○虞、 此 乘 物借 虢 四 道, 諫 兀 ,皆國名。 虞公令 其實 也 屈産之 欲

其不可諫,故不諫而去,之秦。 勿許,虞公不用,遂爲晉所滅。百里奚知

乎? 乎? 不爲 賢 秦,知穆公之可與有行 之將亡而先去之,不可謂不智也。 曾不知以食牛干秦穆公之爲汙也,可謂 知虞公之不可諫 而能之乎? 自鬻以成其君,鄉黨自好者 ,而謂賢者爲之乎?」 不可諫而 相秦而顯其君於天下,可傳於後世,不 不諫,可謂不智乎? 而去,之秦,年已七十矣, 也而相之,可謂 時舉於 知虞 不智 公 智

也。 以 氏 耻 爲汙。其賢又如此,必不肯自鬻以 子言百里奚之智如此,必知食牛以干主之 相,去聲。 爲之。 事 曰:「古之聖賢未遇之時,鄙賤之事,不 理反覆推之,而知其必不然耳。 然此事當孟子時,已無所 如 〇自好,自愛其身之人也。 白 里奚爲人養牛,無足怪 據。 孟 成其 ○范 子直 也。 君 孟

> 里奚爵 惟是 賢 有先 之論,大率類此。 伊尹、百里奚之事,皆聖賢 公忘其賤而與之政。』亦可謂 孟子不得不辯。」〇尹氏 也。」 人君 自 禄 汙 辱 不入於心,故飯牛 不致敬盡禮,則不可得而 以 要 其 蓋以其不正之心度聖 君 哉? 曰:「當時好事者 出 而 處之大節,故 知 莊 百里奚矣。 牛肥,使穆 周 日 見,豈 百

孟子卷第九

孟子卷第十

朱熹集注

凡九章。 **萬章章句下**

鄉 横 非 孟 夷之風者, 時,居北 人 政 其 子曰:「伯 之所 處 君 如如 海之濱,以待天下之清 事,非其民不使。 出 以 頑夫 横民 夷,目 朝 廉 衣朝冠坐於塗炭 之所止,不忍 懦夫有、 不 視惡 立志 色,耳 治則進 也。 也。 居 不 ~, 亂 也 聽 故聞 當紂之 則 惡 思與 退 伯

分 横 治,去聲。 辨。 ,謂不循 懦 法度。 柔弱 下 同 也。 頑者 横,去聲。 餘 並見前 ,無知覺。 朝, 音 廉者 潮 有

> 中 婦 予將以此道覺此民也。」思天下之民匹夫匹 後知 進 伊 ,其自任以天下之重 有不 亂 尹 ,使先覺覺後覺。予,天民之先覺者也 亦 É 與被堯、舜之澤者,若己推 進 . 一何 曰 事 非 『天之生 君 ? 也。 何 斯 使 民 非 也 一,使先 民?』治 而 内 知 溝 覺 亦

使非 與,音預。 不可使之民 民,言 \bigcirc 所 也。 使 何 事 即 餘見 非 民。 君,言所 前 無 篇 不 可 事 事 即 之君 君。 無 何

人處 柳 雖 必以其道。 柳下惠,不羞汙君 袒 下 一楊裸! 由 惠之風者,鄙 由 程於 然不忍去也。 遺佚 我 而 側,爾 夫寬, 不 不辭 怨,阨 焉 薄 「爾 小官。 夫敦。 能 窮 浼 爲 而 我哉?」故聞 爾,我 不 進不 憫 爲 隱賢 與 鄉

「孔子之去齊,接淅而行,去魯,曰:『遲遲鄙,狹陋也。敦,厚也。餘見前篇。

子也 以 吾行也,去父母國之道也。』可以速 久 而 久,可 以 處 而 處,可 以 仕 而 而 仕 速 可可 孔

故 取 也 淅 遲其行也。 曰:「孔子欲去之意久矣,不欲苟去,故遲 子去魯,不税冕而行,豈得 久、速、仕、止,各當其可也。 不税冕而行,非速也。」 米而行,不及炊也。 ,先歷反。 漬米將炊, 膰肉 〇接, 而欲 不至,則得以微罪行矣, 猶 去之速,故以 承 舉此一端,以 也。 爲 ○或曰:「孔 淅, 遲?」楊氏 漬米 手 見其 承 水 水

者也,柳下惠,聖之和者也,孔子,聖之時孟子曰:「伯夷,聖之清者也,伊尹,聖之任

之極。● 張子曰 人之和。 0 勉 無 而 所謂聖者,不勉不思而至焉者 清 所 雜者清之極,無 非聖人之清; 勉而 所 異 和 者 和

> 也。二〇 也。」 孔子,而不得爲聖之時,何也? 之可以一德名也。 蓋兼三子之所以聖者而時 愚) 孔氏 謂 孔 子仕、 曰:「任者,以天下 〇或疑 止、久、 伊尹 出 速,各當 之,非如三子 出處,合乎 程子曰: 爲 其 己 可。 責

者,終條理也。始條理者,智之事也;振之也。金聲也者,始條理也;玉振不之謂集大成。集大成也者,金聲「終是任底意思在。」

成者,樂之一終,《書》所謂「簫韶九成」是猶作樂者,集衆音之小成,而爲一大成也。此言孔子集三聖之事,而爲一大聖之事,

理者,聖之事

也

● 「者」下,原衍一「者」字,據殘宋本、元甲本、元乙本、司

終條

之

也

而

玉

德 始震 之振。 古《樂經》之言。 衆小成而爲一大成,猶孔子之知 中,金、石爲重,故特爲衆音之綱紀。 知 而 未作,而 絲、竹、匏、土、革、木。 聖者,德之所就 言脉絡,指衆音而言也。 也 偏於 之極,兼總條貫,金聲而 後擊特磬以 音自爲始終,而 無不全也。 二者之間 而 玉, 磐也 始,始之也。終,終之也。 玉終詘 一,而其所 先擊! 鐘 屬。 鎛 ,脈絡 收其韻。 「金聲玉振,始 0 然也,故並 也 振,收也,如 鐘 故兒寬云:「惟 聲,宣 爲一 就 以宣其聲,俟其既闋, 通 亦 蓋樂有八音:金、石、 小成。 偏 貫 若獨 世, 宣以始之,收以終 智者,知之所及。 ,無所不備 於 奏八音,則 玉 如聲罪致討之 振 奏一音,則其 終 振之。」亦此 也。 猶三子之所 河 條 無不 天 海 條 八音之 理」, 子 而 則合 理 又金 建 於其 盡 不 ",猶 中 疑 而 洩

意也。

之外 智, 行之盡 以 中,去聲。 子則太和 章言三子之行,各極其 雖至於聖,而知不足以及乎時中 兼備。三子則力有餘 兼全於衆理。 缺 二字之義。 也,其至,爾力也 譬則 於終; 巧 三子猶 也; 元氣之流行於四時 〇此復以射之巧、力,發 所 聖,譬 見孔子巧、力俱全,而 以 所以 春夏秋冬之各 全 者,由: 偏 則 其中,非 而巧不足,是以 者, 力 一偏, 也 其知之至,是以 由其 也 爾 由 蔽 孔 力 也。 射 其 於始,是 子之道 也 於 明智 時 百 一、智 此 步

錡,魚綺反。○北宫,姓,錡,名,衞人。北宫錡問曰:「周室班爵禄也,如之何?」

班,列也。

也,而皆去其籍。然而軻也,嘗聞其略也。孟子曰:「其詳不可得聞也。諸侯惡其害己

寫,故惡周制妨害己之所爲也。 思,去聲。去,上聲。○當時諸侯兼并僭

不達於天子,附於諸侯,曰附庸。十里,子、男五十里,凡四等。不能五十里,「天子之制,地方千里,公、侯皆方百里,伯七

儀父之類是也。 小國之地不足五十里者,不能自達於天小國之地不足五十里者,不能自達於天

天子之卿受地視侯,大夫受地視伯,元士受

地視子、男。

鄙受地也。」元士,上士也。 ○徐氏曰:「王畿之内,亦制都

庶人在官者同禄,禄足以代其耕也。 夫倍上士,上士倍中士,中士倍下士,下士與夫倍上世,是十卿禄,卿禄四大夫,大

以 下所食之禄,皆助法之公田,藉農夫之力 畝,可食七十二人。上士田 百畝,可食二百八十八人。 其人可食二千八百八十人。 也。〇徐氏曰:「大國君田三萬二千畝 十,十倍之也。四,四倍之也。 下士與庶人在官者田百畝,可食九人至五 三十六人。中士田二百畝 耕 而收其租。 庶人在官,府史胥徒也。」愚按: 士之無田 與庶人在官者 可 兀 大夫田 卿田三千二 倍,加一倍 食十八人。 百畝,可食 八百 君以

與庶人在官者同禄,禄足以代其耕也。大夫倍上士,上士倍中士,中士倍下士,下士,次國地方七十里,君十卿禄,卿禄三大夫,則但受禄於官,如田之入而已。

大夫倍上士,上士倍中士,中士倍下士,下士「小國地方五十里,君十卿禄,卿禄二大夫,二千四百畝,可食二百十六人。」二萬四千畝,可食二千一百六十人。卿田二,謂三倍之也。〇徐氏曰:「次國君田三,謂三倍之也。〇徐氏曰:「次國君田

百畝,可食百四十四人。」
六千畝,可食千四百四十人。卿田一千六二,即倍也。〇徐氏曰:「小國君田一萬與庶人在官者同禄,禄足以代其耕也。

爲差。」

《 五人。庶人在官者,其禄以是人,下食五人。庶人在官者,其禄以是人,中食七人,中次食六人。

等。 等也。 畝。 書,皆掇拾於煨燼之餘,而多出 制》不同,蓋不可考,闕之可 所收可供九人。 然則其事固 時之傅會,奈何 火,然而班 曰:「孟子之時,去先王未遠,載籍 音嗣。 庶人在官者,其受禄不同,亦 加之以糞,糞多而 愚按:此章之說 爵禄之制已不聞其詳。 不可 獲 行,得 其次用力不齊,故有此 欲 一二追復矣。」 也。 盡 信 力勤者爲上農 而 夫 與《周禮》、《王 句 爲 也。 婦 之 於漢儒 〇程 有 解 未 佃 今之禮 經秦 此 乎 田 子 其 Ŧi. ? Ŧi. 百

挾貴 口 萬 章問 以 有挾也 ,不挾兄弟 티 : 敢問 而 友。」孟子曰: 友。 友也者 , 友其德 「不挾 長,不 也,不

非惟 小國之君爲然也,雖大國之君亦有之。

> 與治天職也,弗與食天禄也,士之尊賢者也 飽 云則 晉平公之於亥唐也,人云則人,坐云則坐,食 王公之尊賢也 也。然終於此而已矣。 食。 雖 疏 食菜羹,未嘗不飽 弗與共天位 蓋 不敢不 也,弗

亦

裘、牧仲,其三人,則予忘之矣。

獻子之與此

此五人者,

非

、勢,五

孟

獻

子,百

乘之家

也,有

友五

人焉:

樂正

挾者,兼有而恃之之稱

「之」字,疑闕文也。 敬賢者之命也。 言食,乃食也。疏食,糲飯也。不敢不飽 平公造之,唐言人,公乃入;言坐,乃坐; 治天民,非人君所得專者也。」 職曰天職,禄曰天禄,言天所以待賢人,使 疏食之食,音嗣。平公、王公下,諸本多無 〇范氏 亥唐,晉賢 曰:「位 日 天位 人也

主,是天子而友匹夫也。 舜尚見帝,帝館 甥于貳室,亦饗舜, 迭爲 賓

我者也

事我者,所

邑之君

禮 堯 尚,上也。 以女妻舜,故謂之甥。貳室,副 ,妻父曰外 舜上 舅。 而見於帝堯也。 謂 我舅者,吾謂 館 ,舍也。 宫宫 之甥。 也

四二七

孟子卷第十 萬章章句下

頁。貴貴、尊賢,其義一也。」用下敬上,謂之貴貴,用上敬下,謂之尊善堯舍舜於副宮,而就饗其食。

僭。 必 貴,而不知尊賢,故 貴貴、尊賢,皆事之宜者。 子友匹夫而不爲詘,以匹夫友天子 稱之也 此言朋友人倫之一,所以輔仁,故 此堯、舜所以爲人倫之至,而 孟 子曰「其 然當 義 時 孟 而 但 子言 也。 不爲 以 知 貴 天

「悲也。」 萬章問曰:「敢問交際何心也?」孟子曰:

接也。交際、謂人以禮儀幣帛相交際,接也。交際、謂人以禮儀幣帛相交

而後受之,以是爲不恭,故弗卻也。」賜之,曰:『其所取之者,義乎? 不義乎?』曰:「卻之卻之爲不恭,何哉?」曰:「尊者曰:「卻之卻之爲不恭,何哉?」曰:「尊者

曰: 曰:「其交 民之不義也」,而 哉? 得此物者,未知合義與否,必其合義,然後 疑交際之間有所却 却,不受而還之也。 可受,不然則却之矣,所以却之爲不恭也 「請無以辭卻之,以心卻之,曰『其取諸 孟子言尊者之賜,而心竊計其所 也 以 道 一,其接 以 他 者,人便以 再言之,未詳。 辭 也 無受,不可乎?」 以禮,斯孔子受 爲不恭, 萬 以 何 章

但 貨 禮 義,而託於他辭以却之,如此 萬章以爲彼既得之不義, 以道,如 謂 烝豚之類 無 以 辭 言 饋 命 語 贐 恭敬之節 也 問 聞 而 戒、 却之, 直 周 其飢餓之類。 孔子受之,如受陽 則 其 可否耶 以 饋 心 度其 不可受。 接以 不

^{■ 「}語問」,司禮監本作「辭間」,吴本作「語間」

受殷, 可。 萬章 民 罔 道 《康誥》曰:『殺越人于貨,閔不畏死,凡 其 不譈。」是不待教而誅者 所不 饋 「今有禦人於國門之外者,其交也 也 辭 以 也。 禮 斯 於今爲 可 受禦與?」曰:「不 烈, 也。 如之何 殷受夏,周 其

乎? 者,用其禦得之貨以禮饋 外,無人之處也。萬章以爲苟不問 死,凡民無不怨之。 止 與,平聲。 而當即 言殺人而 今《書》閔作 所從來,而 也。 至「爲烈」十四字,語 《康誥》,《周書》篇名。 止人而殺之,且奪其貨也。 誅 者 顛越之,因取其貨,閔然不知畏 激、《書》作憝,徒對反。 但觀其交接之禮 愍 也。 ,無「凡民」二字。 如 孟子言此 何 而 可受之乎? 意 不 我, 一則設 倫。 越, 乃 則 不待教 激,怨也 顛 可受之 其物之 李氏以 有 國門之 越 ○禦, 禦人 也。 商 戒

> **仕於魯也,魯人獵較,孔子亦獵較。** 有而取之者盜也,充類至義之盡也。 乎? 其教之不改而後誅之乎? 「子以爲有王者作,將比今之諸 其禮際矣,斯君子受之,敢 曰:「今之諸侯取之於民也,猶禦也。 爲 直爲衍字耳。 此必有斷 簡 然不可考,如闕之可 或闕文者,近之。 問 何說 夫謂: 侯 也?」日 而 而 孔子 獵 世 愚 誅 荷善 非 意 猶 其 之 其

也。 類 爲 而 者不同矣。夫禦人於國門之外,與非其 比 王者起,必不連合而盡誅之。 而後誅之,則其與禦人之盗,不待教 真 ,至於義之至精至密之處 取之,二者固皆不義之類,然必禦人,乃 ,去聲。夫,音扶。 盗 言今諸侯之取於民,固多不義 其謂: 非 有 而 較, 取 爲 音 盗者,乃推 角。 而 必教之不 極言之耳 然然 比 而 其 有 誅 有 連 可,而况受其賜乎?」

違 氏 况受其賜 非 獲之多少也。 非 又 一,所以 以 引孔子之事 其 便 以 爲 有 爲 田 小同於俗也。 而 ",何爲 真 獵 贵 盗 相 可 二說 以以 也 較, 遽 不 可 明世俗所尚,猶或可從, 以 奪 未知孰是 然則今之諸侯,雖 乎 同 禽獸 張氏以 ? 於禦人之盗 獵較,未詳。 以 祭。 爲獵 孔 也 而 子 較 哉 曰 不 趙 所 取

不去也?」曰:「爲之兆 事道 事 與,平聲。 正 萬 几 祭器。 方難繼之物實之。● 章 道者,以 ,而後去,是以 然則孔子之仕 也。」「事道奚獵較也?」曰:「孔子先 問 先 也。 以 不以四方之食供簿 簿書 行道 〇此 先 簿 IE 爲 因 未嘗有 其祭器 E 事 孔 也 祭器 子事 也 也。 ,非事道 夫器有常數、實有 所 未 事 而 使 終三年淹 兆足以 有定 道 反 IE 詳 與? 奚 覆 獵 辯 行 數 日 ~,不以 矣, 較 論 也 0 徐 日 也 也 奚 氏 而

> 其端既 矣。」未 常品 端,以示於人,使知吾道之果可 端 决,是以未嘗終三年留於一 已而必去之。 也 則其本正 孔子所以不去者,亦欲 知是 口 行, 否 蓋其去雖不輕,而 而人不能遂行之,然後 也。 矣, 被獵較 兆,猶 1 者 或 之兆 1,將久 小試 也 行 亦未嘗 也。若 蓋 而 行道之 事 不 自 得 Ż 廢

仕。 際可之仕 孔子有見行可之仕,有際可之仕,有公養之 禮 因孔 魯 公、《春秋》、《 見行可,見其道之可 也。 卿 於季桓子,見行可之仕也,於衞靈公, 子 季 仕 也,於衞孝公,公養之仕 公養,國 孫 魯 斯 史記 也。 而 君養賢之禮 言其仕有此 衞 》皆 靈 行也。 無 公, 之,疑出公輒 衞 也。 際可,接遇 三者。 侯 也。 元 季 也。 桓 故於 也 以

^{●「}不」上,司禮監本有「而」字。

者,爲於陵仲子而已。 也。 義 衞 之事 所在。」 愚按: ,則兆足以行矣,而不行,然後去。 尹 ,則又受其交際問 氏 曰:「不聞 此 章文義多不可曉,不必 聖賢辭受進 孟子之義 饋 而不 ·却之一 則自 退,惟 而 於 好

孟 子 爲養也 曰:「仕非 前 有 爲 時平爲養。 貧 也 而有 時 乎 爲貧 9 娶

强

爲之說

者。 井臼 亦有家貧親老,或道與 爲、養,並去聲。 ,而欲資其饋養者 如娶妻本爲繼嗣 下同。 而 時 〇 仕· 亦有 違,而 本爲行 爲不能親 但爲 道 操 仕 而

「爲貧者,辭尊居卑,辭富居貧。

處之正,故其所處但當如此。 貧富,謂禄之厚薄。蓋仕不爲道,已非出

辭尊居卑,辭富居貧,惡乎宜乎? 抱關

行,耻

也。

擊柝。

苟禄。 職易 也。 恶, 行矣,爲貧 平聲。 蓋爲貧者 稱,爲 故惟 柝,音托。 而 所宜 抱 仕者,此其律令也。 關 雖 居 不主於行道 擊柝之吏,位卑 也。 〇柝,行 〇李氏日 前 夜 亦 · 禄 「道道 若不能 所 不 薄, 擊 可 其 木 不 以

然,則是貪位慕禄而已矣。」

「孔子嘗爲委吏矣,曰『會計當而已矣』。 爲乘田矣,曰『牛羊茁壯,長而已矣』。 位卑而言高,罪 也。 所謂 言以孔子大聖,而嘗爲賤官,不以爲辱者 委,烏僞 子之爲貧 乘,去聲。 乘田 爲 貧 反。 ,主苑囿芻牧之吏也。 茁,阻 而 而仕者也。 仕 會,工外 也; ,官卑禄薄,而職 刮反。長,上聲。 立乎人之本 委吏,主委積之吏 反。 當,丁 朝 易 茁 前 稱 一,肥貌。 〇此孔 浪 巾 道 反。 不

欲以行道。」 氏 者之所以必 責 朝 日 音 潮 「言爲 廢道 一辭尊 爲 貧者 以 耻 則非 出 富 不 位 而寧處貧賤 可以 爲 竊禄 罪 居尊,居尊者必 之官 則 也 無 此 行 爲 道 尹 貧 之

士之託於諸侯,非禮也。」「不敢也。諸侯失國,而後託於諸侯,禮也;萬章曰:「士之不託諸侯,何也?」孟子曰:

周之。」 之。」「受之何義也?」曰:「君之於氓也,固 萬章曰:「君饋之粟,則受之乎?」曰 土 出 託,寄也,謂不仕 ,不得比 奔他國,食其 諸侯。 廩 而食其 不仕 餼,謂之寄公。 而 、禄也。 食禄 則 古者諸侯 非 士無爵 禮 受 也。

君待民之禮也。 周,救也。視其空乏,則周恤之,無常數,

而 曰 不 抱關擊标者,皆有常職以食於上。 賜 . 敢 於上者,以爲不恭也。 周之則受, 也。」曰:「 賜之則不受, 敢 問 其 不 敢 何 何 也? 也 ? 無常職 日 日

賜,謂予之禄,有常數,君所以待臣之

禮也。

悦。 能 畜伋。」蓋自是臺無饋 首再拜而 曰:「君饋之則受之,不識 繆公之於子思也,亟問 養也,可謂悦賢乎?」 於卒也,摽使者出諸 不受。 曰 : 『今而後 也。 一或饋鼎肉。 悦賢 大門之外,北 可 常 知君 繼 不能舉,又不 乎 ? 之犬馬 子思 面 日 稽

之禮 使者出,拜而辭之。 麾 亟,數也。 亟 也。 ,去聲。 一、故不悦。 數 以君 下同。 鼎肉, 命 而 來 熟肉 於其 摽,音杓。 饋 犬馬畜伋,言不以人 也。 ,當拜受之,非 末後復來饋 卒,末也。 使,去聲。 養賢 麾

能養者未必能用也,况又不能養乎?愧悟,自此不復令臺來致饋也。舉,用也。禮待己也。臺,賤官,主使令者。蓋繆公

道 思以 □ □ 後廩人繼粟 矣?」曰:「以君命將之,再拜稽首 也。 爲鼎肉 敢問 或 使己 庖人繼肉,不以君 君 欲 僕僕爾 養 君子, 亟拜 也,非 如 何 命將之。 斯 而 養君子之 可謂 受。 子 其 養

有 其職繼續 初以 亟 君 拜之勞也。 命 來饋 所 無,不以 則當拜受。 僕僕,煩猥 君命 來饋。 其後有 貌。 不使賢者 司各以

女,下字去聲。●○能養能舉,说賢之至而加諸上位,故曰:王公之尊賢者也。」百官牛羊倉廩備,以養舜於畎畝之中,後舉百官牛羊倉廩備,以養舜於畎畝之中,後舉

法也。唯堯、舜爲能盡之,而後世之所當女,下字去聲。●○能養能舉,悦賢之至

禮也。」 萬 謂庶人。 曰:「在 章 曰:「敢 或 庶人不傳質爲臣,不敢見於諸侯 日 市 問 井之臣,在野 不 見諸 侯, 何 日 義 草 · 莽之臣,皆 也?」孟 子

敢見也。 臣,但未仕者與 質,與贅同。 庶人執鶩, 相 見以自通 ○傳, 執贄在位之臣 通也。質者,士執 者 也 或 不同 内 莫非君 故不

義也;往見,不義也。 之,召之,則不往見之,何也?」曰:「往役,萬章曰:「庶人,召之役,則往役,君欲見

多聞也,爲其賢也。」曰:「爲其多聞也,則天「且君之欲見之也,何爲也哉?」曰:「爲其往役者,庶人之職,不往見者,士之禮。

「女下」,司禮監本乙倒。

聞欲見賢而召之也。 子不召師,而况諸侯乎? 爲其賢也,則吾未

爲,並去聲。

豈不曰:『以位,則子君也,我臣也,何敢 可召與? 友?1千乘之君,求與之友而不可得也,而况 君友也? 事之云乎,豈曰友之云乎?』子思之不悦也, 士,何如?』子思不悦,曰:『古之人有 繆公亟見於子思,曰:『古千乘之國以 以德 ,則子事我者也 ,奚可以 與 言 我 與 友 日

引子思之言而釋之,以明不可召之意。 ○孟子亟、乘,皆去聲。召與之與,平聲。○孟子

焉? 取非其招不往也。」 士不忘在溝壑,勇士不忘喪其元。孔子奚取「齊景公田,招虞人以旌,不至,將殺之。志

曰:「敢問招虞人何以?」曰:「以皮冠。喪,息浪反。○說見前篇。

人以旃,士以旂,大夫以旌。

者。 皮冠 庶人,未仕之臣。 皮冠者,虞人之所有事 田田 交龍爲旂。 獵之冠也。 析 通帛 事見《春秋 羽 而 日 也,故以 旃。士,謂已仕 注於旂干之首 傳 是 招之。 然則

日旌。

人之招招賢人乎? 之招招庶人,庶人豈敢往哉? 况乎以不賢「以大夫之招招虞人,虞人死不敢往。以士

之招招庶人,則不敢往。以不賢人之招招「欲見而召之,●是不賢人之招也。以士

賢人,則不可往矣。

路,出入是門也。 也。 欲見賢人而不以其道,猶欲 夫義,路也 9 《詩》云:『周道 禮 門 也。 其 惟 君 人 如底,其 子 而 能 閉 之門 由 直 是

庶

如矢。君子所履,小人所視。」」

礪石也,言其平也。矢,言其直也。視,視〇《詩》,《小雅・大東》之篇。底,與砥同,夫,音扶。底,《詩》作砥,之履反。

以爲廣狹

也

孔子非與?」曰:「孔子當仕有官職,而以其萬章曰:「孔子,君命召,不俟駕而行。然則以爲法也。引此以證上文能由是路之義。

官召之也。」

者而觀之,其說乃盡。 者而觀之,其說乃盡。○徐氏曰:「孔名召之,故不俟駕而行。○徐氏曰:「孔子、孟子,易地則皆然。」○此章言不見諸子、孟子,易地則皆然。」○此章言不見諸與,平聲。○孔子方仕而任職,君以其官

之善士,斯友天下之善士。 善士,一國之善士,斯友一國之善士,天下孟子謂萬章曰:「一鄉之善士,斯友一鄉之

士。推而至於一國、天下皆然,隨其高下言己之善蓋於一鄉,然後能盡友一鄉之善

其世也,是尚友也。」
頌其詩,讀其書,不知其人,可乎? 是以論「以友天下之善士爲未足,又尚論古之人。

也。 友之道,而非止爲一世之士矣。 以爲未足,又進而取於古人,是能進其 則不可以不知其爲人之實,是以又考其行 世,論其當世行事之迹也。 尚、上同。言進而 夫能友天下之善士,其所友衆矣。 上也。 頌、 言既觀 誦 通。 其言 論其 猶 取

卿,有異姓之卿。」王曰:「請問 王 齊宣王問卿。孟子曰:「王何卿之問 百言 一君有大過 卿 不同乎?」曰:「不同。 則 諫, 反覆之 貴 而 有貴 戚之卿。」 不 · 聽 也? 戚之 則

易位。」

故不得已而至於此也。可去之義。以宗廟爲重,不忍坐視其亡,更立親戚之賢者。蓋與君有親親之恩,無更立親戚之賢者。蓋與君有親親之恩,無

王勃然變乎色。

勃然,變色貌。

曰:「王勿異也。王問臣,臣不敢不以

孟子言也。

正對。」

則諫,反覆之而不聽,則去。」王色定,然後請問異姓之卿。曰:「君有過

過而不聽,已可去矣。然三仁貴戚,不能可易位。異姓之卿,大過非不諫也,但必大過而不聽,乃之卿,小過非不諫也,與次過而不聽,乃之卿,小過非不諫也,與於過而不聽,乃

邑。 行之於紂 此又委 9 任 而 霍 權 力之不 光異姓, 同, 乃 不 能 可 行 之於昌 以 執

孟子卷第十

論也。

446

率天下之人而禍仁義者,必子之言夫!」

朱熹集注

爲,是因子之言而爲仁義之禍也。

此,則天下之人皆以仁義爲害性

而

不肯

戕,音牆。與,平聲。

夫,音扶。〇言如

告子章句上

凡二十章。

告子曰:「性,猶杞柳也;義,猶桮棬也。 人性爲仁義,猶以杞柳爲桮棬。」 以

若巵匜之屬。告子言人性本無仁義,必待 之天理也。 栖,音杯。棬,丘圓反。○性者,人生所禀 杞柳,柜柳。栝楼,屈木所爲,

之説。

柳而 將戕賊杞柳而後以爲桮棬也? 孟子曰:「子能順杞柳之性而以爲桮棬乎? 矯揉而後成,如荀子性惡之説也 以爲桮棬,則亦將戕賊人以爲仁義與? 如將戕賊杞

孟子卷第十

告子章句上

諸西方則西流。人性之無分於善不善也,猶 告子曰:「性猶湍水也,決諸東方則東流,決

水之無分於東西也。」 子因前説而小變之,近於揚子善惡 湍,他端反。○湍,波流瀠回之貌也。告

混

447

乎? 人性之善也,猶水之就下也。 不善,水無有不下。 孟子曰:「水信無分於東西,無分於上下 人無有

性即天理,未有不善者也 言水誠不分東西矣,然豈不分上下乎?

今夫水,搏而躍之,可使過顙,激而行之,

可 人之可使 下 跳 夫,音扶。 使 也。 也 在 Ш 然其 爲 顙,額也。 是 豈 不善 搏,補 本 性 其 水 未嘗不就下,但 各反。 之 水之過額、 性 性哉? 亦 猶 是 搏 也 在山 其 撃 勢 一爲搏 皆 也。 則 然 激 不 躍 也 就 所

告子 乎 論 生 此 性 日 前前 0 人物之所 與 生之 後四章 近 世 謂 佛 性 以 語 氏 0 知 雖 所 覺運 不 謂 同 動者而 作 然其大指 用 是性 言。 者 告子 不 外 略

本

無定

體

加

可

以

無

所

不

爲

也

無

不

善善

本

無

恶

故

反之而後

爲惡。

非

使

而

逆

其

(性耳。

此章言性本善,故

順

之

之白 孟 子 猶白 曰 然。」「白羽之 0 _ 玉之白與?」曰:「然。」 生之 謂 白 性 也 也 猶 猶 白雪之白 白 之 謂 白 與? 白 雪

相

似

者同 下,孟子再問,而告子 之白者同 與,平聲。 是一 性矣 謂 下 之白 同 O 更 白 Ė 無 之謂 然,則是謂 差 别 白 也 猶 白 言 凡 有 羽 凡 牛 以 物

性與?」「然則犬之性猶牛之性,牛之性猶人

之

莫不 形而 以無 之禀,豈 所得於天之氣 性者,人之所得於 子自知其説之非 覺,皆能運 之爲理,而 孟子又言,若 與物若不異也 有 下者也。 不 善 是 物之所 氣。 動 以 而 所謂 爲 其 果如 然以 人物 也。 萬 得 9 性皆 而 氣者當之,是以杞柳 物之靈也。 此 而 以理言之,則仁義 天之理 性,形 氣言之,則 之生,莫 不 全哉? 能 無 則 對 以 犬 而 也; 也。 異 牛 不 上 矣。 告子 此 與 知 有 生者,人之 者 人 人之性 是性 覺 也;氣 愚 皆 不 於 運 按 是 知 禮 有 八湍 動, 性 所 智 知

同 紛紜舛錯,而此章之誤乃其 水之喻,食色無善無不善之説,縱横繆戾, 一蓋徒 而不知仁義禮智之粹然者,人與物 孟子以是折之,其義精矣。 知知 覺 運 動之蠢 然者 本 根。 一人與 所以 異 物 然

告子曰:「食色,性也。 外外 也,非内 也。 仁,内也,非外也;

也

不必求合於義也 事物之宜由乎外。 告子以人之知覺運動者爲性,故言人之甘 食悦色者即其性。 學者但當用力於仁,而 故仁愛之心生於内,而

從其白於外也,故謂 孟 而 我長之,非有長於我也,猶彼白而我白之, 子曰:「何以謂仁 之外 内 義外也?」曰:「彼長 也。」

長,上聲。下 也 我白之,我以彼爲白也。 同。 我 長之,我以彼 爲長

> 與? 也。 曰:「異於白馬之白也,無以異於白人之白 二字宜衍。」●○李氏 與,平聲。下同。○張氏曰:「上『異於』 不識 且謂長者義乎? 長馬之長 也, 曰:「或有闕文焉。 長之者義乎?」 無 以 異 於 長 人之長

也。 義之非外明矣。 白人不異,而長馬、長 長馬、長人,所謂彼長而我長之也。 愚按:白馬、白人,所謂彼白而我白之也 義不在彼之長,而在我長之之心,則 人不同 是乃所謂義 。白馬

吾之長,是以長爲悦者也,故謂之外 我爲悦者也,故謂之内。長楚人之長,亦長 曰:「吾弟則愛之,秦人之弟則不愛也,是以 在外。 言愛主於我,故仁在内,敬主於長,故義 也

⁰ 宜」,元甲本、元乙本、司禮監本、吴本作「疑」。

則 E 亦 . 有然者也,然則耆炙 耆秦人之炙, 無 以 異 亦 於 有外與? 耆吾炙。 夫 物

卒不聞 謂 四章,告子之辯 性 出 耆 而 不得於言 不得其正 ,故因其所明者 與與 於心也。 嗜 其 同。 能 也 ,勿求於心者,所以 自 〇林 夫,音扶。 反 屢 而 屈 氏 而 有 ,而屢變其説以 通之。」〇自篇首至此 曰:「告子以 所 〇言長之耆之,皆 疑 也。 此 卒於鹵莽 食色爲 E 水勝 其所

孟 季子問: 孟 而 未達 季子 故 疑 公都 私 孟 子曰:「何 論之。 仲子之弟 以謂義内 也 蓋聞 也? 孟子之言

日 :「行吾敬,故謂之内 所敬 之人 雖 在 外 然 知其 也 ___ 當 敬 而 行

吾心

暫

時

也

由

中

出

之敬以 敬 之,則 不 在外也

鄉 人長於伯 兄一歲, 則誰 敬?」曰:「 敬

> 兄。二 在 敬 此 長,上聲。 季子問、公都子 長之心,果不由中 所 酌 長 則 在 誰 彼,果 〇 伯 先?」曰 長 答。 在 也。 外 . 圃 也 非 先 季子又言 酌, 由 酌 酌 内 鄉 酒 也 人。」「 也 如 所 此 此 則 皆 敬

出

父乎? 子亦 公都 在 惡在其 弟爲尸,則誰敬?』彼將 鄉人。」 曰:『在 子 不能答,以 敬弟乎? 敬 叔 位故 父也 也。 告 ?』彼將 彼 孟 將 庸敬 子。 日 「敬 曰『在 在 敬 孟 兄,斯 弟。 叔 子 父。 日 位 . 須之敬 子 故 Ī 敬 也 日 叔

位 爲 惡,平聲。 鄉 之,然敬之當 人 在賓客之位 言因時 〇尸,祭祀 如祖 制宜 也。 考 皆 所 也。 主 庸 以 在位, 常 象神 也 也 弟在 雖 斯 子 P

季子聞之曰:「敬 叔父則敬 ,敬弟則敬 果在

外,非 則飲 由内也。」公都子曰:「冬日則飲湯,夏 水,然則飲食亦 在外也?」

H

此 答,大指略同,皆反覆譬喻以曉當世,使明 亦上章耆炙之意。 〇花氏曰: 二章問

仁義之在内, 則知人之性善,而皆可

以 爲

公都子曰:「告子曰:"性無善無不善也。」 胡 氏之説蓋 亦生之謂性、食色性也之意,近世蘇氏、 如此

文、武興,則民好善; 或曰 一 可以 爲善,可以爲不善。 幺 、厲興,則民好暴。」 是故

子且以爲君 而有象; 以瞽瞍 或曰:『有性善,有性不善。是故以堯爲君 好,去聲。 子性有三品之説蓋如此。 ,而有微子啓、王子比干。』 〇此即湍水之説 爲父而 有舜; 也。 按此文,則微 以 紂 爲兄之

> 子、比干皆紂之叔父,而《書》稱微子 此或有誤字。 爲 商

「今曰『性善』,然則彼皆非與?」 王元子,疑

與,平聲。

善也。 孟子曰:「乃若其情, 則可 以爲善矣,乃所謂

本但可以爲善而 乃若,發語辭。 情者,性之 不可 以爲惡,則性之本善 動 也。 人之情

可知矣。

也。

之,恭敬之心,人皆 有之。惻隱之心,仁也,羞惡之心,義也, 一惻隱之心,人皆有之,羞惡之心,人皆有 若夫爲不善,非才之罪 是性,則有是才,性既善則才亦善。 夫,音扶。 爲不善,乃物欲陷溺而然,非其才之罪也。 〇才,猶材質,人之能也。 有之,是非之心,人皆

禮

恭敬之心,禮也,是非之心,智也。

無算 故 非 者,不能 由 求 外 則 鑠 得 我 盡其才者也 之,舍則 也 我固 失之。」 有之也, 或相 弗思耳 倍 蓰 矣 矣。 而

故言有 彼欲 不思而 也。 是 思 算,數也。 敬之發於外者也,敬者,恭之主 惡,去聲。 不求而 四 「者爲 其 不 求之耳。 擴 同 不能擴充以 而 舍,上聲。蓰,音師。 言四者之心人所固 火消金之名,自外以 耳。 義 充之,此 禮智之端 所以善惡相去之遠,由 直 盡其才也。前篇言 因 用 而 以著其本體 此 有 不 〇恭 至内 言端者 ,但人自 於 中 也。 不

乎! 分,好好 詩》 是懿 故有 三: 三天 物 德。]孔子曰:『爲此 必 生蒸 有 則, 民,有 民之秉夷也,故 物 有 詩者 則。 其 民 好 知 之 是 道 秉

好,去聲。○《詩》,《大雅·蒸民》之篇。

善可 夷。 蒸。 《孟子》本文小異。蓋 是。」〇張 則自暴自棄之人也。」又曰:「論 湯、武身之是 之,則氣無清濁 禀其清者爲賢,禀 舜至於塗人一也。 自明矣。○程子曰:「 情無不好此 慈孝之心,是民 法,如有耳 反之則天 氣 有 弗性者 ,不備; 《詩》作 見,而 詩》作烝 地之性存 焉。」 子曰:「形 論 自 彝 公都子所問之三説,皆不 一懿德 常常 也。 氣 則 衆也 愚 皆可 不 所秉 有聰 者。 也 按 論 孔子所言下愚不移者, 其 焉 才禀於 性 而 執之常性 明之德,有 物, 至 濁 以此觀之,則人 懿 性即 孟子專以其發於性 程子 不 後有氣 者爲 美 於善而 故氣質之性,君 事 · 明。 氣, 理 也 也 此 愚。學而 也 説 也,故 氣 質之性,善 復性 二之則 父子 有 則 才 有清 理 性 物 之本 則堯 法 八性之 人人之 辨 則 不 必 也 論 知 不 而 與 子

性雖本善,而不可以 蓋 殊,各有所當,然以事理考之,程子爲密。 不同矣,張子所謂氣質之性是也。二説 者言之,●故以爲才無不善; 禀於氣者言之,則人之才固 所當 氣質所禀雖有不善,而不害性之本善, 深玩也。 無省察矯揉之功。 有昏明强 程子兼指 弱之 學 雖 其

然也。 暴。 孟 子曰:「富歲,子弟多賴; 凶歲,子弟多 非 天之降才爾殊也,其所以陷溺其 心者

者

故有 富歲 以陷溺其心 所顧 豐年 藉 也。 而 而 爲暴。 爲善; 賴,藉也。 凶年 衣食不足,故有 豐年衣食饒足,

不同, 同,浡然而生,至於日至之時 今夫麰麥,播 則 地 有 肥 種 磽, 而 耰之,其 雨 露之養,人事之不 地 ,皆熟矣。 同, 樹之時 雖有 又

> 齊 也。

時, 反。 夫,音扶。 謂當成熟之期也。 〇辨,大麥也。 麰,音牟。 耰, 耰, 音憂。 磽,瘠薄 覆種 也。 也 日 至之 苦交

之? 故凡 聖人與我同類者。 同類者 舉 相 似 也 何 獨 至於 人 而 疑

也。」屢之相似,天下之足同 故龍子曰:『不知足而爲屨,我知其不 聖人亦人耳,其性之善,無不同 也。 也 爲 曹

費,音匱。 至成費也 小而爲之屨,雖未必適中,然必似足形,不 ○ 費, 草器也。 不 知人足之大

犬馬之與我不同 耆者也。 口之於味,有同耆也。 如 使 П 類也,則天下何耆皆從易牙 之於味也,其性與人殊,若 易牙,先得我口之所

⁰ 以」,元甲本、司禮監本、吴本作「指

之口相似也。 之於味也? 至於味,天下期於易牙,是天下

情耳亦然。至於聲,天下期於師曠,是天下言易牙所調之味,則天下皆以爲美也。 耆,與嗜同。下同。○易牙,古之知味者。

天下皆以爲美也。 言師曠所和之音,則

之耳相似也。

不知子都之姣者,無目者也。「惟目亦然。至於子都,天下莫不知其姣也

好也。〇子都,古之美人也。姣,

謂理 故理義之悦我心,猶芻豢之悦我口。」 於心,獨 也,有同 故曰:口之於 也 義 無 聽 所同 焉 也。 目之於色也 聖人 味 然乎?心之所同然者何 也,有 、先得我 同耆 ,有同美焉 心之所同 馬 耳 之於 然耳。 也? 至 聲

> 然,猶 始 實體察得理義之悦心,真猶芻豢之悦 悦理義者,但聖人則先知先覺乎此耳,非 心,猶芻豢之悦我口。」此語親切 有以異於人也。」程子又曰 處物爲義,體用之謂也。 曰 一拳,犬豕 得。 可 也。 是 也。 草 食曰 程子 芻,牛羊 i i 孟子言人心無 「理義之悦我 「在物 . 是 也。 有味。 爲 須

以爲未嘗有材焉,此豈山之性 息,雨露之所潤,非無萌蘗之生焉,牛羊又從 也,斧斤伐之,可以爲美乎? 孟 而牧之,是以若彼 子曰: **一** 牛 山之木嘗美矣,以 濯濯 也。 人見 是其日夜之所 也哉? 其 其濯濯 郊 於 大國

今爲大國之郊,伐之者衆,故失其美耳。外謂之郊。言牛山之木,前此固嘗美矣,糵,五割反。○牛山,齊之東南山也。邑

之貌。 嘗間 息 蘖,而牛羊又從而害之,是以至於光潔 萌 ,芽也。 生長 斷,故日 材,材木也。 也。 蘖,芽之旁出者也。 夜之間 日 夜之所息, 。言山木雖 凡物 皆有 謂 氣 战,猶 所生長· 濯濯,光潔 化 流 行未 有 也 而

好惡與 見其 可以爲美乎? 其良心者,亦猶斧斤之於木也,旦 之情也哉 存;夜氣不足以存,則其違禽獸不遠矣。 人 有梏亡之矣。 雖存乎人者,豈無仁義之心哉? 八禽獸 人相近 也 前 梏之反覆,則其夜氣不足以 也者幾希,則其旦晝之所 其日夜之所息,平旦之氣,其 以爲未嘗有才焉者,是豈人 旦而伐之, 其所以放 爲,

接 即 好、惡,並 所謂 之時 清明之氣 仁義之心 去聲。 也。 也。 良 平旦之氣,謂未與物 好惡 心者,本然之善 與人相近,言得 心

> 遠矣。 也。 失,然其日夜之間,亦必有所 則平旦之氣亦不能清,而 生,日以 晝之所爲,是以 以害其夜之所息,夜之所息, 萌蘖,而牛羊又牧之也。 不善,又已隨而梏亡之,如山木既伐,猶 發見者。● 旦未與物接,其氣清明之際, 人心之所 反 覆 寖薄,而不足以存其仁義之良心 同 但其發見至微,而旦晝 展 然 轉 也。 也 展 轉 幾 言 相 希,不多 人之良 害。 畫之所爲, 所 ,又不能 生長。 好 至於夜氣之 良 也。 惡遂 C 心 雖 所爲之 必 梏,械 故平 E 與 既 猶 勝 放 其 有 有

無草木也。

不消。 不消。 不消。 不消。

物

長,上聲。〇山木人心,其理一也。

■「必猶」,元乙本、司禮監本、吴本乙倒。

知其鄉。」惟心之謂與?」「孔子曰:「操則存,舍則亡,出入無時,莫

也。 説 湛然虚明氣象自可見矣。」孟子發此夜氣之 夜氣愈清。 守之即 愚聞之師曰:「人,理義之心未嘗無,唯 學者當無時 得失之易,而保守之難,不可頃刻失其養。 處如此。 在 舍而言耳。 如平旦之時,則此心常存,無適而非仁義 舍,音捨。 ,於學者極有力,宜熟玩而深省之也。 此,舍之則失去,其出人無定時,亦無定 〇程子曰:「心豈有出人? 亦以操 在爾。 孟子引之,以明心之神明不 與,平聲。○孔子言心,操之則 操之之道,敬以直内而已。」〇 夜氣清,則平旦未與物接之時 而不用其力,使神清 若於旦晝之間不至梏亡,則 氣定,常 測 持

> 之者至矣,吾如有萌焉何哉? 之,未有能生者也。 雖有 或, 天 與 下易 惑同,疑怪也。 生之物 吾見亦罕矣,吾退 也 王,疑指 日 暴之,十日 齊王 加 寒

雖有萌蘗之生,我亦安能如之何哉? 我退則諂諛雜進之日多,是十日寒之也。 温之也。我見王之時少,猶一日暴之也;

得也。弈秋,通國之善弈者也。使弈秋誨二得也。弈秋,通國之善弈者也。使弈秋誨二人弈,其一人專心致志,惟弈秋之爲聽。一一分雖聽之,一心以爲有鴻鵠將至,思援弓繳而射之。雖與之俱學,弗若之矣。爲是其智而射之。雖與之俱學,弗若之矣。爲是其智,不專心致志,則不

夫,音扶。繳,音灼。射,食亦反。爲是之

孟

子曰:「無或乎王之不智也。

^{■「}也」,司禮監本作「矣」。

正不 然賢人易疏,小人易親,是以寡不 之。●○范氏 也。 君子養之以 大夫之時多,親宦官宫妾之時 講官,言於上曰:「人主一日之間 名秋也。 涵養氣質而熏陶德性。」時不能用 多 去聲。 か、蓋以 ·能勝 數,技也。 繳,以 邪。 此 若與之與,平聲。 善則智,小人養之以惡則愚。 也 曰:「人君之心,惟 自古國家治日常少,而亂 繩繫矢而射也。 致,極 也。 弈 秋 少 ,善弈者, 〇程子爲 一,則可 弈, 能勝 接賢 在 ,識者恨 所 韋 養。 衆 日 以 1 棋

生,亦 也。 可 孟 得兼 子 İ 二者不可得 我 · (魚) ,舍生而 所 欲 也 我 取 9 義者也 義, 所 兼 欲 亦我 舍魚 也 9 所 而 熊 欲 掌 取 也。 熊 亦 掌者 二者不 我 所 也 欲

魚 與 熊掌 皆美味, 而熊掌 尤

美也

也。 生亦我所欲,所欲 死 亦 我 所 惡 ,所惡 有 甚 有甚於死者,故 於生者 故 不 爲 患 苟 有 得

所不辟也

秉彝義 惡死而有所不避也。 惡、辟,皆去聲。 人利害之常情, 義之意。 理之良 得,得 心,是以欲生而 生也。 而 下同。 欲 恶 有甚 欲生惡 〇 釋 於 所以 生 死者,雖 不 爲 死者,乃 舍 荷 生 衆 取

何 如使人之所欲莫甚於生,則 不用也? 使人之所惡莫甚 凡 於 可 死 以 者 得 生者 則 凡

可

以辟患者,何不爲

也?

常

情 設 而 則凡 爲之矣。 使人無秉彝之良心,而 可 以 偷生免死 者 肾將 但 有 利 不 害 顧 之私 禮 義

0 識 者恨之」,原脱。 據司禮監本、 仿元本、吴本補。

有不爲也。「由是則生而有不用也,由是則可以辟患而

如此。由其必有秉彜之良心,是以其能舍生取義

要了。○羞惡之,惟賢者能存之而不理,去聲。○羞惡之心,人皆有之,但衆人喪,去聲。○羞惡之心,人皆有之,但衆人惡,去聲。○羞惡之心,人皆有之,賢者能勿喪耳。

不屑也。而與之,行道之人弗受,蹴爾而與之,乞人而與之,行道之人弗受,蹴爾而與之,乞人「一簞食,一豆羹,得之則生,弗得則死,嘑爾「一簞食,一豆羹,得之則生,弗得則死,嘑爾

也。 猶惡無禮,有寧死而不食者。 中凡人也。 豆、木器也。 食,音嗣。 不屑,不以 嘑,呼故 蹴, 嘑,咄 爲 踐 潔也。 踏 啐之貌。 反。 也。 言雖欲食之急而 乞人, 丐乞之人 蹴,子六反。 行道之人,路 是其羞惡之

> 我與? 焉 ? 萬 本心 鍾 爲宫室之美、妻妾之奉 則 ,欲惡有甚於生死者,人皆有之也 不 辨 禮 義 而受之。 工、所識 萬 鍾 於 窮乏者得 我 何 加

者。 有羞惡之心,此言衆 所知識之窮乏者感我之惠 於我身無所增益 爲,去聲。 亦人所易昏 蓋理義之心雖曰固有 與,平聲。 也。 也。 〇萬鍾: 人所以喪 所識窮乏者得 也。 而物欲之蔽 於我 上言 之由 何 我,謂 加 此三 人皆

亦不可以已乎? 此之謂失其本心。」 死而不受,今爲所識窮乏者得我而爲之,是爲身死而不受,今爲妻妾之奉爲之;鄉爲身 「鄉爲身死而不受,今爲宫室之美爲之;鄉

爲身死猶不肯受嘑蹴之食,今乃爲此三者三者身外之物,其得失比生死爲甚輕。鄉、爲,並去聲。爲之之爲,並如字。〇言

免計豐約於宴安之時,是以君子不可頃刻本心,謂羞惡之心。○此章言羞惡之心,而不不受無禮義之萬鍾,是豈不可以止乎?

孟子曰:「仁,人心也;義,人路也。

加

不省察於斯焉。

舍,上聲。〇「哀哉」二字,最宜詳味,令人「舍其路而弗由,放其心而不知求,哀哉!

人有雞犬放,則知求之,有放心,而不

惕然有深省處

知求。

義,而此下專論求放心者,能求放心,則不知求之,心放則不知求,豈愛其至輕而忘知求之,心放則不知求,豈愛其至輕而忘程子曰:「心至重,雞犬至輕。鷄犬放則

違於仁而義在其中矣。

學問之道無他,求其放心而已矣。」

學問之事,固非一端,然其道則在於求其 言,●程子又發明之,曲盡其指,學者宜服 下學 之心約之,使反復入身來,自 子曰:「聖賢千言萬 曰從事於學,而終不能有所發明矣。 昭著,而可以上達;不然,則 放心而已。 而 上達也。」此 蓋能如是,則志氣清明,義理 語,只是欲人將已放 乃 孟 子開 香 能尋向上去, 昧 示要切之 放 逸, 故 程 雖

● 「要切」,司禮監本、吴本乙倒

膺而勿失也。

爲指之不若人也。 害事也,如有能信之者,則不遠秦、楚之路,孟子曰:「今有無名之指,屈而不信,非疾痛

信,與伸同。爲,去聲。○無名指,手之第

四指也。

惡,此之謂不知類也。」「指不若人,則知惡之,心不若人,則不知

思,去聲。〇不知類,言其不知輕重之

等也。

所以 孟 ^{豈愛身不若桐} 子 曰:「拱把之桐 養之者。 、梓哉。 至於身,而 、梓,人苟 弗思甚 不知 所 欲 世 生之,皆知 以養之者,

梓,二木名。 拱,兩手所圍也。把,一手所握也。桐、

孟子曰:「人之於身也,兼所愛。兼所愛」則無尺寸之膚不愛焉,則無尺寸之膚不愛焉,則無尺寸之於身也,兼所愛。兼所愛,則

今有場師,舍其梧檟,養其樲棘,則爲賤場賤而小者,口腹也。貴而大者,心志也。

治場圃者。梧,桐也。檟,梓也。皆美材舍,上聲。檟,音賈。樲,音貳。○場師,

師焉。

「養其一指而失其肩背,而不知也,則爲狼疾

也。

樲

棘

小棗

非

美材

也

人也。

狼善顧,疾則不能,故以爲失肩背之喻。

「飲食之人,則人賤之矣,爲其養小以失

大也。

爲,去聲。○飲食之人,專養口腹者也。

膚哉?」

飲食之人無有失也

則

П

腹豈適

爲尺寸之

已矣。」

己。 雖 此言若使 所當養,而終不可以小害大、賤害貴 腹之養,軀命所關 但養小之人,無不失其大者,故口 專養 \Box 腹, ,不但爲尺寸之膚 而 能不失其 大體 也 腹 而 則

其小體爲小人。」 人,何也?」孟子曰:「從其大體爲大人,從公都子問曰:「鈞是人也,或爲大人,或爲小

曰:「鈞是人也,或從其大體,或從其小體,

交物, 乎其大者,則其小者弗能奪也。● 之,不思則不得 何也 ?」曰:「耳目之官不思? 則 引之而 也。 已矣。 此 心之官 天之所與 而 則 蔽 我者,先立 思 此 於 思 八爲大人 物 則 得 物

思,而 者 職 其理,而物 以思爲職 此物,其引之而去不難矣。 蔽於外物 官之爲言司也。 而物來蔽之。 也。 <u>一</u> 而 不能思,是以蔽於外物。 耳目之欲不能奪之矣。 心爲大。 然此 則 不能蔽; 凡事物之來,心 天之此,舊本多 亦 此三者,皆天之 若能有以立之,則 耳司聽,目司 物 失其職,則 而 己。 又以外物 心 得 此 既不 作比 則能 視, 其 不 所 所以 職,則 得 以 事 能 各 思之 其 與 而 交於 思 爲 無 有 理, 我 捎 大 得 而 所 不 而

■「弗」,司禮監本作「不」。

克敬 其所存者,●嗚呼幾希! 君子存誠,克念 間 惟心耳。 身。是身之微 役,乃獸 短,故且從今本云。 亦作此,乃未詳孰是。 - 茫茫堪輿,俯仰無垠。 注》亦以比方釋之。今本既多作 抵隙,爲厥心 天君泰然,百體從令。」 乃禽。 往古來今,孰無此心? 心爲 ,太倉稊米。 病。 惟口 一心之微,衆欲攻之。 耳目,手足動 ○范浚《心箴》曰: 人於其間 但作比字,於義 參爲三才,日 此,而 ,眇然有 靜。 投 形 爲 注

樂,音洛。○天爵者,德義可尊,自然之樂善不倦,此天爵也。公卿大夫,此人爵也。孟子曰:「有天爵者,有人爵者。仁義忠信,

脩其天爵,以爲吾分之所當然者耳。人爵「古之人脩其天爵,而人爵從之。

貴也。

從之,蓋不待求之而自至也。

棄其天爵,則惑之甚者也,終亦必亡而「今之人脩其天爵,以要人爵,既得人爵,而

已矣。」

要,音邀。〇要,求也。

脩天爵

以

要

人爵

又甚焉,終必並其所得之人爵而亡之也。其心固已惑矣,得人爵而棄天爵,則其惑

《三音·房思耳。 孟子曰:「欲貴者,人之同心也。人人有貴

貴於己者,謂天爵

能賤之。 「人之所貴者,非良貴也。趙孟 貴於已者,謂天爵也。

之所貴,趙

孟

人之所貴,謂人以爵位加己而後貴也。良

^{● 「}所」,殘宋本、元甲本、元乙本、司禮監本、吴本作

矣。 者,本然之善也。 禄與人而使之貴,則 若良貴,則人安得而賤之哉? 趙孟 亦 晉卿 能 奪之而 也。 能 使 之賤 以 爵

義也 施於身,所以不願人之文繡也。」 「《詩》云: 『既醉以酒 ,所以不願人之膏粱之味 既飽 以 德。」言飽乎仁 也; 令聞 廣 譽

者也。 也。 穀。令,善也。 聞,去聲。 飽,充足也。 仁義充足而聞譽彰著,皆所謂良貴 尹 氏 〇《詩》,《大雅·既醉》之篇。 願,欲也。 曰:「言 聞,亦譽也。 在 膏,肥肉。 我 文繡、衣之美 者重, 粱,美 則 外

謂之水不勝火,此又與於不仁之甚者也。 仁者,猶以一杯水救 孟子曰:「仁之勝不仁也,猶水勝火。今之爲 與 ,猶助也。 仁之能勝不仁,必然之理也。 一車薪之火也; 不熄,則

> 者也 但爲之不力,則無以勝不仁,而 真不能勝,是我之所 爲 有以 深 人遂 助 於 不仁 以爲

「亦終必亡而已矣。」 其小仁而亡之。● 言此人之心,亦且 至,而不反諸己也。」 自怠於爲仁,終必 〇趙氏日 「言爲仁不

並

與

孟 不如荑稗。夫仁,亦在乎熟之而已矣。」 熟 穀之美也。但五穀不熟,則反不如 稗,草之似穀者,其實亦可食,然不 荑,音蹄。 子曰:「五穀者,種之美者也,苟爲 猶爲仁而不熟,則反不如爲他道之有 稗,蒲賣反。夫,音扶。〇 能 **荑**稗之 不熟, 如 荑 五

0 小仁」,司禮監本、仿元本、吴本作「所爲」。

之有成也。○尹氏曰:「日新而不已,種之美,又不可以仁之難熟,而甘爲他道成。●是以爲仁必貴乎熟,而不可徒恃其

則熟。」

必志於彀。 孟子曰:「羿之教人射,必志於彀,學者亦

學,謂學射。也。彀,弓滿也。滿而後發,射之法也。彀,古候反。○羿,善射者也。志,猶期

大匠誨人,必以規矩,學者亦必以規矩。」大匠,工師也。規矩,匠之法也。○此章教,弟子舍是則無以學。師舍是則無以會,此方正,工師也。規矩,匠之法也。○此章人之道乎。

孟子卷第十一

「他」,原作「它」,據仿元本、吴本改。

0

告子章句下

凡十六章。

任人有問屋廬子曰:「禮與食孰重?」曰:

禮重。」

任,平聲。 〇任,國名。 屋廬子,名連,孟

子弟子也。

色與禮孰重?」

任人復問也。

禮食,則得食,必以禮 曰:「禮重。」曰:「以禮食,則飢而死,不以 乎? 親 迎,則 不得

妻, 不親迎, 則得妻, 必親迎乎?」

孟子卷第十二

告子章句下

朱熹集注

曰:「於答是也,何有? 屋廬子不能對,明日之鄒,以告孟子。 迎,去聲。

孟子

於,如字。○何有,不難 也。

「不揣其本而齊其末,方寸之木可使高於

岑樓。

「金重於羽者, 豈謂一鉤金與一輿羽之 者,至高,喻禮。若不取其下之平,而升寸 揣,初委反。〇本,謂下。末,謂上。 木於岑樓之上,則寸木反高,岑樓反卑矣。 之木,至卑,喻食色。岑樓,樓之高銳似山 方寸

465

謂哉?

禮有輕於食色者。羽本輕,而一興多,故 重,喻食色有重於禮者。 鉤,帶鉤也。金本重,而帶鉤小,故輕,喻

重? 取色之重者,與禮之輕者而比之,奚翅 取食之重者,與禮之輕者而比之,奚翅食

而 言 得 親 翅,與啻同 己。 何但。 妻而 迎,禮之輕者也 廢人 言其 倫, 古字 相去懸絶,不但有輕重之差 食色之重者 通 用, 飢 而 施 死 智 也。 以 反。 滅 奚翅 其性 禮 猶

子曰

然。

摟其 不終 往應之曰:『紾兄之臂而 則不 處子,則 · 得 得妻; 食 ,則將総之乎? 不摟,則不 奪之食, -得妻, 踰東 則 則 家 得 將 牆 食; 摟 而

其重 也。 棋 其中又各自有輕 此 膠 酌 章言義理 者,而 柱 處子,處女也。 ,毫髮不差,固 而 調 以 摟,音婁。 瑟,所以斷之,一視於理之當 事 之相較,則 物,其 重之别 不肯枉 (輕重 此二者, ○ 総, 禮爲 固 聖賢 尺 /而直 戾 有大分,然於 禮與 尤 於此 也。 重 尋 食 也 摟, 色皆 亦 未 牽

哉?

弗爲耳

而

曹 交問 曰:「人皆可 以爲堯、舜,有諸?」

趙氏 曹交,曹君之弟 也。 人 皆 可 以

也

長,句。 交聞文王十尺,湯 爲堯、舜,疑古語,或孟子所嘗言 食粟而已,如何 九尺,今交九尺 則可?」 兀 7 以

是 舉 此,力不能 日: 百鈞, 亦 曹交問也。 「奚有於是? 爲 鳥 則 獲 爲有 勝 而 匹 食粟而 E 力人矣。 矣。 雛,則 亦爲之而已矣。 已,言無他 夫 爲 人人豈 然則舉烏 無力人矣; 以 材能 不 獲之任 勝 有 也 爲 今日 人 於 患

勝, 之有力人也,能舉移千鈞 兀。 平聲。 禮記 》説 兀 元 字 爲 本 鶩」, 作 鳴 是 也。 鴨 也 烏 從 省

夫徐行者,豈人所不能哉? 所不爲也。堯、「徐行後長者謂之弟,疾行先長者謂之不弟。

舜之道,孝弟而已矣。

○陳氏曰:「孝弟者,人之良知良能,自然 之性也。堯、舜人倫之至,亦率是性而已, 豈能加毫末於是哉?」○楊氏曰:「堯、舜 之道大矣,而所以爲之,乃在夫行止疾徐 之道大矣,而所以爲之,乃在夫行止疾徐 之間,非有甚高難行之事也。百姓蓋日用 而不知耳。」

桀而已矣。」 已矣。子服桀之服,誦桀之言,行桀之行,是已矣。子服桀之服,誦堯之言,行堯之行,是堯而 「子服堯之服,誦堯之言,行堯之行,是堯而

故孟子告之如此兩節云。○言爲善爲惡,皆之行、之行,●並去聲。○言爲善爲惡,皆之行、之行,●並去聲。○言爲善爲惡,皆

曰:「交得見於鄒君,可以假館,願留而受業

於門。」

見,音現。〇假館而後受業,又可見其求

道之不篤。

求耳。子歸而求之,有餘師。」曰:「夫道,若大路然,豈難知哉? 人病不

夫,音扶。○言道不難知,若歸而求之事裁敬長之間,則性分之内,萬理皆備,隨處報別,無不可師,不必留此而受業也。○故孟子教之以孝弟,而不容其受業。蓋孔故孟子教之以孝弟,而不容其受業。蓋孔子餘力學文之意,亦不屑之教誨也。

也。」」孟子曰:「何以言之?」曰:「怨。」公孫丑問曰:「高子曰:『《小弁》,小人之詩

● 下「之行」二字,原脱,據元乙本及正文補。

情也 是宜臼之傅爲作此詩,以敘其哀痛迫切之 弁,音 雅》篇名。 又得褒姒 ,生伯服,而黜申后、廢宜曰。於 周 高 妣 子 \pm ,齊人也。《小 娶 申 后 , 生太子 弁》,《 宜 小

仁也。固矣夫,高叟之爲詩也!」 無他,戚之也。《小弁》之怨,親親也。親親,也。其兄關弓而射之,則己垂涕泣而道之,也。其兄關弓而射之,則己談笑而道之,無他,疏之口。「固哉,高叟之爲詩也! 有人於此,越

國名。道,語也。親親之心,仁之發也。固,謂執滯不通也。爲,猶治也。越,蠻夷關,與彎同。射,食亦反。夫,音扶。○

曰:「《凱風》何以不怨?」

能安其室,七子作此以自責也。《凱風》,《邶風》篇名。衛有七子之母,不

曰:「《凱風》,親之過小者也;《小弁》,親之

之過 過大者也。 小而怨,是不 親之過 可 大而 磯 也。 不怨; 愈 是 疏 不孝 愈 疏 巾 也 9 親

磯,音機。○磯,水激石也。不可磯,言微不可磯,亦不孝也。

激之而遽怒也

地名。 〇宋,姓,牼,名。石丘,宋牼將之楚,孟子遇於石丘。

曰:「先生將何之?」

曰:「吾聞秦、楚構兵,我將見楚王説而罷趙氏曰:「學士年長者,故謂之先生。」

之。楚王不悦,我將見秦王説而罷之。二王

我將有所遇焉。」

説 人。」以事考之,疑即 悦 説 下教,强聒不舍。」《疏》云:「齊宣王 ,音税。 則將見秦王 「有宋鈃者,禁攻寢 〇時 也。 宋牼方欲見楚王,恐其不 此人也。 遇,合也。 兵,救世之戰。 按《莊子》 上 時

之志則大矣,先生之號則不可。何如?」曰:「我將言其不利也。」曰:「先生曰:「軻也請無問其詳,願聞其指。説之將

則不可也。」息民爲說,其志可謂大矣。然以利爲名,息民爲説,其志可謂大矣。然以利爲名,徐氏曰:「能於戰國擾攘之中,而以罷兵

以事其父,爲人弟者懷利以事其兄,是君臣、也。爲人臣者懷利以事其君,爲人子者懷利以罷三軍之師,是三軍之士樂罷而悦於利以罷三軍之師,是三軍之士樂罷而悦於利,

父子、兄弟終去仁義,懷利以相接,然而不亡

者,未之有也。

樂,音洛。下同。

接 其兄,是君臣、父子、兄弟去利,懷仁義以 於仁義也。 日 子者懷仁義以事其父,爲人弟者懷仁義 仁義,而罷三軍之師,是三軍之士樂罷 「先生以仁義説秦、楚之王,秦、楚之王悦於 利? 也。 然 耐 爲人臣者懷仁義以事其君,爲 不王者,未之有也。 何 以 而 必 相 事 悦

然其心有義利之殊,而其效有興亡之異,王,去聲。○此章言休兵息民,爲事則一,

學者所當深察而明辨之也。

不報。 處於平陸,儲子爲相,以幣交,受之而和。 處於平陸,儲子爲相,以幣交,受之而不

報也。 者,來見則當報之,但以幣交,則 爲之居守其國也。 任 季任,任君之弟。任君朝會於鄰國 平聲。 相 ,去聲。 儲子,齊 下 同。 相也。不報 〇趙氏 「季任 不必 曰 0

儲子。屋廬子喜曰:「連得間矣。」●他日由鄒之任,見季子,由平陸之齊,不見

間隙而問之。屋廬子知孟子之處此必有義理,故喜得其

其爲相與?」 問曰:「夫子之任見季子,之齊不見儲子,爲

交,而禮意不及其物也。」

相,可以

至齊之境

内而

不來見,則

雖

以

儲子但爲齊相,不若季子攝守君位,故輕爲其之爲,去聲。下同。與,平聲。○言

不享,惟不役志于享。』曰:「非也。《書》曰:『享多儀,儀不及物曰

之耶?

《書》,《周書·洛誥》之篇。享,奉上也。

禮意不及其幣,則是不享矣,以其不用儀,禮也。物,幣也。役,用也。言雖享

志

而

于享故也。

「爲其不成享也。」

·蘆子兇。或問之,屋廬孟子釋《書》意如此。

見孟子,則以幣交而禮意已備。儲子爲齊徐氏曰:「季子爲君居守,不得往他國以之鄒,儲子得之平陸。」

而去之,仁者固如此乎?」 自爲也。夫子在三卿之中,名實未加於上下 淳于髡曰:「先名實者,爲人也,後名實者,

^{■「}矣」下,元甲本有「間去聲」三字。

其身者也。 救 功 先、後、爲,皆去聲。 也。 民 也 言以名實爲先而爲之者,是有 以名實爲後而 名實未加於上下,言上未能 〇名,聲譽也。 不爲者,是欲獨 實,事 志 Œ 善 於

其

君

下

未能濟其民

也

或

也

!

趨 也; 不辭 而 孟 子 已矣,何必同 也。 小官者,柳下惠 五就湯,五就桀者 曰:「居下位 一者何也? ? ,不以賢事不肖者,伯夷 也。 ,伊尹也 曰:仁也。 三子者不同 9 不惡 君子亦仁 汙 道 君, 其

之謂。 之勤 惡、趨 心 過 桀之意哉 而 矣。 遷善而 伐之耳。 也 ,並去聲。 及其終也,人歸之,天命之,不得 〇楊氏 己。 其 ? 若湯 就桀也 其進伊尹 伊尹 曰:「伊尹之就 初 〇仁者,無私心而合天理 、既就湯,則以湯之心爲 ,湯進之也。 求 伊 以 尹 事之也,欲其 9 即 湯 有 湯豈 ,以三聘 伐 、桀之 有 悔 E 伐

爲臣,魯之削也滋甚。若是乎賢者之無益於曰:「魯繆公之時,公儀子爲政,子柳、子思曰。」 「魯繆公之時,公儀子爲政,子柳、子思以取天下爲心,而伊尹遂相之以伐桀,是以取天下爲

必能有爲也。 影譏孟子雖不去,亦未公儀子,名休,爲魯相。子柳,泄柳也。

不用賢則亡,削何可得與?」曰:「虞不用百里奚而亡,秦穆公用之而霸。

其 者 哭其夫,而變國 處於 曰:「昔者王豹處於淇 事 也 與,平聲。 而無其功者,髡未嘗睹之也。 高 ,有則髡必識之。」 唐, 而 齊 〇百里奚,事 俗。 右 善 有諸 歌。 而 内,必形 華 見前篇 河 一周、杞 西 善善 諸外。 梁 謳 是故無賢 之妻 緜 駒

華,去聲。〇王豹,衛人,善謳。淇,水名。

齊 杞 哀,國俗化之,皆善哭。 無功,未足爲賢 梁,二人皆齊臣 駒 齊 人,善歌。 也。 戰 高 死 唐 於莒。 髡以 齊 西 此譏 邑。 其 孟子仕 妻 華 突之 周

欲爲苟去。 者以爲爲無禮 至,不税冕而 E 齊人聞 禮 子 與 按《史記 税,音脱。 孟 女樂,郊又不 致膰于大夫,則吾猶可以止。』威子卒受齊 〈魯君 「孔子爲 可以 子言以爲爲肉者 ,則亦未爲深知孔子者。 而懼,於是以女樂遺魯君。 往觀之,怠於政事。 行矣。』○孔子曰:『 》:「孔子爲 君子之所爲,衆人固 爲肉、爲無之爲,並去聲。 行。 魯司寇,不用 也。 致膰 不知者以爲 乃孔子則欲以 俎 古 于 魯司 不足道 大 大夫, 從 寇,攝 蓋聖人於父母 子路 魯今且郊, 爲 而 孔子遂行。」 不識也。」 祭,燔 肉 微罪 以 行相 也,其 曰:『夫 季威子 爲 行,不 爲 肉 事 如 知 無 不

> 賢 也。 見幾明 〇 尹 之國,不 而 荷 也 氏 去,故 ,❷宜乎其言若是。」 然則孟子之所爲,豈髡之所 决,而 曰:「淳于髡未 欲 顯 不 以 用 其 意思 女樂 君 相之失, 厚,固 去 嘗 前 知 又不 非 以 衆 膰 亦 能 人 欲 肉 未 所 爲 識 行 嘗 能 哉 無 其 故 識 識

侯,五霸之罪 孟 子 人也。 趙 楚 丁氏 莊 氏 日 . ⊟ : 也 日 五 五 三王 :「夏昆吾, 人 霸者,三王之罪人 霸: 也; 夏 齊威、 今之大夫,今之諸侯之 禹、 商大彭 商 晉文、秦穆、 湯、 周 也; 豕韋 文武 今之諸 周周 宋 也。 襄 齊

罪

威

、晉文,謂之五霸。」

並」,原脱,據吴本及上下文補。

亦」, 原作「而」,據元甲本、司禮監本、 仿元本改。

是故 王之罪人也 者,摟諸侯以 賢,掊克 有 疆 再不朝,則削 春省耕 天子 慶,慶以 天 地 適 子討 而 在位 諸 辟,田野治,養老尊賢,俊傑在位,則 補 侯 地 伐諸 而 不 ,則有 E 其 足,秋 不 巡 人其疆 地,三不朝,則 伐,諸 侯者也 狩 讓 諸 省斂 土 侯 侯朝於天子曰 故故 不 伐 而 地 朝 曰:五霸者,三 而 助 荒 不討。 ,則貶其 不 六師 蕪 遺老 移之。 述 五. 爵 職 其 霸 失

以

而

討 賞 侯,不用天子之命 朝 侯以伐之也。 讓 而 者,出 責 言巡 伐之也。 也,益其 音潮。 也 一命以 狩 辟,與 移之者,誅 地 捜,牽也。 之事 討其罪 以 伐者,奉天子之命 賞 闢 也。 之也。 同。 自 而使 其 五. 自 治,去聲。 霸 人而變置 不 掊克,聚 人 方伯連 牽諸 朝 其 至 疆 侯 聲 六 至 帥 以 之 斂 \bigcirc 師 則 其 伐 帥 也。 也。 慶, 移 有 罪 諸

之,言述職之事

殺大夫。」五命曰:『無 **日** 德。」 三 命 日 「五霸,桓公爲盛。 金馬 不歃 于好。」今之諸侯皆 侯,五霸之罪人也 不告。」曰:『凡 『士無世官,官事 血 妻。』再 初命 :『敬老慈幼 命曰:『尊賢 Ė 我 葵丘 : 『誅不孝,無易樹 同 犯此 無 盟之人,既盟之後,言 曲 之會諸 攝 防 五. 無 無 取 禁,故曰:今之 忘 育 士必 遏糴 侯 賓 才,以彰 旅 得, 無 牲 子, 四 有 無 載 有 命 封 專 無

立也。 《春秋傳》: 歃,所洽反。 不殺,讀書加於牲 已立世子,不得擅易。 「僖公九 糴,音 上, 壹明天子 年,葵丘 狄。 好, 之會,陳 去 之禁。 初命三事 聲。 牲 按 而

諸

歸

而

0 責」。 仿元本、吴本作「讓」。 係避宋英宗父允讓諱, 元甲本、元乙本、 司 禮

也。 也。 世 告天子也 病 防,不得 夫,有罪則請 攝 行 所 鄰 禄 旅 以 ,當廣求賢才以充之,不可 無有封 或 取 而 也 脩 也 身 士 不世官,恐其未 曲 必 皆當有以待之,不可忽忘 正家之要也。 爲 而不告者,不得專封 無 得,必 隄 命于天子而後殺之也 遏 防,壅泉激水,以專 糴 得 鄰 其 國 必賢 人 賓,賓客也。 X 也 荒 以闕 也。 國邑 不得 無 官事 專 人 也 小利 閉 廢 而 無 殺 旅 糴 事 無 不 曲 士

侯之罪人也。」大夫,皆逢君之惡,故曰:今之大夫,今之諸「長君之惡其罪小,逢君之惡其罪大。今之

君之惡也。 長,上聲。 治《春秋》者,不先治五霸之功罪,則 君 之惡 也。 〇君 君之過未 有過不能諫,又順之者,長 〇林氏 萌,而 曰: 邵 先意導之者, 子 有 事無 言

> 霸。 者未 爲罪 莫之罪也 得罪於今之諸侯,則同 異世,故得以 罪於三王,今之諸 子》此章之義,其亦若此 統 理,而不得聖人之心。 ,而反以 有大於五 故五霸者,功之首,罪之魁 一,乃反以 爲功 逃其 霸, 何 爲良臣 罪。 有過 侯 得 其謬哉 時矣。 罪 至於今之大夫,宜 也與? 者 而厚禮之。 於五 春秋之間, 亦未 而諸侯 霸 然五 有 也。」《 皆出 大 不以 於 非 霸 有 孟 惟 於 得 功

魯欲使慎子爲將軍。

順

子

魯臣

者,不容於堯、舜之世。 孟子曰:「不教民而用之,謂之殃民。殃民

■「順」,係避宋孝宗趙昚(慎)諱,元甲本、元乙本、司禮

教民者,教之禮義,使知入事父兄、出事長

上也。用之,使之戰也。

「一戰勝齊,遂有南陽,然且不可。」

是時魯蓋欲使順子伐齊,取南陽也。故孟

慎子勃然不悦,曰:「此則滑釐所不識也。」子言就使順子善戰有功如此,且猶不可。

滑,音骨。○滑釐,順子名。

不足以待諸侯。諸侯之地方百里,不百里,曰:「吾明告子:天子之地方千里,不千里,

而已。

待諸侯,謂待其朝覲聘問之禮。宗廟不足以守宗廟之典籍。

典

也;地非不足也,而儉於百里。儉於百里。太公之封於齊也,亦爲方百里億於百里。太公之封於齊也,亦爲方百里信,問公之封於魯,爲方百里也;地非不足,而籍,祭祀會同之常制也。

里。儉,止而不過之意也。 二公有大勳勞於天下,而其封國不過百

所損乎? 在所益乎?

在

魯地之大,皆并吞小國而得之。有王者

作,則必在所損矣。

徒取諸彼以與此,然且仁者不爲,况於殺人

以求之乎?

「君子之事君也,務引其君以當道,志於仁徒,空也。 言不殺人而取之也。

當道,謂事合於理。志仁,謂心在於仁。

同。○辟,開墾也。爲,去聲。辟,與闢同。鄉,與向同,下皆

孟子卷第十二 告子章句下

而求爲之强戰,是輔桀也。臣,古之所謂民賊也。君不鄉道,不志於仁,「『我能爲君約與國,戰必克。』今之所謂良

言必争奪而至於危亡也。

白 富。 取 白 圭 能薄飲食,忍耆欲,與童僕同苦樂。 時變,人棄我取, 其一分。 主,名丹,周人也。 曰:「吾欲二十而取一,何如?」 其爲此論 〇林氏 ,蓋欲以 人取 曰:「按《史記》: 欲更税法,二十分而 其術施 我 與,以此居 之國家也。」 白圭 積 樂觀 致

「萬室之國,一人陶,則可乎?」曰:「不可。絡,音陌。○貉,北方夷狄之國名也。

孟

子曰:「子之道

,貉道也

器不足用也。」

宫室、宗廟、祭祀之禮,無諸 百官有司,故二十取一而足也。 曰:「夫貉,五 孟子設喻以詰圭,而圭亦知其不 穀 不生, 惟 黍 生之。 侯幣帛 可 饔 無 也 城 郭

可也? 「今居中國,去人倫,無君子,如之何其 熟,故生之。饔飱,以飲食饋客之禮也。 表,音扶。○北方地寒,不生五穀,黍早

無君臣、祭祀、交際之禮,是去人倫;無百

官、有司,是無君子。

,况無君子

乎?

因其辭以折之。●

重之於堯、舜之道者,大桀、小桀也。」

一欲輕之於堯、舜之道者,大貉

小貉

也;

欲

■「以」,仿元本作「而」。

白圭曰:「丹之治水也,愈於禹。」

隄,壅而注之他國。」 趙氏曰:「當時諸侯有小水,白圭爲之築

順水之性也。 孟子曰:「子過矣。禹之治水,水之道也。

「是故禹以四海爲壑。今吾子以鄰國爲壑。

壑,受水處也。

「水逆行,謂之洚水。洚水者,洪水也,仁人

之所惡也。吾子過矣。」

流。今乃壅水以害人,則與洪水之災無惡,去聲。〇水逆行者,下流壅塞,故水逆

孟子曰:「君子不亮,惡乎執?」

孟子卷第十二 告子章句下

言凡事苟且,無所執持也。 惡,平聲。○亮,信也,與諒同。惡乎執

魯欲使樂正子爲政。孟子曰:「吾聞之,喜

而不寐。」

喜其道之得行。

知慮乎?」曰:「否。」「多聞識乎?」曰:公孫丑曰:「樂正子强乎?」曰:「否。」「有

「否。」

正子之所短,故丑疑而歷問之。知,去聲。○此三者,皆當世之所尚,而樂

然則奚爲喜而不寐?」

丑問也。

曰:「其爲人也好善。」

好善足乎?」

丑問也。

四六七

日 「好善優於天下,而况魯國 乎?

夫苟好善,則四海之内,皆將輕千里而來告 優,有餘裕也。 言雖治天下,尚有餘 力也

里爲難也 夫,音扶。下同。 ○輕,易也。 言不以千

讒諂面諛之人居,國欲治,可得乎?」 士止於千里之外,則讒諂面諛之人至矣。 之矣。』訑訑之聲音顏色,距人於千里之外。 夫苟不好善,則 人將 曰:『訑訑,予既已 與 知

然也。 長,而貴於有以來天下之善。 諒多聞之士遠,則讒諂面諛之人至,理勢 不嗜善言之貌。君子小人,迭爲消長,直 池,音移。 〇此章言爲政,不在於用一己之 治,去聲。 ○ 訑訑, 自足其智,

陳子曰:「古之君子何如則仕?」孟子曰:

所就三,所去三。

其目在下。

「迎之致敬以有禮,言將行其言也,則就之,

禮貌未衰,言弗行也,則去之。 所謂見行可之仕,若孔子於季威子是也

受女樂而不朝,則去之矣。

·其次,雖未行其言也,迎之致敬以有禮 則

就之;禮貌衰,則去之。

與公遊於囿,公仰視蜚鴈,而後去之。 所謂際可之仕,若孔子於衛靈公是也。

其言也,使飢餓於我土地,吾耻之。」周之,亦 君聞之,曰:『吾大者不能行其道,又不能從 可受也,免死而已矣。」 「其下,朝不食,夕不食,飢餓不能出門戶。

至於飢餓不能出門戶,則猶不受也。 所謂公養之仕也。 君之於民,固 義,况此又有悔過之言,所以可受。 有周之之 其曰 然未

故

叔敖舉於海,百里奚舉於市。 之間,膠鬲舉於魚鹽之中,管夷吾舉於士,孫孟子曰:「舜發於畎畝之中,傅説舉於版築

里 孫 傅巖,武丁舉之。 説,音悦。 王舉之。 奚事見前 叔敖隱 管仲囚於士官,威公舉 處海濱 ○舜耕歷 篇 , 楚莊王舉之爲令尹。 膠鬲遭亂 山、三十登庸。 뾇販 ·以相 魚 、鹽、文 説築 國。 百

爲,所以動心忍性,曾益其所不能。其筋骨,餓其體膚,空乏其身,行拂亂其所「故天將降大任於是人也,必先苦其心志,勞

性 舜 也 」,與 ,言使之所爲不遂,多背戾 以下是也。 增 竦動其 同。 心、堅忍其性 〇降大任,使之任大事也 空,窮也。 乏, 絶也 也。 也。 然所謂 動 拂,戾 心 性 忍

孟子卷第十二

告子章句下

熟,也須從這裏過。」 〇程子曰:「若要亦指氣禀食色而言耳。〇程子曰:「若要

作,徵於色,發於聲,而後喻。「人恒過,然後能改,困於心,衡於慮,而

後

横,不 能改。 通曉 起; 以至困 曉 驗於人之色,發於人之聲,然後能警 衡,與横同。 也。 不能 也。 順也。 於 蓋不能謹於平日,故必 此又言中 燭於幾微,故必 心、横於 作,奮 恒 人之性 常也。 慮,然後 起也。 一常必 事 徴, 驗 猶言 理 能 暴 事 有 奮 [大率 著 勢 也。 過 發 窮蹙, 而 然後 悟 以 喻 也 興 至 而

恒亡。「入則無法家拂士,出則無敵國外患者,國

度之世臣也。拂士,輔拂之賢士也。拂,與弼同。○此言國亦然也。法家,法

「然後知生於憂患而死於安樂也。」

四六九

仁,以安樂失之者多矣。」 曰:「言困窮拂鬱能堅人之志,而熟人之出於憂患,而死亡由於安樂矣。○尹氏出於憂患,而死亡由於安樂矣。○尹氏

孟子曰:「教亦多術矣。予不屑之教誨也 者,是亦教誨之而已矣。」 多術,言非一端。屑,潔也。不以其人爲 潔而拒絶之,所謂不屑之教誨也。其人若 能感此,退自修省,則是亦我教誨之也。 ○尹氏曰:「言或抑或揚,或與或不與,各 因其才而篤之,無非教也。」

孟子卷第十二

480

朱熹集注

盡心章句上

凡 四十

知天矣。 孟子曰:「盡其心者,知其性也。 知其性,則

理 以出者也。 也。 亦 而無不知者也。 極其心之全體而無不盡者,必其能窮夫理 心者,人之神明,所以具衆理而應萬 一,則有所蔽而無以盡 不外是矣。 性則心之所具之理,而天又理之所從 人有是心,莫非全體,然不窮 以《大學》之序言之,知性則 既知其 乎此心之量。 理,則其所從出 故能 事 者

存其心,養其性,所以 存,謂操而不舍。 物格之謂、盡心 則知至之謂 養,謂順而不害。 事 天 也

也

奉承而不違也。

事

則

殀壽不貳,脩身以俟之,所以立命也。」 名。」愚謂盡心知性而知天,所以造 自理而言謂之天,自禀受而言謂之性 天之至,脩身以俟死,則事天以終身也。 殀壽,命之短長也。貳,疑也。不貳者,知 履其事,則亦無以有諸己矣。 知其理,固不能履其事,然徒造其理而 也;存心養性以事 與氣,有性之名,合性與知覺,有心之 虚,有天之名; 存諸人而言謂之心。」〇張子曰:「由 立命,謂全其天之所付,不以人爲害之。 〇程子曰:「心也,性也,天也 由氣化,有道之名; 天,所以履其 知天而 ,一理也。 事 也 其 合 不以 虚 太 不 理

481

四

孟子卷第十三

盡

心章句上

足以爲智矣。 爲仁,然智而不仁,則亦將流蕩不法,而不俟死,仁之至也。智有不盡,固不知所以妖壽貳其心,智之盡也,事天而能脩身以

孟子曰:「莫非命也,順受其正。

之,所以順受乎此也。 之致而至者,乃爲正命。故君子脩身以俟人物之生,吉凶禍福,皆天所命。然惟莫

「是故知命者,不立乎巖牆之下。

命,謂正命。巖牆,牆之將覆者。知正命,

「盡其道而死者,正命也。

則不處危地以取

覆壓之禍。

者矣。 盡其道,則所值之吉凶,皆莫之致而至

「桎梏死者,非正命也。」

桎梏,所以拘罪人者。言犯罪而死,與立

○此章與上章蓋一時之言,所以發其末句巖牆之下者同。皆人所取,非天所爲也。

得也,求在我者也。 强也,求在我者也。 孟子曰:「求則得之,舍則失之,是求有益於

所有者。○在我者,謂仁義禮智,凡性之

在外者也。」
「求之有道,得之有命,是求無益於得也,求

求,從吾所好。」
氏曰:「言爲仁由己,富貴在天,如不可在外者,謂富貴利達,凡外物皆是。○趙有道,言不可妄求。有命,則不可必得。

孟子曰:「萬物皆備於我矣。

此言理之本然也。大則君臣父子,小則事

内也。

「反身而誠,樂莫大焉。

之不待勉强而無不利矣。其爲樂,孰大之理,皆如惡惡臭、好好色之實然,則其行樂,音洛。〇誠,實也。言反諸身,而所備

强恕而行,求仁莫近焉。」

於是?

强,推己及人,庶幾心公理得而仁不遠也。有私意之隔,而理未純也。故當凡事勉也。反身而誠則仁矣,其有未誠,則是猶强,上聲。〇强,勉强也。恕,推己以及人

孟子曰:「行之而不著焉,習矣而不察焉,終

孟子卷第十三

盡心章句上

而

仁

一可得。

則道在我而樂有餘;

行之以恕,則私不容

此章言萬物之理具於吾身、體之而實、

身由之而不知其道者,衆也。」

著者,知之明。察者,識之精。言方行之

孟子曰:「人不可以無耻。無耻之耻,無

以然,所以終身由之而不知其道者多也

而不能明其所當然,既習矣而

猶

不

識

其所

耻矣。」

從善之人,●終身無復有耻辱之累矣。」趙氏曰:「人能耻己之無所耻,是能改行

孟子曰:「耻之於人大矣。

爲機變之巧者,無所用耻焉。聖賢,失之則入於禽獸,故所繫爲甚大。聖賢,失之則入於禽獸,故所繫爲甚大。

爲機械變詐之巧者,所爲之事皆人所深

●「能」,仿元本作「爲」。

耻之心也 耻 · 前 彼方且自以爲得計 ,故無所 用其愧

不耻不若人,何若人有?」

之心,如 之,可也,耻其不能而掩藏之,不可也。」 事?」其義亦通。○或問:「人有耻不能 曰:「不耻其不如 但無耻一事 何?」程子曰:「耻其不能 不如 人,則事事不如 人,則 何能 有如人之 人矣。 而 爲 或

致敬盡 而况得而臣之乎?」 何獨不然? 樂其道而忘人之勢。故王公不 孟子曰:「古之賢王好善而忘勢,古之賢士 禮,則不得亟見之。 見且由不得亟,

若相反,而實則相成,蓋亦各盡其道而已。 當屈己以下賢,士不 好,去聲。樂,音洛。 枉道而求利,二者勢 亟,去吏反。○言君

> 孟子謂宋句踐曰:「子好遊乎? 踐,名。遊,遊説 句,音鉤。 好、語,皆去聲。 也。 〇宋,姓;句 吾語 子

「人知之,亦囂囂; 人不知,亦囂囂。」

曰:「何如斯可以囂囂 趙氏曰:「囂囂,自得無欲之貌。」 矣?」曰:「尊德樂

義,則 樂,音洛。 之正。樂之,則有以自安,而不徇 以自重,而不慕乎人爵之榮。 可以囂囂矣。 ○德,謂 所得之善。 義,謂 尊之, 乎外 則有 所守 物

故士窮不失義,達不離道 之誘也。❶

離,力智反。〇言不以貧 賤 而 移,不以 富

貴而淫,此尊德樂義見於行事之實也

窮不失義,故士得己焉。達不離道,故民不

失望焉。

其興道致治,而今果如所望也。得己,言不失己也。民不失望,言人素望

世。窮則獨善其身,達則兼善天下。」「古之人,得志澤加於民,不得志脩身見於

而外輕,則無往而不善。 言士得己、民不失望之實。〇此章言內重見,音現。〇見,謂名實之顯著也。此又

豪傑之士,雖無文王猶興。」 孟子曰:「待文王而後興者,凡民也。若夫

長,音扶。○興者,感動奮發之意。凡民, 大,音扶。○興者,感動奮發之意。凡民,

> 然,則過人遠矣。」 孟子曰:「附之以韓、魏之家,如其自視飲

有過人之識,則不以富貴爲事。」也。飲然,不自滿之意。○尹氏曰:飲,音坎。○附,益也。韓、魏,晉卿完

富家

孟子曰:「以佚道使民,雖勞不怨;以生道

殺民,雖死不怨殺者。」

爲其所當爲,則雖咈民之欲而民不怨。其生之也,除害去惡之類是也。蓋不得已而穀、乘屋之類是也。以生道殺民,謂本欲程子曰:「以佚道使民,謂本欲佚之也,播

五子曰:「霸者之民」 孟子曰:「霸者之民」

皞,胡老反。○驩虞,與歡娛同。皞皞,廣

於我? 事。 人怒。」 氏曰:「所以致人驩虞,必有違道干譽之 爲 大自得之貌 而然,豈能久 若王者,則如天,亦不令人喜,亦不令 如天之自然,乃王者之政。」〇楊 也? 程 子 耕田 日 . 鑿井,帝 「驩虞, 有 力 何 所 造 有

爲之者。「殺之而不怨,利之而不庸,民日遷善而不知

者化,身所經歷之處,即人無不化,如舜之夫,音扶。○君子,聖人之通稱也。所過流,豈曰小補之哉?」

己。 也。 心也 甄 盛,乃與天 和 如孔子之立斯立,道斯行, 耕 陶之,非如霸者,但小小 歷 ,莫知其 此則王道之所以爲大,而學者 Ш 所存者神,心 而 田 所以 地之化 者 遜 然 畔, 所存主處 同 而 運 然 陶 並 也。 河 行,0 濱 補塞其罅 ,便神妙 綏斯來, 是其 而 舉 器 八德業 不 所 不 苦 動 當 漏 世 測 斯 窳 而 盡 而

(善政,不如善教之得民也。 程子曰:「仁言,謂以仁厚之言加於民。 程子曰:「仁言,謂以仁厚之言加於民。 不也。此尤見仁德之昭著,故其感人尤 不也。此尤見仁德之昭著,故其感人尤 深也。」

● 「同運並行」,元甲本作「並行同運」。

政,謂法度禁令,所以制其外也。教,謂道

德齊禮,所以格其心也。

牧事引入。 「善政民畏之,善教民愛之,善政得民財,善

教得民心。」

者,不遺其親,不後其君也。 得民財者,百姓足而君無不足也,得民心

fi、就了1台,在4月10。 孟子曰:「人之所不學而能者,其良能也,

良者,本然之善也。○程子曰:「良所不慮而知者,其良知也。

知

良

孩提之童,無不知愛其親者,及其長也,無能,皆無所由,乃出於天,不係於人。」

不知敬其兄也。❶

孩笑、可提抱者也。愛親敬長,所謂良知長,上聲。下同。○孩提,二三歲之間,知

良能者也。

親親,仁也,敬長,義也。無他,達之天

下也。

不同者,所以爲仁義也。言親親敬長,雖一人之私,然達之天下無

非孟子造道之深,不能形容至此也。具。一有感觸,則其應甚速,而無所不通。里人之心,至虚至明,渾然之中,萬理畢聖人之心,至虚至明,渾然之中,萬理畢

孟子曰:「無爲其所不爲,無欲其所不欲,如

❶ 「也」,仿元本作「者」。

② 「時」下,仿元本、吴本有「也」字。

此 而已矣。」

所謂 李氏曰:「有所不爲不欲,人皆有 矣,故曰如此而已矣。」 所不爲、欲所不欲者多矣。 至於私 擴 意 充其羞惡之心者, 一萌,而 不能以禮義 而 能 義 反是 制 不 之,則 是 可 心,則 心 勝 也 用 爲

孟子曰:「人之有德慧術知者,恒存乎疢疾。 不能也 知 言人必有疢疾, 去聲。 術知 者, 術之知。 疢, 丑刃反。 則能動心忍性 疢疾,猶災 ○德慧者 ,增益其所 「,德之 患也

獨 孤 臣 孽 子, 其 操 心 也危,其 慮 患也 深,

孤臣 而 常有、 德 慧 術 知 遠臣; 疢疾 也。 者 孽子 也。 庶子。 達, 謂 達於事 皆不 得 理 於 即 君親 所

謂

孟 子 日 : 有事 君 人者, 事 是 君 則 爲 容 悦

者也

阿徇以爲容, 逢迎以爲悦,此鄙夫之事

婦之道也

有安社稷臣者,以安社稷爲悦者也 眷眷於此而不忘也。 言大臣之計安社 稷 如如 小人之務悦 其君

「有天民者,達可行於天下而後行之者也。 民,故謂之天民。 「必功覆斯民然後出 民者,無位之稱。 後行之。不然,則寧没世不 不肯小用其道以徇於 必其道可 以其全盡 ,如伊、吕之徒。」 人也。 見知而 行於天下,然 天 〇張子曰: 理,乃天之 不悔

「有大人者,正己而物正者也。」

大人,德盛而上下化之,所謂見龍 下文明者。〇此章言人品不同,略 在田,天 有 四

然猶有意也。 猶一國之士也。 容悦佞臣不足言。安社稷則忠矣,然 無意無必,唯其所在而物無 天民,則非一國之士矣,

不化,惟聖者能之。

孟子曰:「君子有三樂,而王天下不與存焉。 樂,音洛。王、與,皆去聲,下並同

父母俱存,兄弟無故,一樂也。 此人所深願而 不可必得者,今既得之,其

樂可知

仰不愧於天,俯不怍於人,二樂也。

心廣體胖,其樂可知。 有息則餒矣。」

程子曰:「人能克己,則仰不愧,俯不怍,

得天下英才而教育之,三樂也

養之,則斯道之傳得之者衆,而天下後世 盡得一世明睿之才,而以所樂乎己者教而

將無不被其澤矣。 聖人之心所願欲者,莫

大於此。今既得之,其樂爲如何哉

「君子有三樂,而王天下不與存 林氏曰:「此三樂者,一係於天,一係於 焉。」

人。其可以自致者,惟不愧不怍而已,學

者可不勉哉

孟子曰:「廣土衆民,君子欲之,所樂不

存焉。

樂,音洛。下同。〇地闢民聚,澤可遠施,

「中天下而立,定四海之民,君子樂之,所性 故君子欲之,然未足以爲樂也。

不存焉。

其道大行,無一夫不被其澤,故君子樂之,

「君子所性,雖大行不加焉,雖窮居不損焉, 然其所得於天者,則不在是也。

分,去聲。○分者,所得於天之全體,故不

分定故也。

以 窮 達 有

言 也,醉然見於面 君子 而 喻 所性 仁、義、禮 ,盎於背,施於四 智根 於 心。 體 其生 四 體 不 色

積盛 言而 於心。 之。」〇此章言君子固欲其道之大行,然 作 也。 蓋氣禀清明 盎 也。 所得於天者,則不以是而 喻,言四體 所性之分,與所欲所樂不同 醉,音粹。見,音現。 威 豐厚 無不順 生, 致 儀 仁、義、禮、智,性之四 其積之盛,則發而著見於外者,不待 然。 之間 發見 盈溢之意。 不待吾言,而自 也。 ,無物欲之累,則 兀 也。 也。 體 ○程子曰:「醉面 不 喻, 腔然, 言 施 曉 盎,烏浪反。 而 於 有所 也 清 喻 四 能 性之四德根 和 體 德 加損 惟 几 此乃言其蘊 潤 曉 也 體 有 謂 澤之貌。 吾 也。 盎背,皆 德 見於 不 〇上言 根,本 意 言 者 也 其 能 本 而 動

無

大公辟 善養老,則仁人以爲己 興,曰:『盍歸 孟子曰: 『盍歸乎來! 紂, 「伯夷辟紂, 居 東 乎來 吾聞 海 之濱, 西 居北海之濱,聞文王作 伯善養老者。」天下有 吾聞西伯善養老者。」 歸 矣 聞 文王 作 興 日

辟,去聲。 己之所歸。 下同。 餘見 前篇 大,他蓋 反。 歸 謂

者足以 足以衣帛矣。 「五畝之宅,樹 之家足以 無失 、肉矣。 飢矣。 牆 五. 母 下 雞,二母 以 百畝之田,匹夫耕之,八 桑,匹 彘 婦 無失其 蠶 之,則 八時,老 老 者

五、母彘二也。 衣,去聲。 〇此文王之政 餘見 前 篇 也。 家養母 雞

導其 非 所謂 肉不飽。 妻子,使養其老。 西伯 善 不煖不飽,謂之凍餒。 養 老 者 制其 五十非帛不 田 里,教 煖,七十 之樹 文王之

民, 無凍餒之老者,此之謂 也。」

耕桑。 老者,教導之,使可以養其老耳,非家賜 田 百畝之田。 畜,謂 雞彘也。 里,謂 〇趙氏 五畝之宅。 티 : 樹,謂 而

心矣。」

人益之也。」

富也。 孟 子 . 易 其田 疇, 薄其 税 斂, 民可 使

難爲言。

田 易、斂、皆去聲。 也。 ○易,治也。 疇,耕治之

食之以時,用之以禮,財不可勝用也。 勝,音升。 〇教民節儉,則財用 足也。

者乎?」 如 無弗與者,至足矣。聖人治天下,使有菽粟 民非水火不生活,昏暮叩人之門戶,求水火, 水 火。 菽粟如水火,而民焉有不仁

,於虔反。 〇水火, 民之所急,宜其愛

> 之。 「言禮義生於富 圃 反 不愛者,多故 足,民 也。 無 常 〇 尹 産 則 氏 無

常

0

天下。故觀於海者難爲水,遊於聖人之門者 孟子曰:「孔子登東山而小魯,登太山 而

小

觀水有術,必觀其瀾。 也。 其視下益小,所見既大,則其小者不足觀 山,而太山則又高矣。此言所處益高,則 此言聖人之道大也。東山、蓋魯城東之高 難爲水、難爲言,猶仁不可爲衆之意。 日月有明,容光必

照焉。

者,光之體,光者,明之用也。觀水之瀾 此言道之有本也。瀾,水之湍急處也。 明

0 也」,司禮監本作「矣」。

無不照,則知其明之有本矣。觀日月於容光之隙則知其源之有本矣。觀日月於容光之隙

道也,不成章不達。」 「流水之爲物也,不盈科不行,君子之志於

必 也 而 言學當以漸 以 文章外見 / 其漸 〇此章言聖人之道大而有本,學之者 ,乃能至也。 ,乃能至 也。 達者,足於此 也。 成章,所 而 積者厚 通於彼

是聖人之徒也。 ● 言雖未至於聖人,亦

「雞鳴而起,孳孳爲利者,蹠之徒也。

蹠,盗蹠也。

程子曰:「言間者,謂相去不遠,所争毫末「欲知舜與蹠之分,無他,利與善之間也。」

「雞鳴 不謹? 티 : 耳。 矣,而其分乃在利、善之間 以 利爲義者,又學者所當深察也。」 利言也。」〇楊氏曰:「舜、蹠之相 學「只主於敬,便是爲善。」 善與利,公私而已矣。 而起,若未接物,如 然講之不熟,見之不明,未有 何爲善?」 而 才出於善,便 已,是豈 或問 程 去 미 不 遠 子 以 以

一毫利物」是也。 及爲人也。列子稱其言曰「伯成子高不以足之意。取爲我者,僅足於爲我而已,不足之意。取爲我者,僅足於爲我而已,不

■「意」,仿元本作「貌」。

❷ 「程」上,原有「○」,據仿元本、吴本刪。

孟子卷第十三 盡心章句上

墨子兼愛,摩頂放踵利天下,爲之。

也。摩頂,摩突其頂也。放,至也。放,上聲。〇墨子,名翟。兼愛,無所不愛

「子莫執中,執中爲近之。執中無權,猶執

是亦執 矣。」又曰 物皆有自然之中,不待安排, 或 央 難 執 權 子莫,魯之賢 度於二者之間 稱錘 爲 識,須是默識心通。 中 則堂非 中; 加 無權 一而已矣。 也,所以 :「中不可執 中而國之中爲 家,則 ,則膠於一定之中 人 也。 而 稱物之輕重 執 廳 知楊、墨 其 非 程子曰: [[中]字最 也。 且試言 中。 中 中,推 而 識 之失中 近 安排 得則 堂 而 而 此 爲 廳, 取 近 不 著 事 類 中 知 中 道 也 則 事 可 則 9 變, 也。 也 見 中 故 不 物

「所惡執一者,爲其賊道也,舉一而廢百也。」

無異。 然, 之,是亦猶執 貴者權。 兼愛害義 鄰有鬭 在陋巷,不改其樂,苟不當其可,則與 百者也。 惡、爲,皆 不人,苟不當其可,則與墨子 顔 則是亦楊、 回,易地則皆然,以 子莫執爲我、兼愛之中 而 〇此章言道之所貴者中,中之所 去聲。 〇楊氏 不知閉 ,執中者害於時 墨而已矣。」 耳 一,故孟 戶,同 曰:「禹、稷三過其 賊 害 室有 子 中,皆舉 也。 以爲 其 有權 鬭 無 而 爲 賊道 而 異。 無權 我 不 也。 害仁, 門 知 楊 而 顔 禹 救 不 子 Ti 廢 鄉 氏

害? 之正 孟子曰:「飢者甘食,渴者甘飲,是未 也, 心亦皆有害。 飢 渴害之也。 贵 惟 口 腹 有 得飲食 飢 渴 之

其正味,人心爲貧賤所害,故於富貴不暇口腹爲飢渴所害,故於飲食不暇擇,而失

擇,而失其正理。

憂矣。」
「人能無以飢渴之害爲心害,則不及人不爲

遠矣。 人能不以貧賤之故而動其心,

則過

人

前功也。」

孟子曰:「柳下惠不以三公易其介。」 不流,與 於三點,是其介也。 其道,遺佚不怨,阨 介,有分辨之意。 孔 子 論 夷、 柳下惠進不隱賢,必 窮不憫,直道事 〇此章言柳下惠和而 齊不念舊惡 意正 人,至 相 以

及泉,猶爲棄井也。」
孟子曰:「有爲者辟若掘井,掘井九軔而不

,皆聖賢微顯闡幽之意也。

仞。● 言鑿井雖深,然未及泉而止,●猶爲辟,讀作譬。軔,音刃,與仞同。○八尺爲

域,終未至於天道,未免爲半塗而廢、自棄孝不如舜,學不如孔子,終未入於聖人之自棄其井也。〇吕侍講曰:「仁不如堯,

五霸,假之也。 孟子曰:「堯、舜,性之也;湯、武,身之也;

道,以復其性。五霸,則假借仁義之名,以堯、舜天性渾全,不假修習。湯、武脩身體

「久假而不歸,惡知其非有也?」求濟其貪欲之私耳。

「蓋歎世人莫覺其僞者。」亦通。舊説,久其名以終身,而不自知其非真有。或曰:惡,平聲。〇歸,還也。有,實有也。言竊

■ 「爲」,司禮監本作「曰」。

❷ 「未」,殘宋本、元甲本、元乙本、仿元本、吴本作「不」。

其成功,則一也,五霸則假之而已,是以 假不歸,即爲 「性之者,與道一也,身之者,履之也,及 真 有,則誤矣。○尹氏曰

功烈如彼其卑也。」

大悦。 太甲于桐, 公孫丑曰:「伊尹曰:「予不狎于不順。」放 民大悦。 太甲賢,又反之,民

餘見前篇 習見也。 予不狎于不順、《商書・太甲》篇文。 不順,言太甲所爲不順義理 也。 狎,

賢者之爲人臣 也, 其 君不 賢 , 則 固 可

放與?」

孟子曰:「有伊尹之志,則可; 與,平聲。 無伊尹之志,

尹之志,公天下以爲 心 而無一毫之私 則篡也。」

者也。

弟忠信。『不素餐兮』,孰大於是?」 其君用之,則安富尊榮,其子弟從之,則孝 耕 公孫丑曰:「《詩》曰『不素餐兮」,君子之不 加 篇。素,空也。無功而食禄,謂之素餐。 餐,七丹反。○《詩》,《魏國風 食,何也?」孟子曰:「君子居是國也 • 伐檀》之

此與告陳相、彭更之意同

王子墊問曰:「士何事?」 士居其間,獨無所事,故王子問之也。 卿、大夫,下則農、工、商、賈,皆有所事,而 墊,丁念反。○墊,齊王之子也。

上則公、

孟子曰:「尚志。」

得行公、卿、大夫之道,又不當爲 尚,高尚也。志者,心之所之也。士既未

盡心章句上

孟子卷第十三

惡在 由義,大人之事備矣。」 曰 罪 :「何謂尚志?」曰:「仁義而已矣。 商 非 仁是 之業,則高 也 也;路惡 非 其有而取之,非 尚其志而 在? 義是也。 義 也。 居仁 殺 居

其 惡,平聲。 用 得大人之位 而 八志也。 已全。若小人之事,則固非所當爲 所居所由,無不在於仁義,此士所以尚 大人,謂公、卿、大夫。言士 ,而其志如此,則大人之事體 非 仁 非義之事,雖 小 不爲。 也 雖 未

言仲子設若非義而與之齊國,必不肯受。舍,音捨。食,音嗣。○仲子,陳仲子也。

豈可以小廉信其大節,而遂以爲賢哉?母,不食君禄,無人道之大倫,罪莫大焉。齊人皆信其賢,然此但小廉耳。其辟兄離

桃應問曰:「舜爲天子,皋陶爲士,瞽瞍殺

人,則如之何?」

所極,非以爲真有此事 刑天子之父。故設此問,以 而 桃應,孟子弟子也。 不可以私害公; 臯 其意以爲舜雖愛父, 陶 也。 雖 執 、觀聖賢 法 而 (用心之 不可

孟子曰:「執之而已矣。」

言皋陶之心,知有法而已,不知有天子之

父也。

「然則舜不禁與?」

與,平聲。

○桃應問

也

夫,音扶。惡,平聲。○言臯陶之法,有所曰:「夫舜惡得而禁之? 夫有所受之也。」

傳受,非 所 敢 私,雖 天子之命亦不得而 廢

之也

然則舜如之何?」

桃應問 也

曰: 「舜視棄天下,猶棄敝蹝也。 竊負而逃,

遵海濱而處,終身訢然,樂而忘天下。」

草履也。 跳,音徙。 遵,循也。 訢,與 、欣同。 言舜之心,知有父而 樂,音洛。 ○跳

猶草芥, 已,不知 而惟順於父母可以解 有天下也。 孟子嘗言,舜視天下 憂,與此 意

不知天子父之爲尊,爲子者,但知有父, 互相發。〇此章言爲士者,但知有法,而

非天理之極、人倫之至。學者察此而 而 不知天下之爲大。蓋其所以爲心者,莫 有得

焉

',則不待較計論量',而天下無難

處之

孟子自范 居移氣 養移 之齊, 體 望見 大哉! 齊 居 王之子,喟 乎 1 夫非 然歎 盡 人之 日

0

子與?」

夫,音扶。 與,平聲。 ○范, 齊 邑。 居, 謂

所處之位。

養,奉養也。

言人之居

處

所

繫甚大,王子亦人子耳,特以所居不同

孟子曰:

所養不同,

而其氣體有異也。

彼者,其居使之然也, 「王子宫室、車馬、衣服多與人同,而 張、鄒皆云: 「羨文也。」 况居天下之 王子若 廣居

者乎?

盎於背,居天下之廣居者然也。」 廣居,見前篇。 〇尹氏 曰:「睟然見於面

吾君也,何其聲之似我君也?』此無他 「魯君之宋,呼於垤澤之門。 守者日 二。此 居相 非

似也。」

呼,去聲。〇垤澤,宋城門名也。孟子又

引此事爲證。

獸畜之也。 孟子曰:「食而弗愛,豕交之也,愛而不敬,

養也。獸,謂犬馬之屬。○交,接也。畜,

「恭敬者,幣之未將者也。

幣之未 子曰:「 將,猶奉 而 後有也。」 將 恭敬 也、《詩》曰『承 時, 雖 已)有此: 因 威 恭敬之心,非 儀 幣 箱是 帛 而 將 後發 0 大 見, [幣帛 然 程

「恭敬而無實,君子不可虚拘。」

敬,而無其實也。拘,留也。此言當時諸侯之待賢者,特以幣帛爲恭

孟子曰:「形色,天性也。惟聖人,然後可以

踐形。」

然後稱 人道 者,性也。 而 形 人有是形,而 形,而不 天 人之有形 而生,與 「天生烝民,有物有則。 未盡,能充其形,惟聖人也。」〇楊氏 而 性 無 而 也 其名。 歉 能充其 萬物 能 也。 踐, 有 各盡其則 盡 色, 不同。 其 又能盡 衆人有之而 如 、形也。 、理,故 無 踐 程子 不各有自 言 既爲人,須盡 、則可 其理 Ĕ : 之踐。 蓋 無 物者 以 人得天地之正 以踐形矣。 不 此 然後 踐 知,賢 然之理 蓋 言聖 其 形色也。 衆 可 形 得人理 以 X 人踐之 人 踐 有 所 盡 惟 氣 得 其 聖 是 謂 則

齊宣王欲短喪。公孫丑曰:「爲朞之喪,猶

●「箱」,係避宋太祖趙匡胤諱,元甲本、元乙本、司禮

監

愈於已乎?」

,猶止也。

徐云爾,亦教之孝弟而已矣。」 孟子曰:「是猶或紾其兄之臂,子謂之姑徐

孫丑曰:「若此者,何如也?」 王子有其母死者,其傅爲之請數月之喪。公

爲,去聲。○陳氏曰:「王子所生之母死,爲,去聲。○陳氏曰:「王子所生之母死,不成為母而不敢終喪。其傅爲請於王,欲厭於嫡母而不敢終喪。其傅爲請於王,欲

時此禮已廢,或既葬而未忍即除,故請

之也。

已。謂夫莫之禁而弗爲者也。」曰:「是欲終之而不可得也,雖加一日愈於

無, 音扶。○言王子欲終喪而不可得, 其夫, 音扶。○言王子欲終喪而不可得, 其 是。示之至情, 則不肖者有以企而及 所譏, 乃謂夫莫之禁而自不爲者耳。○此 所譏, 乃謂夫莫之禁而自不爲者耳。○此 知言三年通喪, 天經地義, 不容私意有所 知言三年通喪, 天經地義, 不容私意有所 知言三年通喪, 天經地義, 不容私意有所

孟子曰:「君子之所以教者五:

後之不同。 下文五者,蓋因人品高下,或相去遠近先

「有如時雨化之者,

人力已至而未能自化,所少者,雨露之滋時雨,及時之雨也。草木之生,播種封殖,

成

妙,亦由是也,若孔子之於顔、曾是已。● 耳。及此時而雨之,則其化速矣。教人之

「有成德者,有達財者,

於由、賜。成德,如孔子之於冉、閔,達財,如孔子之財,與材同。此各因其所長而教之者也。

「有答問者,

就所問而答之,若孔、孟之於樊遲、萬

「有私淑艾者。

「此五者,君子之所以教也。」

大,無棄人也。 聖賢施教,各因其材,小以成小,大以

似不可及也。何不使彼爲可幾及而日孳公孫丑曰:「道則高矣,美矣,宜若登天然,

孳也?」

五子曰:「大丘幾,音機。

拙射變其彀率。
孟子曰:「大匠不爲拙工改廢繩墨,羿不爲

率,彎弓之限也。言教人者,皆有不可爲,去聲。彀,古候反。率,音律。○

君子引而不發,躍如也。中道而立,能者

之法,不容自貶以徇學者之不能也。

從之。」

引,引弓也。發,發矢也。躍如,如踊躍而

● 「已」,元甲本作「也」。

彀

不能藏 法,卑不可抗,高 出 當自勉也。 而立,言其非難非易。能者從之,言學者 而見於前矣。 引弓而不發矢,然其所不告者,已 學之之法,而不告以得之之妙,如射者之 也。 因上文彀率而言君子教人,但授以 〇此章言道有定體,教 中者,無過不及之謂。 不可貶;語 不能 如 顯 中道 有成 踊 默 躍

而不離也。則道在必行,道屈則身在必退,以死相從則道在必行,道屈則身在必退,以死相從殉,如殉葬之殉,以死隨物之名也。身出

以道從人,妾婦之道。「未聞以道殉乎人者也。」

下答,可包?」公都子曰:「滕更之在門也,若在所禮。

而

不答,何也?」

更,平聲。○趙氏曰:「滕更,滕君之弟

來學者也。」

挾有勲勞而問,挾故而問,皆所不答也。 暖孟子曰:「挾貴而問,挾賢而問,挾長而問

更有二焉。」

倦,又惡夫意之不誠者。 电。」○尹氏曰:「有所挾,則受道之心不也。」○尹氏曰:「有所挾,則受道之心不

所厚者薄,無所不薄也。 孟子曰:「於不可已而已者,無所不已,於

其進鋭者,其退速。」 所厚,所當厚者也。此言不及者之弊。 已,止也。不可止,謂所不得不爲者也。

四九一

淮 三者之弊,理勢 鋭 用 心 太 必必 调 2然,雖 其 氣易 過不及之不同 衰 故 退 速。 然

卒同歸

於廢

弛

愛物。」
民也,仁之而弗親。親親而仁民,仁民而民也,仁之而弗親。親親而仁民,仁民而孟子曰:「君子之於物也,愛之而弗仁,於

節。 物, 是 謂 氏 統 老,以及人之老,於民則可,於物則不可。 差等? 理 而言之則皆仁,分而言之則有序。」〇楊 曰:「其分不同 謂禽獸草木。 而分殊者也。」〇 程子曰: 本故也,無僞也。」 「仁,推己及人,如老吾 愛,謂取之有時,用之有 故所施 尹氏 不能 日 無 「何以 差等,所 有

者無不愛也,急親賢之爲務。堯、舜之知而孟子曰:「知者無不知也,當務之爲急;仁

親賢 不 徧 也 物 急 先 務 也 9 堯 舜 之仁 不 徧 愛 人,

賢 常以所當務 知者之知,並去聲。 知也大矣; 則恩無 不治,而 仁者固 者爲急 其爲仁也博矣。 則 無 不愛, 知者固 事 無 然常 不 沿 無 不 而 知, 於 其 親 爲 然

而問無齒决,是之謂不知務。」「不能三年之喪,而緦小功之察,放飯流歡,

精 後 子之於道 飯 務 敬之小者也。 長歡,不敬之大者也。 輕者也。 之重者也。 八則事 雖 神 ,扶晚反。 徧 而無益於天下之治矣。 知 有 察,致詳也。 一,識 人之所知、徧能 序。 **緦麻,三月,小功,五月,服之** 歌, 昌悦反。 其 問,講求之意。 全體 豐 氏 則 齒决, 放飯、大飯。 日 心 〇三年之喪,服 人之所能,徒 「智不 不 齧斷乾 仁不急於親 狹; 〇此 急於先 章言君 知所 肉,不 先

孟子卷第十三 孟子卷第十三 孟子卷第十三

四九四

孟子卷第十四

朱熹集注

盡心章句下

凡三十八章。

所愛。」
愛及其所不愛,不仁者以其所不愛及其孟子曰:「不仁哉,梁惠王也! 仁者以其所

及其所不愛也。親親而仁民,仁民而愛物,所謂以其所愛

> 之戦 也。 子弟,謂太子申 梁惠 之恩,自内及外,不仁之禍,由疏 以民之故及其子,皆以其所不愛及其所愛 ○此承前篇之末三章之意,●言仁人 鬬,糜爛 王 以 下 孟 其 也。 子答辭 血 肉也。 以土地之故及其民, 也。 復之,復戰 糜 爛 逮親 其 民,使 也。

《春秋》每書諸侯戰伐之事,必加譏貶,以著其擅興之罪,無有以爲合於義而許之著其擅興之罪,無有以爲合於義而許之

征,所以正人也。諸侯有罪,則天子討而征者,上伐下也,敵國不相征也。」

● 「此」下,元甲本有「章」字。

有

孟子曰:「盡信《書》,則不如無《書》。

者,學者當識 程子曰:「載事之辭,容有重稱 其 義 而 己。 荷執 於辭 而 過 則 其 時 實

吾於《武成》,取二三策而已矣。

或有害於義,不如無《書》之愈也。」

伐暴之意,反政施仁之法而已。」 《武成》,《周書》篇名,武王伐紂歸而記事 其餘不可盡信也。 之書也。策,竹簡也。取其二三策之言, 〇程子曰:「取其奉天

其血之流杵也?」 仁人無敵於天下。 以至仁伐至不仁,而何

杵,舂杵也。或作鹵,楯也。《武成》言武 流漂杵」。 王伐紂,紂之「前徒倒戈,攻于後以北,血 書》本意,乃謂 孟子言此則其不可信者。然 商人自相殺,非謂武王殺

> 之也。孟子之設是言,懼後世之惑,且長 不仁之心耳。

孟子曰:「有人曰:『我善爲陳, 我善爲

大罪 也。

國君好仁,天下無敵焉 陳,去聲。○制行伍曰陳,交兵曰戰。

好,去聲。

「南面而征,北狄怨,東面而征, 西夷 怨。

曰:『奚爲後我?』

此引湯之事以明之,解見前篇

一武王之伐殷也,革車三百兩,虎賁三千人。

兩,去聲。實,音奔。〇又以武王之事明

之也。兩,車數,一車兩輪也。千、《書序》

作百。

「王曰:『無畏! 崩厥角稽首。 寧爾也,非敵百姓也。」若

盡心章句

孟子卷第十四

四九五

稽 爲 王 首至地, 安寧汝,非敵商之百姓 謂 0 商 泰 誓》文與 日 : 如角之崩也。 無 此 畏 小異。 我 也 也。」於是,商 孟子之意當 我 來 伐 約 云 本 人

其 意 以言傳,上 尹 氏 蓋如 人,雖大匠 日 : 此。 規 達 亦末如之何 必 矩,法度可告者也。 由 心 悟 莊 也 周 己。 所 論斲 蓋 巧 下 學 則 輪 之 可 在

及其 孟 子 爲天子也, 日 舜 之 飯 被袗衣,鼓琴,二女果,若固 糗 茹 草 也,若 將 終 身焉

有之。

也。 定 人之心,不以貧賤 也。二女,堯二女 而有 忍反。果、《説文》作婐,烏果反。 飯,上聲。糗,去久反。 故 也 動於中 糗,乾糒 隨 也。 遇 而安,無預於己,所性 也。 茹, 而 有慕於外,不以 亦食 果,女侍 茹, 也。 音汝。 也。 袗, 畫 袗, 富 言 貴 聖 衣

然則非自殺之也,一間耳。」之父,人亦殺其父,殺人之兄,人亦殺其父。殺人之兄,人亦殺其兄。孟子曰:「吾今而後知殺人親之重也:殺人

間 爲 耳,其實與自害其親 而感發 去聲。 也。 ○言吾今然後 間者,我往彼來 無異 也。 知者 ○范氏 , 間 必 有所 E

孟子曰:「古之爲關也,將以禦暴。

譏察非常。

「今之爲關也,將以爲暴。」

關。若使孟子用於諸侯,必行文王之政,中,此以園囿爲暴也。後世爲暴,不止於王之囿,與民同之,齊宣王之囿,爲阱國王之囿,與民同之,齊宣王之囿,爲阱國王之囿,與民同之,齊宣王之囿,爲阱國

實也。

凡此之類,皆不終日而改也。」

也。使人不以道者,以事言之。不能行身不行道者,以行言之。不行者,道不行

者,令不行也

孟子卷第十四

盡心章句下

者,邪世不能亂。」 孟子曰:「周于利者,凶年不能殺,周于德

周,足也,言積之厚則用有餘

其人, 節食豆羹見於色。」 孟子曰: 「好名之人, 能讓千乘之國, 苟非

勉,而於其所忽,然後可以見其所安之人,矯情干譽,是以能遜千乘之國。然若本非能輕富貴之人,則於得失之小者,反本非能輕富貴之人,則於得失之小者,反

空虚,言若無人然。 孟子曰:「不信仁賢,則國空虛

「無禮義,則上下亂。

四九七

禮義 ,所以辨上下,定民志。

無政事 ,則財用不足。」

禮義政事 尹氏曰:「三者以仁賢爲本。 生之無道,取之無度,用之無節故也。 ,處之皆不以其道矣。」 無仁賢,則

得天下,未之有也。」 孟子曰:「不仁 而得國者,有之矣;不仁而

三代而後可。」 以來,不仁而得天下者有矣,然皆一再傳 而失之,猶不得也。 而不可以得丘民之心。〇鄒 言不仁之人,騁其私智,可以盗千乘之國 所謂得天下者,必如 氏曰:「自秦

孟 子曰:「民爲貴、社稷次之、君爲 之。蓋國以民爲本,社稷亦爲民而 土神。 稷,穀神。 建 國 則 立 輕。 壇 壝 7 以 前 祀

> 君之尊,又係於二者之存亡,故其輕 重

如

此

是故得乎丘民而爲天子,得乎天子爲諸侯

得乎諸侯爲大夫。

天下歸之。天子,至尊貴也,而得其心者 丘民,田野之民,至微賤也。 然得其心,則

諸侯危社稷,則變置

不過爲諸侯耳。是民爲重也。

諸侯無道,將使社稷爲人所滅,則當更立 賢君,是君輕於社稷也。

水溢,則變置社稷。」 犧牲既成,粢盛既潔,祭祀以時,然而旱乾

於君 亦年不順成、八蜡 能爲民禦災捍患,則 盛,音成。 加 輕 於民也。 ○祭祀 不通之意。 不 毀其 失禮,而 ' 壇壝而更置之, 是社稷雖重 土穀之神不

是也。 非聖人 志 百世之上。 孟 子曰 聞柳下惠之風者,薄夫敦,鄙夫寬,奮乎 :「聖人,百世之師 故聞伯夷之風者,頑夫廉,懦夫有立 而 能 句。 若是乎? 百世之下,聞者莫不興起也。 也,伯 丽 况 於親 夷、 柳 炙之 下 惠

也。餘見前篇。 興起,感動奮發也。親炙,親近而熏炙之 者乎?」

是否也。

去父母國之道也。去齊,接淅而行,去他國孟子曰:「孔子之去魯,曰:『遲遲吾行也。』

重出。

之道也。」

孟子曰:「君子之戹於陳、蔡之間,無上下之

交也。」

君子,孔子也。戹,與厄同。君臣皆惡,無

所與交也。

貉稽曰:「稽大不理於口。」

貉,音陌。○趙氏曰:「貉,姓,稽,名。

俚,《方言》亦訓賴。

爲眾口

所訕

。」理,賴

也。

今按《漢書》,無

孟子曰:「無傷也。士憎茲多們。」

四九九

П

·肆不殄厥愠,亦不殞厥問。』文王也。」《詩》云:『憂心悄悄,愠于羣小。』孔子也。此則憎當從土,今本皆從心,蓋傳寫之誤。趙氏曰:「爲士者,益多爲眾口所訕。」按:

當之。 也。 也。 處 之事,可 怒,亦不自墜其聲問之美。 人見怒於羣小。 《詩》,《 如 何、盡 本言太王事 悄悄,憂貌。 邶 肆,發語 以當之。 風 其在我者而已。」 柏 辭。 孟子以爲孔子之事 昆 舟》及《大雅 愠 夷,雖 一, 怒也。 尹 殞,墜 氏 日 不能 孟子 也。 本言衛之仁 「言人顧 殄絶 以 問, 縣》之篇 爲 可 聲 文 其 王 自 愠 問

其香 孟 子 昏 日 使 人昭 賢 者 昭 以 其 昭 昭, 使 人昭 昭; 今以

昭 $\overline{\wedge}$ 大學》之道 昭 明 也。 ,在自昭 昏 香 闇 明德,而 也。 施 尹 於天 氏 下國 日

家,其有不順者寡矣。」

而成路。句。爲間不用,則茅塞之矣。今茅孟子謂高子曰:「山徑之蹊間,句。介然用之

塞子之心矣。」

也。 也。 介然, 倏然之頃 介,音戛。 爲間 言理義之心,不可少有間 少頃 〇徑,小路也。 也。 也。 茅塞 用, 一,茅草 由 蹊,人行 也 斷 生而 也 路, 處 塞之 大路 也。

文王之樂。」 ○豐氏曰:「言禹之樂,過於高子曰:「禹之聲,尚文王之聲。」

孟子曰:「何以言之?」曰:「以 蟲 紐 追,音堆。 也 也 《周 言禹 禮 蠡, 時 所 音禮 鐘 謂 在 旋 者, 蟲 鐘 是 豐氏 紐 也 追蠡。」 如 曰:「追, 蠡者 蟲 製製 欲 木

禹之樂過於文王之樂也。」絕,蓋用之者多,而文王之鐘不然,是以知

曰:「是奚足哉? 城門之軌,兩馬之

力與?」

之,亦未知其是否也 久 迹深。 曉,舊説相 可 能使之然也。 也。 知之也。 迹淺。城門惟容一車,車皆由之,故其轍 與,平聲。○豐氏曰:「奚足,言此何足以 以此 一而紐 城中之途容九軌,車可散行,故其 而 絶,文王之鐘,則未久而紐全,不 蓋日久 議優劣也。」〇此章文義本不可 軌,車轍 承如此 言禹在文王前千餘年,故鐘 (車多所致,非一車兩馬之力 ,而豐氏差明白,故今存 迹也。 兩馬,一車所 轍 駕

棠,殆不可復。」 齊饑。陳臻曰:「國人皆以夫子將復爲發

> 其不可 問言齊人望孟子復勸王發棠,而又自言恐 發棠邑之倉,以 復,扶又反。 也。 〇
> 先
> 時 振 貧 第。 齊國 嘗饑,孟 至 此 又饑 子 勸 陳 臻 王

攘臂下車。 嵎,莫之敢攖。 搏虎,卒爲善士。則之野,有眾逐虎,虎 孟子曰:「是爲馮婦也。晉人有 笑之,笑其不知止也。 之,適也。 用孟子,而孟子亦將去矣,故其言如此 手執曰搏。卒爲善士,後能改行爲善也 眾皆悦之,其爲士者笑之。」 負,依也。 望見馮婦,趨 山曲 疑此時齊王已不能 E 而迎之。 嵎。 馮 攖,觸, 婦 者 馮 也 婦 負

聲也,鼻之於臭也,四枝之於安佚也,●性孟子曰:「口之於味也,目之於色也,耳之於

❶ 「枝」,仿元本、吴本作「肢」。

也。 有 命 焉 君子不謂 性 也

皆如 節 願 有 程 不止! 限 子 而求必 制 Ė 其 :「五者之欲,性 願 則 爲 是亦有 貧 得 則 賤。 是 之也。」 愚按: 命也。 命也 蓋雖 富貴之極, 也。 不可 不能 然有 謂 我 分, 皆 性 亦 之 如 有 不 其 品品 所 能

也,智之於賢者也,聖人之於天道 有性焉,君子不謂命也。」 仁之於父子也,義之於君臣也,禮之於賓主 也,命也

之於君 所禀者 於命 賢 純 智矣,而 而 程子曰:「仁、義、禮、智、天道,在 否 盡 亦 一, 故 不 也 者,所禀有厚薄清 ·已焉。 厚 哲 臣 不謂 不 也 而 ,聖人之於天道 知 盡 清 之命 仲 薄 ,禮之於賓主也恭 則 尼。 而 其仁之 也。」〇 濁 是 ,則反是。 濁。 非 張 於父子也至,義 也 命 然而 耶 無 子 ? 」 愚 日 是皆 性 不 ,智之於 : 「晏嬰 人則 吻 善 按 合 可 所 謂 學 賦 而

> 子各就 性之所 五者爲 言約 子所 五 更詳之。 命 一者爲 也 謂 而 盡矣。」 命,一 有 養 其重處言之,以 性 或 一, 雖 ○愚 則付命於天,道 而 曰 . 命於 有不至,則 有不得,而 ●「者,當作 聞 天者 之 師 也 티 : 伸 不 必欲求之;以 此 則 否; 「此二條 然世之人以 復 而 責 致 抑 人, 衍字。 成於己,其 力。 彼 也。 者, 故 後 前 孟 張

浩生 日 何謂善? 趙 「善人 氏 不 害問 曰:「浩生,姓; 也,信 何謂信?」 曰:「樂正子, 人也 不害,名,齊人也。」 何人也?」孟 子

: 不 害問 也

曰 或」上,仿元本有「〇」。 「可欲之謂

0

其爲人也,可欲而不可惡,則可謂善人矣。天下之理,其善者必可欲,其惡者必可惡。

「有諸己之謂信,

無惡之謂善,誠善於身之謂信。」色,是則可謂信人矣。○張子曰:「志仁凡所謂善,皆實有之,如惡惡臭,如好好

「充實之謂美,

而無待於外矣。

「充實而有光輝之謂大,

四支,發於事業,則德業至盛而不可加矣。 和順積中,而英華發外,美在其中,而暢於

「大而化之之謂聖,

也,在熟之而已矣。」 爲矣。〇張子曰:「大可爲也,化不可爲則不思不勉,從容中道,而非人力之所能則不思不勉,從容中道,而非人力之所能

「聖而不可知之之謂神。

能測。非聖人之上,又有一等神人也。」程子曰:「聖不可知,謂聖之至妙,人所不

樂正子,二之中,四之下也。」

知之神,上下一 若存若亡而已,則能不受變於俗者鮮矣。」 諸己而已。能有諸己,則居之安、資之深, 之止耳。」〇程子曰:「士之所難者,在有 學不倦,合仁與智,具體聖人,獨未至聖人 於學,所以但爲善人、信人而已。顏子 子皆知好仁矣。 己者或未實也。○張子曰:「顏淵 蓋在善、信之間,觀其從於子敖,則其有諸 而美且大可以馴致矣。 可得而名矣。」 ○尹氏曰:「自可欲之善,至於聖而不可 理。 樂正子志仁無惡而 擴充以至於神, 徒知可欲之善,而 不 樂正 則不 好 致

歸 孟 斯 子 日 受之而 逃 已矣。 墨 必 歸 於 楊 逃 楊 必歸 於 儒

陷溺 墨 反正之漸 氏 務外一 之久,而取 大略 而不情,楊氏 其 如 悔 此 悟 之 歸 太 新 斯 簡 也 受之者 而 近 實 関 故 其 其

從而招之。」 今之與楊、墨辯者 如 追 放豚,既 入其 艺, 又

孟

之可反,仁之至,義之盡 故人知彼説之爲 之甚嚴,而於其 既往之失也。 也 放 厂豚,放 ,羈其足也。 逸之 豕 〇此 言彼 來歸,待之甚恕。 邪 豚 章 也 既 待之恕,故 見聖賢之於異端 來歸 也 <u>寸</u> 闌 而又 也 人知此 距之嚴 追 招 咎 道 其 距 罥

者危

征。 孟 子 君 用 日 一:「有 其三,而父子離。」 子 用 其 布 縷之征 緩 其 一, 粟 米 用 之 其 征 二,而 力 民 役 之 有

> 米取 邦 限之法, 若並取之, 征 本 賦 之於 之法 取 之無 亦 秋 歲歲 則 此 力 度 民 有常數,然布縷 意 役 則 力有所不堪矣。 也 取 其 之於冬,當各以 國 尹 危矣。」 氏曰:「言 取之於夏,粟 今兩税 其 民 時

寶珠 子 尹 氏 曰 : 玉 者 日 0 ,殃必及身。 諸 一言 侯 之寶三: 寶 得其 寶者 土 地 安, 人人民 寶 失其 政 寶

盆 大道 見 盆 成括 殺?」曰: 成 括 也 仕於齊。 見 則 殺 足以殺其 門 「其爲人也小有才,未聞 人 孟 問 子 軀 日 Ħ 而 : . 已矣。」 「夫子 死 矣 何 盆 以 成括 君 知 其 之 將

禍。 盆 成 **公**,姓; ○徐氏曰:「君子道其 括, 名 也。 恃 才妄 〈常而 作 己。 所 以 括 有 取

死之道焉,設使幸而獲免,孟子之言猶

信

也。

斯受之而已矣。」
設科也,往者不追,來者不距。苟以是心至,以是爲竊屨來與?」曰:「殆非也。夫子之或問之曰:「若是乎從者之廋也?」曰:「子

從者固不爲竊屨而來,但夫子設置科條以乎? 孟子答之,而或人自悟其失,因言此廋,匿也。言子之從者,乃匿人之物如此廋,医也。言子之從者,乃匿人之物如此。

於聖賢之指,故記之。門人取其言,有夫子亦不能保其往也。門人取其言,有待學者,苟以向道之心而來,則受之耳,

雖

也,人皆有所不爲,達之於其所爲,義 人能充無穿踰之心,而義不可勝用也。 「人能充無欲害人之心,而仁不可勝 孟子曰:「人皆有所不忍,達之於其所忍,仁 勝,平聲。 惻隱羞惡之心,人皆有之,故莫不有所不 矣。 牆,皆爲盗 能,達之於所不能,則無非仁義矣。 物欲之蔽,則於他事或有不能者。 忍、不爲,此仁義之端也。 其 所忍,則能滿其無欲 無穿踰之心,而無不義矣。 能推 其所 之事也。 〇充,滿也。 不爲,以 能推所不忍, 害人之心,而無 達於 穿,穿穴; 然以氣質之偏 所 爲, 但推定 則能 以達 踰, 也。 用 也。 所 於 踰

之之實。人能即 所虧缺,則無適而非 汝,人所輕賤之稱,人雖或有所貪昧 此申説上文充無穿踰之心之意 而甘受之者,然其中 充無受爾汝之實,無所 此而推之,使其 義矣。 心必 有慚 往 而 忿而 不 也 充 爲 不肯受 滿 義 隱 蓋 無無 也 忍 爾

類也。」而不言,是以不言餂之也,是皆穿踰之而不言,是以不言餂之也,是皆穿踰之「士未可以言而言,是以言餂之也;可以言

取 之心,以達於此 所忽易,●故特舉以見例。 無穿踰之心也。 物曰餂,即 餂,音忝。 於人,是亦穿踰之類。 此 () 舒 意 也。 ,探取之也。 而悉去之,然後爲能充其 便佞隱默,皆有意 然其 明必 今人以 事隱 推 無穿踰 微,人 舌取 探

孟子曰:「言近而指遠者,善言也,守約而

施,去聲。〇古人視不下於帶,則帶之上

而至理存焉,所以爲言近而指遠也。乃目前常見至近之處也。舉目前之近事

君子之守,脩其身而天下平。

所以自任者輕。」「人病舍其田而芸人之田,所求於人者重,而此所謂守約而施博也。

舍,音捨。○此言不守約而務博施之病。

聖人也。○程子曰:「性之、反之,古未有之至也。反之者,脩爲以復其性,而至於性者,得全於天,無所污壞,不假脩爲,聖孟子曰:「堯、舜,性者也;湯、武,反之也。

反其性,及其成功則一也。」 意 而 此 安行 ,復性者也。 語,蓋自孟子發之。」〇吕氏曰:「無 性 者 也, ●有意利行, 而至於 堯、舜不失其性 一,湯、 武 善 無 意

必信,非以正行也。 非爲生者也。 動容周旋中禮者,盛德之至也。 經德不回,非以干禄也,言語 哭死 而哀,

事 皆自然而然,非有 意於中也。 中禮,乃其盛德之至。 中、爲、行,並去聲。❷ ,性之之德也 經,常也。 意 而爲之也,皆聖人之 ○細微曲折,❸ 回,曲 自然而中,而非 也。 三者亦 無 有 不

君子行法,以俟命而已矣。」

非 法者,天理之當然者也。君子行之,而 凶禍福有所不計,蓋雖未至於自然,而 有所爲而爲矣。 其義不謀 其利 明明 此反之之事 其道不計其功」, ,董子所謂 己 吉 IE

> 聖人性之,君子所以復其性也 可矣』之意也。」〇吕氏 盛德之至。行法以俟命者 此意也。〇程子曰:「動容周旋中禮者, 由此出,聖人也。 行法以俟命,君子也。 了朝聞道 法由 此),夕死 立

孟子曰:「説大人,則藐之,勿視其 説 高 當時尊貴者也。藐,輕之也。 音税。 顯之貌。藐焉 也。 藐,音眇。 而不畏之,則志意舒展, 〇趙氏 曰:「大人, 巍巍,富貴 巍 魏然。

0 者」,原脱,據仿元本、吴本補。

言語

得 盡

- 2 監本、吴本補。 中爲」、「並」,原脱,據殘宋本、元甲本、元乙本、司
- 6 細微」,原脱,據殘宋本、元甲本、元乙本、司 禮監本

0 也」,原脱,據仿元本、吴本補

飲酒 也,吾何畏彼哉?」 在 前方丈,侍妾數百人,我得 堂 一彼者,皆 「,驅騁 數 仞 田 我 榱 獵,後車千乘,我得志,弗爲也 所 題 不 數 爲 尺, 也; 我 在我者,皆古之制 得 志 志, 弗 爲 弗 也 爲 也 般 樂 食

短 楊氏曰:「《孟子》此章,以己之長,方人之 聖賢之法,則彼之巍巍者何足道哉 然者,我 食列於前者,方一丈也。 榱,楚危反。 ,猶有此等氣象,在孔子則無此矣。」 ○榱,桷 雖得 也。 志,有所不 般,音盤。 題,頭 爲,而所守者皆古 也。 樂, 此皆其所謂巍 音洛。 食前 方丈 乘,去 巍 饌

欲,雖 孟子 有存焉者,寡 EI: 有 不 存 養 矣。」 焉者 心 莫 ,寡矣; 善善 於寡 其爲人 欲。 其爲 也多欲 人也 雖 寡

欲,如口鼻耳目四支之欲,雖人之所不能

溺 所 無 當深 ,只有所向便是欲。」 然多 戒 而 也。 不 節 未 程子 有 不 曰:「所 失 其 本 心者 欲不 必 學 沉

曾皙嗜羊棗,而曾子不忍食羊棗。

以父嗜之,父没之後,食必思親,故不忍羊棗,實小黑而圓,又謂之羊矢棗。曾子

食也。

棗所 公孫 食膾炙而不食羊棗?」曰:「膾 曰:「膾炙哉 丑. 獨 問 也 日 諱 : !」公孫 名 膾 不 炙 · 諱 姓, 丑. 與 E . 羊 姓 棗 然則 所 孰 炙所同 美?! 司 曾子何爲 也 也,羊 名 孟 所 子

肉聶而切之爲膾。炙,炙肉也。

獨

也。

吾黨之士狂簡,進取,不忘其初。』孔子在陳,萬章問曰:「孔子在陳,曰:『盍歸乎來!

何思魯之狂士?」

舊也。此語與《論語》小異。 取,謂求望高遠。不忘其初,謂不能改其盍,何不也。狂簡,謂志大而略於事。進

不欲中道哉? 不可必得,故思其次也。」乎! 狂者進取,獧者有所不爲也』。 孔子豈孟子曰:「孔子『不得中道而與之,必也狂獧

豈不欲中道以下,孟子言也。 爲者,知耻自好,不爲不善之人也。孔子爲者,知耻自好,不爲不善之人也。孔子爲者,如耻自好,不爲不善之人也。孔子爲,所不爲,,所不以之言。然則「孔子」字下當有

「敢問何如斯可謂狂矣?」

萬章問。❶

狂矣。」曰:「如琴張、曾皙、牧皮者,孔子之所謂

琴張,名牢,字子張。子桑戶死,琴張臨其

孟子卷第十四

盡心章句下

三子者之撰,事見《論語》。牧皮,未詳。皙倚其門而歌,事見《檀弓》。又言志異乎有近似者。曾皙,見前篇。季武子死,曾喪而歌,事見《莊子》。雖未必盡然,要必

萬章問。 何以謂之狂也?」

夷考其行,而不掩焉者也。曰:「其志嘐嘐然,曰:『古之人,古之人。』

啰,火交反。行,去聲。○嘐嘐,志大言大吧。重言古之人,見其動輒稱之,不一稱也。重言古之人,見其動輒稱之,不一稱是堯、舜氣象也。特行有不掩焉耳,此所是堯、舜氣象也。特行有不掩焉耳,此所是堯、舜氣象也。特行有不掩焉耳,此所

■ 「問」下,仿元本、吴本有「也」字。

五〇九

是獧也,是又其次也。「狂者又不可得,欲得不屑不潔之士而與之,

者,其 孔子曰: 進 此 狂 於道,有守者不失其身。 ,有志者也; 因上文所引,遂解 惟 鄉 過 原 乎 我門 1 獧, 鄉 而 有 原,德之賊 不 所以思得 守 人我室,我 者 屑 也。 也。」 潔也 獧者之意 有 不 志者能 憾焉

何

如斯

可

謂

之鄉原矣?」

鄉 萬 鄉 而 原慤」,字皆讀 章又引孔子之言 里所謂愿人,謂之鄉 非德,故以 人非 其不見親就爲幸,深惡 有 識 者。 爲 德 作 愿 而 原, 謂謹 問 原。 與 也 過 愿 愿之 孔子 門 而 同。 不 痛 人也 以其似 人 絶之也。 而 荀 不 子》 ·恨 德 故

凉 ? 言 日 :「何以 則 生 斯世也,爲斯世也,善斯可矣。』閹 古 之人,古之人。 是嘐嘐也? 言 行 不顧 何 行,行 爲 踽 踽 不 涼 顧

媚於世也者,是鄉原也。」

厚哉 求 媚,求悦於人 原之志也。 人,②使當世之人皆以爲善則 又譏狷者曰: 然,行不掩其言,而 於人也。 踽,獨行不進之貌 親媚於世 ,去聲。 ? 人既生於此世 鄉 踽 一,是鄉 閹,如 原譏 也。 何必如 其 狂 禹 原之行也 奄人之奄 孟子言此 徒每 者 涼涼 反。 此 日 踽 則 事 閹, 踽 薄 當 何 必 閉 深 也,不 涼 音 可 但 稱 用 自 涼, 藏之意 奄。 矣。 爲 古 如 閉 此 此 見 無 X 藏 嘐 親 此 世 所 耶 也 7 親 ? 嘐 厚 鄉 踽

爲原人,孔子以爲德之賊,何哉?」萬章曰: ●「一鄉皆稱原人焉,無所往而不

9 0

8

[「]人」,司禮監本作「原」。

[「]當但」,司禮監本、吴本乙倒。

[「]章」,殘宋本、元乙本、吴本作「子」。

愿 萬 章疑之。 亦謹厚、 之稱。 而孔子以爲德之賊,故

德 之 賊 之,自以爲 合乎汙世,居之似忠信,行之似 日 :「非之無舉也,刺之無刺也,同乎流! 也 是,而不可與 入堯、舜之道,故曰 廉 潔 ,眾皆悦

亂

非 靡 吕侍講日 忠信 如水之下流,眾莫不然也。 ,欲刺之則 而似忠信 0 言 無 此 可 非 刺 等之人,欲 廉潔 也。」流俗者, 而 似 非 廉 汙 之 潔 濁 則 風 俗 無 也 頹 可

也; 也; 也,惡佞,恐 孔子曰:『惡 惡鄉原,恐其亂德 惡鄭聲, 恐 其 似 其 亂 而 義 亂 非 樂 也 也 者 9 世 惡 惡紫, 恶 利 莠, \Box 恐其 恐 恐 其 其 亂 亂 亂 朱 信 苗

言以明之。 惡 ,其言似義 莠, 莠,似苗之草 圃 音有。 非 義 也 孟 也。 利 子 \Box 又引 佞, 多言 才智之 孔 而 子 不 之

> 間 實者也。 以爲善,有似 色。 德 朱,正色 鄭聲,淫樂也。 乎 也。 中 道 鄉 而 原 實 樂,正 ,不狂 非 也,故 不 樂 獧 也 恐 人皆 其

興,斯 君子反 無 邪慝矣。」 經 而 已矣。 經 正 則 庶 民 興; 庶

民

狷者 反,復 所 不足以惑之矣。 於善,而是非 此,亦復其 濟其私,而 世衰道微,大經 興,興起於善 不爲而 蓋 也。 以狂者 叮 常 邪 經,常也, 與有 也。 明白,無 道 慝 不正 志 而 並 爲 邪 起,不 己。 大 尹 也 慝 ,故人人得爲異 萬 而 氏 所回 如如 常道既 世 所惡於鄉 可 日 可 與 不易之常道 :「君子取夫 鄉 互,雖 勝 進 原之屬 正 復, 道 原,而 有邪 狷 則 君 説 者 民 子 也 也 欲 於 有 狂 興

⁰ 愿」, 司 禮監本、吴本作「原」。

絕之之術無他焉,亦曰反經而已矣。」痛絕之者,爲其似是而非,惑人之深也。

禹、皐 則見而知之,若文王,則 孟子曰:「由 由湯至於文王,五百有餘歲,若伊尹、萊朱, 然亦 也。」〇尹氏 趙 氏 陶 有 三五五 ,則見而 遲 速,不能 堯、舜至於湯, 日 百歲而聖人出,天道之常。 知之; 知 Œ ,謂知其道也。」 若湯 聞 Ŧi. 百 而 五百 ,則聞而知之。 知之。 年,故言有 有餘歲,若 餘

也,爲湯左相。」趙氏曰:「萊朱,湯賢臣。」或曰:「即仲虺

散宜生,則見而知之;若孔子 由文王至於孔 散,素亶反。 ,在人。賢者識其大者,不賢者識其小 子 貢曰:「文、武之道、未 子,五 散,氏;宜生,名; 百有餘 ,則聞 歲,若太公望 而 文王 知之。 墜 於

> 此所謂聞而知之也。 者,莫不有文、武之道焉。夫子焉不學?」

相去又近,然而已無有見而知之者矣;則也,然而無有乎爾,則亦無有乎爾。」世,若此其未遠也,近聖人之居,若此其甚世,若此其未遠也,近聖人之居,若此其甚

乎?」愚按:此言雖若 五百 先生。」而其弟頤正叔序之曰:「周公没 也 以明其傳之有在,而又以 故於篇終,歷序羣聖之統,而終之以此,所 滅,百世之下,必將有神會 傳,而憂後世遂 有不得辭者,而又以見夫天理民彝不可 顥伯淳卒。 ,其指深哉 餘 歲之後,又豈復有 潞公文彥博題其 失其傳,然乃 〇有宋元 不 敢自謂 豐 加 俟後聖 聞 墓 心得之者耳。 所以 年,河 加 曰 : 知之者 一於 E 自見其 「明道 得 無 南 其 則 泯 程 窮

情也哉?」 淑諸 儒。 人之爲功? 人而已。然學者於道不知所向,則孰知 興起斯文爲己任。辨異端,闢邪説,使聖 乎千四百年之後,得不傳之學於遺經,以 焉莫知所之,人欲肆而天理滅矣。 先生生 聖人之道不行;孟軻死, 人之道煥然復明於世。 道不行,百世無善治,學不傳,千載無 人,以傳諸後; 無善治,士猶得以明夫善治之道,以 不知所至,則孰 無真儒,則天下貿貿 蓋自孟子之後,一 聖人之學不傳。 知斯名之稱 斯 真

孟子卷第十四

附録 序跋

(南宋)馬光祖《當塗郡齋刊四書章句集注題跋

取《 敬 書 光 可 加整治。 刊 本文皆大字 ?,見謂善本。光祖 且 祖 中庸》、《大學章 日廢,熟復玩味, 敬 畏哉? 當塗郡 《語》、《孟》歲月浸久,間有 識 是書在 齋 淳 於老眼 舊 祐 有 天地間,無窮達老少皆不 壬子孟 文公《語 朅 句》併 爲 則施之行事 來假 宜 秋朔旦, 刊之,足成《四 蓋 守、依仿規 孟 正 集注》,注 肅 丁,其有 漫滅,就 金華 旲 公所 馬 與

元泳澤書院刻本四書識語

[元]佚 名

字,不 本於京 至正 其殘闕,置諸 丙午秋 無訛 四 師,經注字 舛。 家 月 泳 藏 今得 識。 澤 等 書 誦 燕 院, 實 Ш III 便 嘉 嘉 板 觀 氏 與 行 讀 所 學者共之。 者 刻 於是補 宣 類 一城 多 舊 細

書章句附考序

〔清〕吴 英

而世之 臨没前 也 又有 朱子之注 得 數 因 H 其 傳寫 定 猶 本者鮮, 四 有 而異者,亦未 改筆。 書》也 此注 但 畢 其 生 本 免焉。 本 心 ·所以 行 力於 世 有異 定本 斯

● 「至正」,原作「淳祐」,據陶湘《清代殿板書目》改。此

斯 用 世」,誤爲「七 疏 後爲「得於 心良苦,其 ,没前有改筆,則朱子之注 家之常事,若夫注是書 「公孫枝 大 而 而異 定 學》「欲 也 如《 心 用 世」之類 而 其 《論 論 力獨瘁矣。 ^ 不失」 必 孟 語》「 語》二 自 子》「自武 慊」,後爲 耳。 衛大夫公孫拔 而 定也 道 傳寫之誤,固 而 而 畢生 四 丁至紂 有得 一欲 書》也 類是 心 於 其 力 凡 J) 也。 其 於 注 九

之間 精之理, 者,何爲 得 其 文,亦在於大本大源,而 於《注》之有定 以治國平天下 極 躬行,而 也。 一,亦何爲也哉? 夫朱 也哉 然則 爲孔門 子之意,必欲精之又精 不在於《 ? ,在體諸身,施 本 我子朱 至精之文。 也 蓋 以 注》之有定 立志於爲聖賢,在 四 子之 即 子 不 以 之書 苦 在 講 爲之注者 於政,亦不 於 心 論 本 爲 瘁 兀 也; 旬 力於 兩 間 造 字 必 至 斯 怒 在 用 自 平

此

義 爲

來 寫 此 至當 所誤 ,授受既 子朱子之 而 者 不 耶 미 遠, ? 意 易 亦不免 乃 也 況 不惟注 與 況 有 斯 有 傳寫之誤者 文 非 爲 也,經文歷 朱 子原 無 所 文 負 耶 焉 漢 爲 耳 傳 以

子《儀 於其 於其 年。 摩於《朱子文集》及朱門 朱子《注》之異同 之未 通 巾 經 自論注 此二三 中《學》、《庸注》,則置之。 英自癸卯 禮 通 致 經傳 用 而 處,則置之。 之學 十年間,頗 求 通 通 丽 解 處,不暇詳也。 者, 不 後, 繫 汲汲 東發《黄 木 此 諸 亦手不釋卷, 於 未嘗 也。 不暇, 子集中 棘闈者二 不涉 氏 十三經》 何 日 未嘗 而奚暇 也? 鈔》, 歷 於 + 不 而 於 然 朱 研 於 餘 經 然

業名山 是 日 每 母 聞 慨 病 自 人言鄉 信至 丁卯 忠兒感予心之摧傷,亦不 試 與 英 兒 ,則心痛 與與 偕 兒志 返 已抱 忠偕 盡 棄所業, 恨 人省, 終 樂 天 習 未 而 自 數 就

之定

本

句考之

而

有 心

所

疑

折

衷

子

此

辛

未

夏

兒

志

忠

學

輯

几

朱

子

注

辨

者

有有

猶待辨者,有

不可

不辨者

如《大學·誠

意》章

非

易

事

也

得得

不

杰

焉

定本

旬 於

有

不

待

繆訛 廣其就 得善 遠 窮況 暇爲 之路 者所 證 括 定本及傳 嘉 屋之年, 一次附 也 書》之書 及於家 辛 本 此 不 於後。 尚其 求所 未 學 IE. 屑爲之之事 ,予懼其 歲 几 即 ? 寫 重 方諸 有道之帙。 哀英之遇,而 得所 謂 陽 乃 有 通 誤 徧 日 君 求朱子《章 非 今而 疑 願 經 折 者 覓 ,吴邑吴英序 子見 聽 則 致用之學 衷 借 也 則兒 别録 兒之不 英之 之 折 古 斯 其 猶未 衷於予 役 本 書 當 鄉 諒 所 句集 也 部 亦 使 忠 自 而 兀 遇 當 而 英 之 教 相 量 古 書 學 口 注 而 從 於 命 情 IE 幼 而 **>** 謂 焉 私 及 於 付 不 其 屢 學 也 爲 窮 中 青 壯 梓 能 後 疏 又 躓 夫 此 迁 奚 名 考 雲 行 以 改 釋 場

之也 其定本 其初 天; 本; 聖經章 聖人之有教, 此之類是 政》章「行道 庸》首章「蓋 故 類 之大原出 必謹之於此 本則日 是 不待辨者維 其定本 知事之有道,而 則 学欲 也 故子思於此 也。 「慊與 其必 人知己之有性,而 而 猶待 於天 則曰「得於心 而不 欲 有 不 其 何? 得 自 辨 可 以 不 知其 慊 亦 一於善 於心 首發明之,而 不 者 審 慊 此 不 辨 維 其 大 意 知 也。 其 此 者 何 幾焉」, 我之所 也。 初 幾甚微」。 其 而 ? 維 本,非 由 不失也」。 此 不知 何 如《大學。 「於性; 初本,非 論 爲定 固 此 董 語 定 其 實 有 子 如《 0 本 本 者 出 如 非 所 此 爲 於 如 定 裁 中 定 謂 知

書

章

句

注

定

本

「清

吴

英

發 所 類 明 知 不 以 是 之,讀 所 本於 爲道 其定 用 也 力 天 本 者 聖 而 則 而 所 備 之 宜 不 於 能 所以 深體 我。 蓋 已矣。 爲 學者. 之 所 而 教 默 故子思於 識 知 以 原 之, 也。 其 爲 人,道 所 則 此 其 如 首 於 此 無

原

先儒 於心 之相 若 所習 也 謹之於此, 從 不 坊 大《聖經 永 可 之説, 合矣, 」句,二者雖 釋本又但從定 本不合 樂《大全》本。 不辨, 所 蓋人之所以 而先 以 然皆 章 久 以 人 何 爲 「,爲 審其 哉 者 而 》「一於善 不 ? 安之矣, 見 常 與 有 待辨 爲 幾焉」, 闡 坊 爲 本 善 相習 吾蘇 人 主。 所 本 本 而 駭 不 可 此 既 無 坊 句 凡 爲 異, 合 段 所 證 固 久 間 誠 所習坊本 又 猶 辨 宜不待 人情每 所 爲 意》章「故 既 所 而 待 説 行 善 以 有 政》章「得 與 之本, 辨 本 所 猶 朱 辨矣。 習 及 待 子 既 安 又 及 先 熟 辨 與 於 必 爲

西

而

1 口 儒 辨 之 所 也 些, 得 毋 益 其 其 駭 異 ? 所

以

不

編》, 段之爲 朱子 於此 始出 脱稿 \(\frac{1}{2}\): 其於此段, 《學》、《 且 爲 Ш 子 不 自 從事 安有 又可 真 必 者 定 今試 如 則《 儀禮 而 庸 有 先 氏 定 1 論 此 得 《學》、《 者 > 爲 旁求 篇。」 辨 公 者 不 本 知 其 兀 亦 經 即 乎? 從 其爲 晚 精 真 書 原 我 得 傳 此 矣, 最 則 歲 微 氏 自 朝 集 斯 庸》 涌 口 定 後定 所 殁 如此 於 者 而 所 所 所 編 解 知 本 注 後 親 此 況 以 手 一者, 也 橅 **>** 其 定, 本 亦 贵 定 又下 而 而 又 則 知「人之所 刻 爲 載《 益 而 如 IF. 無 非 書 朱子之子敬 宋淳 定 其 澽 是。 及 可 疑 所 始 口 真 學》、《 絶 本 手 矣。 取 氏 納 以 出 知 改定者乎 祐 筆 定《學 而 未 决 也。 其 親 蘭 版 一之書, 集 無疑 以 庸》 受業 大字 爲 定 然 是 氏 則 11 從 殁 本 庸 翻 注 焉 段 於 此 ? 而 跋 集 惟 刻

苟

作 也。 贵 本 爲 於 趙 由 而 處 疏 段 氏 亦 而 几 通 文 益 坊 解 亦 亦 全 定 有 家 氏 書 則 而 如 淵 載 庭者 本 者 本 不 所 辨 於 疑 惟 附 其 求 是。 從 則 源 此 多 作 者 可 也 載《章 父 録 學 之,復 溯 朱 輯 皆 段 矣 無 無 最 推 也 一受業 **>**′ ≪ 疑 子 疑 後 求 始 作 自 釋 亦 之, 若 》之故 知知 朱 菴 南 定 也。 句 而 也 如 庸 也 有 \wedge 門之 於 此 宋至 ×, 深 本 捎 附 是, **>** 己之 四 如 注,而 朱子 雲峯 其 豈苟 者 有 東 氏 録 書 此 輯 3 但 爲 前 發 ? 源 \wedge 得 》者 有 一惜 几 通 之門 然哉 明 者 黄氏 胡 委 何 定 而 於此 此 性 書 \leq 八,爲 無 者 窮 不 氏《 · • 而 本 宋 段 二 云 作《纂 可 日 辨 所 元 口 ? 究 又 建 朱子 亦 又 四 疏 謂 説 鈔》 著《 其 云 决之堅矣。 益 益 安 如 書 此 故 新 最 考 亦 源 祝 可 然 ^ 其爲 皆其 是。 以 日 疏 可 安 通 注 如 其 無 以 **>** 金少 知 所 氏 倪 則 是 自 緣 疑 他 作 此 定 著 黄 其 而 氏

釋》也 父,爲 録》雖 論 倪 説 淹雅 諸 坊 氏 永 所 祝 父所著《方 不 學》、《 樂《 儒 本 惟 坊 氏之書可 作 》道之矣。 以 失』,祝未之見 本作『有 四 觀 ", 未 所 本 師 或 巾 . 書 未 朱 大全》本。 是從, (庸))尤 從之 所 0 之, 多 發 子 倪 今、 見 必 從 從 明 輿 得 母黨,嘗受業 氏 是 其 内 之緣 坊 耳 源,則 ***** 祝 \wedge 之師 亦 勝 無 於 全 專 直 本 川 9 氏 **覽** 惟 惟 書, 其 增 性 $\stackrel{\cdot}{\sim}$ 心 書 不 也 由 者 几 主 主 定定字 惟 於 減 學者。 大 〕。」《通》之説 一書? 知 通 書 而 **耐** 祝 不 則 衹 在 胡 全》 **>** 有 雖 即 注 氏 謂 日 祝 於 氏 以 録 定 陳氏 謂 ^ 於朱子。 ×, 則其 《大全 衹 輯釋 改 今祝 其 氏 又 附 \bowtie 本, 永 皆 而 勦 父諱 之《 作 何 録 樂《 己。 櫟 仍 如《爲 人近 襲 .] 一得 E **>** 氏 **>** 有 附 **>** 也 所 而 明 大全 爲 穆, 而 焉 如 輯 然 故窮 於 四 於 録 \exists 胡 載 ^ 謂 ? 政》 此 釋 跡 字 陳 几 書 \forall 氏 引 風 **>** 也 和 輯 故 究 倪 即 廣 附 華 氏 和 THI 書

更定之本 微辨 之,況祝 云 : 本? 倪 祝 0 氏 氏 略 更 而 失也 刊 本 者 後 倪氏《輯 所更定 有即 遠 亦弗 之 與 文公適 生不 至 四 「元」, 宗之 ~,派 即 子 興 矣。 者 本可以决然矣。 書》 顛 八之信 出於朱子後嗣之人之言爲祝 何 出 或 子明題 明 能 而 釋》引 倒 亦分矣」。乃祝 從得 於信 之本 所 擇 朱子 元 别 孫 刊 是 焉 得之本不合矣, 本 善以 有指 鑑 Ż 非 乎? 矣,明 之家 祝 從祝氏之人自 何 書 陳氏《四書發明》之言 興 則 也 父從,而 本 其 之辭 即 祝 以 或 也 無 氏《 朱 其 猶 明 鑑 者 如 然猶 識 子 不 自 謂 日一 也 向 大 爲 附 本之 歟 直 失 П 祝 得先公晚 RHI 據。 録 則 可委者 ? 之 講 明 本 則 其 》本卷 上 爲 而 非 明 是 指 而 師 破 非 畫 此 覓 絶 明 得 按 祝 以 端 綻 得 筆 祝 明 日 此 年 氏 定 本

> 釋》,亦如 出 知 則 於此之《大全》,亦 之於《發明》, 則 定 决然矣。 引之以 本, 於 朱子改筆之所以 從《大全》之坊 顯 然也, 鹵 必 莽耶? 爲 自 祝 此 祝 而 有 本 本 矣; 祝 故 而 重 如此,則其 而 不 倪 氏 本, 亦如 如 《輯釋》如 祝本之爲非 亦 不 氏 然爾 可考矣。 此 未 達 V 矣; 達 述之於《 陳氏信 也 相 此 此 傳 矣。 《大全》如 然 又何 定 以 則 輯 其 本 祝 至於《 總之,不 ·更可 其 其 釋 辭 本 脱 並 而 其 胎 輯 以 皆 載 意

事 爲 爲 命 節 謂 以 即即 從 性, 必 句 改之旨有 天 今取 天 率性之 原 而 之所 命 ,以經義繫於 非一 此 來。 段 以爲 之事 謂 一平列 可得而 而 道」二句, 脩 細 道」二句 也 道 也。 繹 、明吾人 之謂 窺見 之,熟玩 其不 道 不復 者。 從 教 之有 性 渾括「天命 之, 人人之 分 命 即 性 貼, 道 而 道 之 即 前 所 中 所 其 以 性 以 首 所

之,使 學知所 來,方 非 總注 特從首節 於己」足言之耳 易」即「出 旬 不本於天而備於我」一句之中 不可 本原 原其 其 不 可易, 爲 於 也 思 多「不可易」、「不 明 首次二節 易」、「不 所自 聖人 出 纔 喫緊 此 學 用 於 「本於天 略 於天」足言之耳, 節 知 三句 力 忧 頓,使 之 天,實體 無 無 經 啓 所 而 所 文 中所蕴含之意 可離」之意。 發 用 自 非有 筋 非 人 以 不 推 後學 下文 力 不 而 絡 之 不 本 爲 原 而 備 能已矣」二句 相 備 所 口 添出 可離 於 教 立言之所以 「學者 於 心 自 於我 聯 離 以 天 不能 己 胸之旨。 耳。 不不 而 爲 也 也。 恰 八, 與此 性、 兩層,然「不 句, 知 備 人 學者 抽出 可 已矣」,此 之, 道、教 相針 次 於 即 亦 離 道 然處 節 此 我 此節 氣 而 E 章 直 則 之 知之, 經 即 對 顯言 追 無 具 無 總 騰 其 所 有 注 備 雖 注 於 旬 出 以 口 而

遺卻 之精 所 字,於第三句 尚 宜 得 藴 雖 於天」意, 旬 董子所謂 而 失旨 皆朱子之筆, 覺 深 用 所 義 親切一 力自 是 取 徒 粗 妙 體 在 而 元 分有 若引來 如 此 粗 爲 雖 以 耶 淺 而 放下 此。 本 不能已之意 爲 淺 好 默 ? 而未及「備於我」 而 似 力。 道 邊意 含蓄 含蓄 勞? 則 識 未及精深 證《中庸》此 整 乃《 之大原」云云,爲知言 遺「道」 若 得 也,乃 文子 齊, 而 矣。 初本「知己之有性」云云 未 解 輯 似 贵 盡 部《 盡 釋》反 而 樂 爲 善 定本與 思 居其 字,文亦 是勉 中 仍於第 無學。 與未 ,況三平列, 至定 人之取 於 庸 節, 意 半 此 盡 爲 勵之辭 **>** 盡 本 也。 未 則 首 發 一句 引 其 其 則 又引 則 善 未 定本 爲 使學 陳 是仍 縣 所 能 明 偏 遺 亦 讀 史氏 氏 舍 殊 發 深 之二 重 盡 相 者 依 之 則 則 無 而 命 依 本 文 知 免 所 舍 口 餘

其 本。 義 通之妙。 加 方始貫 通 而 二,故曰 ,造語瑩潔。『 括 氏之言曰 不 不復 致令聖經賢 心力而 之筆 視 至『無 耳。」是討 已矣」,不過 有 爲 不可 所 稱 似 爲之以 發明 知 讚 爲 不辨 不 所 之, 傳 而 無 尋 本 以 知 於 傳授 勉 成其 知 稱 也 章 則 於 己 爲 經 厲力 句 讚 其 有性 。」是 天 人』三句,未 心法之文, 至粹者,千 此 子 於 而 而 似 所 ii 六句 僅 爲 思 學 備 以 以 乃 於 無 勉 鉤 知 繆 用 我 見 勵 所 深 大 從 其 見 義 百 致 用 闕 儒 祝 批 其 貫 遠 玾 又

君子 誠 則 通 > 陰爲 欲其 日 纔 朱子 誠。 有 小人, 兩, 一於善 「初本『必 改『一於善』,旨 日 便自 陽 而 欺 無自 自嫌 而 只 陰 愚 是 欺 」,後改 謂《易》 哉 也一 也 箇 'n, 作『 | 通 以 旬 則 陽 便 誠 爲 於 四

其 引陳 其 説 聖經 快該 改 慊 則 後言 致 失 提 傳 慊 力之意,正與 章皆承「致 而 行道 當實 (知」句 本之 」,則終 善字 釋 對對 也」一句,《 意 如 不失。』門人胡泳嘗侍坐武夷亭,文公手 老者 經 備 氏 此 而 一。」夫傳 毋 勝於 用 」,自修之首,故提善字, 綱 之言 爲 知」先 方 有 何以 則 領 不 其 自欺。 快 知」來 有 得 如一 (力」,恰相針 初本 猶 日 第六章注「知爲善以 知爲 反謂 於心。」後改本云 四 言 不 必言善 於 本 書 誠 如 只以 又如此 也 善 釋經 於善之顯 善以 該 『一於善』, 通》 不 意」,不比下節及 備 「一於」二字, 爲 傳 注 若 日 耶 去惡之義 定 何 語釋 對 而《 ? 注自修之首而 而 勞 本 也 但 「得於 無 挹 經 輯 豁 初改 讀 文 釋 若作「必 疑 注 不若『必 而 傳 (,尤爲 去其惡 下 》顧 縝 也 有 而 得 本 心 文矣。 密 第 用 乃 此 云 而 也 自 自 其 節 V 誠 用 痛 不 不

虞,罔 見 中 能 初 而於 正者 本 德之爲言得 若作「行道 得 而 爲 用『不失』字。」《通》之所引 其 本 盡 而 也 最 扇 失之 後定本 如 必 不 消 是 此 而 失法度 朝廷正 Œ 待 鎔 仍 行行 得 此 不 復 此 柄 也。 耳。 言 未 失 加 也。 字承上「爲 如 而 。 心 正 道 去「行 矣。 也」,則「得 無 也 以一 也。 則 加 無 ^ 泳 況 而 疑 不失者,兢 輯 上文既 後 此 行道 行 H 不失 有 也。 最 釋 不失,便是 天 道」二字者,沿 而 扇 得於身」, 道」二字,豈 後 下 後 政」二字來。 政者 顧 改 於心 正,所 則 言「政 則道之行 般。 身 便 乃又 本 雖 E 兢 如 了, 正 如 之 有 所 業業 句正 之爲 謂「正人 此 不 此 引 次改「身」 勝 身正 得 也 以 則 E 扇 陳 不 於 古 於 也 解 宜 言 無 贅 氏 初 1 自 注 儆 而後 得於 既 「徳」字 直 E 息 乎 之不 次 在 而 戒 得 而 接, 也 也。 ? 作 未 其 未 無 朝 1

守之不 間 爲 以 之人」之文,故 信 得 學序》謂『本 於心者也 字 不 於 有 之適子,與凡 天子之元子、衆子,以 有 也,上有「自王公以 上説 必遽 乎? 即 政以德, 。」是又皆繆證。 心 得 「志於道」之文。 有得 者 於 有 失 來。 云 何 心 此 異 據於 9 不 物 __ 必 於 則 時 況上 失。『 道得 乎 之躬行 非 心,參觀之而 若 其 民之俊秀」之文,下有 精 ? 德 末 何 其間不得 所 遽云不失,則失之急。 當。『 文先云 於 得 後 據 爲 注之言 「據於 心得」, J) 下至於庶人之子弟 夫《 定 多 於 解 者 而不 添 至公、卿、 得 本,終不 德 德 即 一德,則 大學序》之言 一行 於心 不言 其 字 德 行 躬行 失,乃是 注『得之於 祝 所 道 道 未 氏 而 躬行 行 以 如 也 到 大夫、元 即行道 定本 不 道 持守 自 字 行 原 經 所 而 也 「當 爲 躬 有 心 道 於 爲 根 文 \wedge 大 得 而 世 士 行 尤 渞 1 其 自 心 而 所

有 此 未 字 節 謂 到 旧 明 之所得乎天」, 而 H 顯 注 字 足 失 德 得 持 乃妄 不 惟 似 也 不言 爲 得 於 守 以 日 而 德 字 注 謹 政 德 於 言 心 處 進 足 以 德 在 即 則 不 『所得 者 行 耶 心 之。」是又繆議 德者言, 言之也。 亦此 爲 字 行 承 法 可言 ? 何 道 物? 罅 不 道 政 壞矣。」 而不 以見 德字 又引史氏之言曰 漏 字 得 之 以 不失耶 乎天 言 不 爲 外 來 也 見聖人 德非 言 此 政 所 0 乎? 而 何得謂 故必言不失 爲 説 何 得 議 ? 以 便 大人 邦 必 極是。 之實 道 八之德 德是 見所 之 增「 **×** 也 中庸 大學》 不失」二 耶 章注 方 所 盛德 可可 行 得實處 所 解 《大學》 獨 若 》説 道 德字 以 乎 性 注 故 有 爲 不 謂 足 0 ? 而 到 政

若夫《誠意》章注,坊本與定本合,固

之精 未定 之合 問 因 述, 倪 之者皆以 晚 解 是 以 於 氏 不 者 述 題 年 也 氏 在 審 最 待 大 而 所 衆 得 勤 從 本 没前 改 得 此 絶 耶 其 後 辨 絶 幾 矣。 之 聞 最 云 陳 ? 改 筆 所 子明之題 筆 而 ~ 後定 爲 氏 改 乎 之 祝 \equiv 焉 而 所更定」, 前 陳 所更必爲 惟 無 ? 竊 四書》元本」以下二十六字,示 晚 氏 日 之《 然祝 由 有改 而 氏 此 本 所改 年 得 殊。 倪 信 此 誠 無 之證 絶筆 本 此 祝 自 筆,及門 氏 所 若其 殊 祝 意 人者也 有 謂 語 則 本 夫 亦 本爲 以 之述於 章 諸 所更定之本矣,於 ", 潛爲 也 此 晚 也 此 自 陳 他 餘 處 本今而 年 氏 不 何 ,以《年 定本 即 故 處 諸 必 不 况朱子之疾, 所更 亦自 以祝 解 此 改 多 必 合 述 處 未定 謹 定 傳 後 向 譜 以 必 不 以 然 本 之 本 人 揚 不 得 此 解 他 反 》考之, 而 於 之 能 先 本 先 得 秘 亦 而 與 是 見 其 縷 易 爲 獨

愚 氏、 知 可 疑 語 也。」倪氏 章》,則 處 輯 誠 年 附 一欲 鑑 信 及晚 不 乎 生 反 釋》 於善三字異, 有晚年改本 意 譜 録 辨者甚 以 悟 祝 其 得 氏之言 章 **>** 祝本 本 年 就 本 必 定 摘 謂 而 不 句 又不 自 之。 改本之 如 本 待 録《 强 **%** 加 多 與 此 慊 也 辨 斷《年譜 於其 是《年 不 年 慶元 得 諸 而 者 之説 甲子,公易 他本 輯 能 無自 譜 陳 論 其 是 本 罅 竊更 釋 盡記 氏 解 其 無 庚 皆作 譜》有 隙 而 一之文 似 愚考之《年 欺 既 絶筆 申 一字殊,惟 引 有 可 附 爲 亦 也一 不 簣。」 四 疑之處 公欲 所 陳 其 疑《 可 譌 改定 得 月子 爲 解 氏 疑。」 説 其 其 文 年譜 今 句, 有 如 之 譜 於 也 在 解 觀《 西, 訛 此 言 信 後 於 此 惟 \sim 此 易 誠 能 如 處 善 抑 夫 無 日 公 祝 日 ^ 字 惟 陳 改 氏 何 於 有 意 年 大

子

有

健

忘之疾

恐

盡

志

而

無

以

請

IE.

於

先

牛

附 友 考 也 粗 故 就 姑 因 取 命 其 忠刻 尤 要 此 者 以 弁於卷 記 焉 忠 所 學

朋

四書或問

黄 珅 校點

| È | 卷八 | 卷七 | 卷六 | 卷五 | 卷四 |
|---|-------------|------|------|-------|------|
| | 泰伯第八 二二七 | 述而第七 | 雍也第六 | 公治長第五 | 里仁第四 |
| | = = + | | 九一 | 七四 | 五三 |

目

録

五五二

二四五

三二七

三四二

三四八

| 附 録 二 | 録 | 卷十四 | 卷十一 | 卷十一 | 卷十 | 卷十 | 卷九 | 卷八 | 卷七 | 卷六 | 卷五 | 卷四 | 卷三 | 卷二 | 卷一 | 孟子或 | |
|---|-----|-----|-----|----------|-----|---|----|----|---|-----|-----|-------|-----|-----|---|---------|--|
| 著録 | 序跋 | 四 | = | <u>-</u> | : | | | | | | | | | | | 問 :: :: | |
| | | | | | | | | | | | | | | | | | |
| | | | | | | | | | | | | | | | 0 0 0 0 0 | | |
| 8 0 0 0 0 | • | | | | | 0 | | | 0 | | | 0.000 | | | 0 | | |
| 0 | | | | | | | | | | | | | | | | | |
| 四五四四 | 四四九 | 四四 | 四三〇 | 四二七 | 四一八 | 四 一 五 | 四一 | | 三九六 | 三九三 | 三八八 | 三八六 | 三七七 | 三七四 | 三六七 | 三六七 | |
| | | | | | | | | | | | | | | | | | |

校 點 説 明

注

釋

研

府建陽縣(今屬福建),享年七十一。 焕章閣 曾知南康軍、提舉浙東常平茶鹽公事、知漳州,官至 (今福建南平)。紹興十八年(一一四八),中進士。 宋高宗建炎四年(一一三〇),生于南劍州尤溪縣 谷老人、滄洲病叟等。 朱熹,字元晦,改字仲晦,别號晦庵、晦翁、遯翁、雲 論語》、《孟子》合稱「四書」,成于宋代理學家朱熹。 唐以前,儒者以五經爲重。 待制。 寧宗慶元六年(一二○○),卒于建寧 祖籍徽州婺源(今屬江西)。 將《大學》、《中庸》、

在殫精竭 理學的集大成者。 時並影響後人,在於他「致廣大,極精微」,成爲宋代 十餘日,在政治上並無多大建樹。 熹一生,從政時間前後共計七年,立朝 慮 建立 起一 而他對理學的最大貢獻,或許就 個 嚴 密 的 四 其所以能名重 書 學 體 系,以 僅 畢 四

校

點 説

明

容。 究。 或問》、《孟子或問》同步。 白鹿洞書院開講。所講的就是《中庸或問》首章的 (《朱子别集》五《與皇甫文仲》四)淳熙七年 熙六年,朱熹在致皇甫斌信中提 爲《或問》。」(《朱子續集》二《答蔡季通》三十六)淳 數日整頓得四書頗就緒,皆爲《集註》,其餘議論 註》、《或問》成書。 王懋竑《朱子年譜》載,淳熙四年夏六月、《論 四年(一一七七)、《集註》與《或問》各自成書。 明其取捨之意,成《論語或問》與《孟子或問》。 同時考慮到諸家解説,紛紜不一,於是設爲問答,以 取《精義》之菁華,撰成《論語集註》與《孟子集註 學家註述《論語》、《孟子》之說,輯 生精力,剖析疑似,闡發大義,從事對 ,於乾道八年(一一七二)鏤板行世。 《大學或問》、《中庸或問》的完成,估計和《論 乾道年間,朱熹蒐輯條疏二 在答蔡元定書中,朱熹自云「某 程、張載等前輩 爲《論孟精義》一 到《大學或 四書的 此 後,又擷 朱熹在 問》。 孟 據 淳 内 熙 别 集 清 道 語

集註》、《或問》成書後、朱熹對 於《集註 》屢加

修訂 年譜 無暇 就成了書 當 時 未 H 帙的《四 詳 ,已將《或 將《論孟或問》付 》畢 (見《朱子文集》卷六十二《答張元德》及《朱子 的 重 ,至老不已,可 一略,互有發 竟還是有用之書。 學 商 術聲望,故《或問》依然爲學者所需要,也 書 所以 偷 問》附 或 以問》刻 刻 朱熹生前祇刻印 的 明, 於《章 印。 謂精益求精 目 本。即 標。 可 但據《中庸章句序》,他在世 相互補 一句》之 《或問》和《章句》、《集註》, 書商 最早將四 後。 充印 偷刻 了《論 而《或 儘 於 部《或 證。 管 建陽的 孟 問》 如 加上朱熹 集 問》合 此。 註》。 T 書 或 西 爲 從 則

置 都 卷、《孟子或問》十四 章 子或問》十四 句 書 已亡佚。 》二卷、《中庸或問》二卷、《論 館 或問》、《中庸章句或 南宋陳振孫的《直 該 本殘存《大學 或 卷。 内現 《文獻通考。 存唯 卷。 齊書録解題》,録有《大學 問》各三卷《論 或問 這 的 些當 上》一 語 部 經籍考》録 時 或問》二十卷、《孟 宋刻本藏於上 的 册、《大學 刻 本或抄本, 語 有《大學 或 問》十 或 或 問 海

> 《論 頗大。 是「纂要」,故其章節、文字,與足本《或 下》一 語或問 册、《中 纂要》二册、《孟子或問纂要》一 庸或 問 上》一 册、《中 庸或 問 問》, 册。 下》三册 出 因

《鐵琴銅劍樓藏宋元本書目》中, 此本實 《中庸或問》二卷、《論語集註》十卷、《孟子集註》十 《大學章句》、《中庸章句》之 四卷。 現藏國家圖書館。 章句》一卷、《或問》一卷、《中庸章句》一卷、《或問》 魏莊渠句讀批抹,原爲毗陵周九松所藏,後歸 章句》一卷附《大學或問》二卷、《中庸章句》一卷 碎,已殘缺不全。 文「百宋書藏」,現 卷,爲元至正十六年(一三五 現存元刻本中 《爲元刻本(詳《中國古籍善本書目》),有明儒 不詳何時 所刻,「其 還 藏 此本有元王侗箋注批 無單 有 上海 刻 部現 圖 佳處往往與淳祐本合」。 後附 的《四 書 藏 館。 六)翠 臺 有《或 録有宋刊本《大 書或 灣 另外 故宫 問》。 巖 問》, 點 精 博 舍刻 部《大學 在瞿 只 物 紙 是 袁克 張破 本 在

藏上海 十卷、《孟子或問》一册十四卷。 卷)、《中庸或問》一册(不分卷)、《論語或問》三册二 仲冬吴興閔聞重刊本,包括《大學或問》一册(不分 整的明 章句或問》一卷、《中庸或問》二卷。 大學圖 今已不可見,再刻本僅剩殘本,即《大學或問》一卷、 才又回到世間。 弘治七年(一四九四)功畢,沉寂多年的《四 部《論孟或問》,弘治初至南康,交知府郭 句》之後,足本《四 人所編的《文淵閣 十五册全)。 論語或問》卷五至卷二十,現藏寧波天一 則 或問》附於《章句》、《中庸或問》附於《輯略》,正德 德本顯然是 無《章句 刊 書館藏有明 辭書出 本《四書或問》,爲正德十二年(一五一七) 》和 根據 南昌張元禎在翰林讀書時,手抄了 版社 《輯略》。 弘治十七年,再刻於湖藩。 書或問》已不可得。 書目》。當時 圖書館,一藏 翻弘治十七年本,全,其中《大學 弘治本重 刻 有《四 的 河北大學 此本現存兩 祇是弘治本《大 現存另一部完 書或 據楊士 瑨刻印,於 閣。 圖 問》 書或 初刻本 書館 部 北京 奇 問

> 民獻 章句》後所附《或問》,版式、字體全和正德本一致 此外像經廠本《四書章句集註》中《大學章句》、《中庸 明代《四書或問》足本刻本,現在可見的 改正不少錯誤,但仍有一些錯字和正德本完全相同。 曆朝鮮本顯然也是根據弘治、 中的夾注也都是雙行小字。 學圖書館有藏,共三十八卷(在《中庸或問》後另收 亡佚,但日本正保四年(一六四七)京都書肆 趙璹等人重新監刻《四書或問》。 有《中庸輯略》上下二卷)、《論語或問》、《孟子或 左衛門刻本,便是據萬曆本刻印的。 等人經過仔細校勘,正要付印,因故未成。 人深以爲病。 、尹先覺等人也有志於此、於是請秀才尹元麟、 無 統論弘治本還是正 萬曆二年(一五七四)春 德本,都有不少錯誤, 從正保本的情況看,萬 正德本再刻 萬曆朝鮮 IE 朝鮮 保本北 僅 的,雖 此三 恰 風 本現 金 京大 巧朴 月 偉 然已 問 種 幸 莊

部

等

名竣)刻印《或問 問》,均爲三十六卷本。 弘治、正德、萬曆(日本正保本同)所刻《四 小注》,包括《大學》一卷、《論語》二 癸未三月,高沙徐方廣(原

本

校

點

明

IE

刀口

語録》,亦爲三十七 中孚《鄭堂讀書記》,乾隆年間 六年(一六四三),此書爲 三)已於書坊中見此書,則 王懋竑《題 八),他在清康熙 卷 庸 四 》二卷、《孟子》十四 書 或 壬申、 問 小注前》(《白田草堂存 癸酉間(一六九二至 明刻 此「癸未」當爲明崇 本而非 陳其凝 卷,共三十七 清刻 編《四書 本。 稿》卷 或 禎 六 據 問 周 + 九 據

卷(另附《中庸 館 祇有《論語或問》二十卷、《孟子或問》十四卷、無《大 康熙中吕氏寶誥堂重刊白鹿洞原本《朱子遺書》中, 三十九卷,這大概是最早的三十九卷本了。 的《八千卷樓書目》,丁氏 問》二十卷、《孟子或問》十四卷。 或問》、《中 收藏,現南京圖 ,即《大學或問》二卷、《中 清 一代。《四 庸或問》。 輯 略》二 書館 書或問》通行的却是三十 藏 卷),即原 丁氏藏書後多歸 有清 藏有吕氏刊本《四 庸或 刊《 四 T 據丁丙藏、丁仁 問》三卷、《論 氏 書或 藏書。或 問 南 》三十 書或問》 京圖 但 許 現存 九 語 卷 九 書 或 就

> 本的相異之處,大部分和吕刊本 書或問》,也都是三十九卷本。 本。光緒間 同治十二年(一八七三)刻。 蘇巡撫采進,來歷不詳。 本、《洪氏唐石經館叢書》本、《西 西京清麓叢書》本,光緒間賀瑞麟 出入相對來說要大一些。 在此之後。《 洪汝奎以霍 四 庫 全書》本、 Ш 據校勘。《四 劉 霍山 《洪氏 氏 ○ 四 霍 五 京清麓叢書》本《 相似 劉 Ш 刻 忠 庫全書》本乃 唐 氏五 劉 堂 庫》本與 石 而 氏 經館 板 忠堂刻 同 五 片 正 忠 印 叢書》 IE 堂 本 江 四 刻

的

者提供 稱四庫本)爲校本,以北京大學圖書館 稱宋本)、明正德本、日本正保本、《 或問》爲底本,以上海圖書館所藏宋刻《纂要》本(簡 或問》及康熙中吕氏寶誥堂 治十七年本(簡稱翻弘治本) 四四 書章句集注》所含《大學章句或問》、《中 這次整理《四書或問》,以 個接近 原貌的新的 重 本子。 爲參校 上海 刊《論 四 置 本,以 語 庫 書 或 所 全書》本(館 問》、《孟子 求 所 庸章 明 藏 能 向 元 刻 句 讀

校 點 者 黄 珅

是《八千卷樓書目》中的吕刊本

夫義理 基本。 書,何 學之大小所以 學,則無以收 爲道則一而已。 將語人以大學之道,而又欲其考乎小學之 略陳之,而古法之宜於今者,亦既輯 問其爲 何 務其遠者大者,小人務其近者小者。 也 學者不可 ? 或問:大學之道,吾子以爲大人之學, 也? 及其長也,不進之於大學,則無 小子之學,何也? 曰:此對小子之學言之也。 曰:學之大小,固 其放心,養其德性 事業,而收小學之成功。 不同,特以少長所習之異宜 以不之考也。 是以方其幼也,不習之於小 曰:愚於序文已 日 有不同, ,而爲大學之 吾聞 今子方 而 曰: 敢 是則 然其 君 以 爲

> 也,則 則豈遂不可得 固 善。 於大學,則又恐其失序無本,而不能以自 長,而不及乎此者,欲反從事於小學,則恐 免於躐等陵節之病,則誠幸矣。 日 : 俟其既 乎洒掃應對進 可 辨、義利之分,判然如薰蕕冰炭之相反,而 不免於扞格不勝、勤苦難成之患,欲直 而 字,聖學所以 以相 有高 不可得而復追矣,若其工夫之次第條目 幼學之士,以子之言而得循序漸 是乃次第之當 如之何? 人也。 長,而後進乎明德、新民,以 下淺深、先後緩急之殊,非若古今之 退之間 今使幼學之士 而復補 成始而 曰 : 「然,又 是其歲 ,禮樂射御書數之習。 耶 成終者 何爲 蓋 月之已逝者 ,必先有以 也。 吾聞 若其年之既 而 不 之,敬之 可 止於至 爲小學 進, 從 自 哉 達 其 以 則 事

子

書

大學或問上

聖 學」下,四庫本有「之」字。

艾,非 瞀迷 吾見 既 則 道 夫明 者 其失之於前 良 小 誠 不 應 以 自達矣。 前 往 知 其 H 不不 能 紫 及 則 又若何 良 乎天 德 平 惑 其 所 用力於 進 百 其所以 必以 而 由 能 此,亦 扞 以 終 退 所以 I倍 其 新 平 之節 之本 格 其 古 下 是爲 而 無 民 此 或 勤 也 其 此 或 之 補 進 用 無 以 功,不足以 苦 者 推 肌 與與 古 功 家 之於後者,又不能 者 以 力 爲 以 説 顧以 日 膚 頹 無 邪 也 開 將 焉 夫六 忧 亦 進 致 之 己 有 以 發 可 乎 哉 知 七年之病 甚 甚 不患於無 會、筋骸 涵 是以 聰 以 大 不 力行之 藝之教。 致之。 日 焉 養 幸過 明 得之於此 而 0 日 而 本 程子發明 而 不 程 進 0 不 源 足以 時 之東 地 身 德 子 然 若徒 本 害 而 而 爲大學 矣, 於 心 以 而 脩 則 求三 而 兼 謹 業,而 有 後學者 自 此 顛 格 所 況 歸 而 而 不 補 夫 倒 所 力 能 乎其 物之 嘗 謂 欲 咎 年 不 養其 洒 兼 則 Ż 患 以 致 以 敬 有 眩 於 掃

其所以 所謂 德性 立,由 斂不 矣。 則 恭 學之賴此 方,則知小學之不能 惺法」者焉。 治 爲終者,可 之主宰,而 力之方矣。 主 敬 國 而 之一 先 而 容一物」者焉。 至其門 以 天下平。 是格格 無 爲學之終也 立其 及 道 適 字,豈 問 以始,則夫大學 乎 以 物 萬事之本 티 : 大大者 學 天 人謝氏之説 言之矣, 致 尹氏之説 是皆未 下, 以 非聖學始 知 敬之所以 由 而小者不能 貫 則 以 是 一,奈何 根也。 之而 無賴 觀 所 盡 誠 嘗 始 則 是 事 謂 意 以 則 悠之要 無疑 之不 於 ? 數説 物 爲學 脩 又 IE 日 此 知其 整 之 又 有 己 心 而 日 矣。 奪 能 以 齊 有 以 理 之始者然矣 所 以 離 足以 所以用 無 也 爲 敬者, 所 嚴 謂 安 乎 脩 由 則 賴 哉 蓋 始 謂 肅 敬 百 其 見 其 是 所 此 乎 身, 姓 也 言 常惺 力之 齊 其 此 一心 心 謂 心 知 之 收 以 篤 家 則 既 尊

然則

此篇

所謂

在明

河明德!

在

新

民

544

天

獸者 之間 塞,而 然以 極之真 後有 是理 陰陽 其氣之正 地 齊 有 止 得其 虚 也 以 IE 其 以 以 而 五 於 而 無以充其 在 道 攢 理 ,二五之精,妙合而凝」者,正謂 爲 爲 後 後 行 至 (偏且) 靈 以 於此 魂魄 且 流 化 加 有 彼 健 mi 有 洞 其氣 言 是形。 二者 己。 行,發育萬 育 通 賤 順 是 徹 塞者 前 仁 者 者, 之, 五. 氣 而 萬 本體之全矣。 而言之,則得其 臟 義 加 亦 爲 爲 其 則 亦 而 及其 故人 理 禮智 百骸之身。 所 可 物者,既 物, 其 萬 不 所 謂 咸 物 得 外 以 性 物 生物,則 備 物之生必得是理 之性 陰陽五行者 是以 其 加 焉 可 爲 聞 蓋 爲堯、 原, 最貴 所以 梏 於 形 或 是 唯人之生 其 其所 周子 必得 貴 則 古 又必 説 IE 爲 舜 故 或 Ħ. 無 之詳 所 以 所謂 是氣 又 造化者 其 氣 賤 通 因 X 謂 型 面 是 必 能 方 乃 之 而 者 物 是 乎 於 明 也 得 偏 爲 貴 無 然 然 有 ? 德 參 禽 7 不 氣 昧。 者 無少 者。 者 私 或 體 有 有 加

能

賤

後

在

佚, 所 蔽之心 然之頃 耳之欲聲,口之欲味,鼻之欲臭,四肢之欲 已不能 禽獸,雖 濁 以 相 不 也 已 不 而 而 因 不明 必其 者愚 能 自 洞 可 此 以害乎其德者,又豈可 反 然其 然矣。 得 充矣。 無 無 ,接乎事物無窮之變,則其目之欲 心之靈 日 是則 ,其有不及乎此 有覺 而昧 美 蔽 上智大賢之資,乃能 ,美者賢而惡者 可 覆 惡之殊,故 通 而 以爲 が難 深 失其 也 是 焉 者 然而 固,是以 或 日 以 其 堯、舜而參天地,而 則即 是 聖人 不 有 全矣。 本 所知者不 以 能 人 明 其 雖其 此 施 之形,而實 無 之體 此德之明,日 所 不肖,又有 空隙之中 清 教 況乎 則其 賦 昏 濁 勝言也哉 ,既已養之於小 過 之質 蔽 得 全其本 之異 又以 所謂 情 之於 之 欲利 何 其 極 明德 清 氣 不 以 亦 而 體 前 天, 益 質 遠 害 能 者 其 不 正 色 乏 安 有 者 智 能 香 同 也 本 介 於 而

四

賤之中 救之哉 所蔽 哉! 超然 意、正 於 而 吾 日 夫既 性分之外 格 明之端 加 既 不 得 大 物 万家 能 幸 其所 無有氣質物欲之累 有以啓其明之之端, ,則吾之所得於天而未嘗不 而 是則 則其賢愚之分, 心、脩身之目者,則又所以使之因 而 自 有 非 中於治國 而 知之説 而 明 也 不 以 發,以啓其明之之端也 故 有 所 反之於身,以 自 者 自 開 必 我之得 謂 方且 然其 知 明 推 明 者,所以使之即 之以大學之道。 矣, 也 吾 明德者 (所謂) ,豈不爲之惻然 而終及於平天下。 甘 則 私 之所 固 也。 心 視 明 無 迷 彼 而復得 自 致 而又有以致其明之 德者,又人人 惑没 以 圃 衆 向 其 明 非 大 人 也 者以 明 其所養之中 之同 溺 相 俱 有 其 其必先之以 明者 之之實 遠 所 本體 而 爲 繼之以 於 及 卑 者 作 思 得 物 之, 贵 欲之 之所 使 有 污 乎 爲於 之全 其 也 彼 始 以 苟 此 今 不 Ē 誠

者,固 是 民之 有不 去。 姑以 吾之所 其 脩己治人之道 知,學者雖或知之, 敬、子之孝、父之慈、 爲 去其 大者也。 衆人之心,固莫不 有 有 以 在民 而 也 所 是 其 不容其 標 純 付 舊 此爲大學之教者,所 至善目之。 明 、義理 已奠不各有本然一定之則,程子 一己雖 是其 的 以 而當 畀 染之污 德 增 明 也 而 精 少 所 新 益 而 不 粗克 微 有過),故必指是而言,以 之 欲 以得之於天而 新之者,又 者 焉 能 之極,有 明 也。 自 而《 而 則又皆 不及之差焉 德 是 明者 而 與 有 傳》所謂 而 然德之在 則 亦鮮能 不 人交之信 新 所 不可 介非可 以 盡 非 亦皆 謂 民 慮 有是 月. 人力之所 者 新 見 必至 得 其 以 君之仁、臣 有 \exists 民 於 將 而 則其 誠 理 私 以 而 者 爲 於 乃 日 而 名」者, 能 無 雖 意 當 自 明 用 是 其 所 求 以 粗 或 荷 而 德 明 之間 不 目 所 以 復 而 必 Ħ. 盡 亦 之 之 能 故 謂 夫 ПП 與 去 至 而 不 Mi 非 而

然自 成 明 是皆不考 愚 愛身獨 以 民 加 人欲 大學》一 ~, 纽 德 其 所 八事之要,總而 以 意之所便者 孟 而 於 而徒以政教法度 又 善自 子 斷 復天理者,無毫髮之遺 近 乎此 没 有 篇之指 然以 利, 略 而 謂 篇之過,其能成 道 知二者之當 而 爲《大學》之綱領 足 爲學。 學不得其傳,世之君 不求 言之,又不出乎此 以 總而言之,不出乎 明 止 爲足以新 其 於是乃有不務 於 明 務,顧 至善之所在者。 德 己成物 恨矣。 而 民者 而 乃安於 不 無疑 三者,此 屑 八事 而 子 又有 不謬 乎 明 大 ^,各 也 抵 小 新 其 9

足取

以

為法耶

所考 云者 輕改經文,恐非 之從之, 而輙 티 : 以文義推 又何所 改之, 程 子 之改 之則 則 傳 考 誠 疑 圃 親 無理 若吾子之譏矣。 之義,奈何? 必其 爲 新 ,新民云者 然耶 也 ? 何 所 且 日 據 今親 以 0 ? 若 己 傳 無 意 子 文 民

> 訛,心 疑耶? 考之則 必 是 審 乃漢 矣。 通者矣,其侮聖言 知非是,而故 儒釋經 有據,程子於此,其所以 矧未嘗去其本文,而 若必以不改爲是,則 不得已之變例 爲穿鑿附 而誤後學 前 但 會 世 也 日 處之者 蓋 以 亦 某當: 益 有 何害於傳 求 甚, 承 其 亦 説 誤 踵 何

於至 其 能 曰 : 至 則 後能安,安而後能 於至善,然非先 Z 者 不 中 善之所在,是則吾所當止之地 有 此推本上文之意,言 能有 夫正 善之由 以 曰 物格 得 「知止 其所當 以 鵠 知 然 得其所 也。 至 而 有以知夫至善之所在, 不先有以 而 蓋明 止者 後有 慮 當中 於天下之事 德、新 而 慮 定,定 者 止之。 而後 明 知 而 德 其 民 而 能 中 E 後 皆 之也。 固 新 如 得 也 鵠之所在 能 射 皆 有 民 静 者 欲 所 何 能 以 古 則 其 以 知 静 知 也 知 所 其 11: 欲 不 11-IF

六

志 推 其 之間 必 既 止 級 學 言 得 所 則 有 則 能慮 之相 以 從 其 所 止 定 無 方 所以 之 至 止 容 所 寸 則 懸,爲終身經歷之次序 從 地 則 閒 固 擇 無 然之故 ıĽ, 而 隨 已不甚 暇 於 間 以 止之矣。 事 孟 地 事 動 事 觀 子 ()有此 而 至物 其 事 理 之善信 相 能 11 物 遠。 然既 極 來,有 安 而 物 四 矣; 深 能 皆 以 者 其 直 研 静 以揆之 有 至 非 間 能 幾 知 也 矣 安 定 聖 兀 所 如孔 無 理 神 節 止 不 則 心 而 矣 子之 蓋 實 各 既 則 能 日 得 有 亦 其 慮 用 能 理

始。 則 也 也 9 近 則 知 道 誠 明 日 其 止 知 德 矣 進 先 爲 物 能 新 其 何 有序,而 有 得 民 本 也 本 兩 ? 而 末 事 物 後 9 曰 至於道 其 事 而 而 . 末,先 有 此 首 内 終始, 結 尾 外 也 其 上 相 相 不遠矣。 文兩 始 因 料 知 9 所 故 故 後 節 先 之意 其 曰 日 後 終 終 本

曰:「古之欲明明德於天下者,先治其

或。 下之本 脩其身。 其 明 親 知 家、 序 下之人,皆有 德於天下者, 天 知 致 心 先 或 所 其 家 德 下 其 者 脩 3 知 治 誠 親 先誠 欲 或 其 在 所 以 詳 則 或 意 各長 在國 之本 身 治 家之本在身,故 格物。」 各誠 以 求 、平天下者,新 如 Œ 至於身之主則 其 求 知至善之所 此, 其 欲 或 在 心、脩身者 以 自 得 故欲 其 其 意 脩 者 家 何 蓋 明 明 夫 長 意 其 故 綱 其 至 平天下者,必 其 也 欲 先 (身者 各 而天下 領之 明 善 ? 明 欲 誠 齊 正 德 在 而 欲 德 民 其 其 治 心 先 曰 其 明明德之 意者 也 條 止 之事 國 齊家 而 也 家 0 無 自 心 之 E 目 者 推 此 不 誠 人皆有以 也 其 也。 也。 者 必必 各 以 欲 言《 先致 先 平 意 有 心 「, 必 脩 新 齊 矣。 事 先 有 不 所 以 大學 格 格 其 其 民 也 得 先 以 謂 至 其 欲 有 物、 身, 物 家 然 使 於 其 治 明 知 正 有 以 之 其 其 本 其 明 平 致 齊 致 齊 天 天

則,所 謂 道 之物 欲 隱 必先 勉强 然之正 然,無所不 萬 以 善去 IE 而 口 哀 勉 物者也 誠 之, 亦不 得 心 如 强 其意。 惡或有 之發 」之致,言推之而至於 有以致其 以 而 格 乎即 謂 則 誠之,亦不可得 ,則身 脩 理也 極 必各有所以然之故,與 致之,亦不可 則 矣 于文祖」之格,言窮之而 事 盡 人莫不 可得而正矣,故欲 無 未實 若夫知則心之神明),故欲 意 觀 ,人莫不知,而或不能使其 無 餘 ,則隱微之間,真妄錯 知。 也 理 則 所 以以 有,而 則 主 脩身者,必 致者,推致之謂 理 雖 心 有 格夫物。 所 得 而 爲 私 欲 未 或不能 誠 而致矣。 所 欲 勉 窮,知 盡 矣,故欲誠 雜乎其 累 先 正 强 也 格者。 雖 有 以 ,妙衆理 心者,必先 其 使其 至其 必 以 脩 所當 欲 故致知之 至於 ,如「喪致 有 極 雜 中 IE 之,亦不 表 勉 其心。 雖 極 蔽 意 然之 至之 精 天 裹 强 而 而 者 也 下 雖 粗 欲 洞 案 有 以 爲

揚

哉

則是 言極 不 之次第,至爲纖悉。 此《大學》之條 加 論,未聞 精 見於《原道》之篇 不探其端, 於正心、誠 語焉不詳之病矣, 有及之者,至唐 目 意 而 一。聖賢 驟 ,則庶幾其有聞矣。 而 然漢、 語 無 其 相 韓 日 何乃 次, 傳 子乃能 致 魏 亦未 所 知、格物 以 以 以 來, 是 援 免於擇焉 教 而 以 諸 人 三云者 議 爲説 然其 爲 儒 之 學

於理 者 家 誠 不 詣 理,各有以 日 既 0 齊 能 而 而 此 後 動 而 無 而 曰 詣 覆 0 無 心 不 後 加 其 物 自 盡 説 E 無 或 詣其 極 欺矣。 矣。 1 不 治, 上文之意 格 而 IE 極 而 IE 無 或 矣。 知 後知 餘 而無餘之謂 而後身脩 治 意 無 則 不 心 不 加 至, 也。 自欺 得 盡 知之在我者 後 知 其 ,則心之所 天下 身脩 物 至 IE 格者, 則 也。 而 平。 則身之所 心之 後 而 理之在 後家 意 事 何 本 發 亦 誠 物 體 能 隨 也 之 物 覤 物 所

蓋 體 言之綱 天下 盡 而 日 在 新 謀 之天 0 其 必 無 È 其 民 功 至 言以 篇首三言者、《大學》之綱 者,復 大而無 析 對 不 中 爲 利 下國家 陷 領 待 之有以 該 對 之 於 何 舉之,以見夫天下 也 先 則 所 末 以 事 其 餘 後 亦 偏 哉 固 明 物 言 ,此又言之序 極其精 舉 至此後段 次第言之,則 而 專 明德言之,則似 雖 之不 無 而 以自 多 日 措 不 . 之耳 而不亂 脩 ---而 明爲言矣; 篇首之言 ,然後極其 矣。 吾 而 , 豈外此 也 心 . 雖 明 ,然後合之有 辨 身無 領 之 大,而吾 明 之不 新 也 用 德 明 不 民之事 後段 體用 而 無 明 者, 脩 明 而 求 不 德 又三 心之 之全 於 以 耶 之 則 貫 以 其 亦 智 ? W. 以 推

結 爲 其 文兩 所 本 日 ·, 其 薄 自 節之意 者 本 厚,未 天 亂 子 而 也 以 末 之 至 治者否矣, 有 以 於 身對 也 庶 人, 天下 何 也 其 壹 國家 是 所 皆 厚 日 顶 者 以 0 此 薄 脩

> 爲 是 天之 犯 例 卿 意、正 而 不 所厚者薄 人之親長 亦 下 則 -親其親 以 非 非 以 大 不 身 而 雖 其分 吾心之所當愛,無 君子之心,豁然大公,其視天下 明 明 容 夫 日 : 言 爲 或 心 明 命 本 以 無等差矣。 勢 則 而 治國平天下者,天子 德 ,有生之所 ,不長其長 而 下 其理 此 在 而 無 脩其 於天下爲言,豈 天下 皆必 匹 何 所不薄」,其言蓋 蓋 雖 夫之賤 身 以得爲爲 無 國家 然之理 未 與 故 則本 嘗 同 則 馬。 不 爲 不一 得 所厚 末。 能 而 事 心 己之學 也。 非 所 格 而 亂 不爲 有 然其厚 者 物、 以 非 亦本於此 大學 諸 孟 而 我 薄 家 堯、 吾 侯 末 子 思 致 之 哉 紫十 而 職之所當 所 之 之 不 舜 出 知 薄 得 或 無 無 謂 之分 教 事 可 其 其 私 以 與 云。 也 也 74 及 誠 天 於

^{● 「}蓋」,四庫本作「皆」。

未發 耳。 爲之, 何哉 矣! 於目 然,而 有司之事,皆爲己也。 事之所當然而爲之,則 敗國之君,亡家之主,常接迹於當世 學不明,爲人君父者,慮不足以及此,而苟 預養之者,安得不以天下國家爲己事之當 天下國家之責而 大夫、士之適子,與國之俊選而設,是皆將 堯、舜其民者,亦未嘗不在其分内也。 大學之教,乃爲天子之元子、衆子,公、侯、卿 而 善乎 者 然者也。」此 前,是以天下之治日常少,亂日常多 則 預求 論者不此之監,而反以聖法爲 學者 大抵 雖 張子敬夫之言曰: 有以正其本、清其源 割股、 以是 以學者而視天下之事 其語意之深切,蓋有前 不可辭者,則其所以素教 廬 而 墓 日 弊 以其可 難甲 自 省 車、 焉 兵、錢穀、籩豆、 「爲己 以求知於世 羸 哉 則有 馬, 者, 以以 疑,亦 一,亦可 以察 亦 後世 賢 無 爲 爲 又況 平 所 而 己 獨 悲 所 人 徇 教 而 有 而

> 善利之間 一而無毫釐之差矣。

質。 之,其 先務,而《論 脩身者,誠意、正心、脩身也。 者,物格也,盡心者,知至也,存心、養性 謂明善,即格物、致知之功;其曰誠 手,而子思以授孟子無疑也 庸》、《孟子》者合,則 其或出於古昔先民之言也,故 遠,非聖人不能及也,然以其無他左驗,且 其然也? 脗合焉者。 意、正心、脩身之效也。 云,不慊之説,義利之分,常言之序,亦無 程子之先是書 至於傳文,或引曾子之言,而又多與《中 曰 : 傳則曾子之意,而門人記之。 子謂 日: 故程子以爲孔氏之遺書,學者之 正 (孟)猶 Œ 經蓋 經辭約 而後《論 知其 處 夫子之言,而 **《孟** 其次焉, 加 成 理備,言近 子》之所謂 於曾 孟 其他如謹獨之 蓋《中庸》之所 疑 亦 之而 氏門人 又且不及 身,即 可 曾子 何 不 而 以 知 > 意 述 性 誠 敢 指 知 不

日

然 尤非 也。 其 者。 領 以 遽 尋 接 典 是書之規模 日 孟 ",節 不 難 記 及 及之,豈 退之不 用 物之微言 通 中 而 會其 此 易 此 後學之所易得 至 目 無 爲 盡 一於《中 庸 平 緩急言之, 程 1分明, 非一 以 天下 論 極於《 子 齊 論 不又以 融 何 所以 雖 手,或 蓋 庸 孟 貫 \approx 或 後 其 也 而 大, 》之爲 中 不先 因 **>** 世 會 孟 間 ? 先 I 爲《論 而 然其 庸 通 則 而 蓋 先 夫 是 而 非 乎《大 言 日 時 之 又聖門 有 有 後 書 聞 X 而 以 則 者 精 首 淺深 非 序 極《中 雖 而 者 是 聖人之言爲有優 事 也 又何 微; 尾 無 後 切 學 初 放程 書 而 傳 該 之無 論論 學 \leq 發者 然 非 垂 授 庸》之 以 不參 既 備 論 日 無 世 切 而 建立 序 通 子 極 用 \approx 於學 以 孟 問 而 立 也 之教 致之言 之《 或或 孟 然後 歸 提 之 教 綱 \approx 者 大本 趣 挈 蓋 所 抑 者 是 非 領 應 之 論 未 劣 及 之 綱 可 揚 以 機 大 以 口

> 先焉。 聖門 矣。 而 經 以 編 讀 是 者 觀 四 今之教者,乃 大 之,則 其不 幾 書 經 者 希矣。 而 溺 又不 務講 讀 於 天 虚 可 或棄 學 下 空, 不 者 之書 先 固 流 此 於《大學 不 於 不 論 功 務 可不急於 天下 利 而 之 而 反 亦 事 得 以 四 罪 他 已 説 於 明

之於後 之當 經 以 謂 心渾 日 元 . 爲傳之首章也? 在 知之至也」之文,子 則 此言、 然 明 或 「没世不忘」之下 日 其次第 問問 天 ,是以 而 0 文 然 理 欲 王 明 則 亦 雖 可 章 Ź, 能 其 知 無 欲 丽 明 待 明 然 而二 F 其 之而 於克之而 氣 日 獨 德 克 以 禀 而 説 何 也。 明 有 至三 拘 以 程 之不 以 不 德 經 之於 子 知 蓋 自 克 章 · 然審 統 乃 其 人不能 人莫 者, 明 也。 之半 前 傳 以 不 矣。 然,而 次 矣 不 何 以 文 物 於 知 傳 鄭 然猶 Ŧ 欲 也 此 德 蔽 附 遂 本

云爾

者

亦見其

獨

能

明

之,

而他

又以

見夫未能明者之不可不致其克之之功也。

於此 之所以 受天 存 用 在之,而 蓋 存 是 地 而 日 無 道 命 之 真若見其參於前 以 時 義 我 中 顧 汩 而 出 以 而 於 諟 不 矣。 生 至善之所存 發見於日 人 天 欲 故 之明 前 人 之 命 不 用 明 倚 知 也。 之間 德 所 於衡 何 非 以 也 是 他 也 自 其 明 也 惟 全 則 曰 : 成 常 體 即 不 性 目 大 天 人 察

明 其 大 日 德 0 也 克 明 俊 德 何 也 ? 日 . 言 堯 能

焉。 爲天 之亦 太甲 其言之淺深, 也 有 日 則 序 : 乎? 是三 明天之未 《帝典》 者, 日 則專言成德之事 亦略 固 0 始 皆 康 不 自 有序矣。 爲 語 ≫ 明 人, 之 通言 而 事 人之未 明 也, 而 德 然 極 而 其 始 其 己。 言 大

用 之 或 問 銘 盤之 者 自 有 警 銘 之 何 辭 也 也 ? 古之 日 . 聖 盤 者

矣,而 盤,而 警乎心 雪 前 垢汙 本潔 是德 大 所 復 故 有 兢業業,固 沐 存 不 其 浴 爲 養 必 繼 如 日 怠 而 之也。 前 也。 事 忽 省察之功,無少間 因 則 利欲之昏 利 所以新之之功不繼,則 猶 其 又無 有 欲之昏 其 日 而 而 塵 以 其 所刻之辭 而 [之昏; 德之明 刻 或忘 己 不至 無時 日 垢 去 有是身 新 銘 而 之 其 旦存養省察之功,真 以 之 而 而 不沐浴 於忽忘 而 集 猶既潔矣, 亦如 前 致 而 日 也 日 如 不 也。 日 利欲昏之,猶身之潔 戒焉 日 將 新 此 是 戒 人之 塵 新 斷 復 焉 何 也。 以 謹 德之本明 使 之,又 垢 有 恐懼 欲 於 其 則 之 則 也 而 曰: 如 其 其 利欲之交,將 ? 明 日 疏 汙 亦 所以潔之之功 上,然猶 常接 前 日 常 沐 德 瀹 猶 然則沐 也 日 日 用 新 澡 浴 常 其 猶 有 之器 明,而 之,使 之汙也 乎 雪之功 前 然 恐 疏 其 以 İ 身之 之有 浴 其 既 瀹 去 日 而 每 其 之 有 其 復 新 塵 H 澡 不

復推 太甲 焉。 弗咈 滅 尚 亦 無 桐 寧之戒。 也。 不及」,此皆足以 無 聖敬 處處 父丹書之戒 所 小 義勝欲者從,欲勝義者凶。」 之初 切 間 其 故伊 湯 ,故稱 間 又曰「以 昔 改過不吝」, H 斷, 《嘗以告于湯者告之,欲其 矣。 之所 成 斷 躋」云者 遷義 復以 尹 湯 蓋於是時,太甲 其 而 則 自謂 其 所 以 有以 義 德者,有日 身常 而 以 日 後周之武 得 「終始 制 歸 與湯 見其日 反之而 ,則其 此, 又曰 繼其 事 潔 「敬勝 是亦 清 「咸有 惟 又其學於 以 (烈祖 言 禮制 與 一,時 示 至於聖者 新之實。 王 所 而 怠 愈約 人不求 方且自 謂 不 者 之 邇 路 心 荷 德 復 乃日 成 阼 而 聲色,不 伊 退而於其 日 爲 之 德 H 意 備 有日「 Ë 怨自 尹 怠 至於所 新者 新 而 舊染之汙 進乎 愈切 初 也 檢 勝 而 於 惟 ,其 受 敬 艾 復 身若 從 殖 爲 有 有 矣。 此 几 者 師 於 政 謂 諫 意 故 發 貨 T 得

> 言新 之,蓋以 之君,志學之士,皆不可 興 觴 、起者。 民,其 豆 是爲自新之至, 刀 引 今其 劍 此 户 進語 何 牖 也 ,尚幸頗 莫 而 以莫之考也。 不 티 : 新 銘 民之端 焉 此 見於禮 蓋 自 其 聞 也 書, 本 湯 日 而 願 之 0 此 治 風

席

加

之書 矣。 然此 躍,以 俗。 者 以 胡 티 : □皆爲武王之自言 氏 此,欲其 而 武 之説 豈聲色號 티 : ,而子以 曰:《康 去其惡 失其本心也,故 王 一之封 孔氏《小序》以《 也。 有 武王言之,何 以 語》之 言 而 康 蓋嘗因 令之所及哉? 遷 鼓 叔 於善、舍其 舞 也, 而 作《康誥》之書,而告之 而考之,其 作興之,使之振 以 乃得事理之實, (康誥》 作 商 也 之 新 舊 ? 餘 民 爲 而進 亦 曰 日 民, 成王、 É [朕弟 乎 何 新 染 此 新 而其 奮 周 紂 也 寡 而 五. 也 頭 汗 公 兄 峰 E ?

⁰ 者」上,正保本、四庫本有「云」字。

德既 也。 餘 何 亦 天命之,以 不 年,至于文王,聖 也 旋日矣。 新 蓋民之視效在君,而天之視聽在民,君 ,則民德必 日: 《詩》之言 有天下。 言周之有 新 周 一德日 是其 ,民德既新 邦,自后 雖 新 舊 邦 邦, 而民 雖 舊,而 ,則天命之新 稷 其 亦丕變, 以 命 來 命則 惟 千 新 故 有 新

亦深切矣。

555

其 用其 也? 盤銘》言自新 止 一於是而已矣。 極」。 自新 日 所謂「 此 極即至善之云 新 結 民 也 君 上文《詩》《書》之意 之極 《康誥》言新民也、《文王》 子無所 也,故曰「君子無所不 也。 不 用 用其 其 極 極者,求 也。 者 蓋 何

或問:此引《玄鳥》之詩,何也? 曰:

此 止 辭 孔 處,豈可人爲萬物之靈 而 也 子何以有是言 以 止之乎? 民之止於邦畿,而 日 蓋 引《綿蠻》之詩,而 日 鳥於其欲止之時,猶知其當止之 其所以發明人當知止之義 也? 曰:此 而反不如鳥之能 明物之各有 系以 夫子説《詩》之 孔子之言 止 知所 也。

孝; 當止者在於敬; 所 與 極 君,則其所當止者在於仁,爲人 有則,是以萬物庶事,莫不各有當止之所, 止,以明至善之所 交,則其所當 國 致, 居之位 爲人父,則其 人交之所止,何 發於人心之不容已者,而 引《文王》之詩, 不 同, 止者 爲人子 則 在於信。 所當止者 在 所 也。 也 止 ·, 則 ? 之善不 而繼以 蓋天生烝民,有 其 티 : 在於 是皆天 所 文王 此 君臣、父子 當 慈 臣 因 理 IŁ 一,則 故 聖人之 之所以 與國 者 人 八倫之 其 爲 在 所 於 但

傳引 者莫 常敬 斷 不 取 是 有 容已 焉 法 法 則 焉 非 此 毫之蔽 於 而 其敬 詩 至 但 者 失 天 衆 善 其 學者於此 下 而 而 止之功,是亦文王 不 歷 故 人 所 可 緝 陳 類 傳 止 熙 待 連 於 所 爲 之, 續 唯 知 後 誠 止之實,使 氣禀物欲之所 所 光 聖人之心 使 世 有以 明 止 其 者 自 而 連 見 後 亦 無 續 而 表 其 天 得 不 不 光 (發於 E F 所 能 敬 裹 香 矣。 明 後 止 加 洞 故 無 本 世 豪 也 而 然 得 所 心 不 末 少 詩 間 之 故 能 止 無 於 以

之, 其 猶 陳 亦 於 盡 而 姑 未 阳 始 天 且 不 則 下 終 闕 諛,孝或陷父, 得 必不爲尾 以見物各有 本末 之理 其二 其 言足矣。 所以 一焉,荷 哉 贵 生、 名 正 白公之爲 言之所 不 則 論 而 之凡例 推 其 慈 或 類 所 或 以 流 能 以 敗子 ,其於大倫之目 也 爲 通 於 盡 之, 姑 哉 是 又況傳之所 且其 息 則 言者 敬 得 亦 爲 其 何 或 信 膧 名 以 則

者,已 明之 與 也 以 所 言 光之著乎 以 其 擇 止 脩於 也。 得之之驗 於至善之 恂 善 曰 精 慄 古 而 復 身者, 外 者 執 夫「 益 引《洪 也 嚴 日 求 如 則 理 E 就 其 敬 切 此 備 密 未 澳》之 精 月 之 如 矣, 其 圃 將 之及,故 也 存 磋 所 益 然其 乎 以 詩, 而 求 中 言 睟 得 如 其 所以 何 面 其 也 又 1 琢 密 盎背 也 所 引 於至 如 也 求之之方 威 ? 以 此 磨 儀 善之 講 詩 施 此 日 者 言 於 以 其 0 於 由 所 其 學 發 几 輝

作孚

正

此

意

也

日

0

子之説

《詩

 \leq

既

以

敬

止

之止

爲

語

助

之

辭,

而

於

此

書

又以

爲

所

11-

肵

謂

上天之載

無聲

無

臭,

儀

刑

文王

萬

邦

其

辭

以

明

己意

未

必皆取本文之義

也

日

何

也

日

0

古人引《詩》斷

章

或

姑

借

五.

者

之

目

詞

約

而

義

該

矣。

子之説

乃

復

有

究其

精

微之蕴

而

推

類

以

通

之者

何

其

言

衍

而

不

切

耶

日

舉

其

德

之要

而

總

名

别? 功 謂始條理之事也, 玉石渾全堅確, 而 之所 充盛 能 體 也 難 而 忘 宣著 티 : ,所謂終條 極而言 盛德,以 日 爲 0 人心之所 止 切 又如此,是 骨角脉 於至善之驗 也 磋 身之所 切磋! 琢 理之事 磨 理可尋,而 同 然,聖人既先得之,而 琢磨,求其止於是 得 以 何 也 而 也 民皆仰 以 言 爲 切磋之功易,所 也; 盛 學 德 之而 問、自 至善, 至 善 不能 琢 脩 磨之 而 以 民 之 己 忘 理 其 不

皆先 猶思之, 也。 德業之盛也 育之恩也。 志 何也? 王盛德 利 明 其 愈 引《烈文》之詩,而言前王之没世 明 利 久 德 至 者 曰: 樂其樂者 之得 而 耕 善之餘澤,故 親其 不 賢其賢者,聞 田 能 八親者 所止言之,而發新民之端 「鑿井 忘 ,含哺鼓 也。 子 而 、雖已没 孫保 享其 上文之引《淇 《腹,而` 而知之,仰其 之,思其 利 世 安其 也 而 樂 此 覆 人 不

著明明德之效也。也,此引《烈文》,以新民之得所止言之

而

不然 章後 善、没世不忘者推之,則知其當屬乎 屬,故有 一 而 曰:《淇澳》《烈文》二節,鄭本 屬之此 不 程子置之卒章之 得 而 也? 從者, 曰 : 二 H. 以 中,子 所 家所繫文 謂 獨 道 · 元 在 何 盛 此 以 德、 也 意 知 誠 至 其 意

者,故 有以畏服其民之心志,而使之不敢 明德、新 仁熟,所以自明者,皆極天下之至善,故 則其當屬 其爲釋本末之義 真之於此,何也? 文之下,「此謂知之至也」之上,子不之從, 之後,「正 或問 不 民 · 得 心脩身」之前, :"「聽訟」一章,鄭本元在「止於信 於此 之義 而從 可見矣。 ,何所 也。 可知 曰:以傳之結語考之,則 티: 矣。 當 也? 程子 然則 二家之説,有未 以經之本文參之, 又進而 曰 : 聽 訟 聖 無 真之經 其 人 訟 德 能 無 成 於 安 實 大 而

之屑 何也 之辭 其 者釋經之意也。 訟之可聽。 辯訟之間,以求新民之效,其亦末矣。此 其本之明效也。 菲 本有而 是以 屑 ? 也。 曰 : 雖其聽訟無以 并失之也耶? 蓋己德既明,而 且 古人釋經,取其大略,未必如是 此章之下,有闕文焉,又安知 日 : 或不能然,而欲區區於分争 然則其不論夫終始者, 異於衆 民德自新 人,而 則 自 傳 得 無

大學或問下

也。 既 是必皆有説 則知屬之經後者之不然矣。 後,而下屬誠意之前,程子則去其上句之複, 謂知之至也」之前,而程子以爲衍文,何也 而附此句於聽訟知本之章,以屬明德之上, 之至也」,鄭本元隨「此謂知本」,繫於經文之 日 有 ,則聞命矣,其一鄭本元在經文之後,「此 以其複出 知本結之,而其中間又無知至之説,則 考之經文,初無再論知本、知至之云者 所取舍於其間 或問:「此謂 矣。子獨何據以知其皆不盡然, 而他無所繫也。 知本」,其 郭? 曰: 一爲聽訟章之結 觀於聽訟之章, 此無以他求爲 曰:「此謂 ? 知

> 語也; 而 上之當有闕文也? 然則子何以知其爲釋知至之結語,而又知其 先之乎? 知 之次求之而有合焉,是以不得而異 程子上句之所删,鄭氏下文之所屬, 德之章。● 知其釋知至 再結聽 以傳之例推之,而知其有闕文也 故愚於此皆有所不能無 訟者之不然矣。 自當爲傳文之首,又安得 也; 以 曰:以文義與下文推之, 句法推之,而知其爲結 且. 其下、 文所 也。 則 疑 者。 以此 以 經 屬 日 傳 獨 明 而

文語緒之可尋也。 補之,則程子之言,何以見其必合於經意 而 傳悉矣。 傳復闕焉,且爲最初用力之地,而 曰:此經之序,自誠意以下,其義明而 獨其 (所謂 子乃自謂取程子之意以 格物致知者,字義 無復上 不明

⁰ 自此句至下頁「此兩條者、皆言格物致 不可後之意也」,宋本無。 知 所 以 當 先而

八

之者 其等 乃 徒 動 爲 益 而 程 或 베 耳 前 能 容 欲 ,然天下之理 爲 智 明 問 難 子 子 善善 也。 不 周 勉 有 也 益 於 之言 日 作 旧 奈 至 哉 明二 待 焉 不 程 知 旋 聖」 欲 循 於 何 「學莫先 勉 以 可 故《大學》之序 無 子 以 又 ? 理 躐 踐 而 强 IE 不 日 一或問 似 董 力 而 而 者 其 謂 至, 而 中 程 子 ,不先知之,亦未 爲 後 不 行 行 此 自 禮 於 子 之, 所 學 盡 有 則 , 宜 荷 樂 事 也 也 致 日 謂 覺 何 出 忠 循 之迹 無聖 循 是 哉 無 知 於 理 爾 爲 信 勉 理 學 先致知 以 ? 難 程 爲樂,不 而 能 人之聰 誠 則 强 爾 而 苦 子 則 者 ^ 惟 致 口 可 學 敬 無 書》 其 亦 其 勉 覺 問 其 以 夫 固 何 惟 難 安 有 燭 矣, 所 人 明 而 知 有 耶 不 其 能 循 能 則 m 則 之性 謂 理 睿 後 覺 知 可 則 理 如 勉 聞 不 亦 之 誠 智 也 彼之 之 思 以 知 以 致 見 思 爲 何 本 明 ? 意 其 不 行 不 知 博 以 日 日 不 而

樂,何 皆言 變, 談 物 耶 否 今人 格 必 又 又 或 虎 真 IE 有 在 有 爲 ,然後爲 皆 有 虎 格 ? 物 心 間 問 物 亦 格 誠 格 之,則亦 不 傷 而 ___ 孰 苦 將 窮 其 理。 物。 人者 意 非 真 萬 進 物 而 不 理 所 而 11 理 脩 致 别 也。 知 至 也 以 不 格 通 端 然 窮 致 之 知 其 未 耳 衆 乃嘗 循 盡 然聞之有 欲 而 術 學 所 是 物 日 嘗 莫 雖 如 理 至之,所謂格物 誠 者之 何 若 非 也 以 顔 不 而 或 真 以 意 傷 先 當 日 子 聞 萬 讀 知 害 格物 或 於 者 格 必 先 知 知 亦 理 書 而 吾 懼有 應 虎 而 先致知 至也 道 未 不善之不 皆 而 講 程子 \exists 樂 者 接 者 其 至 不 矣。」 通 耶 明 不懼 必 事 間 也 必 此 耶 口 ? 道 日 如 物 者 物 後 此 義 者 0 凡 而 此 可 夫 昔 也 人 而 唯 物 之 兩 有 欲 知 莫先 神 虎 處 或 爲 今 而 意 條 致知 之 之 見 能 格 其 論 然 而 色 H 物 也 有 於 猶 傷 有 知 之 而 而

是 當 蓋 或 難 之物 處。」 至萬 而 叮 Ŀ 脱 又 脱 於言孝,則當 格 已矣, 一,但 也 窮 者 非 推 萬 窮 然 然 不得, 詞 物各具 但 有 謂 物 又 有 物 ,若天 而 得一道 各隨 若曰 無 悟 日 止 之 貫 焉 鬼 於 又 處。」 不 窮 理 通 神吾. 何 地之所以 人淺 且 明 天 得 通 窮理 處 理 而 别 求 事 日 吾知其 理 理, 又曰 也。 耳 之 深 其 知 入,則可 窮 L 理 會 0 者 可 其 所以 格 而 窮 便 得 又曰 又 譬 事,或先其易者 窮 高深 妣 萬 杰 非謂 高 到 多, 日 爲孝者如 哉 如千蹊 格物 物 且 理 其 以 而 焉 顯 同 自 已矣 推 但 必 鬼神 他 非 物 自 而 出 盡 又 類 當 積累多後,自當 積 萬徑皆 口 已矣。 必 地 習 日 而 窮 豁 之所 欲 以 何。 有 身之中 原 天下 通 然有 既 盡 吾 類 理 此 其餘矣。 多 以 如 則 或先 窮 知 若 推 可 皆 之理 箇 是 天 欲 其 灶 所 以 然 爲 E 深 顯 所 以 滴 其 事 下 覺 至 以 後

> 格 騎 欲 察。」 固 之道 必 察己 非 孝 察之於身,其 父止於慈,子止於孝之類。 至 宜 然則先求之四 物致 然也 切於身,然一草 汎然以觀萬 獨守夫孝之一字 出 如 則 者,豈 又曰 也。 物之所以 太遠 何 當 一物我 知 而 知 : 所當 語其大,天地之所以 因 爲 所 而 「致知之要,當 見 温 以 無 得 然,皆學者 物之理,則吾恐其 用 理,纔明彼即 物 清之節,莫不 端 爲 所 之尤切。」此 力之地 孝之 而 歸 可乎?」 而 一木亦皆 反 也。 可 求 道 得也。」 所 諸 又 與其次第工 知 如 日 宜 若 己乎?」 日 至 窮 曉 + 何 有 「求之情 一致 思· 高 一善之所 . 此,此合内外 或 究 條 (如大軍 厚,語 而 理,不 務 然後 問 者 格 爲 也。 此 E 1,0皆 物 奉 能之, 程也 其 在 可 養之 莫 Ż 而 回 觀 不 物 若 游 徒 如 不

●「十」,正德本、正保本、四庫本作「九」。

0

罪 以 之功 以 反 之爲説者, 收 始 敬 未 則 養 又 知 覆考之, 少,進 驗夫大學 據 其 思 知莫 補 有 曰 在 性 7,所以 心 傳 今也尋 能 乎 中 至以 欲 學 知 無 一而不放 過 致 文之闕。 格 庸 格 則 天 證 知 之 於 物 他書 物, 之言 而 在 爲 其 始教之 所 寡 而 明 窮 有 過 致 又皆 格 也。」此 義 不在 謂 則 欲 暗 1論之, 理 以 知。 如 物、 理 古 耳 一,但 不 信 以 此 在 明 既 功 敬 致 已 然, 又 又曰 其 自 ,其於格物、致知之傳 乎 善 者。」 立 則《文言》所謂 無 五 近 爲 知 又 曰 必 託 固 則 條者, 誠 擇 可 之本 道 有 0 然 : 曰 守 於 善,《 又曰 意 疑,考其字 又 「致知 矣, ,是以 在 力行 格 聖 以 安 乎 者 又言涵養本 是 物 人 經 格之,其 敢 此 也 孟 之先 者 道 何 在 竊取 賢 犯 也 涵養須 子》所 乎 莫 也 學 傳 不 義 凡 適 ,所養 其 如 之 韙 程 道 遲 愚 聚 而 亦 意 敬 間 之 以 之 嘗 謂 問 皆 詳 子 原 用 速 口 之微

之情, 耳、目、 然之 平 之運 既 乎 物 必 有君 可 禮、智之性 之,則心之爲物 非人之所能 凡 而 則 有 有 ? ? 亂 至 有)則,而 是物 聲色 ,古今之變,不 於 當 臣、父子、夫婦、長幼、朋 也。 物 渾 日 人,則 四支之用。 然之則, 之理 . 0 然在中 息之頃,不 貌 次 吾 然 其 自 則 爲 象 而 聞 則 人之 其 不 不 用 也。 而 及 之 吾子 容 所 異 耐 實主 則 隨 盈 於 也 已,是皆得於 以 理不異於己 於 自 能 又次 有 今且 於天 感 身之 之意 爲是物者, 莫不各有 於身。 不 人 惻 外 天 遺 而 容 也 而及於身之所 應。各 隱 也 以 地 道 也 所 Ē, 了,其體 其 之間 亦 流 羞惡 具 極 盡 至 可 友之常。 行 是 所 也 其 有 於 天之所 則 切 者 得 乃 謂 則 9 攸主, 造 大 恭 小 L 有 而 皆 而 遠 理 有 敬 化 悉 帝 近 則 則 也 而 物 接 賦 發 者 聞 是 所 天 至 而 是 義 育 也 之 皆 不 非 當 降 塵 地 於 外 則 而

故於 子所 及 其 知 始 有 純 但 薄 所 子 之衷 미 加 於 其 放 得 不 於 有 不 之異,是以 其 謂 所 知之 其理 進 心 誠 義 天 能 氣 謂 ,爲之小學,而 不 而 仁 謂 烝民所秉之彝 乎大 ,養其 , L 治 理 下 質 . 盡 萬 同 性 理 或有 也。 知 知 有 之心 萬 耳 物之一原,邵子 與 有 而 學, 物 清濁 天 不正 無雜 人之與 推 有 德 昔者聖人蓋有 所不 之 以其 道 不 程子 則 而 性 に、偏 理 子 ,身有不脩,而天下國家 乎物欲之私 盡 究 又 者 使之習於誠 能 無 理 之,以 物 劉 IE 使之即 所 思 則 窮 不 之同 E 之殊 ,賢之與 謂 所 其 也。 子 能 無 所 天 謂 所謂 心之所 一,故以 各到 知 物 所 夫 謂 然 天 憂之,是 理 9 不 事 自 以 敬 愚 命 天地 有 道之形體 欲 乎 此 用 物 發 其 一人之心 有 之 則 未 相 有 其 其 其 之中 必必 之 窮 禀之異 淺 性 之中,夫 極 與懸絶 所 以 所 至 故故 孟 中 深 以 於 以 不 0 者。 其 能 其 因 收 意 厚 張 不 子 則

> 極,而 求之 曰 : 之意 體 益 莫 地 其 則於天下之物,皆有 使於身心性情之德,人倫 吾之知識 則不合者鮮矣,讀者其 베 慮之微,或求之文字之中,或索之講論之際 用 而 推 不 不 鬼 然則子 有以 内 無不 其 可易者。 ,雖不能盡 神之變,鳥獸草木之宜 力之方, 吾之聰明 類 而 見其 求 盡 以 亦 之爲學,不 矣。 之外,吾恐 通之,至於 得 則 必其 所當然而 用程 或考 以 睿智,亦皆 此 周 、表裏 愚 子之言 遍 之事 以 之所 精 亦深考而實識 求 聖賢之學,不 精 不容 究 諸 切 日 H 爲之著,或察之念 粗 其 以 有 ,然其 自 而 用之常,以 心 脱 無 已 義 無 補 以 其 而 然 所 理 乎 極 與 不 求 不盡 指 而 精 本 其 其所以 盡 諸 趣要歸 貫 物之中 微 1 如是之 之哉 傳 也 迹,不 通 之所 之本 至天 闕 而 焉 若 文 又 然

❶ 「到」,四庫本作「造」。

者。 之,則 精 知 微 盡 衆理之妙, 粗 論 藏 通 有 致 存之於端 以管乎天下之理; 加 淺 粗 焉 内 盡 有 此 妙 E 而 近 務 之可 匿 衆理之妙, 心之全。 實不外乎 矣。 外 是 論 心 而 則 香味 使 景 以 精 之 支 也 亦 學 言矣。 别 粗之 功 莊 聖人 離 心 有 而 雜 者 然或 静 雖主 也 爲 以 無 擾, 莽 擇 此 設 巨 以 知 一人之心 而 之中, 今必 其理勢之相須 教 乎 細 然 日 不 而 窮之於 窮 種 其 及 理 . 相 之 知此 措 無 其 出出 渾 使 雖散 以 身, 涵 以 其 以 深 然 真 人 之 是 則 窮 爲 心之靈 心 學 恍 默 積 動 ____ 偏狹 爲 在 而 所 初 衆理之妙 於 惚 問問 窮 致 淺 力 静 識 萬 其 以 不 理之本; 久, 交養 思 蓋亦 體 文字言 近支離 此 物 舌 爲 艱 口 而 辨之際,以 心之 滯, 之 學 難 果 而 而 以 而 虚 無 阳 無 豁 有 其 初 内 心 靈 靈 使 論 然 必 以 外 用 絶 内 未 無 不 而 與 之 之 知 欲 外 貫 嘗 然 以 存 精 足 人 理 而

> 外 明 世 德 佛 0 學 新 愐 詖 民之實學,其亦誤矣 E 淫 道 邪 必 遁之尤者, 如 此 然 後 而 可 欲 以 移 得 之以 之, 亂 則 是 沂

之善 物之誘 善善 父子 敬 生 以 也 格 離 不 之誘 也 自 致 善 猶 也 烝 曰 其 扞 又有 0 ,是安有 而 明 民 人,莫甚 而 、知者、 近 耳 後 今日 也 耳 有爲 有 世 ,禦也 可 推 非 物 **禦外** 大儒 其説者 以 是其 於 不善 此 指 亦 有 知 能能 飲 君 理 E 則。 孝 物 有 爲 者 哉 食男女之欲 臣 扞 慈 扞禦 爲 而 説, ? 外外 去 父子而 則 曰 格物 ,離君 後 外 物 不 物 人 外 若 口 物之誘 之 亦 生 以 誘 物 日 臣 致 言 與 之也 善 所謂 知 而 而 然 知 静 也 至 道 乎 然 後 後能 之 則 道 所 推 外物者 其 古 口 説 其 本 謂 性 夫外 未 知 以 則 曰 然 格 至 是 始 本 知

天

相

物

道

曰

無

絶

不

⁰ 論 IE 德本、 īE 保本、 四 庫 本作「語

教 枵腹 之誘乎己,乃 其 乎其 道 理之本 耳 其 則 可 有不能 克 以 間 固 而 全夫 ~,然後 復 間 惟 自 亦 得 然也。 之功, 者 其 莫非人之所當 有 以 孰 婦 徒 天 充 可 此亂之哉 有 之别 理 其 欲一 以 爲 而 今不即 是 得 人 、説者,況 天理 物之 物, 切 欲之辨 也 飲 扞 ,孰爲· 食之正 而不能察於吾之所 誘 物以 是 有 而 於 雖 乎 而 去之,則 外者 窮其 人欲 不能 聖人 裔 而 絶 戎 不 得 無者 原,而 滅 是 大 無 可 種 中至 君 以 是 以 以 類 也 無 毫 必 奪 徒 無 父之 IE 然後 閉 悪 乎 以 釐 以 但 之 致 於 物 天 行 差 \Box

者 助 之,見於文字多矣,是 極 不 其 遺 於後學者耶 於 大 曰 而 物 而 本 自 用 不 程子 略 力 於行 其 焉 ? 以格物 小 則 事之實 日: 究 既 亦 其 程子 爲 不 有 精 而 務 窮理, 以 之説 而 不廢 博 發 不 而 其 忽其 而 切切 陷 文字之功, 其 師 於支 於 粗。 學者傳 説 己 而 學 而 有

之説 物, 説之異,必欲其 物 鼈 出出 復詳 之精微者有不察矣。 指外物,則於理 爲 道 此 祖 也 亦 有 而 爲 明 其 牽 比 ___ 也。 其 不 則 知 者, 爲 徑約 師 何 合之勞, 類 備 是 所 天 萬 べ之同, 9 蓋 説 · 而 於 謂 如 人物 物同 似 求屈 9 有 然 説 豁 而 哉 矣。 無俟於發明 達 以 然貫 流 經之意,人 出 而 以 而 我 哀樂 伸 必 於狂 同 之在己者有 然其 乎 不 愚 不 爲 又 消 通者 窮 睹 究 而 考之,則 有 長 好 妄,既 萬 理 貫 惡之情 未 欲 之變, , 以 物之 不欲 (通之妙 爲 又非 物性 矣。 通 極 必 德之方 爲 知 畫 乎 窮 不 窮 恐其 其 則 理 至。 見聞 不 若其門 情 夜之道 舍其積累之漸 萬 理 異 同 則 明矣; 天 矣。 原 物 之異 只 皆 其 而 出 地 人 如合 思 之同 之理 是 其於 未 與 於 亦 不 Ш 慮之 則 内 足 免 則 旧 鳥 可 111 外 謂 於 鷽 死 雖 可 乎 求 而 草 爲 以 程 則 衆 魚 生 及 徒 理 專 木 几

四

其 不謂 物 盡 無 推 得 誠 如 也 顔 近 窮 處 言 故故 格知 也 髮之不實 目 不 9 之 子 者之切 理 矣, 積累之 Mi 視、耳 之所 之 但 所 誠 在 物 而 凡 觸 必 謂 務 務 身, 至以後之事 不 我 中 天下之理,反求 日 以 處 格 反求 者 口 可 不 也 也 即 庸》之言 皆 恕 聽、手持、足行之畢 耳。 以 物 是 勝 以 能 意誠 通 爲 恕爲 諸 又曰 又 窮 循 及 亦 亦 者 本 固 日 身 ,然皆備 序 日 程子之所 心 似 非 ,言其 明 加 「先其大者 本」,則是求仁之方,而 而 反 矣。 其 正之功 而 善 以 又 必 處 身 天 日 是 至 先 諸 通 下 窮理 即 而 一尋箇 於 然 方 其 身, 也 而 Ż 我 不 誠 物 爲 反 大 理 」,則 之至 格 · 具 皆 身 敢言 故 格 者 又有 則 是 而 切 自 不 知 物之事 於 有 加 處 天 非 不若 通 則 至之 明 此 以 誠 下 然 無 從 以 非 乎 見, 者 則 無 而 所 乃 之 外 若 先 爲 處 事 其 物 亦 無 不 爲 得 天 類 又 其 非 不 則 理

> 物,爲 者,② 者哉 敬之 得 朽 不 未 言, 則 而 加 而 中 遽 聞 爲言 之 遂 口 有 不 庸》學 約,而 以 論 ? 不 偏 可 而 不 反 此 非 之信 哉? 誣 諸 廢 不 知 類 猶 又有以 程 人之所未聞 ·信他· 矣。 問 身 何 不能 非 程 厭 子 思辨 而 所 則 子 夫 又有以今日 之言 今爲格物 不 人之所聞也? 爲 病 觀 無 以 固 弗得弗措之事 不 誠 物 待 而 已言之。 理 有 容皆 者, 者 物 於子 之煩 疑 子 致 之似 而 之 則 其 之説 誤。 察, 盡 也 游 耶 格 諸 功 廢 若 ? 聖 ? 夫 而 家 而 又安得 衆 且 物 後 人, 以 無 宛 夫 所 地 豈 抑 其 人之所 持 定,今又 己 位 轉 論 其 明 直 而 所 爲 敬 偶 歸 習 以 程 日 速 拂 遽 説 觀 有 未 子 格 以 共 於 貧 己 於 序 聞 理 之 T 持 是 聞 所 IE 理 如 谏

論 IE 德 本、 IE 保本、 四 庫 本作

² 正德 本、 正 一保本、 四 庫 本作

其門 迹,而 之意 傷急迫,既 然其 事物之内, 本,居敬以 裹之意。 未有 其 (爲」者、 关 棄,而身親 盡 (從容 之言,其答問 行 人之所以 則 也 察程子 窮 日 致 未嘗如 是 天 知 之妙 物 酒 下 而 又曰「察 自强,察地 但 持其 不 而 物 而 其 所謂「物我 之物」也 玩 欲 知乃 格 程 能 也 致 不 曰「 因 志,志立乎事物之表,敬 之以精其知」者 子 盡 在 察」, 積 説 其已定之名, 可精」者,又有以 獨 所謂「求 反 其 敬 格之之道,必立志 天 者乃 久 有 行 復之詳 全體規模之大, 」者之旨。 則 勢 貫 所 又曰 以 是 以 如 通之功耳。 謂 理,纔明彼即 自 不 此 其所以 厚德者, 且 即 「宛轉歸 强 察程子 雖 明 1,爲得 事 擬 但其 察 或 然,與 也 即 其 合乎 僅 地 所謂 如 物 亦 語 又無 以 致字 已 Ξ, 嗚 勢 有 不不 曉此 彼 似 所 著之 呼 定 其 以 意 行 矣。 不 則 其 向 所 厚 以 謂 而 1 頗 平 厭 異? 其 末是 非 少 格 於 詳 中 他 而 有 加 程 表 物 以 味 自 事 有 心

以

是

必

尋,以 之教,以爲「爲學之初,且當常存 七十 之合焉,而 進 他説 所勝, 子喪而· 裹真 此 愈 非之極至; 致知之學 識之,未易以 子 當 助於後學哉 티 : 究其 加 ,然其功夫之漸次, 言,雖其規 所能及者。 有 明 别 安之實 洒 此 窮 理,待此 凡 不免於猶 大義 不 然 以 遇 ,與 覈 處,非 反 事, 彼 已 其 身 世 \Box 模之大, 事 以 乖 然必 惟嘗實 如此 實 之所 舌争 間 窮 有所未 徇 文字言 事 矣 即 獨 理 外誇 是 究 融 當 既 惟 謂 也 尚 爲 條 用 意 其 釋 以 且 久 念昔 博 何 盡 主 多 味之深 理之密,若 脱落,然後 極 力於此 識 語 , 積累之多 就 物 望 日 也 爲務 是 之所 愈 此 而 治 聞 其 此 多 然則 事 是 必 聞 延平 以 能 心, 者, 切 及 亦 反 究 者 有 加 知 而 爲 也 循 勿 先 不 其 奚 則 復 所 所 不 心 愈 不 本 謂 能 逮 胸 序 推 爲 牛 發 博 有 愈

平 於荷 之,而, 内。 惡之 是以 惡。 善也 好 得 性 揆厥 耶 本 室 其 而 ,莫不有善 可 而 然,惡者物 ? 焉 著。 然既 善 不 惡之極者。 所 不 物欲之 所元 或 此 雖曰 未能 曰 : 誠 以 知 在 問 IE 惡 自欺 者 其 惡之真 有 爲 好之, 天下之道二,善 則 無不 而 惡 六章之指 私 於 是 己 亦有僅識 非 欲 循 而 而 · " 事 得 形 爲 惡者以 唯 所 其 無 夫不知善之真可 不 物 以 人之 可 而 體 意之所 生 不 惡 次 誠 蔽之, 之 恶 未 之累,而 之邪 足 第,則 17, 其 則 能 理 所 其 挽之於 其 以 則 以 無 本心莫不好 發有一 詳 非唯不 粗 固 穢 而天命之本然者不 其 爲 分, 不 善 與 猶 而 有 也 善 悪悪 又爲 好 者 惡 中。 瞢 不 不 有 不 者以 能真 是以 天 而 誠 然不 而 口 足以 口 好,則 也 氣禀之拘 反 是以 者 命 己 得 不 7善而 有 拒 矣。 雖 知 知 人 所 而 察 去惡 以 其 其 之常 夫 之 其 不 賦 言 日 也 賊 然 好 免 惡 於 好 善 惡 之 者 口

奥,以 好之 也。 發, 焉 頃 如 好 也 誠 其 開 故 焉 正 而 而 好 9 可 惡之也。 惡惡臭之真,欲 其 明 爲大學之教,而必首之以格物致知之目 滴 身無 纖 則 而 如 色之真 如 夫好 意之説焉, 好 其 也 所 茶之 禁止其苟 庶 日 何 日 心 可 以 乎 好 益 不 恶 惡 善 惡 桁 長 脩 之有 善 微 内 惡 个,欲 使既 惡 之必然矣; 所 而 乎 矣。 則 外 則 其 中 而 念 發之實 則 且 哉 以快乎己之目 必 昭 必 中 惡 無 念 又欲其謹之於 以 自 若彼 由 有 由 融 無 不 相 欺之萌。 以 足乎己之 中 中 聖人 是 好 不 既 表 承 - 及外 小人, 識 及 至此 則 悪 裹澄 如 則 外 夫 又 其 於 此 善 則 是 無 爲 幽隱 而 此 無 無 澈 而 矣, 鼻, 悪 是 初 其 害 敢 復進之以 凡 出出 之所 蓋 其 好之也 也 非爲 毫之不 之 而 初 而 小 毫之不 其 獨 恶 有憂之, 間 心 有 須 非 心 隱 徒 之 在 臾 之所 微 間 爲 人 無 有 也 以 而 惡 好 心 與 其 爲 斷 如 不

承,首 之萌 其 然非 之説 其 至 惡之實 惡 見 日 矣。 一,而 獨 而 全 知 聽 有 然不 其 是 尾 至 又不 而 後此 而 其 故故 以 爲 以 猶 毋 而 詳 所 開 知善惡之所 能 淪 後 必 欲 自 如 皆然,今不 自 其 外託 曰「欲 陷 謹之於獨 意 此 欺 而 爲也 知 至於如 誠 焉 不 識 是 於善以自 之真 假 故故 誠 古 他 在 然猶 其 復重 則 又 宜 此 ,以禁止 則 術 意者 大學 日 但 而 爲 以 不 出 必 不 不 以 自 蓋 雜 敢 先 能 自知耳。 功 不 也 脩 平 誠其意 侍 致 其 則 知 有 夫, 之先 其 其 其 以 荷 其 亦 間 知」, 次 致其 知 且 真 不 必必 務 第 之已 可 此 自 亦 口 矣。 謹 好 又 章 欺 好 謂 相 可

嗛 以 心 恨 者, 與與 所 有 銜 所 而字書 此 之 銜 不 然 之義 異 同 則 而 以 慊 别 何 爲 而 之耳。 之爲 也 其 \Box ? 銜 爲 義 物 快 曰 : 或或 孟 也 爲 子 慊 以 足 所 然則 之爲 爲 爲 謂 少 恨 慊 慊 字 爲 又 於 亦 少 有 以 心 旧 爲 則 作 爲

> 樂毅 明 字 讀 言者 嗛 書 者各隨 而 栗 音又異 所謂 又以 也 姬 其 所 「慊於志」, 孟 則以 、尤不患於 指 訓 子 快 而 所 、銜其恨 與 觀 謂 之,則 足 則以 吾 者 無别 與 何 銜其 少之 讀 既 慊 也 龃 並 快與足之意 意 愜 行 漢 而 TH 書 不 言 則 悖 者 所 義 矣。 也 愈 而

然,乃 傳,以 平之體 其 也。 節 之 蚩 古 明,如鑑之空, 其 爲 可 俯 則 或問 議 故 仰 真體之本然,而喜怒憂懼 心也,必 爲 爲有 其 因 雖 其 得 鑑 及 未感之時 物賦 其 鬼 所喜怒憂懼,便 空衡 人之有 其 如 神 正 感 如衡之平, 形者 耶 槁 有 平 物 ? 木 不 之用 心, 之際, 得 至 之不復生,死 티 : 亦 本 窺 虚 其 流 以 其 以 人之一 至 爲 而 用 應 爲 行 際 静 不 所 之 隨感 不 物 所 者 得 應 所 心,湛 身之主 滯 其 灰之 者 謂 不 而 固 而 IE 此 又 IE 鑑 能 無 應 皆 不 然 章 然 得 空 無 者 則 之 光 中 失 虚 衡 妍

八

之有哉 爲 其 憂 明 不 īF. 懼 能 得 者 必 乃 其 無 有 耳 所 E 動 失,且又不 唯 以 · 而 乎 傳者之意 其 爲 中 必 事 天 者 如枯 物 下 之達 能 之 而 木 古 此 不 來 死灰然後乃爲 與 非 道 心 有 之 以 俱 所 亦 用 往 心 不 何 之應 始始 則 不 有 其 應 得 物 喜 得 之 其 不 其 便 得 怒 既 正

者 希 求 不深念而 其放 孔子 心,從 所 屢 謂 省之 其 操則 大體」 哉 存 者 蓋 皆謂 孟 此 子 所 學

則

身在

於此

而

心

馳

於

彼

血

肉

之軀

無

所

管

攝

其

不爲「

仰

面

貪

看

鳥

頭

錯

應

者

幾

矣。

舍則亡」,

其

Œ

而

無

不

在

是

則

耳

目

鼻

兀

肢

百

骸

莫

正

也

惟

是

此

心

之

靈

既

日

身之

主

一,荷

得

不

有

所聽

命

以

供

其

事

而

其

動

静

語

默

出

人

起

居

唯

吾

所

使

而

無

不

合

於

理

如

其

不

然

僻 何 或 也 問 八章 曰 舊 之辟,舊讀 音 舊説 以 爲 L 譬, 章 例 而 之而 今 讀 不 爲

非 之際 内 蓋 情 抵 然 無 接 能 取 則 陷 類 合 然後得免於偏也 有 也 不 所 所 有 恩常掩 舍 阻 偏 於 ,於此五者 例 也 以 相 之間 爲 脩,今乃猶有 焉 似 向 不 以 於 文意求之,而 以 此 偏, 能 愛 此 齊 而 便爲 下 心 與 章之義 無 之 不 蓋 義,亦 文逆 將 漠 則 是 知 事 以 哉? 偏 然, 而 無 溺 以 其 接 爲 有 倚 之 亦 焉 身 、善矣。 何 身與 都 實承 當於 所向 若是之偏 既 得 而 而 日 而 有 以 且 而 無 有 其 . 必 不 不 勝 不 身不脩,則是 心 事 親 當: 説 Ŀ 凡 有 通 理 是其 知 其 脩 則 既 接 疎 章 然之則矣。 是 如 者 也 所 其惡 失其 情 正 之等 此 其 五 偏 而 愛暱 身之所接 矣 何 是 而 者 能 矣; 後 則 好 立 哉 況 蓋 以 文 皆皆 齊 惡 或 所 比之私 間 必 於 宜其身之 命 之平。 賤 偏 其 謂 有 身與 其 閨 人 者 今日 **分**好 日 之别 家 於 所 意 八之常 接 門 竊 惡 耳 物 物 之 惡 以 IF. 而 M

此 而 心 後 身脩 Œ 則身不待檢而自 亦 日 心 得 其 正 乃 脩 也 能 脩 身, 非 謂

則 陷於 哉? 非吾 足去 未至 之可 如是 歌,孟子之隱几 塗之人而已爾。 所 而 當然也 先有是心,不度 正 愛 宜 欲 故有敖之之意 取,而其行 於可哀,而 也 敖 之 有 一偏者發 曰 : 又況此章之指 ,其 則 而 人之於此 ,若夫敖惰 親愛、 敖之, 哉 今有人焉,其親且 位與 ? ,其言雖 則是常 所 賤 而 德,未至於可 無足是非 其惡未至於 曰: 又其下者 更 臥、蓋 施 則凶 惡、畏敬、哀矜,固 加 乃 耐 敖之爲 亦 詳 情 無 安得 爲 一德也 亦因其有以自取, 審 所不 有 也, 所 慮 ,則夫子之取 可賤 所 宜 畏 舊,未至於可 凶德也,正 雖 其 而 ,曾謂本 則視之泛然 敖爾。 敖 有 日 因 而 遽 惰,而 也,其 所當 有 敬 謂 而 所 也 之凶 人 若因 事 L 敖惰 其 重 其 言 心 瑟 理 以 而 意 德 如 親 之 人 其 之 無 窮 而 有 而 而

非

道

此

不

若

知

而 猶 不 敢 肆 其 敖惰之心 也 亦 何 病

之心出 弟,亦何以異於此哉! 中,而不至於大相遠 有言 矣。 能無失 民則非 外樂 ,不過自其慈幼者而 有不察耳。 ,赤子未能 或 問 於至誠 而有待於强爲 於其心 如赤子之不能自言矣,而使之者 如 則 傳 自言其意,而爲之母 保 則 之言此,蓋 凡 赤子」, 以本 所以 矣,豈待學而後 也。 推之,而慈幼之心, 既舉其細,則大者 無慈愛之實, 求其意者 何 事君之孝,事 也 以 明夫使衆 雖 者 能 長之 慈 而 哉 或 程 子 於 愛 口 反

也 善必 不 德罔大,墜厥宗」,亦是意 積而 日 書》所謂 :仁讓言家,貪戾言 後 成 爾 惡 惟 雖 德 1 罔 而 小 可 萬萬 爾 懼 ,古人之深 何也? 邦 惟 ...慶 爾 日 戒 惟

日 此章本言上行 下效,有 不 期 而

非 者。 日 能 必 化 本言 有 也 以 遂 内 諸 施 求 必 適自 人 有 諸 其 欲 ,賞善罰惡之政 則 善,而 恕字之旨 之 諸 從 亦 專 之,欲 但 責 無 推 非 人。」以爲 也 務 以所令反其 人以 脩 則 惡 諸 則 吾 謂 脩 是 有 遂 己 不 其 而 所 斯 故先 其 己 必 猶 不 口 遽 先成 有 矜己之長,愧 不 己 不 無 以 有 求 都 也 欲 君 必 待 而 亦 求 也。 如 X 與 望 不治 於己 (所 好 後 非 子之言 固 於 之善 諸 民 恕 心 IE 人之皆 求諸人, 諸 三:此 有 勸 人 此 共 爲 而 人,而 ,則民 理 人。」 勉 未 而 而 意 由 義 終 所 曰 有 程 無 有 也 蓋 人之短 身 能 其 以 拱 爲 當 以 督 無 諸 去惡, 不從 口 己 手以 條 治 爲 然 責 諸 而 曰 : 己 有諸 方僅 行 如 教 非 其 而 人。 後 己 故 俟 國 治 T. 則 而 然 諸 耐 法 不 化 而 己 令 免 者 己 哉 遂 則 不 脅 其 古 又 可 後 之 之 自 推 言 未 非 E 不 可 不 之 且. 而 而 非

之善, 恕 戒 然, 欲 者 即 使 息之謂 陷 所當及者 使之亦如我 爲 用 所以終身力 IE 心 本。 哉 焉 其 ,將使天下之人 如治己之心以治人者,又不過 力之序,亦可 是推之,以及於人。 以 ,故《大學》之傳,最 而直 源潔流 是 所 治 無惡 蓋 以 人, 也 欲 乃 近 能强 治已愛己者 世 大 清, 如愛己之心 以 而 此 之所以 然人之爲 名 亂 以 可 其 於 而 姑 而 以 卿之言有 見矣。 之 不 自治,至於 治 非 無 道 皆 息待之,不 肖 自治 己治 一,而 之身 不可 人之惡 後 皆 如己之不 而 心 以 至即 兩 而自治 贵 人, 行之時 愛人, 日 爲 恕 出 必 章 所 然後 有 0 標 之爲 此 於 嘗 無 始 相 謂 善 準 不盡 章 IE 窮 及 訓 焉 肖 而 終 以 也。 而 然後 道 理 而 雖 誥 推 於 非 視 强於 身 而 則 口 其道矣 有有 至 論 不 此 今乃 苟 表端 吾 以 淪 可 及人 之, E 求 自 則 可 可 行 胥 治 相 言 以 姑 之 以 禁 教 不 則 其

是乃 力陳 賢君 如此 正學者所當深察 主,一以自治爲主, 有未合者。 治人之意,與夫《中 豈不誤哉 我之昏而後 以施之於己。今曰「恕己則昏」,則是已知 不知自治其 義,本以如心而得,故可以施之於 賢矣。」此言近厚,世亦多稱之者。 之心責己,恕己之心恕人,則不 ,則亦止 則 大義 也 所 (矣,而又曰「以恕己之心恕人」,則是 明,雖 謂 以 不 日 可以言下章愛人之事,而於 有 放其 能 蓋其 Ē 昏,而遂推以及人,使其亦 藉令其 聰 也, 無 年 明 失。 而明 爲 罪 乃欲 而 ·庸》以 則二者之間,毫釐之異, 恕雖 (意但 恕 朏 而 辨也。 總功 己 姑 其 由 則 同, 、妻,其 爲欲反此 爲 人 此 是察,放飯流歡 香。 以 緩辭以 治人之説, 若漢之光武 而 人聖賢之域 臣 荷 患 一以及 人,而 郅 心以 不至 能 但恕字之 慰 揮不能 以 解之, 人爲 則皆 此 施 將 於 不 責 亦亦 章 於 其 可 而 如 既 聖 人

> 其 禍 以 丛 決 賊 失 乃至於此,可不謹哉 是問 其君之罪。 又甚遠, 者。 而大啓爲人臣者不肯責難 光武 一字之義,有所不明 乃謂 惲 爲善恕 己 量 Ì 陳 而 其 善 順

乎? 暢,使 歌,優 亦 非 見,而《詩》之爲用 則引《詩》之助,與爲多焉。 讀之,則 之文,證此之義而 引《詩》云者,皆以 家、治國之事 也 能於其所論之外 ? 刑
 □

 :
 人 (游厭飫,有以感發人之善心,非 日 于寡妻, 曰: 首言 心融神會,有不知手舞 反 :古人言必引《詩 既結上文,而 復吟 文,文具 至 家 咏之間,意 于兄弟, 人,次言兄弟,終言 亦得矣。 是 己 ,别有所發明也。 而 而求之,則引者之意 也。 意足矣,復三引《詩 復引《詩》者三, 夫以 **>**9 以 티 : 味 蓋不 蓋 御 深 而 此 三詩 取 于 長, 獨此,他 足 章 其 家邦」之 蹈 義 所 然嘗 嗟 亦 徒 兀 者 理 論 取 嘆 或 序 凡 是 通 試 咏 何 齊 彼 口

意也。

察彼之 幸其 倡之 賢愚 弟、慈 以 子 但前 天下 之所以爲心者,雖曰未嘗不同,然貴賤 君子不唯有以化之, 之,以見人心之所 衆心之所同得者也。 以 察其 (起者 處 是爲 ,雖有 有以 此 ,則下之有是心者 異 章專以己推 或 爲言 心之所 心,而 禀 問問 言, ,或不得 而 倡焉 不, 苟非 0 遂其 小大之殊,然其道 矣,此 何 上章論 失 也 同 而興起矣,然上之人乃或不 遂 興 其 在 ? 論 而 同 起之善端 而 上 而 所 齊家、治國之道 日: 治國 之君 反有不均之歎。 人化爲言,此章 得 以 而又有以處之也。 而 自家以及國,自國以及 ,亦無所感 夫絜 處之之道 不 三者,人道之大端 、平天下之道 能 子真 也 矩之道 已者如此 不 知實 過 티 : 則 而興起矣。 如 既 蹈 此 然 又 是 彼 何 殊勢 有 是 · 而 以孝 而 申 以 後 以 其 蓋 言 能 以 有 君 所 以 復

> 孝弟 處乎 之心 圍一, 之間 國家 不相 通 蓋 歎 餘 廣狹長短,又皆平 太史范公乃獨推 絜 不敢以己之所惡者施之於人。 也。 之 不 矣,天下其有 莫之省, ,此,則 將 侵越, 足之處, 度人之心,知 賈子所謂 不倍者,皆 ,而所以 爲 蓋絜 度 無 也? 而 上下四方,物我之際,各得其分 而强 (), 度也。 物 處 是 各就 度長絜大」者 則 得 心 不 不 訓 此 日 所謂絜 ·均如 其 制 平 以 得 人之所惡者 以 . 以言之,而 中 事 其 矩,所以 者 自 挈,殊 此 者 ,校其所占之地 所 一,截然方 乎 盡 莊 矩者也 前 ? 其 子 無 心, 也 出於此 凡天 爲 所 然君子 後其理可 意 不異乎 使吾之身一 方 謂 而 謂 E 前 下 夫爲 也。 無 0 一,而 此 絜 之所以 之欲 則 不 Ż, 則 諸 均 以 得 先 天 天 無 其 己 則 友 爲 地 F 有

^{●「}謂」,四庫本作「味」。

皆以 所謂 守 通矣。 便爲 私,而 而 身可行」,程子所謂 之云,是 即 IE 由 知 而 有 IE 草 蓋 已矣。 至 此 而 王肅之方於事上 心者 其 木 如愛己之心以愛人者 胡 人之心; 故 亦 其所 出 能以 若趙. 越,雖 可 蕃 於 則 亦 有 贵 而 以 推以 一有私意存乎其間 此 所謂 將 一人之心,爲千萬 自 充拓 推 推 由之爲守 欲 通天下之志 何 外 之, 之 意誠 及人者,亦無不 絜 所 而 至 恕者已 而 矩 則吾之愛惡 去,則 充 而 不 充 無 心正, 亦亦 其 至哉 强 不 而 則 拓得 類 爲 乎 通 將 天 好 易 ,而知千萬人之心 之哉? 也。 ? 故 耳。 則 地 有 人 尉 去, 人之心,其如此 有 閉 所 曰 : 雖桀、紂、 日 佞己,推 ·得其 取舍,皆 則一膜之外, 夫子所謂 以 則天 然必 而 0 而 隔 勝 此 然則 爲 督 礙 亦 IE 自 地 固 尉 一己之 而 X 日 是 其 得 其 隱 變化 前 絜 盗 則 不 物 以 終 陵 能 其 窮 章 矩 跖 所 格

> 序 後 盾,而 若於 恕 賢凡言恕者,又必以忠爲本, 意雖 唯忠,而後所 乃 未 交病,而雖 哉 不 必 下 本末之意 兩 其所當 公, 察此 言, 理 四 不可行矣,尚何終身之望哉? 有 方 而事則私,是將 如 以以 耐 未 庭 形 遽欲以 明,而 欲,吾之所惡者,未 也。 如之心,始得其正,是亦 除 此 與 之内, 度之,而莫 影、欲去其 然則君子之學, J. 是爲施於 有 跬 步之間 見其物 IE 不 ,則吾之 人之準 截 而 丽 我相 必其 然各 亦 程子 不 可 口 且 所欲者 侵 則 所 得 亦言 不 得。 是以 此 参 彼彼 其分。 當 謹 篇 商 則 此 其 其 先 忠 聖 矛

事 均 同 日 0 自 爲 耳 此以勢之遠 推己 爲 曰:自身而家,自家而國 實非 及人之 説 有 異 若有 事 ~邇,事 事 也 不 加 能 之先 蓋 傳之所 相 必審 通 後 自國 焉 於接 以 而 者, 釋 所 物, 之者 而 施 何 天下 有 也 好 惡 不 ?

其 首 於外 則 遠 以 不 誨 尾 治 近 推 偏 而 者 先 實 於 己 齊 内 後 度 廣 其 後 一身矣 前 事 物 博 國 有 皆 而 嚴 施 舉 以 ,何名爲異 其 周 可 密 此 TE 有 國 法 徧 倫 不 加 而 已治 然後 理 同 彼 精 亦 者 詳 可 篤 而平天下。 説 見 也。 民 有 恩 哉 自 其 知 以 義 然自 或 本 興 立 加 以 末 起 標 齊 實 下 或 準 此 然 其 以 則 胥 以 後 家 物 治 其 教 口

焉 好其 好 君 民 子 惡 ,則上之愛下,真猶父母之愛其子 親 有 所好,而 日 又能 絜 其 所 上 矩之道 以 謂 豊 與之聚之,惡其所惡,而 民之好 民 不 故能 亦 之父母」者, 猶 惡,爲己之好 子之愛其父母 以己之好 何 惡, 也 惡 ? 知 哉 矣 不 巾 以 民 日 之 彼 施 夫

日 君 言 恣 E 在 己 尊 徇 此 私,不 位 所 者 引 ^ 與 人 節 天 所 南 下 觀 Ш 同 仰 其 之 不 好 可不 詩 惡 何 謹 則 爲 也 若 天 ?

下僇,如桀、紂、幽、厲也。

傳》曰 貨 未 無 尤 言有 矣; 則 也 日 曰 日 易大傳》曰 0 0 在 . 格 悖 有 財 民 言 不 有 故 不 物 於 或 日 用 日 而 歸 曰 能 德 能 争 德 者 0 . 財 矣。 於 致 絜 而 此 所 王 鬭 絜 聚 不 者 E 也 得 知、 其 謂 矩 於上 有 可 人 其 然 矩 亦亦 矣。 衆 何何 「先 人 者 不 深 誠 德 不謹 民 則 得 則 悖 言 意 有 即 言 知 爲天下僇, 以 慎 則 將 而 或 民 而 土,則 Ē 此 所謂 務 本 聚 民散 乎 施之 一,失 悖 以 父 出 末 人? 財 心 言 德」, 而 導 13: 明 於下矣 用 以 衆 以 而 大 其 出 利 鄭 之, 德 而 失 天 所 而 劫 無 者 日 脩 何 氏 而 失 分 所 謹 失衆 奪 絜 或 財 也 而 其 布 以 亦 7,財散 民, 地, 之教者 以 而 矩 身 得 之 爲 悖 失國 謹 當 之心 而 衆 E 不 何 何 君 春 曰: 而 之, 先者 於下 得 下 患 世 也 秋 有 矣。 也 E 亦 或 則 ? 平 外 逆

其命心。命,則民有逆辭,上貪於利,則下人侵畔,得

耳,可不謹哉! 耳,可不謹哉! 耳,可不謹哉! 耳,可不謹哉! 耳,可不謹哉! 耳,可不謹哉! 耳,可不謹哉! 其,而致其丁寧之常,何也? 曰:以天命之重,而致其丁寧之常,何也? 曰:以天命之重,而致其丁寧之常,何也?

E 彼,而獨深惡乎此者,以其有害於善人,使民 不得被其澤,而 惡者,不但媢疾 甚之亂耶? 曰:小人爲惡,千條萬端,其可 矣,然仁人惡之之深,至於如此,得無疾之已 絜矩與否之異 利,及其子孫,不好善之害,流於後世,亦 也。 然非 其引《秦誓》何也? 曰: 殺 人于貨之盗,則罪不至死,故 人也。 其流禍之長,及於後世而 事 曰: 媢疾之人, 誠 而 已。仁人不深 言好善之 悪乎 可惡 未 由

> 得宜也 其爲禦亂之術至矣,而 保安善人,使不蒙其害,亦所以禁伏兇人,使 罪焉 萌,而天下之公在我,是以是非不謬,而 愛人,能惡 爲遵,以 漢石刻詞有引「尊五美,屏四惡」者,而 进之爲屏,何也? 然所以仁之之意,亦未嘗不行乎其間也。此 不得稔其惡,雖因彼之善惡,而有好惡之殊 害雖得不施於此,而彼所放之地,其 苦樂之情則一,今此惡 亦放 而置之無人之境,以禦魑魅而後已。蓋不 ,故不敢以己之所惡,施之於人,而 流之而已。 屏爲迸 人,何也? 然又念夫彼此 則 曰:古字之通用者多矣, 其 證 人放而 何致亂之有? 曰: 仁人者 也。 曰:仁人之能 不遠 之勢雖 私 則其 民復何 欲 以尊 必 惟 遠 而

曰:大凡疑義所以決之,不過乎義理、文勢、曰:命之爲慢,與其爲怠也,孰得?

失 先 以 所 所 決 事 了,則 之則 後 鄉 益 深 證 沉況 乎 背 求 \equiv 亦 皆 矣。 者 於 何 愐 通 而 以 必 此 不 若使其 己。 是 苦 等 欲 可 字 以 而 心 以 今此 推 既 極 不 事證決之則 於義理、 他 究 力 兩 二字, 猶 以 通, 亦皆可見矣。 求 當 而 之, 事 欲 於 視 實之大者 無 以 徒 事 其 考,蓋 義 (緩急 費 義 理、 日 無 大 以 而 不 文 有 得 爲 勢 無 口

私 與 以 性 民 陷 者 而 之父母 溺其 絜 日 何 0 矩 哉 好 心 則 善惡 是以 能 不 好 日: 至於是矣。 悪 悪 其 不仁之人, 人者 、所好惡戾於常性 人之性。 IE 相 然也有 反 阿 黨 使其 媢 如如 拂 疾 能 人之 此 有 勝

絜 不 也 得 矩 ? 之 與 日 日 本 忠信、 同 也 忠 好 信 惡 驕 者 驕泰 矣。 泰 盡 則 之所 己之 恣 己 以 徇 心 私 爲 而 得 以 不 失 人 違 者, 從 於 欲 物 何

曰:上文深陳財用之失民矣,此復言生

出之禍 者以 **豈若** 嘗 可一 也。 則 則 用 而 財 百姓足, 所 財 廢 夫子 之 ,有國之常政,所以厚下而足民者, 夫《洪 利 日 後 以 用 道 也。 世 告 不足。」正此 爲 告之亦以足食爲首 而 ,故深言其害以爲 何 頭 利 齊、梁之君,使之制 君孰與不足?」 無 吕 、範》八 也 者, 會箕斂、厲民自養之云哉 氏 則 ? 之説 聖人 必 政 日 至 意 0 於 贵 食 也 得 此 剥 輕 貨 其 所 孟子 戒耳。 之哉 民 爲 然孟 旨 謂 以 先 蓋 民之産者是 矣。 有 Ħ 自 生 子 . 至於崇 子 奉, 所謂 民之道 特 有 而 貢 無 以 子 有 則 而 問 政 政 爲 固 日 本 有 財 不不 政 已 事 事 未 國 者 悖

崇貨 仁者 聚 財」, 而 真 也 身 何 日 尊; 有 也 仁 以 然 ? 不仁者惟利 財 亦 者 曰 : 發 即 以 身之意 財 仁者 財 貨 發 而 不 是 身, 也 以 私 圖 其效言之爾 不 其 故故 仁 有 捐 者 故 身 以 賈 財 身 非 禍 散 發 民 謂 以

終矣; 是將爲 之財可長保矣,此 積 得爲吾之財乎? 仁,則下不好義,下不 鹿臺之財; ,皆以身發財之效也 上 事 好 天下僇之不暇, 「未 有 終, 德宗以出走, 則 有 則 下 府 若商紂以自焚, 以財發身之效也。 爲 好 庫 君者安富 義 財 好義 而 矣; 非 圃 況 其 下好 豐瓊 列則 府庫 財 尊 其事 者, 義 林、大盈之 之 榮 而 起鉅 財,又豈 不終; 上不好 而 則 何 事 也? 府 橋 有 庫

此

被其 齒者 之禄,而享民之奉矣,則不當復與之争 儀子所以 豚牛羊,民之所畜養以 殃; 去其 也 仁者之心 曰 其 盗 拔園葵、去織 角 聚斂之臣剥 引 臣竊君之府 ,傅之翼者兩 孟 至 獻子之言,何也? 誠惻 民之膏 爲利 怛 婦,而董子因有「與之 庫 ,寧亡己之財 其足」之喻 以 者 自 血 也。 私。 以 奉上,而 既 而 。皆絜 曰: 已 禍 此 前 食 不 公 君 雞 不 及 民 矩

> 借如 良博 而欲 織 臣」,亦絜矩之義也。 忍傷民之力,所以 蒲 愛。 鳴鼓以聲其罪。 而直斥其 其 耐 意亦 所以責二子者,疾痛深切,不 可見矣。 不仁; 「與其有聚斂之臣,寧有 以聖人之宏大兼容,温 昔孔子以臧文仲之妾 以 冉求聚 斂 於季氏 少

蓋 此 人以 惟義之安, 厭 也? 亦出 也。 日 義 以義爲利 曰: 於此 爲利,義之 孟子分别 以 或 而自 云。 利 不 以 則 爲 無所 義 利 所 不遺其 利 利, 安 不 爲 則 利矣。 即 拔 利, 上 親,不後其 本 利 下 以 塞 之所 交征 義 源 程子曰 之意,其 爲 在。」 不 利 君 0 奪 IE 不 謂 聖 蓋 何 傳

之可 何 以 審 也 解 ? 於未然, 日 矣。 曰: 此其言「 聖賢深探其實 怨已 而 不爲無及於事之悔 結結 菑 於民 害 並 至」,「 心。 而 極言之,欲 則 非 無 如 也 之 朝 何 クタ 以 有 此

以類 若有餘,而意味或反不足,此不可不察也 自 别 相 見 於言 從,自始至終,畫爲 外, 不 可 易 也 兩 必 節 欲 則 其界辨雖 説 中 判

三八

呼! 矣,有國家者,可不監哉 也; 知其終爲害也。 佐人主之欲,人主不悟,以爲有利於國,而 蹷拔矣。」吕正獻公之言曰:「小人聚斂, 傷,則其本傷 之言曰:「民者邦之本,財者民之心。 陳京、裴延齡之徒 防 嘉其任怨,而不知其怨歸於上也。」 若二公之言,則 猶 有 用 其本傷,則枝榦凋瘁,而根 桑 賞其納忠,而 、弘羊、 ,以敗其國者。 可 謂 孔 僅 深 得 宇文融 不知其大不忠 此 章之旨者 故陸宣公 楊矜、 其心 嗚 柢 不

端以 續 於易置而 而 傳言之詳,然其實則不過好惡、義利之兩 以舊文爲正者,何也? 己。 脉絡 廣 曰:此章之文,程子多所更定, 其意,是以二義相循,間見層出 但以 貫 錯 通 陳耳。 欲致其詳,故所言已足,而 而 T 寧反復爲人深切之意,又 然徐而考之,則其端緒 티 : 此章之義博,故 而 子 復 有 似 更 獨

中庸或問上

及,猶 於未發之大本 立 見諸行事各得其中之名也。 之名也; 合 氏 以 而 爲 方 時 而 子固言之矣。今以其説推之,不偏不倚云 而 專 其 中 以 無 不 言之, 或問名篇之義: 行而 子所謂在中之義,未發之前 ,則取 過 未 近 無 、發,雖 無過不及者,程子所謂中之道 不 兀 過 不先不後,理之當、事之中 何也? 及之本體 不 旁,心之體、地之中 無過 則 ·及爲 未 取 不及之義,語固 有 説 日 不偏不倚之名; 無 程 ,實在於是; 0 ,二者固 過 子專 中, 不 及之可 蓋 以 名 不 不偏 不 也 偏 而 同 各有當 及其 無 名,而 矣,子 有 不倚 爲言 於已 無過 所 也 發 偏 也 也 故 乃 所 發 不 猶 倚 吕 而

> 得 此 實 樂 物之變,無 至 以 曰 相 在 無 中 而 虚 0 事之中 言和 遺彼 爲體 過 無 其中。」而 也 不及者 所 雖 用, 也 其所 往 偏 則 亦 此愚於名篇之義,所以不 而 倚 未 中 - , 是 吕 主不能 非 故 嘗 在其 氏 中 乃 有 亦云:「當其 謂之中; 無 矣。」是則二義雖 中 所 不 偏 偏 言中, 偏 倚 倚 者 於 以 也。 之 ___ 此 則 (未發, 所 事 故 含喜 心 爲,而 然 程 而 殊, · 得 應 此 怒 子 其 哀 又 於 心 所 取 萬 THI

常矣。 則 兼 不 與 於今之無 以 爲平常 無 舉 必要於 可易,若驚世駭 忌 也 日 二説 憚 0 . 庸字 者相 所 久 況 何 中 詭 而 雖 也? 之義, 異,而 反 庸 後 殊 見,不 之云,上 其 俗之事 其 日 E 程子以不易言之, 其 致 庸德之行 常常 若 _ 唯 也。 則 謂 與 久 其平常 之平常 高 而 可 但 明 不 暫 庸 謂 可 爲 而 故 之不易 對,而 易 言之謹 則直 不 可 者 . 得 而 常 子 下 驗 爲 TT 可

乎? 之禪 之事 非 則 當 以 曰 又 平 自 然 0 不 以 -常矣。 授,湯、武之放伐 然 易 君臣、父子、日 見 而 而 日 則 而 夫 亦 無 所 不 爲 雖 豊 所 謂 言 細 然 同 詭 平常, 微 也。 者, 流 異 而 合汙之謂 云 又孰若平常 用之常,推 不 所謂平 爾 將 敢 其變無 是 不 忽 爲 固 常 哉 則 淺 非 窮, 而 其 之爲 近 有 亦 至於 既 名 荷 亦 其 日 篇 曰 事 且 無 高 切 堯 當 之 之云 理之 適 難 乎 義 然, 舜 行 而 1

者 常之意焉 庸 中 篇 中 何 之中,實 庸之説,至其名篇 大 和 日 哉? 指 而 此 則 精 兼體 日 篇首章先 티: 中 粗 比 庸 之中 本 用 中和之中 末 也 和 且其 明中 無 乃 其 不 所 所 和之義 所 不 謂 其 該 中 盡 義 庸 此 者尤 和 者 雖 其 次章 而 精 廣 所 又 日 前 有 乃 以 而 中 不 於 V. 及 中 庸

曰:張子之言如何? 曰:其曰須句句

不 理 但 會 可 使 施於此 其 言 互 篇 相 也 發 明 者 0 真 讀 書 之 要

養,以 此,則 己,而 者擇 謂 求 所 濟 之罪,原其設 氏 爲 人 謂 爲 强 濟其私者,又下此一等也。 以志 人 立 善 己之私而後學者 者,程子以 立喜怒哀樂未 人者,正指此下等人爾。 日: 遽 爲窮理之 是以爲 此 於功名言之,而謂今之學者未及 而 欲 吕氏 中, 固 成 執 物,此 心 以 人爲及物之事 爲己爲 之者, 爲 地 ,猶愛而 爲欲見知於人者,是 大本,使人以 耳。 、發之中 特 不可 亦 可 人之説 而 公,視 日 坐 語 欲使學者務 以 以 ,而涉 百 之未瑩,乃 不 殊不 日 彼 爲之本 如 若 是爲 能 語 欲 何 獵 日 知夫子 矣。 求 知 徼幸, ? 未 準 所 世 X 能 先 似 知 先 使 而 至 曰 平 吕 取 聖 存 學 其 以 所 以 後 成

^{● 「}互」,原作「自」,據翻弘治本、正保本、四庫本改。

際,亦 誠 全 中 章大指 能 豊 則 復 容 中 而 學者 則有 者 致思焉 ,豈聖人之所强 以 有 切 所 亦 中 擇 可 今 取 以 時 於 感悟 學 其 立,而 者之病 間 而興起矣。 哉 未 覽 發 但 之 者 其

典, 利、貞 非全體 不能自 在 出 之謂 口 在 人之所以 天命之謂性」,言天之所以 人,雖有性 名,以見其本皆出乎天,而實不外於我也 此 萬 在 教。」何也? 或問 物萬 吾之性 性言之,則 物 而 者 已者 為性 四 性 雖 事之理, 「天命之謂性,率性之謂 時 ,命也; 所 有 也 命之分,而 也。 五. 氣禀之 以 一行,庶 日 故以 日 純 蓋天之所以 無不 仁、義、禮、智,而 吾之得乎是 粹 此 命言 類 統 其 先明性、道 萬 理 於 而 之, 化,莫不 命乎人者,是 其 則 其 而 未 則 理 間 命 賦 非 則 嘗 與 若 日 以 道, 、教之所 未 萬 蓋 由 不 四 生 荀 元 亨 在 端 是 而 物 脩 9 道 天 五 而 莫 而 則

皆循 雖鳥 待外 義、禮 乎天以 别 父子 以 不得 蓋 循 循 則 親 所 行 韓子之所云也。 則 所謂 自 得 通 其 其禮之性 之路,是 其性 獸草木之生,僅得 故 智之性 貫乎全體 求, 君臣之分,以至於敬長尊賢,亦道也 其形氣 蜂蟻 至於仁 尤 生者 性者 智而 可 所 而 而 之君 謂 以 無 則所 各 己。 之所 則 見天命之本 無 民愛物、皆道 所 則 則 道者,不假 有自 ,然其知覺運 事 恭敬辭 「率性之謂道」,言循 不 臣 是 謂 循 事 理之不具,故所謂 備。 偏 非 ,豺獺之報 道 然之理 其仁之性 物物 ,又反有 邪 也。 形氣之偏, 所謂 讓之節文,皆道 正 人爲, 然 也 莫不 一之分 蓋 焉。 動 性 初 天 以 本 1者,無 而 循其義之性 自然,各 榮悴開 則自 無 别 命 存 至 雎 無 間 亦 之 於 而 其 道者 所 父 鳩 性 虎 義 不 一物之 其 道 落 不周 子之 能 之 也 有 所 狼 理 也 得 有 之 亦 有 所

不異者 其 殺 粹 是 不能 言 不 免 皆理之自然,而 以 在 而 有 天 前 及者 前 前 别 無 不 有 以 形 道 是 及, 以 其貴賤 全 氣之正 私 人因 所 者 使 [則所 爲 亦豈 理 是以是以 適 昏 意 之各 之品 則 有 渾 而 亦 乎所 人 是 謂 然, 於 得 人之所 以 未 之等 錯 欲 道 所 然 教 賢智者或 節 盡 取 於 嘗 雜 行之宜。 或 無 而 謂 其 人物 也 防 其 中 此 不 前 生 所 得 品 道 範 清 情 而 焉 者 在 其 虧 者 之所 節 爲 無 蓋 使之各盡 濁 以 是 間 則仁 哉 闕 之, 以 亦 失 天 厚 蓋 7 惟聖人之 因 也 前 同 命 或 全其所受之正; 之 薄 教 亦 以 有 故 之爲 得 之性 不 调 之 於 有 於 以 能 7 是 脩 者 其分, 能 所 禀 所 天 法 辨 因 贵 教 愚 率 道 也 謂 無 乖 下, 心 其 其 垂 亦 之謂 有 不肖者 7 失 -性之道 性 戾 清 人雖 道 訓 待 則 親 使 有 矣 於 者 舛 於 之 教, 於 義 疏 夫 明 不 彼 逆, 性 不 天 或 能 得 人 有 之 所 純 之 调

守,以 失,則 之説 是 以 始 成 遂 因 有 備 義 而 而 命 肵 爲 老 一面 之説 其 其 以 教 知,豈 ,然學者能因 是三言著於 外乎人之所受乎 天 至於天下 以 人無 别 生,皆有政 材質之宜 行 地 氏 公去其 禮之爲教得 則 釋 之道,而 矣 而 所 知 氏 則 獨 知 不 謂 我 所 知 名 人欲之私 爲之制 之物 愚, 差 無者非 之所得 謂 天 義 流篇 首 以 事 空者 之 其 致 事 則 之 之 致 則 所指 矣 所 間 其 無 知 度文爲 天者 道 雖 施 其 乎 亦 之爲 非 大 彌 以 而 而 矣 用 天者, 順 性 前 焉 小 爲之開 日 與 縫 已 復乎天 而 其 姑 矣; 皆 輔 教 ,使之有 我 哉 制其取 反身以驗之,則 有 强爲之也。 所 此 以 攢 明 者 無 得 以 欲 則 導禁 有 釋 之功, 矣。 理 有 得 蓋 聖人 無 以 夫三者 用 違 物之不該 之正 所持 以守 乎脩道 得 有 之節 夫如 止 其 乎 得 然 所 理 一,使之 所 循 率 之 乎 之 子 亦 以 而 推 據 不 > 天 思 未 財 其

之力 因 用 固 偏 利 有 説 之間。 一言 其 有之不 曲 老 則 而 則 所甚易之不能已者 皆非 凡 去 知 佛之清 其 而脩道之教,又將 夫天命之性 聖人之所 世 可 信 所以 所 昧 本 之 者 浄 無 爲 訓 寂 而益致 以 教 背 詁 滅 教我 ,率性之道 矣。 詞 其 與與 所 章 其學問 而 夫百家衆技之支 者 由 由 一,管、 至 益 莫 是 我 難 致 ,豈不 以 而後立 商 思辨 非 其 而 往 之 持 大 從 權 昭 之 因 守 其 其 矣。 然 推 功 其 謀 所 所 行 所 離 古 H 功 其

節 爲 旧 之發」以 之所以得名 處,指其自然發 曰 私 謂 程子 意 日 有 雖 小 以 下,至「安 之論 知 受天 率 不 性 非 所 失 撓 地 率性,正 脩 見 指 其 之中 故與 能 道 各 脩 所 之説 有 致是」一 爲 受乎天 以 天 條 而 就 生, 地 理 言 不 私 不 者 而 同 也 意 者 節, 相 梏 而 人欲 孰 似 然後 於 亦 吕 言 爲 而 以 形 其 氏 未 發 是 爲 良 體 精 見 萌 不 耶 文 道 中 1 道 之

> 性之道 若能 率 之, 太 下 得 此 却 達之天下,傳之後世者 至 氏 則 口 非《論語》本文之意耳。 之意矣。 繁複 於脩 爲 性 所謂率 其旨,故其門人亦多祖之,但 脩之,各得其 似未合子思本文之意。 所 傳之後世,所以 非復子思 謂道 言 而 心 處 似 誠 行 道 而 , 雖已· 之而 者, 則程 游氏 失本文之意耳。 求 ,已失其指,而 亦不親切 之,自 又在脩爲之後 已者 程 所 分,而 中 子養之以 謂 子 然 節 又當脩 所 無容 也 似 不 引舜 而 指 中 亦 , 得 於此 吕氏 所 私 人 福 皆 不 道 禀 事 獨 欲 改 之。 焉 脩 有吕 遠 所 而 不 又 以 本 其 未 而 但 則 能 謂 所 通 7 推本之,以爲 而 又 旧 反 萌 道 教焉 無 先 引舜 結之者 氏 求復之云 以 條 由 欲 其 自 之病 過 王 在 達 所 時 本 教 然 不及 制 事 我 之天 位 説 謂 發 以 則 禮 也 爲 郊 水 循 見 得

曰:楊氏所論王氏之失,如何? 曰:

性 氏 之道 於意 云,而 指爲王氏之失,不惟 王 之云也 以 氏 猶 遁天倍 爲 有不平,而 之言 楊 日 其 上 順 氏 E 帝 性 固 又自言 情 在 降 命之 爲 爲 反爲至公之累矣。 天爲命,在 衷 多 非 之,蓋 理 云 病 性 一文意 似同 爾 一,則 然 豈 此 無 又 浴 人爲性, 不若 悖 真 所 亦 而 不 以 於 云 譏 楊 理 爲 相 天 裸裎 且以 有 使 氏 似 則 程 我 人欲 或 亦亦 率 若 今乃 子 使 有 性 非 游 近 亦 之 是

意 過 言 日 河 • 此 則 此非 以 日 但 於吕 以 楊 往 可 此 不 後 然則 隔 則 及 語 稱 學 游 壁 非 證 其 吕 所 後學 前 之,則其 聽 深 敢 游 潛 亦每 言 今且 所 縝 楊、 也 敢 密 高 稱 侯 言 熟 於 下 其 但 四 也 復其 淺 穎 以 子 游 深 悟 程 之説 稱 言 亦 子 其 謂 可 之言 究 侯 穎 孰 見 覈 氏 悟 優 矣。 其 之 論 温

或問:既曰「道也者,不可須臾離也,可

也 隨 無 之間 莫顯 在 懼 微 平 之, 以全其 兩 率性之道 離 故 其 不 乎 其 非 事 無時 人所 顯 乎 其 也。 所 蓋 念之方 道 君子 微 著,又有 所 所 不 也 不 ,以明 聞 謂 其先言道 不 不 然,學者當先其 而 慎 是 道 睹 萌 見,而 本然之體 矣, 君 故 其 者 不 而 由 甚於他 子 君 獨 率 而 聞 教而 致 必 子 也, 己獨 不 又 者 察 性 謹 戒 可 日 入者,其 而 焉 也。 慎 其 人之知者, 何 離 知之,則 所 「莫 以以 已 獨 平 也 以 事之未然 性性 而 又言莫見 者 見 其 ? 言 謹 君子 (始當. 平 所 無 道 其 所 其 日 隱 不 不 之 善 學 以 事 心 0 如 睹 有 言 此 莫 恶 者 之纖 無 而 戒 乎 此 大 顯 故 之 尤 隱 周 所 謹 恐 蓋 懼 恐 論 平 當 道 幾 釆 微 防 不

0

[「]氏」,正德本、正保本、四庫本作「生」。

豪忽之不谨一。❷ 「先其事之未然」,正德本、正保本、四庫本作「無須

心目 其 然 間 者 非 口 不 貫 道 無 道 而 心 八之間)所 違 離者 率性之謂 暫離 可 徹古今, 也 力之爲,而 不在,大而父子君臣 因 循之則治 之間 禽 物 離 不 、與之頃 自爲 其 「,雖未; 及 淵 者 是 也。 而 不 見 也 乃 不 而 流 常 可 我 而取諸至 何 矣。 若 相 品 天下人物之所 嘗 於 若 恐 離 • 莫不 ,持守工夫一 , 失之則亂 遠 管矣,是則 節 其 者而 人欲之私 見 懼 不在我,而 則 哉 聖人之所脩 之 可 其 平 各 是 也 以 持守 近 其 有 不 人 ; 是 暫 小小 口 耳 力 當 君子之 則 蓋 之也 以君子戒慎乎其 合 Ż 離 雖 私 然 有不 人欲間 而 뻬 常 共 無 暫離 所 者 智 日 不 陷 以 動 不 由 須 不 有 之 易 至 於禽獸之域 爲 静 而 所 、與之 外 充塞 是 及 人之 之,則 所 之理 教者 食 乎 不敢 由 而 則 以 聞 爲 息 道 吾 頃 所 以 H 形 者 天 不 有 瞭 爲 因 自 之 所 亦 謂 用 口 地 然 H 而 判 學 其 爲 得 謂 假 須 不 而 0

月 图 既 其 之差而 之實,必 隱之間 言 若《書》之言防 久,則其見於聲音容 古 不 有 而 及 微 甚於他人之知矣。 既 人,而 己 無 E 事 如 於 所 時 親 則 已知之, 已也 乃 色、 獨 不 此 此 有暴 不 而 然, 矣, 聞 心 必 他 日 發於聲 常常 著 謹 而 是 則 人 怨,而 聽 是 則 明, 者 皆 細 又 而 之 以 其 於 微之事 常情 以 不 所 然 無 不 君 而 毫髮之間 謂 日 可 貌 不 爲 又況既 不 聲 子 後 揜 之 所 道 見, 物蔽 知吾 既 不 有 乃 視 間 者 忽 古 見 戒 以 而 於 以以 心之靈 無 他 有 懼 又 發 是 用 己 而 無 所 是心 無 人之所 圖 爲 平 不 於 其 於 所 形 不 所 口 此 耳 11-行 獨 力 在 藏 潛 皎皎 以 目 於 也 蓋 尤 事 見 禮 不 遁 之 伏 欺 而 不 不 念 施 如 聞 **>** 敢 所 慮 之 道 出出 夫 待 之 V 天 爲

事無所損益」。「道自爲道,我自爲我」,正德本、正保本、四庫本作「

四

六

必若 美,而 謹 微 聞 也。 此 是 破 容於不異矣,若其 有先於 即即 則 碎 致 獨 無 ,遏人欲、存天理之實事。 不 支離 睹, 家皆不之察,獨 是之重 適 日 其 不愧 則 爲謹 是要切之處 無 加 謹 此 而 恐懼 爲言,以見君子之學,必由 純 是 須 諸家 者, 焉 不 之 屋 其 獨之意,子乃分之以 與之間 平 在 甚 複 漏 不 義 必 所 亦 之説 矣, 耶? 聞 耶 理 使 謹 莫 ? 同 則 之發 其 亦 , 尤在 矣。 而 者 有 ,皆以 兩言 爲一 程 幾 又言 尤 日 是 切 且. 子嘗有「不 . 微之際,無 二者相 則下 無 於 此 於隱 在 事 之,正 既言 戒謹 莫 處 此 書 於 則 見 蓋體 而 學之功 者。 卒章 微 獨 道 平 不 須,皆反 與此 其爲 不謹 爲 也 也。 不 睹, 隱 兩 道之功, 愧屋 故 可 言 莫 矣,又言 事 相 潛 既 恐懼 此 子 是 盡 毫 無 離 首 人 思 言 躬 雖 顯 而 漏 又 固 善 尾 莫 何 戒 乎 則 乃 不 人 於 爲 欲 與 伏 不 全

> 耳。 複 在 意 於此 隱 獨 處 故 日 與 謹 血 字 0 則 者, 無 上言 獨 偏 脉 ,莫顯乎 幽隱之間 其所 是固 滯 幽隱之地也。 曰 : 是持養氣象」之言 所不 是持守之功 理 人之所 道 m 其 不 子 無 不 微」 ·用其 分明。 已分爲 睹 又安知 所 也 可 不 不 當 離, (戒懼) 而 且 睹 聞 亦 如 兩 雖 下言君子之所 無所 是其 而 者, 不 不 甚 日 事 免 闡 下言君 矣 睹 而極言之以 是 己之所不 ,其於二 於 施 語 也 不聞之不 而 兩 破碎之譏 [勢自 於平常之處, 當 條 故 子 時 者皆 上言 者之間 相 自 聽 睹 謹 至於此 唱 其 爲 者 爲謹 者, 「莫 不 和 平常之 有 獨 而 各有 聞 見 特 平 未 其 獨 尤 而 也 也 在 加 > 平 繁 車

及游 程子不若三家之密,是固若有不同者矣。 理言之,則三家不若程子 日 楊 氏 程 不 子 同 所 謂隱 而 子 微之際,若 之盡 之, 何 ,以心言之, 耶 與 日 氏 日 改 則 本 以

則 必 有 亦 是 初 理 無 然 異 後 指 有 也 是 心, 合 而言 有 是 之, 心 而 亦 後 何 有 不 是 可 理 之

矣。 是 觀 得 間 其 未 昭 不 又 昭 非《論》《孟》本文之意。 於 以 者 用 盡 口 . 得 之甚 别 之準 乃欲 而 此 萌 意深 耳。 離者 而 於言了,「 以以 又 不 動 日 可 於其 得 他 哉 則 處 其 求見 使人戒懼 心 正 之, 説 欺,感之而 論 也。 必 如 間 然經文 天地之中,性 夫所 但專 而 惟 若 有 何 耳,非 求 虚 楊 ? 事 氏 謂 乎 此 心 以 氏 焉」,「參前 所 既 中 此 日 以 能 欲 過 無 指 -者,而 . 心 失 , 使 求 應 不 適 至 不 吕 其指, 人虚 及爲 者 與 見 謂 不使 非 則 睹 氏 天 此 遂 隱微之間 道 庶 則固 不 舊 倚 空其 道 執 離 人欲之私 之云則 一心也,豈 而 聞 乎 本 衡 之,以 道 所引 見之」, 二之語 隱 心之謂 所 心,反 節 微 則 論 有 善 用 爲 之 最 似 道

> 之間 既知 聽、舉 其 旨也 之準 己 使學者誤謂 離 道 矣, 而上下之别,而墮於釋氏 也。 爲 世 此 之,則 則,不可頃 害 履 不能 其 百姓特日 若曰 若便指 將 ,皆物 言 有 違 雖猖 似 所謂 道 不 物 亦 物以 無 也 可 用 刻去之而 狂 而 有 不在 ,其所以 道者,不外乎 勝言 獨立 而 妄行,亦 所 爲道。 不 未 雖 知 ,是以 1者,不 盡 如 欲 作 耳 不 而 無 此 由 離 日 則 蓋 用 無 物 之義 之而 但 適 則 衣 是性 人 適 是 一文義 而 是《中 不 而 食、 不 不 理 不 能 」之失,目 惟 不 人 爲 進 可 作 之失 在 昧 頃 有 道, 得 則 息 於 刻 天 形 地 視 理 而 則 吾 m

不能 程 本, 集 氏 解 則 及 明 無 0 雖嘗辨之, 也 道 疑 吕 夫子 矣。 氏 奈 之書, 之言 何 所 而 謂 論者 而 今有二 改 日 爲 本 猶 之序 是 則 或 本,子之 則 陳 以 者 愚 爲 忠 「, 子 嘗 肅 非 聞 於 所 程 公 之 夫子 謂 石 所 氏 謂

門,師 切者 間 序,蓋 約 言考之,則二 臆 此 不 以 相 也 失其 況 仲 合。 及 所聞 表 私 而 裏,如 校之明 改 見 之於 改 改 ,又不翅碔砆之與 聖則 爲傳 未 不 矣。 本 本 蓋 告之,然後自覺其 生 本 免 異 厭 矣。 師 者 幾叟之師 程子之 者 指 反 人之形 舌 也 道 聖 前 近見胡 書詳 有 豊可 浮 所 其 平日 之詳 則 刻 辨 又 誤 後 本 未 貌 皆 露 略 内 所 而 之言 所 者 不察 能 楊 ,昔腴 峭 雖 親 弟 得 失之,及 而 脩 仲 美 改 氏 急之 或 見 有 之别 而 所 而 而 玉 平 於 氏 非 意 不 奪 而 今 實 記 劉 遽 易 太學 也 其 病 於 同 哉 親 瘠 與 侯 則 其 本 謂 從 舊 略 聞 李之於幾 師 吕 至 然 其 兄 之 也 講 於此 而 容 者 之,是 聖語 若 氏 於 故 其 書 孫 兩 堂 而 其 同 尚 語 E 幾 陳 詞 其 更 之 自 部 而 豊 以 叟 公 猶 然 多 義 哉 意 出 亦 行 初 位 詞 叟, 之 有 之 實 其 與 具 神 程 精 雖 胸 而 本 不

之, 善 故 情 之 無 無 喜怒、 皆 明 物 也者 皆 辨 該,故曰 不 一,而 之正 以聖 德 所 所 不 由 育 中 焉 曰「天下之達道 則 外於 ·節謂 哀 教 焉。」 道 乖 偏 或 ,天下之達 天理 則 具 戾,故 樂 問 ,道之用 倚 而 之體 於 其 「天下之大本 之 吾 何 而 入者,其始之所發端 各 道之淺深 昧 故 人心者, 和。 喜 心 有 也 有 也 而 謂 謂 也。 加 怒哀 大本 攸當 道 以 也, 之中 之 中 損 也。 和 日 以 其 也者,天下 蓋 其 也 樂之 有 . 固 其古今人 天 天命之性 體 方其 致 蓋 及其 此 所 謂 地 不 然 用 中 不立 推 天 未 謂 之 問 萬 和 之全,本 静 未 發 本 發 命之性 之 中 物之 而 ,終之 發 天 之大 而 矣 和 天 者 而 謂 物 可 渾 不 命 之 者 皆 地 萬 之 理 知 所 動 知 本 純純 中 皆 得 所 之 理 位 矣 所 然 所 無 以 所 也 而 其 具 至 性 焉 如 共 在 以 狀 發 所 不 以 萬 焉 極 中 由 著 知 存 性 和 而

故 問 的 此 充塞 動 之不中,則吾心正 其至之謂。 謬,而行之每不違焉,則爲有以致其 以益 道之行,日 常 善惡之幾者 者,愈嚴 君子自 所 此 静各止 之極功 萬 事之不和 不失焉,則爲有以致其中, 以 化 無 章 固矣,尤於隱微幽獨之際,而 節之,則人欲 者 之本原 雖 間 其不睹不聞之前 之歸 愈 固 其所, 爲 以益 驩 敬,以至於無 致焉 ,則吾氣 有非 欣 愈精愈密,以 篇 '一心之妙用 亦學者 而 交通 廣矣。 而 開卷之首,然子思之言,亦 始學所當 天地 ,而天地之心亦正,故陰陽 肆 極其至,至於静 順,而天 而 立志 而 於此乎位矣; 達 致者,用力推 萬 道 毫之偏 「議者。 而 聖神 至於無 之初 物 有 地之氣亦 而大本之立 所 於此 所 以 所 不 之能 倚,而守 然射者之 所以 戒 行 當 乎育 而 和,而 毫 動 致 謹 無 矣。 知 事 順 而 之 謹 恐 而 矣。 也 學 故 息 差 無 極 達 其 H 之 懼 惟

而

必 至 此 而 後 已焉 ,其指

之實 體 聽,視聽之由耳目 用之名,則安得不二? 日 則此 . 然則 爲彼體,彼爲 中 和果二 7,初非 有二 此用 物乎 如如 物 察 也 其 耳 日 目 0 之 體 觀 能 其 ____

用

視

然則 凡若 不必天 是理 是事 誣哉 胎殰 乎中 子獨 不若直以事言,而理 失其 彼彼 當其不位不育之時 也 此 卵 以其 1 和者多矣,天地之位,萬物之育 曰 : 者,豈非 殈 翻 常耶? 以 今以事言者 天地位 ,則不 事 但其言之不 地覆,然後爲不位矣;兵 理言 論 1者,亦 必 曰 : 不 一萬物 然則自古衰亂之世 中 人消物 三辰 在 不 備 非 固 其 育 和 以爲 ,有以啓後學之疑 以 失行 ,諸家皆以 豊 中之爲 盡,然後爲 之所致,而 爲 無聖賢 有 無 Щ 是 盡 是 崩 理 耳。 事 亂 ',豈以 一,所以]]] 其 不育矣。 生 又安可 而 而 M 竭 理 於其 後 徒 曰 荒 言 有 有 是 病 則

之所至 □ --其間 吾身之 也哉? 者 中 將 之,則夫災異之變,又豈 世 天 天下雖治,而吾身之天地 本 二,何 地 也 其 而 不又爲 而 不 不 所 其 者之爲 未有一 家 天 而 位 足 以 但能 耶 所 於 破 然 m 地 止 以 天地 碎 國 和 耳 萬 萬 則 致中和於一身,則天下 致 之甚 實 日 者 ,莫不皆然,此 物, 物自育者 各 夫 已位而 亦未 0 事 彼達 有 不害 中 善惡 耶 可 所 和 ? 也, 而 從來, 有 者 爲 感 萬物不育者, 窮 也。 在 萬物,不害爲 能 日 通之 安泰; 而 而 上 乃 致 0 分中 又不 特據其 而 世 者 不 在 和 理,亦 不可 既 能 下者所 固未有 而 其 和 可 曰 有 不 以 不 不 雖亂 紊 效 有 及 以 本 亦 能 屬 知 乖 耳 能 其 救 而 未 於 能 以 耳 焉 錯 者 力 致 救 病 其 推 有 中 而

舉 中 而 者 合之於和 子思之言中 和 也,中 ,然則又將何以 節 也,天下 和 如 此 一之達 而 周子之言則 爲 道 天下之大 也,乃

> 首已 也。 加 本 不 也 周 相 辨之矣,學者 耶 悖焉者可也 ? 子之所謂 日 子 中, 思之所 涵 以 泳 時 而 中 謂 别 而 中 識 言 之, 以 也 未 見 其 愚 發 於 並 而

吕氏問 皆指 時,在 指 定 心悉意 聖賢之言,固 則 言之未當,學者 也 不 文皆以不偏不倚爲言 是 無無 時 也 及,則方此之時, 中 已 其 日 中 過 之中, 發 書 其説 以 之之審,而 之義 不及之名 程、吕 而言 蓋 審 其 不完矣。 中字,因 有 ,謂之無所 而 歸 問 何 而後書乃自 發 與 答 不完之中,又失 自 在 未 端 亦 未 如 中 過 可 而 而 然 何 有 一之義 何 不及 執 未 知之乎? 則 偏 程子 自 中 ? 竟 其 此 倚 而 節 以 少 者 而 ___ 語 日 則 初 為未 立 不 異。 言,而 學 者 立 0 乎 叮 謂 中 考之文 名, 此書 以 凡言 者 當。 節 亦 謂 蓋 此 之可 尤 又 遽 或未 未 又其 之 心者 似 當 又 則 向 無 以 發 此 非 知 言 并 之 爲 虚 调

夫心 後 也? 也。 吕説 非未 所以 則 不有 云, 孟 發之時 爲定 既思即是已發」之説矣。 可 亦 子 固 可 皆 非 見 亦 發之中也。 所指赤子之心 已發之時,不以老稚賢愚而 爲 行之,蓋其 論 日: 則程 以 日 己 當詳之,未 ,則程子 得 獨赤子之心 ,若未發,則 然者,獨 也。 聖人之心爲異乎赤子之心矣,然則 然則程子卒以赤子之心爲已發, 而 發之一言,而 衆人之心,莫不有未發之時,亦 子之説《書》也 改也。 吕 氏 所以答蘇季明之問,又已 所謂中者,乃指時中之中 不知其於此 吕 又 可見 純 純 引允 티 : 爲 氏又謂 然矣。 以赤子之心爲 無僞 其 無僞又不足以名之, 程子「明鏡 固 執 不 凡此皆其 求之喜怒哀樂 何故 厥 者 辨 是以程子 謂 中 ,乃因其 而 「允執厥 有别也。 略 遽 以 止水」之 無 以 決不以 明 已發, 所 ,雖改 爲 發 未 辨 中 但 莫 未 而 是 有 何 而 發

> 見,耳 問 之心 既 時 前 未 爲 此 可 物 能 心 矣,但其答蘇 但 發而 有 則 知覺者 不在焉, 旒黈纊之説參之,●其誤必矣。 不 水 其 9 鏡之 以 知覺 相 爲 爲 可 一之有 爲未有喜怒哀樂之偏耳,若其目 爲《坤 言也。 9 對 説 未 而 值 體 發 岩 聞 而 而 便 亦 如如 者 学 則當 季明之後章 既 未 可言 遂 不 以 티: 耶 有 耳 發 廢 口 才 純 ? 所知 静, 無 則 曉。 耳目之用 諸 思 陰 愈益 聞 爲 日 説 即 而 而 覺 目 水 : 蓋 是已 如 不 精 引《復》以 記 也。 鏡 聖人之心 當 無 爲 明 何 之 哉? 見之答,以下 至静 録 無 一發爲《 ? 而 故以 用,亦 陽 多失本真, 不 티 : 之 則 可 蓋 其言 動 爲静 比 時 亂 口 程 未 未 非 見 **>** ,豈若 發之 之有 子 獨 發 則 静 中 但 天 而 文 備 指 未 有 地 時 則 便 有

須

見須聞」。 前 旒 黈 纊 IE 德 本、 正 保 本、 四 庫 本 作 若 無 事 時

Ŧī.

之言 思慮 其答 至於 之者 嘗以是而 以以 亦亦 古 旒 則 時 门,決不 人之 動字 不中 黈 其 視 不 動 將何 皆精當 則語 爲 聰 所 雜 定之問 上 行 遂 静 求 明 者 聽 塞 制 如 雖要 以 戒,尊之有禁,以 遂 不行 祭服 字 静 圃 陽 是 使之 致 所 致其 之云, 如 之問 E 之過 其 切 但其 謂 以 聾 不 動 前 誠 善 至若 飲 精 而 瞽 爲《 無 也 意 則問 答 日 觀 也。 設 則 其 見 當 敬 然非 者 旒 交於鬼神 無 至其答過 是 聞 祭 何 若使當祭之時 黈 事 禮容樂節皆 也 祀 爲 以 時 以 0 酒 時 用 須 雖 若曰 是爲 戒, 哉 無 功 見 日 而 之問 所見 然初 履之有 欲 須 真 不 留 足 其 聞 程 不 答 聞 之 真 之 子 能 未 不 使其 文所謂 者 其 求之説 之。 使 喜怒 如 未 發 其 鏡 病 而 執 根 其 小 1

引屢空、貨殖 之明, 之前 哀樂 Ě 致中和者, 之,是以屢言 也 日 有 有 J, 其不 由空 各有 差 偏 則宜 如 在 沈 倚 水 欲 及 而後見 而 攸 之止 陷 其 於 心 至於 E 當 不 亦 而 未 爲 未 之而 發之前 入於浮屠者幾 此章之説 待 日 甚 則 夫中 事 則 當 者 著 有 又 但 物 其未 意 へ 當 敬 病 如 之湮 者之情 · 是 當敬 之來 其 是之 愈甚。 推 求 間 於 尤 發 又 求 没者 以 以 紕 前 見 彼 説 而 多 察之,而 此 此 存 漏 是 希 章 此 夫 殊 瞭 也 可 心 顯 之,而不 心 遂不 以 矣。 蓋 不 所 虚 發見 疑 至 致 知 謂 心 兩 心 且 虚 復 此 以 失 如 尚 郷 中 E 不

知

則

又

有

若

不

相

值

而

口

疑

者

大抵

此

條

最

蓋

聽

他

人之問

前

從旁

竊記

非

惟

未

爲

約

全

一被

得

廣

則

説

⁰ 黈」,正 德本、正保本、 四庫本作

謂「未 發,本 又當 不得 之間矣,一有求之之心 子譏之以 用之間 勿失, 一矣,又何中 則 理 有 執 其 須於 中 紊 此 即 而 差 自 慟 體之」,「 發之時, 正 事 見 在 亂 未發之中耶 其喜 謂 則 寂 固 未發之際, 無人欲之私焉 之, 即 爲 其 然 喜 援 無 有 (中」者 物 不 怒 固 之可 自 況 引 所 識 隨 中固自若」, 執之」, 以心驗之,則 欲 然之機,不假 乖 不 無 大 感 得乎? 從 樂 相 刺, 差 本,豈 所 能 ? 丽 矣。 而 Ė 似 事 則 體 而 ,則發必中節矣」。 應,亦安得 ,則是便爲已發, 此 執 發之處 於 不勝其 亦吕 所 之,則 爲 然 此 不 疑與 執 且夫未發已發 謂 信 吕 義 中之義 細 人力。 氏 中 哉 氏 理之根本 及其 推 程子所云「言 見得 其 之失也。 可 塊然 之, 之説 爲 疑 自見 當發 其 方其 楊氏 也。 偏 未 則 所 日 不 發之 固 倚 程 動, 於 其 又 執 所 程 以 則 未 已 子 驗 H 亦 時,其 爾 諱 祖 子

條

加

此

而

若楊氏之云中固自若,而又引莊周 理,發見在此 氏之言,多雜 凡所云爲,皆不復出於中心之誠矣。 之言以明之,則是以爲聖人方當喜怒哀樂之 及之差,乃 當論其中 心漠然同 時 否,不當論其 於老、佛、故 中 事一 之中 於 木 石 物之中,各無 而 加 非 有 其 渾 無 姑外示如此之形 失 然 類 則至 在 如 偏 此 出怒不 之中 論 大抵 倚 也 過 其 也 楊 不

甚

乎? 名,死 夫子 首章 考, 其字者也 爵 皇 夫子之意,而子思言之,故 或問 不 祖 之言以證 **□** 則諡 亦 應謚 伯 名之 某 古者生無爵 而 此其稱「仲 前 父」,乃直 諱 而 故《儀 之也。 其名,則 子孫又不 己 矣。 禮 以 尼曰」; 死 曰 : 周 固 饋 字 得 無 食之祝 己 人 而 孫 稱 益 彌文矣,然 冠 面 其字 何 此 可 則 則子 命 也 以 以 詞 字 之。 ? 以别之, 字 下, 日 孫 而 其 尊 之 況 又 日 引 於 滴 有 其 袓 孔

又 孔 將 通 姓 謂 號 之 之 也 通 何 稱 哉 不 若曰 日 若 仲 日 夫子, 尼 孔 子 而 何以 則又當 則 外之之 哉 時 衆人 辭 相 而

心 得 我 理 者 一,蓋 而 每 中 何 反 曰 天命 戒 也 乎 謹 ? 此,而 君 人則 恐懼 人心之正 子 日 所 不 不 以 中 知有此 以 中 無 庸 中 不常 也。 失其 者 庸 惟君子 無過 也 當 而 小人之所 無 然 不 所 故 及 爲 忌 能 能 愐 憚 平常 以 隨 知 故 其 反 時 之 之 其 在 而

有若 不煩 之不 庸 其 字,蓋疊上文之語 所 前 篇之通 此 增 謂 疑 者 中 字 Ė 如 庸, 體 矣 而 小人之中庸」, 漢之胡 知 ,但以 理 是乃 則 其 亦 此章乃引夫子所言之首章,且 爲 通 所以 文勢考之,則恐未然。 廣,唐之吕温、 非 然諸 矣。 乃 爲無忌憚 敢 説 日 王 自 皆謂 肅 小人之情 以 柳宗 爲 也 小 程 中 子 X 庸 如 元 實 悉 者 狀 此 蓋 反 加 而 論 古 則 則 居 反 中

> 以警 然所 又遽 考,它不能 據 正,而未必肅之所增,程子從之,亦不爲 句之義以 方言 及 當 此 略 而 臆決 君子中 意之隱 以 乎 别生它說也 舉 大端 發明小人之情狀,則 鄉 也。 盡 原 盡 其 庸 微 亂德之姦矣。 録 諸説皆從鄭 意 也。 而 也 分别君子小人之 ,不應偏 小人反之,其下且當平 若論 故 疑王肅所傳之本爲得其 解 本,雖 章之語 亦 上句 今存 曲 非 趣 吕氏 盡 而 脉 其妙, 不解 本文之意 白 以 則 未 下句 無 而 解 上 當 文 觀 足 所 兩 遽

也 耳。 下 中 何 中 章 庸 如 庸 且《論 一之意 ? 或問 自 之德,而 兩 章 能 日 各是 擇 語 而 中 不然。 民鮮能久」,或以 以 泛論 無 發 庸 下文「不 能字。 明 者 之,未 言之,乃 此 義,不當遽以 章 而 能 遽 方 所 朞 及 承 謂 口 月 爲 夫 上章 矣者 責 守 民 不能 其 鮮 彼 小 者 不 能 又已 而 久也 證 人反 能 久於 證 久 然 此

弱 蓋 程 各 説 應雜 取之 安得 矣。 而 則 論 徐次 盡 不察乎此, 子 意 其 則 語》解 侯氏 其一 能 亦有久行之説, 屬 置 而著於此,則其次第行列,決有 有 與 故 「春月」之章而 日 則 手 「不能 讀 次序 無 而 動 有 其意之所屬 程子釋之,以爲民鮮有 章之意 此 錯 所謂 民 差謬。 足 以 而 者先因其文之所斷,以 書 陳之也 乎? 履 切 然吕 程 青月守」者不 非 無 中 子 前 非 不 學 氏 之手 而 曰: 0 自省焉,② 時 識 中 者 所 自 則疑 不失夫全篇之旨矣。 ,以考相承之序,則有 故凡此 之言也,章之先 者 中 言之固 不 謂 筆 世 也。 能 厭 教 出於門人之所記 故鮮 則其 常喜 同,文意 古 衰 書之例 則亦足以 守 能 之 無序矣,子思 諸家之説 此中 疎 之病 久,若 新 求本章 闊 質薄 條, 庸之德 意謂,不 ,皆文斷 益 V 讀 後, 益 . 識 有 明 然 之 É 其 得 警 者 氣 古 乃 以 又

> 中 矣。 而 不 如 E 可 若 離 一識得 則 庶幾 中, 則手 耳 動足履皆 有自 然之

道之所 ⊟ : 行君子之所不必行者,賢者之過 者之不及乎 也。 其互言之,何 賢不肖之過不及,宜若道之所以 曰: 變,能知君子之所 荷 以 智愚之過不及,宜若道之所以 此 賤 道 昏 或問 不 爲 以 昧蹇淺,不 亦 不 不足行,愚者又不知 承 能行君子之所當行 此 中 行 È 其言 也? 也。 也 章 不必 能知君子之所當 知之過 民 道 刻意尚行,驚 日: 之 鮮 知者, 測 不 能 者 度 行 久 知者之過 深 不 者 所 既 矣」之 不行 平 微 明 不 世 以 惟 不 中 知者, 駭 行 知 揣 肖者之 也 明也 何 意 也 俗 也 是 乎 摩 也 也 務 愚 中 今 鬼 能 此 事

汙

而

教」, 原脱 據正德本、正 保 本 四 庫

四 庫

之所以 知 道 至 用 道 不 之中, 八心之正 之間 味 而 爲 及 也 失之耳 不 乎 特行 足 不 中 則必守之而 知,不 明 知味之正 ,當然不易之理 也 也 而 故 賢 不 肖者又不求 然道之所 之過 日 著。習而 . 不失矣 則 者 必 人莫 嗜之而 · 固 既 謂 不察,是以 不 所 惟 中 不 飲 以 者 行 外 不 食 知 是 乎人生 是乃 厭 也 也 務 不 矣 鮮 知 此 天 而 其 日 知 能 命 道 以

大,而 之所 行 其 此 知 者 其孰 行程 中 如 亦 則恐 以 此 承上章之意 或 非 子 則 行 問 爲 以 非愚 非 他 則 過 也 文 爲 非 人之所及 此 孰爲不 執 者之不及矣。 知者之過矣; 意 其 蓋 持過 矣。 稱舜之大知 不自恃其 ,言如舜之知 及,而 也。 、不及之兩 蓋 當 兩 衆 孰 聰明 此舜 又能 端之説 爲 論 而 中 何 不 端,使民 之 執 而 同 不 也 也 樂取 吕 知 兩 之際 過 故 ? 所 端 必 以 則 不 楊 諸 而 道 兼 未 得 爲 爲 用 人

> 所當 之爲過、不及, 至 總 當 衆 行。 ,然後有以 説 以 若其 執 其 而 未然,則 知夫 不 不可 百 無過、不及之在此 之 行哉 又安能 極 處 先識 而 求 其 彼 義 兩 前 端 理 之 在

失之也。 如《詩》之興 或問 七章之説。 耳。 或以 二句 曰 : 各爲 此 以 E 句 事 言之, 起 下 句 則

之,則 得,據 티 : 矣。 吕 子 賢者之過 過,則道之所 上 所 氏 章「不能 諸説 引未 之論 或問 然 既 而 則 守 竭 如何? 矣; . 兹 顔子,有 見其 吾 之,則拳拳服 朞 此 賢 才而 以 月 服 其 (止),皆 也, 明 守 膺 稱 日: 也。 二者 不敢緩,此 弗 口 乃 失 0 之賢, 非 程 其 而 蓋 膺 隨 則 子 言 所 能 論語 而不 其 非不肖 所引 屢 擇乎 以 何 如 所以 所 ジ之本 敢失 爲 也 口 至, 中 ? 知 之 恍 者之 庸 惚前 賢 空 也 盡 意 勉 日 不 其 歟 而 則 . 承 所 惟 張 及 ? 無 不 後 進

深潛鎮 也 加 求見聖人之止」一句,文義亦未 不 此 可 中庸豈 密之意,學者所宜 爲 數言者 象,求見聖人之止,欲罷 可 擇 乃爲 擇 親 則二矣。」其務爲 切 誳 確實 誦 而 安耳。 而 服 足 行 而 以 也 過 侯氏 見 不 高 其 能 但

加

不

顧

經文義理之實也

,亦甚矣哉

也。 不自知矣。 而守之,而 無 氣 所難 也。 亦承 日 中庸 以 過 質之偏,事勢之迫,未必從容而 舜 不 故 ,然皆取 蓋三者之事,亦智、仁、勇之屬, 上章之意,以三者之難 或問 爲 程 及,荷一 則 絶 子 擬議 雖 此 學 中 以 無難 必於行,而無擇於義,且或出 無 克己 其所以 毫之私意有所未 之間,忽已墮於過與 庸 爲 知 前 不 最 難 可 雖若甚易,而實 難言之,其旨 楊氏 行之事,然天理渾 能」, 亦謂 明明 何 也? 盡 中 有 中節 則 示 庸 能 深 之尤 矣。 及之 雖欲 而 曰: 此 斯 不 也 可 人 有 然, 若 爲 游 能 而 擇 於 之 難

其所無 稱 餘。 意,亦非儒者之言也。 之者」,其違道遠矣。 高弟,而 而 楊氏 事 焉 其言乃如此,殊不可 下章 ,夫何能之有? 所 論 循天下 二公學於程氏之門, 不知 不 固 則皆老、佛 能 曉 然之理, 爲 也 Ē! 道 遠 之緒 而 之 行

也。 力有 無道 其 北 子路 倚 節 蓋 强 曰: 方之强 失 强 不 則 或 子路 之所 者, 者 以 而 能 亦承上章之意,以 或 必 有 前 勝 貧 類 問 力有 至 人賤,或 當 一過乎 人者,其 道 好勇,故聖人之言所以 如 所謂强者 於 而 强 此 此 以勝人之名也。 富貴 也。 流 其 不能 强 記 孰能反之? 者 (),或 中 南方之强,不及强 7、又非 也 子 久 7 和 不能 處 明擇中庸 路 9 與 而 乎窮 四者之强,强之 世俗 之 物 無 不 間 同 ·改其平 依 約 故此四者,汝 之所謂 凡 長其 强 故 ,非持守之 而守之,非 則 疑 必至 和 何 善 者 素 於 强 也 而 也 而 流 也 中 或 於 無

之强 惟 此 與 也 弱 也 倚 顔 以 中 ,然凡物之情 以 而 者 立之所 子 矯 無 不 日 以 之强 1,爲未 所 爲 流 不 諸 矯 依 爲 倚 以以 以 揉 説 强 然 則 爲 疑於必 如 耳 抑 ,惟强者 其 强 矯 何 中 而 不 哉 以以 ? 立 强 傾 倚 者 南 本 日 側 爲 爲子 方之强 日 而 無 : 而 能 不倚 大意 所 偃 無 中 路 依 11 所 之所以 7 之强 爲 則皆得 者 依 古 又 矯 幾 而 何 與 哉 無 希 獨 之强 爲强 北 所 疑 之, 矣, 立 依 於 方

鄭 暗 引 疑 後 見 無 之事 章 此 者 知 德 注 或問 之語 素 以素 加 隱 獨 其 則二字之義既 以 爲 + 漢 素爲 爲 位」之素,不 反之,似亦 素隱 書 傃, 章 索, 者 古 「素隱」之説。 藝文志 於義 有未 顔氏 有據。 明, 應頓 安。 又釋之以 略 》劉 而 通 異 但 與下 惟 歆 景字之義, 又以 則又若 其 論 티 : 文「行 舊 爲 神 遯 説 吕 求 仙 索 氏 有 世 有 家 怪 隱 流 與 謂 從 口 不

> 之語 人 本 字 而 猶 立 未 也 語 於 誤 勢 獨 至 亦 鄭 與 相 氏 夫 類 時 未 其 乃失之耳。 免有念之云, 説 近 是 蓋 游 皆 當 氏 非 所 時 儒 謂 所 者 離 傳

非 能 體 無不 之所 多 則 形 事 近 道 夫自夫婦之愚不 獨 物 知 而 則 也 陰 載 之多 聖人 微 不能 陽 或問 包,則天下莫能 ,其大至 而 言之,男女居室,人道之常 所 地 密 寒暑 行之;極其遠 能 以 有所 盡 ,聖人亦容有 而 十二章之説。 形載 雖 吉 不 道 於 以 不知不能也,天能生 可 天 蓋 M 而 見,所 天 肖 不能 災祥 地聖 無 地之大, 所 所 載矣;其小至於 能 而言之,則 生覆 不盡 謂 不 不在也。 人之所 日: 知行,至 費 能 知 而 ,至於氣 道之用 而 盡 盡 X 不能 隱 得 雖 故君 於聖 能 天下 猶 其 一覆 者 愚 也 廣 有 化流 盡 愚 子之 IE 而 也 不 人 之大 憾也 肖 者 即 夫 天 不 而 而 行 其 其 尤 能 然 亦 地 愚 道

所 尤 造 極 所 又引《詩》以 聽之所 破 婦 坤 以 見 其 端 以 ,至此極矣,然猶以爲 矣。 之所 書》記 戒謹 而 道 遠 乎 言道之體用,上下 而 其所 及者 之 大 夫 重 道 能 而 恐懼之實,無 婦 不 之 知 釐降 咸 言 極 明之,曰「鳶飛戾天,魚躍 此 用之體, 口 在 能 離 也 '、《禮》 天 行 所以 其 恒 處 F 近 》,《詩》首《關 而 , 蓋夫婦 爲「費 》謹大昏,皆 小而 則 其 道 不 昭著 知 不 用 無 不足 至矣。 其 言 離 之 不 之際, 而 前 造 乎 體 也; 以 隱 廣 端 此 無 盡 如 **参** 則 此 也。 雎 乎 隱微 察乎 所 其意也 此 意 而 天 当首 此 不 而 子思之 有 下 也 于淵」, 口 之 天 在 則 戒 非 莫 謂 間 地 也。 故 淫 其 視 費 能

以 淆 子之道 聖人 諸 物 曰 達 爲 ,故聖人 諸説 諸天,故 夷 惠 如 有 之徒 何 聖 所 ? 不 既 與。」 曰: 有 己 所 程子 則 失 不 之, 又析其所不 知 至 又曰 矣。 夫婦 之智 張 君 知 子

> E 常默 地 隱 及隱 協 知 夫 IE 不 不 似似 矣。 以 不 婦 能 而 ·得爲 具乎其中,若 其 能 之能 而 矣。 欲 恐其 非 若從程子 兩 而 亦謂 隱矣。 言語 之,皆 天 知 若 有 地 能 之隱 天 未 指陳 有 行 不 地 之説 憾者 程子之云, 安 者 可 於費外别 之可 有 則恐未然。 也。 曉 爲 憾 1,爲道 則使章内專言 也 為 道 及耳 曰 : Ē. 之 又 飛 之隱 有 費 故 謂 何 魚 隱 曰 且隱之爲言 不 聖 疑 獨舉費 : 躍 而 知 其 人 諸 耶 可言 察 不 費 於 之 家 乎 能 而 而 文 所 皆 隱 天 爲 不 以

緊爲 此 地之間無 潑 也 地 在 一者 人處,與必 E 下 然則 所 何 則 不在 也 魚之躍 程 ? 有 在 子 事焉 티 : 所謂 上 而 則爲之 道 而 出 「鳶 之流 勿 于 Œ 淵 飛 飛 心之意 者 行 魚 而 此 發 躍 戾於 也 見 子 司 其 於 天 活 思 者 天 潑 喫

■「見」上,四庫本有「可」字。

也。 之間 發見 不外 天 潑 洞 爾 也 而 m 後 之存 地 爲 但 地 爲 見 聖 則 言之,惟欲學者於此 乎此 必必 道 於上下之間 爲 可 斷 其 人 言 ,亘古亘今,雖未嘗有 日 X 必 然其 之 學 以 則 曰「與必 處 體 用 有事 則又以 仰 而 所不 之妙 者 又以 之間 得 心, 」者,正 全 而 之 集 視乎 體 焉 故 在 明 而 知 ,人倫之際, 義 也 有 呈 發 而 必 个不 人 者 無 道 養 鳶之飛,俯 事焉 以示人之意,爲莫切 露 勿 明學者洞見道體之妙 此 而 可可 能者 疑。 之體 抑 氣 妙 Œ 心 見 孟 而 謂著矣。 默 心活潑潑 之存 而 諸 用 而 子 用 發 亦 勿正心之意同 日 而 夫婦 顯 程 流 耳。 此 此 識 用之間 毫之空闕 子 而 行 言 而 也 之,則爲 行 以爲「子 之所知所 觀 子 至 地」,亦 後 無 發 固 乎 於 有 思 此 所 見, 者 魚之躍 爲 程 以 於 其 滯 精 子借 自 則 充塞 活 於 思 有 此 流 日 礙 非 能 密 指 此 覺 息 潑 此 喫 以 行 初 云

彼異。 也。 之防 謂 下 賢 意 事 但 妙,已躍 若如釋氏之云,則 氏蓋嘗言之,而 釋氏之遺意耶? 之,所以明人事之至近,而 矣,是安可 君、臣臣、父父、子子,各止其所, 不 善用 必 句 特恐學者用力之過 如 在 有事 然其 也 ,然鳶而必戾于天, 況吾之所言,雖 解之,欲其 孟 若出於吾之所謂 子 如矣, 力者,苟能 、實則 之意 焉之外, 日 同 日 然則其 何待 一必 吾亦言之耳,彼固 、雖有所事,而 而 而 己 鳶 又當 有 曰 : 語 於此 下 也。 與 可 事 、所謂 哉 句 以 彼同 此 焉 别 而 而 超 魚而 ,則夫道 躍 蓋 但 設 反 活 後足 然默會, 半 天理在焉, 淵 且 此 俚俗 爲 潑 此 而 不 必 詞 子 而 念 所累,故更 於言 潑 ·爲 之體 所形 躍 之間 而 思 言 不得而 之常 魚 所累耳 地 于 不可 以 則 以 2者,毋 口 容, 淵 用 爲 道 E 雖 釋 夫 談 亂 若 Œ 盡 實 專 氏 婦 是 古 戾 也 以 其 君 與 之 74 11 非 則 無 天

舉此而絶之矣,又安可同年而語哉?

道者 之費 子之意 但 意 以 而 口 以 也 此詩,姑借二 道 以 三人矣,又曰 曉 夫子 蓋 所 是 欲學者之必 E 又以 者尤 又非 謂 爲 則良知 論 乃無用之長 E 有非 與 察見 窮其 中 未 亦未免小失之耳 不可 多。 點之意明之, 吕氏 安。 以下 是二 非 天 上下之極 良能 時 物 知 如以 理者 觀 以下 · 論庸 口 以 指 謝 不可 物專爲形 乎 物 者 門之士 明 鳶 氏 良知良 此 恐 又 魚 能者爲 道 既 如 而 不 也。 非 則 而 而 體 曰 何 人亦 得 謂 言, 形 其 本 所 無 其無所不在之體, 爲 能 費 此其 非 其 爲 游 文之訓 得 所不 無所 道 (則常 道 之所自出 蓋 是 日 無 説益 之隱 氏 聞 · 而 、發明 . 極 所不包之量 日 之説 在之實,非 賴 者 道 吕 其 在 子思之引 於道矣。 以 隱 程 則 道 而 氏 而 上 子之 所 之外 爲 其 於 又别 F 分 則 謂 道 不 程 至 此 而

意 氏 無 爲説 矣。 體驗之,若有 此 可 其用體字察字,又皆非經文之正 又 所 雨 非 語 於 所 ,雖天 元尤非 不 所 章 日 以 也 知」者,孟 智 引 所 ·若從諸家以聖人所不知不能 知不能之説,最 底止,子思之意 之弊,必至於此 有憾於天 力 謂 或 其曰「非體 天 人雖 問 其 所 地 七 地 所 他 明察, 十三章之説 及,爲 聖 不能 以 又有一 有 子 皆 以 論 本 憾 地,則於 使 迷 易其 似 物 中 大不可 謂 而 聖人不 之 X 庸 於 而 道 X ,其不 爲明白,但所 節 神 地 而後已。 彼 不遺者,其 也 所 古 子 識 ,爲道之不 此 曉 文義既 不 自 知不 則 文意 以 者 出 飛 楊 能 若 莊 揚 亦 此 爲 氏 測 能 牛 嘗試 兩皆 也 以 有 以 眩瞀迷 耳 不 則 邪 孰 意 必矣。 引聖 人治人,爲 非 大 爲 所 可 足深論 以 其 遁 能 失之。 循 也 能 不 而 隱 察之」, 祁 荒 其 失 此 通 化 愈 寒 唐 文之 惟 説 大抵 m 而 則 \geq 暑 侯 其 至 不 而

於姑 知能 其 必 者 者 所 猶 能 有 以 日 加 有憾者 之 於 失 以 ,是乃行遠自 其 漸 也 能 也 知 彼 不已焉,則人道之全,亦將 耶? 息之 所 有 次 知能 先後之序 是 切於身之不 行 能 人 至於天地聖人所不 一之道 爲 者 ,而或非 能 所 行 不 論 盡 姑 行者,人之所切於身而 道也

 □

 :

 亦道 而 堪, 而 也 息 引張 而 還 違 上章固言之矣。 是 Ħ 邇、升高自卑之序,使其 所 也。 而 治 聖人之所不 可 用之所急矣。 亦 道 緩急之宜,人之受責 謂 子之説以 遽 彼 離者,後其 之無 兩 欲 然自人而 人,善矣。 入之道者,不得 失之 盡 ·能及 窮 道 而 實 以責 ,則終非一人一 可以 知 日 言, 之, 則 夫婦 然則責 又謂 有 不 焉 不 於人,吾見 則夫婦 漸 馴 則 其 可 能 致。 須臾 之所 而 求 爲 無 責 而 (者,將 其 之當 道 由 不 人 乃 天 急 離 之 能 之 所 今 是 而 地 流

> 得其讀,而 先施於彼者 責乎朋友之施己者如 君,則未能如此也; 責乎臣之事己者如 於文意有所不通, 他,而吾之所以自脩之則,具於此矣。 責彼者 加 而 夫子之意,蓋曰 反 反 求乎己 求乎己之所以 ,自責於庸言 以父、君、兄、友之四字 之所 則未 我之所責乎子之事己者如 以 能 而其義亦何所當 此,而 事 所責乎弟之事己者如 事 庸 如 此 兄 父,則未 行之間 此 則 也。 反求乎己之所以 而反 未 蓋 於是 求乎己之所以 能 能 不待 如 如 爲 哉 以 此 此 絶 今或不 求之於 其 也 也 句 所 9 此 所 事 以

之。 者,又引《論 者,多引此 然後知二者之爲忠恕,其 一盾,終 及深考乎 曰 0 不相 諸説 章 語》 以 謀 程 如 明一一 以 子之言, 何 ? 釋 而 牽 違道不遠」之意,一 以 合 티 : 貫 不 迹 有 之」之義 置 諸 雖 所 學者蓋 家 同 謂 説 動 而 説 ^ 所 論 天者 以爲 此 語 章 病

子、臣

弟、

友之絶句,何

也?

曰

不足以 知 矣。 其爲 妙,而 也。 而去以至於穀纔七里 爲之説之過也 穀七里」之違,非背而去之之謂,愚固已言之 意之表,則亦足以 已各得其所矣。 盡 遠」之事。● 己,乃忠恕之所以 則 而 恕者, 己,而至 諸 今始違之也 得失自可 餘 借 非昔已在穀而今始去之也,蓋曰 孰 説於此 存,則其違 説 其 能 其 雖多,大 可名之粗以明之,學者默識 誠者自無息; 判 心 若動 然 實 見矣。 ,多所未 如 夫齊 異 曾子之言,蓋指其不 以 亦 概 禽獸不遠矣」,非謂昔 互 此 名 天,而 日 放 相發明,而 耳。 非 師違穀七里,而穀 而 違道不遠, 自 合,則不察文義 此 而 其 無 此 **念孟** 不待推 E 推 疑 知 而去以入於 爲 以 哉 此意 德之深, 子》所云「 此 貫 不害其爲 己,而 章「違 如 之, 以 然 觀之,則 齊師 則 杰 可名之 知 前 禽 本 自 人 夜 於言 萬 道 言 己 不 獸 禽 氣 此 不 强 違 待 百 物 不 推 之

> 曉者。 是 出 要除 無恕之忠、無忠之恕,而 若究其極 之心 可 上之道莫若忠,待下之道莫若恕」,此則不 日 所 無 人 不 於程 見 於强爲,而不由乎中矣,豈忠恕之謂 違者,非背而去之之謂 以 心 遠 不 矣。② 而推以 自是忠恕而 當,不然,則 而 耳。 箇除一 子 若姑以所重言之,則似 見 他説 ,則忠之與恕 諸 蓋 今析爲二 不得, 及人,可 行 所 殊不 事 謂 往,以 不 求之愈遠 道 圃 相 者。當 待 事 謝 以得其當然之實 似 至於道 勉 氏 初 而 所 ,意其記録之或誤 而 也。 以 不 兩 然之理 以 而 能 相 爲 用 事 亦不爲 ,獨爲不遠 愈不近矣。 也 離,程 程子 之,則 猶 上接下者, 形影者 而 然惟 又謂 是果 子 無 哉? 所 理 而 盡 根 有 意 謂 事 其 此 於 施 口 己

- 「爲」,四庫本作「謂」。
- 「意」,四庫本作「已」。

2 0

不

之矣。 張 睨視之勞,而 盡 人之身,若以 柯 柯 .俱 者責其行 人 則 子 猶 者必 治 者 意 生之語 二説皆 在 則 忠者 猶 ,舊本乃推 外以 有 在所執之柯 則 睨 深 誠 所 人 其 異 ,若未瑩耳 得之, 視之勞, 下, 以 改 所 於 有 爲未 治 是 即 及 是。 張子之言 但 知 止 心 之之則,不 而猶以 盡 , 者 而 蓋 而 虚 善。 責 衆 不 不 者仁 不 吕 厚 其 L 而 自 氏 在所伐之柯 爲遠也。 若易之 之道, 詳實 望 知 之原 改 欺 遠 以以 焉 本 也 於 有 太略 其 彼 止 則 忠 日 恕 味 若 所 不 在 而 恕 0 者 得 必 能 衆 夫 故 所 旧 不 與

執

以

謂

之所 體 人者 用 聖人乃 以 耳 其 盡 、大天下 事 自 此 親 謂 見 之道 聖 未 莫能 能 人 者, 必必 之 載 心 其 亦 至 日 乎 純 小 未 瞽 天 亦 能 叟 不 F 如 底 已 莫 其 豫者 能 而 所 破 道 以 舜 之 責

六四

隱 闢 不恕 逮 難 庶乎 蔽 蕃 爲 之忠恕, 繼 此 於 爲 則 則 有 私 其 而 也 得 亦 有 有 通 無 欲 不 日 獨 其 似 有 似 行_, 病 如 而 文意 天 得 於 寒 於 矣。 實 此 地 程 恕; 不 有忮 之化 子之 然後 故當 也 恕 又 且 當 耳 不 其 害之心 意。 其 謝 屬 其 生 若 曰 氏、 塞 通 乎 其 生 游 但 有 庸 也 也 日 不 侯 也 程 氏 天 者 窮 不 餘 天 氏 7 所 恕, 常 而 謝 地 地 特 所 所 引 道 盡 論 氏 非 閉 變 謂 以 之云 之, 耻 推 若 化 氣 而 天 論 躬 則 草 督 機 地 明 人 語 之 其 木 闔 不 消 順 X

四

作

0

遠

於

心

而得

之矣。

夫

四

者

固皆衆

X

之所能

於

事

父、事君

事兄、交友、皆所

以

求乎人者

責

乎

己

一之所

未

能

則

其

所

以

治

己

之道

亦亦

不

則

其

所

以愛人之道

,不遠於我

而得之矣。

至

推

之心

以

及

X

也

推

其

誠

心

以

及於

行

改 四 庫 本作

説 焉 忘物」 睨 又謂 可 之遺意 至謂 之命也, 豈不誤 可; 天矣,爲 謂 加 有 説 心,則是 以 不 乃 而 天地 乃謂 不位 可以 以以 使經 視 如 爲 道 究者。 彼 之, 道 則爲已違道而 之氣,因人之不恕, ,人不致和,則萬 而遠 彼爲 人 無 天地者,反效其所爲,以自已其 天 爲道 則 天地因人之不恕,而實 而 爲道 既於文義有 猶 物 地之有 H 蓋若以 我 其 以 人甚矣,豈中庸之旨哉 人者,既以忮心失恕,而 如執柯 爲遠 ,則與 之間 哉 説 ! 不恕 信 而 爲 矣。 爲 道二 人不 則 游氏之説 猶未遠 而 以 所 乃 道 其 忠 伐柯 物 不 今經 則遠 致中 因 違 而遠於道 恕 而 有 通 人 經背理又 也 將 有 時 文如此,而 而 人,故君 則與柯 則 而 ,是則老、莊 ,其病尤多 似 以至於忘 而 推 然 有 於 不 天 其意 故故 不 自 不 育 地 則 二,故 楊氏 (於穆 有 子 恕之 絶 恕 有 其 其 不 甚 戒 己 於 則 是 時 説

> 不及。 能之説 爲,自 之教 子君臣者乎? 之人也。 日 矛盾 知其有所不通,而復爲 將 人將使天下皆無父子君臣矣,此則 道之説,愚於《論語》已辨之矣。 釐之差而 安有此理哉 使 此 而 X 道 求仁言之,則忠恕者莫近 君子以一己之難克 蓋近 獨 無 以 爲 已也。 嗚呼 所合。 爲 無 以 世 ? 道 用 爲若止謂 者, 之 果有不得其 侯氏之言,於是乎 既又曰:「自道言之,則 侯氏 是皆流於異端之説 物, 此 反 非所謂將使天下皆 爲 人 固 恕己以 是説以救之, 誤 無 多疎闊 人 而 讀 而 道 知 9 及 之門 有 其引 至於 馬。」 而 天 ,驗矣。 害 軱 諸 F 於道 不 然終 爲 則 四 則 皆 家 顔 而 之説 皆 者 但 不 無 是 子 已 口 É 聖 未 樂 毫 是 父 恕 所 亦 口

疑者。 者 「尤爲 或問 而 切 張子所謂當知無天下國家皆非 十四四 至 章之説。 吕 氏 説 雖 日 不 免時 此 章 文義, 有 Ż 無 理 口

篇 \Box 神之義, 鼻之嘘吸者 ,其説已詳 孔 子所以告宰予者,見於《祭義》之 爲 而 魂,耳目之精明者爲 鄭氏釋之,亦已 一明矣。 魄, 其 蓋

以其 指血 化 來,皆在 爲説 在 氣之類以 人也, 其 則 、中矣。 其 意 陰陽 、明之。 又廣 蓋陽 合 程子、張子 則 而 魂 天 魄 爲神 地 凝 萬 魂 陰魄 更以 聚 物 之 而 爲鬼,是 陰 屈 有 伸 陽 生 往 浩

狀」者 陰陽 所 謂 判 精 E 則 氣 以 魂 爲物 明 升 此 爲 遊 神 而《 魂爲 魄 《書》所 降 變,故 爲 謂 鬼 徂 知 落者 鬼神 易大 之情 亦 傳

實

而足以

服其

心

平

得

者無所

不足於

吾

心

而

己,

則

豊

不

明

白

真

者

,却有未善

若

E

識

者

知其

(理之如:

此

而

此

類者多矣,甚可笑也。

但侯氏

所以

自爲説

世

佛者

了,妄以

吾言傅著其

説

而指

意

乖

刺

如

謂

也。

侯氏所辨常

總默

識

自

得之説甚

當

丁,近

意

未及此

前

詭

遇

得

禽,

亦非行險僥倖

之

但

楊

氏

以

反

夕身

而

誠

爲

不

願

乎

外,

則

本

文之

亦

條

暢

而存亡、

得喪、

窮

通

、好醜之説

尤

善

其

大

體

則

皆

平

E

慤

實

而

有

餘

味

也

游

氏

説

者方伸 其升 降 爲言 而 爲神, 耳。 往者既 若又以其往來者言之, 屈 加 爲鬼。 蓋二氣之 則 來

主

伸,

陰

主

屈

而

綜

分,實 識 如 以言,亦 之矣。 謝 氏所 各得 氣之運 謂 日 做 其 諸 題 義焉。 ,故陽 説 目 如 人 何 學者 思 議 曰 者 熟 玩 吕 則 庶 氏 精察之, 乎 推 本 有

其 非 章 詩》之意 實,然亦不察此 以二句 下引《詩》與 而 言 或 問 道 之義 十五章之説。 則失之矣。 雖 無所不在,而其 爲 夫子之言 止 前 於此 反 乃 티 : 以 也。 章 指 章首二 進 諸 首 之則有 二言 説 事 惟 以 句 發 吕 明 序 承 明 氏 也 爲 F 引

或問

鬼神之説,

其詳

奈何

?

日

鬼

子之説,尤爲詳備

但

改

本

有

所

屈

者

神與 天下 如可 爲 鬼神之德所以 云, 也。 之累 不 萬 謝 既 而 知 物 句, 氏 程 反之氣,復爲 神 而結之日 之物 物 一按經 程子 其 喜者,而 其 而 耳 説 子 形 乃 德爲二物 於 無 數 則 而别 形 ,所謂 而 辨 文 是 不在」一 游、楊之説 善矣,但 子之以 莫 潰 下者, 本 其 理之實,果 非 「誠之不可揜 細 爲鬼神 反 一只 盛者,蓋以 贊 非《東見録》中 鬼 以 原 方伸之氣」者,其 前 幹 鬼 好 非 語 之意 神 經 歸 事 神 之德 之所 隔 文 誠 近 以 根之云, ,皆有不 明體 之德之盛 壁 是 事 形 也 何 張 悪 也。 爲 理 而 其 如 而 子 物, 如 鬼神 (誠耳, 也 求之,則失之遠 者 上下言之, 也 以其 他 此 今侯氏 可 似 所謂 ? ,故鬼神 何 書 曉 其 」,則是 亦 之德 類 也 他語考之, 亦 謂 非 如 者 微 侯 ? 不不 可考也 有是 下 此 乃 以 氏 惟「妙 有 爲 文 必以 乍 誠 則 日 類 析 以 日 反 説 所 讀 0 也 誠 物 鬼 自 爲 0 原

至

謂

亦

後 物 體 之體 枝 而言順 則 葉 物先乎 而 有 物 耳。 所 無 附 氣 幹,猶木之有幹,必先有 不 而 待 必曰 生焉,貞之幹 是 體 而 物 有 ,然後見其 者 事 然 亦 日 猶 爲 氣 是 此 先 物 也 之 而 平

言,以 其精 楊氏 愚公共之物,而 氏之説備 所謂 於 舜得 程 有 ,果何物哉? 而 滯 顔、 神 乃忘其所以 子 或 爲 非 問 孔 於冥 魂 其常,而 所 顔子 跖壽夭之不齊 吾儒 矣。 子不得其常者善矣,然又以爲 魄 謂 十七章之説。 漠之間,尤非 猶 非 之 雖夭,而不亡者存 常理 楊氏所辨孔子不受命之意 有 非 孔子不得其常者,尤明白 若曰 所 論孔子之意 存 顔子 宜 者 者 言 天命之性 盡 所能專; ,則亦不得 則 矣。 之。 日 所以 是 0 物 · 何 且 程 而 語 而 則 子、 若 其 侯氏 更援 顔子也。 其常 不 所 則 是古 日 化 張 謂 反 老 所推 氣 之意 子 而 爲 天於 散 今聖 不 聃 己。 也 之 則 Ì 衍 而

氏

猶

者

説

黑説以汩之哉! 異説以汩之哉! 其言。 蓋德

中庸或問下

游 歐陽、蘇氏之書,亦已有是説矣。 以爲文王未嘗稱王之證,深有補於名教,然 之説,於禮之節文度數詳矣,其 不 ,讀者詳之可 同,然合而觀之,亦表裏之説 或 問 也。 九 游 章 氏 之説 引《泰誓》、《武 日。 也 郊禘,吕 間 有不 氏 成》 口 楊

耳。 周 何 向 禮 明 也 然禮 曉 建 日 也 ? 日 也 或 曰 : 其 書 昭 一之神 ,今且假設諸侯之廟 亦 穆之昭, 爲 讀 昭之爲言,明 白 有 位 爲韶 明 作 左宗 佋字者, 先 何 世讀爲韶,今從本 廟 也? 儒以 則 也, 則假借 爲 Ŧi. 日 廟 晉 以 以 此 其 皆 避 明 之。 當 不 而 諱 南 在 可 通 面 而 字, 以 用 改 而

之廟 世之 焉。 之。 左爲 向。 向, 位。 凡 親 袝 廟,四世之君居之; 祖 者,取其深遠 廟之室 居之;穆之北 宫之東南矣, 廟主 于 盡 在 群 後,每 其 昭 南 群 則遷其主于 太祖之廟, 廟皆南向 北 ,始封之君 穆之人乎 向者, 昭 中 在 班之南廟,南廟之主 而 右爲 .,則惟太祖 之人乎 本廟之室中 昭 易世 其 故故 取 ,各有門堂寢 穆,給祭之位 廟,三世之君居之; 制 居之; 百 穆 其 此 太廟 此 謂 則 而 世 以 者 者 向 之 穆之南 東 孫毓以 不遷 次 下, 皆 皆 之西 - 皆東 明, 穆。 昭之北 向自 遷。 而 列 故 列 南 夾室 向, 廟,五 室, 蓋 遷 自 則 如 其 爲外爲 於 謂 於 是 群 於 遷之 餘 廟,二世 南 及其 北 也 之 而 北 而 兀 廟 北 加 牆宇 牖 世 牖 昭 爲 爲 之 都 謂 廟 也 廟 昭 袷 之 蓋 下 最 下 昭 北 宫, 列 之桃 之南 一之君 于太 太 北 而 而 尊 新 則 兀 君 祖 唐 居 廟 主 則 向 北 南 南

應、韓 之列 穆 始 贵 矣。 爲 世 祧 穆 王 不 世 爲 \equiv 爲 尊 穆 7 其 稱 動 遷 穆 世 穆 則 秋 禮 則 乎? 交 0 而 也 昭 而 武 爲 巾 以傳》以 亦 古 爲 家 五. 者 錯 之北 此 几 左 王 昭 以 之説 當 武 世 世 所 袝 彼 反 爲 日 爲 之 曰 : 以 世 遷 昭 管、蔡、郕、霍 以 此 廟 爲 昭 穆 序 則 左 昭 穆 兀 袝 若 有 考 不 五. 卑 穆 爲 六 世 之 世 而 必 則 是 若武 明 然 世 矣 者 尊 世 爲 之 \equiv 則 以 北 之 雖 文 也。 穆 而 班 不 袝 穆 後 世 自 廟 矣。 其 紛 而 王 而 遷 户, 右 昭 穆 其 既 可 六 謂 昭 紛 爲 五. 七 之南 爲 始 穆 遠 常 蓋 世 文之 必 乎 世 哉 文 世 世 兀 卑 袝 者 昭 王 以 爲 爲 而 袝 世 矣 廟 猶 而 袝 世 爲 孫 昭 昭 主 昭 穆之 昭 是 矣 曰 曰 E 穆考, 祧 不 既 形 則 穆 則 今 而 而 而 然, 易 祧 \equiv 不 乃 子 南 常 六 右 Ŧi. 廟 昭 則 晉、 也 之 然 世 成 孫 者 廟 反 \equiv m 世 兀 爲 世 則

考, 之上 易。 卑之 祖 道 穆 時 穆 有 然則天子 主 廟 全 穆 也 一示示 其 不同 易 廟 常 爲 云者 而 獨 而 次 尊。 惟四 宗 無 在 在 尊 檐 特 之 有 周 則 卑 矣。 穆 右 廟 昭 所 何 設 則凡已毀未 神 可 制 昭 時 必 之 之 加 也 也 位 宗 其 猶 之袷 不 而 而 大治 故 制 謂 廟 耳 於曾之東也與? 禮未 見 外 有 改 特 后 Ŧi. 商 伯 穆 有 可 設 塗 日 不 廟 非 稷 其 而 之 以 1:《春 有 以 位 百 盡 可 始 七 制 穆 會 陳 毁之主 考焉 左 不失 於 爲 也 撤 於 若 封 世 不 然 毁 右 都 祖 1秋傳》 文、 而 三宗 見 而 何 廟 爲 其 説 宫 悉 室, 之 意或 一,又 昭 漢 ? 之主 昭 序 者 去 西 武受 儒 則 穆 日 其 畢 然 而 曰 之 以 日 之記 如 昭 禰 後 詳 則 陳 内 爲 也 加 命 此 常 之 唐 世 然 序 有 今 將 壞 高 在 而 之 下 其 自 則 又已 則 無 以 不 納 廟 祖 以 E 文 尊 各 毁 爲 之 昭 口 無 高 有 所 新

文王 西 廟 之 者。 베 加 王 武 王 廟 也 故 后 同 親 季 亦 爲 北 北 \pm 稷 猶 然其 加 不 六 遷 遷 遷 盡 以 爲 但 謂 廟 廟 而 祧 爲 在 當桃 有 廟 太 如 不 謂 者 位 數 加 而 而 Ŧi. 王 矣。 功 祖 諸 昭 毁 之文 藏 康 置 中 成 武 廟 季 當 儒 于 遷 而 王 者 而 王 王. 而 居 之説 宗 至 穆 與 世 太祖 次, 以 袝。 組 袝 袝 己。 共 昭 劉 與 親 故 室 有 紺 王 之 宜 太 歆 廟 於於 别 功當宗,故 之 則 自 居 至 至 時 至 之 南 亦 祖 四 廟。 立 昭 武 此 昭 康 成 是 與 説 之 廟 而 之北 則 以 E 王. 王 王 成 諸 也 廟 七 廟 武 初 至 上, 文 時 時 時 王 侯 而 者 穆 於 Ŧ. 廟、太 有天下之時 王 遷 别 之 七,文、 亦 雖 則 則 則 東 親 王 諸 居 <u>)</u> 皆 廟 其 北 昭 時 王 太 組 盡 穆 儒 王 數 H. 無 季 紺 王 當 王 武 謂 廟 居 之 則 爲 甚 之 祧 祔 祧 祧 祧 之 於 文 南 不 説 穆 異 爲 五.

不 秦政之惡 實,天下 世 也 爲 也。 曰 : 耳。 時 于 昭 歆 者 自 武 室,見 之説 爲 如 懿 藏 是 世 始 過 前 此 以 王 穆之上 於 日 日 室,於是 亦 立 矣。 代 0 0 後 則 武 當考 則 後 而始立文世 於 武 祖 説 然 夫 世 周 則 世 經 是 世 功宗德之 則 者 且 子 室 以 穆之 爲 自 康 自 典,皆有 之乎 室 程 諸 議 子 祀 武 王 有 多 而 於三 子 儒 父、 遷,穆 孫 祧 高 王 ? 是 不 晚 與 者藏 者 室於三 圉 克 臣 論 復 劉 年 説 昭 明 劉 得 日 商 若 藏 議 亞 歆 E 之 文,而 尚 歆 . 於文 嘗 君 即 於 袝 擇 室 上, 商 矣 之 必 穆 愚 論 太 其 增 之三宗 説 之上 世 以 如 而 本 此 亦 功德 而 先 Ì 廟 除 此 前 室 爲 朝 爲 程 意 孰 矣 祖 遞 七 謚 爲 廟 其 有 子 少 昭 爲 至 廟 而 遷 法 嫌 廟 制 之 無 周 祭 獨 或 是 不 孝 於 如 之 图 桃 之 之 然 王 亦 以 同 至 則

則 爲 備 也。 上,父子皆異 諸 節 廟 大夫、士之制 加 推 有不得 而 其 侯 則 太 猶 大夫之 則 諸侯 「則其 不 制 適 而 祖 棁、 知 大 視 而 降 不 土 殺 前説 太宗皆 未 夫 大 其 哉 之 復 盡 降 制 必 夫 也 倉 黝、 廟 廟 其 二,然其 官 何 若 有 其 而 楹 則 奈 事 獨 重 堊、 非記 當 也 不 日 終身之定論 生也 殺 何? 生 檐 門 視 得 斵 ? 爲 . 其二, 事 斵 諸 大夫 者之誤 堂寢室之合 太 廟之 桷 百 而 異 日 存之 士 祖 티 : 世 殺 礱,大夫 宫 侯 0 而 然其 昭 不 爲 耳。 固 降 心者, 又不 大 而 殺 穆 遷 數 則 有 也 也。 夫三 死 其 之 之 門 蓋 所 或 得 降 不 位 有 廟 是 然後 堂寢室之 天子 由 不 出 日 官 爲 殺 得 猶 廟 不 得 以 命 0 於 以 矣, 異 以 之 得 不 爲 士 可 師 諸 則 然 此 廟 兩 得 以 名 曷 爲 者 Ш 時 侯 視 則 丽

其 室之制 遂不能 又 或 其 及 别 務 制 帝 明 堂 不 而 太 不 備 致 近 爲 帝 厭 室 之廟皆自營之, 異 廟之尊 降 昭 顧 世,諸 前 始也。 祖 足 抑 物之孝。 而 室 也 穆之位 損 革 者 不 以 猶 乃 其 而 也。 尊 之私 陳 日 既 梏 而先 不 侯 臣 以 是 夫漢之爲 鼎 . 不 於 子 褻 能 無 西 蓋 至於 然 俎 皆 王宗 漢 國 遺 備 不 而 爲 · 而 其 復 則 明 無 大大 詔 敢 朔 不 各 别 上 後 獨 如 以 非 廟 其合爲 嚴 藏 有 帝,不知禮 禮 者 爲 爲 天 夫 古 世 之禮 禮 盡 主 加 略矣,然其始 公 所 子 無 之 何 其 室 於 然猶 焉 處 之 私 以 邑 禮 始 事 也 光 則 之 尊 事 廟 ? 生 烈皇后更 雖 則 魏 不 而 盡 廟 其 義 事 則 深 其 失 可 雖 廢 不 曰 晉循 之正 存之心 親 廣 都 皆 矣。 其 得 以 同 所 之度 也 廟 宫 由 堂 無 獨 爲 以 衣 之 降 漢 異 而 車 同 致 所

生事 之舞 從 宜草 古者宗 然於前 于我 已者 既 論 有 士 一,老 祖 自 则 其 其 一二知 有 爲 存之心 禮, 有 之 致 惑 朝 創 不 於 虚 世 未 師 嘗 紀 於 異端 世 廟之 得 宗廟之禮, 有 宿 是宗 無 而 而 有 此 一,則 經學古之人,乃 焉 聞 正 儒 復 後 而 於 意於 制 也。 徒知譏 有 徇 其 事 老 舊 都 廟 而 若 亦 不 罪者; 流 是 生 之 章 明 自 宫 此 莫 日 抑 得 俗 其 事 之 儀 别 亦 南渡之後, 未 矣 有 嘗 則 伸 之爲 孝惠之飾 沿襲之變, 存之心, • 殿 爲 及營 亂 能 觀 雖 然 於今之世, 於 八,前門 不得 虚文矣。 命, 知 於 朝 宗 能 而 陋 表 其 陸 廷 考 廟 私 與 不盛。 而 有 原 之上 故 佃 後 故 於 者 非 議 其 不 者。 終 之議 都 寢 責 不 史 而 是以 宗 則 臣 惟 知 不 一,禮官 籍 得 淪 竊 又 子 始 叔 本 幸 窮 然 能 廟 没 歎 之 則 不 其 徒 孫 略 亦 之 而 鄉 以 而 能 事 荷 博 禮 知 知 通 或 權 如 至 自 則 賤

> 者 後 ? 與 宜 更詳考之,則 帝 無 日 之秉 深 前 嗚 説 探 詞 王 呼 史筆者, 以 遺旨 不 制 惜 同 及之,豈 作之 哉 特 當 1 而 知 即 盛 書 張 然陸 所擇矣。 前 天未 琥 總 故 日 之議 叙 氏 尼 承 欲 所 以 詔 其 使 定 庶 昭 討 事 斯 幾 昭 論 示 而 人 穆之次 近 來 之 嗇 者 世 臣 其 復 也 讀 傳 見 而

所

略

耶

又

從耳。 乃 考 未 盧 月「玄雉 而 與「 從沈氏 爲 也 且於上下文義 _ 無 或 地 問 所 曰 則 人 道 也? 據 似 于 敏 沈 也 亦 淮 樹」之云者 十章 説 以 日 爲 固 曰 蒲 蜄 亦不 爲 蒲 蒲 盧 善 此 盧 盧之爲 爲 而 甚 矣, 之説 亦 相 變化 其 通 彼 應 然《夏 傳 書 之意 惟沈 果 何 日 故 之 羸 以 不 小 傳 氏 蜄 得 他 廢 而 之説 文 者 E 舊 舊 而 無 **>** 耳 蒲 不 說 所

⁰ 宗 IE 德本、 IE 保本、 四 庫 作

詳 見 又 解 儒 其 考 無 爲 夏 之 他 時 筆 而 明 果 物 蓋 羸 之本 深 文 而 多 或 辨 矣。 可 穿 反取 之耶 文也 名,若以 證 況 不 諸 則 此 足 此 姑 等 且 據 蒲 而 闕 瑣 又 信 附 盧 之, 碎,既 以 合之, 爲 疑 其 蜄 變 亦 爲 亦 丰 化 決 出 可 蒲 大 則 非 於 義 盧 也 又 孔 後 所 不 則 世 何 子 必 必 所 不 于

待 無 有 純 而 此 則 其 有 蔽 未 困 無 同 致 粹 於 安 得 也 此 不 也 則 曰 所 天 知 . 無 不知, 而 粹之多, 利 理 達 也 生 9 所 渾 道 而 而 何 咈 待 達 行 則學 然, 安 也 知 也 勉 者 而 者 ? 德 而 也 無 真 以 ,有三知 行者,安於義 未 此 曰 : 生 所 知之, 能 人 知 此 而 虧 無 之禀 此 其 得 神 喪 雜 氣 三行之不 清 利 雖 靈 者 天 質 之多 氣 非 而 也 不待教 之異 理,不 清 理 必 生 小失, 行 知 明 學 而 之, 同 未 待 而 賦 而 而 而 習 雖 質 能 知 性 而 於 不 而

者,不 仁 者 其 初 未 專 明 知 成 矣,然其 H 則 可 勇 反之者也。 能 分而 仁,以 知之次 之屬 以 安行 功 也 達 以 而 哌 其説善矣,子 固 爲仁矣,然生 學 反之 已 也 有 獲 困 矣。 言 也 此 知 爲 性 次序 子 則 所安,未 心 則 者 3 利行 仁, 之本, 路 衡 而 其 利 此 則三知爲智 昏 也 曰 : 慮 非 所 明 行 學 蔽 而 三等者 者爲 勇 知 知 口 則 駁 篇 之不 知 張 困 知 而 之大 其 所 而 子、 首 以 利 善 雜 後 其 加 足 知之, 至, 從 其 天 諸 爲 知 而 知 行 利 以 語 吕 1,三行 也 릲 之者 者 章 知 爲 無 當 知 氣 理 何 勉 矣 則知 楊、 知 少 之 也 質之禀, 幾 生 以 也 力 故及其 且 然學而 也 異 爲 乎 Ì 不 舜 ? 而 侯 L 木 强 之大, 馬 卑 仁 明 不 氏 文三者之 知 矯 勉 久 所 矣, 明 知 亦 勉 皆 亦 知 而 强 故 而 知之, 行 以 復 之 後 行 學 安 今 夫 而 不 而 能 之 非 爲 牛 其 同 行 而 觔 口

爲 於 而 智 强 知 而 不 利 而 言 息 爲 行 行 以 則 勇 者 爲 至 主 以 於 又 生 於 知 通 知 行 而 之 \equiv 安 而 近 成 行 近 爲 功之一 而言: 者 爲 仁 主 勇 困 之次 於 則 知 爲 知 又 勉 勇 而 以 行 則 3 爲 亦 \equiv 者 以 主 庶 知 其

乎

其

曲

盡

也

歟

輕 用 賈 讒 以 静 則 理 欲 德 捐 養 事 邪 勝 無 其 之所 其 不 以 日 所 古 則 則 而 富 私 存 制 0 以 静 然 任 動 謂 九 其 兄 爲 臣 静 矣 則 賢 經之説 故 外 弟 勸 杜 後 不 無 不 齊 賢 違 婚 \square 故 宫 以 專 明 不 姻 之道 立其本 盛 去 齊其 所 盛 奈 蓋持 欲 色, 徇 讓 以 服 何 其 忧 貨 外 爲 則 遠 ? 無 衡 非 色, 9 脩 賢 色、 之勢, 親 動 則 相 禮 E 身之要 者 則 之欲 遠 而 無 不 0 賤 隱 故故 好 動 以 不 不 貨 此 微 賢 其 察 養 尊 而 也 重 則 不 其 其 位 佞 則 則 内 篤 内 内 愛 於 彼 信 重 人 外 無

之,已 經 力 賜 危 下 以 以 者 能 所 人 其 衆 禄 趨 不 之旅 送 無 情 誠 盛 同 以 嘉 以 有 親 事 其 使大 既 所容 度 其 其 爲 莫 功 足 細 而 滅 蕃 禀 其 事 善 往 不 皆 勸 恤 事 者 故 小 任 好 不 衛 而 稱 不不 1,惰者 欲 其 百 悦 待 忠信 相 封 使令,所 則 惡 王 不 事 司 逸, 私 姓 之 所 室 貴 而 强 以 以 恤 之 以 然 其 道 其 願 委 勉 則 亦 重 朝 治 以 而 償 道 總 所 積 事 財 出 士 而 莫不 禄 聘 其 以 爲 無 其 也 其 不 能 無 君 於 倍 則 有 亂 爲 勸 勞 所 者 欲以 仰 實, 其 者 欲 迎 勸 節 親 天 畔 日 以 得 使 事 勸 塗 則 富 之 F 其 親 大臣之道 不 省 爲 矜其 矣。 俯 L 以 而 矣。 不 諸 來 之道 心 出 月 故 勸 下 育 自 信度 矣。 侯 之累 平. 試 時 士 盡 勞 爲之授節 相 不 因 無 皆 也 之道 脩 使 其 能 能 安 作 後 以 故 凡 竭 也 身 薄 授 者 此 其 持 則 淫 程 官 大 任 斂 也 樂 臣 九 忠 貢 其 續 天 巧 其

七六

任 官 叔 之,不幸 也 哉 所 尊 加 加 廢 何 無 贵 大 焉 周 以 法 ? 所 賢之等 以 也 聃 親 臣 公不免於有過 事 荷 悖 尊 但 季 則 則 是 亦 親 而 耳 以 賢 富 聖 相 侯 是 以 而 日 E 自 無 而 親 貴之 脩 與 而 則 . 人之意 富 或 當 乃 者 以 曰 : 推 親 夾 此 身之至 親 之貴 不 置 所 間之,故 自 之 而 之 輔 親 勝 親 以 已 之大臣 親 親 也 故, \pm 已 之, 親 焉 親 親 親 亦 9 則 及其 室 哉 治 愛 然 敬 之殺 子 可 不 親 尊 而 又 臨 而 大 後 之位 庶 而 問 見 不 之厚 之則 賢 贵 致辟 事 保 觀 有 民 臣 言 而 五. 矣。 賢 而 並 無 全之 叔 於管 以 推 任 之後 之, 否 傷 體 不 行 來 所 而 各 者 之也 日 之 恩 眩 群 百 不 尊 自 而 也 當 有 而 以 蔡 Ι. 臣 悖 之 輕 使 子 土 則 不 其 而 不 事 監 大 敬 若 之 屬 推 惟 治 至 謂 日 理 柔 則 而 者, 商 臣 之 之 道 親 任 於 信 無 康 任 則 自 而 遠

之, 業 以 賢 蔽 者 意 疑 之 能 臣 能 坐 不 姦 世 者,必 否矣。 愈密 交孚 哉? 奉行 不 獨 爲 以 慮 上 基 賢 也 則 而 知九 姦 脩 耶 也 亦 以 任 李 疑 文書 以 身 ? 如 則 夫勞 而其 林 亟 成 成 兩 不 則 敗 爲 經之義 其 能 可 盡 求 日 其 亂 雜 甫 不 國 本 爲 以 不 爲 0 私 其 其 於 之 任 其 以 然, 尊 職 不 眩 道 人 則 顧 求 范 徒 如 或 而 而 賢 業 然 此 愈甚 賢 猶 以 古 雎 焉 吾 是之人矣; 不 然耳 主 而 爲 古之聖 也 易之而 視 置 恐 所 而 幸 不 有 先 則 而 下 之大臣之位 明 Ŀ 謂 又恃 而 覺 以 鄒 逸 彼 使其 聽 則 之 有 之所 悟 共 陽 君 於 炉 E 其 聰 其 所 小 趙 成 賢 得 賢 所 明 所 者 不 臣 所 高 以 以 IE. 而 謂 疾 相 於 以 之 幸 置 亦 欺 猜 大 有 不 至 能 朱 此 安 偏 以 任 察 使 知 光 防 所 而 口 光 此 義 得 之 欺 御 聽 或 爲 蒙 畏 明 以 則 以 其 失 虞 姑 F 蔽 備 大 以 IE 牛 誠 不 防 必 而 而

服 懷諸 而 以 柔 於 者 可 則 則 四 遠 遠 勝 大 夫 其 又言「蠻 愈 懷方氏之官掌之,於經有明文耶 夷 先 人之 侯 言 臣 所 禍 巧, 也。 近 謂 之 者 而 古 而 爲 矣。 偏 上 移 有 夷 而 其 況愚所謂 於 聽 也 無 不 率 非 爲 獨 左 可 其序。 志 嗚 服 害 任、 右 舊 勝言者。 賓 呼 愈 説 則 旅 危 御下蔽 深。 其 授節 《書》言「柔遠能邇」, 以 也 哉 所 爲 爲 謂 ? 不 委積者 或 幸 蕃國之諸 柔遠, 幸 上之姦,將 家之禍 日 曰 : 而 而 0 È 臣 子 以其 亦不 之威 比 之姦 何 尤 長、 侯 Ė 列 以 有 不 遂 勝 遺 謂 在 則 於

治 指 也 天下 誠 意 是 意 所 日 其 國 於格物,故 則 出 楊氏之説 家之 前 法度 若 段主 有 道 爲 不 一於誠 以 虚 則 有 同 器 爲 是 者焉, 意,故以 若 虚 直 正言 器之云者二, 但知 以 何 先 以 誠 也? 王之典 爲 發 有 之 法 而 也 日 章 度 不 0 而 知 其 文 而 其 古

> 楊 L 則 口 不 不 物 曉 氏 免於迂回 又若主於誠 文之意 同 爲 他書 也 審 虚 矣。 器 則 首 而 而 但 不 雖 尾 意,而 難 其 之 亦 衡 通 講 下 可 決 也 文 以 與 反 一,豈記 所引 亦多有類 宛 前 語 轉 段 以 明道 者之誤耶? 而 相 説 應,其於本段 之 先生之言 此 合之,然 也 者, 殊 此 紁 不 其

矣。 精 也。 而 義 不 諸 困 先立 曰 : 矣 神 説 所謂 惟 乎 爲 ,行有常而 言 誠 游 前 氏誠定之云得其 是則 則言 定, 所謂 不疚 有 何 物 也? 明善者 矣,道有 而 不 日 躓 要。 0 也 矣, 先 本 立 張 而 事 子 乎 有 不 實 窮 誠

不 可 而 日 信 以 行 夫在 諛 其 乎 日 : 説 志 友 下位 在下 故 取 則 容也, 民 志行 獲上、 而 不 不 可 其道 不孚, 獲 明 治。 乎 善 在信 上, 而名譽 然欲 誠 身之説, 則 乎友 獲乎 無 示 以 而已。 聞 上,又不 安其 奈 故故 何 位

以 善 蓋 無 乎 厚 所 此 雖 不 也 而 《大學》 大學 愛 諸 必 E 親 者 見 天 必 以 欲 不 口 削 身者 又不 道 然 不 能 敬之實 薄 知 明 勉 以 順 道 所 之 能 格 蓋 所 襲 善 焉 而 在 親 反 將 謂 物 理 如 謂 取 以 道、 可 無 悦 固 故 身 好 致 信 欲 無 意 也 物 誠 强 以 所 平 不誠 執 擇 好 友、 知 信 誠 格 親 爲 阳 親 其 不 色, 毫 乎友, 所 善 故 而 而 身 以 不 意 薄 也 而 獲 之不 夫子 以 心 知 悪 真 見 則 曲 故 己。 Ļ 古 而 其 誠 正 悪 至 知 悦 從 外 又不 執 友不 實 身 道 身。 言 治 身 也 必 至 有 也 蓋 者 不 民 此 在 然欲 ,其 脩 9 不 善 事 不 可 繼 見信 意 擇 執 明 親 口 悦 也 能 之 之。 以 將 道 誠 之之 而 乎 之之 得 之 如 所 誠 乎 其 便 無 在 心 悪 善 乎 禮 知 而 在 親 然欲 蓋 下 誠 佞 所 正 明 身,又 至 固 誠 惡 則 而 文即 施 擇 而 乎 則 荷 而 矣。 臭, 己。 身 則 善 好 合 身 則 則 内 順 所 而

> 耳。 耳。 多 無 不 本 離 之 萬 得 如 則 利 功 物 直 好 所 遺 意 去 然亦 矣。 若 好 明 矣 事 之 謂 蓋 IE 而 理皆 Ź 但 知 物 色 反 無大得 達 在 者 身 能 善 有 回 而 道 即 備 未 無 而 反 專 達 事 而 諸 誠 求 至 不 於 務 失, 即 德 其 者 説 諸 實 我 求 物 則 所 惟 如 身, 九 之於身,尤 有 物 而 而 反 行 何 楊 經 格 如 則 之 無 各 自 氏 凡 前 知 求 不 而 不 無 反 事 其 待 所 至 誠 不 内 身之説 亦 求 謂 理 哉 誠 而 非 外 此 之於外 者 反之於身 如 ¹人大學 隱 今乃 章 以 多矣, 恶 顯 之 貫 況格 爲 悪 之殊 之 未 説 反 臭 安 安 而 欲 雖 物

之云 以 之大 曰 自 難言 小 也 然之理言之, 日 0 而 也 誠 若 皆 , 姑 之 事 有 理 爲 以 取 之得 其 義 則 乎 名 天 真 其 地 此 義 實 詳 名 言 之間 無 之, 可 妄 則 得 之 則 惟 亦 而 隋 直 天 意 聞 實 理 其 耳 平 爲 無 所 至 指 妄

是 其 之繆; 天下 秋 天 雜 者 也。 實 之名,若 類 道 實 有 至於隨事 則妄, 冬夏,書 以 爲 也 亦 ,惟聖人之心 不 而 何 各得 無聲 沖 體 同 誠 曰 無 此 也 神 . 則 也 妄 天 漠 此 所 然 然 之 ,而言, 其 無臭, 無朕 理 夜昏 常 ●一行之實亦 謂 其 之 德 則 故 性 曰 : 而 之 物 不 物 義 天 是 天 命之正 已 則 爲 所 明, 之大 無 勉 之所 而 也 理 理、聖人之所 矣,未 洪 至實 以 思 而 則 萬 得 百千 念之實 纖 情 爲 無 中 理 歸 純 以 誠 以 而 巨 實 爲,而 也。 兼該 萬年, 始 德 之 生, 誠 不 無 則 細 而 有 言 名 思 妄、故 也, 亦 則 未 而 夫 不 之, 飛 物 而 無 妄者 誠 若 天 以 始 未 未嘗 雜 是其 元之 潛 以 得 所 也 若 之所 嘗 不 則 聖 所 雜 純 動 不具,然 者 有 有 是 在 大 也 有 謂 植 氣 之 則 是 以 言之 其 小 於 得 生 天 也 誠 也 息 若 春 實 雖 誠 之 之 亦 爲 實

> 仁 之發, 好,得 中 於爲 矣; 無 理 夫 而 至 義者有 實 者雜之故也。 於詐 人物 道 無 毫之不義。 而 初 但 當 善 事之或遺 無 無人欲之私 以蔽之, 而 而 以 其 毫之不滿,此 僞 不實矣。 動容周 而 、羞惡之發, 忮 氣 欺 生, 毫之不仁,義 内 害 質 罔 外 雜 之 性 · 而 而 其 旋 而卒墮於 隱 之, 私 偏 命 惟 此 爲 其 以 顯, 欲 之 德 聖 莫 常人之心,所 其 病 而 爲 則 \Box 生 不 正 人 也 常 之, 貪 所 善 所 焉。 中禮 鼻、 氣 則 不 昧 小 也 以 固 固 是 質 免 7,又極 表裏皆 X 雜 不 爲 耳 亦 舉 是 以 於二 清 之歸 也 之, 勉 仁 莫 天下之 以 目 純 不思,從 以 者 非 則 天下 則 當 日 致 則 雖 所 有 兀 天 渾 表 其 善 其 支 理 之 欲 以 不 惻 裹 然 以 然 丽 之 容 實 皆 其 其 勉 爲 實 隱 則 無 天 而

■ 此句原脱,今據正德本、正保本、四庫本補。

是 外 能 恶 善 執 何 其 天 曰 以 而 夫 日 之 於 之功 去恶 本 理 也 也 則 爲 不 不 人 若是 爲 天下之事 陰惡 吾之病 敢 未 然之 真 何 誠 所 日 而 之心 ()知其 謂 懈 雖 實 免於 實 虚 無 者 固 如 矣 陽 誠 無妄之本 善 周 其 則 所 私 自 善 之 自 子 如 而 凡 不 固 藏 言 而 者 欲 至矣, 其 而 吾之 是 其 而 所 睹 皆有 於 E 之, 反 也。 天 安 以 謂 不 爲 人 而 篤 中 然, 爲 德, 理之 欲 聞 恶 亦 得 誠 私 無 矣。 以 不 其 日 自 Ž 之 則 欲 日 於 而 以 不 知 : 又何患 誠 上 將 大體 間, 其 者 擇 實 謂 私 中者目 不 於 其 然 耳 章 消 能 誠 之 分 善 其 是 如 則《大學》 亦 出 以 磨 觀 德 觀 不去 也 誠 而 是 而 於不實哉 必 而 日 天 之, 之, 之, 泯 者 哉 固 爲 又 戒 適 無 道 滅 執 善 加 諸 所 則 則 何 所 謹 則 奈 之 其 恐 以 而 説 以 其 不 何 但 其 也 論 施 耳 ? 爲 得 懼 爲 古 不 其 虚 非 爲 於 如 /

> 之矣。 得 下 所 失,不 發 章 明 以 程 人 能 讀 道言 子 者深 出 無 乎 妄之云 愚於《 此 玩 矣。 而 默 通 至 識 書 矣 焉 之説 其 則 他 諸 家 説 亦 之 亦 既 是 各 略 言 有 非

之博 得 之, 辨 謹 之 不 欲 善 此 而 可 學? 乎 以 情 所 無 五. 得 則 則 辨 ? 見 之 者 疑 曰 然後 精 故 而 亦 之明 於行; 理 之序 者,又皆 而 未 其 能 曰 學 而 之不 有 有 免乎 不 學 "、問 反 問 也。 則 吕 雜 以 不可 復 行 通 斷 故 備 有 氏 思 之 之篤 必 問 日 事 而 無 以 辨 病 此 以 踐 能 之 0 物 不 不 章 則 發 有 吕 其 審 差 之理 事 蓋 亦 博 最 其 所 氏 實 之 君 凡 然 有 故 端 自 爲 之 而 不能 所 子 序 後 故 及 能 得 mi 詳 説 不 學、 之於天 乎 其 有 能 無 而 口 實, 爲 之 ? 參 積 故 問 以 所 可 思 詳 空言 然 累 伍 疑 以 盡 不 下, 思 之 深 思 師 不 惑 施 而 可 矣 學 友 以 辨 其 貫 以 必 考 亦 而

貴於 質 苦 物 則 不固 以 之説 而 問 可 不 以 以 其 通 而 而 亦 彼 驗 以 能 也 爲 不 博 焉 1,尤有 能 E 矣。 之地 有 泛 此 其 也 盡 問 ,得於外者也。 不 學之初 然 (實,則 也 謹 傷 爲 濫 審。 決 非 而 後 故必 皆 也 而 功 非 疑 而 其 有 若曰 其 無 E 也 非 獨 與 察之不 而 間 然使 思索 以 餘 至於 有造約之心 益 不問 爲 思 問 也, 深 則皆 成 之善 9 反之於身 其 以 造 或 心 學 若專恃 間 或 無 精 精 乎 1得之, 思 太 Ì 也。 而 而 粗 以 也,或太 約 之,然後 深 信 不 審 而 異 略 7,知其 而 之不 故 此 之 後 能 矣 而 而 而 而 不 其 説 可 不 無 所 而 姑從 故其問 進, 止 多 篤 思 心 審 疑 以 也 論 爲 不反之心 與 也 而 貫 變 何 則 而 則 則 則 事 學 理 不 又 守之 化 事 又 是疑 之不 其 不 於 熟 專 也 必 氣 何 调 疑 博 可 非

曰"何以言誠爲此篇之樞紐也?

至於如 然。 然 體 之適 所 以 武、周公之事 有 獨 而 實之存亡 不 也 而 曰 無 也 是 微 妄 以 狀 焉 教 0 可 行 而 哉 誠 也 可 極 此 離 性 ,所以實乎此理之實 也 此 聖人於 鬼神之 實 一,其 毫 者 者,此]者,又 1 而 此 (理之體) 之盛 之為 鳶飛 而 平 實 也 「道 實 在物之實體 不可 常 理 孔 而 理 因 一,其示 不遠 此 魚躍 不 費 之 者 已矣。 也 之實 因 其 揜者也 用 可 子 而 功 也 揜, 流 體 也。 之言, 隱 效 人 以 蓋 也。 用 者, 過 也。 也,亦 以 其 動 道 自 天 則 天 之實 與 下,至 也。 命 無 充 然 言實 又 皆 隱 戒謹 地 其 九滿,夫 不 中 云 其 而 實 之 欲 位 及,不 而 毫之不 庸 中 者 當 實 發見 理 見,微 其必 理 於 恐懼 品 云者, 和 萬 然之實用 者 應 之 大 豈 實 節 云者 物 一, 之 用 見 以其 用 而謹 理 舜 無 實, 之也 之 育 所 之當 實 實 之原 實 廣 文 也 顯 以 所 其 而 mi 而 理 理 則

之事 之功。 故 以 命之性 也。 其 之意 嗚 實 正 必 務 無妄 其 發 期 大 呼 省,皆 言 深 明 ,皆所以 實 經 於 百 哉 雖 實理之本然 辟 之 之 不 而 實 實理之原 所 刑之, 多 愧 者 初 極 7 以 大 屋 功 心 實 而 反 人 本 漏 也 而 其 化 乎 復 而 者, 言 此 樞 參天 而 也 乎 天 欲 卒章「尚 也 言 之序 紐 戒 此 也 地 人 不 無 也 謹 八之實 内 越 聲 而 也 而 恐 省 乎 語 誠 蓋 贊 無 絅 懼 者 明 其 誠 時 此 此 臭 化 而 之云, 之 理 篇 靡 所 育 以 又極 謹 無 有争 以 大 而 己 獨 則 下 言 指 無 乎 口 克 又 至 累 亦 妄 也 專 戀 克 本 於 天 真 章

之手 切 者 誠 爲 所 筆 惟 傳 或 得 問 也 先 録 其 明 誠 亦 訓 其 諸 明 可 以 乃 1 以 内 顔 説 見 外 子 條 彼記 道 好 日 以 行 : 學 録 知 爲 程 論 者之不 語 誠 子 中 明 明 諸 語 説 能 以 似 而 行 皆 無 程 不 失 親 學 子 語

> 之辨 於性 楊 者 至 行 氏 失 論 矣。 也 聖 則 於 其 性 遠 一、教 所 雖 賢 張 云 非 教二字得 矣。 無 其 之 子 E 者, 所 当皆 事 品 蓋 日 得 以 非 之, 以 以 誠 爲 第 申 所 性 至 説 即 之, 實 然 故 以 於實 則 明 然之説 教 未 有 言 而 也 分爲 似 究 由 性 然不 於 其 未 恐 誠 之之 誠 學 也。 得 立 字 亦 至 易之 其 言 明 不 事 兩 然 以 本旨 之 能 本 地 其 塗 至 而 意 語 無 爲言 過 簡 之 不 誤 也 而 於 至 易 所 程 不 游 云 吕 以 子 以 則 E.

其 天下 是 助言 録 子 至 也 事 以 之理 於 盡 或 而 論 問 命 其 極 己 窮 一,未 言之, 之忠、 論 則 理 至 贊 盡 嘗 亦 誠 天 非 若 性 不 盡 盡 地 正 有 以 物 性 之 至 解 9 口 之信, 諸 化 而 於 此 疑 説 育, 語 命 文之意 者 爲 其 如 而 而 盡 分 蓋 何 日 日 其 嘗 ? 今不 則 只 不 性 竊 未 窮 口 日 論 嘗 蓋 以 得 理 0 便 誊 天 程 THI

不 理 全 所 勢 明 知 無 之事 非 人之所及,而 天地之心 心 地 其 謂 前 同 至 不 之氣 此 理 人欲之私 天 也。 命 只 得 地 而 理 事 理 自 雖 是 之所 不 之意多 不 盡 亦 然之勢 若 一之致,多或未 而 其 古 若以 ,而贊天 然,然亦 偏 以 人 人之所 言 不 理,而 體 爲 盡 則其 此 人之所爲,又有天地之所不 「,是贵 而 前 同 其分言之,則天之所 即 也 物 而 讀 也。 也。 天 之説 天 推 及於分殊 地 所 者 不 爲 地 又況 之, 有 之化 以 人所爲各自有分, 蓋 無小失其平矣。 亦 但 之 而 代 人 莫 分殊 則 則 察,故程子之言 體 聖 天 其 物 之省 生 程、 其 尤不見其 人 哉? 而 所 者少,蓋 其 天 説 之狀 張之論 理物者 純 以 地 也。 1 初 於 爲之者 之 故 亦未 即 人 爲, 義 間 至 凡天 抑 天 有 乃 理, 莫 嘗 於 乃 惟 雖 揚 古 彼 地 及 不 甚 窮 爲 其 之 發 非 以 莫 之 此 F 天 有 而

> 身, 善 格物 無 而 也 固 又有所不足言 而 别 言 吕 不 誠身之意 蓋 尤 當 容 則 以 確 有 如 其 理言 實。 漸 張 親 次 子 疎 楊氏 之, 也 然於此 當當 之言 遠 ,胥失之矣。 近 則 如 萬物皆備 淺 也 程 精 論之, 深先後 子 粗 日 之論 本 末 游、 云 則 者, 反 楊 又 若 初 求 不 又 説 以 無 前 其 於

於

事

致

異

章

乎 之質 禀或 所 之 爲 自 盡 極 全 非 厚 性 能 謂 使其 異。 薄,或仁或義 是 舉 悉 擴 各因其發見之偏,一一 或 問 其 充 而 也 E 薄 自其 復其 其 全 完 致 者厚 若其· 四 體 具 曲 初 性 一之説。 端者是 而 9 而 次 以 而言之,則人 無 即 異 則 或孝或弟, 其 所 者 此 曰 : 氣 不 善端 也 章 同 盡 而 所 人性 則 上章 推 言之,則 程 謂 所 不 自 子 之,以 而 發 致 能 雖 之言,大意 孩 曲 不 所言 隨 有 能 同 提 至乎其 惟 其 以 而 同 聖 聖 貫 所 至 而 矣。 誠 禀 氣 子 诵

耳。 失其 若張 子 進 各有 與? 見 似 則 自 隨 氏 通 衡 故 如 和 乎 以 誠 説 變,化爲 事 有 此 而 所 、指矣。 次序 化 爲 矣 楊 内之節目 子之説 用 亦 疑 如上 至於 旧 無 立 爲 動 氏 力 於 得 則 其 與 卓 大而 矣 既 之, 不應專 悉 專 明 章之説 無滯 所 似 於 爾 蓋進 有 以 務 而 動 以 以 論 之意 但 化之之化。 亦 衆善之意 光 推 又 變化 明 明 不 説 德 也 輝 則 安得 致 日 於 詳 爲 爲 之序 致 亦 皆 發 化 其 豈 則 之 内 兼 通 自 曲 外 以 氣 且. 非 如是之繁促 其 亦 説 而 由由 照 明 己 爲 其 學問 質 以 若 記 之 遺 此 又以 字 而 明 進 則 之 由 中 動 以 者 其 其 明 人, 矣, 不 達 乎 爲 亦 所 基 篤 之 爲 外 上下文意 9 形爲 同 徙 無 之 自 外 内 偏 行 略 己 既 世 而 哉哉 者 射 義 所 人 以 厚 之 非 又 而 參 以 易矣。 及 而 言 ? 爲 變爲 理之 鶴 引 本 且 失 所 前 物, Ż, 説 則 游 夫 之 自 不 意 鳴 明 倚 無

> 曉 物 相 承 不 今 誠 續 固 且. 不 節 於 能 明動之間 以 盡 就 録 然亦 至 誠 動 本 不 文之外 物 可 之 不 辨 意 也 尤 别 生 不 無 口

八四

教之説 之言 實。 矣, 數 謂 者 者 是 前 其 爲 也。 游氏 哉 推 爲 ,故就之而 知 或 不 論 驗 逆詐、 乃 妙 間 真 ,●如嵩 動 之煩 哉 口 且 心合於氣, 至 大 平 ? 心 貴, 誠 其 不 兀 無 Ш 論 程 意 . 億 事 如 體 而 形 子 想 理 其 神 賢 爲 不 而 之説 測 朕 優 用 氣合於神之云 董 於 多,非 信 氣 威 度 兆 便 五 至 有 儀 之已 之 而 經之徒,亦 近二之論 誠 常 物,若之 之 私 日 之 以 則 先 形 世 前 其 者 覺 而 吕 不 亦 知 者 得 氏 何 尤 非 蓋 何 用 有 也 得 爲 非 儒 害 而 能 天 之 其 有 者 前 異 反 確 如 至 不

0 教」, IE 德本、正 一保本、 四

術

爲

所

誠

知

知

以

得矣。 皆實心之所爲 死 聖人之心亦至實, 故自古至今, 理言之,則天地之理至實,而 讀 之爲言,實 心之實而言者 實而言者,如 物之義 又老、莊之遺意也。 而 如 始至終,皆實理之所爲也,以 者各隨 ,故讀者或不能曉,請得 然論之,其説 子説 或 所謂 亦亦 事之不實,而 問二十五章之説。 其 乃 而已矣。 惟 誠 文 與 無 如如 日 程 也。 者物之終始,不 意之所指 下 雖 誠 子之言爲 物 文相 而 日 高 不 此 誠者物之終始,不誠 無 反諸身不誠之類是也。 然此篇之言,有以 之不 可揜之類是也 然於此 所 一息之妄,故從生至 應。 謂 事之中,自始至終, 而 實 誠者物之終始者 至當, 而推言之。 尋之, 游、楊皆以 曰:自成自道, 而 無 誠 爲 無 心言之,則 一息之妄, 無物者,以 則其 然其 物之中, 所當,且 理之 義 蓋 言 有 無 各 以 誠 太 無 待

> 者也。 自其間 然也。 於心者,必有是心之實,乃有是物之實,未 理,方有是物,未有 本無不實之理,故凡物之生於理者,必 謂 蓋 之時,所爲皆實,而去此之後,未 皆實,而三月之後,未免於無實,蓋 終始,即 無有矣。 爲,皆無實之可言 未免於間 有間斷之前,所 不 至焉之終始,即其物之終始也。 誠 在人者本無不實之心 斷之後,以至未 苟未至於聖人,而其本心之實者 無 其事之終始也。 如曰三月不違,則三月之間,所 斷 物 者 則 然 自其實 爲 也。 無 雖 無其 不 以是言之,則 有 有是心 實者 相接續 理而 其 日 事 月 →故凡物之出 徒有不實之物 之 之前 及其 至 亦 焉 初 免於無實 無 間 ,以至 則 凡 是 不 以 在 斷 違之 則 有 天 至 異 所 者 所 此 猶 是 爲 於 則

^{■「}本無」,正德本、正保本、四庫本作「或有」。

發明。 也。 亦不 言 猶 几 誠 仁,而凡言仁者遂至於 心 所 有 終則 之無 是以 時 主於行,故各就 有 知 謂 失經文之本意。 無 之運 旧 吕 誠 亦 又 未 徹 其 有 物 之在 未 謂 楊 爲 氏 盡 心 頭 爲 始,天行 直 亦 安。 成德 所論 己, 之 氏之言 者 徹 説 誠 以 實 天 尾 不 則 太 則 天行二字爲 誠之有 X 蓋 子貢、子 而 爲 者 待 成物之功 高 形 德之殊 蓋 能 子貢之言主於知,子 實 也」之説 蓋 其 其所重, 而 (理,而 有 多類此 而 如 IE 輟 其 物 有 此 思所 無字 往往至於交互 猶 而 物, 物 而 後 蓋 知 "。假借 廢」,蓋 不知其 E 之實者 解 其 之可 而 最 言之 無 不 愛之不 不 也 餘 有 待 也 誠 蓋 説 依託 賓主之分 諸 異 訓 形 在人 則 本於《易》 亦輟 楊 經之大 也 其 説 亦善 其 而 足 輟 氏 差錯 日 有 思之 亦 以 爲 而 而 無 説 大 程 不 後 病 物 而 誤 盡 實 抵 子 由 無 所

> 時 有 無 之意 之運,夫豈有 不 實之心 0 而 其 又 直 時 取 以 而 譬 天 己 也 無 者哉 亦不 不 實 親 之 切矣。 理 喻 彼 夫 人 兀

於其道 然。 積 日一不 息 無 矣。 位 最 所 心 貳之意,亦假 謂 ,以至於與 ,皆實理之自 爽 ,然後爲 爲 天之昭 而 吕氏所謂「不已其 若如其言,則「不息則久」以 繁 至 或問二十 非 日 而 前 誠 雜 所 其 語 無息, 昭 無息 天下 以 命 亦 如 以 天 有 借之 明聖人 六 不已 游 耶 以 地 至於無 然, 病。 化成之事,其所 章 ? 至於博厚 合 類 楊 雖欲已之而 之 其 德 蓋 天道之自 也 游 無 説 命,不 窮,譬夫人之充 德 天 字字 意 氏 息 道 又 則 不 日 高 則 聖 雖 ·已其 以 甚 息 0 明,乃 然矣。 是 人 密 得 善。 之 此 不可 積 F 之所 有 德 而 辨 章 而 意 意 形 至 聖人 而 得, 之 成 於 恐 其 又 以 意 則 容 何 此 説 以 地 未 不 不 疎 童 自 雖 不

若 者 勝 道 致焉 而 夫豈 於不已 是 語 道 積 乃 内内 其 致 可可 納 著於 不 甚 也 大 其 而 曲 之於 繁 儒 叮 天之所以 積累 後 ,失其旨矣。 無 氣 外精 善善。 一言 之 不 乃 成 碎 故 息 象 則 兀 明 内 察 穿 漸 也,故章末引《文王》之詩 然 方論聖人之事 功效之謂 或 其日「天地之道 粗 亦猶吕氏之失 方」者是已 而 動 ,於其 也 鑿 後至 次之謂哉? 不 變化 盡 爲天,文王之所 各有 察 而 」,蓋未覺 於誠 楊 粗 乎 於其 攸當, 此 者皆欲 此 氏 若 章之博 前 非 本 動 由 鄭 若如吕氏之説 謂 指 也。 而 不 於 ,聖人之德 其 以 而 氏 推 在 Ė 無 其 天,故無息」之 所謂 又 語 失之愈遠 厚 而 以 $\dot{\mathbb{E}}$ 一然後 大抵聖賢 外 非 曰「天 之更端 高 致之於精 爲 之 者皆 極 文,皆 明 以 德 至 純 致 蓋 證 無 亦 欲 地 於 誠 學 之, 耳 之 不 近 原 之 則 引 天 待 之

楊

德

形

優

義

吕

張

者人之所得 前 益 優大 始始 句 以 去智 有 而 德 氏之説 氏 子 元 爲德性 凝夫道 相 甚 所 無 備 ,然後乃 所 無 因 或 反 矣 一,爲極 爾。 Ż, 問 對 不 止 哉 論 準 有 亦 行, 之説 逐 則 明 廣 所待於道 然 禮 温故 十七七 則 故 旬 游 之 其 能 高 不 須 大 非 氏 爲 則 爲 物 禮 既 行 明之意, 不 可 高 更 道 知 義 是 分 章之説 者道 未 誤 之 曉。 口 明 以 新 所 别 所 善。 則梏於儀 矣, 偏 也 也 之分,則 游 條 謂 至 謂 敦厚崇 體之節 蓋 廢 其 而 甚 又 德 道 道 楊 而 今乃 道 諸老氏 又 以 者 티 : 至 者 以 者 大意 爲 日 其 德 説 禮 章 無 以 自 切 文,必其人 又 乃 德、 失 器 爲 足 於 諸 道 然之路 方 古 禮 不 之言 爲 愈遠 之, 數 得 張 非 爲 無 地 文 足 説 虚 之末 之, 德 義 禮 德 備 則 以 平 無 然 但 矣。 之 德 天 惟 其 以 凝 恍 離 則 細

誤

道

惚

蕩

而

欲

有

之盡 句,承 此 所 以 故 庸 可 具 不 分之 不體 又一章之通旨也 脩 也 也 大小二意。 不崇禮 知 一之,極之道之,温之知之,敦之崇之,所 是德 新 新 ,厚也,道之大也; 章 則 ,故居上居下, 也 · 首道 温 敦 而 禮 此 故 凝 厚 然 體 則 是道 然後 也,道之小也 如德 後 諸 大 有 説 小 也。 性 有 以 而言 之所遺 在治 也 以 知 問學 以 崇 一,廣大也, 新 故故 其 在 禮 也 亂 也 於道之大小 而 尊 一,精微 而 温 句 之道之,致 無所不宜 大抵 敦 故 之内 高 厚 又 也 明 此 又 不 也 無 中 不 五. 可

彼 以 官 未 何 此 制制 有 爲 耶 能 ? 争 天下之共 或 度不行於天下久 更姓改物 雄 問 日 不能 子 當是之時 主 思之時 相 ,而定天下于一者也。 諸 尚 侯 ,下及六國之未亡 雖 (矣,其 周 周 有 室 室 不 衰 雖 臣 微 衰, 口 之心 軌 禮 而 然 同 樂 人 一, 猶 猶 失 方 則

者, 六尺六 有外 人尚 下之耳 周 出 天下者,必改正 書文,何 也 所 謂 行於道路 通;不合乎此, 廣 見於書傳者詳 不待禁而自 之文 門合轍 狹 及 必合乎 日 輿, 史掌達書 者 如 周 軌 Ė 軌 寸,故其 以 禮 畢 而制 無 一,蓋 ,自將偏生 能 **当**司 至」者 孰 而 此 無 不 不 若 作 得 有 徒教 來 爲 名於四方,而大行 言 矣。 則 然 一朔,易 轍 其 是 而 之 遠 也。 矣。 其法之同 不惟 後 迹之在 其 變 則 倚 法,領於冬官,其 心 邇 民 軌 口 之 以言 必 杌陧, 志 服 道藝, 古 文者 者,車之轍 有 哉 以 莫 同 色, 語 若三代之異 司 不 行 也 ? 地 其 所 9 殊徽 而 得 ? 而 書 乎 齊 者, 兀 而 謂 E 跬 以 書 方 之 海 同 0 日 討 相 號 春 步 閉 人之法, 居 内 點 之内 迹 周 0 之,而 距之間 不 其 秋 門 凡 典之 以新 古之 之 畫 而 也 前 尚 傳 造 一, 爲 車 無 形 政 車 庸 有 其 重 周 動 象 4 所 其 天 亦 不 則

然後 於 雖 厝 又 制 秦 其 每 車 始 滅 九 末 改 以六尺爲度,書以 六 歲 流 爾 或 而 海 内 而 喻焉 孰謂 其 分 號 裂 子 其 令法制 思之時 而 制度之詳 猶 小 不得 篆 有 而 隸 以 遽 變 如此, 書 同 然哉 也 爲法, 於 天下 必 是 至 以 而

文義 爲 則其善 者之不爲 焉者以 則 通 説 吕 其 0 則 是 不 惟 有。 多近 矛 氏 同 或 位 吕 位言 行 又不 問 亦失之,惜 盾 不 氏 雖 似 者 霸 二十九章之説。 也 可 程 王 1,宜不 足 無 者 説 而 以 子 所 稱 事 日: 以 若 爲 復上 亦 差 也 耶 乎其不 得 口 得 迹 因 也 然 ? 爲 之耳 言 以 亦 矣, 鄭注 則 相 者 何 티 : 天 上 以 説 因 易者 疑 也 地 焉者 霸 上句 日 以 至於 哉 然於文義皆 且 者 故 ? 王 其 又安知下 「三重」 以 日 之 以 道 上下 天下者 有辨 日 言 不 事 時言,下 推 一 謬,言 之, 者 而 焉 平 此 言 也 者 章 焉 而 不 諸 ? 而

> 法度, 驗乎 也 故 IE 道 無 近 者 者習,其行之有常,故 也。 形 曰 近也。 後聖未 ПП 不悖,言 人所 人之所當守也 遠者悦, 難 知 共 至 動,舉一 由 與其自然者 故 而 其 兼 難 日 德之廣 法 料 無 身兼 9 與 疑 則 故 久 則 被 謂 行 日 謂 而 無 而 準 與言 不惑 安之也 出出 故企 所 言之也 則, 有 拂 謂 加 以 也 而 人之所 言 0 驗 慕 遠 之也 乎 法 鬼 有 取 謂 神 以 明

子之所 化。 者, 之, 者,小德之川流 迹 也 言 大德之敦化。 則高下散 由 是不 之, 以 或 其行之有不 問問 謂 此 則 口 推之, 小 兼 由 以 德 内 殊 其 大 外、 者 可 書 事 時 以聖人言之, 德 見 純 之有 言 該 小德之川 不食 之説。 諸説 亦 本 也 不已者, 得 姑 末 也 之得 夏 而言者, 티 : 以夫子 迅 時 流 失矣。 則 雷 贊 大德 物各 於 風 (周 天 已行 烈必 穆 何 之 地 付 不 也 日 易 言 敦 物 之 己 ?

皆律 襲 授 以 何 居 而 也 貢 以 也 推之, 安也 一居宋 慊 水 方 民 》、述《職 律 於是 天時 土之事 · 而 天時 加 至 其 其 則古先聖王之所以迎 於 而 而 哉 之事 之意 方》也 廣 大 其 章 仕 也 甫 至於昆 至 襲 止 也。 可 久 也 於 水 見矣。 使 速之皆 禪授放 由 土之意 夫子 以 其 蟲 其 至 所 草 行之有居 於 由 而 以 木 當 伐, 可 用 得 體 其 各 其 見 捨 書 邦 國 各 遂 日 口 矣。 行 家 之 其 經 以 推 也 魯 藏之 有 野 其 也 性 筴 若因 而 而 者 序 時 所 逢 則 頒 其 者 設 朔 禹 是 遇 掖 亦 所

物之資 失之。 也。 但 睿 智爲 不 知經綸之爲致和,立本之爲 經 或 君 問 蓋 也 德者 以 聰 至 容 聖 下 明 執 至 ,得之而 睿 敬 誠 智者,生 家之説 别 説 則仁、 未 盡 知 亦 日 安行 義 其 . 或 楊 寬 致中 得 禮 而 裕 氏 其 智 首 以 以 文義, 之事 出 聰 知化 下 則 庶 明

> 皆 耳。 之爲 至 下 善 誠 於 游 焉 之 窮 道 氏 有 理 者 以 所 以 至 得 上 倚 於 章 者 之。 命 爲 無 其 言 所 Ħ. 説 至 屬 F. 自 聖之德,下 於 則 德 至 爲 者 誠 不 其 者 得 用 無 章 其 以 所 - 爲言 綱 領

於其至 焉。 身, 先 於高 聖 則 所 道 自 而 知用 所謂 其 人之 以 然之效, 脩 而 所 育 遠玄妙之域,輕 蓋 或 馴 道之 問問 以平 近者 以 德 淡 心於内,不 致乎其 於此 卒 而 而 教 而 章 者, 篇 而言之, 極 中 不 與與 而 ·之説。 其 極 厭 可 庸 無 論之, 夫 盛 之 求 見 聲 簡 也 矣,子 天 極 以 自 其 臭 人 而 地 日 則 之 君子 知 大 實 功 示 文,温 . 之 ,然後 德 天 也 可 入德之方,欲 而 思 承 所 篤 命之性 故 尋 反失之也 懼 上三 以 恭 而 以 夫學者 此 可 以 位 而 理 此 是 至 以 章, 率性 天下 章 謹 知遠之 萬 而 誠 故故 · 論 之, 學 求 物 既 終 盛 獨 平 言 之 Ż 反 誠 德

大 成 引《詩》,自「衣 條 耳,與《詩》之訓 其 他 功 近 大學》敬止 其 夫 Ŧi. 反 言 誠 貫 日 焉 知 不 條 之極致 色,以 本 不 而 之,以至 意 亦 而於文義 非 風 顯 之事 ,始學成 并言之,又 顯」, 此 之自 日 空言 之德 吕 章 反 至 氏 之 其 而 則 又申 身以 也 亦 也 錦 既 知 無 例 德 反之 極 既 尤 義 充 微之 尚 失其章旨 以 聲 疎 而 也 明 然 失 多未當 不 謹 尚 絅 今以「不 後 無 其 後 以 密淺深之序 而 其 同 獨 二,以 顯」者,於此 Ê 三條者 本 諸 臭,凡三 網」之心 所 蓋蓋 極言之,其旨 章 而 乎 也 説 以 旨 已矣。 至「不 又, · 而 下學之初 亦 入乎 顯 如 矣。 如此 假借 何 維 不 亦 以 以以 條 也 此 故 德 顯 章 ? 得 通 此 爲皆言 可 ,皆所 而言,若 章 承 爲 維 其 至 深 首 見 日 自 心 進 凡 Ŀ 綱 其 德 通 . 哉 章 則 其 **写**不 德 前 以 文 德 領 程 遂 極 成 無

者之言。 耳。 神 所 如 也 而 近 後 誠 親 動 微 風 工 作 世説 毛 於人」, 明 謂 誠 之顯 之自 以 之之事 長 夫 而 用是: 注達 學之不講,其陋 居 其論 爲非 敬、 淺 以 無 於天, 者 深 一,爲 藏於中 下 諸 不言 性」之談 次第, 所 乃 前 則又審 「不失足於人,不失色於人,不 大程夫子不能言者,蓋 爲 天 一知,未 則 謂 知 知 有 下 而 則 猶 其 見 心 深取 信」, 則 離 又 有 爲篤 無交於物 失與 之 於 聞 免 又 文義 聲 而 人 接 至此, 精 牽 動 乎 失 爲 色,至 而 不 恭 吕 物 其「知 微 其 作 合之病 察乎了 之未 人 7 而 之事 氏 明 皆 條 敬信之; 於 泊然 亦 一於無 天下平; 同 達 理 由 獨 風 當 口 矣。 暴 心 翁 之自」之説 者 而 憐 ※聲無 者 楊 其 純 著 出 習於 非 序 然 也 氏 以 9 論 素 至 文之 簡 以 也 臭, 以 以 貨 以 佛 德 之 非 知 德 獨 游 色 氏 儒 與 然 爲 風 輶 氏 知 知

之自

太遠。

其有所從來,而不可不謹, 者,而益以言語之得失,動作之是非,皆知 與吕氏舊本之説略同,而其取 要當參取吕氏改本,去其所 則 庶乎其可耳。 謂 證 見 又皆 聞

失也。

侯氏説多疎闊,惟以此章爲再叙入

以「德輶如毛」爲有德而未化,則又吕、游之

德成德之序者,獨爲得之也。

學而第一

凡十六章

之事 是也 則 能 也。 之未知 者,有所效於彼而 曰 既 . 其 習 加 學而 習之字從羽從白、《月令》所謂 或問: 所 又以 效夫能 之爲 學 曰 : ,而效夫知者 知 者熟, 時反 學而 學之爲效,何 鳥 且 者 數 能 復 而 以以 矣,而 飛 求其 時習,何 而 中 温 何 求 心 以 繹之,如鳥之習飛然, 成 於 也? 其 悦懌 求 於我之謂 其 能, 也? 以 其 所 説 也 曰 : 知 皆學之事 知 也? 日: 之 《説 蓋 以己 鷹 也 理,所 人而 所 乃學習 曰 : 文》文 之未 以己 謂 也。 言 不 能 學

> 是 故 是 則 亦 者,必皆有以自得於心,而 從容於朝 而 不 能 人心之所同然,非有我之得私 及人,而信從者衆,若何而樂耶 而 ,則無 時 表 其 不足以 所 既學矣又必 無 其 八中心: 裹扞格 知者 胸 事 可 則工 嗜 中 以 固 喻 油 益 之味,危殆 雖 夕 夫間 若 知 其 精 欲 然悦懌之味, 俯 其 而 冥 美矣,此學之始也 身 勉 仰 時習之,◎則 無 所當 斷 行 焉 之中,凡 與 以 而 以 事 杌隉,而 而 致 E 知之理, 自 相 無 其學之之道; 矣。 進 安, 以 雖 不能以 其 其 成其習之之功。 然學 芻 亦 而 無 所 無 也 豢之 心 且 ? 學 所 可 以 與 矣 枯 語諸 即 能 而 能 向 日 日 甘 理 燥 者 之安矣。 而 習矣而 知 其 也 0 生澀 於口 相 不 人者 益 吾獨 且 以 所 理 習 涵 固 當 能 義 善

2

時」下,正德本、

IE

保本有「時」字。

語或問卷

^{■「}曰」,原脱,據正德本、正保本補。

九

DП

爲 於 知者 善有 説 中 相 所 信 得 如 何 曰 加 뻬 以 0 外 能 前 雖 同 以 之, 加 是 也 宣 此 常人之情, 之也 ,彼亦 以及於彼,彼之心 得 食 損 其 深 世 以 也 律吕 之率 吾之所得 雖 於己者既 倀 於 求 日 衆 亦 足 則 我 若 倀 也 X 人既飽,而 諧 從 曷 以 人不 哉 之 聖 不 和 其 而 爲 而 爲 則 門 得於其心之所 ? 知 歡 亦 知 不 説矣,然以之告人而 而 知 將 足以 之學, 也 不 獨爲 忻交通 之也,吾之所 莫之從 然 能 而 皆 不 知 人 達 足以 及 不 有 九 人知之, 有以 雖 而 則 · 愠 於外 人不下 以 人,人之信而從 己之私 ,則是 或 不 以 宣揚 方其樂矣,是 得 何 得 聞 爲 能 耶 其 同 以 此 不 乎我,吾 ? 己 能者 發 獨 咽,則吾之所 心 矣。 也 爲 愠 矣, 不 而 暢 擅 之 今吾 君 者, 知 己, 乎 所 人莫之 是 夫 而 子 雖 彼 此 學之 之所 信之 有 我 者 之學 猶 本 同 也 宫 亦 理 之 又 待 商 從 然 + 非 亦 ?

者,以 之哉 者,其 知,而 安,而 性 説 已焉 非 尹 曰 : 應對之事,正門人小子 也 有 目 然諸説 習近 一,而 凡 此 成德之君子,其 不 就 而 重 篤 學皆 大學 則不怨不尤,下學上達 臨 能者言 學之終也 處之泰然,且 其 有 不 復 遠 ,養之有 或概舉 能 日 事 相 所 及伊 思 . 未 耶 發 相 然,不以大小 指 釋者, 程子之於習 ? 必 也。 之功 兼 亦 其 尹之言 果 不 0 凡,而 日 惟 各 厚, 學之爲道 能 焉 티 : 孰 以 略 0 程 有 真 能 ,守之有 不 知者言 無纖芥含怒不平之意 子 所 學有大小 則與此 所宜先 不 不指 然 之? 然 而 則先後 有 動 發 諸 也 有 也。 明 不不 説 其 不 兩 間 也 雖至 自 章文意 也,聖 學 目 固 越 義 如 9 是 今也 兩 也 但 此 愐 范 乎 所 焉 於聖 H 言 或 則 范 兩 學 所 人不見 各指 人 進 居 皆 且 何 爲 氏 謝 端 之不 在 世 習 謂 人 指 洒 而 彻 不 所 口 不 略 學 類 其 我 掃 而 其 引

之難 之可説 異 借 其自爲矛 説 子所 夫習 耳。 或借習矣不察之云 意 自得者近之。 而 兑卦》之《象》**,** 説 事 亦 ,則是所謂習 最釋經之大病,蓋 或旨 謂 疎 而 日 而 而 則不待習之 ,乃人心之同 其 使 浹洽者是已 熟 其 釋此之易; 意 盾益 或借理義悦 次則 時 意 熟 於説 略 E 而 似, 之所 然范 甚 惟 親者引之而 而串者, 乃有「比於説 説, 又 矣。 范 串 不 以 氏 氏 以 脉 而 或强以 爲説 或 之 然,不待習而 而 或文句偶 相 心之云以 本 而 説 胳 向 又未足 以 所謂 祖 已説 關 爲 諸 貫 背 爲 其 反疎 則 也 知 實 通 彼之有, 説 説 德 而 串 矣。 所 殊 察之與 爲 聚 以 未 ·, 尹 者 最 孰 同 且 以 義 盡夫説 爲 当皆 説 而 IE 近 其後 或 凡 脩 氏 E 而 後得 精 ? 夫説 則 説 習 身治 旨 並 之 莫 而 明 反 切 者 復 己 者 形 以 意 缘 理 所 知 日 之 也 也, 此 彼 實 假 爲 義 語 引 謂 以 程 0 引

> 益 取 曰 : 經據 有所 至於 亦不 決。 獐 之 之不二, 而 於吾之所 日 而 邊 而 0 放 察 彼彼 益 朋 謝 乎 發明 察 周 免 其 之 反 以爲 又安能 來之 故 偶 言外 氏 爲 鹿 暗 氏 而 則 必 朋 也。 獨 倚 值 説 親 樂 甚 是 鹿 借 樂, 來 以習熟爲言 重於 文意之適 見 ,則首! 以 則 其 邊 自 未 豈 其 之意 而 而 彼 爲 之獐 遠 奈 相 能 雜 人, 自言者之的 尾 此 高 與 何 而 自 以習熟爲常言,而 之 俱 衡決,氣 此 而 ? 講 如 來 信 其 同 循 昧 取 學 何? 哉 則 前 日 最 間 環 而 信 而 似 則 謝 無端 藉 於 無 欲 脉 矣 然 以 以 我 曰 : 氏 確 外 外 前 顧 耳. 不 後 爲 爲 方 之大弊 而 ,終不若出 數者之患, 以 通 樂 資 樂 不 爲 而 亦 真 相 卒 其 其 止 慊 習 以 彼 而 實 明 無 察有 可 其 耶 不復 爲 義 以 也 忧 熟 所 以 如 理 所 爲

❶ 「旨」,原作「志」,據正德本、正保本改。

九

哉? 耶? 耳。 語 説 侍 孰 其 助 則 以 而 不 也 以 之出 二以 焉 耳 樂 無 程子之言求之,然後見夫可樂之實耳 IE 譽 爲 而 但 與 前 至 有 非 決於吾 古 日 且 善及人而 字之 於己 於此 所 於 以 於 引三 讀 古人之言,必 初 然則程 謂 知 致 才 、之引 程 無 胡 之,則 虚 以 大 不 子 心可 氏 所 樂 而 設 彼之有,形此之無者。 講 而 所 其 主 讀 經 以 信從者衆」之云,纔九字 子 之爲 春 友遠 也 者 亦亦 謂《 次 而 矣,豈待 是 爲 所謂 非 秋 藉 不覺 則 以 言, 引《詩》 易 吾説 憂,則 彼 游 見之 此 以 獲 不 ※語 則 以 氏 爲 自 其 麟 見 此 又墮 已 7 所 樂於 之 幸 爲 明 知 是 而 非 7 書》以 謂 也 而 他 卒 而 講 而 後 其 而 於 充實 成物者爲 有 驗 學 人之辭 無 判 資 立 假 且 驕吝之私 之實 爲 悶 以 耶 意 借 夫樂 幾 彼 又 輝 者 證 爲 有 之 之 無 以 光 爾 也 其 與 爲 所 非 病 沂 且 惟 何 而

外 知之耶 者,人 之知 之説 若 爲 且其 善 存其 則 或 乎外 皆 九 或 程 盛 乃 以 E 有 不 子 出 五. 此 下 以 德 之萬物 不 及此 耳。 非 者 德 求 過 於 自 孰 亦非 然者 焉者之事 潛 、脩其身,故人莫得 高 ? 以 心 又 ,至於九 知 知 爲得之? (安得 樂爲 龍 而失之矣。 而 説 之,豈必 而 此 有 而 耳。 咸 無 反 則 後 程 所謂 意 在外 覩 悶 其 以 方 子 人 於 言 假 反 爲聖人之德 而 得 之 得 有 則 人不 求人 或者 日: 也, 有 借 於 德 以 則 内 爲 是《乾》之六爻 至 求 而 外之 内 以 博 知 失之甚 下焉者 知者,正 之不 君子之學,固 其 乃 知 病之 焉 爲 而 ൬ 以 之 爲 而 辨 積 未 化 有 説 則 知 聖人之事 心 知 耶 何 矣。 滿 能 之爲 之,下 ,然後 又謂 則 亦 ? 也。 以 諸 於 達 既 疎 也 宜 中 内 日 平 日 矣 Ħ. 小 焉 然有 獨 見 不 上焉者 而 X 加 世世 當 外 貶 戾 得 求 者 知 不 發 説 初 形 日 矣 也 越 實 愠 諸 而 U 九 加

約

心

程

説

阨

尹氏 終爲此章之説者 惡以 厚與 君子 待厚者,又有謂安於命故 亦猶聖者能之之云耳。 未之思與? 之貴者哉? 求 有 且樂 ,則庶乎其 子、楊氏爲得之也。 窮 此 之不愠 爲 明 迫 不 之知 理哉 有 則又 尤切 便能 之者 憫當之,則亦已太高矣。 於不得已 以 然豊 ? 見其 過 不 ,自見其 (無慕於: 使 則非 又引孔、顔之樂以 高 異端之言 有 · 愠 得 人之始學 有 引 而 者 而 何 失,然亦 其類。 幸 有 老 後 「,則 、外矣。 自私之病 聃 如 無 人之不知 然哉 1,大率如 至論 其 知 ? 可 又有 説 又有以 愠 我 不 無所當於文義矣。 即 日 者 温者, 其 似 耳, 豈以 知 謂 又有引不念舊 希 亦 所以然者 明此句之義 此 是其言之也 有信 是 又有以爲 不 而 夫 太快,不 遺佚不 則 ,引者豈 説 皆非 愠 自喜其 君 我 於始 自待 以 則 貴 子 <u>\</u> 其 团 以 則 怨 若 其 既 之 夫 中 自 身 偶 不 爲 復 也。 過, 意 贵 曰

謝氏 力行, 張子 皆中, 舊爲差約 暢; 重,意味 大者 矣,敢 牽合支離之患也。 者,或有柔緩之失; 追 有 品 0 如程子之所譏者,然其大體非諸 日: IE 之書,今本出 之學 通達 是諸 不 區之所敢議,然嘗竊 ,或失於未精 而自得之功多矣。 而頗 問 爾 周 淵 謝、 然語 餘説之大體 " 雖 奇偉 先 永,自成一家之言,雖或 有 楊氏 而 生 楊之書, 原於程氏,然其博學詳說,精 其精 醲郁 者,或有過 君 脉 書乃 於胡 子之説 亦 之風。 實之味 9 惟周 有 其所自 傳者 而 整 得 氏 不 清 峻 氏敦厚 失 故凡 蓋 貫處,顧 高 不 和 嚴 爲 尹 揣之,則 子 何 之病; 筆 同 氏 靡 恪 其 如 程 其説皆深 不 削 密者 平. 者 易直 所 何 ? 子 可 淡簡約 前 無 裁 也 及耳。 或苦 則 有賢 醖 其 口 定 大 雖 寬 又未 所 藉 不 、害,不 者,比 約 言 平 容 能 知 敷 於 是 日 Z 若 免 嚴 未 Ē 及 思 聯 不 腴 亦 議

之病 雖則 不屬 今此 如 本 此 矣。 章 乃 ,殊不可曉也 稍就平實,又覺其 增之,則 初 其 後本改爲持弓矢審固 中 未 本 語涉空幻, 有 然 承 亦 蜩 有 貫 解 而上下 益 改 意燥澀 之 兩 而 句 文意 正己 0 反 前 不 文意 亦齟 未免齟齬 而 如 後發, 自完 舊 龉 者。 而

義 神 義 實 羞惡、恭敬、是非、誠實之情以 於此其可 然,人心之所 則 日 五 則 禮 禮 有之理也, 别 行之秀以 之理 或問: 流 宜 之 理 則 、智、信之性以爲之體 敬 則 推矣。 也 愛之理 之 仁何以 生, 以 也 而 理 而 其 前 爲 其 也 故 或 妙 發 一,而 也 發 其 爲 其 日 也 爲忠信。 爲 愛之理 發爲 爲 其 丽 ,仁之 是 心 然則 發 其 非。 羞 也 爲 發 ,已發則有 所以 悪。 也? , 未 程 恭 爲 是皆天理之固 爲之用。 土 敬。 子 惻 發 神 水神 爲愛之理 以孝弟爲 隱 티 : 則 日 金神 惻隱 信 具 日 人禀 蓋木 火 仁、 智, 神 則 日

> 也,此 無孝弟 爲 者我之所自出,兄者同 用 何 行仁之本, 言,則 好 漸 而 之,則必有不好犯上作亂之效。 孝,從兄 非 本 列則 仁 也? 也 犯 次,而爲仁之道生生 務 謂 民,自仁民而愛物 而力行之,至於行 上 孝 論性而以仁爲孝弟之本者然也 事親、從兄、仁民、愛物,皆其 始 作 者 日 弟 而 曰 : 有 亂 弟, 之 而 又何 四 然 而 仁之 又曰 理,不 者 則 已哉 乃愛之先 之名, 耶? 所 爲 論 謂 本 性 性 性中 티 : 而 此 ,其愛有差等,其 則 於 出 而 成 愛之 見 孝 未 以仁 而 性 不窮矣,又豈特 而 只 此 弟 而 先 有 · , 德 有仁 亦 理 所 尤 . 爲 老 我 立 若君 以 也,其 以 切 孝弟之本, 生 一,則 故故 弟 義 爲 爲 爲之之事 於 之 自 子 事 自 禮 行 外 目 見於 以 荷 親 但 親 施 性 智 耳。 也 親 此 能 不 親 而 而 有 而

^{■「}蜩」,原作「挺」,據四庫本改

爲之亦 則 也; 孝弟 序,必 必然。 聖賢之言 謂本欲爲彼,而姑先借此以爲之地也。 耶? 不失其立言之旨矣。 之本,蓋以爲是皆吾心之所固有,吾事之所 務 能 本而不能以自行矣。 可不爲之理也; 爲 ,於此不務,則於其 不然之事 0 其 然則 禮之本 而 , 敢於其不能不然者, 或忽焉 此本先立,而後其末乃有自而生耳 但其理有本末之殊,而爲之有先後之 日 順 有 已 乎親 「若此 本耶? 君子之務孝弟,特以 矣。 不然。 也 也。 但 類者 則爲義之本 其 孝弟者,天之所以 以 但人爲物誘 仁者, E 知 愛親 . 甚衆,皆以是説求之,則 此者 曰 : 故 所不可不爲者,亦 有。 天之所 有子 而 然則義、禮、智、 則爲智之本也; 言 請問之。 也; 以孝弟 而 爲 則 以 忘 爲仁 其 爲仁之本 其 與 命 八敬乎 爲 而 所 我 我 之地 티 : 大率 無所 受乎 爲 不之 而 而 信 亦 非 仁 不 也 不

> 無一 平日 哉! 造次 其可 至 其誠 而 而 程子説中或人所問由孝弟可以至仁者相似 考乎《大學》之意,其亦甚矣! 者,爲衍説耳。 禮、智、禮、樂之實者,正爲是爾,此其 百 曰 主 反乎 行之本 德 范説 論仁 乎 以誠 毫自欺之心,又豈獨 顛沛之間,思慮隱微 此 要 爲是説者既 程子 者, 知仁,比之或説,其失益 道 大概得之,但 意而 , 嘗以活者爲仁, 死者爲不仁,但 則爲信之本 也 無 之説 歟! 不 先之也。 孝弟自 在 者也。 不察乎《論語》之文,又 於 티 : 此。 所引脩身、 也。 爲 且. 但其 諸 之際,必 人道之大端, 所謂誠意者 於孝弟一事 孟子之論 蓋 家 意 人之所 之 謝氏 遠 不主乎 Œ 説 耳。 以 心 如 則 誠 所 爲 以爲 爲 爲 欲 非 Œ 實 誠 何 五常 蓋 其 以 意 其 然 與 而

「受」,正保本作「得」。

0

不 未 可 活 矣,必 足 能 物 以 識 乃 爲 此 爲 識 知 則 此 也 雖 然 能 而 後 夫謂 躬 後 可 行 口 以 活者爲 力 以 爲 踐 加 操 仁 極 則 存 於 其 踐 死 純 者爲 爲 履 熟 説 之 謂 必

功

9

識

此

之誤

也

其

誤

如

此

故

其

於

旁

引

四

條

者

皆

不

仁

而

終

之發 作 親 孝弟 爲 近 求 有 若 知 自 從 木 亂 之 省 ,特爲間 兄 特 而 不 而 而 充 非 最 爲 知 術 之, 謂 有 親 近 木 仁 此 以 者 巷 之 意 則 源 則 察夫 而 之人 也 何 近 如 非 但 非 木 往 水 仁 爲 事 1 夫曰 之 由 而 猶 加 某 親 也 根 非 非 口 事 而 從 水之 由孝弟充之 水哉 不 也 而 夫 兄之時 知之事, 若 已 四 又以不 之 源 條 孝 説 之心 其 豊 者 弟 日 而 必 好 則 皆 而 可 其 後 然 犯 以 謂 古 所 又 爲 後 深 上 事 根 以 以 仁

後

爲

也。

故

又

以

爲

間

巷

之

人

徒

能

謹

於

事

之

理

者

與與

謝

氏

活

者

之説

相

似

而

其

所

以

用

則

是孝

弟

非

必

其

識

此

活

物

而

充

之

然

足

頑

痹

爲

不

仁

者

奈

何

?

曰

.

是

古

所

謂

愛

親

從

兄

而

不

識

其

爲

活物

則

終不

可

以

道

力者

不

同

學

者

不

可

不

察

也

蓋

人

能

事

親

而

仁,而 皆出 也。 有子 謂 禪, 意。 然也 者乃 又以 忘矣。 從之,特以 其 人心之不僞, 活 彼 之意,乃 觀 0 在 潛 於 且 物 乃欣 不 其 乎 心 必 此 人 若 者 聽 日 論 活 如 默 爲 蓋 察 專 爲仁, 求 然受之 然 之僞 此 源 物 其 伺 此 以 論 夫 後 於佛學之餘 説 於 孝弟 耐 活 其 而 莫 耶 可 事 則 心 吕 當 物 則 不 而 如 親 ? 以 又 爲 進 是 然之要,非 在 而 事 不 從 爲 并 而 不 伯以 乎 方 日 求 辭 兄 親 知 偽 與 初 父兄 識 其 之時, 習 從 仁 其 非 則 爲 夫 事 則 兄 也 擴 以 則 口 猶 而 親從 活 五 其 者 充之云 論 見 爲 幸 程 釋 非 常 物 然 吾 所 其 矣。 子 氏 聖 而 亦 兄之際 百 之 其 直 門 事 以 之 僞 得 非 行 者 論 不 又 所 之 之 事 所 日 其 所 本 重 所 岢 僞 知 而 手

00

之,而 氏進 非若 之痹 所謂 不息 得之,其論爲仁之本, 失,願卒 汎言,而孝弟爲指其事耳。 本文之旨矣。 氏舉彼加 頑然不仁,而應乎事 失道 本而 孝 於道者不 謝 頑 遂以 而後德,失德 而 矣。 從 氏 聞 爲 而弟,則是吾之所謂愛之理者,常存 小孝弟之意,亦其言之小 此之説得之,其引 反 爲得 兄 仁之本於 仁與 因孝弟以 而 其曰務本之一 可 仁 日 不 曉,豈非 不仁,皆必 : 也 知 而 游 此乎 ,者皆不得其當, 所 後仁」之説 則失程子之意矣。 氏 求活物,幸其瞥然見 曰 : 謂 説 在 弟 猶有惑 然日 游氏 不 也。 則 事 有犯 責 好 (之) 蓋蓋 是 以 耶 犯 事 無 吾之本 志 下諸 事 Ŀ 疵 以 親 隱 履之實 如手足 作 於 務 則 巾 而 本爲 亂 老 似 則 説 不 楊 氏 周 非 者 得 心 知 有

於此 又以 或 問 爲 子 心 於 之德 前 章 何 哉 既 以 仁爲 愛之理矣。 仁之道大

者,則 也? 德,是以聖門之學,必以 者,五常之首也,而 則包四者」,推 意 獨至者也。 曰: 以行之者,則必以孝弟爲 章所言之類是也。 前章所言之類是也; 貫四端。 不可以一言而 仁之爲急而 言令色之中 二章於首章之次, 四德之元, 夫子所謂 曰: 断其不仁,以 必以巧言令色 故仁之爲 夫子之言,所謂 求少 程子則懼夫讀者之不察, 猶 識 盡也。 鮮 五常之仁, 此 其 許之仁 而 而其序 所 其實愛之理 義 包四者 解 言, 爲甚。 程 專言之則曰 程子 當 害 子乃以 偏言之 求仁爲要,而 焉,是以 務 則 解 又如此 先,論其 偏 論《乾 辭 可見 與 之惑 記 惻隱之體也, 言 不 其 語者 則 則 非 ,所以 迫 矣。 推本 也 所 心之德 切 日 四 所 欲學者 所 可 釋 愛之理 事 德 蓋 以 爲 語 説 以 聖人之 而意 而 戒 之, 賊 心之 列 其 專 於 侕 也 之 所 也 何 知 此 巧 而 如

别 耶? 賊之, 未必 不 固 微 必 舍之極 亦善乎? 説 此 曲 而 之體 明 欲 在 不 如 如 説 其 則 令,而 乎心 何 此 不仁,則失之矣。 ,其仁少也。 是之人, 於 是 而豈 可 口 是 也 ? 意 其 知 皆 以 謂 則 而 間 爲己 以 口 牽 曰 : 則 不 曰 見 有 贵 蓋 在 於鮮 曲 以 其 功 可令其色。 己 少有仁者之云 其 有 乎 誠爲己也, 言固 聖人之意,所謂 爲 多少論 爲之説 矣, 得 疎 亦 其 時 之爲 人之有異,亦 失矣。 矣。 今日 不察 欲 心 矣。 而 後 爲 巧, 而 哉 夫人 少 有 且 也 之 失之。 又 利 ? 9 則 今 時 徒 而 日 夫 説 日 而 脩於外者 日 不 0 心 而 耳 以 且 者 丽 不 爲 欲巧 吕 仁, 可 本皆仁, 鮮 日 未 脩 猶 察 利 觀 猶 日 氏之説 巧 有 矣仁者, 得 之内 乎 足 而 夫程 非 又 紛 欲令, 其言 時 爲 聖 以 其 謂 范 紛 仁 乃 定 外 子 言 心 雖 其 如 氏 則 然 所 爲 不 之 婉 者 取 而 色 未 又 或 心 是 蓋 之 置

德,能 辭 容色 人,而 之不 巧令者不同 若夫小人 者 之間 辭 其 其 而 爲人之不同 夫子告顏淵以 而 以 「則聖· 己。 飾 養 巧」者,但 氣之間 所引若多端者 不 解 <u>Ż</u> 爲 乎 其 遠暴慢之效; 求其 而曾子所言君子所貴 至於詩 氣 判 而 外 内 人盛德之至 許 四 決 已 者 説 無 而 者 哉 不 耐 ,然覈其 以 子 非 安 己, 不 克己復禮之目,不過 己。 爲直 人所 欲 而 持 得 患 以 其 己。 則 養用 티 : 然 謂 本 其 謂 直 蓋意誠 《鄉黨》之所記 心 矯情 之脩 之不 色 意 動 令儀令色者 情 失其 所 謝 言 力之地; 厲 爲 容 徑 謂 氏 飾 以 立。 内 周 行 在 如 其 之説 Œ 蔽 遜 乎 僞 荏 旋 於爲己,則 何 爲害又 而 以 之,亦 之心 道 以 誠 中 也 所引 則 鮮 招 出 者 爲 禮 則 有 雖 恂 視 悖 之, 人 之 党 若 矣。 亦 意 則 恂 大 X 聽 曰 多端 妙 也 情 容 但 與 怡 賢 之 在 於 爲 實 言 忧 信 故 彼 本 患 爲 貌 則 怡 成 於 巧 動

矣,似 耳。 失。 本乃 之意 庶乎其得之也。 令之尤者耳 、思 木 、之意矣。 口 不 乎,喜援 者 敬 便儇皎 若周 有 察乎巧 同 其日 僞 諂 者 如 ,則又若范氏之失 ,請及其 亦失 淺 也 何 豈 氏 深 非 厲者,其 ? 程 記 其 據 者,其 令之 彼 蓋 盡 而 ,名義皆若 ? 辭 子 本 日 范 而 不 雖 言 以 本 章 學者於謝 0 不 氏 仁者,又若范、游之失,而復 所 託於夫子之言 但所謂 爲 意 楊 庶 初 游 而 乃 以 擇 説 達者與 氏 幾乎 論之。 本 氏 而 以一人而 爲巧令者 是非,其累有 則直 未 大 而 則 也 狂 出 當。 小不 抵 氏之説 1 意 本 詞氣 以 日 末 不 本 蕩 善善 同 其 甚 切 言 倒 者 ,亦若吕 ,其流傳之有 其 愚者 悪 游 也 日 Ē 「游氏 9 以 置 日 楊 相 而 則非 不 如 是辯 違 其 料 楊 绝 而 而 此者。 所 仁 其 氏 其 以 氏 非 曾 以 而 周 之 下 多 言 聖 次 所 爲 謂 氏 子 唯 天 是 几 謂 謂 有 也 信 曰

誤

且.

謂

誠

詳之。 裹之謂. 違,所 也? 者,謂之忠, 又謂 端之發,皆必 理 土 也 實 忠 仁、義、禮、智 以 「發己 何 之本 忠信 而 無 理者是也。 或 曰: 謂 其 也 夫信之爲信,實有之理也 問問 不信 蓋 也 不 ? 信 出 亦亦 然 者,以 在 五. 自 前章五常之目 也 乎 程子 故 行之氣, 以 日 此之謂 盡 未 而 内 循 以 1,皆實 有 以是 謂 人之所禀以 居 ,所謂盡 人言之, 者 其 其驗乎 盡 物 忠 信 中 見 而 己 而 而 而 央 各 爲 言 於用 循 之心 有 無 不 加 居 而 主 己之謂 外 物 也 一,已具 違 而 要之 出 密 乎 分 焉 則 無 者 者 无 平 生者 而 焉 Ŧ. 以 妄者 所謂 違 謂 而 出 忠者 則 無 爾 方 此 忠 於 事 謂 言 ,莫不象之 於 隱 實 之信, 四 而 意 之實 心而 信 凡性之所 信 也 以 以人言之 也 曰 矣,請 理 季 \pm 所 實 ,是乃 者 世 一時 此 之 謂 自 程 故 而 而 復 子 表 無 忠 又 未 所 何

敬、不 之立 有接 循 信 有 信 或 則失之耳。 且 謝 此 曰 一,此 先忠 楊、 行之云,或出 物 餘 非 於無我者則過之。」又謂 曰 人 傳 行 人之際,猶 無違者言之,而 味 踐 之 ·言而 但以 而 蓋 無 言 諸 信 不 周 也 所 習爲 襲 而 説 氏 不信,處 而 信者,今日立行無 史遷 處己接 乎之説 游 信 蓋 後 何 何 直知。 克 傳習 説 。」亦皆失於太高 . · 如 ? 閑 有不 於 也? 之誤。 肖 雖 居 己 人,正 天 非曾子之事 獨 道無二致,人己 無 忠不 不從 時 無 亦後 曰 티 : 地 處 立 不言不 可 0 又 一心應物 而 言之差,而失 憾者 章餘 信之累 程子、范、尹 謝 以 謂 固 「謀 爲 不信 説 文義考之則然, 有 動之 萬 謀 乎 非 力學文之意。 ,然深有警於 而 九 所 7,分而 物 ? 臨 而 則 非 流 謂 而 謂 之 忠、 事 事 爲 皆 不 就 遽 固 也 爲二, 實 靈 而 其 交而 出 使 可 動 以 謀 也 其 贵 其 小 於 從 本 謂 而 而

限,且 之際 耶? 仁,則 其 爲 之 見 不 傳習之説 心 IE 物,而於此見之,亦如二章之失耶 IE 章 理 篤 之 不 爲 道 知其説者矣。 息之或 心 處 言治? 反人 力行 也 或問 誠 己 於傳習,亦 於爲己,而 所 其所省 既曰 細 一,以 意 無 謂 考其説 於不 體道之實,亦 得之,至於違仁違道之别, 違 不 無須臾忘矣,則 爲政者之心 則 道之爲治, 也。 忠信 則 Œ 又 日 忠不 誠 ,似未免於老、釋之弊 心誠 初無 擇 不 周 若應物 内 至於 治者,政教號令之爲治之 之不 可 氏 信 形 意 專 曉 内 而 外 而 何 不 精 内 無 於 則 之際 不自 當以 言 也 以以 省 須臾忘者, 見道於 宜 初 贵 内 也 無 其動 其 而 至此 悟 見道 又據失念 無 티: 謂 不 者 日 忠信。 口 致 静 通 道 也。 也 爲 道 語 乎 又安 别 則 未 然則 説 且 情 者 外 接 外 至 此 爲 吾 楊 如 也 有 之 於 在 則 有 平 違 無 童 E 正 治

楊 非 甚矣。 以 説 説 此 十五人 義 氏 曰:千乘之説 下文五者,亦 又以富之而 事 則 諸 \equiv 傳 不同 家之力所能給也。 氏之説 義蓋嘗考之,疑 ,然與孔氏 以 也 而出 聞言之,故不能 代古書,其 魯變至道 説孰 八百家而出 前 疑 游氏引養引恬之説,似以道爲引導之 夫子之所言者,心也,非事也。 車 馬 孟 曲 爲 未及夫教爲言,則 牛兵 書傳 子 折 得 乘。 非 ,包氏、馬氏孰爲得耶 爲言 詳備 之? 未 引 亦無 馬氏 車 甲 不合,豈新義 嘗 導之 凡 ,則其失既 無小誤。 粮糗 盡 一乘,如包氏之説 車 然與《荀 足據矣。 日 爲 見 周 事 可據。 班 芻茭具焉,恐 ず,其説 氏以愛人爲 乘,甲士步卒合七 程子、張 爵分土 若《 其自相矛盾又 遠 子·王制 之云耶? 蓋如馬 曰_: 五 至其 不 王制》則 得通 子至矣。 之籍 ? 主 則 卒章 者之 若范 非 氏之 曰 : 前 学之 特 固 然

以敬事 之。 節 以朝 然愛人者 胡氏發明之爲 之意,是以其言多類此。 然後勉而 氏 尹 治之之道與天下 者」,則又若以爲 而 四者爲之先後,雖非本文之意,然其 以 其 氏 用 互相發明而義 諸 子 〈卒章 後世 其曰:「古人 愛 而愛民者,亦豈出 路 ,其名覃衆,❶故慕之而易道; 侯 人,游、 治之耳。 有 尤 不 何 天下 能 切 必 尤詳。 先此 也 讀書之言爲是,當於本 楊 小國寡民本不足治,特以 同,而治之之效有如 ,則千乘之國 得 各 之 蓋其 若范氏則疎 以下,蓋本二夫子之意 百里 胡氏 説 有當也。 素論嘗 E. 不 之 於誠 若如其説 同 節用者 地 節用 ,亦足以 而君之,皆 蓋 孰 心 有 而 楊 哉 者 ,愛人之本 爲 不 不 説 氏之説 ,其事切 得 屑 切。 則 亦善。 此 卑 用 章 耶 其 日 也 沂 謝 ? 其 能 辨 所 1/2

●「覃」,四庫本作「覆」。

故憚之 本諸 譏 己 則 而 (申子、 則 雖 行。 日 韓 愛人,而 徒 侯弊袴 以 愛人之名揚于 人終不蒙其愛矣。 之説 耳 衆 而 不 能 而 以 游 節 用之實 氏 所

是。 及所 也。 之道 耳。 得 也 游 之至」,而 暇之力 復有學文之日乎? 爲子爲弟者平日所當爲之事 氏 孝弟」之云矣。 若謝 如如 所謂 所謂 此 此 不 或 愛,謝 但 問六章之説。 耳。 所 但 所謂「孝弟之至」者,然後 氏 謂 爲 其言過矣。 程子本立 處 盡得 衆 所 行 汎愛衆 而 氏 有 而 謂 游 孝弟 以 餘 汎愛衆人者也,未嘗遽 氏 盡 爲 夫是數者,終身由之而 力,但 而文自至者,失之 去 范氏以汎愛衆爲以 充其 孝弟之則」,正 而 必若是而後學文, 然後讀 其 無忿疾忮害之心 力 謂 無害 程子、范、游 字, 行 耳 書」, 此 人之心 非 則 數 可 亦 亦 謂 事 謂 若 以 日 盡 而 当皆 太 讀 謝 及 所 則 孝 孝 盡 尹 有 快 此 非 愛 豈 弟 書 弟 夫 氏 常 氏 餘

> 借,而 失,則 氏之敷 道,以 賢者自是以寡過,而賢者自是以 信 弊。 若繁冗,然自多識前言往行 游於 輕。 如 患 上達 亦類此。 不之極深,未嘗養之於學,游之於藝也 何 於 本也,行 ,雖孔子亦然。 藝 ? 不 程子以 而 爲脩己治人之方者,皆在 尤讀 不 陳詳 足, 蘇 而 悟 日 有餘 氏 至於專以推其所爲 已哉 其 者 又 之説 爲 盡 力則以學文,此孔子所以教 謝 所 所宜 何 讀 氏 包之有 今之教人者,不亦異乎 有以 如 ,又有以正 書, 以 楊 而 詳 學文爲游 則凡 氏 深究 爲 味 不 以 有 也 無所 盡 學 所 餘 後 近世好 以 也 不至 蘇氏 文 以 説 平 世 下 於藝, 而遽告之矣。 蓋 爲 其 ? 講 也。 棄 則 周 日 中 餘 乎 本 人也。 佳 氏 亦 高 曰 矣。豈 引之極 故 孝 先 事 似 逐 便 語 日 躐等之 • 下學 弟、仁、 王 蓋 亦 末 於 他 若 意 之 太 假 説 游 意 亦 而 不

^{●「}學文」,原作「文學」,據正德本、正保本及《論語精義》

未必能 行之,務以誕相 ,而學者 未必信 勝 也 ,風俗之壞,必 則 亦妄相 從 自此始矣 而 己。 少 而習之,長 而

亦非 足,非 也。 特孔 便以 得。 滅 德 庸》亦 舊說。 同,而 特文而 質者爲 其言抑揚之間 聖門 子責 日 如 相 但 而 所患 以遠色爲勸賢之事 程子、游、尹氏爲優,惟賢賢易色,當從 已乎? 氏 好 范氏 問 蓋孔子兩言未見好德 爲 徒事空言,且 之所 愈 色 謂 人 消 也,此 之緩 耳 爲易色 論 章 此 長 以以 許矣。 一之説。 好 質具 所 也舊矣。 意 辭,非以 賢色之優劣失之,●而謝 未 若有 爲 亦 亦非是。 學者文耳,質具 非 而文不足,特比之以 疎。 以爲是非學者不能耳。 曰: 子 過 所 夏蓋 范、謝之説,於此 爲既 ,則古人之言,其 中之弊,故 患 子夏 此 而 所謂 章諸説 疾 如 好色而 止 所謂 好色, 時 於是焉 如 人之不 好 大旨 未學,豈 胡 而 且 色者 而《 氏 文 好 務 文 不 德 氏 病 则 爲 以 中 略

> 之, 溢 謂 但 所言之序,又何説以 失於過高矣。 過之者,讀者於此亦不可以 范 夏之言,未必 語 氏 而 「長幼必 旁出 少倒耳。 以 而 本立 周 其 氏 能 質美言之,輕重 有此 曰「大舜 亦 有 楊氏尊賢親 吕氏之説,乃因子 序,夫婦 以 意也。 爲 通之乎? 有 爲 激 法 必 必若: 聖 親之説 而 能 不 之間 言, 人生 有 察 其言 别 也。 夏之言而又 似 蓋 巧矣, 知, 得 得 則上 謝 之矣。 其 則又 既 氏 適 横 所

不 有 曰: 學 反 此蓋古 戾 或問: 則 而不 古 八章張 安者。 註舊説 若 日 學 子學則不固 蓋 則 而 日 不 張子從之,但 不 古 重 則 則 一之説 不 當 威 日 則 文 重 如 勢若 則 當 何 有 日

2

0

[「]好色賢賢」。

[「]胡」,正德本、正保本作「吴」。

威

則 楊 且 之説 又過之。 學 之 爲 亦 功 且 如 以 又豈 此 夫子之言推 止 而 於 楊 不 氏 所 古 之, 謂 而 則 已 可 學 哉 與 而 權

者

忠 後 篇之二十四章,考之則 亦 也 則 氏 以 哉 可 以 内 與 爲 主爲 適道 外爲言,若 未 日 . 精 ,適 託 范 耳 者, 氏 0 道 忠 如 程子 程 然後 信之 何 子之意者,但 ? 可 誠 可 見其 説 與 忠之辨 티 : 立 如 得失矣。 一權,豈 觀上下 何 ?,見於 ? 其 以 易 F 文意 第七 誠 遽 曰 0 言 訓 是

遲 在 崇 而 德 一之事 口 通 之問 ,恐其 也 ? 者 亦云, 티 : 未 應 謝 及 而 氏 此。 以 以 徙 主忠信 且 義 夫子所 繼之, 爲 不言 則 以 對 又

程 不 如 有 而 如 何 子 獨 信 何 所 略 實理之云, 此 如 而 何 日 不 : 察 凡 也。 日 義 其 而 . 者, 於 所 是 日 其 謂 亦 心 所 忠 謝 之正 调 信者 謂 氏 高 以 所 也 而 人 皆 謂 失之矣。 言 然, 改過之説 不 之者 仁 蓋 不 得 義 然 則 於

氏

爲

無

病

而

楊

氏

取

友改過

之説

亦善

味

矣。 既 則 非 所 仁義之正乎? 不 者 不 可 善之與惡,勢均 知則已, ,行之失 日 蓋 以 知 安,故不容憚 其 其 忽 無 意急於勸 然 既 也 常 而 知 而後改之 爲 之 蓋 既 善 體 改以 其 不 勉而 則 敵, 理 幸 則 其 自 而 有 也 而 誘 亦 口 陷 棄 所 無 人 口 以 於 於 不 賓主 之改 且 以 憚 小 得 不仁不義矣 如 暫 改 則 人之域耳 謝 過 輕 時 而 氏之言 重之分, 其 而 不 而 復於 心 爲 不 惡 知

其言 路 以 非 生 而 言矣,豈 加 言 知 之 過 失 論 安行 之失 也。 事 而 之 生知安行者 也 觀 改 獨 若生知安行 之, 於輕也。 爲 此章 如 木 且 何 亦 而 人之爲過 ? 而 自 ,則其 學 E 可 之事 日 日 哉 見。 . 於 則 聖 謝 他章 固 以 蓋 亦 人之言 氏 謝 無 其 有 此 所 氏 宜 所 淺 所 章 謂 待於 獨 其 深,不 之 引 此 以 每 説 顔 **企聖人** 爲 章 此 每 淵 學 非 章 必 過 爲 論 車 高 游 季

0

其 自 爲嫌 於賢於己 準 矣。 心 不 又將 何? 之可 爲不 視 之 滿 則 論 勉 者。 非 陋 我 就 一, 且 也 視我 然考之不 忠信者, 而 而 或 不 日 者之 者 而 親 進之,是皆理 亦 彼我 敢 慮 0 亦若 者 故於齒德之殊絕者,則尊 求之以 蓋 爲 此 未 或 輕 夫 所 則 . 人之賢 不 嘗 疎 好惡之私所能 必 蓋 謂 以 是 楊 ·詳,而 不 勝 或高 不 輕 尚 人不 勝 樂 耳 如 氏 爲 ·欲自謂· 己 以 $\bar{\mathbb{E}}$ 而 以 不優 己之説 9 亦 吾友,然亦 而 如己 又 絶 友之; 者 慮之 不 勢之自然 或下,亦 以 不 何 若己者爲 人 而 劣,隱之於心 爲 吾 人不如己 自 或過 也 後 然 其 蔽 合 棄 友 程 友 有 至 也 志 子 耳,其 我 彼賢 不 ,則亦 之, 非 必 於 若己 不 友者, 同 爲 周 有 我之敢 容 接 故學者之 而 則 而 於 方 哉 矜 師 以 人 不 意 勝 生 者, 尹 我 者 其 而 待物 之; 分别 E 自 得 則 己 氏 者 故 且 爲 容 雖 有 善 者 滿 而 以 如

> 者爲友 謝 以 氏之説,蓋得 亦曷嘗使之輕爲 人之歸矣。 人,雖有美 以 足 不 加 而 亦 辭 賢 肯 氏 足 以 不 可 害意。 智日遠 問 所 以 敢 爲 知 ,則自足 自 己。 親 高 如 至 肆 必 才良質,亦且 是 安於 耐 於凡庸 顔 也。 0 蓋樂 勝 其 日損 而 則聖· 事 己 便 略。 所 而 淺 亦 於 自 夫其所以定 ,故以 僻 後 與居者 嵬 人安得一 陋 其 縱 滿 蘇 友 佞 善。 故 瑣之流 恣 氏 此 而 則 柔之徒 戒之, 日 忽不 謂 勝 忌 故 無無 己 不 世 人 多 憚 是謂 者 之陋者 自 取 一言以警之, 非 莫己若也 則 聞 直 亦 知, 舍者. 不吾 不以 厮 則 喜 者 諒 ,樂以 説 役 其 之 者 m 友矣。 文害辭 如 徒 其 墮於 臨 之 少 是, 不 隸 己 下 IE 己 蘇 然 1 之 是 己 而 不 若 而 而

范 氏 慎 或 字 問 之説 九 章 非 之 是 説 其 日 日 0 使民 程 子 勿 倍 游 勿 氏 志 亦

引

申

0 臨 己」, 四 庫 本作「可 臨

0

曾子 也。 氏之説 心之不 説 謂 非 洪氏之説 謂曾子之行,一 忘生者衆 有遷」,以就夫反其生之説 民 而 也 改大 意 楊 歸 可已 氏 君子 ,恐不如是之支也。 於厚耳,今日己 ,於歸厚之義無所當,且歸字之義 前 亦可 因 爲事 俗 [歸厚之文,而引「惟 薄 者 之慎終追遠, 矣 ,則失之矣。 於孝 豈爲 觀 洪 焉。 氏 日: 前 教 蘇氏曰: 德 及 民 曾子之學,以忠信孝 .歸 此 乃吾事所當然 而 ,則亦巧矣。 尹氏蓋總程 此外 後 厚,似亦羨 ,則爲得之。 略於喪祭 爲之哉? 民生厚,因 又有 蘇 然詳 則 子之 於 Ē 背死 弟 氏 物 文 謝 若 吾 爲

言,借其求字而反言之,以明夫子之未嘗求, 有 如 夫子欲聞其 夫子求之之説 孟 子之言伊 或 問 夫子未 政 (,而爲是卑異以求之,則失之 尹以 何 嘗求聞 堯、舜之道要湯也。 也? 諸侯之政,而 E 0 此就子 禽之 若謂 子 貢

屑就在,濟時行道之心雖篤,而未嘗屈道以信身也

本,故其言如

此

將有求容患失之耻,學者尤不可 得者 謂 矣。 所發明 擇,如以温 聖人之容,夸張迫急,而於文義之間,多 言聖人。 説之得失,奈何? 吕氏真以 見,亦非本旨,以 不克由聖。 大抵此章説之善者,莫踰於程子,而 可見矣。 然是亦可以爲之兆也。 亦未然。 暴 慢侈 楊氏以爲聖人求之在我, ,雖足以警夫如是之人,然其説之流 也。 彼既語夫子以政矣,未聞一君舉國以 又與周 謝氏以爲此一節論學成 泰 爲 此言至於是邦,則 爲清和之發之類,皆非 胡氏曰: 求而 人所 爲因是足以見之可 氏皆引吾其與 人與之,則又甚· 忌 而 凡人未見聖,若不克見,既見聖,亦 曰:范氏之説,皆非 聖人一 嫉 ",則 言不契,則 雖 非 欲 正 其 聞 求 謂 矣。 委而去之,未嘗 以 居 之爲説 是,細考之 之 而 此 胡氏、 也 不 而 聽其所爲 病 光 日 知 時 其論 輝 所 不 不 亦 也 他 又 著 以 口 暇 有 恐

各以 訓其 程子 氏 雜 也字 之訓 而用之,已失其旨,又於不侮無欲之下, 體之言也 係焉,其失愈甚矣。 五 德, 二 説 後説 推 不 其用與效之言也 同 如 何 ? 日: 前 尹 説

説 實能 其行亦不足觀矣。 周 日 推之,則父之志行,亦容或有未盡善者,正 未應遽以孝許之也。 行 之,恐不得 以 不明。 可 説 氏 爲子觀父之志行者,善矣。 而能述之,乃可爲孝。 以行其志,然改父之道於三年之中,則無愛親之心,而 蓋用舊説 承述,亦豈遽 年無改於父之道,此觀行之一節 或問 而 小 范、楊、 十一章之説。 不 如其 同 州 三年無改於父之道,程子之 説 周氏 晁 得以 蓋 也。 氏、洪氏之説 尹 爲一 且以下文三年無改者 氏 孝 蓋觀志 曰:觀志觀行,范氏 説 此特日 得其用心之本, 稱 也哉 ,謝、游、尹氏 也。 而 然以 ? 洪氏曰: 亦當。 觀 能 而 承之,觀 文勢 謝 已,恐 父没 晁氏 而 爲 一使 觀

乎? 或三 不可 也。 以義制之耳。 改爲之心。至有所遇之不同 若尹、游之説,則夫子之言,得無有所不 者程 預言矣。 則於之爲字,未見施之如此 改者,乃子道也,非父道也。 者,顧乃恍然惘 而 豈有三年之久,視其父之所 不明 孝子居喪,思慕哀痛 游 可 氏 年而改,或 以待三年 聽 其不可改,則終身不改,固不 以爲孝乎? 子亦若尹 得 曰:爲人子者,本以守父之道,不忍 其制 不聰 善讀 事之宜 者推 三年而改者,意其 ,行不正 者,則 氏之云也 甚 然,如 不得已 范、楊、周 一一説 類 則誠 又 醉眠 而求之,或終身不改, 不 (非常之變,亦不可 謝 ,則不待三年而 相 有 夢魘而 知 氏 其重者。 若以於字爲言 須,爲不可易 氏之説 則隨 爲 不可堪者,然視 哀,君子病之。 則過之矣。 有不可不 恬不知省 有爲 待 其 ,則所不 言。 輕 曰 : 而 盡 重 心 改 其 言 夫 有 者 而

忍遷 乎 聞 不幸 宜 至 每 或 顧 ? 誠 如 之 改 日 其 而 此 哀 師 就 所 則 至哉 昔 即即 矣,以 父之過 痛 於 遇 以 謝 義 如 以 駸駸 漸 此言,足以警學者用 方 改之而 理 何 變之 爲 有當 明 之中 然所 此 承 但 其 使 代 必 不 已 失却 意 不 無 改 前 忍之心 則 亦 何 人者, 迹 人,不 多,必 古 可 必 口 善 以 平 尋 隱 易 矣 是 則 不得已 心之微矣。 忍 /,然用 其 爲 爲 不 遷 曰 法 政 可 X 就 0 子者 無 吾 其 之 但 心 而 耳 云 當 每 嘗 隱 心

大之事 禮 斯 謂 反 以 和 至 則 爲 上文考之,既 文,今獨從 美者,皆指 者 於 或問: L · E ,又未始離 不 固 可 云 小大 行 其 程 和 耶 禮 日 子 由之,諸説 是 由 與 「禮之用,和 於 而屬之上文,何 豊 於禮 和 禮 若 得 而 也 以 越 贵 言 亦亦 爲 和 也 不 由 有 不 而 爲貴」,則 同 和 得 今若以 指 前 由於 也 遺 禮 則 ? 皆 禮 L 禮 屬 之 爲 而 且 所 日 之 小 主 所 而 由 謂

> 下,萬 與 楊 禮 句, 其 禮節之亦 言矣。 不 程 和 詳 有 而 之用, 和 説 矣 者 可易也。 子爲得 小 氏 由 化 亦 大雖 之意 1。皆出: 者, 雖 是 物 未見 加 足 且. 以 曰 ,善矣。 散 可 樂 之, 以 則 中 能 不 既 殊,而 乎? 於 其 興 謝 巧 知 日 口 其 曰 以 焉 而 必 氏 0 和 由 節 免 行 心 小 蓋 范 爲 若如 之 禮制 重 者 和 日 大 而 自 日 説 加 則 由 周、 複之弊 而 然之節 由 不 非 不 其 范 和 如 行 有 《樂記 禮之所 以 和 以 尹氏 亦 也 氏 相 矣。 不 何 爲 禮 人之所不欲者强 之 重 爲 可 ? • 節 聖 皆 説 複 故 不 行 體 有 流 者 以 然 日 祖 此 之 用 知 之 而 有 則 小 則 爲 甚 其 章 也 不 和 制 大 其 是 遂 兩 其 一之説 一天 古古 息, 説 平 而 禮 由之 品品 以 論 日 和 蓋 禮 高 樂 不 有 特 節 合 惟 以 之 爲 亦 如 地 使

^{■「}如」,原作「等」,據四庫本改。

是 耳。 也。 説。 堂事者, 儐尸。 宰,而室事 弊,又有甚 氏 難 加 而 也 -,各 乃 而 而 從 本於 無 無 故行 非 所 至,以 今日 祭,舒 詳《易》之文, 日 和 和 履 則 然則 極至之義。 以 者 此 矣。」此説 其 不 之 本 用 爲 位,而 交乎户,堂事 肆 焉 亦 若 雖 明以 文之 則宗祝 而 豊 至 和 不 者耳。 恐 徒 夷 和 或 則 也 未 肅 勉 和 俟 甚 意 不 蓋 得 蓋 既 然。 爲 强 苦, 然各得其所 足之謂 踞 其 有 故遲 得 其下八卦之説 曰《履》之爲 失 蓋 其論季氏之祭,爲 於儀 貴之義,恐亦 之。 司 肆 和 圃 其 詳 日 之愈 者也。 各 緩至 交乎增,室事者,祭 自 句 禮 禮家之説,正 但其 哉 供 貌之間 有 讀 之 ? 其 此。 不 矣。 而不 用 事 日 和 則 請 失 卦 以 則 及子 其 非《易》 問 爲 則 而 又引「 其 亂 其 和 疑 君 抗 楊 禮 是 無 和 焉 例 爲 路 於 臣 氏 謂 有 激 徒 前 至 0 皆 則 夷 時。 上 意 履 貴 之 爲 季 禮 之 於 H 禮 若

信

何

也 其 應 下云云,則前 獨 以 和 而 至 已辨之矣 爲 和 而 後 不 可 以 有 加

於前 發,以 焉, 者無 復其言而 曰: 踐者矣。 然其 乃 以 必 0 也 則 此特爲 然 復者 引之以釋此 ,而責: 以爲信之所在 始 得名者而 ? 或問: 開 其言無 可也。 則葉 也 其 日 ,是乃使 得之也。 以爲義 其復必其言之失於後 或不度其 0 自 所謂約 人之不顧 人之約信 公所云 新之路 不 若約 亂 可 之,則 句 有 人不 踐 一,而 今不警其言不 信之始 不可, 信 八宜焉 耳。 復 圃 義 而 亦矯枉 必 度於 爲 固 言 合宜,則言必 理, 無 踐 信 若信之名, 而 欲 非 則 而 焉 義 不 遂 輕 其言之必 者之失矣。 又 信 所言將有 過 則 近 言 不 求 其 者 義 輕 害 踐 其近 近 而 顧 直 則言 發其 於義 則 與信 義 則 必 何 矣。 可 踐 之 於 失 復 耶 IE 不 踐 也 義 有 之 差 者 或 其 ? 以 口

日

不

家

所

川

之後 若 禮 及 未 也 何 有 欲 節 以 後 則 曰 皆 者 然 如 非 以 焉 其 開 0 爲 亦 則 信 遠 之前 爲 可 也 有子 ? 禮 所 誕 不 者 所 崎 則 能 之恭 近 於 恭 足 宗 謾 贵 其 以 嶇 曰 遠 義 尚 因 之意 耻 而 欺 垂 耳 自 使 所謂 口 反 耻 矣 辱 近 僞 不 # 巾 此 則 遠 取 人 側 辱 禮 本 立 楊 失 恭 其 蟀 耻 耻 不 言 然不合於節 習 故 氏 何 教 近 所 意 身 然 馵 辱 爲 戒 如 必 必 之旨 之 也 禮 後 親 被 謹 善 也 其 於 慮 或 因 説 ? 惟致恭 矣 君 困 必 弊 其 其 矣 者 初 此 蓋 則 子行之, 矣。 也。 辱 言 之言 所 且 日 而 然 加 如 爲 而 而 終, 將 行 或 文 又 亦 徐 此 口 不 或 而 日 致 失 無 得 哉 計 行 非 以 爲 則 宗, 必 日 敬 所 其 其 爲 有子 之 防 必 求 或 且 也 0 於 遠 不 所 所 於 稽 後 先 其 過 恭 何 此 日 至 耻 親 親 之意 己 其 患 其 儒 近 或 章 而 也 0 辱 説 於 然 所 於 又 固 中 非 因 不 前 然 ?

之説 彼 其 因 耶 卑 耻 意 亦 恭 奈何 更 道 有 可 加 爲 思 之説 猶 孝 人 ? 巽 辱 而 亦 復 可 不 信 尤不 之賢 者, ? 之 弟 以 通 失 能 可 後 依 此 且 而 謹 其 遠 以 口 也 其 又 但 分 言 求 然 既 日 由 也。 爲 而 信 耻 近 與 有 : 明 語 遠 免 於 終 不 宗主矣。 於 辱 後 而 宗, 程 此 不 乎 平 文 意 先 可 親仁 曰: 依 禮 子 求 則 章 蓋 曲 耻 未 復 求 耻 主 義 之, 四 之 安 折 其 諸 其 辱 有 也。 辱 沂 説 則 意 飽 則 恭 似 本 則 者 所 説 説 平 此 而 其 亦 亦 爲 意 在 敏 禮 見 大 不 言 稍 後 説 信 相 而 古 可 近 我 率 同 人欲 義 行 1 費 小 冀 則 表 宗矣。」 重 爲 於 以 者 不 力, 相 慎 -之,是 異, 裹 其 安 忠 近 而 爲 禮 失 有 非 言 似 信 也 俟 得 知 於 不 而 矣 其 所 而 其 義 此 遠 而 而 以 其 沂 不 依 亦 所 其 或 就 友 於 文 因 意 有 禮 其 耻 矣 言 必必 親 口 之 勝 得 禮 苟 辱 義 恭 9 蓋 E IF. 説 通 信 度 有 己 爲 失 终 者 爲 É 而 至

説 於小 失其 网 少 本 耻 於前 於若 不 爲 上 加 ,恭近 引 其 異 通 張 可 句 禮 不 章之義 失。 耳。 復言、 以 恭 大意 親 矣。 子説 則 至 ,意之所重,乃 是迂遠 宗之爲 可 恭 及 宗之 無 禮 聖 句 范、楊、周 無 蓋徒憂 謝 近 雖 不 而 而 乃 則 若得 禮 於 氏 而 與 反 和 遠 F 遠 是 説 則 復字之説 禮 難 理 吕 可 其 耻 耻 將 勞者 復言之害義,而 之説 通 之, 蓋 也 辱之説 固 氏 句 類之甚乎? 以 氏 也。 在乎 不失所 亦 一,若以 復言、 如 略 自 爲 而終 大意皆得之,而皆 類 此 則 相 爲 ,與上文信字殊 張子 不復之害 此 不切耳。 皆 似 ,則得之矣。 復言 未 然聖賢之言本 親 遠 「得之。 義 信恭之説 免近 特 耻 至 爲 爲和 吕氏 可 則 引 禮 不 可宗 乎張 察 宗之云 楊氏 信 尤 此 也 但 · 。 而 平有 上二 章 迁 也 范 爲和 子 因 夫遠 推 不 不 晦 以 E 不 爲 之 是 免 爲 句 蒙 辨 説 周 子 不 相 復 而

> 氏 説 學 言 爲得。 者 前固 則 而 亦 發 不 范氏既 (,自與 論之矣。 勝 其 聖 費 不 人 於 可 不同 辭 曉 矣。 而 若 周 末 此 氏 旬 每 又因 之 事 程 如 惟 此 推

己

二者而 字 非 學 之鮮 若論 未 以 日 亦 口 又引孔文子之好學,以 ,則亦 曉 亦 禁 非 盡 爲 侯、周 矣。 非 主 聖人之意。 耻 止 以 或 則 下 一善爲 已哉 問 禁 躬 之 贵 其 問 氏 止 辭 不 + 周 難 輕 氏 師 説次之。 之 逮之意 四章之説。 而得爲 ,是矣。 知 重 辭 貪之本也一句, 固 范氏就有道之説 哉 亦 夫所以謹於言者 也 當 ? 不 好 如 侯 疑 其 倫 但 學 且 配 此 氏 或 日 矣。 謹 也。 好學、下 曰 孔、 但 又但 有 與 言之説 誤字,不 不 非 顔 若文子 尹 侯氏 · 字 戒 一 未有所當 此 氏 似 問 於多言, 不 章 ,豈徒爲 以 范、 最 嘆知學者 同 自 之旨 亦太輕 之所 然則 善 無 兩 吕 字爲 則 事 耳 范 皆 謂 則 其

六

物欲 子 其不 又不 其 及 非所當敏, 念耳。 者,可見又以其平日之言推之, 論 本 至焉,其去於道也 此,豈反人之情而强其所難,亦曰 他 文亦謂 敏 不 乎孔、顔、曾、孟之事 敏 喪 间 而勉 若 謹之云,恐亦未遽及此 直言之,而 過 可 慎 祭之禮 胡 皆 食必 謝 氏 曉。 大意 於言行者 日 而 氏 求 志 出 所謂 也 然以 之 食 辭 既 ,非若主 其大者,而 居 期 ,●不亦遠乎? 説 慎 氣 不 此 ,然其所學毫釐之差 飽 必 人者,有 必 其後改之説 而 的 水安, 外 居 則 爲 已 當 期 則 父偃 過 非 是枝 耳。 ,役役焉 安,人之情 胡 所當慎 也 高 不 加 氏 所 有志於學 蔓之 留 甚 若但 務 張敬 及 也。 惟 謂 矣。 爲 孟 情 其 考之 \Box 張 夫 也。 則 五. 子 誇 於 辭 弊 如 則 體之奉 就 日 敬夫之説 鼎 有不可 其 ,則不當以 五. 不 此 平 所 張 而 此 (所謂 有 則 食 世 聖人之言 隱 鼎 耳 求 謂 固 所謂 而 道 則 也 ·, 未 敏 安 謹 秘 勝 有 無 乃 而 然 胡 者,有 言者 不循 者 飽 所 此 其 謂 夫 爲 使 澽 亦 Œ 敏 如 不 爲

> 之云, 之食而 家 子 而 且 就 切 以 時 焉 而 哉? 不 所 諸 爲 正 9 正 明 亦 己能 學者 謂 公推 於 焉 不求安飽之説 或 敢 乃 方 則未 問 飽 人 不 楊 其 以 語 從 之太 大概 也 而 敢 其 氏 終 夫 事 何 考 不 引 學者 尊 知 身 楊氏 於仁 以 過,以 其 立 飽 貴 其 終 事 知 是非 志、脩身、 者 業之 食 何 求 而 如 所 無 亦大過矣。 以 不 師 略 至 此 乃 引, 諂 哉? 爲仁, 違 所 賢者之禮 於 取 其 晉 無 似 ~、❷求 就 友之 此 切 平 求 驕之爲子 亦誤 大凡 豊 公食於 師 而 其 則 其放 時 遽責 志 夫 矣。 亦 又 耳 取 此 耳 誤 何 之 未 友而 章 心 之於 亥 貢 非 矣。 爲 如 得 等 顔、 本 唐 此 質 亥 方 有 言 意 Ħ. 其 此 孟 孟 道 之 其 唐

「云」,京乍「子」,隶日車大文。

0

658

[「]去」,原作「分」,據四庫本改。

❷ 「食」,原作「日」,翻弘治本作「身」,今據正德本、正本改。

其

甚

彼

也

琢

之志 釋之,今諸家引爲 乎其 於貨 説 哉 傳 ? 治 ? 錐 人 也 此 也 《大學》之傳 字 所 而 細 鑿 骨 不 殖 則 而 日 曰: 釋 有 然以 没其 已 角 諂 曰 日 而磨以 日 以 可 不 蓋 者 不 古人引《詩 古之工事,不 或 謂 : 然則 理 - 驕者 協者,今必 然則 名 亦 常人貧 其 疎 切 有 推 以 以 志 或 沙 志 切 何 故以 蘇 之,古今當 精 刀,磋 之所 密 亦 石 此 磋 而 耶 氏 則 粗 可或 引 能 章之説 也。 》,斷章取 琢 之釋 爲言 必諂 存,與其學之所 引 此 質之夫子,而審 自 磨之别,其詳 以 可 同 蘇 詩, 强 以 大 氏 鑢; 考 或 矣。 ,然於詩文 亦 釋 抵 日 富 前 也 異,不能 而 亦 此,不 若 切 義,姑以 治 則必驕,今能 一,以 磋 以 不 子 子不 此 琢 玉 者, 道 資 相 矣,子 今言 成 石者 切之至 學自 亦 可 雖 然, 遠 列則 齊 形 至,庶 拘 發 其 得 未 之, 耳。 磋 琢 也 剽 之 己 磋 何 聞 淺 脩 免 説 之。 不可 也; 不 以 加

磨

曰

以

則

乎

深

若

者,故 之所謂 有至 言哉 掖子貢者 之意矣。 者,然後 未足爲至,自是而不已,則是 之不給。 者也; 而復磨之,君子之學也 能 加 吾 一焉者 得 誠 磨 日 矣。 謂以 來者 者 也; 可 不 不 . 然 富 矣。 孔 者,蓋貧則防其 ,琢之詳 蘇氏 爲 得 亦 異 富 子 夫蘇氏 貧富 高 而 故 其 未可 至 子 而 Ė 據 乎 未言 好 矣, 胡 好 貢得 之説 耶 者 以爲至也 以 禮 彼 禮 而 氏 ·者也。 貧 也。 猶 ? 爲 矣。 之意 爲言 是 雖 一而樂 非 非 欲其見可 以 説 二言 切之可 欲 此 之 於文意 周 子 爲 也。 騙 然其 富 老、佛 豊 Ē: 自 貢言 公不 而 亦不 則 而好 未 富 是 矣, 識 至於 以 而 而 至 而 蓋 貧 大旨 其 可 防其驕 禮。」夫貧 能 最 而 不 爲 上 而 貧 之 彼 所 得 將 止 則 復 將 樂與 爲 無 見可 未 也 餘 謂 也。 谜之, 有至焉者矣 則 諂 孰 夫子 言 有 也 得之, 豈 樂 者 富 而 而 有 往 미 加 志 好 ,紛紛乎 不 不止 樂 琢之可 而 故 而 者 不 賢 非 非 所 乎 禮 無 好 孔 於 ,其已言 雖 吾 司 貧 爲 以 顔 孔 而 禮 子 則 彼 欲 自 矣。 富 焉 之 至 誘 子 子 無 子 此 必

夫 言,亦 屬 協 若 之謂 也 自 未 爲 與 無 加 之深 子 安 耶 未 隋 好 驕 口 之意 有 其 與 范 通 耶 也 貧 禮 之云 亦 則 倣《大學》程子之意 程 論 有 0 楊 矣, 好 富 互 不 其 叔 古 問 禮 進 相 所 夫好 矣 非前 本 能 氏 然 周 子 説 知 學 治 發 於 於「其 旧 以 與 以 夫 其 當 、成成 明者 禮 尹 道 言 强 人之所及 周 以 叔子 爲 矣。 貧 亦 ,若樂 氏 以 協 則 德之不 無 樂之非 能 有 爲 以 尹 斯 皆 也 又 亦 處 諂 脩治 可 曰 爲 同 之謂 善矣。 加 以 其 無 . 而 非 論 耳 同 謝 密 分 諸 好 驕 而 爲 者 自 自 口 與 矣。 乃 氏 説 禮 以 能 僅 則 脩 也 耶 脩 與 非 必 以 然 者,又有 道 大 自 爲 樂 亦 不 伯 所 然其 則 問 必 以 以 學自 旨 脩 能 能 有 及 則豊 其 學 樂 子 以接於人 成 者 處 未 造 而 成 則 所 德 所 則 與 脩 其 盡 道 避 易 所 其 脩 皆 德 不 似 好 論 無 者。 分 之 夫 協 分 不 説 治 皆 禮 樂 爲 諂 異

言之 士,亦 驕 之説 氏 此 諂 合 章 知 其 子説 疎 夫 也 少 而 諸 知 矣。 時 之説,不 則 無 也 來 謝 後 貧 亦 來者。 富之道耳。 階 者 驕 氏 況 見 未定之論 説皆 則子 亦 豈必皆出 若范 級 爲善 物 者 至於告往 不 有 不 我之云, 諂 如 爲 貢第: 見於《語 足 口 不 亦 氏 謝 如 之士 不 亦 樂非以 觀 以 得 未 范 以 氏 也 於各哉 足 者 非 能 知 其 有 爲 説 知 與 是。 楊 然因 無 咏歎 贵 文義 求 來, 外 以 貧, 解 ,則子貢第 ? 曾 諂 必 見 尹 於 ,好禮非 **>** 有 氏 使子 其説 無 皆 夫子之言,未 人 此 日 餘 氏 己 其 而 故 驕 不 出 外 説 周 見 而 而 知 説 以 亦多不 以 之爲 貢 爲 於 則 氏 富 於《文集》, 内 自 貧 來 雖 而 能 則 之説 之説 人, 故 曾 不 得 也。 出 果不 精 美者 形 反 無 氏 足, 於情 者 岩 而 容 通 而 蓋 爲 有 終 大抵 夫 則 以 張 免 故 不 矣 性 而 富 子 以 驕 敬 贵 於 有 往 如 又 小 有 貧富 故 見 程 益 類 此 餘 所 夫 其 如 無 不

與好 不能解 未除,而曰吾樂與好禮,未之聞也。 足貴。 毫求之之意,居富而有一毫自恃之心,皆諂與驕也。 禮可得而進焉,又不可以不知也。 而 也。張敬夫曰: 所謂無諂無驕者,學者亦非可忽也。 安於無諂無驕, 必也無諂無驕, 而不知進學, 居 貧 而 而 後樂 此病 固未 有

至論。 范氏 楊亦 吝之私,亦猶其首章不 非此章之所指矣。吕氏充知有命之説,皆非 句似范氏,下句似吕、謝,皆已辨於前矣。 未有 佳。 或問 謝氏之説,既非本文意,而又不免驕 十六章之説。 不知之云,楊氏求爲可知之説 但知人之説,二家各得其一偏,而 愠之云也。 曰:尹氏善矣, 侯、 周氏 范、 則

論語或問卷二

爲

政

凡二十四章

息,其 隱。 日 中,常居其 高 之形,半覆 十六度,故周回七十二度,常隱不見。 之極者,猶 而 月 出 動 五 北 地三十六 或問 樞 包乎 緯 極 紐 右轉, 之星,正 地外 所而 屋脊之謂極 不 乎地上,半繞乎地下, 北 動之處 辰 度,故周 更迭 不動,其 地 之 在 方 爲 ()隱見 ,則在乎南北之端 常 而静,處乎天中。 樞 也。 回 旁 見 ,皆若環 則 七十二度,常 何 不隱七十二度之 然南極 經星隨天左旋 也 ? 而左 繞 低 曰 入地三 而 0 北極 焉 旋 見不 天 故 歸 不 謂 圓 向 天

> 何 ? 之。 故謂 也。 説 認 動,而衆星拱之耳,非 有 有德之譬, 正,周氏 亦謹嚴,但所以 辰之舍,則 者,亦可見 德 甚 北 之辰,亦恐非是。 二家又皆以中 ,然後能無爲 辰爲北 知 日: 失 此 所謂 聖人取譬之本旨。 矣。 程子、張 是 亦 則 斗, 恐 北 居中不移,似皆便以 知 語夫德者則粗矣。 謝 故有 未 4 天 氏 樞 然。 子、 而天下歸之,如北 而 非 以 無 之説 以北 不遷,有定次而不移 爲以其 范 北 辰蓋天象之名耳。 爲 詳聖人之意,但 辰 而 尹 楊氏 辰爲有居中之德 也 加 爲,推 得之。 聖 所 人 所謂 建周 日 居 吾 謝氏 0 所 其 所 吕 諸 於 以 辰 中 之不 十二 氏 説 取 以 所 有 由 心 如 爲 爲 誤 意 守

同 0 ,然皆發 或謂《 或問 二章之義。 乎情 詩》三百篇 而 止乎禮義者也,此其 雖 曰: 有 程子、范氏正矣。 美惡 怨刺之不 /所以

無懇 探其 然其 不 使 事 而 之之意 所 心 也 情 愚 或 爲 詩》之不正 丁, 作 害其 吾之言固 人 ? 得以卒歸於正 日 則 嘗 思 教 以刺 隱 譏 切 法之也 有 竊 無 方之俗,使讀者考焉 日 矣, 爲 然則夫子删《詩》何取 諷 署 ,然後其 是 矣 有 邪 諭 而 人 IE 疑 者 夫子之存之也 夫爲此 夫子 而其 (也,亦 者多矣 已墮於媒 之 播 乎 焉。 . 與? 誠 揚 ? 日 人 亦 不止 之, 焉 夫變 . 之人 有 則 必 曰 : 日: 了又可 何 是 爾,非盡 以 既 優 IE 取 慢 乎 亦 風 《詩》 (覺悟) 放故 此 恐 無 游 禮義者 平 刻 《鄭 安 以 《詩序》之言 未 陳 含 薄 爾 其言雖 知 特 ,以監 思 || 衛 耐 以 蓄 雖 能 善 之流 哉 其 以 於 無邪 懲 爲合於禮 有 閉 或 微 非 見 此 亦豈 創 》之詩 邪 主 其得 益 邪 當 夫 之 焉。 而 而 示 日 之方, 於 於 不之去 所 時 先 小 而 其 譎 失, 也 發 言 然 若但 時 得 哉 以 義 賢 義 諫 則 又 罪 譏 者 之 而 則 而 平 然 而

端耳。 失 者於 爲言 也,然 耶? 義,夫 氏 其 日: 史,則序《詩 無 又 爾 將 盡 新 愈遠 中 所 日 適 非 使 斷之耶? 義 諸 以 思 又有 人考焉 而 》之説 誠能 日: 而其 亦豈不 欲 然則 矣。 辨 其於夫子特舉思無邪 説 慮 不 使 蘇 隱 甚 如 可 夫子 所引之《詩 是 人習 思 》者固 其 可 何 氏 微之際者,亦太疎 以 卒歸 日 以 也 疑者。 又 後所 者 ? 無 監 所謂 一,則治 . 或 豊 邪 焉 其 吾固 善矣。 티 : 史爲 已失之,而楊氏 於思無邪 但 之一言者 著《二 而 得 讀《詩 失,而 效 \leq 如 大旨 心、脩身、讀書、 言以 言之矣,聖人之意 國 其 不 謝 然謂《 經 過 所 氏 則 義 学 之文 心 蔽之者 「其讀《 之一言耶 之 爲 怨 專 辨 《詩》皆 而 皆失之, 得 法 也 而 以先王之澤 以卒歸 不 言 勝 蓋 又因 不 而 近 〈詩》之 者 當辨之, 非 怒 己 則 矣。 出 以警 窮 之 哉 其 則 荆 而 於 乎 理 法 或 其 舒 楊 學 就 是 爲 古 或 IE

邪 豈 氏 《詩》而 專 之言也 爲 以 此 美 説 言,以 刺 ,是亦不考於《詩》而已矣。 之 爲言,其失近於謝氏。 時 爲凡夫子之所取 其 論 尚 有 未 定者 者 與 尹 氏 ? 皆 0 思 主 無 於 周

本旨 敢 則 善 從 刑 心 誅 至 言 但 而 之謂 一於犯 爲非 一,而 於 無 楊 ,殊失文意。 者 也。 説 此 所當矣。 車 微 非 ,真有以 問三章之説。 哉 亦 任 有異乎 此 則 侯氏 爲 不 德 章 可 亂 有德禮則 若以 至如是之偏 禮之意。 之意。 矣。 范、 以道 ,此章 免於罪戾耳 蓋 而 説 脱 所 吕 吕 爲治、於政猶 一之意 專 謂 漏 氏 蓋 刑 曰:楊、侯、周氏得之。 謝 恐董子 任 免 憲 政 與 謂 也 不若 E 政 網 尹 范 先 在其中者 ,豈冒犯不義 刑之弊,其 氏 治 氏 以 所 ②以 謝 皆 皆 内 其 周 謂 氏 可 以 革 以 幸 氏 有 所謂 承 通 意 之得 格其 苟 廢 免 面 天 於 則 流 於 免 意 置 而 先 以以 德 其 甚 後 以 政 非 必 刑 不 爲

節

以

不

此

曰

而

表 裹 者 則 庶 幾 得之矣。

學,真 致知 之不 也。 之道 無所 知 爲天已定而所 則 章 0 應 程子以 之,其 ,其説! 或問: 通 通 當 楊、 年 誠 意 有 以 也 而 周 意、正心、脩身、齊家、治 愈 次 有 血 第 一、尹 所謂 疎 具於《大學》之篇矣。 必十有 爲夫子立法以 大學之道,何 Ŧi. 氣 蓋 而 爲言, 氏蓋守 聖人 乃 而 言 知所嚮者爲 志於學,其後不應又必累 以爲天不窮譬之,則恐其 自 愈輕 五 生知安行, 志學之年, 而 其説 而 也 語 後 道也? 皆輕,至於 勉進後人之辭 特 太輕 志 張 於學, 子 周 渾 团 以 耳 氏 曰 : 國、 已明 然 日 爲聖人之 血 0 天 ¥. 氣之説 何 聖 下文兩 蓋 格物 道 理 天下 人 其 也 牛 是 於 古 理 大

0 尚 原 作 尚論」。 據正德本 IE

² 網」 原作 據四庫

口

曉

聖人之義 人之所以 又有與 或不 原, 不不 安之,有 學 亦近 吕氏 自 之妙 氏 益 也 過 亦 而 其曰「生 思 理 誠 以 爲 而 0 待 人同 指 知 至 乎 物欲 而 不 爲 若 而 有 聖, 之 學 夫名器事物之間 所 於 張 特行之未熟,故 得 言聖人學者之分,其 明 聖人爲童 所 天之無 者 未 而 范 子之説 者 固 知 進 而 則程子嘗言之矣。 則 猶 後 安,亦當學而 氏 非物 有徒 哉 又何 未至 未免交戰 知 以 ? 其 窮 也。 物而 子 爲 生知 説 必聖人而 其不 於 若 ,時,已. 則自 聖 依 不 又 如其 知之,有 人 四 而 必 得 乎 非 勉 曰「安行 古至今, 有 不 兩 安之」, 由 引 知 胸 言 而 能 與 意 以 後 從 可 志 以 中 中 安行 人 學 殆 爲 然 所 口 則 而 心 爲 也 也 則 亦 不 異 非 義 所 未 以 是 所 曷 而 比 子》不 功,而 非《孟 之際 見明 禮言 程子、 聖人 不 張子、范 曰 其 也 有 若張子之云。 E 而 0 言 動 非 ? 言之, 無 既立矣, 徹, 强立之謂 心 之 動 毫 則 日 日 所 則 日、日、 釐之辨 過 心 無 疑 自 可 爲 也。 所 則 耳 志 加 比 謝 滯

理之本

未

知者

知

亦亦

當

當之乎?

然則所謂

雖

漸

進

蓋

欲

不

踰

矩

矣

謝

而

後

進

其

加

是

加

平

哉

前

物物

而

於我云爾,此以學者言之, 子》本文之意。 其所立之地 少拘矣。 、謝之説 感,而 其 亦 乎學,積 以 則 氏 **無** 礙 日 以信 似 得 誤 充 日 + 又必 張子 之説 也 . 之。 亦 確然 不 積 矣。 年 所 小 有諸己爲 判 意 + 所 玩 是 以 所 蓋 謂 差 至 堅 者 + 然於 年 謂 日 索涵 爲聖 謂 也。 於 於 不 五. 其 古 所 : 天 器 事 張 則 年 日 惑 所 胸 日 命 養之 但 人 物 於 物 知 子 無不可 志學之説 信 進 中 謂 不 者 范氏 之 者 禮 莫能 之 益 脩 范 知 惑 立 事 功 若 理 以 何 持 氏 何 而 者 7,若 引《 摇 程 成 之 守 所見 也 後 也 而 子 也 之 孟 則 固 知 極 何

之所 物 惑 理 者 亦 窮 而 而 蓋 命 知 益 然 ,其 猶 觀 也 也 非 以 理 觀 理 此 何 而 徹 之, 矣。 又進 此 不 盡 之, 以 以 至 其 隨 初 也 名 베 惑 物之所 爲 訓 事 性 則 非 爲 則 其 雖 至 之與 性 别 焉 無 彼 日 而 性 於 先 天 所 殊 妄之 日 0 則 知 物 性 命 理 理 是 則 後 在 然 0 得 不 其 天 之 理 以 而 也 有 云 云 而 程 則 是之 理 動 命, 實 則 所以 無 有是言耳 者 者 人 所 言, 子之意 程 而 心 則 殊 亦 不 蓋 大 未 雖 子 謂 不 小 命 則 窮 不 爲 天 雖 口 之直 非 E 性 德 德 而 理 亦 道 能 耳 其 蓋 一,性之 則 性 焉 有 己。 之 之 者 運 不 無 相 天道 無 漸 以 敦 111 也 夫三者固 以 是 行 能 眇 周 去 不 次階 窮 故學 化 所 理 流 則 氏 忽 無 之全 不 盡 賦 理 具 也 自 也 所 之説 1 能 之 與 級 自 天 盡 至 是 謂 而 分 間 以 性 萬 性 之 性 命 非 於 故 有 而 天 别 也 也 物 言 미 自 者 性 以 不 命

物。 言 乎 上 若 也 孔 意 來 本 則 謂 説 不 而 亦 亦 性性 ? ? 篤 者 不 文 别 子 也 非 章 過 牛 益 放 不 有 所 知 其 E 也 而 明 此 待 但以 之所自 乃 有 日 之所 楊氏 0 相 知 白 所屬 知 略 日 然以《 知 其 以 之者 矣。 與 范 應 記 殆 命 此 爲 其 知 所 能 之 9 氏 所 不 窮 之未至 出 氣 加 以 而 論 及 無 當 孟 學《易》之云, 日 止 聞 也 達 而 後 爲 矣。 旧 世 矣。 間 子 矣。 此 之 言 但 欲 賦 又 他 能 人 **>** 命 知 者 則 者 聖 其 受萬 則 皆 其 似 説 也 若 耶 謝 性 又 賢 信 知 E 以 奈 未 張 得 氏 之言 有 則 以 夫 物 窮 與 理 何 知 子 日 之矣。 所 尤 知 張 理言者 窮 之 達 道 則 其 性 所 謂 無 天 子 然 達 命 有 爲 所 與 所 謂 有 日 者 至 所 之 耶 知云 命 則 理 命 止 然又 知 . LI 驗 者 命 謂 有 真 之 果 天 命 程 此 其 而 之, 者, 之 命 所 之 爲 以 猶 子 有 何 信 吾 則 理 自 於 命 所 前 此 則 與 V 爲 而

姦 是 其 猶 無 張 子、 有 而 與 年,若用 Z 否 非 意 熟 迹 形 必 得 張 子 是 則 張子言之詳 之累, 之所 之意 之 可 也 者 耳 子 而 隨 日 也 則恐 恐 理 否之 乎 有 幾於化 弓 弓| 相 0 9 其 力、若 其 指 焉 所 以 所 似 其言 語 未 而 據 若 聞 理 謂 氣言者, 意 則 不 蓋 安 至 於 尤 不 也 耳 則 之過 若從 而 謂 日 張 義 然 矣, 也 精 神 甪 順 可 推 之 耳 子 後 不 速 然程 力 其 害於 也 窮 無 心 之 范 後 所 心 9 何 若 而 序 達 所 女 説 謂 而 所 氏 有 子之意 也 自 則 H 則 然 有 欲 兩 聲 聞 程 所 滯 所 ? 横 至 自 各 所 誠 不 命 通 亦 言 子 通 於 於 耳 無 謂 得 知 自 有 日 云 也 口 疎 迹 最 主於 此 所 不 爲 天 0 其 盡 者 以 踰 者 略 後 蓋 聞 有 其 但 别 X 未 其 命 當 矩 是 物 豈 恐 以 無 之 免 貫 義 其 又 也 曰 其 而 0 説, 之 其 渾 加 是 别 滯 以 德 更 不 通 以 則 不 非 無 其 性 然 其 或 知 於 思 又 盛 + 程 亂 讀

> 之至, 以 偶 作 皆 讀 釋,蓋有 踰 者 人 從,舊讀 氏 出 從 與 未 從 如 年之間 於 矩 如 蓋 則 渾 此, 天 縱 皆 列 心 察 而 而 然 何 又 者 / 禦寇、 爲 爲 耳 祖 爲 聖 莫 非 陸 而 無 也 其 絶 乃近 縱 人 ? 儒 今 知 無 氏 私 從 莊 以 師 句 之道 獨 者所 其 所 欲 無 且至心 日 之 理言之, 世 用 周 容中 不 所 之 然 别 初 之謂 習 當言 所 然 以 力 其 間 此 音 説 道 俗 以 然 聖 音 字 而 而 何 則 爲 之 流 也 則 而 然 人 從 而 讀 則 也 謝 舊 終 謂 傳 然 有 也 大 句 容 不 氏 古 日 也 亦 之 者 哉 而 心 絶 自 可 所 不 誤 讀 曰 化之, ? 於 自 耳。 到 從 謂 此 諸 日 免 如 耳 縱 聖 范 先 心 而 經之本 内 0 如 於 本 順 吕 諸 人 所 外 亦 生 從 春 心 氏 字 誤 及 氏 之德 一之説 先 融 與 豈 心 欲 兩 雖 爾 此 也 牛 文 理 唐 不 聖 凍 不 忘

● 「横」,四庫本作「凡」。

害 子 之分之爲 於 得之。 不可 曉。 但 矣。 矣。 也 僭 嗚呼 其 而 事 不 禮 生 1 矣。 之 僭 以 是 雖 雍 者,其 不 徹 可 則 考 心 其 贵 然 祭 不 亦 也 以 僭 口 爲 想 而

反,不 禮 以尊 愛親之心,故以 莫大之不孝哉 則 榮其 反置 親 其 親 而 此 於 爲 告之, 夫子 僭 莫 大之孝 叛 因 不 庶 其 臣 其 ,夫 之域 問 有 孝 贵 所 知 而 而 感 自 知 發 其 陷 違 愐 於 能 有 於

隱,而 事 自改 變, 也。 自 脅之以遷 有 雖然, 所 不 善 聖 得 哉 人亦豈務爲 遁 焉 耳 亦 循 鳴 理 險 呼 而 語 言 以 此 中 而 其 物 人 情 所

之讀

皆失之耳。

程子

謂

Ŧi.

+

知天

命

而

未

知其

果

何

謂

也

?

吕

謝

楊

説

皆

善

但

從

字

曉。

且

與

其

下文所引舜、

孔

子

事

亦

相

加

養

血

氣

其

德

致

命

遂

志等

語

尤

不

口

耳。

其

論

不

夢

周

迂

口

難

通

殊

彼

爲

是

足

而

知

不

禮

0

諸

説

如

何

日

范

氏

之説

殊

無

倫

次

0

張子

兼

不

思

不

勉

而

言,不

若

程

其

大

義

則

程

子

張

子

固

不

爲 聖 之言 也 與? 티 : 諸 説 如 何 ?

其 其 티 : 事 所 包之廣 程子以 有 所未 告懿子 合,然直 而未及乎 者, 以 孟 爲 理 告衆 氏之僭禮 而 觀 之, (之言, 則 也 聖 人 雖 蓋 此 於 以

之地

也。

然古今以

爲聖人之事者亦多

故故

程

言

固

而

口

也

范

川

以

此

章

亦蒙上文

窮盡

之云

而

繫之耳

,非指聖人

所

浩

未至也。

然《易

大傳》之言

窮

理

盡

性

以

以

命」,

則以《易》《書》所發之理言之,爲

云,言

其

與

、天爲

而

己。

Ŧi.

+

知

命

誠

有

所

七十

然後至

一於命,

何

也

?

曰 :

至

命

之

子

因

之,蓋

不害於

理

也

其

有

考乎?

魯之三家,

殯設

撥

則

其

葬

或

問

三家僭禮,其於

夫子

之三言

事 爲 君 箴懿子之失 者推之, 亦 無 所 則亦疎 施 矣, 然 不 不 矣。 得 其 又 事 以 懿 尹 子 力 而 不 以 其

二六

然亦 悟通 矣。 何者 與天 此 篇 其 告 問 禮之意 氏之言,爲世之貧 所 論 ,特問之以質其 而 而 達之才,亦何以 道 周 可 以 以聖言之淵懿如 論 葬 因 而 夫子復以告之, 爲 并 . 樊 氏 以 朋 祭 非 則 氏 之 遲 夫子告孟 來 以 善 性 釋 以 見聖言所 説 忠信之病也 禮 以 與 仁言之,亦 四章之意亦高矣, 而考之亦 雖 及之,則亦 遺 天道之發,不特此 約 目者,其 事 孫之意, 知其 包之廣,而 庶 賤 實 此 蓋 未詳 幾 過 而 而 · 而 亦 非 得 無問 愛 鶩 高 或 待 又以 之。 有 樊 也。 則恐其 親 高 而 有 樊 所不 遲 者 遠 然聖人之言 傷贅,其 此 爲 遲 樊 平 謝 加 言 亦 章爲然也 意 程説 遲 似 告二 知 Ħ 氏 未 非 若 則 亦 然不 也 又 通 然也 之驗 一之瀆 言 得 耶 非 少 不 其 以 之 ? 過 知 前 性 僭 直 敏

切 於 人 或 心 問 ,使學者知 章 之説 有所警省 티 : 此 章 而 唯 用 謝 其 氏 力 之 説 若

> 致疾 之日 如諸 而 顧 爲是迂 説之意 以 「不爲不義 憂其 昧 親 則 前 不切之語以 以 夫子 後 貽 於 可 父母 武 以 爲孝者,是 伯 之憂 告之,反若使 之問 可 謂 何 世 孝 不 之必 直告 矣

平日

教

人

做身謹

疾之意哉

於人, 其 學者考之可 之言 范、尹氏之説 獸畜之也」, 著夫能養而 也,故特以 八拙也。 或問:) 豈若 初 無致養之意 此殆欲避前説之嫌 其尊卑懸絶之甚 是 父母 也。 不敬者之罪 亦其 犬馬 之 不 至 曾氏 (明驗。 皆 倫 尊 ,恐聖言取譬,必 能 乎 親 引《孟 ? 有 耳。 諸 犬 養 日 馬 説 者 子》「愛而 謝 則 而 於此 至卑 明之,所以 氏言之已 此 犬 遷就 馬 設 賤 疎 之有 戒 之耳 不若是 略 不 之言 聖 敬 惟

説 之失爲言,然不若程子之言爲盡 不 ,則亦似失立言之意矣。 可 爲 解 正 但以 也 文義 而 謝 程 考之,則 氏 子 後 於服 説 勞具 似當以程子、楊、周 則 似 饌, 楊、 有 闕 又皆 周亦 矣。 文 誤字 以二子 以 爲 孝 氏 而

者 退 退 則尤足以 云亦 爲 以 發字之義亦 爲 加 為開 省 後説 孔 省二字,意亦 自 乃有 子 得爲 或問 若以 可 亦恐當以 發之耶 發 以 謂 り則 發明 爲顔 見 九 中心者 爲孔子發之,如憤悱啓 能 然,蓋 章之説。 其 未 有 則 子之自省, 隱 一説 不同。 所 知 顯 是 若 開 其 以 亦 無違 爲 發」, 爲 日 以 密矣。 曰:程子至矣,其以 致之實耳。 正 開 前説 顔 爲 之時 也。 發者 子 顔 而 恐 i 子 當 以 但 不 蓋若以爲顔子 三,以 當 有 心 以 爲 以 初未 云「亦 有開 前説 發之云, 開 孔子省之, 燕私言之, 然程子於 發, Ţ 爲 發,以 T 爲 足 發 則 也 Œ 則 私 以 當 明

子所以 氣,不 之,然非聖人陰以告顏子而 能 虚 亦 知 意 有 謝 退 開 雖 不 言其氣禀之高 違,不言其義理 知之者,且 得其然 之説 口 使 方以耳聽,若之何 , 則聖· 此 氏不違之説 與門人講論 發 於文義 勝 馳 理,然遂爲 如是之驕倨而 而 驚恍惚 省顔子之私 ,於學者 言者 人之立 視 而 可 他 不可復有其 通 不 矣 人 以以 爲説 而 得 明 觀書 爲 之契合 言 而 猶有 流 其 其 垂教 爲觀 全 而 楊 者 於 ,蓋用古註 所 加 忽易 語 決 不 專 所益;神受之云, 氏 怪 豊 以 人矣。 加 書不 又以神者受之也。 不 足 意乃若以 以 教 誕之域 又何 然者矣。 足以 也。 獨 教 好 專 不 其 不欲使衆 為篤 者 如聽言之切,固 凌 以 望 其論顔子之不 范氏專以 講論之云乎 ,然亦狹矣,夫 得 心 其 神受爲説 節 於 恐 聖賢深 顔 虚爲言 然好 後 聖 云 子 爲 者 世 人 爲 人得 害 聞 微之 之 亦 篤 顔 僅 則 口 聞 得 或 則 而 子 有 心

用之間 且以明 愚矣, 知向之所 其 默識,不 以 故 夫之説 爲 亦皆 周 而 之也 察之之詳 日 也 不違 燕私,則其視聽 發。 可 此言 知 氏 耳 勝 而 又以 者 少 鳴 進 胡 如愚。 所以夫子 復問辨 惜 必 德之功 氏曰 呼 謂愚者 以 · 然蓋 偏 謝 蓋 哉 日 亦 退而省其 爲 或 爲教 善。 退而察其履踐 侯 夫子 ,反如愚蒙之未達者; 而 張敬 蓋 欲 顔子之質,鄰 偶 必 ,乃所謂上 言動 退 必常有省焉,非 氏 發 雖 門人觀顔子之朝夕者尤善 大 而省其 由 與 关曰: 於門人也。 曾氏曰: 門 皆 内外 聖人之於顔子 私之云者 回 其 皆 人之進 以 言 問 能 私 相 智 夫子之言 終 爲 以 答 也。 符 於 則 入乎耳, 而 日 聖 聖人所教 生 而 布 知其足以 所以見其非無證之空言 隱 則 知 然聖人久矣知顔子之不 乎四體 一、恐亦 人言此、欲 詳言之, 顯 曾 言多 及侍坐 ,顔子 故聞夫子 著乎 全 氏 致,欲學 固 矣, 發明 隨 無事 ,形乎動 皆 心 或有 胡 用 一而退 而 能 有 以 發見 之言 默而 氏 斯 今存者 體之於 者之慎其 實 不 以 至 道 , 夫子 静 此 張 待 而 證 於 乃 識 然後 放足 心 意。 之, 敬 妄 省 其 其 日 無 察 而 終 通

不

非

以

者

亦

請 事 斯 語之驗 也

驟矣。 通,但 離遷 事,且 兼君子小人而言, 之言以釋以字之義 氏之説則疎矣。 小人何嘗一日不 氏説 疎,其 不可曉,蓋已贅矣。 通 歸 莫 則 就 趣語 也 如 或 上二句恐有未當 其 歸趣之云,又迫夫所安者之地 楊氏三句,大 而小不同,然 問 ,抑又甚矣。 用 以 輕 謝 所 十章之説。 心。 所由 重 曲, 氏 淺 説 今先視 爲昔者所經 深 而 人之易見者莫如 似 亦似 在於善」,則其 無 所安者, 前 甚 周氏 亦不 抵 雜 一當其 其 曰 非 前 所安之云則得 謂 略 0 亦然。 用 必論矣。 此章之本旨 所 然 似 引 唯 乃特 心 以 謝 由 何 細 程子 所 考之, 者, 爲 意 莫 進小 者 爲 而 尹 然 才, 由 行事 得之。 後 則 所處 矣。 蘇 氏 斯 意 引 Ĺ 尤 矣。 察 則 則 氏 之, 道 説 左 也 之 其 其 至 亦 有 吕 難 又 也 是 支 氏 亦 然 亦 似 范 日 貫 所 氏 行 知

殊

范

者果善矣 所爲者誠 幸矣而 安之,則 但 善矣 入於惡 其 則 所 爲 未 安之云, 善 則 知其 ,然終不可以易其 惡 未 能 知 也 決 其 久而安之乎? 所自 矣。 亦 如 小人有 爲之者 謝 人者,所自爲之者非 説 幸 果 惡亦 耳 · 而 中 善乎 0 如之。 蘇 於善 氏 所 日 君 至 自 於久 爲之 子 見 也。 有 其

故者 爲 新 此 謂 雖 廢 能 温 吾有 尋 見 富 故 忘 而 記 解 繹 荒落之患 已乎 必 誦 惑 或 譬 今之所 誦 而 其所 之學 然 貴 問 若 説 而 不 ? 於 能 待 無 雖 不 學 己 不 知 源 勤 索 學 時 始 日 必 得者 足 新 者 之水 · 而 其 . 而 加 得 温 以 乎 故者,昔之所已得 無 義 無 反 者 故 爲 ? 而 其 所 已之求 理 復 也。 人師 耳 而 每 據 尋 之 贵 文字 後 出 有 以 所 昔之所 繹 爲 可 有 者 得 知 之功 師 以 哉 知 之外,略 窮 於其 新 IE ? 然者 之道 新 矣。 亦 謂 則 得 平 所未 將 此 學 者 無 則 然徒 亦 雖 亦 何 耳 記 得 足 以 未 抑 毫 見 也 曰 於 温 能 既 者 若 所 授 髮 聞 免

非 矣 遠。 矣。 故 可 焉 矣。 足 異,然其 而 高 爲 氏 於本章論之耳。 子夏之言 説,美則 於於 以 云者 又 知新之大者,學者以 自 以 明 師 則 爲 程子 見 乎 審 吕 并夫子、子思之意 言 以 譬諸 中 能 夫義 究 氏 ? 美 意味,則今之視 Œ 爲 庸 悪 如是 據 ,則其文義 其 吾 所 觀 矣, 師 謝 程子 夫 廣 説 理 人,昨 年 以 氏 其 其 氣 之 而 大、 明 调 則 范、楊、 無乃非 專 爲 庶 象之狹 無窮,而 夫未 + 精 高 記 日 以 師 矣 亦 時 微 不 誦 識 名 平 有 至此 有 是 實 周 以 之 而 其 聞 本 昔 餘 解 而 爲 倒 於於 學 爲 文之意乎 面 氏 爲 亦 爲 也。 者,不足 釋 爲 夫子 之, 置 的 極 師 説 將 不 此 何 經 而 斯 致 而 之事 亦 而 且昔 不 今日 則 同 爲 尤 義 之言 言, 錯 深 放 暇 矣。」 其 而 其 而 ? 求 以 失 陳 此 與 程 識 口 於 牽 不 不 爲 者 爲 此 今 子 所 師 其 合 至 足 之 至 之 無 晚 師 川 温 心 楊 引 其 其 引

所 之如 則 理 所 偏 將 廢 是 謂 則 之詳 分 殊者, 兩 者 得之, 正 則 以 概 亦 爲學者 誤矣。 以 爲 同 各 夫 極 加 聖賢 不 其 察 功 所 其 以 而 異 言 無

有

兩失之患

耳

當

也

出 哉? 若 所 但 教 矣。 以 上下之云,亦 之義 也 而 求 日 .君 人,先盡其 范氏 道 爲言,則 以 子不 不實矣。 或問 亦 0 游 ,是徒 道 各專 氏 而 彼 溺其 爲 大意亦善,其語 十二章之説 意 又爲子游之譏 規 本 其 聖 無 喜 亦 小者近 楊氏 矩 心於是, 類 人 所 其 而 用 淮 、亦豈教 當 此 志 有 加 引 繩 者 於 不 據 夫 揚 而 · , 此 能 雖 小 而 雄 而 日 語 子夏 人 章之意矣。 者 相 有 方 意 大器之言,以 後進夫遠者大者 0 不 涉 以 近 繁雜 通 以 圓 程 悟 老 遺 也 贵 者 貫 子 平. 、莊 其 器 其 通 直 施 則 不 必 尹 而 之焉 器 之 安 則 取 以 是 引 且聖人 氏 之 所 之 釋 尤 道 離 形 形 得 耳。 失 自 者 虚 不 而 物 之 而

> 則所 不 知 偏。 哉? 器 而 包者廣 可 蓋若 之 侯氏 大受爲 理 日 矣。 所 而 不 引, 不器 周 不專 器 語 氏 故 自 之説 則 於 不 倒 意 事 可 置 專 小 ,於大義 , 今 直 則 在 知 是, 亦 而 支 而 以 口 而 若 不 大 不 受, 無 可 有 杰 平 小 所 所

乘之國」 謝 也 子 自 兩 所 · 貢 與 氏 意 爲 有 多言 ? 説 或問十三章之説。 其首 雖 意, 中 范、 者 不 而 語 推 言 而其 末 周之説 發者推之,恐 意 之, 而 兩 雜 語 可 説 則 亂 有 喻 爲 也 則 不 及「德 尤 不 則 口 待言 當 不 曰 : 解 意 亦若 可 矣, 者。 也 諧 程 曉 而 范、 頑 而 0 子凡三 人信從之之 以 中 嚚 周 以 周 其 尤 其 氏 能 所 説 明白 之説 説 所 謂 讓 謂 千 大 又 而

⁰ 施安」,四庫本作 安頓

弘 治本同 正德本作「亦 IE 保

言者, 中 以 氏 如 者 若 且 子》文勢自 而 意 此 不不 説 子 無 以 疎 此 范 矣 之意 貢之言 此 以 也 以一行 亦 知 又安得爲己之言耶 如史氏 周 知 爲 何 其 君子切 之 今姑 與 其 説 爲 何 有 説 其 語 爲 何 哉 之所 故 所 不 論 他 耶 己之事多矣,夫子 言 乃 重 同 則 而 人 ? 記亡 善 者,不 復言之,以 本 矣, 闕之,不敢以 尹 言 於 且 氏 文 其 以 辭 吴 日 之説 初 所 ? 得 霸 爲 先 \$ 無 行 越 耳 强 他 行 蓋 不 至 人 者推 明,豈 之辨 取 人,則 而 與 信 於繁 初 意斷 不言何 曾不 其 從 未 爲 之, 也 所 之 嘗 所謂 亦 也 而 一,告之 及之, 證 引《 之 程子 以 不 則 也 言 楊 孟 其 殺 又

但 意 倫 也 其 日 或 比 問 然 周 故 周 不 而 四 周 而 不 章之説 者 不 比 比 推 比 其 比 故 曰 : 意 不 而 周 不 而 程 周 言之者 子 二者, 則 之 語 解 勢若 也 本 善矣, 文 之 程 不

不得其 敬夫曰 事, 天理 繫而 則 比 比,恐不 引 以 俗 以 何 張 亦 善 子 之説 之 是 周 ? 敬 比 古 於賢,亦 亦 是 失其 人 若宗 夫之説 旋 周 意 不 與 推 分。 欲 而 日 君子内 之云 害其爲 比 之可 贵 發 Œ 不 同 爲 蓋其 而 魯 其 周 明 並 忠信 其以 於 以 親 口 立 所 ,則皆 所 ,其語意 也 徧及之義 恕 心無不溥焉 理 則 [h] 比 也 於 親 以 謂 周 非 昵 黨之意 之所當親之,非 於 正 是 及 徧 **%**偏之道 以 以 人,其 此 互 曰 皆 足 人 及之義 説 周 訓 0 之謂 而言 又 相 私 以 以 情 氏 所謂 耳 非 周 舊 於親 則 發 推 周 也。 子 也。 敷? 説 也 委 也 明 周 爲 又 疎 則 之 其 曲 然如《易 以 周 也。 程 非 周 遠 今謂 周 非 周 則 以 以 忠 子之意 忠 矣。 有 諸 近 旋 若 不 字 也。 也 爲 成 信 信 小人則 比 昵 家 賢 君 小 就 古 則 則 比之私 爲 人愚, 若 得 》所 比 子 義 范 X 非 亦 無彼 矣。 失, 周 則 處 謝 人之 有 於善 之 於 氏 若 謂 以 不 所 之 龃 亦 周 不 所 奉 卅 夕 此 奈 無 張

於人,周之道也。楊氏之説得之矣。

之見。 於理, 遠 文。 於理 者 思 切 范 盡 即之安。 矣。 也。 訓謝 夫罔殆之義 而 罔者,其 謝 或 不 有所考,又以爲無進故 正謂 楊、 而卒 而卒於罔 又繫以 問問 范 殆者,其 以 相 此固 思 不 氏 類。 尹 於 知 學、思、 則語 可 图 爲 心 、殆也。 氏言之詳矣。 有 無 不 兼 之得 知及之,亦似 也 昏昧,雖安於所安,而 若吕 也。 心 所 得 夫内外始終而 兩進者,賢於温 多不 危 未及 罔、 昏以 不安之説, 迫 危以事言,不安者,不安 氏 考之《精義》,則程子、 瑩,而 了, 正 雖 殆之辨 以 耳。 心言, 图 得 以 少過 爲 其 其 其 殆,於文義 但 其 如 無得 言 所 章末 不 引六言六 程 惑 既 故 彼彼 網之 而後 得, 子 E 禽 日 知 者 以 騰 亦 其 贅 昏 新 無 而 無 殆 之説 有 所 足 自 乎 而 亦 無 且 無 網 蔽 得 以 取 以 闕 不 爲 得 ? 危 口

> 有 彼其親見先覺 而 字之失,遂疑 無實,殆爲 坐,如釋子禪觀之爲 所 之,使之罔 冗,其間不能無失云。 謂 如 不 此者 思者 悟聖人所謂學 不 可 非 馬 學 足以 不 以 而 得 非 戒哉 思 無 涉事 爲 夫 聞 所 與 己之事 耳。 覺耳。 後 義 思者,初 而 理 學之所 周 以 不 之 氏 思思 罔爲不能 ·安,亦皆生於思 所 至游 意 不在 在 不 有遺物之蔽 雖 氏之説 聞 E 於是也 爲 兀 而 而 己 然 差 差 失 則 而 癖

者,蓋 之言 之亦不詳矣。 孔 曰 攻爲 爲 誰 非 其不同 正矣。 或問 氏 孟之意 攻擊之攻,而其 不可 姑 攻乎異端之説。 曉。 以 奈 自張 楊、 與其平日之言行 當 何? 然謂 時 子、吕、謝、 墨 所謂 論 所以爲説者 日 孔 之, 子不 異端 張 如墨氏之無父, 、楊、周 曰 子之言 闢 . 固 ,有大不 程 亦 未有 氏 子 若 不同 皆誤 以 則 范 見其 相 有 其 也 尹 似 是 則

矣。 涯之辨 以 言 云也 觀 徒 經 此 子 好 悖 矣,然亦 天 言以 闢 衰 哉 之所 辨爲 而 孟 反 德 則 之,正 判 之門 下、慮後世 謝 異 子 此 潔 者 端 正之, 固 然 所 氏 屑 孟 禮 强 蓋 非 身亂 其 牆 其 以 子之疵 以 意 之 爲其不識 固 則 所 IF. 也 所 夫子 哉 答 訓 乖 能 不 彼 道 則 以 倫 謂 公都 弱 於 不不 必 異 自 蓋 以 亦 之戒,又已深闢 姑 爲 固 苦 事 辨 反 端 何 不務 若吕 善 則 存 不 如 E 吾之門 子 理 然 以 ,然熟視異端之害 意 彼世 經 闢 而 如 深 是之淺 好辨之問 益 祛習俗之蔽 反經 氏 從 無害 固 異 亦 水火之相勝,彼 闢 以 之所以 我 一俗之毀譽,又豈 端 有 所 之矣 牆 甚 而 者,吾 當 不 則 且 矣。 而 則 徒 可 務 於 近 之矣 9 陷 與 爲説 亦 者, 不 夫吾 若 之 楊 異 也 恐聖人之 而 於彼之邪 而 辨 端 則 氏 張 角 不 反 者 者 之所 之於 子 可 不 謂 可 盛 其 則 若 之 而 待 其 之 見 以 熟 則 善 不 無 君 以 無

云

也

爲 耳 者 者 新 行 無 其所 實矣 衛 者 乎 爲 則 説 智 矣, 之, 其 去 此 ,豈其猶有 ? 耳 又并與子夏、 亦 似 聲,恐 所 事。 知 其 或問 若 然 此 楊 不 曰 亦 而 以爲 無事 之謂 善善 尤 不知其失聖人之本意以 氏 既 知 以 次 + 又引禹之行水爲言 非本文之意。 其 亦 則 歸 識 知 之意,初 七章之説。 不 哉 惡 未安。 取 於 傳 范 斯 爲 知 惡 乎老、佛之言, 孟子之言而 智。 受 IE 寫 者,求之子 楊氏 不以 之之説 而 之誤 周 不 從 且. 然 氏 近之。 相 我 日 曰 : 耶 無 所 毫 其 似 矣, 必 , 亦 大 謂 髪之 失其 日 也 抑 程子、 路平日之言, 得 由 充 但范 則 能 則 故 正 亦若 其 失 其 私 当。 又 充 謝 讀 至 欲 類 誠 是 氏 尹 於 此 曲 何 旧 而 是 氏 是知之 范 者 氏 非 之説 所 是數 闢 蜀 非 此 吾 首 之言 其 之 謝 之 之 又 謂 耶 説 周 以 説 氏 1 之 知 直 心 间 與 知 似 强 以 Z

推本所 里,尚 訓 猶 聞 戾 無 信 不 多 聞 子之所以告子張者,其 能 何 一,則孤 見者, 也 日 見 闕 闕 已安,而 也 而 謹 而 則 ? 疑 或 使以 尤悔、 何 從,有始 其 日 聖人之於言行之際,其重之如 積之多 問 僅 冒 禄之可干哉 陋 曰 : 所 餘 足以 是 之積 卑淺 無 昧 以 然則 則 子張學干禄,而夫子告之如 焉,則其反身亦切矣。而 求 人之處己 事 庶 苟 爲言與 多聞 一無以 禄 寡 有 有卒又如此,學者 是果 於謹, H. 幾 耶 尤 0 矣。 不能 ? ? 悔 見 何 無 參驗 行 接 意亦 則言行之間 而 而 顧 所 以 免,是將 之資 誠反是 日 物 擇之審 於其 E 得 依 而 可 據 禄 莫大於言行 程子言之詳矣。 知所疑殆,知而 蓋未 也。 知矣。 餘 耶 而 而觀之,則夫 無 遂以 ,擇之審 流 然積 亦 敢 以 於 聖人之 聖 可 然自寡 物我 以 行 繆妄。 此 之不 爲已 人教 以 爲 乎 前 此 州 交 盡 而 絶 而

固 蓋 明者 既如 哉? 爲 其 士 取 意 蓋先王之世,教 免急於彼 正 人才之不成,風俗之不厚,蓋 不得,非所 人,而 ,則以 猶 此 能 萬世不易之良法也。 使士之不賢者 中,樂在 彼、聖人之教行於下者又 謹 出於脩身謹 ,或不足以 而反得彼之辭也,豈 嗚呼! 其言 爲君子 不考其 而 計 其 緩於此,有司之良者,每 行 中, 也 三代之時,先生之法行於上 則 亦脩 言行之素,使士之賢者 民以德行道藝而 故故 爲 ,或不免於外 直 行之意,一得其 得 有 在 日 其 人。 得 禄 其 在我者 禄 豈若後世 中 在 真教之以 然其 之 其中。 餒 道 如 而 亦 在 所 慕 不可 此 其 賓興之,故 人,則 以 已,其得 ,有司之不 如 然 專 是 中 是 相 聖人 悢 而 日 以 得矣。 求 猶 詞 其 求 無 之 在 與 本 不 越 法 禄

^{●「}冒」,正保本作「茫」。

是。 之意。 似皆 也。 皆以 説,不若程、 道 此 所 必 便 必之意,尤失聖人之 無 辨之耳。 子、張子 以 舉 得 口 不謀食者,恐於文義反類 成就,又安得不愧於古上之人,亦 而 過 闕 經 未 尹 謝 爲當然 行 不 一,行 氏 文 當 之革 疑 氏 而 藝 、范、吕、楊氏 口 例 因 楊 范氏 殆 以 才業 滿 曉 程 又 氏 而 爲謹言行者 不 張之安。 見 哉 天 謂 必 子説,大概 爲 以子張爲琴張 以脩身干禄爲 之人, 不之怪 下無怨惡 其 盡 寡 識 論 尤寡悔 日 , 尹 見 得 : 而 深 得之。 之見 周 也。 氏 諸説 禄 其 旨 氏 亦 之道 則 不 而 1、爲非 不 也。 然則人 ,尤爲自尤之尤 餘 善 於其餘二字,意 能 已,則 賢 不通,當 ,則亦考之不詳 如 但 字之説, 但 又 補 事 Ħ. 何 游 程 特言滿 程 則 良 而 氏 有 子 其 才 因 者 子 尤 於本 所引 失聖 風 斷 輕 何 之, 之解, 字之 亦 然 天下 重 重 俗 則 非 似 取 倒 人 章 謀 於 之 程 固

哉

有 所 不 盡 矣,學者詳之。

哉! 付舉 服,公室自張, 略 也,三家專 ,不若其 無甚 錯之柄 或 此言得之矣。 日: 問 異 + 胡氏 日 前 九章之説。 於 得 魯, (有言 夫 何至 義 楊氏語 子 者之 哀 必必 乞 ,使公復問 公豈 意尤 有 師 有 日 進 得 於 . 所 相 則 程 越 而 處 似。 也 孰 子 而 擅 矣。 至矣, 爲 卒 舉 然曰 日 枉 錯 以 民 之 旅 心 當 當 諸 死 既 而 權 是 説

時

大

心

哉? 問, 楊氏 則過於本文之意,而失之明矣。 類 自 以 致 IE. 亦未嘗不以正對 對,爲 八爲密。 其 或問二十章之説。 謝 亦 敬 不至若是之疎 氏敬忠二義,文意 忠 急 但范氏 以 於 率 民 民 而 以 之意 也,豈 然。 夫子 也。 曰 然夫 0 然 不 必急 爲君 但 明,似 諸 與 説 得自養之云 子 下 大夫 周 於 皆得之, 於 句 民 氏問其説 有 有 文 他 爲 而 勢 問問 政 後 不 者 然 之 心 而

敬 尹 其 夫之説 氏 善 大意 但 以 ,其亦是 亦 爲 善 使 偶中其失 但 民 語 勸 勢 於 倒 敬 者與 置,不 忠, 則 免 非 有 文 病。 意 耳。 張

告之以 爲 周 可 亦 政 爲 句 於 則 以 唯 仕 獨 未 耳。 不 氏 可 恐 ,尤失之矣。 程 有 之 嘗 推 求 善 皆 而 政 非 子 或 時 此 之 志 謂 范 、楊、 仕 以 有 爲 夫子 問二十一 天下 訓謝 也 爲政 政 私 真 有 也 而),則 有 侯氏 專 耶 政之人,范 爲 然此 尹 ,今不爲政 爲政之效 則 況定 舉 ? 是亦 非 政之本 氏之説近之。 得之。 章之説 ·孝乎而 也 我 日 意 公之初 爲 0 之爲是,是 有 聖人 謝氏 謝 政 難 但兼孝友而一 言之本意 實 而 則失之矣。 ,夫子蓋 以 ,尹 日 陽 又讀 、未嘗一 不 其言 告 : 氏 外 張子、 虎 或 引《書》之義 亦 孝乎 皆以 焉, 不 如此 用 人 未 回 耳。 欲 者 事 舉 楊、 屬 嘗 彼 爲 曰 : 言之, 了, 又 仕 將 故 張子 而 之下 不 以是 施之 清而 侯、 爲 非 聖 措 特 不

則

言歟? 之,則愾乎 天下矣。 嗚呼 此 所以 爲 聖人之

若進 焉,何 蔓衍 地之生 皆欲 爲深 夫子 氏以 此章之旨,又將并 近之,諸説皆以 同 楊 日 德 以 氏 就 乎? 中 固常言之矣,曷爲其 或問二十二章之説。 也? 之云 及 而 以 萬 車 有主爲言, 此 語 倚 物 取 且其 矣。 耳, 曰 : 贵 衡之説,亦 義,亦大 則 若 其 IE 日 有諸己者爲言 是其 是 與 其 所爲説者 大德小德 亦 其 泥 所 孟子之意 (意以 非文義。 專 謭 矣。 因 必 恃 謭 車 言 曰 : 初 舍 拘 聖 以 所 而 忠 此 而失之矣。 拘 爲説 夫言而 信 發 人 由 楊、 不 則 而 也 之言,如 者 耳 以 主 非 尹 務 者 進之屬 爲主 於 鑿焉 而 但 氏 日 亦亦 有 此 不 不 説 : 信 也 然 天 以 游 病 究 而 爲

通 或 問 君 爲臣 何 謂 綱、父爲 綱 ? 子綱 日 0 夫 按 邢 爲 疏 妻 綱 白 虎 大

得

三八

質,周 之月 首篇 者爲 也? 之説 疑 爲自 孔氏 謂 而改 故 曉 曉 也 而 0 有 之 其 孔 雖 知 也 古 爲 詳 文義 以 地 IE 何 綱 損 也 常 矣 氏 尚文也 日 朔, 矣。 ,其下有日 帝 爲 統 E 益 爲 謂 小 曰 : 皆 之 Ė 商 蓋 得 9 五. 以 所 者 謂 而 可 一皆然, 周 無窮 湯 以 之 何 常 馬 疏 以 妄改易之耳。 爲 之人統 預 以 始 謂 也。 所 ? 例考之,非 氏 何 新 紀 知」者 建子 前 改 因 文質? 謂 之説 物 民之視聽 蓋不 曰 : 所 īĒ. 爲主 日 \equiv 其不能甚異可 之月 以 類 0 朔 統 商 雖 可 子於 張 非 相 以 ? 考。 約 티 : 而 馬 而 義 爲 理 召 馬 也 曰 : 建丑 周 御 氏 是既 日 然 世 世 E 上 説 夏 禮 然以 因 夫損 也 其 下 何 故夏以建 耶 謂之天 尚 數 之月爲 之,鄭氏 王者受 智、 取 整齊 義 知。 是 以 忠 相 理求之, 益 何 夫馬 則 何 知 之變, 信 生,其 商 今是 不 人 其 晏 可 命 統 E 也 以 寅 尚 道 録 推 不 氏 不

周,而 説 禮以 不能 逐末 尚浮 得失有多少之差耳 亦莫 然卒 亦皆損 罷 臣、父子、夫婦之實,則秦不能 禍 曰 : 三代之事言之可矣,若以 不察於文義之失, 益之變,又豈 皆非 者 侯 不然也。 因 不 置 爲 忘 虚 亦 乃 漢 周 本 ,捐棄禮法 然,雖昏狂 不 有 守 損 欲因 遺 亦 之禮 能 而 餘 益 其 不 廢 變 至於 補 其 有 所 能 德 然 其 秦 而 不足,其 大 禮 常 有 任 則 所因 滅 損 斯 然跡 以 而 乖 ,故其議 而 刑 而 益之矣,漢繼秦 夫子之言, 先王之法, ,然則夫子之言 也 損 甚異 亂之極,不 可 一之大體 ,漢之苛 車 其 (勢有 益之者。 預 以 子秦 繼周 所 日。 知 損 論之際,不 由 者 不得 益 世 解 也 夫子之言 者言之, 始 耶 爲 能 其 漢懲 有 然其 言 與 推 而 出 不 以 亦 至於 而 民休 此 之 不然者 亡 驗 源 甚 自 反 此 則 所 萬 於 雖 秦之 因 則 知 異 乎 夫 謂 旧 可 息 秦 其 祖 其 損 秦 平 君 其 謂

失

也

周

氏

自

朝

夕

惟

義

之知

以

下,

亦

不

免

有

謂

見義

不爲,故餒

而

無

勇

則

語倒

而意亦支。

楊氏

其所論鬼神之意,則學者所宜深考也。

説

得之矣。

謝

亦

以

相因爲言,且失之過,而

何

如

? 或

티 :

此非

相因之文。范、吕、周氏之

問:

見義不爲,或以承上文而言之,

爲商 者矣。 豈 能易其大體。 行已成之間 周雖不期於因商, 甚異也。 氏 之明且 何 之不驗乎? 能甚異於周哉! 也 而獨得之,則理之所在, ,周以是 ? 決也。 三綱五常,天下之達道,夏以是而爲夏,商以 前此楊氏略有此 曰 : ,或少損以裁其過, 一而爲 前乎夏者,故不能甚異於夏,則後乎周者, 何晏誤之也。 周。 而必至於因 日 吴氏曰: 雖千萬世 0 商雖 然則 不期 凡稱可知者,若曰其大略不能 ,其不能外乎此者,必矣。 商。 諸家之説 ,或少益以救其不及,而皆 意,而其説 於因夏,而必至於因夏; 世異 亦有不可得而 然至於胡 事殊,不過就 皆 不若 不 氏、 出 其 是 此 誤 E 不 亦 而

一三九

以問

論語或問卷三

凡二十六章

八

佾第三

佾者 人紀 治之甚嚴,其法備於《春秋》,所以 是之迫哉? 曰:或以忍爲容忍之忍,聖人辭 求之,舞位 聖人量同 或問: 也。」若以 何如? 天地,以 必 八佾,舊説 方,豈 曰:未必 曰 此 説通之,則 是不可 恕待 其 佾 有謂上下通以 然也 口 人,惟於亂 少 考矣。 而 亦 人多如 無 然 氣,豈其若 可 胡 然以 扶大倫 臣 疑 八人 賊 氏 此 者, 子則 理 哉 日 爲 意 立 但 ? 似未安耳

恐本

意未

必然耳。

曰:

孰

不

可忍」,吕説

如

何?

日

聖人方欲極言其僭叛不臣之心

廟 有 不 之實者; 人所傷,不在於禮樂,語勢激切 以爲成王賜魯以王禮, 不應反却 知禮 而設也,恐其説亦不得通矣。 考,然以 或問二章之説。 」之云,文義 又以 而 魯之郊祀觀之,則 譏其僭諸 兩章爲 亦 院之小 有不仁不智之異 티 : 有 惟 不 得 此 同 以 無異説 者 罪 初 祀周 ?,有過 矣。 也 不爲周 謝氏 ,但范 公者,未 是 平 以 與 公之 則 爲 事 孰 聖 氏 亦 理

之意 爲言, 程、張之意,不知其何以通之,至以 亦 干犯,人必知之,故 至,然禮樂制數,則有 意,然恐不 ,以爲不仁之人,僭亂悖逆之心,無 或問三章之説。 則其所以語仁者又太淺矣。 若程子之安也 日 日 定而 其如 : 程 禮 不可易者, 子 樂 至矣。 何耳 范 愛人 吕 氏 氏 自 0 所 張 雜 少 以 子 愛 用 此 不

禮 仁 主 次 備 謂 皆 者 一於仁 必 何 禮 以 祖 之實 所 於是,非仁者不能 輕 ,亦足 何 程 能 而 爲 重之不倫 説 也 舉 主 此 以敦樂」者,反若緩 뻬 者, 於禮樂,則 而 游 未 險 氏 見 也 怪 耶 周 極 不仁者之所以 ? 矣 氏 徒 尤 語 見禮樂之盛 至其 而 爲 亦 其 詳 倒 所 而 所 置 盡 謂 不 謂 不能 ·切之辭 亦 楊氏 顛 謝 非 與 沛 足 氏 於 不 不 造 以 所

性 但 但 痛 功 但 夫 謝 之本 所 之 張 不 미 理 氏情性之説爲未當。 子易字之説恐 或 亦非 發明於奢易二字尤多,但 問 以 耳 則 事 相 四章 失 出於情耶 若 之耳 則 也 如 之説 不 其 若 而 未 説 0 可 謝 ? 謝 安。 日 乎 之爲 則 周、 0 但得情之正 是 禮之恭敬 程 范 得, 尹 性 周 子、 氏 氏 善 與 一遂以 引 而 張 皆 情 謝 謝 據 子 惡 祖 氏 ,喪之哀 而 儉 訓 氏 至 程 略 合乎 釋之 朝 戚 而 矣, 同 説 爲 祥 判

> 意 遂 取之間,而 亦簡 程 暮 而 爲 子 歌 補 而 本 則 之云 便。 其 有以 也。 未 可見矣。 但考之夫子之所 備 默識 儉戚 亦 其告林放,豈 最 有 夫本之所 爲 所 爲差愈耳 未 楊 有 盡 氏 功 耳 讀 直 0 在 以 欲 論 似 者 尹 彻 儉戚 其 未 以 歟 則 氏 嘗直 因 其 則 四 爲本 吾 者 説 約 去 以 均 而 取 者 取 在 參 程 之 去 似 之 説

瑩 耳 似 蓋 己。 首 吕 少 亦 也 爲 異 不同 希 然自有 或 植 問 前 矣。 遺 五章之説。 於文義 腹、 聖人 然臣 中 或 朝 之不 豊 以 委 有 以 來,其 文裘,蓋 不 是 可 曰 通 爲 無 . 者 能 口 出 君 此 如 常 猶 蓋 於 義 是 哉 特 明 人之不可 而 時 白 其 不亂者 之不 辭 周 旧 氏 范 得 説 無

是之巧 謝 氏 祭 或 曲 則 問 受福 六 而 章 出出 之云, 之説 深 也 恐 楊 日 夫子 氏 0 諸 所 當 説 謂 時 大 小 之意 貞吉者 概 多 ,未若 同 惟

尤 始 幾 亦 是 誤 有 未 是 有 冉求爲宰,自哀 楊 事 此 意 故 氏 又謂 夫子 張 敬 昭公失此 欲 夫 其 公時 以 救 爲當 之,以 也 卒 冉 至 有 爲 敗亡 之兆 爲宰 其 ·之時 其 説 説

子 似 射 則 謂 爲 也 言之,而 口 以 宜 其 説 爲 非 乎 争 有 亦 下文曷爲 無 離 射 F 有 君子者言之,則 未 或 巾 揖 則 問 堂 下 去 而 争 通 既 讓 必 飲 射 而 不 者。 七章之説 張 以 不察乎 而 而 争 之文,則 位 飲 子 升 君 揖 以 而 不遂以 如 則合乎《大射》之説 則又未考乎其争也 子 遜 程子 飲 爲 衆 之 不争者,近之。 之, 圃 禮 亦 人 禮 又遠 失諸 日 飲」之説 未考乎 無 則 之 周 爲 0 讓 又不考乎 情 二、尹 於 言 此 IE 下 文義 耶 章 鵠 謝 皆 既 之文,是 ? 諸 程 反 氏 以 下 矣。 説 然直 求 ∇ 射 下 矣。 子 君 惟 而復升之 各 以 以 諸 楊 爲 而 子 若 殊 巾 之 身 射 謂 本 然謂 氏 下 復 然 飲 説 者 然 君 有 無 以 升 而

説 争 聖人之意矣。 張 己 據 始 却 射 既 氏之言以 降 人 亦 氏 氏 而 矣。 之儀, 皆 辨之矣。 升射 争 失之也。 以 子 旬 也 也 無 左 勝者 至 君子 爲 以 以 絶 手 言之中 則 其 爲 爲 謝 至 及堦 袒 於 耦 右 言 謂 奈何? 爲 不 其 既 周 決 進 射 「其争也 加 日: 争 自 證 君 争 不 氏 ,勝者先升堂少右 遂 弛 宜 若范氏 子其争乎者 也 也 則 足於辭 則 從 弓 然 而 F 執 皆 揖 又 乃 争 又 於其 則 禮 而 티 : 張 欲 君 而 陷 以 所 非 子 請 弓 之説 記 中 後 子, 是 之所 於 以 謙 上 君 飲 而 不 **>** 鵠 升 巧 鄭 爲 争 孫 子 其 於 遂 以 勝 堂 亦 君 則 譎 爲 文勢牽 程 説 注 勝 恭 謂 取 以 者 射 子、 之 其 之 君 之誤,張 者 子 射 敬 不 非 執 勝 襲 讀 子 之 首 私 退 之 楊 文意。 畢 則 驸 也 勝者進 强 有 所 尾 讓 脱 Ż 至 而 而 亦 文義 不 周 争 不 揖 争 決 無 揖 大 ႕[然 安。 失 老 謝 尹 ∇ 所 與 而 則 如 而

中 此 F 面 有争, 者 其 則 坐, 興 説 何 注 揖 取 疏 愈 也? 先 而 豐 舊説 不 其争 上之 降。 明 耳 曰 : 而 也亦不 觶 其 諸家失之,是以 興, 是其所謂君子者,亦 雍 티 : 容 7 失其 謙 此 飲 遜 其 爲 卒 乃 猶 君子之道 觶 如 回 徒 是 君 坐 爲 是 子 奠 紛 Ħ 而 於 則 矣。 紛 有 時 豐 雖

子之心

三云爾

者耳。 句,不 其 不 此 删 之篇 曰 先 句, 可 而 後之序 去之也 知 ,或以云「素以 或問 應此 何 而 其 今此 哉 并及 以 爲 章 子夏所引之詩, 素 何 句之義,夫子方有取 則 他 獨 且《碩 喻 詩 章例 多 得 禮 矣 之。 删 者 爲 人》之詩 句 損 詩者,去其不合於義 ,失之遠矣,程子 日 絢兮」一 然其 而 ___ : 句 見 諸 蓋 以以 删 日 家 兀 句云者 質待禮 之説 衛風 章 又 取 焉, <u>'</u>, 而 不 齊 而 如 應 章 也 碩 素 始 因 皆 夫子 何 反 待 删 見 理 IF. ? 蓋 七

> 之意 之譬。 明 尹 畫 子 説 以 飾 有其容,内有其 夫子所言之意也 氏 以二素字字同用異, 心 而 且白之受采,見於禮 近之, 9 以 本 因之,蓋亦誤矣。 耳 飾 必 者 然恐其亦若楊、 夫子之意 。,但謂 爲 一,不 耳。 意 爲有德 四異説 謝 若范 然其 但 氏 起予之説 既 謂 而 以强通之耶 以 有 所以 子 文之以婦容,亦皆非 謝、 爲 則 質, 倩 夏之言, ,然則皆有 有 以 爲説 盼之質, 楊 周之説 素 而以素爲德之譬 ,程子、 書 張 而 爲 説 然後 最 義 子之説 必 之 ? 亦 不 有是質 爲 為明 足 以 尹 而 有過 范氏 所 有 相 協 以 氏 又 倩 害 迁 未安者。 子 於 證 有 加 高 語 盼 以 亦 夏 滯 文 易 感 之弊。 然 是。 之容 爲 簡 以 倩 無 難 也 發我 後 粉 絢 盼 而 爲 能 此 通 黛 詩 爲 意 爲 舍 惟 發 可 又 理。 周 夫 謝 未 加 周 容 外 此 明

或問九章之説。曰:程子以徵爲成,蓋

四

歟? 釋獻 氏之説 子豈 夫子 獨 蓋 從 庸 亦 從 吾能言之,則 似 》固 本 周 不 非 并 爲 之,意其 數者 是。 以 字之義 敢 遂 此 也 註 中 今不能 日 但 大 舍 文 哉 作 而 庸》 出 其 獻 今 禮 周 設 代 後 亦 抵 非 意 而 皆爲 使二 用 不言 而 樂 禮 之 知 蓋 若 則 觀 支 但 於 吕 言 之,吾從周」。 禮 焉 而 離 能 於 E 以 制 氏 指 也。 爾, 集 擅 代之後足證夫子之言 無 則 伯 無 就 言 獻 聖賢立言之本 度 則 賢 姑存 註 用二 人 聖人 其 以 文 得 豈以二 通 范氏 其 人者,恐 》之云 而 證 制作之意 爲 之多 爲 説 代之制 舊 不 作 成吾言 之實迹 憲 專以 中 説 可 爲 矣, 代 也 平 推 蓋 行 焉 亦未安。 之 之, 以 無 自 然後 乎? 其 但 可 而 云 意 無 然審 人爲 有 夫子 其 必 也 或 E 爾 古 證 德 有 以 有 則 亦 巾 且《 則 從 言 無 重 H. 張 所 法 吾 口 自 而 往 有 周 位 中 夫 謂 非 子 考 度 後 則 往 楊 以 謂 能 可

> 樂 爲 樂,今以此 乎 無 疑 ? 其 所 正 書而不 當 説之或然 而 曰 《雅》《頌 耳 胡 章之指觀之, 果成也。 日 氏 0 也 》各得 有 孔 言 子 所言之禮,今有 其 至 於 先 所 則三代之禮 然亦 樂則 儒 言 與 孔 無 詩 子 全 相 嘗 孔 存 書 定 子 者 欲 禮 幾 故

芬芳 祖 也 祖 諸 循 禮 秋 遠 合祭於太 之 ? 纂 儒 引《曾子 配 家 不 之説; 所自 例》者 之,但 或問: 而 敢 以 티 : 條 褻 爲 暢 廟 出 西襄 也 先 問》、《 詳 : 設 禘則直祭其 先儒 也 秬 儒 矣。 而 而 兩 此 爲 下 以 不 位 禘 春 티 : 説 酒 及 其 及 褅 禮 秋 而 最 毁 祖 爲 煮鬱 日 之説 孔 修學》以 不 爲 鬱 之 廟 合 子 祖 及 得 鬯者 所 未 祭 多矣。 不欲觀 金 之 群 之, 毁 於 自 明袷之爲 香 所 廟 廟 出 太 草 自 何 而 之 獨 也。 之主 廟 其 出 之意 主 和 巾 取 之 具 Ŀ 惟 爲 趙 而 於《 極 袷 氏 以 其 其 捎 曰 其 尊 其 如 則 何 伯

之後 不足 之意,其亦必不然矣。 其得失於此可見矣。 不 有 氏 以 灌之時,已不足觀,不必言既 逆祀 通 以見觀鬯設主之孰先孰後,●亦恐其説之 ,則禘祭本不合群廟之主 冒 ,薦獻 觀,不必更言而往 也 乎失禮之中又失禮焉之説 如 爲言 何 謝 禮 ? 尹 ·; 則 節,又皆無實 日 從僭禮説 又異乎僭 0 程子 如楊 矣。 以僭禮言之當矣,然 范、 氏則方灌之時,已 禮之説 之繁文也 如吕 ,必如舊説,則未 灌 周 ,則是自其 氏 而 從逆祀 則是既 往 然 也 」。 又 聖人 如 説 灌 未 趙

法,此 得其仁孝誠敬之心,程 得 子、吕氏之專 嘗言之,其義 其 或問 皆其 偏,蓋 十一章之説。 説之善者也。 雖廣 吕氏得其 也。 ,而於此章之旨 程子又有逆祀之説 報 子 日 然游氏又兼郊 得 本追遠之意 : 諸 其不王不 説 皆 ,則不若程 善 然 游 ·禘之 社 而 禘 氏 各

> 其專 之言 以 氏 遠之意,則與《 親,故其 庸》之廣耳。 亦失所引記文之本意也。 IE 服」者,其失益遠矣。 掌云者,又何 答問之本意。 曰「知鬼神之情狀,則能 正 事天,社 又以爲其義有至蹟 言之,而 楊 也 [,與此 以逆祀爲説 氏 所引祭通之説 謝氏專以交神明之道言之,似 義 誠 所 不同 僭 有 以 然《中庸》實 以 禮之意 蓋或人之問,未應及 中庸》之意,亦未始不 事 廣 見其爲交神明之道哉? ,故覺此章義狹,而不若《 而各有所 於此章者。 地 禘 尤 游氏所譏禮大義衆者 者, 游 備 所以 以神 兼 而 氏 當 周 則 四祀 非 則 追遠 氏以 道設教而 疑 亦或 而此 度 既 當 數數 而言, 。當所 偏 爲《 未然。 以 章發明 之謂 此,而 矣, 非 多 中 同 郊 而 天下 者 此 以 庸 也 其 追 所 中 蓋 則 楊 指 章 爲 親

❶ 「觀」,四庫本作「灌」。

者 張 天下萬事,莫不皆然,所當得爲者,天之所爲 口 禮 ,則於治天下也不難 觀 敬 惟 今附 夫 天子得用之, 將 明 于 程 此 子 ,而諸 之説 ,亦曰循其理 張 敬夫曰 侯不得 而 用 又 禮 而已矣 蓋 自 者 天理 爲 ,天所 之所當 也。 秩 義 也。 知 然 亦 禘之 此 也 有 説

之意。 曉 耳 子至矣。 ·, 非 疑 或 有誤 專 問 彼 以 但 十二章之説 所 先 脱 范 謂 其 祖 氏 其 爲 八引伯高 有神 鬼 言 者 也 非 之事 通 其 曰: 謝 鬼之説 謂 氏 諸説 則 己之 章首二 甚 皆 則 所 善 得 旬 失 祀 彼 不 而 者 章 程 可

臣者 也。 竈 祭之尊 其 而 非 不可 周 未及考於奥、 已者,亦非 或 ",户 問 氏 是,其釋夫子之答辭 因 十三章之説 電 曉 其 、貴臣之説 其 爲祭之小,而以夫子特爲 是。 日 竈 之禮 吕氏之説,得之爲 我 寧 誤 曰 媚 0 矣。 謝 於 程 則 氏於 奥 子 諸 范 以 直 家 人 氏 奥 求 無 所 以 多 喻 奥 不 福 所 不 及 媚 惜 媚 爲 貴 於

> 也。 存,一 不若胡 君 媚 天 皆先 理誤矣。 於人欲之私矣,豈聖人之所爲哉? 惜 文。 乃 注 也 無不在,在 日 奥爲 ? 盡 設 云 哉 者 斯言即禱 有不直 然則 禮 設 爾 蓋 饌 曰 : 亦 氏、 者,天理 順 迎 席 也 唐 人則 非 子 理 尸 又以天爲理之所自 於 初 ^ 則 張氏之爲 祠 月令》夏三月,其祀 之所 凡祭 奥 於 人心之昭 爲獲罪於天矣。 而 猶 楊 而 奥。 論之, 之公也 有 復 氏 而 五 論 陷 設主 直 其 ,而所以 祀 祀 昭 而 得 於范氏之失矣。 書 以 者是 户 孔 竈 也。 媚 奠 之禮 而 疏 答其意者 夫欲求媚 也。 竈 有媚之之心, 俎 胡氏 竈 今亡 以 爲 於 張敬 出 爲 逆 門、 其 日 竈 何 逸禮 之 理 ,是不直之甚 夫 語 所祭之處 亦無不 天即 所 行 而 也 曰 則 亦 以 聖 中 據 鄭 理 是 未 中 胸 也 爲 則 人 霤 氏 盡 亦 而 中 之 流 言 事 以 也 順 之 可 所 理

或問十四章之説。曰:諸説惟尹氏得

際,已 從 統 郁 是 而 又 氏 爲 顔 周 有 非 不 承 郁 以 以 淵 周 無 作焉 之歎 也 有 得其位 先王,蓋未 爲從 聖 者 禮 范 ,郁郁乎文哉之語,又將 以 見於書傳 所 人 推 大 氏 加 繆 亦亦 其監於二代之意 之所 之, 以 矣。 備 竊 戾 ,固當從時 後 爲 將 意其從二代之 則 時 而 謝 不 矣 有 無 固 世 措 不 氏、 取 豊 知 所 將 無 之宜 口 其 而 施 侯 有 以 獨 從 王之禮, 也。 强 所 氏 不 加 周 也。 從 當從 由 以 盡 者 爲然乎 「始者' 之 且立先代之後 禮 爲 而 從者,而 何 設 以 周 也。 非 不 所 而 使 夫 固 禮 從 ? 措 敢 周禮之盛 而虞、 子 夫 不 其 乎? 不 大抵聖 且監 能 子 亦 所 周 文, 從 夏之 得 多 不 以 氏 楊 於 位 以 則 於 則 得 告 以

此 發 意 明 意 或 問 尤 非 詳 其 五 本 章 也 之説。 吕 氏 范 周 氏 日 氏 . 以 之説 程 立 宗 子 至 廟 恐 矣, 爲 亦 教 或 尹 民 有 氏

> 惟 則 則 時 氏 待 當察於其間耳 其 訐 意。 事 孝 其 知,恐亦未安。 於當 之意 必 前 其 將 其 也 人 問 則 爲 ? 廟 不然矣。 所 如 爲 所 復 不 然亦 少賤之 時 謝 未 已 敬 問 而 티 : 本 氏之説 問 見 後 鬼 乎? 既 於 而 神 加 以 雜矣。 問 有 而 楊 時 今 未及問 耶 或人所 豈謂 又託 或 夫籩 則 當 氏 無 ? 者 則是聖人本欲以 又 0 以 行 疑 思 曰 : 於敬慎之説 可 問 侯 豆之事,特 籩 非 者 矣。 者 念 稱 以 豆之事 氏 聖 而 子 則 則 其 鄹 初 人敬 復 蓋 日 何 親 古 亦 人 不 問 0 兼 將 以 之 心 之子者觀之, 識 繼此 ,夫子真 引 慎 非 知 復 必 誠 則 其名物 以文之也 程 其 其 有 是肆 間 問 心 不 而 子、 爲始 事 位 9 焉 而 誠 復 ()所不 者 其 之 後 以 矣。 所 詆 本 吕 每 從 而 必

9 0

上「之」字,翻弘治本、正德本作「心」。

[「]引」,正德本、正保本作「用」。

事也。

若 但 其不 是。 力不 義皆 爲或主皮,或不主皮 車 有 詳也。 《儀禮》之言,射固 所遺 以 主皮者而 同 未 或 有 問 容 科之一 也 暢 飾 + 者。 ❷爲言,而 張子之説則善矣,然以爲此 六章 事,則於文未有所見。 言 一之説。 耳。 范、周 ,以其力之不同者,亦 楊 不主於 有此二類,然此 八尹 氏於 티: 氏 程子 此, 中 因之,恐 獨爲 \equiv 則 説 於 謝 得 義 專以 乃 其 氏 於文 之, 亦 非 爲 考 以

説 代以後文不足,不可以 氏 異 王之不忍於釁鍾之牛, 則 義 疾之之説 或 范氏 問 但 范氏 + 所謂 七 非 章 小體大體 省費者得之。 子貢之本意 (興斯道 之説。 ,語亦未 亦不然 曰: 之説 此 盡 耳。 或以 無 也 章之説 所 若愛羊之 當。 爲猶 謝 氏 皆 E : 齊 而 官 周 無

或問十八章之説。曰:諸説皆善,但范

子 則聖賢之分可見矣。 也,亦曰 善。 而 爲 失其旨。 而 IE 合 爲 之,然亦本 不類聖人之心耳。 氏 爲 發 由 可 聖 推 則强不弱之志。 胡氏曰: , 亦恐未然。 孟子之所以 一人爲 也。 合一 其 於理義有未合一 説 畏天命 如 非 乎? 此 程子推時 此 本 出 集註》所引檗山黄資政説 聖人事君盡禮,非自賢以駭俗,內交以媚 特以 而 意。 畏大人而已矣。 程子之意。 已,非 二者審己所 尹氏 然仰遵夫子,則作中和 謝 畏 人所 又謂 氏 天 耳。 以夫子之言,爲歎 用程子 鄙 命 以不 孟子參校彼 聞 薄 此外 以子 彼 畏 擇而從之可 魯、 説 之與 大 知夫子之故 思、 則胡 不如孔子者 衛之 而 人 孟子之言 我 加歎字,亦 而 之德, 氏 最爲 我 君 然 ,果若何 之説 師 此 則 1觀之 而 以 得 事 亦 亦

或問十九章之説。曰: 范説大概贊聖

^{● 「}未有」,翻弘治本、正德本作「有未」

[,]翻弘治本、正德本作「節」。

哉? 者所及 宴賜 之道 言之混 也 敬之説 君 有 相 , 雖 君 爲 貴治 7 爲使臣之禮 事一 臣 發 君 臣 皆然,蓋 兩 不 則 而 定公以 而 明 而 各盡其 説之中 以禮,而 耳, 既 後始 者 言之爾 仁矣,則 賤、賤事 物, 過 也。 無 矣。 然謂 不 下 道 何 以 所 待 數語 往 似 禮 吕 臣之事君,亦豈 ,若爲 而 至如 貴 語 當 其 聖 未 言之, 而非 義 氏、 至謂 (之道 亦 人 嘗以 意 他 相與 則 謝 未 尹 而 尤不 臣 則 禮之所在 善 氏 一,而 盡 氏 正 後 吕 私 而 知 也 也。 倫 各 言 然 意鑿 所 禮 無待 謝 而 謝、 夫 也 得 以 楊 知 可 楊、周 而 君 則 可 其 於禮 侯 哉 爲 忠 乎 則凡 又幾 以不 所 皆 日 今 要, 氏 ? 説 則 以 以 君 日 之説 義 侯 則 君子 忠 之 尹 使 於 誠 可 非 飲 必必 臣 氏 氏 以 使 食 衍 敬 是 也 腎 其 兼 則 甚 惻 而 而

大序》之文 或問二十 以 章 釋 之 説 此 章 Ż 日 義 程 加 子 謝 兩 楊 説 皆 周 引

説

爲

别

互

臣

則

以

説,而 序 爲言 者 吴氏因之。 亦 非 之,此言乃 説多引「發 夫淫者,樂之過 亦 與與 所 義 文 范 所 有 怛 祖 而 失其 以 説 以 可 至 鄭 也 而 害於和 (范氏 似亦未究 不 爲説者,又涉 觀 論 誠 氏 不 而 能 。今附 者 盡 言之,不 義 游 、王氏之義,則又甚矣。 歸 乎 直 爲 無 以今觀之,序乃因夫子之言以 其 氏 而贅於辭矣。 者 變風 雎 情 似 以《詩》之本文釋之之爲 失其意者,不若其第三説 既 意 也。 ",止乎 业也 其本 而 亦 于 ,似已覺 引序文,乃不用 知其 未深 而 此 失其正者也; 今謂 發, 乎 ·原者。 張 禮 何 程子 考乎《詩》之文 張 敬 然已 義 爲 日 夫淫 以 夫 然范 淫 通之也。 之三説 哀樂 謝 者爲言, 所 頗 其 色傷善者之失 氏 論 有 氏 ,情之爲 色、 傷者、哀之 程子之説 雖 性 可 吕氏 專 傷 引 情 疑者,尤 以 楊氏 尹 以 也 當 序文 也 於善 之際 序 所 氏 也 而 考 謂 和 리 ∇ 其

也 具 樂而 於 性。 不 淫 樂 而 哀 至 不不傷 於 淫 哀 發 而 不 至 瑜節 於 傷 則 則 性 情之正 流 於 情 也 而 汩 其 性

説 張 此 既 可 日 甚 蓋 之,昔嘗有 爲 晦 信 曰 則 $\stackrel{>}{\exists}$ 也 . 子、 言 隱 矣。 發之,而 乎 出 不 而 未 口 ? 미 日 辭 或 范、尹 失之矣。 社 可 曉。 畏 胡 問 0 曰 : 以 日 日 氏 不 知 0 也 相 説 日 修 以 夫子之責宰予,亦不若是之迂 蘇 使 也 胡 爲 哉 而 語 經 是 使是言果 古者 氏 民 楊 而周 氏 然 然程子 正 問 則 而 以 戰 氏遂事 以 祭地 ,若吕、謝、楊、 欲 於 公祀于 其 故此章之旨,但 固 爲 栗, 社 尹子 新 言 無 公與 於 爲 奇 嫌 出 或 則 社 張子 新邑,亦先用二牛于郊 既 則 者 於哀 祭地 於晦 〈宰我 者 有 猶 往之云,其失爲尤 力,尹子 以 據 祀 皆以 亦 之禮, 天於 矣。 公,則 矣, 謀 爲 何 侯、 社當爲 哀 當 所 誅 艴然不答, 郊 存 日 公之言 以 不 也 周 當 而 然 至矣, 桓 程 氏之 吾聞 考之 平 以 故 主, 子、 ? 而 且 公 後

> 又曰 説 昊天上帝 用 (雲門)以祀天,兩圭有邸 大牢 則以郊對社可 于 「郊所 社 以 也。 以 血 祭祭社 明 知矣。 天道 記 日 稷 社 後世既立社又立北郊 舞《咸池 所以 而 天子將 别 神 無 地 地 赏以 出 示之位 道 類 祀 地 于 周 L 而 兩 禮 帝 别無祭 , 失之矣。 圭 以 宜 有 禋 于 邸 祀 社 社 無 祀

禮 以 説 苑》有 也 爲 是 日 儉 九 公使管仲 . 與與 女, 婦 僭 也 處 則 禮以 是 人謂 或問 哉 如 謂 如諸 而 亦 塞門、反站 日 人而 ? 夫子 但 大 管仲 嫁 有 家 侯之制 日 爲 夫 名之乎 三歸之爲臺名, H \equiv 不 0 以 極 具 歸,三 築三歸之臺」, 歸 禮家 與 藏 官 臺 同 之家」,是 龜 \equiv 也。 爲 觀 ? 科 歸 之言若 歸 之侈, 僭 矣。 日 云者,一 則 並 且 ,今管氏 臧 稱 雖 若 今夫子但 其 何 加 此 臺 文仲之居蔡, 而 則 此 證 也 未 者 名, 韓 娶三 之官 亦 則 ? 也 至 皆 非 安 安 爲 於 曰: 亦 姓 不 知 以 僭 知 事 日 僭 日 其 而 口 其 不 爲 L . 也 説 失 備 舊 據 相 亦 不 攝

謂 有 淺 者 程 淺 者 以 謝 爲 之所存矣。 者 僭 不 何 之説 肾 器 見 子所謂器 其用 楊 非 敢 哉 以 禮 則 於 禮 小 議 爲 而 兼 之説 衷以 亦 驗 禮 用 前 狹而 一 者 其失 儉則 不仁矣。 在 티 : 夫量淺 也 家之説 狹之意, 初 其 夫子之言 不 不 放以 大 又方文勝 量 似矣,聞 如 當是 (中矣。 知 不 究 揚 一淺耳 則自知禮 何 者 奢 在 其 雄 ? 而 時 又 而 而 爲 此 所 而 氏 夫子 論之也 也 口 故諸説 過者之尤 可 凡 遂 之言得 其 以 日 故 用狹者 則 世, 管仲 盡 也 折 淺 不 尹 但機 與 徒知 夫子 信 夫 儉 方 謝 固 者多 氏 量淺 其 曰 之 尊 也 而 氏 其 失之矣。 失 謝 所 其 儉 之小 所 耶 管仲 本 遽 之説 遵 禮 作 氏 謂 或 本 而 者, 9 ? 爲 以 器 用 虚 有 而 人 也 不及者之 也 管 之功 爲 之。 聞 胥 以 則 凡 器 見 所 小 仲 知 失 謂 是禮 此 楊 於 量 器 爲 爲 可 日 前 禮 之 淺 氏 量 知 量 小 類 所 而 不 IE 0 者

也。 其 程子 爲 是 豚 意 大 荷 而 肩 取之可 之説 器 得 有 不 蓋 矣。 也 揜 如 王 謝 佐之才, 爲 豆 而 然謝 主, 也 者 説 可 乎 遂 則 而 楊之説 ? 是 以 則 口 范、 當 雖 爲 故 是 大 周 觀 器 歸 時 亦 此 尹 矣。 不 章 反 狐 氏 口 者 坫 裘 廢 説 如 而 以 三十 楊 輔 擇 不 之, 説 揚 害其 其 善 則 則

又過 多。 乎 子 大 蓋 ? 意 反 得之, 魯 深 楊 或問二十三 周 將 樂 矣。 氏純、繹之義 氏之説 IE 得 翕、 樂 此 其 而 純 方 所 語 蓋 章之説。 之意, 論 之之辭 皦 亦 樂 不 、釋之義 類 當其 之 亦恐 此 音 耳 物 0 節 日 未 楊 侯 則 . 皦如之説 贵 然。 氏 謝 程 尹 當 又 氏 子、 無 遽 味 謂 得 大病 之爲 及 范 其 此 語 此 氏 孔 則

據改。「三」,原作「二」,此實論第二十三章,翻弘治本不誤。

然細考之,其文義亦有未盡善者。

嘗寧居,如木鐸之徇于道路,則亦恐未安也。 木鐸」乎? 日 何患於斯文之喪乎? 文之喪,且當是時,夫子固無恙也,二三子又 劉侍讀之説,而 文之喪,子獨以 久矣,●又何至是 亦 日 或問 一何 患於喪」而 二十四章之説 然蘇氏 爲失位之喪,何也? 蘇 氏因之,得其旨矣。 以天使夫子 而 已,固 始日 抑夫子之設教門人爲 ,諸家皆以 未有以 「天將以夫子爲 東西 知其 喪爲 南 日 爲 北 蓋 此 斯 未 封 斯

者矣。 説 得之矣。 析尤有功 爲 記》有之,然程子 **戸詳備。** 也。 或問二十五章之説。 日 0 范氏 游氏之説 程 周 子 氏 、謝氏各得 蓋 釋傳 以 亦兼存之耳 盡 亦善,而於美、善二字,辨 之説 美爲 德,則其説有不 티 : 如 意 何 非 而發明之,尤 程子第二説 ? 專以 日 此 爲 樂 通

> 也? 淺深 爲何 盡 何 本矣 則 以 所 文意之曲折 其量 足觀 觀 或 티 : 臨喪 則雖欲觀之,其將何以 問 何 而觀 ,子獨以 此以其文意 足觀者 則以其哀而觀其厚薄。 卒 其大小 章 也。 · 之説 爲 雖於大義 無 ,爲禮則 推 或 所 丽 以 觀 得之 爲 其 觀之乎? 可 以 事 何 通 其 也 之 所 ,然恐其 今既 敬 得 觀 蓋 而 在 或 觀 無 彼 其 其 上 何 以 E

■「爲」,正保本作「已」,正德本作「而」

論語或問卷四

凡二十六章

生仁第四

彼耳 謝 不復指 通 之本意 程 意矣,今直 但 楊 叔子皆云 爲譬喻之言。 或問 氏 恐或 則 然程 言 止 多從孟子 又非文意 於 所 非 以擇鄉 子之意 澤,而 里仁之説,孟子 爾 如 本文之意 此, 矣。 ,吕、周、 特因上句以爲文,恐聖人 丽 胡氏 也。 言之,何 ,亦似以里爲 以文義考之, 孟子之言,姑借此 又 程 耳 尹氏 自 伯 灣引 也? 讀 爲 子、張子 者 又 以明 人之擇 ,則擇 兼 詳 説 日 之。 兩 義皆一 擇術之 及 一云者 鄭 意 以 里 胡 范 以 氏 一 明 口 氏

我之爲 矣。 舜之飯糗茹草 文之義,而 字,則亦 意,但謂不仁 氏 意氣之所爲 志者之所爲, 而 耳,豈若是險怪而不平 意,而流於老、佛之弊。 語 不 微之間,時 日 之病 未安之事,非直 存 意 里 可 胡氏 雖 焉 居 問 精 我 爲多。 也。 有 惟 於此 功 然 日 ൬ 猶 章 居仁如 體 ,若將終身。 加 矣。 未 豊 者,不能安於義理 以物爲我」,則 有未安者。 細味之,似 Ż 發 如以 爲之,其 能 不 説 而 明 里 然所謂 安仁 仁者之所 不仁 盡 約爲 安仁者也, 衣衫衣鼓琴, 似 日 性 得 哉 處 利 也」,刻 者, 其 有 事 如 其本旨者。 諸 約 未 性情一 樂 曰「不仁者,不 又 約 爲 説 及哉 擇而處仁。 也 能 楊 人甚矣。 而徒 若固 、樂之説 皆 未必 能 爲 意厲 敦仁者, 氏於長、久一 而 不相管攝 善 無 情 有之, 固 出 累 ,利仁者 行 然 若 其 而 於 聖人之 胡 濫 於 此 氏 所 則 通 亦 乃 所 其 則 安仁 此 티: 知 之 性 也 時 下 有 利 守 謝 細 口

明。 利 爲 氏 所 吕 謂 淺 至 則 意 子,齊之晏平仲 者之久處 中 所謂 矣。 以 氏 者 矣 亦 得之,而 氏之説 有諸己 ·庸》達 八其旨 者也 安仁 所 ,但若欲爲而 疎 而畏天、 仁、行仁、生 而 若徒爲 謂 矣。 自 亦 ,其語 得者 一者,亦 向 而體之者,恐未足以明安仁之意。 則善矣,然初 德 長 所謂 何足以得爲仁之利哉? 語 安仁、 ,此利仁者之久處約 慕 處 生知、學 多繁 亦然。 名而 樂 勉强者 表記》三仁之序考之可見矣。 利仁,則文義 泰者 未 也 知、學 爲之之類,看 利仁之説 複。 親 已,則是豈其 原 亦 切 惟 知 憲 ,亦未及乎利仁也 以 不見利字之意,而 周 環 尹 云 知 堵 其 氏 者 其 者 氏 長處樂也。 程子 閔 事 他 其 爲尤密矣。 皆 語 損 智自 一説 如 圃 利 汶 不能 真 尤 言 上 ,發明 知仁 仁 雖 不 非 樂 私 |者則 侯氏 魯之季 范 約 類 有 之云, 天、 之爲 所 氏 亦 與 而 以 畏 太 大 皆 周 發 於 所 切 驕 文

耳。 仁者 矣。 中 中 中,體用備矣。 謂 處 是心 處 惡之,則又出於天賦 人之心者,過矣。 好者相亂 是之人,仁者 見於《書》者,與 至正 無私 哉 説,今之説 至 而 而反 公者心之平也 ? E 或 游氏之説則善矣,但以 後得 而 問 云者 之地 心, 楊 不 無之哉? 爲 爲 亦其立言之疎也。 氏 而 章 ,則是仁者之心,初 者 又 所 自 會物於一 事 無 Ż 范氏 物侵 疑 私 自 好 上文克知三有 無 説 是非之心,人皆有之, 也 爲一 物 耳。 已失之,然不過 之秉 而 敬 動耳 正 我之間 亦曰 曰 己者,僧肇之言也 處, 可乎 脩 者 然 : 贵 彝 口 可 理 程 必 無 ? 仁者爲 之 願 願之云 子 可 而 私 以 日 謝氏 之云 得 之言 宅心者,宜 也 不可易者 不中正,而 且宅心之云 此 而 宅 也 一,若有 當 此 心納 宅心 本無 曰 若 理 亦 約 心 有 言之 焉 而 與 於 於 好 於 曰 意 一,夫 如 爲 彼 惡 所 盡 好 居 可

偏 也。 矣 説 詳 況 不 加 此 乎 物 差, 未 潤 楊 記 此 而 而 而 私 不 氏 佛 而 也 此 而 不 又 意 者 得 以 不 所以 其 足 則 心於己 人 甚 儒 之言 其 且 輕 以 不 物之 者 意 切 必仁 欲 足 與 重 而 者 而 淺 以 焉 此 ___ 數 與 尹 較 也。 者 深 有 者 與 則 氏 稱 己 之,猶未得 而 之間 此 介乎 非 非 是物 以 之,則不可 日 後 又若之何 公盡 何 謂 : 能 必必 其 我未忘, 然則 懵 如 也 中 ? 不 然 爲 能 則 不 游 又得 日 曉 而 極 無 雖 知 氏 矣。 率彼 . 可 至之論 毫 好 所 所 知 程 會 髮 惡 好 及 謂 周 哉 以合 子 之 之 氏 惡 之 智 之

矣。 則 爲 此 言 實 則 知 可 范 有意於爲 或 惟 問 以以 氏之説,太重 四章之説 一者能 爲己 去聲 能 好 讀 非但 如 人,能惡 恶 此 字 志 曰 : 知之 則 於仁者 則 不 程子、 可。 而 又誤 已 則仁 矣。 謂 也 謝 楊、 其 氏 人 尹 蓋 且 以 有 曷 得 上 志 志 意 章 之 平

> 美名 謂 惡 今姑 與? 惡各 然此 心 爲 之惡者,如 也 不 仁 好 無 者 得 之 恕 己之惡 是 所 可 就 無 以 人 以 當其物, 不惡者 於物之當好者 又或有説焉 平 好 日 失仁人之公道 , 悪 悪 其 補 此 . 哉? 必 文 其 可 則 而 然 何 故 也 恕 而 闕 觀 ,則惻然不 其 ? 則 而 胡 ,惡人之惡 推 耳 恶 愛之 謝 今日 則 氏 果 日 ,蓋仁固 之,則易矣。 之也 氏 胡 力 如 : 然其 理未 則 所 非 氏 排 無 此 此 必 之言 得 欣 謂 惡 其 自覺其 言 語 嘗 知仁者 公矣,而 E 然悦 不 必深 惡 然 説 意 不行 則 而 至 人之惡, 其亦 惡之。 則 於 以 是不惟先 而 然以 有 説之不 日 爲 謂 乎好 好之; 已甚 常 不 主 蓋得之矣。 未 其 於愛、故 人之情 可 惡之間 如 是 獨 恕己之 免 無 安 曉 惡 於 以 有 惡之 所 有 者 而 偏 所 好 所

^{■「}然」,正德本、正保本作「能」。

也。 此 幾矣,然與其上文不類,而亦非 心 爲仁,不 而 若日 又 將 惡己之惡,如惡人之惡,則於理 不 亦遠乎? 復以 君子之道 不然,則 待天下之人也 -經之本 意其文之或 意 爲 也 誤 以 庶

卒 耳。 所惡 於 平心以觀,程子之説 之,以文義 小 衆 富 義 理 謂 程 而 人未嘗 貴 (矣,然立位以行道,亦君子之所欲 子 固惡 或問: 君 可 得 也。 此 若二 子樂富貴 通 意 舊説之意, 富 者 異 貴 不 欲 貧 則 同。 五章諸 賤 章所謂 ,恐不若從舊之爲 富貴而 則 舊説勝 而 矣, 不 侯 而 君子所以異於人者,特以 而范 處,不幸 然 悲貧 説 何與我事者,則又失於過 惡貧賤,人之常情,君子 尹 ,於文義 以 身 如 氏 、謝、游 木 何? 賤者,則 意 獨 則 而 味 守 道 得 間 則 其 安 、楊氏皆用之, 日 否 貧 三阜 有 程子 説 也 「, 亦 賤 甚 衆 愚嘗考 則 前 若 費 深。 君 人 固 不 謝 力 子 也 不 去 之 然 非 欲 及 9 而 氏

乎? 失於 若以 者,何也? 曰: 計 過 則 所 之,則亦豈自覺其所引之誤與? 如 高 IE 謂 曰:去仁之説 得,行一不義、殺 其平日之素 富貴則不處之意,但未知其復以 者 也哉? 以 何? 固 意 「存乎不仁,則成不仁之名」者 而 得貧 無得 此, 也。 孟 ,乃吾事之當然,初豈 謝氏去仁實亡之説 有 子之意言之,則 若必合於此 所 而 若然,則又豈可謂 貧賤之道矣,設其有之,則脩 賤 曰 : 略 又 之道 行 叛於 京,奈何 於 也。 然則君 事 是亦一時 一,則 不 也 彼 ? 蓋 文而 亦 也 子而 辜 如 非 未 楊 티 : 言之, 君 亦善, 而 孔 安。 不期 然其 氏 以 有 子 得 子 去仁則 范氏 所 是爲 所 非 天下 主 引 蓋 而 後 則 但其 道 孟 以 善矣, 我 既 趙 得之,非 其曰 本 吾 非 以 去 子 非 無 之 孟 日 衛 E 之説 本 得 貧 恐 道 他 所 類 之云 君 一去其 刊 其 然所 賤 身 富 而 文之 卿 成 子 耳。 去 既 爲 得 語 貴 > 冗 口

從

形

聲

之有

影

則

反析

人與仁

不

違

之説

過

矣。

而

其

所

謂

身之所

在

斯

口

以

謂

之學者

則

尤未

當

矣。

謝

氏

非

有

意

於

贵

口

謂

口

違

非

哉

?

其

下

文以

如

是

則

有

口

離

非

道

之説

若仁

則

違

與

不

違,

在

人

而

不

審

矣。

夫道

以

人

所

共

由

而

得

名

故

子

思

離

非

道

而

生

可

違

非

仁.

之説

其

(於彼

此

之

文

義

日

程

子

至

矣。

張子

推

説

亦

善

范

氏

因

口

異

於

造

次

矣。

吕氏

之説

蓋

亦

類

此

而

其

字

義

,又加詳

焉

爾

E

諸

家之説

如

何

? 訓

0

猶

是

無

事

之時

造

次

則

異

於

閒

暇

顛

沛

則

又

進

而

加

密

何

也

日

吴氏

嘗言、

之矣

終

食

?

復

辨

也

日

子

以

爲終

食

造次、

顛

沛

言

每

集

矣。

其

他

諸

家之説

亦

不

親

切

今皆

不

能

以

下

句

繫之范説

其

名

從

之

之

則

兩

長

雜

有

不

勝

辨

者

而

又

不

足與

辨

也。

若

以

去

物

而

相

隨

者

其

亦

疎

矣。

至

謂

終

食之間

仁耳。 所 氏 瑩 異 間 也。 間 爲仁 楊 焉: 游、 然以 者之於此 説 放 日 端 之 者 雖 0 歸 何 相 飯 而 楊 若 知之非 或 亦 미 譏 食 而 流 表 卒 如 則信 皆 而 以 離 有 時 不 日 焉 歠 裹 何 無 日 祭 斥 飲 哉 0 言 者 此 爲 復 ? 學 固 乎 侯 其 而 食 之,而 意 ? 艱 病 雖 操 若 者 其 亦 則 氏 必 티 : 必 陃 經 也 存 學 但 而 官 行 其 陋 得 敬 所 祭爲言 文本 踐 仁 以 指 者 繼 之 何 其 知 其 謂 矣 則不 其實 其 履之功 之發 之 以 也 實 所 惟 病 意 不 是 然推 ? 日 艱 與 謂 不 尹 違仁 與 則 志 但 仁 爲 與 但 是 可 謝 氏 孰 日 周 也 本 此 而 心 離 本 謂 此 口 不 造 之 0 則 謂 氏 而 若 而 無 是 亦 次 可 小 吾 知 在 食 唐 而 加 言 無 爲 其 顛 之 專 恐 事 怪 不 氏 恩 又 知 異 食之 可 説 沛 其 而 其 以 知 則 矣 則 巾 語 不 惠 者 據 味 義 流 遂 焉 知 此 制 有 必 多 焉 也 之 於 有 未 無 爲 禮 於 而

等 聖人 月 也; 也; 至 爲 而 而 又其 造次 之事 焉爲學者之事 失之 純 言之,其失甚 亦 造 次 顛 者 不 則日 沛 也 已者 次 必 顛 月 於是,三月不 程 沛必 凡三等也 至焉。」蓋以 如 子 也 何 日 矣。 於是 ? : 純 爲 曰 . 亦 顏子之事 違仁之氣 純 尹氏 此 不 亦不已爲 誦 Ė, 通 程 L 天 子 , 日 之 兩 象 德

大意亦 謝 足者,皆爲勝 云耳。 意 屬之下 而説其 而 二者字,恐其 蓋 無 氏 以尚之一句未安,不若遂以真好惡者推 所 或問 日 善,但 謂 吕 文,則恐於文義 爲仁矣,與周、尹 恶 真 氏 六章之説。 不仁者 好 無以 物之事 以 本 悪 好惡 意 者 尚 其 或 之、不. 亦善 則 爲一人之事,則經文有 不然耳。 所 日: 以 氏皆自爲一 非 有 口,但 加其身、未見 克己 爲仁者,如下文所 程子至矣。 不 生 通 知之説 范氏 爲仁之意矣。 者。 句; 亦 此言之 得之, 太過 力不 張 而 子 不

則尤貿 其曰 不足者 力以下 仁 奈 以下之説 仁由己,何力不足之有? 説 加 人,用力於仁, 心,疑其指上文好惡者 不仁之説 之之爲善 首尾兩 未之見,亦 集註 何? 則 也久矣,恐不得復 無以尚之,惡不 天下歸仁者,則又失之大快矣。 》所 亦程子之意 之説 亂 未 日 而 見 則 耳 用 而 不 近 上繋於用 者 無序 程 諸説 是 知 又 吕 楊、 不 子之意, 則無力不足之患也 固 似 其説 氏 類 蓋 仁而 嘗思之矣,如范氏説,則力 也。 真 周 不 前 又 力於仁之文,疑 不 之所 有 氏 同 以 楊 謝 可 蓋 則 力 不加乎身,則 而言之, 好 此 氏之失,前 氏 有 未 得 仁 定 未見之云 不 爲説 而又有人嘗 之矣。 所 而 一之説 有 足者 也 通矣。 謂 以 以爲 也。 志 而 屈 尹 類 又曰 1,與章 其 氏之説 已辨之。 亦 特 既 難 用 然 如 所 謝 但曰 説 易之 是 用力 力 謂 好 夫 氏 以 之 於 此 Ż 子 用 而

得失如 未免其 無用 有所 遽歎. 夫力不足之人, 蓋 因 不足者 云者從范 力不足之説 能安者。 力於仁者,則且歎其未見此等之人,而 之云,與下文者不異矣。 可得,故思其 程説 前 有 力而 越 力不足之人,但我未之見,所以深言 夫未見其次之人。 與 此 戾於前後之云也。 而 (庶幾 畫 則又不免乎跨越之弊,此亦 爲 不不 吕、謝、楊説 氏 繫乎一句之前 不足之人也。 焉者有間矣。 能 前 り則同 平 可 次 用 盡 用 下 力於仁 用,必 而 程子之意,以 文二句從周氏之訓 於程子, 然程子 歎其 ,前已辨之矣。 矣。 不 此則蓋有之矣,不必 而 且其下文二句 未見耳。 然聖人方疑 夫子思其 ·得已 舊説未敢遽 是數説者,其前後 其 而以下文二 然未見之云,又 力 ,則力不 不 不絶夫進 足 此 F 而 有 未 則 者 以 足之 句 以 周 所 又 未 有 未 而 至 姑 善 指 必 爲 氏 未 止 應 用 見 於 不

> 之可好。 趨 者亦用力乎? 氏曰: 之者 存此 故又曰自勝者强,又曰克己復禮爲仁。 爲利之、惡不仁爲强之者得之矣。 則其好可移矣。 日 避者,物欲蔽塞之也。 . 謝氏之説蓋 好仁好色,舉天下之物,未有以尚之者。 ,何以言之也 意 ,甚於美色,不仁之可惡,甚於惡臭,而 而 熟考之可 曰 : 然,然亦 ? 好仁者,不 解 也。 蘇氏言之矣。 其蔽,達其塞, 日 . 未 曰 也。 子 幾 所 胡 不用 於 謂 氏 蘇氏 人終不 有以尚之。 安 力可 以 無 也 E. 爲仁 好 乎 以 乎? 知 仁 尚 仁 所

爲仁 以爲 如 引《表記 公使管叔監殷,而管叔以 説,後乎此者,又有吴氏之説 又推明之,亦盡矣。 何 也。 知禮 或問 吴説已見 ,實過也。 》以爲説者 七章之説 如范氏 《集註》。 然周公愛其兄,孔子厚其君 ,則 殷畔; 説 前乎 티 : 則 已支離 而 魯昭公實不知禮 楊 ,此者, 宜 程 氏 日 焉。 子 矣。 亦 責 至 則 因 劉侍讀 小人以恕 矣。 有劉 之, ,是乃 而 諸説 但 日 氏 尹 所以 孔 氏 所 周 子

六〇

知見 説 觀 氏 觀 爲 則 則 之失 一,而 爲 過 此 宜 而 可 而 者 推 彼 爲先,遂以 矣 以 日 亦 識 之者, 爲 之 即 不 其 尤 活 如 運 吾之仁,是 必 甚 而 謝 專 日 動 誤 氏 人 於 此 作 蓋 焉 之 觀 爲 能 所 其 耳。 説 過 之所 謂 自 説 論 矣。 觀 知 則 如 曰 爲 以 其 何 旧 0 范、 過 彼 每 然者,即 . 觀 ? 世 之知 以活 吕 有 人 則 曰 既 之 知 大 0 此 者 疎 其 謝 運 此 可 爲 説 所 所謂 以 動 氏 而 訓 之 作 最 以 謝 知

彷彿。 體 猶 子謂 故仁 不 加 勝 之 謂 攫 ,愛爲仁用」,則 不 不可 一之愛, 可 愛 其 挐 間 以 非 原 險 迭 有 寒爲 其 薄 知之覺,猶 以愛爲仁」, 過 相 之説 所 狂 者 排 水而 以 怪 焉 逐 然者 耳。 於其 而 己。 有 煩 於 水之寒,火之熱也。 夫有 觀 擾 仁 蓋 蓋 血 然其 猝 者 之意 亦 脉之所 日 是 迫 焉 不可 生於 所 性 味 應 有 謂 愈不 係,未 以 必 以 接 知 情爲 覺爲 有 者 不 仁 是 暇 焉 得 嘗 爲 性 其 愛 程 不 更

水,而 乃直 陷 於異端 謂 或問 恶言· 覺 爲仁。 誠 水之寒也 朝 以 聞 是 而 説 夕 深疾夫愛之 死 推 之, 溺於 得 ,則庶乎 無 新 説 近 奇 於 其 則 而 釋 有 是 不 氏 改 自 謂 之 矣。 知 熱 説 其 消

之之際

則

又

不

務

谏

改

其

過

而

徒欲

藉

之

以

知

之

地

是

既

失

其

所

以

求

仁之方矣。

Ħ.

其

之而

欲

知觀者之爲仁也,方寸之地

俄

乎

日

吾之所

謂

道

者

固

非

彼

之

所

謂

?

養本

原

· 何

必

欲

求

過

以

爲

觀

省之資

及

其

觀

後

知

其

果

不

然

也

蓋

方其

無

事

之時

不

務

涵

爲

新

奇

而

可

喜

吾

亦嘗聞

而

悦

之矣。

然嘗

以

之旨

「未嘗」

示以

愛爲言

至於

以

覺

訓

則

蓋

使之相

爲流

通

也

故於

有子之言

及

此

音

質之於

師

前

日

不

然,既

又驗諸

行事

之實

而

嘗明斥其

(非矣。

今宗本程氏

而

不深考

於此

程子 死得 端 而 人者爲説 此,專以爲實見 不 用 所謂清浄寂 者 之實 所謂 若彼 是以敵之耳。 然之實理,乃人 絶滅之,以求其所謂清浄寂 吕 故故 求知死,爲 ,其急於聞之者,特懼 而 前 是 之特 氏 理 道者、君臣、父子、夫婦、昆弟、 且 卒無 的開、 者 説 也。 又 祖 同,後改之説 此 其旨 之而 補 彼之所謂 八之意, 其 滅者,則 以 若 於 彼之説者,坐亡立 是以 説 死 夕 理義 小偏耳 八之所 亦 世 也。 死 亦誤 深 教 爲吾之説者,行法俟 切 重於生,與 亦 特主 之 初 以 道 日 矣。 矣。 一,則以 萬 夫死之將至, 爲 無所效於人 可 則 張 於聞 分也 何 人 以 滅者 幾 范 子 但 丽 也 無 此 於 説 前 所 道 大夫知 不 憾 爲 脱, 也 釋氏 謂 既 説 故 可 朋友 幻 疎 大 不虚 日 重 生 變見 所 程 若 以 而 爲 之云。 0 意 以 子 命 欲 之 彼 不 事 當 吾 而 妄 加 與與 生、 爲 於 謝 萬 日 之 聞 之 而 倚 當 然 非 而

> 之説 也。 亦非 意則 有以 於 者,既聞 生,明正之安於死,言有夫子 無 則 能有曾子所處之事耳。 死 論 氏 則 不 謂 所復憂。 活 又 若楊氏 焉,則 、異矣。 虚 以 有不同 者爲仁之説也。 生 不 知生 生、 聞 可 而 道 道 曉,以意 死 而 是曾子將死 而 死 若其果然 既以 者。 楊氏與程子皆引易簣之事 而 者,爲吾身血 得 遽 死者,乃道 得 遂 是之偏 聞道 正者 程子之意,蓋以道之重 無餘事 推 爲 故 ,則與釋氏之言尤 而 非以 得 之出乎生、入乎 又以 便 其 0 後始 之可 E 無 所謂 氣 而 聞道 所言之志,而 爲 餘 之爲 與 爲 得 而 不 道 此 事 聞 也 又 便爲 聞 者 條 而 有 夫 此 聞 之 可 是 所 無 得正 而 説 亦 以 然 不 死 此 謂 餘 後 於 其 能 死 而 牛 道 事 而 不

0

照應之語,故據正保本改。 前言程子「所謂不虚生、死得是者,意若小偏」,此顯 一是」,原作「正」,翻弘治本作「而」,正保本作「是」。

其所 意義 得 之言,而 爲 以 益 口 爲説 明白矣 以誠 者 周 有 氏 所得 則賢於楊氏矣。 蓋 亦 者,明夫實見實理之説 生 於 不 虚 生之云者 尹氏誦 程子 而

乎是 何? 又在 焉。 不可 焉 高 能 食菜羹,則不 求安之累者乎? 遠 有 衣且 若 所 焉 求 或 日 者猶可 則吾已 問: 謝 飽 楊 發 有以 則其志亦何足言哉 明 氏 與安者之下矣。 食 程子至矣,范、 耻惡 者 所謂 也,特以其不美於 能 辨於 周 適乎口 以 也。 出 有 氏若皆以 衣惡食者, 食前方丈,則對客 諸其 、前矣。 取 日 謝 焉 體之實也。 氏 八户者 此 則 固 然周 爲 尹因之, 别 志於 其爲未 了蓋其 然 不能 爲 也 氏 觀 道 此 曰: 所謂 忘 説 識 耐 聽 則 然求 免於 而 情 泰 趣卑凡, 諸説 范 猶 而 非 而 其 而 然, 志分 氏 不 自 以 飽 求 意 有 免 疏 恧 其 與 飽 愠 尤 又 如

> 從、誰 白 謝氏 之與比亦 也。 由 音讀之學不 也 爲 惟 或 適 問 吕 不 與謀之適。 差 同衆説,誤爲比於有義之人者 氏 十章之説 以 而 爲主 明, 其所論老、佛之失,亦最 以 然吕 謝 適 日 氏 爲 0 氏之説 以 此 子 章諸 爲 適 可 衛 不明 説 之適之故 似 多誤 吾誰 爲 而 獨 義 滴 明

惡之謂 所據 不之從 言,而上下章又且 易使之類 子小人而 亦 惡之類矣。 白爲 迁 而 或 晦 問 説, 則 爲 也,如周 而 是 不通矣。 相 取 又可 而 + 也。 況 須 舍 以 者, 以 也 見其 是四者皆爲下懷其上之事 比 章之説, 言君子小 君 ? 和同之類是也。 多義 則君民之謂 尹氏多本程説 民爲説, 亦有 티 : 利之説 所未 以 程 人而 例 子 則 安矣。 求 兩 其 也 相 則 之, 義 懷惠之云 反者 如 古 以 而 不 愛 凡言 當 相 謝 於 冒 則 人 此 爲 反 君 與 善 善 何 又 亦 爲

於土 子安其所必安,小人之所安, 務 則 恶 周 於莊 無所 若 而 加 語 惠 其 (猶管仲) 「,則 未 自 深 去之之謂 不 氏 利 云 日 ,法之可安也 而 矣。 必有 安於 善 者 蓋 生 懷居矣,而未見懷德之意 繫 君 云 終不 實 了其説 之 列則 發 爾 子賢其賢 猶 用 此 逐 善 所 明 書 恐 近聖賢 日 程 利 程子 外 耳。 謂 但 援 久於惠。 好 不 子 有 懷 畏 貪 則 彼 得 仁惡 第二説 不 以 蘇 土之小 大抵 威 得之心。 初説 而 因 氣象 而 通矣。 釋 氏説 如 前 親其親,小人樂其 同 利 不仁也。 懷德之君子 疾 此 有不安者矣。 王不忘之言而 ,然皆易懷 之耳。 也。 在耳目之前 亦 人,特欲全其 ,申公巫臣 是最 亦 佳 其爲善惡,亦各 尹 蘇氏曰: 未 氏 ,然必以 爲 楊氏 足 必 雖 得 德之可 以 而 以 爲 刑 ,不待懷 懷,安也。 当。 因 所謂 能 患 刑 爲 安 爲 發 在歲 謝 利 言 樂 所 據 安 爲 體 樂善 則 氏 害 慎 君 而 而 保, 言, 月 也 出 也。 罰 爲 有 刑 之 安 子 之 此 利 君 固

後者,小人不知也。

謝、周 貽害於彼,不勝怨也 既宜之,彼亦宜之,雖傷 耳。 楊、 變化對夫解衣推食者而言之,其可 矣。 之大,放利而 火之相 亦爲得之,但 周 或問 此 夫利 氏 氏之説 外則晁氏 反, 豈特有小大之殊哉 又并所 物之與 行爲 其 章之説。 是 謂 語多病,如《乾》之 心亦善。 自利 亦 利之小 不怨。 躬 自厚 道,但 其爲 曰 晁氏曰: 依 0 *, 其 於 而 程子 利 善惡 非 薄 比疑 而 依於義 責 本文之意 行 至 人者,失之 則 哉 若 之 利 矣。 如 專 而行,則 物 以 陰 不 利 乾 陽 倫 爲 范 於 謝 此 水 甚 氏 而 道 利 此

下句 皆不 以 能行禮,不能以禮讓 禮之繁文末節 之説 能 或問 盡 則李 善。 十三章之説。 今詳上句之説 氏 則雖禮文具在, 當當 得 世 之。 所 日 李氏日 尚 0 亦且. 此 則 章 如之何哉 時 能 范 以禮 人所易 氏 得之, 讓 諸家 然後 煮

六四

氏、周 失之,謝氏 文末 難 加 ጢ 言 氏 下 中 以 至 若不 之讀 身之禮 諸説 句 句 句 爲國 節之間 能 氏 於 文勢 至 則 以 辭 以 能 者屬之下文,雖於上句 或 不 禮 恐亦未 上句 亦多 讓 禮 以 字 Œ 通 讓 則 之 則 禮 而 爲 甚 相 爲 猶 不 心 無 亦 讓 讓 矣。 絶乃安耳。 戾, 或 免此 可 同 所 無 之 爲 則 通 而 據 以 國 説 又與 往往 禮 要之, 病 先 矣。 爲 而下 意之實 圃 也 則 民 禮 多 諸 徒 巧 此但 且其 耳 句 至 則 説 謝 相 曲 一讓 以 1 而 其 不 與 如禮 楊 當 爲 字爲 而 E 人 同 爲 至 從 支 句 爲 通 所 也。 周 於 或 事 何 三句 離 之 然 絶 憚 句 乎 説 也 矣。 讀 者 旬 爲 楊 繁 皆 施 讀 不

位 立 患 爲言,其文義則 無 或 位 失其 問問 爲 患 文 四 無 (義之所 章之説。 位 以 似 指 行 矣,而 矣。 道, 曰: 所 君子之所 謝 程子、范氏 以 氏 立 專 爲 以 以 身 才 7 皆 稱 有 乎 其 所 以

之首 知 事 矣 諸 此 是 則 不 則 知 此 太疎 所謂 也 其 云者 奈何? 章 位 也 事 , 己 乃 先 切 又 而 、略矣。 所以 耳。 所以 何 蓋 物 事 也 患 之意,正爲 至 畏 者 正以爲字爲重, 若 前 患 不 物 已辨之,今不 論 名喜名之説 固 迎矣; 爲 之有 必 預 蓋 患 日: 知者言耳。 者 當 楊氏之説 所以 以 可 爲 曰: 則 乎人之莫 以 未有位 知者 哉? 此 防 未有 過 德 此亦對待之言,欲 人不己 爲 立 擬 高 爲 勉 且 乎其位者,進 嫌 重 甚矣。 周 以 殊 貴 若有 而 己 而范、 顛倒 於其實 出 爲 則 7 氏 知 不近本文之意 先 不 知 皎 將 無 而 求 而 以 當 也 皎 且 必 重複,殊 謝 患 我貴之説 所 甚 必 7 專 之行 所謂 如 而 語 病 無 求 以 而 聖 以 於其 謝 己 然語 位 爲 有 或遺之, 立 求爲 才 人之言 人之反 氏 而 矣 一乎其 可 未 不可 可 而 道 所 必 首 知矣 知 口 有 爲 其 固 而 亦 而 謂 曉 位 名 可 亦 知 其 言 求 口 非 則 至

論者然後可,然則無乃反爲過論也耶!

爾 子 不 理之所自 加 大、内外、本末之殊,然 以 於此,蓋得之眉睫之間 然其下學之功亦至,而 物 至 言 呼 也 已矣。 所 惟 告之,若日 是 ,特未知反求其本, 處 以 ? 謂 無 事 行之際,蓋無不 ,則其積之久、行之熟,日用之間 告之,曾子無 待 君子 問問 者, 以《史記 於 來者 曾子之心 曾子之學 各 之教 問 吾之所 有 故故 貫之旨, 辨 **>** 條 考之, 有 無 而 理 ,於是豁 所 如 亦 所 詳視審 主 謂 而 而 問 夫子 不 將有以上 復 則 時 其 也 於 道 得 無 辨 容 夫子 故 疑 雨 所 誠 者, 夫衆理之所 不 有 然 不 而 化 以 而 記 身 盡 不 俟 而 所 唯 卒時 之者 雖 直 爲 而 俟其問 達矣。 矣。 曾 有 其於聖人一 稱 焉 有 應 道 力行之也 贊 以 子 ,曾子 以 精 日 者 所以 得 所 IE 之問 也 自來, 對, 唯 粗 謂 則 夫子 未 夫 而 之 衆 達 此 孟 蓋 小 呼 應 何 而

殊。 使曾 意者 繹 人 而 嘗不一; 恕 氏 發 忠恕告之, 夫 與,是以因夫子之 聞之矣,然 之,何也? 也 年 聖言 衆目之殊,則 哉 オニ 不求之空言恍惚之中 無 以 明 ,道之用也。 爲 不 此聖人之道 也 其 子 實者 十有 備 萬 而 而 曰 恕 理 非 蓋 獨曾 則 無 反 爲 曰 : 九耳, 有 盡 曾 蓋 雖 益 不 貫,更 忠 以 己 子 未 所謂 子 忠 無 其 夫子之告曾子 通 實 用 所 爲 於 出 爲 爲 嘗 其 餘 惑 也 得 忠,道 門 以 而 恕體 誦言 矣。 聞 是 無 能 藴 乎 問 同 者, 道 他 默 人 以 以 此 焉 之問 歸 説之辭 之早 而考諸 契 是 是 其 一貫之旨 今乃 理 則 之 亦 耳。 殊 其 爲 日 將 以 體 必 塗 目 不然, 言 蓋 也 而 而 安所 而 分 然彼 也 重 聖 門 已 如 分未 正欲 殊 亦 以 以 人 而 矣 致 此 推 得 忠 措 用 而 而 而 未 他 者 白 嘗 漢 ズ 其 哉 己 所 及 恕 使 直 意 心 理 人 口 慮 究 門 不 未 文 邢 以 以 畏 爲 推

六六

其 何 並 意 至 爾。 爲 也 以 然則《 有 欲 所 曾子之言忠恕 之 觀 ,楊氏 其 下 學 ? 深 指 也 以 來 者默 偏 得 之, 門人之説,謝氏、侯氏專明曾子 蓋 其 考於其 實 中 子 曰 則學者勉 致 門 則於 所 而 日 有 庸 尹 知 達 而 程子 不 以 以 人爲 (書,則· 氏 力行 掠掠 識之也。 所 此 能 默 夫子 有 티 : 獨 發明曾子之意 謂 謂 以 行 動 識 F 自聖人之 説 不可 推 違 教 有 以 之事 相 之心 而 其 中 者 道 中 通 人, 以 天 加 所 衆 而其論《中庸》之旨 庸》之言,欲學者之下 矣。 偏 降 爾, 不 勉强 庸 别 謂 曾 則 遠 廢 心而 而 乎 下 其 勉强之説 欲學 等之辨 之功 者 學者正 亦 此 學 程之意 理 故其言每 極 矣。 有 言 雖 何 ,者勉 焉 不 也。 達 精 同 也 當 爾 也 曰 : 庶 同 之義者 微 ? 則 默 而 兼 其 者 中 如 矣 程 識之 進之 分 幾 取 各 學 此 日 曰 门,以 庸 者 則 其 得 蓋 子 何 而

曰: 之分 指 也。 爲説 學 且 人 聖人 則 行者,在人則謂之忠; 盡 分之 日 티 : 子之言忠不異,而 矣 乎 謂 盡 而 氣 侯氏論之,其 此以 然則 之恕耳 耳。 之事 耶 己 之忠恕 有待乎推 以今論之,則伯子之言 者 忠 而 而 則 ? 推 恕 不 又以 天 天 若 及 語意支離 日 而 道著 地 天之 爲 性 非 均 E 忠 亦 動 日 以 彼 有 達 有 爲 及物 自 人事,取 盡 必 以 去取之意得矣。 等 以 言恕有不 涉 乎 推 若 天 天 然 己 級之可 聖 而 道 乎 程 耶 道 而 之 叔子 不及載 賢 而 由 也 人 子 ? 無 心 其 賢人之忠恕爲 恕 而 是 爲 動 外, 理之 而 之言 「舉植 言矣。 亦 同者, 若此 分 爲 而 以 又何 推 則 於《 曰 也,此 生 人 天之云者 屬 以 其 一物者, 又 則 道 章之云 精 而 然其 乎是者 及 宜 以 本 何 日 庶 不 義》之書 何 體 物 以 有 必 何 ·及動 乎 所 從 内 天 耶 動 在 己 乎 兩 耳。 以 則 程 外 則 流 以 而

之云 忠之 象 説 雖異 之,亦若 以 此 百 不 言 爲 者 加 有 而 驗之, 蓋蓋 「, 何 昭 過 屬之學者之事 言 恕 焉 接 分 然者 也、蓋、 何 此, 乎物 理 也 也 不 蓋 也 則 爲 未 伯 也? 可 未甚 不害 其 ? 違 於 但 嘗 不 也 盡 又似 子特 方 曉 闕 其 道 此 曰 : 不 類, 己 其爲 其 切於 矣。 文耶 所 不 無 曰 : 縱 行 雖 以聖人之恕,爲無待乎 遠之事, 忠 以 所 以 何 恕之所以得名,本以 , 横錯 涉乎人爲,然爲 平 文義。 同 推之, 疑 理 ? 而 日 是 耶 叔 其 也。 之本 矣。 恕 . 子則以 然 不 綜 間 其 之理 口 見 自有 而 并 也 而 日 E 日 曰 末 曉 與 其 叔 其 . 沖漠 已 體 上 爲聖人之恕 此 矣。 其 其 子 不 程 並 之於身 具 下 亦 别 本 引 以 之在 同 伯 行 及 無 而 ·之説 以 縱 章之 盡 耳。 釋曾子 子 而 言 朕 横 其推 其 心 以 己 不 推 本之 錯 解 知 則 恕 推 相 而 而 而 而 性 説 之 而 綜 與 萬 不 論 亦 是 己 悖 非 内 己

似不 恕,而 之觀 矣。 是亦 是 以 則 言者 記 言之。 外物我之間,其亦不異乎此 義 言之,則仁之成己猶忠也, 日 言。忠恕 其 者 義 乃 爲 而 是則 所以 之失 必盡聖人之藴無疑 日 所以爲 亦可者,亦 優者,夫豈然哉 知其言之是否,而 一,而繼之曰言仁義 有不 億度以言 則 必 0 忠恕之云, 貫 其 程 小 爲 也。 足信; 道 盡 誤 子之引 ,若他· 也 蓋其 而 非 ,則其言雖 此 必矣」者 以《 若曾 已 程 言 何也? 君 矣。 人言之,則 中 意若 子不敢言也。 非 庸》之文推之 子 子乃 程 唯 也。」今記 曰: 亦可? 之 **E**: 日 其 子 或 何 義之處 0 矣。 道 日 以 不 人之信,若 偶 也 其曰 然則 其 四 能 不 中 何 他 ? 張 日 口 者 言, 實 録 物 也 忠 其 子言之 而 日 信 見 猶 不 未 恕 其 程 : 不 以 則 如 而 明 而 恕 盡 此 曾 乃 侏 所 子 日 此 何 \Box 日 言 也 以 忠 疑 子 又 所 儒 乃 ? 几

遽及乎 矣。 之恕 以言 天 或 何 用 乎 者 自 下 前 異 ? 相 恕 則 忠則在己,恕 心之謂 而 乃 夫忠恕之所 聖人, 且 因 ,則固仁 加 其 非 相 則 曰 無 日 反 人也。 所 之意 并 不 爲表 此 古 其 以 謂 恕 忠 察 聖人之忠 誠,盡 不 而 不 見 所 忠者 於此 裏也。 固 欲 之施 可, 能 夫 以 今范氏 日 也。 誠 易忠以 、體用 責 以 無 則 1,亦曰 心 誠 之屬 也。 而 分 亦甚矣。 人 在 之謂忠」,則 日: 日 今吕氏 又 貫,正 者 别 曰「忠則 則固 人」,則其言皆 之分矣。 也, 誠,易恕以仁,其 然日 盡己之心 以二 於 責 或 則皆 其 然以 一誠 又以 己 以 日 忠 夫聖門之學, 者 之 間 無 之發 其 日 皆 該 事 欲 其 自 謂 日 出 不 而已矣, 恕, 爲 貫 辨 故 然 道 0 忠 於 誠 也 0 待物 諸 矣」,又 全 之 自 無 亦 程 用 則 恕 非 行 體 説 然 所 E 子 力 見 聖 亦 非 欲 未 之 之 於 當 之 人 如 體 明 回 口 所 荷

> 息、萬 嘗離 以 禮 之所自來 體,不言乾道變化 不言維天之命,則 之以捷徑之易 道,而告之以 夫子懼夫弟子之不 可 베 高 ,始於 必告以 其 躐 自 夫事 矣。 幾 下 物散 有 繁悉。 陟 也。 夫子 物之間,又安得謂 以 殊言忠恕者 遐 貫 遍 此 人也。 其論 自 圃 者 之所 觀 邇 終於 則是憂夫 盡 而 無以 盡 則 能 以 識 先 後 且 簡 心 無 乎 告夫曾子、 見夫 可 遍 博 夫 易, 知 以 此 蓋 觀 哉 以 所 Œ 性 見 推 也 流 固 其 文, ? 盡 謂 者, 途之迂遠 夫 程 而 亦 識 不可以 道 其 今謝 有其序 而 萬 子 恐 不 將 子貢者, 者 之意。 以 後 物 非 息者之爲 固 無 流 氏 約 孟 散 入道 之 以 乃 殊 而 亦 子 而 而 未 謂 以 者 不 Œ 不 示

0

應。
「以責人之心責已」,「之事」與「乃」相應,非與「爲」相張載對《中庸》「君子之道四,丘未能一焉」云云的概括張載對《中庸》「君子之道四,丘未能一焉」云云的概括「者」下,原衍「爲」字,據正德本、正保本删。 全句脱自

哉 身,而 處 所 貫之事」,亦非也。 以 又謂 之也 而 背道之謂 出 馬 遠云者,正 加 ? 於 人 不 0 足 乎 盡 未嘗不一也。 ,今未暇辨。 有 當之大也。 以 物 夫孔子之所謂 「忠恕未免乎違道」,則又未察乎違 異端之説,其擇焉 ,亦曰其所以酬酢應變者,雖千變萬化 至人無己 特學至者 萬 堂之上 矣,而 不得聞者」,亦非也。 盡 理無 哉 者名之也。 以 恕之所 不 其 一,其可 論之,則 足耳,未及乎 自是 又謂 至其 又謂 聞 今游氏以 之而 反身 爲呫 誦程伯子充擴之語 以得名者,正自其 「恕爲 而之道 貫者 「仲尼、曾子所以授受, 又謂「反 既 而 有 而 囁 不 失 天地 非 得 盡物」, 耳 誠, 也不遠 精 夫師 推 其 語 其 身而 日 以 旨矣,而 方謂 以私 亦甚 貫彼 未至者, 及 指、萬 弟子相 則 物 誠 \overline{Z} 反 矣 於一人 恕 我 爾 求 爲 而 未 其 道 哉 又皆 物 則 加 與, 雖 諸 盡 足 世 不 至

> 元無間 孟 聞 萬物」者,其爲譬亦不切矣。 恕,猶有待於勿施哉? 爲學者言之者 盡 則 則 失,大概 曰「己所不欲,勿施 中庸》所 子地 也 又 固 而若 豈 聞 息,未嘗少有偽妄雜乎其間 位不 其言 蓋以 弗 得 類 謂 聞 而 此。 孔 忠 同 而 耳。 筆 也。 其 恕, 不 之於 顔之 而 ·曉其 故門人之問 爲 則非 侯 於人」耳。 且其告子貢、仲弓 忠論之, 書 忠 氏 所謂 子 恕 又以 耶 其曰「天未嘗 ? 思之言,而 亦 者 異 若曰 爲 則 也 楊、 贵 ,則亦 孔、 以 此 可 周 何謂 説 若 顔、子 謂 氣 也 可 初 有 尹 孔子之 孔 亦 也 流 不 爲 歲誤 所未 子 氏 則 同 聞 辭 得 所 之

或問:均是人也,或爲君子而喻於義,

❶ 「馬」,原誤作「焉」,與《莊子》不合,據正保本、四庫本

變矣。 失在於 馬,其 楊、周 其用 好之而 之不 之既 君子 以一説定 或 爲 於君子小人之際, 解 氏 而 反 矣。 通達 以 爲 IE 同 事 爲 分 釋 心 小 小 不 氏),則其 之失,則 用 喻 深 郭? 人 曰: 然後從 喻字之意殊 然喻字之義 人之分,則 論其 大旨 同 也 喻 心 愈深者,亦不可 而 何 然則 而 之初者,其 喻 幾微曲 所習 也? 將 多善,然或 後 故有先喻之而好愈篤者 於 雖 而 所謂 篤 利 事 則有 所 不可易 名之,則 初亦 少。 惟 好,范氏以 티 : 折 禀之不 之中具此兩端 何 君子小人之所喻者,各 無不盡矣。 未 吕氏 高 切要之言與? 論其 也 謝氏 推 矣。 以 卑之或異 甚剖 ? 其 其 之釋得之,蓋 善 則自 (所禀則 意 若周 且 前 例 爲 判 亦 與 程 好之 拘 i待甚恕 或引其 必 周 程子、范 可 氏 子 也 前 其 以 所謂 蓋 有 而 氏 7,有先 楊 習 要知 清 後 各 IE 所 使 不 前 後 非 濁 隨 心 其 口 喻 相 喻 而 周

> 害矣。 之,則利 其 反致不奪不饜之害; 以利也、《易》所謂「利者義之和」者是也。 小人乎? 君子之所 通 於 人 之 此 孟子之告梁王, 所 爲不善,對害言之,則 而 爲, 見 日 小 也 固 人 ? 胡氏言之悉矣。 非 自義爲之,則蒙就義之利 酷 意猶 欲其 E 曉 0 是 於 也 是 不利 彼 皆 耳。 有 何 之, 利 胡 獨 然 日 非 氏 自 但 以 日 而 不善 利 對 君 喻 遠 爲 心於利之 義 義 子 利 之, 矣。 固 深 爲 則

所當矣。 之,楊氏、 或問: 周 十七 氏皆引《大學》而言 章 -諸説 如 何? 則 日 支 0 謝 離 氏 而 得 無

者,如 乃《 推之,則下文又敬 顯諫之文焉 下氣怡色、 内 或問: 何? 則》之節 諸家幾諫之説,多以爲見微 ,則爲 柔 티 : 文耳。 聲 其 以 證 不違 説 諫」者,而《 也 以 固 亦 將 彼 善 明矣。 文考之,則正 矣,然此 爲荷 曲 焉 且 禮 以 不 章 亦 從父之 以 彼 有 所 而 謂 諫 文

也? 佳。 乎? 謝 不怨者,遂略而不説,不知其意果以 令者,而 、周、尹氏他説 諸説固失之矣,其他 但 侯氏 曰:范氏他説皆善,所引曾子之言 恐其 勞 所謂 而 所以 不 不違幾諫之初心 怨, 爲説者,亦若見幾之云爾。 ,則皆失之,而楊氏於勞 亦 將 文義 無 所屬於上文矣。 亦有 者得之矣。 爲 可論 何 如 而 亦 者

其次則侯氏亦可觀也。 或問十九章之説。曰:范、謝氏得之,

篇矣。 出 范氏所謂各記 者 皆 或問二十章 放 此。 所聞者,或未必 楊氏於字之説,已 之説。 日: 然也。 胡氏 得之矣。 見於首 後有重

意,然事親者,亦不可以不知也。楊、周自爲一説亦通。謝氏則恐非聖人之本國問二十一章之説。曰:侯、尹得之。

或問二十二章之説。曰:范氏、周氏得

人之本意,然於學者,亦足以有警也。 之。諸家亦無異説,惟謝氏爲不同,恐非聖

之之説 則太支離矣。 約之約,恐聖人之意,或不 尹氏乃以爲約之以禮,則皆未安。 爲不外馳以失道; 但所謂失之者,本謂事之失 或問二十三章之説。 亦與 、謝氏 相 約,本謂斂束簡省 類 也。 止 ☐ : 范、侯皆以 而 此。 已,謝 謝 楊氏 尹 而周 氏 得之。 而 乃以 爲儉 氏 己, 失

者,固 訥 爲不直使之爲君子之所貴,而反出於其 之所貴,則其於義有所偏矣。 以爲氣質之禀,有辨有訥, 但范氏所謂人性因所有者,未知其可。 而貴之耶? 而 不欲其辨,即 或問二十四 미 賤 矣,而君子 夫子之教伯魚 章之説。 有以能 亦何 行而 而自脩者,則 必 ,稱公西赤,又曷 日 取 能言 不能言爲 0 於 此 不 而 無 能 不 異 所 能 君 欲 意豈 言 説 者 其

樂在 之域 意切 尤 爲 間 則未 取憎」者,失之尤甚。 專爲欲心之不放而爲是也。 但 而 心術之病 加 心亦可謂之不放」者,亦不免有卑言行 之意。 鄉 以 養其中,然言訥 所 疎 不 矣。 察乎 免有 謂 耶 闊 愿之爲 寡言哉 於 情 在 也。 理義 厭 此 尹 其 性 道 謝 氏 ? 者矣。❷ 離事物, 外 論 不 氏 而 所謂 之正 蓋訥言而敏行,雖足以制 則 訥言: 其説 在物」者,不可 所 外 胡 則寡過,行敏 論禮樂進反之意則善矣, 玉 君子之志 氏 敏 而 之弊,使學者以 周 則 聖人之意 帛鐘鼓之謂 之説 行者 必求道於杳冥昏 必 氏 無 將 亦 他 有 楊氏 亦 者 曉。 善 發 閹 有 則 則 ,豈爲是而 矣, 明 然媚世 所 有 補 乎? 豈 語 功,亦 此 謂 也。 然 雖 以 而 爲 惡 於外 所 默 侯 爲 而 緩 一,而 胡 心, 戒 其 貴 謂 之 然 禮 氏 非 而 氏

> 是。 緩以敏勵之,由我而已。 敏 與納 雖若出於天資,然可習 不自變其氣質 也。 ,學豈有 言 煩 以 功哉 訥 矯之,

志于 《文言》之云,則以釋爻辭大字之意,蓋言其 否? 德之盛爾。 莫不各以 立,當有朋 子、范氏 書之意皆不相 至於所謂 下 通者而從之,則 義理 文爲 或問: 日 0 亦同 類 善類 「與 而 此 類聚 聚 德 程子所謂「一 心 泛言事 其説 物同,故不 似。 應者不合、蓋 不 不 凡 來與 孤 安樂,只 類應之説 爲 前 其引《易》以説此 善者以 爲 理, 與 周 《易易 鄰 氏 孤」,則於《易》文此 凡 德立 兼 是 有 無以 不可 類 程子 而用之,前 德 德者, 應」之説 文言》之 而 孤 易矣。 考。 ,所謂 百善從之, 者」是也 書,又自 必 讀 事 是 不 意 者 故 也 物 孤 同 張 擇 德

714

是

行而

善

則

速 固

改 喻

則

應

務則 事則

給,不敏者反

日

言

而

能 能

訥 敏

畜 遷

德

則

人則 過

信 勇

謀

密

不

訥

者

反

0

其

與

鐘」, 弘治本、 正 德本作

² 或問》本亦多用 Ē 德本、正 保本作「原」,合於《論》、《孟》原文,且

欲其易知而有親者,恐亦未免乎同流合污之 子物同之説,然以《易》之本文求之,既有 不通,而其説之流,將必有不顧理之是非,唯 至於謝、楊皆 盛爲言, 而後以 以 類 孤 爲 應爲説,於文義 孤 特之孤,恐或近 亦 可 通 於 也 所 程

弊也。

耳。 所以綢繆 不 以 而 氏 交友者 應 所 求助之云者例推之,則爲患失固寵之意 謂 遽指此等輩而言也。 詳子游之言,本以警學者於幾微之際, 或問卒章之説。 「期於功之必成」者,以下文惟予 亦 固 何自 結 而 而疎哉? 不可 解, 티 : 事君者何自 且若其言 諸説皆 善。 ,則是乃 而 與 但 女 謝

一七四

論語或問卷五

凡二十七章

公冶長第五

説,則 范氏 其 子 哉 俗簡賢附勢之私 之,然有罪 不 示 爲 以 爲非 非義之説,亦得之,但 或問 爲可 苟如其 牽合甚矣。 爲 首章 義 孔子欲妻以 託 無罪 而 言 ,則過於人情,至於以 之説 己 在 則 矣。 ,豈遽及夫不 我 且夫子之於公冶 凡 而 繫 謝氏 日 女,而辨 已以 於於 . 以 程 縲 以 下, 爲設 子 爲 絒 爲 其 至 聖 亦 而 辭則誤矣。 非 矣。 桎 智帥 能 人 足 長,特取 梏 罪 非 以 以 者 張子 警 知 而 人之 子 其 世 失 免 死

> 者,不 之諾 乎 迷,而 知,人多謹於擇壻,不能慎於擇女,逮德下衰,又惟 以富貴結,或以急難合,或憑媒妁兩美之言,或因意氣 婚姻,參度彼己如是之審,所以能 論後世婚姻之失,尤爲有補。 之優劣,則賢於尹 亦足以破夫過計求全之惑也。 又失之苟且 ? 初未嘗深知二人之性 不思家之隆替自内助始也 楊 問 氏 其 不累室家之説 有 ,而不及聖人之意 罪 無罪, 氏之無所分 行也。 皆 ,可勝歎哉 Ě 保終 聖人 雖然,壻猶易見,女最 與 而無 沉别矣。 ,然施之今世, 胡氏曰: 謝 所 周氏論二子 敝 氏 取 也。 相 矣 聖 胡 反 人之於 財色是 後 而 似 世 所 可 時 或

티 : 周 事者三人,所兄事者五人,所友者十一人,皆教子賤 歲,意其進師夫子,退從諸弟子游 父宰,民不忍欺。」以年計之,孔子卒時,子賤方年二十 夫子歎之如此。 氏 《家語》云: 亦善, 或問二章之説 而 「子賤少孔子四十九歲,有才智仁愛,爲 吴氏曰 胡氏、 《説苑》云: 吴氏 티 : 亦 范 而 有 氏 子賤爲單父宰 切 磋 可 得之,謝 以 取 成 者。 其德 以以治 ,所 者, 胡 楊 里 氏

之術。 以 君 講 則 子,爲夫子之力 筵 誤 程子 矣。 開導及之,非 斯焉之訓 但 范 氏 推 有 事 經之正意也 言魯 所 理 未安,侯 古 有 當 君 出 子 此 而 氏 謝 不 然 蓋 氏 用 亦 以 用 非 魯 蓋 其

此

章之本旨也

器爲 者,正 者,不 未 器 不言 之物 不 自 則 澽 通 意 矜 及 乎 其 自賢 他 或問 重 恐非 語 以 得 變, 器之華 此 或 也 意 概 其 口 三章之説。 而子 則 始 以 可 本 蓋 若 以 恐 不 尚 用 意。 但 靡 庶 其 貢 未 偏 飾 而 本 者 幾 後 必 耳 小之,恐 目之也。 己。 蓋 稱 焉 一然,亦 説 則 其可 器 耳。 日 所 所取 至與范氏 瑚 亦 0 璉 見夫子之稱子 用之實,而今較 當日答問之意,亦 謂 有 程 范氏 夫子 者 之飾 宗 不 子 乃 又直以 尚 以 廟 皆以子貢 所 在 則 口 乎宗 器 以 飾 盛 觀 爲 稱 如 矣, 器 之 廟 子 陶 尚 賤 其 爲 爲 貴 貴 然 貢 匏 飾

二説 爲 害爲 夫子 不 亦 輕 器 小 類 重 成 故揚之, · 而 則 不 相 此 乎? 器 似 夫子 誠 而 而 加 與 ,則今固 其 故抑 謝 恐其 其 以 稱 日 抑 氏 之,未 子 甚 説 揚 何 未 賤者 焉。 之説 尤 能 害 有 能 不 爲 有差 其 所 器矣 爲宗 形 則 未 日 而 又 等 安也。 廟之貴 能 似 F 又 耳 者 安 輝 子 貢 光 楊 口 謝 則 遽 則 本 氏 夫 説 周 以 何 而 能

但 義 其後 説 而 佞者,恐 故 徒 不 惟 仁 説 贅 尹 或 其 問 氏 其 而 以爲仁則佞不害 説 未 佞,不 最 説 兀 多 安 爲平實 矣。 章 不 也 一之説。 ·若仁 通 此 大 (),其 其 而 抵 吕 説 優 日 不 惟 氏 諸 0 雖 劣, 佞 家 \Box 不 程 者, 又 皆 給 知 子 豊 之 亦 不 仁 之 待 訓 解 太 則 解 較 緩 此 無 甚 善 於 句 所 而 善 矣。 之 知 辭 用

且

又

豊

判

然二

物

而

口

以

去

此

而

即

彼

乎

?

諸

約

而

所

得

多

矣。

形

而

上者

,乃名理之辭,

而

非

指

其

地

位

之

稱

哉

之,●又特畏 甚 章 未 則 諛 (矣,以 能 句之失也。 ,亦不考於 也大矣, 豈君子之心 亦已頗 全 體 顔子之賢,僅 論之矣。 人之憎己 不息於仁, 不知 日: 其仁之句, 仲 尹 而 弓 能三 何 氏直 不 哉 以 也 爲 德 月 ? 以 諂 不違 行 前篇 而 孔 日 諛, 名 又 子 而 并 許 第 則 而 己 之 $\dot{\underline{}}$ 讀 仲 其 子 難 以 爲 失 則 七 弓

几

諂

指 大者 見大 卒然之間 出 者 1,且其 安於小 意,見道 ,故安於 一人,而 或 問問 驗之於身,又如 漆 如 言之 分明 不自知其 小,惟 雕 此 開 對 則 未 何 見之不明,故 非見乎 若 能 也 所至之淺深也。 自 ? 目 信 此 有 日 其 其 所 0 而 大者不能矣。 人惟 切 見 程 若 子以 而 而 存若亡 手 不 不 見其 有 容 今開 爲 自 E 所

仲

之未能

全體

而

不

息

也

亦

何

疑

哉

能

爲

爲孔 如此, 者, 矣。 自 謝 則 詣 論 開 則 意 欺 此 未已 脱 則 欺 得 其 與 固 也 言學者 其與前 程子 之,而 資 且. 子見 蓋爲己之心勝, 曾 未 爲 於其 然無毫髮之累,則 則其 也。 既 禀之誠 點 必 進 所 其 乎 並 見 當 H 細 見 胡 章 謂 信 曰 : 以 稱 其 進 如 道 微 語 又若 道 慤 漆 此 反身 平 之明 容 敢 則 諸説 亦 而 雕 著 則 信 或 問 而 進道之志大也。 有 口 相 開 信 了,又爲 矣,而 而 有 二子 開 後 躐 取 矛 如 爲 便 誠 所 優 使 等 也 點賢 何 盾 法 是 也。 未 於 之仕 孰 而 如 又曰 ? 也 盡 止 而 胡 點 爲賢 過 於開 何 티 : 氏 曰 : 未可 語 蓋 予之失 何 若楊 日 充之有 日 則 乎? 見道 不 也 又非 程 然開 其 然曰 遽以 漆 可 子 氏 雕 子 見 分明 曉 開 、范 見大 之進 又 信 趣 未 事 又 以 日 之言 矣。 序 超 至 自 不

⁰ 此 於」, 正保本、 四 庫本 作

餔 則 禄 미 IE 前 以 亦 及者 於德 故曰 難言 孟 理,已上却 止 許 夫子 行 焉 啜 以 説 開 如 子 於 也 於天 計 其 若 所謂 爲 此 只是 盛 也 此 則 平日 耶 於 未 不 耳 ? 而 見之未明, 宜亦已有餘 而 日 F 同者 ? 此 足 這 仁熟焉 不 此 日: 能 難言」者,豈 而 有 乎 日 亦豈全不 箇 使效 理之上 能 與 後行者也。 ,仕者, 0 未 ,何也? 理 不然也, 徹 進 人 其以 信者 ,則其 矣。 規 守之未 官 矣。 但見之明,養之至 復 矩,不 又 一,而 子 ·知其 所 有 日 此 日 脩 曰: 所謂 使 明 獨 其 篤 然以 開 理之上,又有 上徹 短長 能 夫 理 到 其 仕 職 仕 而 使 非 有 而 其篤 日 有 爲 下 輕 而 若聖賢之達 人巧」者,意 非言意 而 不可 求 餘 求 自 姑 無愧 只 志如此 禄 禄之仕 ,則又與 理 許 使之爲 言 是 而 焉 於 則 之所 理之 哉 以 這 其 似 至 簡 則

或問六章之説。曰:程子得之矣。但

海 豈 必迂 子路之 先有 且 也。 也? 口 爲是説以 也 道 此 然吕 示人以迹之言,而 其 不若周氏之完善矣。 者 憤 夫子 居、亂 亦亦 固 章 曰 口 世 謝 此 無 氏 譏 亦未 若曰自今觀之,可以 何必故爲 亦因 過中 勇 宛 氏 意,則恐其 所 不 無 人 以 而 明之,而 轉 忍 賢 然也。 往 之或 以爲説焉 之謂 浮 可 絶 君者,不 曲 而 Ī 海 共 中 爲 不在, 爲 是説 可 哉 爲 患 國 是 憂則 從則可 逢萌 卒 引 設言 不容有此 難 説 此章 若吕氏、 不往,則又惡 無 然後 ,則恐其 程子 然直言 蓋 、管寧 又謂 違之,不得 ,然後足 所 矣,以 亦非 以 一言 取 見海之可浮、夷之 可 又於佛 聖人豈終乘桴浮 爲 遭漢之亂 材 安排 以 周 其 是。 未 比 而 爲聖人之言 之 以 明 氏 無 必 足矣 已而 之 之 説 肸之召 信之 計 聖人 在 所 今范氏 然 耶 則 爲 較 其 不 也 去耳 未 善 欲 耶 又 能 在 也 何 既 夫 明 於 可

七八

也。 是 浮 浮 之,則亦可以 有楊 能 人, 所 度 海 而 於 氏 去 好 而 以 所謂 此 勇 也 居 雖 過 夷 豊 而 有 聖人之勇不可過之意,然自今觀 我 矣, 遽喜 爲偏勝過中 終 此 無 使 歎 爲 所 而 焉 虚言 夫子而 ,所以 取 卒不 材 哉 之戒矣。 甚 E 有 行 不獲已 抑 無 但 也 揚之辭 所 度 取 子路 其 馬, 材 未 也 之譏 則 至 則 ,未 於 不 其

之朝 之取 爲高 家者 禍 見 元 不可易之論。 祐議 恐恐 也。 既 7,過也 亦豈能 所不可 哉 或問 不足以 亦未然。 又以三子 論 七章之説 意 此 廢之事 趣 救 與 治 范氏深譏三子,并與 多 前 賦、 當 無 三子之於仁,固 ,爲有 類 篇 時 事 爲宰、 ,雖當隆盛 此 訥 於 之弊,而 願 日 此 言之説 此 平 前 與賓客言 其 諸 所 外, 説皆 以 直 又 大率 之時 墮 反 以從容風 亦 固 於 未 啟 其 勉 不 ·, 仕 相 皆 焉 足 後 材 有 似 偏之 有 卓 來之 天 而 以 而 或 蓋 議 子 然 未 爲 不

> 無統約 子之材 出於此 可見其 氏 能 極於 爲是溟涬 知爲仁之方」者,●皆 顧 識仁」,又謂「子路盡 氏 一,仁與不 使武伯知仁通上下, 論》《孟》之言,旨意向 慮忖 所 引子 至 耳。 謂 細微 度、尤 者, 之發 歸於覺之說 頁問管仲及聖人語道,不若諸 則 觀 謝、 滉漾之説 何 其 則未有以 而終於廣大之言也。 爲 不 侯皆 爲 進 而 近聖 退 已 不 直 而 以仁 周 矣。 也。 知其旨意之所 特 人之氣 仁而仁止於是」者 以 告 旋 口 則知三子之仁,而 未 迷之耶? 背 以 爲覺者 此 疑。 又謂「夫子 則 能 謂 通 其 亦不 有 象 上下 趨 使聖人之意 其 也 ,故皆以 繒 可 全 君子 相 之云者 善惡 楊氏 恐武 其 知 在。 體 他 子 而有不 之分分 之漫 爲三 雜 則 伯 如 可 如 而 旧 尤 其 侯 謝 道 果 引 而 云

^{■ 「}者」,正德本、正保本作「亦」,則屬下句。

説 之仁」者,亦不親切。 計 則雖 遠,而非三子之所及」,首尾 以三子之事,爲非仁不能矣,又謂「其器 其不仁」,則亦自相戾矣。且聖人之言 今日「君子固 斷言之, 毫髮之間 通之,則其説曉然,不待辭 畫籌度,至於如此,然後出 至尹氏則幾矣,然所謂 曰未仁,不害其爲小人;若以 此 則 謂 [斷者] 雖 有 慕 日 而言也。 不仁」者,而 於 不仁,亦豈害其爲 仁 而 讀者但 若以 力 有 「盡仁之道 衡決,蓋 又謂「不 未 費 之哉 趨嚮之極 以 至,未 而 此 決 篇 其毫 君 矣。 四 不 周 可 子 能 而 章 斯謂 可 贵 IE 髮間 氏 哉 重 無 曉 道 其 言 ? 亦 有

説 氏 而 \equiv 條 第 以 語 或問 几 與 爲 能及者 爲完也。 條 許 八章之説。 不 ,他皆以 喻 以下,恐説 非此章之意也。 范氏以子貢爲知足以知之, 與 曰 : 爲 諸説 之者 及,恐未安耳 皆同 誤 夫子貢之對 , 一;但 不若第 惟 程 周

> 免於過 子與不. 己方回 大得失 二,爲 也 一一。 道人德之實也。 顯克恭 此上知之資, 則知從心不踰矩之妙 及 氏論知十知二最 而 夫仁 夫子 ,語以出告反面 胡 此中 材品之高 ,見其不可 氏曰 一哉? 也 也 如回者,❷ 與之者, 敷 人以 生 聞 ? 知之亞 又謂 上之資,學而知之之才也。 企及,故稱之如 而 知 下,而非 其他大抵皆 知昏 IE 聞可 十,舉 爲 善 亦以 也 子 以 是説者, 定晨省 欲之善,則 胡 貢 其 聞 始 材言 氏 畫 知 造道 知 知二 此。 終 又 焉 不 語 祖 亦 無 推 及 新 以 知聖 而 者 人德之謂 謝氏 徐 不盡 明之, 程 則 而 未 序 無 而 行 言 子 新 害 後長 而 不可 也 以知 所 子 矣,其 説 進 耳 於 資平日 亦 據 聞 知之: 而 故 類 得 其 + 贵 亦 志學 知 而 神 其 吕 無 未 浩 夫 知 遽 U 天

或問:程子、謝、周、尹氏晝寢之説,如

[「]之者」,正德本、正保本作「者之」。

[「]與」,正德本、正保本作「之」。

乎?

日

以

其

文

義

推

之,

恐

其

未

必

然

也

寢爲

寢室

之

寢

而

非

眠

寢

也

티 :

然

則

然

何

前

乎

,此者,

劉

侍

況畫

居於

次内,未

有

以

見

其必爲

邇聲

色者

遽

以

耽

惑責

之,則

其

探

人之私

而

發揚

之,

亦

大

八〇

也

當,其 也。 意也 而 其語仁恕之别,奈 曰 . 不待禁止 第 唯楊 此 他則傳録 仁與恕之辨 條 也 則語太簡, 出 以 於 之間 程 何? 勿言 子 亦 也。 之手 容有誤矣。 而 者 티 : 未有 范氏 ,禁止之辭 筆 以無言者, 以知其 丁,其 以 下,皆 言 日 最 (意之所 勉 失之 自 然則 强 爲 然 的

焉,故 氏 仁。 學者 吕 旨 然考之《論語》之書,則聖人之言性命者蓋 前 以 以 氏 一竊恐子 非 以 或問 爲聖人教 語 以爲聖人之教,有屏 門 自 爲 子 人 得 聖 文 貢 之,則 又 章 貢之本意,亦 人 則 性 人,各因 記 未 亦 之日 嘗 命之説。 雖聞 近 不言 矣。 子子 其 而 性 材 不過於如 不 但 人 命, 喻也,此 性與 曰 : 罕 附 不 言 但 程子、 察乎 耳 其旨 天道 利 而 此 説善矣。 與 罕言之 後 也 一,實 張 淵 及之 命 奥 與 鮮 未

范 惟無慾者 失之緩 亦 氏 有 無 味 或 心之説 問 ,能以 蘇氏 若程 剛 ·棖 日 自 之 ,已辨於前篇之十章矣。 遂。 子 有 剛 志而 但張子 謝、 티 : 未免於慾者 周 諸 氏 、范、蘇 之言緊而 説 皆 其 楊氏 善 志 當屈 而 切 之説 於慾 蘇 也 氏 學者

耳

謝、楊

以

爲

誠然者

誤

周

氏

又

以

其切責之乎

?

聽言

觀

行,夫子亦

設

此

以

警

其質之本然,則

亦哀矜之而已矣,豈

一當若

是

今昔爲言,亦未得爲

通

論

也

寢,其

怠惰自棄之罪

爲顯然而

可

責

也。

諸家

氏

不恕矣。

故

范、

楊氏

皆

從

舊説

蓋知

當

畫

而

多以

朽木糞牆爲譬其

質惡者

亦

不

然

也

若

在

也

焉。 甚,而 聖人 之别 知夫 矣。 文章 彼 而 言 乎不言之中, 曉 其 貫 氏 其 能 而 然 以 亦 天 之矣,又告 則 而 有 使聖 之中 爲性 矣 親 論 不 夫 不 號 性 誤 又駸駸 可 炙 成 謂 所 與 之 於 謂 則固 矣。 先 文 聞 ·, 要 耶 論 不 衆 天道之目 人果絶 命之微,聖人 夫 覺 哉 辭 知 ? 性 回 人論性之妙,則預 乎佛、老之意矣,安得謂之 而 在學 以 抑 不 之門 而 且 非 欲學者之自得。」則其言之已 亦 口 天 如 П 預 吾 何 聖 不 但 游氏以性與天道爲有 者 謂 子 於天道 而 有 待 子 而 人 默 而 未 言 貢者,夫子嘗告以 未嘗言 求 辨 既 貢 所 識 未 哉 嘗 謂 所以自得之。 説 不 不 嘗言 日 矣,又告 而 以 告之。 能 性 差 非 得 自 而 也 誤 與 但 知 知 聞 於 得 ,則學者 而 天道 之, 至 矣,又若 其 不 也 天道 每 之以 謝 於 不 成 則 則 著 者, 如 通 義 氏 若 未嘗 又 精 何 見 知 而 亦 矣。 此 理 何 甚 雖 粗 在 其 誤 以 以 於 楊 我

> 學者 心 傳之實 可 不 深 耶 切 爲 戒 而 精 思 力行 以 求 盡 其

有不 也。 矣。 故 惟 反 謝 能無失者,故夫子嘗以其兼人而退之。 吴氏曰: 以 氏 至於吴氏之説 或 聖 爲 問 異 賢 子 子路勇矣, 力行 路恐 蓋 其説 聞 之意, 則 之説 然一 每 又可 爲 於敢 以 知 知 日 行。 以 道 爲 : 補諸 不復置 之 諸 重 具 説 而 説 思 皆 行 之未 其 得之, 爲 於 亦 其

地 所許 惡之 其 衆善 先 能 之 餘 可 王 與 了,及其 耳 雜 之制 或問: 也。 稱 也。 銘 者 器者稱 而 益 蓋 以是 獨 死 純 孔 聖 舉 則 以 於 諸 幸 人忠孝之意 推 美 其 尊 惡 説 但取 之得 之, 而 善 名節 焉 如 不 而 則 何 其 益 則 稱 其 遺 以 以文, 名 惡 其 爲 所 以 之 同 惠 日 惡 人 爲 || H 以 0 故 何 益 是 或 范 出出 爲 也 不 人 氏 唯 其子 亦 以 其 謚 能 牛 不 敏 孫 法 無 盡 雖 有 無 日 Z 有 善 不 善 舉

?

四

人,故止以所長稱之。 此,然孔子責人以恕,居其國 范氏 敏 意,而吴氏之説 雜者求之,亦太過矣。 行 又引舜以 之敏,不若吕 爲説 ,義意尤備 氏 則 以爲 過矣。 不非 其他諸説 不 其大夫,又戒子貢以 敏 吴氏曰: 吕 之敏者得之。 氏 皆得 所 孔圉之行 謂 其 物 大 相 方 如

此等處 其輕 太高 推 文王 謝 謂 近 耳之資 致 而 氏 陳 行己恭,則其事上非有容悦之私 矣。 事 高 愈 所 善 或 重之宜 問 遠 卑 E 謂 閉 以 也。 則 當 尹氏之失,蓋亦 明 難 邪 十五章之説。 則 爾 之者, 反求諸己而 以 者,恐孔子之意 恐其 其 至以子産爲成人,則其許 體之愈實。 事 <u></u>: 無益於爲己之實,而 亦過 言, 是四事 蓋 驗之踐 高 曰: 范氏 類此。 矣。 至理 若但 者,亦 當 未必及此 凡觀書者,於 履之間 惟 如 善矣,惟所 廣 有 范 此 求 而能 序 氏 惟愈 證 · 而 之亦 耶 徒 爲 也。 左 敬 得 爲 引 ?

不怨矣。 惠於民,而後使之以義焉,則民雖勞而

敬也。 則恐其未足以當之也 楊 者,辭意俱病。 亦爲得之,蓋久 或問 謝 十六章之説。 氏 意則善矣,然謂 又以盛 而其 敬 德 日 : 而 不衰耳, 有常者語晏嬰 非 程子至矣,范 有 意於 非 久 而

也,而 則是僭上失禮之事 氏又謂「文仲不知僭上害禮之事於我 已辨之矣。 之,若程子、范、楊、尹之説, 或問十七章之説。 可乎 程子采地之説,恐其 ,若爲之而有 **=** 則 張 吾於管氏之章 或誤 子、楊氏 益 則 何益 也 爲 之 得 謝

子文之質,近於好仁者,文子之質,近於惡不 亦 然似皆未 或有 或問十八章之說。 未備者焉,請 得 其 所 安,獨 得推其意 程 曰 : 子 之言 諸説 而極 則 各 論之。 至矣。 有 發 明 而

者

仕

若

H

無

告天子 先事 立於淫 之事 之號 張之行 蠻荆 至誠 子則 之所 者, 未 據 故 得 何 行 之也。 子 爲 知 而 而 以 盡 又不 執 至乃以 無 而 下請 潔身, 其 張 爲,止 亂 性 爲 自 有 告 其 其 少 之問 所以 之 是 還 難 (事皆卓 新 能 政 間 通 蓋仁者心之德而 朝 亦 能 **\$** 止 柄 貫 方 至於篡弑 身爲之,而 於 復 息,不足以 行 忠清 者 尹 就 全體 與 伯 既 其 ,至於再三,既 如 者何 然非 則 其 亂 不 猾夏之心, 故 此 而 如如 能 又未 臣 疑 E 説 ,其不得 討 常人之所能及也。 節 之禍 IE. 共 以 天地一 其賊 名之。 ,至於仁則未知 不知其爲罪 知 君 而 爲 事 已未知 所 論 0 已作,又 以 仁 天之理 至 不能 樂亂 以 爲 之, 此二人者,平 去國三年, 而 元之氣 於 今子文仕 言 問 滅 則子文三 革 其 者 也明 之, 也 不能 又不 其 弦 所 何 自 以 文子 伐 僭 化 其 而 矣。 事 11: 又 F. 能 隨 於 子 王 育 非 何 孔 許,而 已,亦 告新 其 無 意 抑 知 志 丽 日 可 其

以

流

國之時 其謂「夫子不信子文無愠之事」, 之,則於仁之理、與 聖人之言, 古者遁世之人,後 子文若果無喜 則 所謂 若子文之心,其至公無 以 懷 其 爲 、恐畏 默識乎? 加矣,若 心 也 可遂以仁 亦不 指 之果 無喜 忠, ,未知其 其 躁迫,特出 是 事 輕 辭 則 愠 又皆未 無 實而言之,不 之何 絶 不 恐 者 喜 果 許 程子之意,大概恐出 愠 迫 也 或 愠 能 又特 之 世 切, 而 未 人之所 足以 則 耶 於不 脱 耶 異 學者 可 ? 然 何 然 不 ? 端端 而 輕以仁許 見其 以 也 意 而 之學 得 見 至 私 以 因 日 過 知 無 E Ë, 於 於色而 果 得是名者 其 有合 其 命之以 日 所累於 獨 蓋蓋 文子 如 程 言 非 而 而 之耶 至 此 子 程 而 於 有 有 獨指 之意 於 子 反 雖 忠 能 所 心 則 則 此 又 庶 以 不 清 者 未 耶 其 亦 必 是 然 舊 安 能 者 謂 政 旧 幾 求 鄿 然 去 有 间 而 亦

八四

邪 之忠 無復 哉? 而 此 不可 清 及於天下,然後爲仁,何其言之戾邪? 之仁與不仁,論其心 故程子以 此三仁者,考事察言,以求其心 則夷、齊、三仁之見許於夫子,何 有 通 以 日 況 意 不 . 而 耳 盡 程子以 窮居一 也。 E ,伯夷之清 易者,若聖人之心,則豈有一事 合於理 心 吕氏 但遂 ,何也? 毫私欲之累,其 若 之德 爲「比干之忠,見得時 日 徒能 以子文不知進退之義,文子不知 一介之士,終身何可以有望於仁也 以忠清 爲二子之事 0 者 全天之理 諸説之得失, 心如 固 馬, 曰: 其事 爲 亦 木石 則 如何耳。 仁,則 未能 又 亦異乎二子之爲矣。 9 ,聖人爲之,亦 而 何 無 有 則謂之忠清, Ŧi. 不 奈何? 仁 所 以及於天下也 范氏 常 可 一之可 喜 ,則其中 便是仁」,亦 百 耳 也? 愠 以 行 0 之非仁 必 言 티 : 無 而 比干 有 洞 誠 日 哉 所 日 不 0 以 然 0 然 忠 有 爲 貫

> 理也。 者,正 能,但 待學問 於君 哉? 耳。 以文子爲事 其失又甚矣。 然子文楚之宗臣 去之 去就 之貌者,於文義尤不通也。 子》本文之意,似 知之意,而未有以 之義。 耳。 前章辨之已詳,此 一節 且 以其事是君 不可遂以 若不爲容悦, 而自能 孟子所謂 楊氏 也 君 」, 且 文子之失,又不 謝氏又以二子爲質厚之人,不 以釋子文之喜色,似以爲 人,而又謂 入德,其 忠清 一詳其 不 ,無必退之義 容悦 驗其必然也,使出 ,則爲容悦 如 爲仁 則 意, 此 特謂 不 忠其清,固 又 似 ,如答 復重出 其不爲容悦。《 安 所 專 亦 又以 前 求 得 以 在 以 ,知之云釋 容於君 謂 謂 孟 於 無 不 比 也 之 之事 亦 武 亂 所 於此 知 干、伯夷 擇 非 事 0 伯 作 似 仁不 之意 容悦 求 君 君 楊 於 而 孟 悦 義 氏 則 未 後 人

❶ 「重」,原脱,據正德本、正保本、四庫本補。

其 遠於 乎? 想 以言 不若 又何所 之耳。 而 相 爲 心迹 爲仁 伯 ,而 而 意之所指,殊 獨 反 此 而 夷 ,而为 聖人之意,而 之不 知 不得 德,而非所以名仁之義,又且得於三者, 范説之爲實也 論 前 不得爲仁耳。然比干、伯夷之 不 至色有歉 以推 若欲舍迹 何 大 知 其 於仁、豈又以仁爲覺於是三者之云 耶 叮 在 爲臣 而 失則均,若銖較而 迹之 仁不 其 ? 判 可 心,子文、文子之事 耳。 論 見乎? 爲仁之道。 於心 不 曲 可 且 而 二子之所 口 出 以 其爲説,與 折 0 楊氏 惟 知,以 以 於 侯氏 迹論 心之論 以知其 下,全體踐形之説 强 程子之譏文子,正 蓋 爲 大概 所 亦 則 爲, 蓋以失夫未知之 聞 謂理之得者,可 寸度之,則恐 其 則 范氏之下者 心 偏之説 又直 而 其説 在 意 之隱 所謂 觀之,則 蓋 迹 矣,而 故 日 以 微 所以 心 比 爲 亦 而 雖 者 則 干 末 其 口 反 IE 以 爲 反 得 相

> 説 者耳,夫豈以聖人爲不知爲仁之道如 同 云 仁之道,使聖人爲之,亦只可 不 又以己之意,附於程子之説, 者 哉 知 而與 也。 其 以 上文全體一 程子蓋謂聖人之行 何 而 爲説 也? 事之云者,了無系屬 至謂 或或 謂 而 三子 之清 不 有 知 出 不 侯 其 忠 於 氏 忠 有 知 不 則 又

之,則 禮以 齊 文子言之, 人之以義制 則 意起」者,則 之説則狹矣。 當之實 納 利 行,可 賂 害 或問十九章 是非當 也。 而 得 請 喪,萬 其 謂 事 其謂 會,及公薨未 至矣。 否,再 每 審 且以傳考之,亦未見其 矣。 事 而 變 一之説。 不汩 \equiv 思至於再則 而 思 蓋天下之事,以 然宣 思 無 而 於利 窮。 已審 如 日 葬,則 一公弑 使晉 0 害之私 思 9 程子嘗 已審 V. 以 止 又背之 而 於 私 則 求 也。 再 意 義 爲 遭 以 再 者、欲 揣 之 且. 而 喪 理 則 慮 使 之, 如 之 斷 私 逐

説 事 誤 臨 之 其 爲 止 日 之間 則 有 果 0 理 矣 私 所 再 事 善矣, 哉 曉 之 任 口 巾 始 又 口 以爲 焉 然 周 思 之 與 也 略 焉 則 者 公仰 耳 臣 ? 擇 則 然 矣 行,有 不 行 於 亦 范 又 贵 日 若 而 可 可 有 何 氏 非 0 思 是 也 則 不 否 思 待 所 通 諸 則 之, 可 之之之 庶 之 未 於 以 説 徐 幾其 焉 間 皆 盡 亦 學 如 如 思之而 則 若因 過 爲 問 以 是 爲 何 全耳 止 爲 耶 其 求 ? 而 口 道 思 ? 有 果 其 反 始 不合耳 也 之 而 不 説 若楊 謝 0 牽 也 思 此 可 擇 徐 氏 於 而 爲言, 特 計 益 何 氏 焉 思 再 於 若 名 之 則 之 之 思 爲 較 可

考 徒 而 其 事 之書者 或問 夫子 免其 實 亦 故 身 + 何 可 多 章 則 考矣。 取 失 一之説。 是 哉 之, 無 ? 唯程 若 以 티 : 大 異 曰 抵 邦 子 於 武 此 無 意 張 子 章 道 圓 禹 ·之説 之事 而 孔 佯 理 見 光 爲 備 之 喑 於 不

> 實 若 有 直 則 張 流 以 於 喑 子 其失聖人之意又益 爲 默 則 爲 固 我 當 之意 以 然。 武 子 則 爲 而 又 謝 喑 其 氏 默 遠 計 矣。 而 云。 較 罪 之。 利 楊 害之間 氏 范 调 高 謝 幾 無 則

志 牢 之 耳 言 孟 也 子 矣,然以孟子之説考之,恐其 孟 而 加 之謂 此 所 弱 初 吕 子 子 雖 不合。 所謂 謂 又 特 或問二十一章之說。 在 固 謝 氏 心 乎? 於行 自 所 氏 不 似 拒 固 傳 志 進 大意 爲 而 以 在於行道 聞 其 取 又如 道 不 爲 但 説 即即 肯 之 初 近之,但 裁 范 而 所 以 耶 有 其 即 此 得 氏 謂 ? 異 立言 此 所 英材 似 言稍 不成 而 辭 其 范 謂 所 以 不 爾 言多病 斐然 之 謂 爲 章 而 吕 發 在 <u></u>: 非 不 贵 裁 教 · 不達 成 其 於 或 知 成 得 之, 其 章 秘 傳 程 則 未 耳。 所 章 一之説 彼 性 者,亦豈立 乎 道 子 范 其 然 以 者 行之過 爲 之説 氏 裁之者 樂 也 然 夫 也 爲 告 夫 亦 初 Ħ. 説 與 蓋 善 孟 子 亦 其 其

事 氏 而 文 何 倦 不 以 又 也 意 氏 得 相 私 有 亦 自 邦 心 妨 非 然,則 淑 未 家 也 輔 此 諸 焉 備 而 亦 章 狂 亦 人,恐《孟子》本文,亦非 有 又有 則 無 之意 狷 爲 教 非 厭 雖 耶 不 過不及之説 而 是,當於本章 不 蓋 ? 素 薄之之意 中道、然以 其 明,材不素具,其 其 以 後所 簡 也 近 爲 引《孟 辨之耳 聖人 狷 況 之誤 於得 教 教 必 子》之 人之 亦 若 人不 之, 也。 楊 將 是

蘇氏日 以 有間言焉,若申生之事與? 氏 言 其 蓋 其不 諫 矣。 嘗言之,然無所 或 文考之, 夷 問問 辭 念而 、齊之事遠矣,傳失其 其 爲 夷、 於 不 怨希 恐 扣 口 齊之有 馬 亦未當 信 蓋 也, 考,未 耳 不若是,則又何惡之可念哉? 舊惡, 不 奈 解。 范 決 何 敢 而 然 ? 意其出 吕 斷 何 范 以 以 皆 也 氏 티 : 爲 爲 ? 以 也,父子之間 所 無 必 程子之 謂 怨 日 然 也, 爲 樂 : 也 天 人 但 蘇

> 人之惡 所 善 則 氏 者 順 引 恶 文 始以 與與 理 意 所過 爲 此 則 殊 横 何 言 章 太 者化,亦 逆 必 不 則 所 寬 鱒 深 相 指 全非 而 弓 類 念 爲言。 亦 不 非 而 此 切。 楊氏 無 孟子 章 又 所 何以 之意矣。 而結之以 合 吕 則又 本意 氏 而 所 新 直 適 謂 舊 以公天下之 相 攻人之惡 如是,則 之 清 反 能 擇 矣 遠 他 謝 怨

患 之,則直答以 情 夫子 也。 説 新矣,然即 也。 其不得哉? 至 矣。 蓋美之者 日: 或問 夫 或 楊氏 微生 醯 其言以觀之,有以 有 非 無 乞醯 謂 亦 然乎? 難 設 而 爲 直 得之物,或乞於 E 其 之説 非 得之,則 一,彼將 有急 中 日 庸 難 去 日 : 之行,微 不察其幾 之用 爲是説 而 知 程子 求 其 前 之他 我 無 生 者 不 IE 范 而 而 一之事 大之 失之 知 我 新 氏 之 即 口 無

^{● 「}則」,正德本、正保本作「而」。

耶 直爲 美德 用 出 哉 求者 得 庸 掠美行私 其 ? 之 ,怨使誰 求 心 加 矣。 之意 非中庸之行,吾 者 可 處 然則 善乎 非子思之中 ,特惡其直 也 則 ,左右 且直之爲言,在 當當 告 沂 其與之也,必不告以得之之所,其 斯 今微生高之乞諸 之可 人之 ?」至哉斯言,其亦異 或 王文 異 庸 也 而失於絞託 所 態 一,求之而 不 必 謂 如 正公之言 知 也 此,夫子 中 其 昔聖賢 庸 何 者 鄰 不 所 而 E . 也 得 尚 乃 取 己。 未 必 焉 胡 何美之云 而 有 乎微生 恩欲 廣 今概 不 爲 以 則 之 告 斯言 爲 往 之 中 以 己 以 助 非

耳。」 程子 未 此 口 人蓋 也 蓋 知 鄧名名世 或 問問 因 也 左丘 其 先 左丘 説 友 啖 姓 ,字元至云。 鄧 而范 而 趙 明 著作 明 非 陸 、吕、楊 名, 傳《 名 氏 傳《春 世 春 辨 考之 1秋》者 氏 之 則 於 秋 氏 古 纂 者 耶 姓 以 例 ? 乃 書 爲 詳 左氏 當世 日 日 矣。 0

安知其 此 做 物 者 氣 以 天 之弊乎? 有 文而 餘 志者 所 之,以爲是特實、育之倫耳, 亦 之發也 敷? 便不 何 理 謂 猶 補 心 藴 而言耳。 ,疑若 矣,學 合内 程子 性 E 其 或 也 問問 做, 分 也。 非 范 闕 世 ? 之意也 之别 氏 外 紀 耶 歟 者宜 之學 日 以 以 + 謝氏 曰 : 曰: 蓋祖述程子之意,但其所以 而 ? 録 ? : 聖 爲 五 成 之或誤乎? 是其言心, 熟讀 而 真 然則 者 日 取 日 其仁 章 每 ,但三樂之云 爲 不 百 0 ,不察於 其 . 稱 之 及子路,以 無心 吾意子路之言,其 世 其 而 胸 其 者,則亦 子 指 深 之 以 懷洒 以 路揀 者,不 味之, 師 子 亦若意之云爾, 顔 其 曰 此 者 路 曰 : 落 子之心 . 難 立語 善形容聖人之 亦誤矣。 輕輕 今觀之,亦 爲 亦 不 豈 程 割 無 其言 亞 淪 可 子 其 所 舍 稍 之言 於 爲 但 好 繋累 於 有 底 孔 疎 或 空 出 玩 勇 見 要 浴 張 論 志 寂 於 其 無 有 不 於 顔 而 子 議 於 沂 子

徒校 之醉 氏 爲 文義 説 後説 陸子 之問 於不篤 而 玩 風 論也 之論 路者 賢之意。 尤 志 之意 何 無 物喪志之一言, 其 非 所 亦 則 乎? 於仁者之事 人 壽嘗論 ,則其言亦太容易矣。 思何 則 所以 增 量,而未及實指其體也。 不 差約矣,然其日 也。 ,蓋得之矣,學者不可 不 又以夫子所言爲非 太卑矣,其 損 通 拍 謝氏 慮之屬 若吕氏之語,則 於其 也 名之也 此 之間 游氏之説 以 以 有志爲 楊氏專以 間 有 每 則 而不知其反以 爲 所 亦 夫豈 淺乎其 如 尹 每如 省 未 則 謝 氏 更不作用者 至道之病,而 發, 察 其不 氏 亦 獨 志之 此 志, 蓋其 亦 於 者, 太支離 知 超 此 贵 皆 以 程 而聊 能言 然謹 二子 廣狹爲言 Œ 至於斯 不戒 未 未 又以二子皆 非 所 子 老、 免 論 足 亞 有 以答子路 哉 矣, 誦 於 加 亦 爲 佛 也 欲 浴 以 所 師 於 蓋 而 猶 程 乎 沂 之餘 發 二子 浴 明 説 必 顔 則 此 其 門 ? 於 於 御 聖 沂

以

而

仁,則子路之事亦不可忽,要當如此用力,然後顏子 其分而無不得焉。 誠之者,人之道也。 子路蓋欲先去其私於事物之間者,其 有 之不仁,病於有己, 已耳 馴 張 默 致 至於顔子則幾於廓然大公而無物我之間 識 敬 ,若慕高遠而忽卑 夫 於其 廣 推 言 此 ,故雖衣服車 程子之説 至於孔子則純乎天矣,物各付物 記誠者 而 深 近 一天之道 知 則亦妄意 其 馬之間 其 不可易者矣。 也 意 、志可謂篤而用 躐 然而 ,此意未嘗不存焉 亦善。 等 終身無 學 矣 者 有 然 張 之事 志 所 猶 I 日 此 一亦實 成 於 止 所 外 口 求 於 謂

則

否,内 張子有 爲見他 若范氏之説 以 范、 爲内省之比 知過 楊 或問二十六章之説。 亦善, 自訟 言, 人之 爲 非 否。 也 難 過,則於文義 但尹氏述程説 則省之於訟 有 者 此恐亦未安也 其意 過 ,其亦誤矣。 則 亦若 日 ,其用 觀 謝 有 而 曰: 程 其 氏 不 去其首句 謝氏 黨 通 力 加 以以 否 亦 觀 以 子 不同 疾 内 其 見 至矣, 已 自 則直 黨 其 其 调 即

勢小 以 如 先覺也。其言自盡 皆如己也。 者 信又如其 理,正使初無文字 子之言,亦曰 知,蓋不悟此爲設辭以勉人學之意也。 語 質,則人之忠信,固有與聖人同者耳。 生質而言耳。 又誤矣。 楊 下 後 ,則失之矣。 ,亦不免吕、楊之誤,其於程子之言,蓋 不分明,似 則 或有之 氏 戾 或 、説,則亦人人皆有聖質,不待積 其日 善。 問 卒 若使果有聖人之質,自無 前説之云,其 吕氏遂亦以忠信爲聖人之質, 也。 尹 章之説 忠信質 必 以 語生質則不異於 氏 范、吕皆以爲聖人必待 有忠信如 爲聖人之質,全與 然其論夫子不以聖賢 用 ,師友之傳,亦不害其 不欺以下則 程 也 子説 日 失 猶 . . 丘 明 日 程 者 所 子之意 而 甚,今不復 耳,非 人,猶 謂 善。 忠信 誰 衆人 不學之 謂 到 無 謝 日 質 自 + 氏 獨 事 且 學 無 今其 以 語 而 室 夫 有 之 居 忠 知 則 事 而 異 牛 其 語

> 能以 所未 之衆,千歲之遠,其可 氏曰:十室之邑,尚有 之後,以至于今,讀書學問者不絕於世, 一二數,則以不知孔子所好之學而好之耳 察者矣。 胡氏之説, 以學而 忠信如 入聖者,宜 (孔子者 亦有 況以 而 亦多矣。 所 求如曾、 天下之大,萬民 發明云。 然自孟子 . 閔者,不 胡

雍 也

則 范 之對 曰 之,莊以蒞之,蓋近之矣。 耶 日 在 南 氏 : 才德之云,足以 人上之意,則未之發也。 ? 亦 之 未達乎前篇夫子所以 面 或問 或 而 曰 : 問 證 而 有 亦 以前 不日 以 子 仲弓之有人君之度,何 爲得之。 知其然也。 桑 爲 篇不佞之譏,後 伯 政,則疑其 子 兼仲弓之所長矣,然此 何 謝 人 楊 對 然其深厚廣博,宜 謝 ⊟: 主 遂 也 或 氏 人之文意耳。 以 於德而言也 章 以 諸 仲弓爲仁 爲 居 説 以 日 簡 敬 如 知 胡 其 以 行 何 氏 ? 然 臨 簡

> 禮著明 簡者明 程子未 默契聖人之微旨,而分别其居敬 所謂 矣。 專指 氏以 見其 同,何也 同, 夫子所以深許之也。 簡 所稱矣。 友 以 稱之, 者 爲 大率夫子之意,但言其人之可, 可 其 爲 不衣冠而處」,則固略於禮 ,蓋老氏之流 莊 , 者,固 其 盡善 居 亦可南 子所稱 何 ? 所以 日: 敬爲言 故其所以見於事 也? 曰 : 之意 有未盡善之之意矣。 夫子 可, 面 子 持身以 尹 桑户 티 : 則 ,若是則 雖 也。 以子桑 氏 恐失之。 不正言其居簡之失 , 程子之説得之矣。 然《家 與孟 敬 又因未盡 日 伯子爲 則 不 者 0 子反、子琴張 復得以 語》亦云「孔子 居敬 心 游、楊既不 法,如莊 自 不 善之説 可 居簡 仲弓乃能 然操 放 居 可 而 逸 簡 而 之不 爲 生之 得 之不 以 又 而 見 謝 爲 其 義 其 而

0 禮 正 德本、正保本作「理」。

論語或問卷六

九

仲 者 則 贵 謝 簡 内 何 理 亦 無 也 程 持 理 簡 也 弓 得 獨 0 子 循 淮 無 與 未 氏 與 其 而 之言 道 以 平 若 於外 爲 安 似 則 不 而 氏 於 所 無 一揆,外 以 范 居 不 舉 臨 事 日 簡 既 以 堯、 煩 簡 氏 蓋 也 事 煩 夫 居 民 其 行之者 不 而 擾 專 敬 行 者 之 君 大 舜 程 無法 太 而 素 廉 E 之 以 簡 無 謂 哉 子 爲 之事 子 簡 明 内 曲 之説 患 簡 舉 爲 以 無 以 之弊 守 於内 又 外 亦 盡 爲 異 衆 太 其 其 ·, 荷 判 非 且 其 若 臨 又豊 矣。 大, 亦 簡 寡 有 矣。 將 旨 有 居 所 以 切 民 而 贅 心 居 而 所 敬 無 無事 之道 以 紀 以 有 可 熟考 於 而 游 且子 程 略 而 小 簡 處 不 綱 簡 同 簡 且 氏 子 爲 身者 於 也 行 大 可 法 爲 H 而 語 而 狹 桑 則 以 簡 略 無 度 勝言者矣。 事 而 言耳 若 伯 深 矣。 是 爲 者 時 其 有 敢 又 有 思 語 子 居 既 則 可 所 慢 細 不 之可 之行 未 自 哉 敬者 無 是 務 曰 簡 略 也 然 密 然 敬 疑 所 義 於

> 之説 此 有 緩,然夫子之許仲 久 相 則 而 許 發明之意 蠱 如 之也 弊 何 生 ? 焉 也 日 將 0 不 弓 此 謝 勝 以 亦 氏 其 南 記 説 多 面 蓋 事 者 時 矣。 亦 之言 又 此 非 意 曰 耳 以 而 其 辭 未 范 知 差 必 氏

若如 非 既 之説 知 不 所論 使 念慮 愚嘗 日 之, 非 0 可 所 不 程 以 不 韓 聞 文義 ,本皆與 過 形 小 或 纔 子 問 審 字 子 語 於 差 之 知 詳 之言 : 則 之 而 · 隨 顔 事 師 之, 韓 子 所 且 别 是 爾 矣, 程 即 之 子 也 安 便 盡 子 則 而 亦 冰 日 矣。 不 也 更 是 同 0 而 所 何 釋 貮 范氏 不 心 又 以 足 後 萌 其 過 不 程 常 皆 爲 以 乃易 之説, 所 作 日 復 子云 有 不 爲 此 謂 日 形 過 微 貳 者 章 顔 其遷 性 不 於 者 使 有 諸 子 如 不 而 尤善。 心術之間 不 焉 差 則 乎 何 怒之説 直 移 說 貳 ? 失 非 遏 於怒者 則 如 別別之, 過 便 學 蓋 張 亦 何 者 其 能 恐 间 子

求 則 不遷 絶學 子之事 乎? 矣。 顔 不足以言之,又何 説 動 亦老氏之語,若聖人,則固不待學,然亦 有過 不 則 理 雖 子 益 故 貳 放 亦 則 不 之學 心 欲 也。 無 以支矣。 過 游 猶 善 至以 過 貳,乃其終身好學之所就,未至於是, 而 勉 則 ,亦無所當 過, 氏 韓 矣, 不 Ŀ, 遽 學 楊氏 子之説 不遷怒之説 猶范氏之云也。 不遷不貳 然則 害其 而 可 而 一於如 又概以 於 至是 力行 求放 文義 謂 爲 云 自 此 也。 凡有動 改, 哉 之, 爾 心之説, 强之有哉 ,則恐未 有 能 爲 政恐未易 夫顔子 亦 所 則 自强者 有 謝 未 程子之意, 檢 IE 氏 者 又以聖人寂 意亦 安。 大意 心 身之意 然。 皆 ? 之賢,利仁 語之 脩己 過 可 善矣, 所謂 其 如 蓋 也 至 ,則於 之别 日 日 顔 亦 而 一,豈能 9 絶學 知 然謂 未嘗 子之 而 然 太 不 其 幾 蓋 顔 則 論 疎 患 口 不

或問四章之指。曰:程、張備矣。若范

矣,而 子,以 之意 義制 應耳 而 當 爲 以 以 所 其 而 張 而 富 氏 其於 程子 後説 不 繼 嗇 言 以 循 廉 子之説觀 乃 前 與爲吝, 事 責原憲之 也。 取 理之云, 則其上 又未嘗 其 嗇 義 ,雖極 之説 則善。 抑其 相 與 不 語 與 理之 賙 謝 辭 直 爲 有 大意 之説 觀之 之可 氏示 受之當然,非 不 謹 宜 則 · 吝、寡 當然, 拒 相 則 吕説 辭 其下宜 行 嚴,而其 冉 戾之嫌。 非 可 見。 人之説,恐未嘗 則得之。 亦頗 乎 H. 以 子 見。 所 亦 亦 取 其間 之請 多 又教以 善,但 以 禄秩之説, 無 爲 有未安者 與 日 宏裕寬大、優暇 游 語 使 多取 廉 獨 也 爲 9 以文勢考之, 氏食功之説支矣。 孔子。 楊氏深 皆 以 人 者 及 雖 惠 示 可 爲貪; 富 故 人, 而 以 其 其 見爲 雖 不富 亦恐未 有 禄 意 周 文意 之 譏世之君 以 蓋 此 爲 以 則 急 不曰 聖人 富 分 使 意 當受 意 若 亦 不 爲 不 乃 寡 爲 廉 分 繼 以 相 善 室 至 取 \Box 退

溺 説 説 其 爲 加 加 뻬 줆 氏 刻則 過 已 之 欺 以 流 私 或 日 不至於傷 世 問 也 污 之 積 寧 便 必 蓋 冉求之請 冉子爲其 穢 以 弊 曾 也 與 其 衆 其 氏 故 沉 盗 毋 惠 疾 私 將 陋 濁 愚 蓋 名 若 則 吝 而 八母請 使 嘗竊 之中 者 可 亦 徒 夫子不與可乎? 至 矣。 共 實 實 寧 得 知 於 倉者 聖 排 此 介毋 吝 ,不但有 以 彼 此 此 輕 人所以重 其 之, 者 爲 之説 意 外 財 爲 得 貪 學者未 得 者 以 則 重 害 託 託 爲 則 胡 如 違 義 其 而 딤. 於 而少予之也 於 是 且 氏 所 庶 不 説 得 受 清 將 皆 之説 其 譏之紛 請 中行 察 當 苦 堯 介 丽 不失聖 舉 不 乎 不與 矣。 天 不 近 廉 此 亦 不 下 紛者 世 遜 與 則 人 曾 善。 固 之 之 幸 之 而 情 則 氏

惡 此 程 其 而 論 欲 或 欲 仲 問 用 弓 日 五. 子 字 云 章 産 蓋 爾 之説。 子 嫌 非 賤 於 與 之 日 與 仲 0 例 其 弓 范 故 子言 言 爾 楊 也 而 之説 此 蘇 斥 説 氏 其 當 父之 得 以 矣。 之 爲

> 譬,不 矣。 之次 程子之嫌 乃 矣。 通 與之言 謂 顔 之用 淵 祀 而 蓋 當以 以《論 而 吕 取 死 今以 後得 氏 後之言 之, 父子 然果 尹 語 則 用 氏皆祖之,不 **>** 勿 而 如 其 此 考 用 言 此 而 説 例 之, 爲 亦 也 蓋 也 則 不用 以 其 勞 當 歎 謂 H. 張子 而 就 於大祀 顔 凡 · 其誤 E 於 之説 祭祀之犧 淵 起 義 物之身 之 未 與 益 蓋 見 無 非 而 其 而 亦 必 所 Ш 止 親 取 澼 111

然私 兩 心 私 衆 蓋 者 而 何 物 欲 人 以仁爲心之德 又 所 之心 欲亂 日 不 或 而 也? 以 萌 心 相 日 不 之,則 不 . 去 違 則 所 仁,人心 違 也 曰: 即 以 於 仁,則 或 是 所 每 1 也,人 孟 有 謂 至 也 心 子 是心 於 心 也 不 而 之言,非 有 之與 違者 違 故 是 則 是 德 仁 所 而 心 心與仁宜 謂 存 也 不 非 以 ,又若二 焉 違 能 則 有 克己 有 有 此 兩 訓 是 是 物 顔 復 德 德 心 物 非 子 而 矣 此 矣。 也 之 相 有

有之, 似 終月 三月 夫 此言 日 尹 心 有 差 也,是以 之於仁熟矣,然以 依 所 得 月 與仁 與 所失 也 蓋 見規 之爲 至 此 然其 期 而 諸 亦 仁 焉 章 子從 不 哉 也。 深 曰 豊 目 至 無待於 模 文 多 者 失 體 復不遠 不 能 在 於 ,然程 意 則 意 也。 事 其 向 而 曰 : 外 違 發 踰 味 密 不 於仁,或能 以 使天假之年 默 者 不 明 而 時 矣,至 協 氣象之云 識 大抵此章之説, 子之解 日 _ 一, 仁在 則 我 至 違 之久, 其 未 於言 月 月至焉 爲 此 而 猶 其 期 能 其 耶 客 常 心之本 有待於 意之表 内 而 識 所 終 也 1 以得善弗失言之, 何 或 而 ,大而化之, 則 其 者 改 日 也 張 我 非 而 不 何 周 誠 而 然者 何 ? 不 又豈 爲 子 其 能 意 則 程 知 伯 不 也 分親 違 内 È 也。 無 庶 日 此 失, 温 張 ? 又 復 外 念 也 而 平 辨 説 其 侯、 或能 賓 則 未 可 後 其 9 而 慮 日 顔 則 H 主 實 與 解 0 其 以 嘗 之 子 得

於賢 間 衆 病,至 身之可 大,而 得 以 自 之事矣。 也 禀之盛衰」,則 加 往 在 意 其 終於可 强 明夫顔 與 我 不 則 勉 Á 者 則 人之德 則可 安於 不 ? 者, 必 勉 謂 乃 程 不言其 德 息者 久 循 子所 「必致 范 爲 大抵 謂 久之域 而 盛 則 客 子 循 氏 爲 得 之不 仁 岢 已」,是 云 而 而 則 所以大 無 謂 大而 之 其 養 爾 熟 以 求 持 不 其 他 説 其 也。 而 爲 爲 E 志 能 能 直 於地位之淺 非 異 氣 化之之事 反忘 使 矣。 自 用 主 養 E 是 不 可 。 固 其 説 功 而成 至 於 凡 氣 違者, 以 峻 日 至 本 内 至於 身之者 爲 常 絶 而 内 性 以 氣 吕 此 而 必 疎 情 非 其 外夾持之功 徇 然後 非 矣。 ※ 顔子 不 氏 而 又大 深 略 又 測 吾 能守者, \Box 末 出 極 徒 絶 力之所 以 度 亦 又謂 矣 故 段 贊 调 之未 於 望於 姓矣 顔 能 而 巾 過 日 著 本 此 子 非 不 達 源 賢 道 爲 力 繫 蓋 不 能 使 其 顔 此 幾 Z 之 幾 以 不 在 將 息 1 子 所 人 與 非 以 游

之意 耶? 説 是 外難易之別 力於仁爲行仁,不違 則 當於其不違 復之際言之,雖 不 氏 益 其 心 可 以 、爲説 之與 味 甚 須 楊、 耳。 臾 爲 矣。 、侯不遠 ,亦自相矛盾 仁又 離 人 之際 心 ,則其 · 而 且. 爲二物, 以 則仁之與 無害於本文之意,然學者 謂 而 而 仁 離 人 體焉 復之説 内外、 存 仁 心 小小 而 爲 而 不 ,乃可見其所以 亦豊 不可通矣。 心 以仁 或 可 判 ,蓋自其 非二 ____ 相 心 存 離 日 迹,而 不 物矣; 不 心 或 違 既 依 相 仁 至以 違 倍 而 於仁 依 之 然曰 其 用 有 而 也 謂 師 用 功 IE 旋 内

卒不 謝 范 此問從政 八聞國 氏 氏 競 之云 或 政 也 胡 女也。 問 謂可使爲大夫否也? 氏 則季 七章 吕 然康子卒不能與三子同升諸公,此魯之所以 亦 氏 庶 之 之説。 康子 幾矣。 訓 未必有 不 티 : 胡 甚 氏 蓋宰有家事而已,大夫則 親 E 此 程 切 意 子 求爲季氏宰久矣。 之言 也。 然 亦 楊氏 至矣。 無 病 所

> 必 引 本 拘 章 以 以 釋果、達之云者, 可 六藝之目 見藝之爲言 也 非聖言之本 能 其 事 之謂 意 考之 亦

者,而 矣。 失之,孔門之不仕者,如曾皙 多有之,不但二子而已 而 E 謝 或問 吾獨 楊氏惟 氏之説, 麄厲 八章之説。 有取 顔、閔 焉,亦以 感奮 不 也 티 : 仕之説 其 足以 若 程 不 子、 漆 立 近 原 雕 范 聖 懦 開 於 氏 夫 賢 之徒 程 八之志 得 氣 子 象 心 而

之致 也。 序 則 氏 質之禀,蓋 0 矣。 能 引《易》而 以《淮 或問: 其 加 窮 理盡 日 至者也。 日 命者 有一 南 伯牛之 言 不 性 子》而言耳, 人 以 則 定 何如 范 至 不 其 而 類,而 氏、楊 疾,先 於 室, 也 不 命」, ? 可 而 又 氏言之詳矣。 易者 儒 其 日 自 則 日 以 : 信 牖 益 孟 爲 能盡 有 否則 錯 執 生之 癩, 一子所謂 亂 其 人之道 不 信 而 丰 初, 然范 可 乎 莫 知 ? 何 其 氣

遷南 也。 不復入其室,止 時,伯牛家以 也 牖 曰 : 肇 、欲令君 以 舊 爲 注 此 於牖 禮 以 X 禮 爲惡 尊孔子,而 而 南面 病 下 者 取 疾 居 也 不欲見 其 出出 (手而) 孔子不 牖 孔子視伯牛 執 人,未必 君 之,理 敢當 視 故 或 然 疾 則

程子 於老、 求顔 尤 淺 所謂 必 然其言皆若 亦得乎言外之意 類類 非 Ē 何 者耳。 子 所 言 引 也? 或問 佛之門者耳 非 · 用 以 以實 而 所以語顔子 語 心 不 顔樂之説 티 : 之,則 發躍 所 日 顔 有 在 子 所 程子 然則 者。 也。 而 如 指 語 不 也,學者所宜詳味 者 滯 蓋 獨楊 程 可 吕 然其富貴能憂之説 謝 ,而卒不正言以實之, 曰 : 而意 日 子 得之説 氏 氏 答鮮 顔子之心,無 氏 心 以 程 不 之説 理 不 子 圓 于侁 與 義悦心言之, ,則又流 之言詳矣, 矣。 ,爲庶幾 物交之説 之問 范氏 也。若 少 而 其 X 則 私 平 疎

> 樂,仁 得,而 若范氏、 欲 況於後世之傳聞 及門升堂,親受音旨 王公信伯 之學,而不若樂道之雖淺而猶 有心樂道 至樂無樂」是也。 天 .而已者, 理 無 吕 適 渾 ,則有著矣,道 論之,則又以爲心上一毫不留 氏之説,蓋皆未免乎侁之蔽。 不樂,不 然,是以 則胡氏、張氏發明之尤詳 者哉? 以 待 日 而其 是 以道 用 爲 亦 動 説 無 爲可 程 差失有 静之間 子 則 可 有 樂,莊 樂然後樂 所 又流 據 若 謂 也 此 從 顔子 於 子 者 容 異 彼 所 也 自 其 謂 而

楊、尹 非 顔子之事, 孟 一爲説 子有 或問 之説,皆得之。 亦非 諸 + 則過矣。 己之意。 是。 章 · 之 所 説。 但張 又以樂正 謂 楊 今汝畫者 氏 日 子以 引 張 求 子 中道 子、 爲 也 ,乃責其不 退 信 而 吕 故 道 廢 爲 謝 進 亦

^{■「}之言」,正德本、正保本作「言之」。

一九八

之説 止 勉之 是 意則 一意,而徒然煩複 辭 而 善矣,然以其 非 誘 進 之之意 ,恐非聖言之本旨也 説 也。 推之,則覺其 若程 子、 三句 范 氏

於 洪氏曰: 必先於能 皆 可 所記,初無次序,不可以不考 以 不 唯 警學 能 或問十二章之説 之對也,片言折獄,必後於由之行詐也,子張未仁。 讀《論語》者 出 行 五者也 於其間。 者用心之微 子夏切 ,必先知其言之先後,若參也魯,必先 而謝 問 也。 近思, 也 説 티 : 利非 洪氏 必後於小人儒也。 程子至矣,諸説 必 之説 殖貨者,尤 亦 善。 門

善,而 其 分言之,則凡飲酒 明之所謂 之迁耳。 塗,則自 所行之實 或 其間 問問 不當 티 : 十三章之説。 公事者, 不能 事 由 不 非 徑 無小得 在 讀法 然 何事 其 以 設 位 亦 失也。 而 也 譬 不 必 日: 群 ? 不 而 謀其 至乎 范、 己。 至 曰: 以 行 如 楊、 有司者,公 政 不 但 程 由徑,乃 既 士 謝 然 子 民 則 有 所 氏 之 滅 IE 皆 譏

> 乎? 既 私 間 以懸料 公事也。 事 , E 利 也 得人矣,則 則 去古既遠,風俗之變不可 病 .而盡. 亦 以 休戚之所 以是而至其 邑宰之知 可見 知者,然大意其 矣。 安知其 關 己 ,而當以 而 室,亦何嫌之有? 不已 訪 問 受署 告于有司者 焉 無 知 煦 則 固 濡 耐 凡一邑之 爲 媚 有 之屬 説 不可 之 且 亦

心 也。 異説 伐,理之當然,非爲有争有伐,而 若范氏衆必有争 即 而悦之者 莊 固足以 謝氏之説,尤爲過之。 子所謂孟 或問 而諸家横 也。 抑夫好勝之私矣。 孟之反何人也? 子反,蓋聞老氏 日 出 功、必有矜之説 0 他 諸説 意 以汩之,殊不 如 何 夫操無欲上人之 ? 懦 日 然人之私意 後 弱 0 日 以 夫讓 謙 胡 此 氏 是 下之風 可 本無 爲 以 而 曉 美 不 爲

盡 伐之美,豈論其功耶? 也。 然遂 多端 子之意,亦非 而 可 等之意也。 E ,優於衆説 必 范氏 以 得 發見,亦各不同,豈有但持此一行,而便 爲 吕 大 但師 氏 於此,復爲得之。夫子之意 道 之理。 説 ,若更以又爲乃則盡善矣。 孟之反之意 楊氏之説尤失本旨,此言 孟之反而可,則恐非夫子之意 亦費 孟之反 力,夫子所言,未有 以 此爲言,不但非夫 之行 也 尹 固 氏 爲 辭 如是 可 約 其不 加 法 意 人

説

,則其不解甚矣。

諸 言,猶《書》所謂 之美者, 爲協於文耶? 戾焉 世之所同好,不得 八豈使 非 説 或問: ,曷若從范氏之説,無鮀之佞 如 聖人之本旨 人不虐惸 何 ? 十五 日 「無虐惸 章 獨 而輕 謝 也 程子説,與 氏 而 重 楊 獨 所 獨 一於其 氏之説 畏 前 謂 曰:巧言令色,衰 高 善 畏 間 本文而字若 明 觀 也。 高明」者,聖 若 哉 世 (而獨· 之 且其 以 治 非 有 曰 朝 蜀 立 巧 有

> 且夫子之言,本豈有此意哉? 言令色不足以 相 傾 乃 戰 或 避遊談之禍者,尤恐未然。 之 事 ,夫子之時,未有是 侯氏改字之 也 游

談

之而 耳。 何也? 耳 則是賢人之行,與 由 少矣,又何説以 由 理 ,豈有此 者矣,何獨於此 道 深矣,然以文義考之, 若直以出 不知其道,亦嘗以 ,則世之悖理犯義 或問十六章之説。 曰:何莫之云,猶 理哉 不能 該之耶? 衆人不異,特其知之爲 而 不由 不然耶? 爲 而 户,譬夫行之不能 曰: 則 世又有不知而 不由於道者,爲 程子之云,終身由 日 洪 諸 何莫學夫《詩 氏 若范氏之説 先生之説,其 八爲得。 不能 日 異

或問 十七章之説。 曰:謝氏 美矣。

⁰ 獨」,正 德本作

100

其引子貢文質之言亦非是,且 爲言 揉損益之矣,殆非聖人之本意 其 本言文質 楊氏乎 故其説雖 不 高。 口 而 以 相 於文義首尾皆所 勝 使學者無復矯 謝 也。 氏 專 得 以 不合, 其 觀 旨 人

正之説 并以 已矣。 能順 通 上句本文之意 字義,亦皆爲生存之生,而又增 天之生是人 爲生存之生,雖若不同, 而 故故 "但於上句文義差不甚協耳。 盡 是, 矣。 上生字爲生存之生者,其 或問十八章之説 其生直者,合於程伯子之意矣。 蓋欲 叔子之意當 M 蓋上「生」字爲始生之生,下「生」字 猶能保其終焉,●是 也 以 實 對 則 理自然, 下文幸免爲 無 亦類此,而 所 當矣。 而意實相足。 日 初無委曲 0 程伯子之言 於義理 語 二事者 入吉凶 范 其 張子於 不分明,似 説 免 彼 特 固 其 之性 然於 兩 幸 乃 蓋 而 亦 其 約 非 生 而 不 日 口

> 異,然以經之本文,與程伯子之説 以 之意,無 此,亦不能 敬 直之名,若至大至剛以直之,直亦氣之本然 有 直,生爲盡生之經,其論 綱」三字,然亦未見其 之云,如 説自罔無 直以生直之生,亦爲生出 不待人以直養之而後得此名也。 合,不知其偶用 談實, 文生字 所未合。 順理爲直 所當矣。 張子之説 而 皆 如 識 其 蓋生理 也 ,生爲生存之生,游 其何 以 訓 以 此字,而 爲 説聖言, 下 ,其以 生 説 又疑 本直 皆 出 也? 有無常之意 不 之 一,不待· 如 罔 不 直字略同 可 散漫不 之生 生 計 綱 爲 吕氏足以 曉。 無常 其 之下,少「之無 則 人順 也? 同 氏 與 吾聞 謹 前 ,則於 推 異 生存之生 之而 以 也。 本 耶 之,則皆 乃至 大凡 免於 范 文 生 循 字 公莊 殊 後得 理 謝 此 世 其 章 於 爲 氏 抑 不 1

^{●「}猶能」,翻弘治本、正德本作「能猶」。

不碍、 有故,非生之理也。 學者所宜 亦近之。 爲養生者發,與 祥,本老氏 其支蔓,而 而 之云者,益 已辨於前、盡生之經, 語 死 木不抑,未嘗不直也。 亦 則不類。 也 未 ,於經 蘇氏曰: 瑩 列 語 無 相遠矣。 也。 ,然其賢於諸 吾不 所切 之文,亦無 以不益生助 木之曲也或抑之,水之曲也或碍之,水 孟子助長之云殊 罔,不直也。天之生物必直 尹氏蓋發明程子伯子之意 於日用之實乎? 知其 原聖賢之本意,豈 凡物皆然,而況於人乎? 則又所以能 所謂 所 説遠矣。 長爲直 當 矣。 然其 不類,此 則 保其 蘇氏之説 楊 語 益 與 氏 ,其曲必 意 若 生 生 本 以 似 又 不 是 存 首 生 故

其以 過 尹 高 安訓樂,爲未 或問 氏亦得之,而 而 十九章之説。 楊氏 以 盡 夫婦之愚 尹氏 其 官 爲 曰:程子至矣,范、 揚 尤 口 發 切 以 暢 與 於 之意 文意。 知爲. 耳 知之 但 謝

者,則反以卑矣。

學者而、 下 説 類,彼蓋汎言應世接物之事 下,又有論性不論氣之弊。 偏也。 可以入於下愚者 尤佳。張子之説 或問二十章之說。 言也 楊氏 所引不失人言, 殊 ,則又備 不 日 口 曉。 矣。 此 謝 程 子至矣, 亦 則專 范氏 楊 其 與 又 日 程 各 中 爲 性 引 子 得 善 人以 後 以 其 准

宜,近 義, 以 則 宜 惑者必至於瀆矣。 務,而反務其 而 是 是 而易知 難 敬 警之與? 測 所 或問: 樊遲問知,而夫子告之以務民之 而 鬼 謂 也 易 神 者,而 非 智 知 而 也。 達 也,非 所 遠 於 不昧不惑於 不當務者矣。 曰 之, 意者樊遲 事理 誠 達於事理, 所 何 能 則 謂 也 専用 ? 鬼 或 其 神 鬼神之難 有 昧 日 其力於人道所 者 鬼神之理, 者必至於慢 此 則 . 非 病 必 ,故夫子 道 忽 祀典之 測者 之 而 所 出出 不

生之理直,不直而生者幸也

非

正

也

耳。 利 道 董子 其效 獲,何 鬼神 此 事 天 之而 鬼神 以 加 Œ IF. 之事而已。 不計其 理之自 慢之也 絕之,固 耶 耶 明道 則 又嘗以先事 所 作循 樊遲 哉 不瀆 其事 也? 無 則 謂「仁 則 贵 不 又使 聖 功, 蓋 耳。 然 ·雖公, 必 天 不 IE 在 曰 : 有 也。 日 無 人者 理之自 使 上 也 使 人 若夫仁 正謂 先 後 遠 功 人 則 人 爲 問 非 而 然 獲之病 1,正其 之, 得告之,其 其曰遠者,以其 敬 敬 明 是 但 或此先 其 此 意 然 之, 而 禮 事 而 者 何 不 意 則 IE 遠 以 者,必 , ●則 而 自 誼 夫子告之以 也? 何 爾 私 計 則 之,然亦 Œ 故 無 不 夫 也 其 一之,在 先 雖 欲 夫子 謀 所 然正 ? 功 聖 效,而 有 曰 利 爲 有 其 以警之者 利 人 是效, 0 以 之 其 成 處 既 利 誼 贵 者 不 F 聖 爲 事 私 功 出出 2 告 未 後 先 則 使 復 而 祀 X 不 心 之 爲 嘗 明 亦 爲 是 難 守 人 謂 故 所 典 也。 以 之 其 計 利 其 褻 義 亦 後 之 嚴 謂 之

> 其論先 焉,則 意,知 心於 致其敬 人所 獲者 當,又以敬 第 矣。 幾其近之矣。 亦未安也。 民之義 居作虚器者質之,聖人之意可 育 謂 至 第五 鬼神之情 亦 難 以以 矣, 德 鬼神者, 0 何 而 諸 則豊 後 一説皆 遠 以 於 民爲人者當矣。 范氏 敬 説 獲 爲 鬼 鬼 遠 如 謝 後 狀 似 知 神 初 以 神 鬼 以 何 氏 獲 之事 不 亦 之 非 者 務民 神 ? 又 以 之謂 爲 未 IE 鬼 爲 未見 義 第 乃 此 神 日 達 哉? 之義 明 哉? 等 : 爲 淫 程 民 其 或 程 也。 利 子 祀言之, 爲 而 親 所 見矣。 以 子 者 之意 則 其 吕氏 振 之論 若於 以 臧 之 四 尤 前 民 非 文 而 敬 説 ,若先 無謂 之説,庶 則 此 仲 己 其 不 此 先 而 説 亦 文之 遠之 釋 祀 能 等 恐 難 無 善 聖 遠 猶 後 有 爰 所 似 務

2

^{●「}非其」,正德本、正保本作「其非」。

正德本、正保本作「義」,下「誼」字同。

其論 體之而 尤非 氏 氏 樊遲問崇德,孔子答以先事後得, 子之意 非程子之旨。其曰 之意,亦大漫矣。 人事。 全 以義 而不務利,敬鬼神而不近之,非明智不惑者不能也 教之以脩德進業, 其 用 夫子之意矣。 ,亦可觀矣。 鬼神之意,則固善矣,先難 而不求僥倖之福也。 《問知也,曰「務民之義,敬鬼神而遠之」,教之以 · 而 事 程説,無所復論。 不失,豈欲 而 在熟之之云,則優於謝 爲二,猶有新 而不貪無故之利 蘇氏曰: 先難後獲,意若可觀,而 一時見之而遂已耶? 學者之於仁,固欲其終 「於此 其問仁也 孔子之言,常中弟子之過 此 時可以見仁」者 學之餘 則須也 外則蘇氏、曾 也。 ,曰「仁者先難 後 有苟得之意也 獲,雖 曾氏曰: 習 氏 也 也 與? 非 務民 而 氏 楊 身 尹 程 則 亦 後

於水 誠 蓋夫子 或 問 有 之意 而 知 好 之説 ,正爲仁者之於 之者 如 非 何 但如之而 티 : Ш 知 程 已也。 者之 子 至

子乃謂 樂 謝、 説 雖 又以 者觀之, 常爲壽也。 故程子以喜好訓之,又以 説 則 體段之云 夫以下,蕩 子一説,乃以 安其常」,亦言仁者之所以壽 知者必有所樂」,則失之矣。 子謂樂水 有不 其 必 ,諸家之得失, ,蓋亦類 楊氏之説 他 體用分之,如 易置吕 存焉」者,文義 説之或略 「特言其成德之後性 則 耳,非 、樂山 此。 而 亦 以其所謂「以静 氏之説 無止,不類儒者之言, 壽 可 ,皆若過 與 古註、 見其 有 爲安静長久之象,則與吕 於此者 則固然矣,然其失之淺深 何? 夫動 體 而 、范、游 用 意矣。 高 後 亦 静,皆言其體 之分 ·,亦可 曰 : 不可 而失之矣。 可 氣 耳。 而壽 程子 相 氏説皆然,獨 者以 類相合言之, 也。 程 張子 曉也。 以 類 子 類推 티 : 耳,非 所 若其分之, 所 静 此 無 謂「仁 非 則自壽 謂 · 何 戕 矣。 謝 曰: 體 謂 吕氏 賊 以 氏 其 > 安 仁 則 若 張

此矣。 是言 論 盡性 顔子 何 耳 而與天爲一」,則論 之不壽,而 謂 然於聖 日 澤 及 張 萬 子 人之意 世 之初 歸諸天,則 者, 猶 雖 蓋 愈高 粗 以仁 未 不壽 而 太 而 或 猶 遠 病 復有 不 愈深 有 也 壽 實。 疑 矣 及 而 於 其 爲 日

墜,而 其治化又不同 夸詐而 伯禽之王 太公之盛時 俗之變又不 太公之法, 太公治齊,尊賢尚 勢言之,則 ,又必一變而後可以及魯之衰也。 險 而 或問二十三章之説。 其規模氣象 魯平 魯習禮義。 道 齊强 而 同 ,已必 自其 也。 益 矣。 以 而 趨 財言之, ,猶有 功; 魯弱; 末 是以 齊自桓公、管仲 於 蓋 變 而言之,則 薄; 伯 其 而 周 自其本 禽 風氣本不同矣。 則 以 後 魯則 曰 : 公之遺意 治 齊 俗言之,則齊 可 魯 厚 以 以 而言之,則 雖 齊俗益壞之 ,尊尊親親 而 至 地言之,則 日 不 魯 於 則 然當是 衰 無變 薄 周 弱 其 9 公、 雖 亂 而 以 尚 舊 廢

其器 其言 私 避周 説 哉 其 道 齊 皆舉而 又 時 爲 變」,此其說雖 不同」,而凡史書之言太公就封報政遲速者 曰「有王者起, 制 故故 本末之大備也,又何待 有避嫌之病,益使其 觚 非 而非聖言公平正實之本旨也 出於此 公、太公優劣之嫌,則 也。 下, 發, 或問二十四章之説。 變可比於魯之治時者,亦非文義 (雖爲説之多,而終不能無所遺 夫子 諸家於此 廢之。 而 觚 諸家推 之得 語 推之則天下之物皆然也。 ,則魯之治 其 避魯以 似 而 蓋 邦 制 而 取 美,然恐其 家, 各得其 廣之,各得 觚 法於 侯國 亦孰 哉 説 時 魯,則王 一變而後至道乎 乃 不 觚 曰「非二公遺化之 而 能 曰:夫子之意,本 周 得 哉 端 不免 行 成 公之政 不 \pm 此 而 有 一道之嫌 意 於 道 歎 又或 遂 所遺 有意 翕 變之 器之 也 據 但 上觚 若 然 即 以 以 功 則 如 爲 指 果 爲 而 不 Ŧ.

其 所 事 意 謂 雖 就就 IE. 同 名 實 者 以 加 與 不 īF. 可 此 名 以 事 此 相 口 章 明 而 之旨 也 文 意 不 循 類 名 而 蓋 責 E 名

而 别 者 哉 者 不必仁 有 而 之 爲 此 後 則 人,當往救之者 近之。 之 所 理 知 陷 孔 而 或 詳 豊 有以 不 其詐 人也。 氏 害者 也 程 間 復 有 而 知 以 子 有 爲 仁 未 若吴 而 夫人 也 所謂 爲 宰 可 亦得 赴 人 詐 敢 有 欲 我 得 無 井 之墜 之也 以 氏 惟 好 以 以 之也 而 井 故 可 爲 以 以 極 則 爲 言 以 人 有 爲 爲 井 必 不 觀 凡 仁 者 图 爲 井 仁 人 避 仁 然 人墜 然諸 平 人 世 仁者,則 者 當作 井 難,范 者 焉 也 而 有 在 救 井, 0 吾 掩 憂樂之 之 家 井 此 人者 人, 人之所 問 又 日 氏 有 理 亦 0 當 0 何 可 亦 以 所 欺 則 所 欺 往 以 爲 謂 所 而 不 爲 何 者 當 图 從 其 能 待 亦 爲 從 井 憂 至 也 救 有 乘 之 或 往 之 之 爲 知 是 有 ?

又 發 言 亦 字 未 惟 陷 井 陷 深 所 産 此 無 欺 無 之下 謂 有 協 吕 字 救 謂 考 謂 事 图 是 使 固 則 皆 於文 亦 之,而 所 於 氏首尾 陷 理 往 「仁者之心 人,亦未 陷 與 於 非 文義。 脱 未 於 以 也 視 孔 此 引 不 君 義 安耳。 不 非 之 「使之」二字 意 爲 此 使 蓋 子 程、 義 之 其 也 大概 有 爲 語 陷 所 不 陷 所 過 所 陷 則 相 范 於井 待 能 Ż 謂 以 履, 自 正 謝 得之,但 於不義 似 有 智 必 氏 於 不 范 彼證之,則明白 不 者, 人在 中 之説 又謂 知 者 楊 井 也 能 # 氏 如 哉 而 然 皆 之意 是 自 以 中 雖 也 井 知 陷之於 宰 以 陷 所 浙 或 而 而 則 未 之矣,又安 予 所 以 謂 爲 未 逆 孟子之論 口 而 口 大抵諸家之釋 故 之問 行 爲 不 謂 以 詐 以 必 見 不 其 不 見 欺 救 施 不 救 真 言 億 矣 矣。 失 知 不 善 善 有 不 則 術 至 舜、 可 而 者 得 信 謝 爲 則 程 則 而 而 救 此 氏 此 爲 能 不 子 子 其 口

0

六

乃

心

之間 之何? 從之之道 身無益於人,仁者之所必 之實 説 愈 其 竟 之異 者 疑 餘 爲 密矣。 則 後 也 ,猶然挾其 티 : 如 使 同 乎 人拯之, 何 ? 蘇 奈 使 蘇 卒 具 何 氏之説 徒 氏 要以 又歎 不 ? 日 . 以 徒 不 往 知 窮 從 爲 拯 日 仁者之 也。 演,仁 也 視 1 力 0 所 所至而 而 爲 程 事 惟 以 者之所必 井 事 子(下有 君 迫 處 難 父在 而 實 己。 於 而 知 無 有 具 險,則臣子 輕 不 而 説闕文) 日 爲 雖 重 0 也 務 릲 徒 此 緩 則 於 從 殺 外 急 如 爲 無 有 可 其 者 約 以 禮 稱 如

束 者 未 位 所 而 安耳 淺 至 之 於 而 意 愚意 深 有 顔 或 顔 問 不 子 蓋 子之歎 推 同 但 之歎 深 者之 程 耳 在 孟 得 子 此 子 之, 以 訓 章 則 程 則 説 則 約 獨 子 不 又 恐 約 論 爲學者之分 之 異 於 以 之云, 其 以禮 其 顔子之説 此 約 指 章之工 此 爲 義 是乃 也 知 爲 亦 要, 約 同 所 夫 則 而 束之意 謂 皆 次 何 鄙 與 諸 序 爲 知 顔 也 意 約 ? 説 要 有 地 子

> 矣。 文爲 其 歸 則 意 上,又有天道之約, 然日 於是者 其 程 之 何 重 太疎」也 則 而 一複之中 罷 舉 吕 理 ? 子之論顏子 是 以 氏 而 相 趨 約 博 似 措之之事 蓋 之 0 必 禮 文 與 蓋欲 宗 於 反 後 張 程 不 之上,又 約 中 0 生 張 子 禮皆 子 如 者 著 則 此 子 方 以 兩 是 恐 意 太 病 之説 恍 幾若 而 文 説 人事 影 張 密 也 也 有愈 然 施 爲 皆 帶 子 諸 王氏之徒爲 有 禮之文, 之當 然 不 所 形 又 楊 此 深 所 同 謂 謂 容 日 説 矣。 之 得 禮字 示不 至 然 學 似 約約 者 范 簡 愈 得 而 謝 而 出 深 其 謝 謂 程 人 非 史 氏 所 於 而 官 事 其 則 失 則 理 子 謂 以 不 大 爲 其 防 之 之 至 愈 學 V 知

史 記 或 問 孔 孔 子 子 至 之 衛 見 南 南 子 子 使 何 X 也 謂 ? 孔 子 H 日 0 按 諸

也。

⁰ 徒」。 翻 弘治 本、 正 德本

磷

或

意

日

世

正

夫人 所考也。 見之也 雖湼 「,則 夫 見之嫌乎 焉 焉 嫡 ,故大饗廢夫人之禮 小 方之君子,不辱 者矣。 南子之行 是於禮 雖 所 君 所 且 靈公、南子特舉之爾。 而 且 寡 常 或有見小君之禮 謂 而 以 何休 日 衛 然禮家 禮從 行 不 淫 小 無 又 君 0 緇 者, 亂 獨 君 則 所 仕 況 既 宜 日 聞 有 見 於其 願 醜 亦 聖 則 又謂陽 以 、使從俗者,其 於 郊 見。 何爲拘 矣, ,穀梁子以爲大夫 欲 人道 矢之爲 爲 夫 諸 迎 國 與 夫 然其 子 侯 執贄之説,不 一而見其 孔 (寡君 侯 隆 人, 而 曷 拘 子 疑 誓 而 使 殺繆侯 德 願 譾 爲 辭 而 爲兄弟者 티 : 亦 是 X 盛 見, 何 譾 而 小 謝 己 久 禮 亦 攝 也 於 君 雖 將 蓋 不 己 有 也 南子 不得 焉 而 此 禮 辭 不 磨 仕 亦 V 所 竊 知 不 既 非 於 有 行 而 不 其 其 而 也 則 見 與 必 日 澼 得 其 何 不 善 當 非 於 是 夫 其 ? 見 ? m 足 大人 之説 之 者。 幸 日: 티 : 多 也。 矢、 言 以

世

大

四

説,讀 子過物之行,子路 如白水」,「所不與崔 見於傳者多矣,若曰 免 用 誓 何 而 子路之不悦 楊氏包承 之弊 處否 亦有 爲大 故 此 日 也? 否爲泰否之否,如 聲 近 説 . 范 於 邢氏 相 人人矣。 懼非 氏 其 而包承乎小人,以 誓者 云 近,《 티 : 獨 義 爾 小人之説, 引蔡 不悦, 從 者 所以爲 則美,顧 盤 也 是説之行 曾氏言之得 也, 舊 庚》 謨 非常談 不 「所不與舅 説 而 慶者,有 且 説 訓 楊 所 告以 所 何 訓 其 而 也 謂矢言, 氏 然 所 言之爲 將 ? 文義若 今 矢爲 能 獨 平 得亨利 可 矣。 如上帝」,皆 亦 啟後世爲荷 曉 日 屢 見之 氏 遵 : 曾氏 陳 同 誓 言之,若使 故誓之如 有 程子 亦 日 用 心者, 辭 所 理 憤 則 日 引 之 也 **参** 未 諸 激 而 見 也 此 安 是 其 之 有 家 南

或 問 二十八章程子二 説 自 相 爲

物皆 中之 侯氏 賢字 何 甚 舉 高 庸 記 矣其 足 明 録 之意皆善,但 ,則皆失之。 也 ,其曰 有 説 猶 之差焉 履 蓋 ? 不精 自 用 而 所謂至者 無 日 失之。 然無 程 愚不肖者多不肖字,亦其小失也 . 非 子 也 ^ 中 識 티 : 解 過 然謝 乎? 其 彼 不及之地 得 則 之言正 以 諸説 亦 則 未 高 、楊氏所論 曰 其 事 安耳。 明 論 誠 如 事 也, 中 知此 何 耳 物 庸 ? 處 物 其 語 理,則 分 豈 L 至德高 日 曰: 亦多此 録 體 占皆 日 賢知者 用 吾之手 事事 天 則 久 然 字 明 或 類 物 有 多 謂 中 之 有

欲 争 舜 亦 也 病 有 而 所 後 或問 諸 以及人,不待推以譬彼而後施之者,仁 能 不 日 意 能 之 仁、恕之别 博 猶 耳。 平 施 ? 日 濟 必也聖乎,蓋 必 日 衆, 也 何 不然,此 必 射 也 乎 也 聖乎 ? 而 以起下文堯、 後言射之有 Œ 티 : 謂 此 言 凡己之 雖 聖人 必 聖

> 人之所 彼之兩 能 語 故 未 亦 不 後施 也。 在事 則堯、舜獨非 不 意,諸家孰爲得之乎? 博 免以 可 其 反 同 ,反無所當。 施濟衆, 辨 而又 曉。 求諸己而足矣,豈 以己 不 ,然其實皆 之者,恕也 一可" 不能 博施 論 辨仁聖之别 一之欲, 爲聖一 蓋既 日 仁、聖之别 何干 者 濟 聖耶? 能 不與 衆不止於仁 ,然後得 其答仁不足以 不出乎常人一 譬 博 -仁事」 説,亦 此 之於人, 施 (其同 固 其從容勉强 濟衆 雖 今以吾説通其文義 不可 不害於貫 必 之乎 於聖 詳 曰: 似亦太過 博 則 知 曉 而 而 程子詳 ? 施 既 是 其 耳 堯、舜 念之間 盡 爲 濟 堯矣」。 故 亦 通 曰 : 曰「堯、舜 衆,務 之一條,尤 聖者之事 必 有 博施 其 也 矣,然亦 病諸 此 淺 欲 他 學 章 爲 深 但 此 濟 如 之 Ż 聖 之 衆 則 而

●「矣」,四庫本作「舜」。

也。 之術,亦各不同,不可一概論 顔、冉者,亦要切矣,然與此 但使之知其所在而已也。楊氏所引孔子告 用、仁之得名者,善矣。 非此 近取譬,乃聖人直指子貢用力爲仁之術, 之方而非仁,則蓋以爲仁道發用著見之所 有志於仁以下,則爲得之。 氏分博施濟衆爲仁聖之事,殊不可曉。子 不切,子貢以下則又遂失其本文之旨矣。 施濟衆之説,得其文義,伊尹以下則已 仁之爲仁,雖無二致,然聖人所以示人求之 又出其手筆,則或恐其考之未詳也。 已」,此類亦恐記者失之。至以博爲厚者, 實仁者之極功,但不可 此但以章句文義而 (字義,且與前後數條之意,亦不 又如謂 「聖人之至 謂 然謂立人、達人 言,已爲失之,而 必 章之旨 謝氏分别仁之功 如 獨 也。 此 能 而 體 不 後得爲仁 相類。 是 類 范氏 八爲仁 緩 心 非 吕 能 貢 博 而 而 則 而

論語或問卷七

凡三十七章

第七

述而

未然 之謙 則 以 抵 子,作者略備矣,特未有折衷者耳,❶故述而不作。 不敢當折衷之名, 氏之説 語録》之説則未安。 自 此 與 篇聖人之謙辭爲多 也 尹 高 辭 或問 也。 氏之説皆善。 ,其失聖人之意也遠矣。 ,然後爲 楊 首章之説。 謝氏 氏 所 善。 以其 論 而 作《 自託 蘇氏曰: (卑而 然解之云,亦合之以蘇 以爲老聃、彭祖者,疑 티 : 春秋》之意亦 ,疑以此類記之也 於 耻之,故必侈其 程子之解善矣, 自生民以來,至於孔 傳述,此 其論老彭, 則 善。 聖人 然猶 説 大

> 日: 我, 而謝 本意 存諸 言 間,亦不當如此 也。 尹得之,而楊氏過高 蓋皆聖人之所不居 後文意乃足,恐聖人之言,不如是之簡 氏爲差易了,然如其説,则當增 所 説,但言以身處之,自以爲有,而不言文義 以然者 而 諸 謝、楊不 ,果何 得 心者,拳拳服 聖人處此、雖爲自貶、然其 氏 或 説 問 其 過高, 不 理者,不 0 ,推其所自,蓋皆出於古註所謂「人 所指 默 明, 解,固 又不 識 之夸。 耳。 而 待問 膺而 無 子 可 義, 也。 然以 可説矣。 又 不 以 辨 惟程子、范 孰 弗失 審 自 但未知當時立言之 存言者,吕氏得之, 而 得 爲 ... 也。 無疑 得之? 也。 言者,程子、范 一説, 諸説 此外復字,然 辭 也。 二義皆通 티 : 氣 尹 之中,吕 何 奈 不言 共 抑 曰 何 有 揚之 0 爲 而 不 於 而 晦

^{■「}特」,正德本、正保本作「時」。

者誠 之弊 無增 則 陳 復釋 竊 好學,則可 爲言者,乃若自大之辭,與夫所謂 無之,則有 人字,有下當有 無 人之所以處此 皆 有 以 是 通 加 爲 未通者,姑闕 其文義也。 行 庸行之常,非聖人平日 不若 且第 矯揉 玩之,倫類 我 謂 所不 獨 之煩 直 九篇 有 云爾已矣者 以 者,乃其 此字,乃得 通 之」者, 然以經文考之,則 ;於理爲通, 不居爲言,則於文爲 十五章之言,意亦類 可見。 焉以俟知者,其 矣。 自貶之意 就 是 然或者又疑二章 殊 使果 以 如 但言 其 所不居之例 不 而無夸大激 如 所説 相 其 亦可也。 其 不如丘 而其 似 何下 説 前 意 也 此 順 所 則 當 經 而 此 所 讀 揚 故 之 以 聖 古 有 不 而

則

遲

者 氏 又陷於自恕之失耶 以言道 ,果何道也?● 或問三章之説 爲 易,而 難 ? 兀 於 2 티 : 講 者 至 學,則 楊、尹 爲 謂 非 此 顯 得之矣。 非 未 過 聖 知 人 其 則 、之自 無 所 言 乃 謝

> 憂, 則 又尊聖人 而 耻 其 卑屈 之 過 也

複散 之説 又豈 語 不 和 録 識 樂之云則 所以語大聖人之德哉 爲 或 緩,亦異 **≫** 愈也。 其 問 何 節,字義不精,不 四 説 章 乎 矣。 善至 而楊氏蓋其 之 程子、謝 説 又曰 以 日 心 所 氏之云矣。 體 心廣 ·若其 以 程 和 3 進 子 敬 體 德 E 至 内 胖 解 而 矣, 外 以 及 不 范氏 下 而 然 言 此 舒 其 重 楊

久,則 非 實 大 夫 思 未嘗夢 或問 子 而夢者, 以其前 · 所言 也 固 孔子不 之 故爲此説,其 嘗夢之矣。 如 本 何 ? 意 夢周公之説 也 日 爲義 程子之意, 孔子 日 . 則 諸 自 程 精 説 言 子 矣, 蓋 如 不 以 然恐 夢 嫌 何 爲 之 ? 於 初

0

6

道。 四 庫 本作 如

庫本作

大」,正德本、正保本作「夫」。

之 蓋 楊 以 誠 公之 氏 氏 言聖人與 見 爲 日 加 以 非 説 以 其 氏 己 有 以 戲 其 周 聖 : 多變也 但 張 夢 己 夢 事 爲聖人誠不厭 爲説實不同也。 IE 無 時 語 公之事 人因 晦、 藏 子 意 説 見 意 , 而 ,聖人之言, 往,固 古今、 亦 然 之 推 自 不 天 於 厭 自 然聖人誠 有 而又曰 説 爲 健 ,其以夢非真夢 如 可 經 覺其衰之久, 而 能 遠 可 世 知來,凡天地古今之所 言之以及於 復 本 邇 有 有 取 之意 一,爲 義 以 存 通塞之間 時 所 者 河面 下, 、健不息,故夢 似不如是之不 然後無意於經世」,則 賢 而 天 未 焉。 然夢見之云,乃若今人 人存誠 息 喻 辭 似 亦 無 也 而 胡 横 范 意 有 此 此 歎其 氏 ,與程子略 范 泆 所 語 於 ,則其夢治。 人之所 而 日: 耳。 氏 不 而 斯 而 口 有 將 之意, 心 足 文 意 無 乎 以 此 寐 莊 不得 爲 無 其 則 哉? 所止 又不 有 不忘 萬物之 外 也。 夢 相 若夫思 外乎 又 ,夢之 則 下 蓋 復 似 同 方 推 其 胡 謝 夢 是 周 以 此 至

> 爲等 紛 爾。 擾 神情 善學者 不定, 既謹其言動 則 所 夢 雜 亂 而又必驗諸 或 Œ 或 邪, 夢 亦 寐 與 之間 旦

形、會 賓、 守 是 曰: 道 方 水 連、剡注、襄尺、井儀 《大夏》《大濩》《大 目 日 在 義 是,而 者 「,與 也 以 田 曲 不 軍 吾於 若爲父子而 是 失者, 人 或 嘉 意 過 粟米、差分、少廣、商 所以游之之説? 所 問問 日 也 期 君 轉 顔 也。 共 表、 於必至者,志也。 子之事 其 道 據 注 由 、舞交 志之、據之何 爲 六 而 也。 處 得夫仁,爲君 樂 德者,己之所 得 義 事、假借 武 衢 既言之矣。 理 名 日 ^ 也。 之 **>** 0 雲門 ,若父子 逐 也。 總 不 티 : 禽 五 功、 名 違 諧 \approx 既已得之, 左 御 五. 也 五禮: 臣 聲 之仁、 均 也 大 自 射: 何 敢問 而 輸、 也 者, 咸 得 鳴 也 得 曰 白 和 方程、贏 六藝之 古、 奈 君 何 九 夫 鱒、 矢、 大 臣之 何 潛 義 也 而 韶 X 謹 心 者 ? 象 逐

以身體 於其 至矣。 隙 試 序 據,據 後德 據、依 之間 未 游 道 而 則 焉,又皆 不 論 以 盡 漏 、德、仁、藝,人心 不 可 足、旁要 其 中」者,統言 矣。 進 乎 可 可 德者未若仁之可 非 之,則 旨意之大 然其 疎 '易者 游藝之周於外也。 盡乎 據 游, 而 僻之心, 密之等言之,則志道者未 據 曰 日 所 也 人心 語 物 也。 用 其進爲之序,先後疎密,皆 德 諸 H 意 理 之間 而 用 是 類 之所 略 説 以先後之次言之,則志道 亦 後仁 周 其 章之旨 M 所 如 皆簡 無 如 於 名物 心思 不 當 何 必 依,依仁之密乎内 自 日 可依,依仁 世 可 ? 志、 奥 有 而 用 也。 學 動 詳味聖人 無 度數,皆有至理 未 而 據、依、游 人之 日 作 者。 者當 易 而 . 不 其 其雍 遂 無復毫 程 能 日 也 游 如 曉。 而 如德之 子、 此 無 心 兼 是 後 容涵 之地 語 者 蓋 於 今請 張 内 涵 髮 口 藝 前 志 也 子 此 之 外 泳 循 可 泳 存 又 而 口

輕 軍 爲 盡。 之則 之意 道,則 不存 而言 見之 미 日 不至於中 之至,不能 守寸,得尺守尺之説,意味 語 而 奪 趨 0 且 游 以 言之」者,以上文言依仁止於所行, 程、 帥 向 也。 行也。 疎 吕 云者,亦言其當游於 不 而 發其未 其 能 , 亦曰 之言 氏 不 也。 專 張 皆 求 失其 簡 其 道 至矣。 係 至 H 爲 質之, 約,而 以藝爲 而 君 張子之意 盡之意,明 其 念 用 是言 其極,而 和 止 子 大 於 之品 有 依字之訓 范 概 則 此 依仁 也。 日 和 時 不 氏 所 爲 節 也。 對 大 有 不 倍 平 謂 耳。 所 則大者有守 其 之分義者,亦指 理 所 乎 此 善之云 實 略 志 行 而 尤 日 進 或 此 者 涉 深 放 者 言 則 0 説 而 耳。 疎 故 非 此 心 而 亦 諸 以 不 非 存乎 不 所 説 字 爲 則 應 而 以 謝 躬 獨 有 故 據之德 Ž 如 張 縱 如 夫 行 其 事 氏 而 此 子 説 何 過 能 得 是 以 六 小 實 爲 爲 加 础 志 志 未 去 路 是 不 蓺 4 而 可

四

之,則 有所 效 乃 理。 惟 何 餘 氏 幾 謹 其 得,亦於彼 無藝不害爲君子之語 以 於德者,守 () 其 也。 矣, 所 時 以 念念不忘之説善矣, 依 以 之謂 中之中 堯、舜、 所依 無 仁 當 得 所指以 亦不 然 啓 思 爲 也 志者,有思之 止 未 自 耶 無 不 之 其 此文義皆有所不合。 知 恕 可 若《易》所 禹皆 則非 違 ? 爲 所 也。 所 爲道者 曉 其 之 當之, 而 得 至 所 門 矣。 者 自 文義也 今 己, 之 以 謂 甚 ,善矣, 誠 日 主 ,則恐其 矣。 德 精 而 道 以 謂 贵 ,則又慢 而 \equiv 耳, 者 無 而 據德爲 而 古 止 明者, 聖 分管 思 有爲之端也,若之 戴 然謂 蓋 其 以 守 非 果 執 無 天 未 其下 所以依於仁者 所者,亦 不 以 而 何 中 中 履 爲 而 免於老、佛之 示 止 動 有 蓋 不 物 ·, 皆 、又豈 ·庸,亦 地 允執厥中 文所 其 虔 之 所 ·仁則 此 也 之 矣。 謂 所 志 據 所 譬 論 無是 惟 至 止 謂 而 道 皇 哉 而 精 游 於 皇 於 自 之 推 則 後 據

> 其不仁 於藝 體道 張子、 地,則 如游 道者既差,則其二者亦 日 IE 者 抵皆以其已然之效而言, 而 日 日 後 謂 爲之分義 至 似 志道以致之者 尊 説 以 有 其 ,依仁以 稍 范氏之説 未之及也 至親 閑 者 所 未 而已 疎耳 而 依 得 邪 己, 於仁 也 而 成德」者,則亦得之。 初無 則 而 守仁者,意 非若子之依父、妻之依夫、 猶 是 爲正 且 而 尤爲! 所當也, 爲 尹 徒 其 欲 兩 爲 氏 然後可 依之,亦反諸乎身 其 未 切 是 物 則 依 有 當 而求其 也。 物 亦 賢 於 而 所附 甚善 於諸 以 是 可 以 但 其 繋其 乎 耳 及此。 所以 也 據 日 説 ? 然 但 非 德以 「據德 遠 心 亦 其 其 謂 用 楊 甚, 而 若 論 氏 必 所 既 力 而 雖 之 於 以 夫 其 游 以 旧 大

氏 成 或問 人所 以 七 章 成己者, 一之説。 失之遠矣。 日 諸 説 無 他 異 惟 范

或問 八 章之説。 曰 : 程子 至矣,范 亦

弓 識 何 庶 以 者 幾 也 有 ? 爲 奪 功 焉 説, 之太過,復於王之復乃下告上之辭 而 E 但所引《孟 楊 亦非 如《易》所謂 氏 引 是。 據 子》爲未當耳 亦 曰:反之爲還以 有 原始反終者 助 也 謝 吕氏 氏 也 相 之訓 隅 證 不

知

其

所以然者矣。

有間 蓋 病 , 聖人之心, 豈其若是之支哉 用 矣,然終不若程 程 楊氏 或問 子 之意。 舊本仁 九 章之説。 不 人有不忍者, 忍 語之完且 不能,語 曰:程子至矣,謝説 善善 意之 後改忍 也 精 謝 粗 爲 説 能 蓋 亦 有

也? 子路之問 曰 有 所 以言 諸 范 此 或問 曰 説 意。 謝 . 聖 觀 若爲 如 亦皆得 人耳 之,則 蓋此 十章之 何 許 ? 章 之,但 與之 所謂 日 猶 與,不爲 0 以 楊 程、張 與者,正 與,文義 物 知物我之分云者 分别 我對待 許與 孔 之説,無 謂 亦 顔 與 而 通 之 之 言 不 與, (,若孔 俱 同 以 但 處 耳 恐 以 易 何

> 無 而言 子之仕止久速,則其可否之幾,渾然在 與 於物矣。 ,若孔子之天下文明 此章之意 猶 則 止 風 以 動 神化,有 己之從 我 違 不 而

言義 也。 於張 拘 則 義 是 求皆 爲 鞭之説。 之哉? 命 隨 實 而 子、尹 三説 決於義 其高 不言 或問 而 有 蓋此本設言,以明富之不可 不言 此 命者 若曰 十一章之説 F 意 、日則 不同 故 而 命, 謝、楊 矣 此 「,聖賢 設 命 則奈 豊 章之意 然愚 教 以 可 聖 可求者 可 求 之事 有 人 何 意 求 不 則 其 之 以 不 曰 亦 同 寧 也 爲 可 言 110 謝 . 爲 者 屈 義,而 此 哉 求皆決於 程 楊之説 中 其 · 世 己 也 子 水,故 或 以 ? 口 叮 不 曰 求 而 爲 求 以 可 爲 Ž, 發 人言 求 聖 有 不 未 : 耳 律 人 則 者 至 執 T 口

^{■「}謝」,原爲空格,今據正保本、四庫本補

之以不可求者 特迫於聖人而止,迫於聖人而止,則亦有時 豈問其可不可 之,如不可求,從吾所好。」聖人之於利,未嘗有意於求也 是不可求也。 之,不求則不得也,仁義是也。 仁,斯仁至矣。」若富貴 而 蘇氏之説,蓋亦如此。 所守」,蓋得此章之意。 有言 有 如 有未能安者,以是曉之,庶其易知而有信 吾亦已辨之矣。蘇氏曰:凡物之可 命 日 「貴賤貧富,自有定分,枉道以求,徒喪 者 死 生有 ,夫豈皆不言命乎? 哉。 故曰: 以爲 命, 然將教人以勿求,則人猶有可得之心, 高其開闊 富而 富 則 貴 有求 可求也,雖執鞭之士 在天,求之有道, 固 其非孟子則失其旨 中人以下,其於義理 而不得者,有不求而得者, 故曰:「仁遠乎哉? 以其扃鐍。 魏國韓忠獻 不 - 如開 而作矣。 求者,求則得 門發 吾 得之 故告 亦爲 我欲 耳。 篋 公 而

不在焉,則失之矣。謝、楊説亦善,楊氏舊説,引之説,亦可觀焉。曾氏曰:鬼神恍惚,戰疾危殆,斯須或問十二章之説。曰:尹説得之,曾氏

示之以無有也

説 孔 語 子事甚佳, 意最 爲 疎 而 闊 後 皆 復删 不可 去之。 曉 范 氏 正

字,如何? 黑,頎然而長,其於舜也可知,是以三月不知肉味 文王也, ●見其穆然而深思, 見其高望而遠志 樂爲學樂,則 之,則習之三月 味,聖人不當固 曰:孔子之於樂,習其音,知其數,得 史文爲正,而其爲説亦他説所 自有三月字,則非合分之誤矣。 或問: 十三章之文,程子改三月爲 曰:彼以一日聞 未 |滯如此 然耳。 而 忘肉 故爾。 味 蘇 也。 氏 説 其志,知其人。 樂,而三月忘 然以《史記 既 不及,但 亦 故范氏獨 有音字,又 得 見其 之。 / 黝 以爲 蘇 > 考 其 音 引 於 氏

問答之本意耳。謝氏所引王氏之言,夸而不氏盡之矣,但程子并引諫伐之事,似非此章或問夫子不爲衛君之説。曰:程子、尹

^{■「}其」,原作「而」,今據正德本、正保本改

明 之賢,天下孰 遂 齊兄 此 子 間 言 日 蓋 年 實。 而 讓 叔 矣。 而 然 以 自 所 曲 答問 小 此 齊 以 夫子 弟之處 知之矣。 舊義 失其 折 章大體,正 之地 斷 小 蒯 楊 後 惡父子之争者,以爲失旨,亦 而 己本意 也。 則 曲 瞶 氏 知 以 子 爲 所主之正 折 而 當 於 夫 以其父子之争而 夷、齊 貢 無 ,然則前 至第二條始以 耳。 伯 此 不 不知之? 子 然意二子 也。 及 復有怨乎之問 可,是以 夷 最 之不 此句《檀弓》立 二子之疑 之 輒 爲 爲 意,悦 至其卒章,深詆善兄弟之 地 留 賢 此 爲 則於文義之間 意 列則 ,皆得之矣。 其言不能 蓋 ,雖賢 子貢 何 於 牽 所引《檀 瞶 其 雖 耶 新 於 絶之,初不復論 、輒父子,當夷、 蓋 不 而 ? 説之有 文勢之波 孫 由 至 爲 不 其 之説 無 此 . 待 日 聞 所 衛 弓》之説 但 小 起 不 爲或 夫子之 得 君 似失 以 夷、 失 據 乃 可 之意 而 郢 前 耳。 流 曉 出 Z 齊 其 當 夫 處

> 哉? 心 乎 間,其得罪於天 無 衛 激 纖 以 發 ,曉然知夫二子之爲是,非 君之争 過 審 芥之憾矣。 此其所以必 中 其 之行 猶 趣。 未 而 爲 而 理,而 夫子告之如 再問 持 甚 不 是 得 能 而 罪 見 1 無 後 絶 於 感 燭 知所決 於聖 慨 天 乎 其 此,則 激 理 不 衛 一人,尚 平之心 也 發之私 君 也 故 父子 子 貢 問 何 之 之 疑 恕 而 則

是 又 彼 處 所 無 不樂 有 耳。 以 輕 義 間 重 時之或息 ,如元氣流行天地之間 或問十五章之説 明其 一於其 得 矣。 且曰 之者視 樂之未嘗 間 亦 必 哉? 也。 在 \Box 之,亦 其 不 豈以貧富貴 中, 義 不在 夫子言 而 無 則 日 富 乎 以 與 貴 無 異 此 顔 此 聖人之心 於 視 子 賤 蓋 而 處之 之不 疏 如 之異, 即 無 食 浮 當 所 雲,則 飲 改 不到 慕 無時 時 而 於 有 所

^{■ 「}燭」上,正德本、正保本有「以」字。

非聖人 貴者 之也 不足 也。 之富 天 如浮 革百 事 語 見之,不知其 程子至矣, 云,則老、佛之談 而 爵之貴,備 其 也 雲,則 道 於此,方言其視之之輕 ·貴,視其去來,如浮雲之輕」者,亦誤矣。 校勝 耶 萬之言, 樂 且 亦 無所不樂之意也。 ? 亦 耳 聖人視之之輕,亦 不 負 無 亦過 范 然 無 非 則 以 萬 氏 始 何 金革 意 以趙 加 既 而 故 乎 物之富 有 説 耳 爾。 失乎聖言之旨也。 病矣,然必 百 所 也。 亦 孟 萬 系 得 又謂聖人視 能 日 記 爲言,若將與世之富 之語,又於張 以太公云者,推之金 之。 0 者 或本張説 賤、 以 諸 又謂 列 自義理 挾 説 來 謝 未 此 去無 氏 如 此 「聖人於不 以 遽 而 義 何 無 及其 繼 而 而 ? 後樂,又 富 楊氏 所 常 誤 子 衛 觀之爲 貴, 樂之 去來 説 而 君 回 程 之 義 以 中 亦 鄿

或問:程氏學《易》無大過之云,何也?

則皆 然。 矣。 爲 如 辭,則又何 過 日 其 何 0 小 然以文勢考之,恐 此 未知 異。 ? 楊 既學《易》也,不 以 氏 日 爲聖人之未學《易》也,不 其誤 説 然范 所言而 又 謝 而 過 氏 尹 云 高 真 不 皆宗程 爾 而 以 可 應 無 聖人 耶 猶 不如 實 ? 有 氏 爲 至 小過 者 此 日 有 所 彻 0 過 論 范 蓋 應 而 惟 Ŧi. 則 既 氏 嘗 爲 范、 + 疑未 是 以 有 曰 説 謙 大 楊 下

甚 恐 不 未 善、執禮之説、恐 司 必然。 然其 或問 + 日 諸説 七章之説。 1雅素 大略皆通,范、 云者 不 必 得之矣。 ☐ : 然 也 程子 尹 之言,自有 正音之説 雅字之訓

横 也 則 慮 其 尹 所言 氏 非 或問 日 得 0 實 何 之,蘇氏蓋亦得之,而不 十八章之説 而後爲是含蓄之言也。 如天地之生物,而不自知 也 ? 聖人之自言, 日 . 程 非 子至矣, 盛 惡 能 其 德 其 無 八功耳。 之至 不 病 其 讓 者 次

遺意 矣。 引 未 欲累物反之,則未知其所主之安在也 然。 ,樂以忘憂,其主意要重在上字,今乃以 而 發 諸 耶? 極之於無我之事 范氏分好學好道二事,得無老氏損 憤 其 説 而 如 一説 至 謝氏 於聖, 何? 論 不悟其爲聖人之謙 樂以 曰 : 蓋 其 ,其亦誤矣。 忘憂 張 平 子一説, Ħ 者,則 所 論 如 且發憤 真以 盡 辭 此 乎 益之 人 恐 孔 而 忘 欲 子 濟 情 或

亦

解矣。

災變戰伐篡弒之事,於《易》《禮》論鬼神者尤 理,亦少過 佳,而未免有 易言之,然不當列於此 獨神字之説近之。 正亂俗之事則失之。吕氏三字之説皆病, 今日 或問二十章之說。 范、楊三字之説得之,而并 不 語 耳。 四者。 所 偏 若妙 也。 何也? 但此 理 曰 : 四者之間 之神, 曰:程子、謝、 乃鬼神而直以 孔子 日 則 於《春秋》 也。 聖人平日之 聖人固 以 游説 神爲 爲 尹 未 妙 得 亦 而 不

> 必 常言。蓋 非若世人之徒 有 訓 戒焉。 不及是,其 於神 語 圃 反 則 不得已而及之,則於三者 以惑人也 論 其 理 以 ,然其及之也 曉當世之惑,

善者,恐非《易大傳》之本意也。 張子所引顔子之説,乃《正蒙》所謂達善達不 或問二十一章之説。曰:此無異論,獨

得 如 説 則是 夫其上句之説則善矣,而其所論 下 曰:天之生我,而使之氣質清 此 如 以害己 文而言, 或問: ,其死 生德於我 何 ? ,是亦 生禍 則 日 孔 其 子何 矣,豈其不 程子之説 天 (意若曰:「天之生德 福 也 固 以知天之生德 ,而豈魋之所能 有 不 固 偶然者矣,使 Á 如此 知 明 哉 7,義理 下句爲不自 矣, 於 爲哉?」 於我 但 己 日: 昭著 桓 其 也 者 連

^{■「}神」,翻弘治本作「禮」,正保本作「微」

爲自 必之 此 魋 臧 爲 合 謝 不 則 有 至 也 加 於 匡 倉 以 日 不 也 不 下 氏 口 聖賢之 知其 桓 世世 爲 其 是 自 必之 自 所 解 旬 意 尹 人是 如子 魋 譖 必 氏 謂 蓋 也 必 者 日 則予 古 決 愬 之 矣,於孔子、程子之意 辭 又 與 爾 用 也 王 有 臨 以 無 何 辭 子之有 天合德者, 其 者 程 利 未 是 患 是 天其 謝 説 爲 固 以文考之, 直 害 孔 能 理 隨 難 理 氏 自必之辭, 不 欲 矣 不 子之於公伯 但 事 不 有 也 或者爲言,則 以 疑 同 過 聖 其 加 疑 而 故 下,下 於程 矣。 害於 恐非生 爲 廢 分 也 發 賢 孔子皆以 (興行 不自 别 0 則 豊 以 子之言 固 孔 句 天 范 彼 則 得 事考 德 有 寮, 必 皆 子 恐皆 止 命 氏 日 孔 是 於予 之解 而 一之間 所 其如 用 之 假 之, 子之於桓 則 并 自 孟 自 不 程 殊 手 之文意 聖 子 何 未 與 必 必 了其説 者 同 説 則 之云 則 命 之於 之 哉 也 有 生 寮、 也 何 有 ? 德 有 辭 固 所 而

> 宜 行 既 去之,弟 宋,與弟子 聖人之自 亦 害己,然避患亦未 德於予,桓 曰 處之,言各有當, 0 遭伐 深 未 而 程子 嘗 玩 孔子告以 於 樹之厄, 不 子 論 閒 必 斯 一魋其 習禮大樹 日 之詳 暇 焉 如 也 此 可可 此 遂 如 矣。 · 而 不 嘗 語 微 子 所謂 以速 可 之下 不深 也。 何 服 又 然按《 以 微 而 並 矣 此 蓋聖· 去之, 服 行 避 桓 遂之 而 史記 魋 以 患 而 人雖 廢 子 伐 過 不 雖 弟 鄭 彼 宋 其 悖者 日 深 子 知 也 樹 孔 欲 疑 而 其 何 1,學者 天 孔 子 處 不 其 孔 也 日 牛 適 之 ? 谏 子

謝 日 過 、楊氏 而 尹 或 流 氏 問 於 爲 之説 老 無 説 隱 佛 雖 得 之 Ž 同 然其 其實 説 意 也 矣。 所 以 程 游 爲 子、 氏 説 亦 者 張 爲 子、 則 得 恐 之。 范 其

日 誠 或 忠 間 以 程 體 子 用 所 而 謂 言 誠 也 忠 乎 孚信之 信 以 别 内 外 而 何 言

耳。 善 也。 益 然要其 也。 弟之常事 善,但所引行 義 亦 但説 恐亦未免有病 尹氏之説,又若四事 但能博學於文,而又約之以禮,則 曾氏 通 而忠信日 歸 有内外之殊 四四 宿 日 曰 , 卒亦不外乎爲子爲弟之 教之云,又自學文以後而言 有餘力以上云云者,乃 忠 諸 者 益篤 説 也 心 如 則 不欺,信 耳。 何 ? 亦不得 各爲 謝氏三事之 日 者言 0 門 不 范氏 合 而 不妄」, 八爲子爲 用 之意 不 説 常 相 其 行 也 須 力 事 亦 H 亦 其

爲惡而已,非若君子之能有爲也。 人固不可得而見,豈 作用者,特不及聖人耳。 氏、曾氏説亦得之。 楊氏爲太支,然其末句之説亦善。 「蓋其 或問二十五章之説。 人少 而思 無君子、善人、有恒者乎? 見之也。 若善人,則粗能嗣守 吴氏曰: 及其見, 曰 : 曾氏 君子蓋有賢德 則又悦 日 諸説皆 當夫子 成務,不至於 此 而進 耐 外 而又有 善 夫子云 之, 則吴 時 聖 獨 日

> 之與泰 也」,烏 奈何? 也。 繼,則雖欲爲有常,不可得矣。 爲如是之形、作爲如是之事者 此亦妄人而已矣,孟子 二者兼内外、學之所至、事之所能 一長而爲有之狀,未能充實而爲盈之狀,貧約而爲泰之狀 君子哉若人」,凡此類 有恒,雖未明乎善,亦必有 能久乎? ,則貧富貴賤 티 : 無 티 : 絶 所謂 當得 無 無 之稱 有、●上 「雨集溝澮皆盈 也,虚則未 意而 一節終身不易 耳。 忘言。 虚實、 也。 爲之云者, 善 满之名 ,其涸可 約 人,明 而言。 爲之無 者。 泰之分, 乎 若 立而待 耳 本 善 作 約 以 無 者

次必於是,尹 取田不以禮之意 驚衆之云, 意似廣 射宿 之義,小有 或問二十六章之説 、氏操於心以往,皆非所 不 ,然其取義亦疎矣。范氏 而實不 同。 蓋 切; 謝 日 0 暴 楊 此 物之云, 得 無 之 他 以言 爲 異, 多。 造 聖 獨

■ 「無有」,正德本、正保本作「有無」。

取之也、 已矣。 殞身 暴天物者 之得邦家 不絶流、不射宿,皆仁之至義之盡,而天理之公也。 心之發也。 之心,天地生物之心也。 商紂之暴殄天物 則 亦豈 餇 此 得爲天理之公哉! 獸 有不得免焉。 外 ,而於其天性之親,人倫之愛,反恝然其無情 則 則 然於物也 則 固 王政行焉 人欲之私 張 事雖 敬 有祭祀之須,有奉養賓客之用 夫 不同 鳥 於是取之有時。 其親親而仁民,仁民 也。 所 潤 ,然其咈 故梁武之不以 論 魚鱉咸若矣。 而異端之教,遂至禁殺 亦 佳 天理以致亂亡, ,用之有節 張敬夫曰: 血 若夫窮 而愛物 食 祀 ,若夫子之 宗 使夫子 口 則 廟 茹 ,則其 腹 皆 聖 蔬 也 與與 而 以 人 是

之説, 子 張 故無不知而作之者。 同 ,但文義各異,至句讀亦有不同者,然程子 程 而 子 子 小 説 或問二十七 無以 之密 不 略 同。 而 易矣。 也。 義 亦 孔子不以 家復自有 胡 章之説。 正。 尹氏 氏曰: 楊 發明 生知 聖人生而知之,作 氏 小不 自居 曰: 其 謝 意, 同 氏 諸 今乃自謂 亦爲 處 説 胡 然皆 大 氏 無非 得之。 其 意 似 無不 理 不 略 程

> 也。 聖人 也。 耳目所受也。 聖人不能矣。 知 固 從之、識之、知之三者, 亦其次矣。 而作之者 不 夫不爲妄作,在聖人爲不足道 識之,記 得而 有 所 至於吕氏則以 ,又以 從之。 不 而不忘也。 若君子有所未知、 擇善去不善,致知之端也。 知 見聞擇 而 闕之,則誤 范氏 内外並進利仁之事 識之知爲次, 在楊、 爲 知之屬 則不 求 ,然味之則無所不知 作 胡 道 則孔子之知 可 淺深 之 上 從之,效於事爲 也。 間 句 雖 之序, 多 異於生 其説 但 聞 乃 以 多 生 知 見 以 爲 則

往 謝 自其 義 能 \exists 之不善,亦不與 舊 氏 以 爲 已 者,而 進之心 潔己而往日之不善亡矣,故不 得,但文勢差倒 爲 或問二十八章之説。 説 小異,然大意 往 謂 每 耳。 往 出 日 其 於 如 之事 退 有 此 去而 耳。 亦 意 則 如 同 計 若以 似 爲 曰 : 何 耳 度之私 或 非 ? 本 諸説 錯 於中 取 曰 日。 簡 0 其 保 皆善, 也 推 不 此 今日 其 心 之, 夫豈 保 往 於 之 字 其 旧 則 潔 日

之意 其曲 但未見善字之意耳 而後 遽 也, 其與人取善之意,而 得其 日 奏之善,然後使人復歌 彼之善矣。 多能,其於小藝,不待取於人而後足, 和之, ,不掩人善,何以言之也? 抑又見其從容不迫,不輕信而易悦之意。 諸説如何? (詳如: 和 動容周 終 而 或問 而 失之也 則己之所歌 則己之所歌 遽 此,其謙遜 三十一 旋 故必俟其 和之,則亦幾於伐己之能 自 曰 : 然中 章之説,所 審慎 又不掩其善也。然此 亦全章 乃殘章耳,故必使反之 曲 他説 程子以爲 禮 而始和之,則既 終,以盡 處 可知也。 則 非 也。 又并必使反之 謂 日 有 善人之歌而 見其 0 聖 此 然若 意於爲之 聖 人 意亦善, 首 而 人 謙 不失 尾 以 不俟 必 天縱 遜 欲 亦 節 掩 審

或問三十二章之説。曰:程子之意善

論語或問卷七

有人字 審其 當也 不 子,對文而言,自有虚 論 得之,但聖人雖不讓於文,而猶人之説, 於此非謙 者,又非 所輕重, 説,則二吾字不相戾矣,然其於文行之間 爲孔子之自稱,文勢亦不 句吾字,設爲衆人自稱之辭, 矣,其論文意大概亦皆得之,而辭 矣,然曰人於文皆曰 聽 居以勉人,非 訟 必 耳, , 楊氏 然。 所以言聖 則 辭以下,則非此章之旨矣。 下合 亦未 亦未嘗自 似程説, 尹氏 更 必 得 L 有 謂 爲 人 吾勝 曰 范 而 其 實、 也。 至 以 可 字,文意 下 下 論 爲 難易、 人, 句 以 程 過 吕 相 語 人 氏 其 屬 而下句吾字, 人 則 尤 聖,而 意 急緩之殊,故 莫字 也 日 也。 莫字之上 乃 爲 不 或未瑩 進 足。 足,無 疎 之訓 躬 謝 如范 後不 而 活 又此 行 猶 氏 不 E 敢 至 善 氏 更 君 其 爲 無

0

[「]上」下,正德本、正保本有「合」字。

必以 是 互見 於行,言其未之有得 觀之,又見其 言其不能過人,又見其不 自足之心 於文,言其 E 哉 得爲效焉 曲 其 則 折 所 奈 焉 可以 淵 以 何 雖 永, 然 見其 ? 不 及 者 言之中,而 至於如 讓 人, 日 則 汲汲於此 其 0 ,則見其實之難焉 足 未 能 此 見其 此, 前 可 必工之意;且合而 其 以 文 旨意 亦不失其 非 不 而 義 聖人而 難 言 不敢有 反覆 繼之意; 盡 集 也 註 ,見其 謙 能 毫髮 更 **>** 也 出 若 備 蓋

其意 當 能學 之意 不 者 通 則 本 以承聖 ,似以爲雖夫子之誨 或問三十三章之説。 與 不 張子之説善矣。 能聖且仁 之, 同 也 人之誨 則 世人之不敢 若不 者, 耳 論 雖 如 若近 其 范 此 人不倦, 實 氏 曰 : 前 似張子之言 自聖當仁 專 恐 於 程 以 惟 子 然己 不 文 其 自 義 説 所 者 子 不 聖 有 則 未 多 敢 然 所 華

> 言,則 躐者 倦 以 也 實 不可 氏 且自始學以至成 仁矣,亦未見其 矣,果皆可 亂 而 以 分屬 此 尹 不 曉 功施 ,若之何而遽以仁聖之名加之乎? 可謂 聖、 氏 章之旨耳。 居 於 最 其 又以弟子 以 云 人爲仁 爲 名之一 爾 爲聖且仁 得之,但 亦 矣。 所以 他. 非 所不能學者 **一**,殊 ,其梯級有不若是其易以 事,其 是。 學、 謝氏 矣乎 不當雜 不 所以 若 謂 類 病 ? 孟 不 其平日之言,蓋 誨 亦 厭 子 者果 取 若 ,特在於有 又以不厭 所引子 不倦則聖 子貢之言 范氏 何 如 之類 · 貢 世 楊 H 之

於鬼 聞 則禱 聖人之言盡矣,諸家之説當 之,而夫子不從,何 也 或問: 神 者臣 病 以 子 而 行禱 苟 至情 與 須 聞 五. 與之生,君 迫 于 切之所 祀, 禱 也 ? 著 則 於 日 是 爲 禮 矣。 子豈 不安其死, 非 經 以 病者之所 理言 以事言之, 爲 今子路 是 Ż, 哉? 而 則 請 與

則 禱之 禮未 至 其 辭 其 以 矣。 之功 而 語 不屑屑於冥漠不可知之間 言 事 務 誠 然 詳 者 語 似 之所作, 川則 於禱 0 矣 鬼 爲 味 理 得 然 有 ,於是爲備,觀諸《 聖人者。 E : 則非 既 神 語 謝 則 ,然非此 高 則 以 ,則不考《士喪 兼舉 何 之有 諸 意,又未嘗告子路以 奇 氏 此 聖人之言 又 聖人之事,而 至於夫子 也 以 説 合 〈甚矣。 一之矣。 廢 若 彼 無 爲非夫子之不禱 如 章之意,今不 舊文 程 未能 何 日 則 0 子則至矣。 ? 據此文,實夫子之不 又 乃不 而 而 蓋 禮》之過 是 其 易》之《十翼 爲 後 祈 其語 蓋 生 所聞 0 及 教 禱 新 其 有 孔 人 ·擇其 此 人 1 難 意 禱之理也。 意 者。 所以建立 氏 之病 於 ____ ,乃語子 筮之屬 言 每 范氏 亦 而 得 決諸 所當 程 者 似 又 直 之, 子 每 ②亦 恐 重 類 然 以 者 如 皆 出 理 路 複 其 但 不 非 可 人 以 爲 禱 此 於 理 蓋 以 與 於 其 見 不 極 所 聖 無 而 理

氏曰: 禱哉? 譴 哉? 則 神 禱 求 禍 也 夫子 者,言聖人之好 日 言 凡 之佑 聖 怒 固 多 非 福 交 日 也。 述其 楊氏 人平 福之云 禱之爲禮 病者所自 0 未嘗禱 鬼 鬼 無不合於理 尹 神 神 諸説 何 、君父悔 合吉 夫子初無是 之 氏 日自然之誠, 者 也 非正 誠 合 之外 ? 則 則 則 爲 意 M 用 善惡 非 又安得 舉 過 禮 日 則 之論 程 也 而 所 也 耐 . 遷善之詞 胡 同 悪 程 子 · 豊 以 一 以 禱 也 而 子以禱 語 之 ,賞善刑淫 似 則又不當對 張 以 必 雖 施之,其 ,則豈 忠臣孝子 聖人 矣, 語 臣 此 有 説 善 而 禱 子 然 待 己之吉 以 爲 也 矣 亦 之 言之耶 而 切 所 至此 悔 亦誤矣。 解 至之情有 爲 禮 後 謂 謝 過 而 如 鬼 \Box 得 用之, 遷 加 X 合 神 鬼 鬼 加 而 之。 子 吉 善 以 爲 神 復 神 其 而 不 言 之 言 若 有 之 詞 祈 自 且 X 胡

^{■「}一」,正德本、正保本無此字。

也。 又安取 廢者 壯 下 謙 心,天且弗違,而況於鬼神乎? 無所作,豈疾病而後禱哉! 惟君父則可,而又必於其鬼焉。 厚,所以發子路者深矣。 而老,非日月至焉者,其何以如之? 神祇,與人一理,夫子道參天地,誠貫幽顯,仰無所愧,俯 以此推之,後世祀典之失,又豈可勝言哉! 放聖人之立 福乎? 子路所謂 制 猶 上下神祇者, 殆非大夫之所得 盟詛之類 生而知之,安而行之,少而壯 若非其鬼, 而 爾。 獨日丘之禱 張敬夫曰: 然君子不自 ,則是淫 久矣,辭 又曰: 上 祀而已 聖人之 爲 也 禱

往偏主於一事,細參考之,優劣深淺見矣。子盡之矣,他説皆不能出其規模之内,而往或問三十五章、三十六章之説。曰:程

所以 其效,固已失之,而所論之效,又不切於本文 若前説之善矣。 程、張問答,語意 盡之矣。 語聖人。 吕氏不言三者之所以然,而 或問 但所 卒章之説。 謂聖人之時者,非是。 范氏以三者爲德之脩 尤精,至於所以推之,則 티 : 程子、謝、尹之説 則 所 記 非 不

爲庶幾,然以上下文推之,其爲德也,亦或非之義也。楊氏所言,皆非聖人之事,惟德盛

其至者矣。

泰伯 第八

讓,而 爲至 者,見其讓 見其 也? 無所 爲 日 下者,實 固 古 (逃去) 據矣。 一辭,三辭 或 曰:泰伯之讓,無揖遜授受之跡,人但 不 人辭讓 問 由 解 何 不 日 或 其 也 於此 返 ? 日 而 目 爲終辭。 以 何 0 而 己 也,今必求 日 則 何 已,不 以 \equiv 而 是以 以言 一爲節 言 讓之爲德既美矣,至於 不知所以使文、武 故古 \equiv 知 天下讓也。 其 讓 其 其 讓 事 註 之 辭 讓 於 至是,但 爲 爲 以實之, 也; 禮 隱 固 辭, 微 日: 知 讓 之 言 其 有 則 再 也 其 中 天 讓 亦 \equiv 辭 ?

矣,其 其讓也 哉? 蓋 所以 極,而 由 受之而不爲貪,父死不赴,傷毀髮膚而 利欲之私也。 聖孫,爲其道足以濟天下, 於父死不赴,傷毁髮膚,皆非賢者之事 之意,非禮 盛德之事也,然存其實而取 必於讓國 不孝,蓋處君臣父子之變,而不失乎 起 不 則 而 · 同矣。 爲至德也。 ,故泰伯 不可 日 爲至德 其 又 : 非 能 而 讓 先 以 有爲名之累矣,此其 也 隱 誠 爲之,則亦過 티 : 儒 爲此 有 何耶? 矣 是以泰伯去之而不爲 晦 論 泰伯 加 其 逃去可矣,何必斷 其與魯隱公、吴季子之事 之 也。 所 迹 以 多 又 ,使民 天 日: 以 曰 : 〈探其 矣。 下 使名實俱亡 而不合於中庸之德 而非有愛憎之間 太王之欲立賢 太王有 讓 無 蘇 其 邪志而 得 氏 名者,亂之所 則 德 以 而 其 所 廢 成之, 狷,王 稱 爲 中 所 髮文身 長 以 加 就就 讓國 庸 焉 讓 不 7 爲 亂 此 爲 季 使 至 少 至 大 則

二二七

論

語或問卷八

乎? 也。 深自 也 開 哉 義 兄弟 辭 天下 王 治 心 王季之心,但 二事 作 基 耳 必 則 旲 9 也 之言 終身 使其 絶焉 爲 成 曰 : 例之,則 授顯宗,唐宋 뻬 然顯 亦不 則固未 E 其 王 三公」,何 日 此 程子既 德業果與文王不異,則太王之欲 業矣」, 弟 則 無 以 泰 宗、 能 則 謝 黄 門 間 利 伯 亦 以 如 亦 其 嘗斷髮文身也。 氏 玄宗之心,其 言 害言之, 固 顯宗、 何 未 事 曰「泰 又曰: 又曰 也 以 爲 以 朝居矣。 足 古 王 何 ? 爲 至 必 以 有 玄宗 成器以 必 示 泰 曰: 伯 致 德 盡聖賢之心 不 「子貢 斷 固 伯 國 必 知 可考者,然以 則可 髮 不 然 於 革 亦 此 使泰伯 王 天下 (厚薄 文身 恐 足 言 命 亦 王 能 且 季 若 非 以 推 季 泰 漢東 文文王 有 哉 授玄宗, 使紂賢 又 文 論 有 也。 廣 而 伯 天 而 ?!此 聖 王 自 假設 安 叔 海 端 不 下 漢、 之 必 不 其 有 蓋 賢 齊 王 委 7 信 之 能 之 使 皆 倫 文 同 位 以 唐 引 之 以 以

> 説得之矣。 季歷乃邪心矣。大率此爲推本而言,楊氏之

范、 德之云偏 吕亦得之。 或問二章 於内。 之説。 謝氏 楊氏 不 則 日 就 辭 理之云過 費 程 甚 子、 矣。 張 子 於 至 高

矣。 於己者 晁 范、 重 辱 今人蔽於老、佛之説,則 而 詹事 其身 楊 乎 謝、 程 氏 或 1,諸説 ,當問 子 ,則支矣。 問 以啓手足 尹 以達 然之。 氏 此義於程子 皆 爲 之所不及,不其 章 善。 重乎? 不知 爲 之説 티 : 不 吕 楊 虧 其 氏 ,程子 其 是 氏 不 如 以易實爲 所 未 於 謂之禮, 體 何 謂 此 可 至 ? 白禮 戒 得 其 知 乎 慎 禮 ? 日 也 果 死 恐 而 也 者 0 謂 懼 生 日 過 程 之達 禮 無 晁 爲 0 之。 戀 不 爲 日

不敬 何 ? 或問: 則 E 其 此 動 曾子三言, 程 容 伯 貌 子、 也 非 尹 其 暴 氏 之 爲 即 慢 意 脩 也 身 惟 之 恭 夫 驗 敬 不 有 莊 奈 末

亦

何

容貌

順

理

者

句

則

君

子

本

在

於

上

貫

之之之

謂

謂

道

無

本

以

籩

豆

爲

之,此

睟

面

盎

背

氏

其

正

顔

色

則

動

鄙

倍

斯

能

近

所貴 足遠 説當 與 得 爲 容 莊 7,不待 う貴 末節 惟 末 信 也 亦 也 F 之矣 邪 矣。 末 貌 敬 哉 涵養 者 以 矣 色 句 而 平 在 斯 莊 爲君 之例 則 去 非 而 施 其 於 曰 能 以 有 涵 而 可 曰 獨 僞 下,其 設 解 無 本 素 遠 貫 養 己 0 子 不 遠 貴 道 中 本 而 之而 暴 而 不 則 9 於 程 則 百 暴 末 乎 無 所 自 慢 己。 熟 惟 分 屑 是 叔 出 慢 此 精 論 也 爾 矣。 未 誠 屑 守 辭 則 子 ,養於中 有 粗 也 持 IE 嘗無 又 實 苟 何 於 固 之 其 本 各 養 顔 有 内 所 也 儀 本 故皆 不 斯 出 説 末 既 色 本末 爲 素 無 以 末 章 日 能 辭 之間 久 誠 而 器 本 以 出 如 矣 而 遠 氣 則 日 説 也 實 而 於 辭 言 何 數 斯 漏 E 0 也 熟 身 É 故 以 夫 今 言 不 氣 ? 則 倍 則 必 顔 動之中 氏之説 審度以 端 文義 鄙 素 也。 自 儼 存 所貴 不 莊 知 正 色 次,故 形 ",則 則 儼 倍 不 以 以 其 也 於聲。 自 耳 道 便 所 何 近 其 動 有 出 否, 能 貴 也 於 故 無 動 也 此 口 近 所

脩之也 偽妄不 發之也 誠信 之、 今乃 也 者 能 IE 小心 然經 矣。 正之、 信 當 乃 閑 IE 也 情 遠 事 之真 小心 出出 顔 以 邪 在 之事 暴 子 文 0 動 色, 其 而 慢 矜 出 動 審 辭 有 僞 謂 但 以 爲 收放 平 審慎 一之者 莊 端 容 度 氣 爲 自 其 爲 E 矜 出 H 貌 便 儼 以 此 矜 則 動 何 IE 不 莊 心 莊 之 誰 能 以 遠 以 章之 莊 能 則 輕 人 如 之術 得 歟 敬 遠 遠 漏 出 莊 於 忽 IF. 僻 便 近 ? ? 失 誠 鄙 爲 之 夷 暴 説 信 倍 能 違 日 也。 皆 曰 實 也 慢 背 易之態 倍 審 其 出 動 也 遠 容 度 心 也 暴 理之言 出 而 未 此 心少 則 涵 出 日 辭 貌 慢 動 養 口 本 IE 道 則 能 是 氣 不 顔 其 其 有 其 謝 矜 遠 知

當是 道之正 心 此章最先,前章次之,而易簣之事最在其後,乃 見於此者 鄙 也。 色, 而 氏 疵 有 所 而 其 説 胡 倍 未 睟 而 用 時 安知 (視死生猶 氏 將 學者誠能 也 免於浮 面 其 也 了其始 死 盎 二,而見於《檀弓》者 所考曾 力 其 謝 諸 息奄 而言 背 氏 非 爲 畫 説 :躁急: 之功, 盡心於此 皆 奄 夜然,夫豈 子 亦 色 止 人 如 善者得之,但以 僅 自 所 莊 於 云三者皆道者, 何 在, 之 迫 謝 吾 以 也 揚 事 之病 而聲爲律,身爲度, ,則可以不惑於彼 氏 耶 恐 異 眉 施 則 日 教 其 失之,吾 ? 瞬 於己 公坐亡幻 善。 也。 愚嘗考其事之先後 無 目 日 此 沈 之 者 胡 氏 且. 又 暴 語 浸 際 氏 「,似 不 不 不 皆 也 慢 以 티: 醲 誠 心 垂 非 爲 得 但 爲端儼 也 而 不 亦 郁 曾子之疾 即 絶 是 、信 文 而 遽 敬 非 理 時 之 者 者 不 義 責 語 竊 是。 所 理 也、 風 皆 也 楊 論 之 之 其 即 意 可

於 寡 師 ,不幾於 或問 巧 能 僞 顔 矣 子 以 而 深知義 近 問 名乎? 於 不 理之無 能,多 曰 : 窮 愚 矣 嘗 惟 加 問 聞 恐 之 於

喻矣。 然豈 其能 善之不 事 校, 티 : 視天 以下 闕 於此 耳。 問 有包之之意焉 等之失也。 用力,各有所當,不 致,不見可校者也。 9 於 ,信乎? 若顔 過矣。 彼 下 間 謝 而 寡 而 不 然自學者觀 固 能 猶 無 而 説 故 盡 子 寡 間 於 有 意 不 求 故 其言 矣, 티 : 則 티 : 彼 所 蓋 物 以 也 盡 雖 不 心 之 也 如 然或 爲 有 乎 有彼 能 孟 孟子三自 能 但 理 此 非 難。 謂 義 而 可 子 之,則 自 渾 吾 失於 而 肯 彼固 理 之之意焉 犯 所言 以此 固 他 然,不待 亦 洪 一者優 之 問 夫 而 多矣,然豈 人觀之,則見 此 此 隨 氏 不 反,不 誰 無 於 不 廢彼 ,學者反身 意 而 校, 其 曰 : 劣 能 與之 窮 不 得 所至之深 也 自 者 能 矣,然或 非 有愧之之意 吾固 固 如 於 而 校, 反 特自反, 顔子 不 彼 雖 不 日 反 \Box 待 僧 其 多 物 陷 如 也 猶 能 之不 不 我 德之 楊 如 非 淺 言 有 而 於 何 氏 是 能 此 挾 Ħ. 所 臘 而 m

又見 者薄 多聞,故 固 莫 即 其 且其所謂包之者驕也,彼之者狹也 也 非 不待於自 其言足以 是贵 如 於颜 理 此 也。 信 子見其聞 顔子之心 反,今 見三子之氣象,亦善 乎其 其 説 Ė 然 優人聖域也。」如 哉? 非 乎? 知十,曾子力行,故 特 吴氏曰:「子貢 自 曰 : 反 夫 則 也 犯 既 」,愧之 何 而 失 Z ? 不

之未仁 節 之辭,以審 子之稱此,正 而 賤 或 郭? 問 正直之意,非 訂 六章楊氏之説,然乎? 之耳。 以 此言一立,其 其 非 小失 且楊氏又何以 君子不能,故設 也 、流之弊 將 知 有 爲答問 此 日 排 君 : 死 子 曾

之訓 重 可 矣, 謝説 勝 或問 恐或未然。《説 其 然亦未 弘 如 七章之説。 何 可 ? 見 也 道 日 0 遠之意。 自 曰 : 文》以 謂 任 顔 以 程 子 天下之重,爲 子至矣, 謂 弘 蓋此二字,曾 有 包其 決 者 但 毅 一毅字 近 ~,孟 之 任

> 則 者 正 子已自釋之,學者涵泳其言,足 病 不 不能容納之,可 之,誤矣。 必 别下 語 也。 但 也。 擴 楊 大作弘之事 氏 尹 分别 氏疎矣。 最 以 爲 若 識 有 功 其 氣 非 而 弘 或

則有 此,而 感動於 樂,誦 也。 已學幼儀矣。 於三千,其初若甚難 其言近而 箎,樂之一 故必學樂 之先後不同,何也? 舞《大夏》。 節 然詩本於人之情性,有 或問: 有以發起其仁義之良 詩,舞《勺》,成童舞《象》,二十始學禮 人者 文度數之詳, 易 丽 物,以漸習之, 古者之教,十 曉, 今夫子之言,其序 ,又爲易 後誦 蓋禮之小者,自爲童子而 而從容詠 詩。 强者,故其 其 人,故學之所 曰 : 所謂樂者 經 而節 年學幼 至於 歎之間 詩者,樂之章 美刺 心 夫詩之音律 三百 也。 如 未學詩 ,蓋琴瑟 所 儀,十三學 此 誳 得 乃與 至於禮 必先 喻之旨 其儀 以 不可 漸 於 塤 至 漬

也。 廷之上 楊 焉 以 移 闕 氏 勉之所及者,必其甚安且久,然後有以 人淪 習之久而 亦 至於樂,則聲 説 有 日 ',外有以 一筋骸 焉 氏 ,所以學之最早,而其見效反在 亭 亦 日 肌 者 所謂樂非 疎密緩急之異,詳 一,而其 浹髓 得之,但立禮説 而 也; 諸説 之東,而德性 精 有得 至 行 而安於仁義禮智之實,又 其 音 쪰 於 如 於 鐘 焉。 之高 所以 酢之際,得以 成 何 鄉 鼓羽 ? 人, 黨州 然後 養其 下,舞蹈之疾 籥者 曰 : 然後及 ,諸家多 味 之守,得 間 内 耳 而 「則過 之間 程子備矣,然其 有 İ 審 IÈ 其 以 所 思 和 古 大者, 矣。 以 達 古 未備 焉 徐 詩 其 而 堅 於宗 其 可 九尤不 不亂 心 禮之後 有非 定 成 肌 又 也 志 而 其 廟 膚 必 至 也 於 謝 間 德 思 使 口 朝 不 之 服

之所當然者 而 能 或 問 使 之 子 所謂 知其所 謂 民 民 可 之秉 以然者, 使之由 彝 百百 於是 何 也 姓 理 ? 所 之當 日 曰 用 0 者 理

> 謂禮 其 説 謂 其 以 티 : 聖言之本意, 未易得聞 言之切矣。 知之」,蓋不能使之知 也 中 所以 道 所 之病,與 聖 樂法度之外 謝 者 謂 其 人之爲 然,則 氏 道者、老、佛 庶幾乎 則 者 之 前 贵 説 曰 : 篇同 而 莫 禮 有 然 如 況 樂 ! 不 搏 吕 亦 何 自有 於庶民乎? 刑 學者審 噬 原 氏 之 頗 ? 日 政 於 毒 之説 派非不 所 0 中近 覺 皆 天 日 螫 游 謂 處 命 擇 薄 氏 所 如 道 使之知 世 其 之 恶 則 以 而 何 可 如 學 意 其 性 之患哉? 所未 使 已,若吾之所 也 何 者之病 則 日不 民 ? 雖 也。 日 安,易 善 由 學 日 矣, 者 此 程 口 0 矣。 也 此 使 有 非 其

人上者。 取。 則不能爲亂; 善 但 胡氏曰 或 ,其可不思制其産 張、 問 吕 自古亂民,皆其材 好勇而 + 未 章 通 不疾貧 Ż 耳 厚其生乎? 説 胡 ,則不肯爲 力出 如 氏 何 上 衆而迫於飢 ? 旬 抑學者不幸 亂; 小 曰 疾貧 異 : 寒 而 諸 然 者 -而勇 不 也 説 好 亦 勇 口 勇

滋,其不流於亂也幾希矣! 此又學者所當自警也。又不幸而貧,苟無道以持之,自行一不義,取非其有,日長月

王 如 不 此其光也,而 同 坐 以待旦 張敬夫曰 ,然皆是足 或 問 ,夫豈有絲毫驕吝存於其間哉 驕吝之説 方且 周 公以 握髪 以 有警。 叔父之尊, 吐 哺 曰 : 惟恐失天下之賢才 張敬 程子 位上宰,握大權 夫 至矣。 論 周 公 思 事 諸 勳 兼 説 亦 烈

此 明 終 以 孔 諸 氏 無 以 、善非 引 不 爲 不 氏 儒 説 户足 爲禄。 范 之説 王 難 得 或 文義 善者 問 氏 以 得 易得之物,勉學者自强之意也。 氏 之言 進於善, 乎善,言三 不 十二章之説 以 皆 誘 其 一,孔氏、范氏 爲 不 以穀爲善者 人以學 則 無 甚 勉人汲汲於學之意也 不 以 通 得乎 年學,而猶 爲 之意 惟 \equiv 티 : 善善 楊 年學而 以 也。 ,言三年學 説 下句 此 善 爲近之, 章 不至乎善 爲 程子、侯 又皆 不至乎 穀 文 惟 意 ",則 不 難 但 愚 楊 善 同 明 尹 訓 按 謝 則 必 氏

> 方言。 以 就出 説 釋 也,成也。 曉然矣。 穀 有 而 亦以物之成實者爲穀 爲 處之方, 易 未 善 至 備 《爾雅》曰 且上章 耳。 以 則 志 在位 胡 蓋不易得者, 頗 氏 論 「信善爲 謀政 足 之 疾 其 貧 釋 訓 穀。」言善之成 之事,亦 驕吝之失,下章 爲 釋 善 以 歎美之辭 明 胡 之, 氏 類 實 曰 則 也。 也 若 記 文 穀 今 若 意 楊 去 善 世

篤 篤信 善道 道。 以 善其事之善, 善,然後能守死 曰 日 害其 : 信 此言 非 之功, 然徒篤 或 ,則又君子 而 篤 道 問 未 人 信 也 能 而 當當 信 篤 則 守死善道,言寧 能 至 而 日 篤 信 不 之 善道 死 以 0 不能 能 於 好 善其 不 所 子 學,守 好 信 變, 者 不 所 好學,徒守死 學 道 道 取 謂 好學之力。 則 也。 也。 非 更 而 死 其 相 守 死 信 善 善道 蓋 爲 死 好 而 亦 道 能 用 學 則 不 不 而 守 以 爲 猶 何 篤 然 無 何 不 死 足 明 雖 以 不 工 也 也 以 欲 盖 善 平 ?

矣。 雖 所論 也 此 好 學 几 者之所以 篤 티 : 而 信 不 諸説 之意,尤宜 能 推 更 如 以 相 何 善 爲 ? 深 道 用 味 日 則 而 0 其 不 學 可 得 亦 有 無 而 闕 用

罪人也。 見杜密 令,多 謀此 耳。 其 夫,見禮 胡氏曰: 聖人之意。 罰得中,令聞休暢 各有分守,皆不可 夫之職,以至於天子不可 夫子之言,無上下之異,但爲不在 意終不備 所 政 或問 然不止此,又當 上賓,知善不薦 請 東漢季年,黨錮禍起 今密舉志義力行之賢 耳。 稱季 託 而 陵清高以箴之。 胡 + 范氏爲 同 ,不亦萬之一乎?」昱乃慚服。 四 氏 郡 更當自下 劉 章 所 以相 勝 ,見惡不論 論 范氏之説, 人君言,故 亦 知 自 踰 亦 潁川杜密去官家居 左 蜀 糾違道失節之士 · 而推 密 乃 其 還 過 右 隱情惜己,自同 謂 閉 於 前 爲大備 昱 ,如士不可侵大 事 門 日 後 天道,乃 自 如 掃軌。 ,今附 彼 E 此 何 劉 ,而盡 此 ? 位 而 以愚觀之。 ,使明府 勝 太守王昱 寒蟬,乃 每 於 之間 則 下 位 爲 日 謁守 爲 此 備 然 不 得 大

> 當用 昱從善 位 工,以兩處文義考之, 而謀其政者,大概如此 爲定公時,誤矣。 張子、 或問 服 義 十五 固 范氏之説 不 可 章 訾 之説。 若 密之爲 ,黨錮諸賢多陷此失,可不戒哉 但 恐 又説魯樂既 張子 亦 曰 : 是代昱 未 然。 洋 程 洋 子 行 事 盈 師 IE 以 也 ,放棄 摰 耳 夫子 之義 適 不 齊 在 反 其

多,皆 也。 今日 説 説 其旨意之所 如 愚説 ,則有宜 有 或問 楊氏 不出 以 而 云 爲 . 此 不 爲治矣, 此,子之不 不 舜、 與 在 章 與 列則 用莊 ,然以卒章之説參之, 禹之有 治, 愚 生語 如 説 後説 同 以 天下 雖 爲 語 陋 何 恐恐 不 而 既 則 也 與 不 不倫, 有 ? 或 求 與, 宜 得 曰 : 爲 諸 程 則 遂 其 得 如 説 蓋 文 子 不 意 前 見 雖 亦

程子爲尤盡。惟天爲大,惟堯則之,則范氏、或問十九章之説。曰:諸説皆得之,而

爲未安耳

尹 氏 爲得之。 楊氏 似 也 説 雖 密,然氣 象 反 狹 與

文

氣象不相

德所以 伐紂 説 已,故 既有其二,以加倍之力,可取 侯 於天下之心,曷不專守分地 貶武之意,曷不曰文王之德以白之乎? 戎衣,天下大定,此文、武之實也。 述人之事。 嘗言之矣。 如 也 E 而 得之也。 何 年,而紂益不悛 ,獨武王行之,此考之不詳也。 唐 ? 有天下之大半,得 或 爲至德也, 孟 虞之際,於 問 曰 : 蓋文王受命作周,大統 子 舜之天 胡氏曰: 亦 曰:文王服 舜 孔氏於文義若不順,疑 言周 獨 之 ,於是武王 則文、 臣 稱之,他 下 斯 孔子稱武王、周公善繼人之志 衆 所 爲 武 而取其三分之二乎 而 以治 矣, 盛 事 不取 兼舉 爲 順天應人,繼志述事, 孔、范 商 而論者乃謂文王無意於 未集,武王嗣 順 人不 夫文王之時,三分天下 而 猶北 矣。 者, 則善 平 獨 ? 誠 誠 以 得 面 稱 使仲 使文王 (矣,然以 臣節,此周之 此 日 五. 説 而 爲西 范 尼 五. 人, 與 不 無廣 有 聖 胡 氏 人 伯 同 也 人之 取 諸 之 氏 而 何 善善 又 周 服 文

日

之壽 武王 動 ,莫非天理,當文王時。 時 則夫三分之一, ,受罪貫盈,武王安得而不取? 亦不待周 商歷未終,文王安得而取之? 師 而服矣。 向若文王享堯 及

匠

日: 氏曰: 水道 異矣。 而矯 愛其親有深長之恩如此,然而 冕,則以奉其先也; 焉,然夫子亦稱其實而已,未必 私而害天下之公也。若王裒、 就而殛死,故心常痛之,而不忍享其奉也。 意亦深矣。 然禹之儉勤 人之職詳矣。 枉又 禹之若是 孔子之稱之,何 ,使無水旱之災,所謂 或問 衰周之時 不可 溝 以 胡氏曰:禹爲天子有常奉矣,然以 ,乃其常德,未 洫之制 ,禮失其本,而奢僭極矣,夫子蓋嘗救之,然 過 何也? 盡 正也 蓋馬 力溝洫 故稱禹爲法焉, 也? 曰 : 既 不棄天下者,不敢以 則以終其事也。 티 : 平 嵇 見於《周 濬畎 必 水 紹, 胡 日 患 專 則 氏嘗論之矣。 真 爲 澮距 又治 終身不 洪 至豐享祀 與墨者之宗禹 爲 是也 氏 禮》遂人、 111 此 古之聖人 蓋 田間之 仕 是也 ,然其 也。 鯀功 一家之 有 可 華 也 説 洪

論 語 或問 卷九

子罕第九

憂深慮遠,則又不可以多言也,故罕言而已。 至,若多言仁,則學者憑虛躐等,而反害於仁 性之德也,然必忠信篤敬,克己復禮,然後能 多言命,則人事不脩,而反害於命矣。 利,則人不知義,而反害於利矣。命者,天之 者,義之和 言利如《易》之「利建侯」、「利有攸往」之類是 令也,然人當脩己以俟之,然後可以立命,若 三者皆理之正,聖人所不能不言,而其 或問: 也,惟合於義,則 夫子之有罕言,何 利自 也? 至,若多言 曰 : 仁者, 利

答辭

,如程子説

,則亦微著黨人之不知己者

自利爲之,則小人之 也、蓋利一而已。 皆至矣。 曰 0 諸 范氏 説 如 亦得之,而 何 自義爲之,則君子之爲, ? 事 日 0 也。 以 程子、 利爲有二,則非 謝 氏 張子之言 疎

凡三十章

切。

楊説亦善,

但所謂

仁則

未嘗言者,不

而

不

謂哉。 與無得而名,語意之抑揚自不同也。 若程子之説,爲孔子但罕言耳,豈未嘗言之 吕以黨人爲 之矣。尹氏所謂慕聖人而不知者亦善。 或問二 所論合而言之道也,疑亦非孟子意。 章之指。 知聖人者,非 曰:黨人之意,程子盡 是。 蓋 無 所成名。 但孔子 范

黨人不知孔子有一以貫之者,詳黨人語意所

爾。

蓋嘗執御,即

能鄙事之意也。

楊氏

以

爲

恐亦未安,但作自言吾將何執御之意乃安

氏」,正德本、正保本作「説」。

0

之説 人之事 學者之始 前 也 也 不 毋 爲禁止之辭 Z 史記 於必 任 爾。 固 大同 何 無固 其 私 日 或 或 也? 留留 我 意 問 問 八 詳 奈 而 於物,不 者,過 程 常常 無 也 須絶 於固 無 程 子 聖 在 章之説 9 E 子 則 之説 古 何 然經 無 人 事 常以《 以 兀 而 ? 蓋 從 絶 而 私 必 後 者 爲學者 不 容容 通 非 者, 成 傳 日 固 留 身 加 史記 何 於 多 用,故《論 屏 中 日: . 皆 隨 我 我。 絶之 也 以 也 無 道 無 亦 有 復 事 程 》 爲 無 意 所當勉 所 深 順 字、范、 生意 絶 而 蓋意 四者始 爲 者 凝 IE 曰 旨 理 蓋 有所 有 語 滯 矣, 渾 無之 不先 》作 循 必 此 也 日 也 然 曰 尹 絶 於 獨 環 常 本 無之 得 天 毋 意 稱 期 張 所 無 兀 不 在 有 之。 理 子 聖 者 盡 所 謂 窮 事 我 必 毋 而 而

> 精。 以 似 皆 然 善, 耳 爲 范氏 0 謂 自 而 天 始 日 所 意 0 學 理 謂 者 諸 至 四 説 貫 成 之私 者 如 德 則 有 何 9 竭 無 ? 也 四 兩 焉 以 曰 者 端 下 0 則 之 之 張 及吕 與 鑿 教 子 天 其 前 地 其 楊 不 説 四 説 尤 相 條 亦

皆

得

之。

之, 義》諸 之説 我 聖人自 人 當從吴氏 氏 蓋 何 不 則 以 而 則 得與 ,七篇三十二章 後 將 或問 也 固 説 不覺其言之若 死 做 喪 不 著 然 聞 爲 者 則 未 五 然, 後 乃 天 以 斯 以 章 喪 我 孔 文 道 爲 之説 以 之 相 (義推、 而 子 ,我若未 相 理 説 因 死 之自名 對 此 而 已詳言之矣。 而 如 者。 Ż, 而 言 日 則 爲 何 未 可 已 恐當 當 ? 言我若當 、從程 則 定之 孔 決之 死 亦 氏、 以 日 則 如 謂 辭 爲 0 子 辭 馬 孔 聖人 以 匡人 夫 則 曰 : 也 氏 死 也 氏 與 文 後 舊 有 天 義 程 馬 無 則 從 死 説 馬 爲 考 子 後 者 心 氏 奈

以 意 天 可 自 也 處 而 爲 是言則不 可。 讀者不 以 辭 害

也? 疑 以 但 諸 與 宰 當 足 孰是,故 宋,商後,又都商 日 列 夫子 此 據 嚭 爲 論 説 時 子 此 耳。 \sim 君 書 惟 孔 如 請 或 曰 : 鄭 左 果 稱 問 子 子 何 前 尋 兩 氏 ? 傳》: ·自謂 國有 者, 聖 日: 商 後文體 盟,公使子貢 此 存之。 所 何 太宰見孔 蘇 在 日 則 舊 以言太宰或吴或宋 據 多 是官也。 魯哀 氏 0 明 不 説 也。 能 不 丘 諸 説 道 但《列子》多寓 應多 類,故 訓 處 ,是也。」二説 説 也。 公會於彙 而 子,曰 將 洪 皆得之,而范氏爲 語 不 能 (解焉。 鄭氏 爲 氏 將 從 有 在 如 大,今以 日 未備 蘇 固 0 於多能 以 此者,亦非是。 『丘聖者 「宋太宰 氏 皋,吴 有 爲吴,而 子貢 説 訓 言 不同,未 也? 尹氏 耳。 大者, 故 爲 恐或 又嘗 子 殆, 與 太宰 謂 使 邢 日 日 ? 也 太 知 所 然 何 滴 疏 不

> 太宰豈. 既曰 己之心 聖人 言 知 乏,而 則 此 理 其多能 未 正 嘗以 以 多能 必矣,如尹氏 太 辛之心 爲聖耳 觀之 説 尹 亦亦 氏 也 有 蓋 所 以

0

偏

也。

鄙 惟以 欲 獨 不 言之矣。 從張子 然也。 附 夫 爲謙 其 而 或 言 問 有 范、尹 張 無 然程子之説 無 挾 辭, 之説 知之説 知之説。 子 則 以爲 蓋從 無二者之嫌矣。 耳 無 似 程 而 日 於 亦 知之意,文意隔 子,謝 以 : 非 文義 空空屬之鄙 張 是。 子 意 Ž 亦 亦然。 空空,蓋指 不 過 甚 則 絶, 通 楊氏 也。 恐 子

氏之説, 相 與之際,恐不若 或 或 問 問 原 九 八章之説。 於柳子《貞 章之説。 是其恝然也 曰 : : 符》之論 古註得之,范氏 諸説不 0 相遠 聖 人 於天 但 祖 謝

⁰ 「貞」 原作「真」,據四庫 本改。

之名 其 不 其説 必 適 失之過。 至 得之,但 禮之謂 趨 趨 欺 不然,何獨於此 曰 蓋 其 「於瞽者、非 固未 由 但 不見 謂 有 實 謂 楊 蓋 欺 有 所以 加 所 者, 如 氏 不 而 敬 以 以 其 欺 後 焉 廣愛敬者,復與 亦 教 凡 説 以 之意也 得 非但 三者 非 民 此皆自 其 ,聖人心本 是 則聖人愛敬之誠 之云者 不 而 示 見 然耶? 夫見之必 盡 欺 而 加 而已。 加 非 無欺 此 非 敬 聖 語 爲 尹氏 焉 人自然 作 蓋 相 人 則 過 者 心 戾 者 其 不 所 耳。 亦 作 欺 之 謂 何 似 中

得之,一毫之差, 子以 聖人之道,真實 日 約 0 ,尤爲卓絶。 字之義 瞻 程子至矣,但 或 在 問 前 未安 忽在 子之歎, 高 則入於老、佛之門矣。 ,則前 然讀者亦當深造 章 後,爲過不 妙,而苦未端 首 E 四 諸 辨之矣。 言,正 家 及,恐其 之 是 的 説 顔 以 得 處 如 子 道 此 、未然。 見得 今程 張 而 義 何 子 自 ? 理

大率未 未 虚 禮教人,使人有 之學,爲外 爾 性 中 博 當。 之説 者,此亦不 者」,此言得之矣。 者,故聖人謂學,但有爲己、爲人之異, 也 首 高 内、 ,其論極大止中亦 明 安,他皆得之。 文、約禮二事而 尾皆爲善 亦 似 博 大之云,使 吕 亦 在乎 性外之殊 亦 免好高之弊也。 氏 厚 精 贅 竭 言博 H 然。 但 面 語 誘 才 威 用 其 而 之事 也 儀,非禮之本,故 也。 辭 所據守,其所病者 考諸程子之言, 行 夫天下 人 進 侯説 艱 向 事 中 己。 以下 謝氏 亦 奥。當 之間 吴氏之言有曰「 然。 言約 别 之事 非 博約二字甚善,諸 謝氏 處 失之矣,且又以 楊氏 又以 非 也,亦 也。 走 范氏之説 熟 文,莫非 味之乃 耳 謂 所立 張 所 所謂 求 謂 則 以 子 其 乃乃在 謝 卓爾 於 E 窈 所 知 IE 學 善誘, 詳 氏 口 所性 冥 所 性 要 取 無 容 之言 曉 謹 謂 於 其 傳 昏 而 之 此 備 而 耳 乍 之 清 以 默 内 家 節 卓 無 但 章 IF.

未 此 則 贵 胡 能 非 以 不 説 及。 遽 有 博 文 至 所 最 歸 爲 聖人之地 爲完備 自 感 顔 功,但叙其 通 子 自得 但 天下之故 耳。 歸功聖人一句未安。 下, 所學之本末,而歎 則有 而 脱 守邪 不可 曉者矣, 此外 其 蓋

德乎? 臣之事 聖人病則不能無,若其方寸決不以 其事之前也。 詳,今附于此。 氏 而得復從其列。① 所 如 原子路之意,亦得之矣。 或問 使夫子疾病不問,非禮之臣遂以奉終,豈不仰累聖 曰:夫子倘至大故,耳 而 E 十一章之説。 吾 若夢奠則子路死於衛久矣。大夫老而致事, 誰 無家臣者,無禄故也。 上欺」者, 胡氏曰:此必夫子失司寇之後、未致 引 咎 自 曰: 歸 所接 **场**病而懵 己以 范、 有異,必 則胡氏言之爲 深 孔子初未嘗知爲 也 楊最 責子 遂 路 善。 正之矣。 也。 謝 或

記》,亦其 此之意耳。 人君不致敬盡 或 問 好 十二章之説。 高之過。 謝 氏 禮 道 大不 則不 若楊氏所謂取 容之 足 티 : 與 論 有 范 爲一 説 蓋 至 原 賤之道, 句,非 於《史 矣, 旧

> 侯氏説亦得之。 則君子初不爲此而後不行也,況聖人乎?

范、尹 説 之間 蓋 則又以爲《書》有淮夷、徐戎,蓋徐 風 所謂「忠信篤敬,蠻 有」者,聖人之事也,今《精義 箕子也。 菟、樂浪、 出於班 如 俗,至漢猶存,夫子之時,又當純 論之於第 何? 或問 有 雜之,兩失其旨 東 高 夷雜居中國者,亦未詳 固,然恐非聖人之本意也。 箕子居於遼東, 九 曰 : 驪 五 夷之説。 之屬, 程子所謂 貊 而胡 矣。 可 曰 行」者,學者之事 : 所居 九夷之地 氏 明道 邢 亦 》失此語。 以 則 日 乘桴之説 爲 孰 化 州 九 是 古 · 苔、 若洪 。此 其教 君 夷 何 也 子 蓋 張 陋 也 條 玄 H 説 則 子 之

■ 「得」字,正保本作「後得」。

子自衛反魯,復得之他國以歸 變爲小大也。 曰:季札觀樂,以《小雅》爲周衰,以《大雅》爲文王,蓋以正 楊、侯、尹 頌》各得其所。 或 問 得之,其詳則洪 十四章之説 是時王迹息而《詩》亡,其存者謬亂失次,孔 ,定著爲三百五篇,於是《雅 曰 : 氏又言之矣。 范、謝、 游失之, 洪氏

楊亦然。謝氏則過矣。但失不以「何有於我」爲聖人之謙辭耳。范、但失不以「何有於我」爲聖人之謙辭耳。范、或問十五章之説。曰:程子之意精矣,

何 當 在慎 口 是,則無以見天理之如 以 者,其果聖人之本意乎 ? 以 如 爲聖人之意本如是也,亦曰 此 無 獨」者,何 或 日 問問 也。 所 間 范 川上之歎,程 蓋道 斷 謝 也 而 無時 ? 尹 不 氏之説 日 虧 而 ? 是 . 真 不然,唯 言 耳。 子 日 皆 體 人 所 . 欲 其曰「其要只 述其 程 非其 謂 曰 慎 體 子之言 純 其 此 所聞 諸 心之如 亦 獨 道 説 不 則 非 者 者 如 己

> 意矣。 意,其 之言 觀 非 而 焉,而孟子論仲 聖人之意矣。 互有得失。 也 與 此意 然 孟 有 楊 子之言 以 氏 曰 : 尼 異 不 亟稱 乎? 逝之説 荀 子 推 於水,特 稱 曰 : 其 孔 則 極 此 子 老、 則 未 取 見 佛之云, 亦 必 大 有 一時 水必 程 本之 子

表矣。 痛藥之,不使稂莠得害嘉穀 之所好,好 好色而不好德焉,則其不好 氏詳矣。 或問十七章之說。 而 胡氏曰: 難疎; 德亦人所同 好 德而好 色亦 ,則志氣清明 色, 티 : 何所 好 是好 好 諸説 就 而 德 也。 難 而 而 皆善。 未 獨立乎萬物之 親。 是 能深 故色者, 知 其 也。 而 病 胡 不 而

之。 之云 也,予何人也,有爲者亦若是。」此吾 論吾 一,則得 惟胡氏爲盡 止吾往者,皆不得 或問十八章之説。 其文義 善耳。 矣, 其説。 而 胡 티 : 於 氏曰: 往 其 諸説皆善, 者 楊氏進止 大旨 顔淵曰 也 冉 求 乃 「舜何 日 反 在 而 失 其 我 非

人所能與,此君子所以自强不息也。不悦子之道,力不足也。」此吾止者也。其進其止,皆非他

之意也,亦失之矣。
之,呂説未安,謝説不異,蓋又以不惰爲領受之,呂説未安,謝説不異,蓋又以不惰爲領受或問十九章之説。曰:程子、范氏得

不可不深玩耳。 考之,恐不然也。然張子之言自爲一義,亦 進耳。諸説以此爲聖人之極致,以上下章意 或問二十章之説。曰:止特謂惰而不

氏遠矣。

子宋人之譬言之,其支甚矣。得之,謝氏疎矣。楊氏乃爲苗生義,而以孟明二十一章之説。曰:范、侯、尹氏

説,亦有功。得之,楊氏聖人與人爲善,又惡其怠而止之得之,楊氏聖人與人爲善,又惡其怠而止之或問二十二章之説。曰:范、吕、尹氏

得之,而楊氏爲尤密。胡氏本韓文公、宋貫或問二十三章之説。曰:范、謝、楊、尹

脩壞 尋繹者鮮矣。 然以其逆心也,故能改革者鮮矣。 汝志者是也。 之、蘇氏之説,又别一意,然亦 法言者,伊尹所謂逆于汝心者也。 國之治亂之所由也 改則法言爲有功,釋則異言爲無取 情無所牾,故甘而悦之,然以其遜志也,故能 理不可 巽言者,伊尹所謂遜 可 拒,故 勉 胡氏曰 ,此身之 而從之。 干

或問二十五章之説。曰:侯氏得之,楊

偏。 之語未安。 説皆得之,但范氏「耻不若人」、「疾惡之心 脩德也邪? 語自 見可欲,然後用其 爲 幾於小成」二語,不 脩 學者不見可欲,未嘗不加存養,豈 或問二十六章之説。 反 德之事 矣。 謝氏之意亦佳,但「不忘其初」、 前 夫脩德 曾氏以爲子路尚 又 (力邪? 日 而 非 知其所謂 不 所 能 以 楊氏以不忮不求 H 曰:范、吕、尹 進 新 後段 志 於 則 而 日 亦何貴於 忘物,惟 新 語 必 意 則 Æ 其 亦

其 不 耻 此 敝 意亦 衣 善 故 能 車 馬 輕 裘 與 朋 友共 敝 之而

明 謝 此 説 章之意。 舊 或問二十七章之説。 本 有 「欲學者必 後本削之,不識 周 於德」一 曰 : 其何意也 范、謝得之, 句,最能 發

辭氣少和平耳。 或問二十八章之説。曰:謝氏得之,但

爲 此 儒 此 章 章句之差, 也 説 前 章之意,雖 一之失,而未及究所以失者,乃在於此 ,章句之學,其亦豈可忽哉 尤 而程子 也。 有唐 然原先儒之爲是説 或 、問二十九章之説。 然皆并 棣 諸家 論 初 偏 得 權 若 反之云,遂誤以 論權 之深,而 非反經之意 下 小失,而 章 ,皆祖程子之説,而謝 爲 蓋 説 亦不免於通 其説 日: 由 故 則 爲 以 皆有 之弊, 程子、楊氏 非先 程子 此説 下 章合於 所 雖 遂 下 耳。 儒 不 故 章 至 所 知 通 先 夫 氏 以 論 於 此 及 至

> 也。 氏之説 謝 氏諸 惟 説 岳皋 與子 蓋 則 氏 家之説,固疑於 以諸家皆祖程説 也,故必歸之舜、 不盡 氏 亦 范 ,亦何異哉? 天下者,物 陶 輕 説 未 當堯、舜之時 則 氏 之意, 爲詳, 知其 始 ,似皆以 爲 則 而 稱 正 未足以 其 分章 所以失之之端 權 今請 而 也 物 諸 仰 稱 爲 之失, 禹 以以 而 家之所 與賢 矣 以 稱 勝 而 而 其 謝 進 物 天下之重,而 權加諸 然 後 一物而 尤密 與子者,其 所 退 而 而 適 加諸 同 别 以 舍 其 世 得其 也 堯、舜之説 輕 權 舍 所 何 與子,則 與 平 [輕取 取 辨 邪 \Box 賢 平焉 其 者 夫 重矣,而 ? 兩之所 未 於 而 也。 重之 程 反 天下 謝 免 屬 티 : 論之。 子、范 經 之 氏 此 於 意 范 仰 重 在 之 范 几

或問三十章之説。曰:其意則程子難

● 「氏」,正德本、正保本作「意」。

四四四

字也。 耶? 幾章乎? 棣,棣。」「 也,信乎? 曰:不 矣」之句矣,而 義之所存 刊削之迹,必爲所删, 章之唐棣,非 易之説盡之矣,其文義則凡係於上章者皆 來遲」,說者 晉史》爲然也、《 而 棠棣》之一 티 : 范 氏 唐 也, 考之無證,而驗之不合,且又 子 棣,移。」則《小雅》之常棣, 亦 以 亦 何以 漢武之賦,所 姗 物矣。 章,0 未爲 何必 角弓》之詩, 姗 然也。 爲 偏 得 而 曲爲之説, 則未知以此 行 爲 且彼詩文義屬 夫 也。 貌 翩 子所 也? 按《 謂 則 티 : 固 爾 删 亦 偏 有「 以 而 爲 雅 而 或 何 日 . 强 彼之第 ***** 以 翩 不 翩 姗 連, 非 通 非 與 取 爲 姗 其 小 之 大 棠 者 失 獨 無 此 偏 其 反

「棠」,正保本作「常」。

論語或問卷十

凡二上

鄉黨第十

信實 侃 文不 説 爲 於程 史公稱 何 如如 侃 也 有 之訓 功。 字,而 屬 或 或 然亦 何 魯道 問 問 ? 當 日 范氏 不 0 尹 有温: 從明 之衰 序篇 恂恂,或 百 日 氏約 以《詩》《書》訓 説 · 恭之意· 其説 辨 説 諸 在 而 之訓 文》爲得 説 以 泗之間 篇 精 美矣, 爲 中 也 矣。 如 爲 誠 亦 得之。 何 信 楊 明 何 然無 티 : 詁 ? 斷 或或 氏 白 考之,宜 斷 也 楊氏便 詆 曰: 而 所據 以 如 日: ? 切 世 爲 也 是 至 儒 日 誾 温 且 以 皆 之説 亦 便 也 誾 恭 之 作 太 下 爲 原

> 心,非 誾 不盡。 君 티 : 義 正 文》之訓,所以 可 加 後漢 誾 也 如 有 色之語,蓋 何 與 此 ,説者以 何 朝廷 書 ※云: 也 與二 衎 言 曰 : ? ? 衎 但 福 義 日 此其先下大 曰 而 爲 以 . 侃 。」其意亦 爲得 誾 樂, 如 音 争辨之意, 此 侃 由 誾 何? 義 未 自作 卑 誤 也。 衎 求之,亦 及 作 以及尊 衎 以 夫次 티 : 夫 此 衎 誾誾之爲中 爲争 行 耳 得 衎 而 此 也 E 禮 字,不 也 晉 官 未 辨 之容 大 曰 : 如 人 當 夫 岡 口 亦 此 從 作 踧踖 判 直 正 有 加 楊 侃 此 爲 嘿抑 侃 後 兩 是 也 尹 有 存 侃 及

禮 此 説 非 如之説亦 君 得 心 0 之。 或問 聘禮 平 可 體 常 反路 善,賓不顧之説 謝 E 君 説 召 誠 寢 亦有賓不顧之文,鄭 敏 是 於 使 給 所 也 擯 安 揖 諸 詳 襜 恐 説 ,則張子善矣。 如之説 不 無 如 能 此 何 ? 爾 洪 氏 以 楊 氏 亦 爲 氏 0 范 謂 於 儀 躩 爲

得之。

作 趨 攝齊 知 之禮廢,升堂而蹴齊者多矣。 諸 以爲儀也。 有 有 死,皆以 退者,亦誤 而 進 説 中 帳 , 則手 -, 字 退 中門, 如 或問中門之説。 矣,不得復有 何 必 攝齊之説 爲贄 無 謂 宇文周復古,乃不脩贄 ? 爲 所 執與? 闔門 而 謂 衍 曰 : E 棖闖之中,然則門之左右 文也? 笏則 左扉立於其中」是 ,胡氏推之亦善。 言似不足、屏氣不 日 進字 止 古者君 티 : 用 曰 曰 : 以 也。 0 疏門中有闑,兩 指 (而執笏 臣所執 降 畫 趨進 曾 記事 而 氏 ,於是攝 翼 盡 五 而已,不執之 以爲 也 玉三帛二生 或問 階 息 如 何 ,謝氏 齊 音義 扉各 則 曰 升堂 鞠 以 0 旁 爲 躬

受封 日 《儀禮》有受如争,承下如送之文,應 ,天子授之以圭爲 或問 上如揖,下如授,其説 所謂 命 圭 者何 瑞 節,其具 ? 日 不同 0 古者 見 何 於 註 諸 也 與 疏 侯

> 俛仰。 於義 邦君 也。 者誤 何也 之,若如舊 此 此 禮者以爲 圭,而「勃 故《記》曰 禮》所記 而《左氏》記子貢譏哀公、邾子執圭高卑容有 系於其下矣。 説 同 矣。 ? 爲 是 ,於是有庭實 曰 而 故以此 0 安也 也 티 : ,孔子所行者 注 非禮 私 如戦 且燕享之禮,亦自 説 疏 覿 註 庭 不 見於《聘 但爲奉之平衡不高不卑之意 禮有執 色,足蹜蹜如有循」之文,不當 ,何也? 以 實旅 據《儀禮》,當從之,以爲 類 下爲 旅 享禮,註 未 百 百 國君之器則平衡之説 詳 正 下 何 禮》, 如享禮然 曰 : 也 其 堂 爲乎諸侯之庭?」 説 一, 則 孔 疏 不同 胡氏以爲若《聘 當時 子行之,而 與 是 今 不 諸説 則 時 Ħ. 大夫僭 非 · 得 據 不同 正矣。 燕享 不 此 并 論 於 記 顯

■「蹴」,四庫本作「躐」。

出之以 也? 不得 本 口 氏 騮 以 如今之説矣,但其語 何 而 上 黄 黄、白、黑, 知知 自 火克 合 獨 也 出 服 赤 耳。 謂 之, 云表而出之矣。 之飾 此 合 而 或 其 日 類 歸 絺 五 金 成 問 而 0 非 舊説以爲 日 曰 : · 而 於下章 綌 緑 则 则 方之間 以 成 常日之衣矣。 五方之正色也。 何也? 色有正 出 若如舊説,則當云加表 紫 忽以 必有之辭,與下章 赤白合而成紅; 寢衣之簡 以 於表,表 金克木,則白 色也。 以 必 此 則 間,奈 土克 티 : 彼 加 儳之,又似若不倫者,今 不甚明 故諸家 此 表 不可 此説 曰 : 水, 何 皆得其適矣。 而 且此章 何? 以 後 白 以 以 雖皆因之, 則 侯 知 誤 出 青合而 故 親 以水克 木克土, 黄 必 其錯 氏 今説 也。 曰 : 褻裘之文, 膚 黑 有 不得 以 而 明 合 青、赤、 出 則 紅紫爲 成 曰 : 火,則 不然, 後 衣者 而 則青 於 不 古 而 碧 出, 范 自 表 此 E 成 0 0 6 曰 説 何

曾氏 異於夫子者,故獨稱夫子也 下,亦三代之禮耶? 禮,而夫子行之,不得獨稱夫子耶? 謂之君子,則不得獨爲夫子之事,豈自此之後,❸皆三代 見之也。 寢衣其今之被乎? 至纂集而成,必出 首,以君子發之,何也? 0 如如 取 是亦 於善疑 之説, 何? 獨於此章之首,又以君子發之,不知何謂。 有 亦以 티 : 可 哉 一人之手,故自篇首稱之,皆蒙上所 疑 ? 彼宗廟朝廷聘享之禮,三代行之, 是亦 爲 者, 티 : 吴氏曰: 然 耶? 曰 : 姑 誤 也 吴氏之説 存 矣,諸 此 ②此篇雖雜出弟子所記 愚嘗 其説 티 : 愚竊有疑之。 又不知 意其 侯 口 楊 疑 狐 也 氏 食不厭 非 如 裘 狐 被, 何 以 此 貉 章 ? 精 言以 朝 蓋 而 典 既 之

時,何不從也? 曰:食以飢飽爲節,聖人與或問:不時不食,諸説皆謂朝夕日中之

[「]疑」,翻弘治本、正德本無此字。

書例當作大字。 「吴氏」,翻弘治本、正德本無此二字,則本段小字依全

[「]豈」,翻弘治本、正德本作「盖」。

之説 然,燕 醫 勝 如《 范氏 章人 謝 物 之意,讀者詳之。 謂 無 日 日 自 王 施 則 中 食之説,亦 . 量 氏 不 日 周 穿 制 楊 説 待 不 於萬民 得之矣。 如 得之矣。 死無委壑之 耳 居私 >) 所 禮》所言 則 掘 氏 及 言 疏 非 亂 諸 萌 不 若 謂 所 食、恐其 芽,鬱 説 循 之説 若 而 爲 朝 引, 未必 五 理 朝 ()但蒙 如 君 其 飢 邢 勺 穀 者 日 何 子 其 理者 而 而 養强 H 然。 疏 曰: 如 未 不與 ? 之 治 未 有 義 死, 中 所 何 魚 成,果實 所 未 必 故 則 割 既 但 引 餒 日 熟」之類 雖 語 病者則善 爾 爲 亦 食 0 不 食 肉 解 則支矣。 乃終 氣 不 矣。 也 曰 : 矣 當 以 敗 色 Œ 析 激 食 惡 未 奈 穀 而 以 牲 揚 可 朝 則 程子之言 不 最 惟 熟 言耳。 爲 范 臭惡 似 · 得 體 何 也 不 他 胡 主 而 日 説 爲得 此 此 其 食 ? 時 禮 漢 氏 15 遂謂 未 范、 爲 不 與 唯 肉 食 謹 詔 以 以 日 之。 IE 食 下 其 謝 心 則 厚 所 爲 俟 不 雖 酒 疾

> 遂絶 江東 之原 文,則 而不踰 日。 酒 非 無量 聖 亂 皆 以 者, 矩 唯字 在 酒 ,是以如 ,内昏其 之 於酒 但 廢 事 事 連 不 心志。 上文 此。 使 王 其 聖人 導 過 所 學者 以 飲飲 外 而 醉 爲言 以 喪其 無 言 未能 耳 定 戒 威 量 蓋 帝 學 然 儀 胡 命 亦 \Box 者 則 酌 甚 無 氏 肉 至 如 飲 則 圖 多則 説 晉 矣。 觴 班 態 元 得 而 伯 帝永 蓋 所謂 不食, 之。 覆 若 從 之, 嘉 心 解 淫 胡 於 初 所 此 而 氏 此 鎮 欲 亂

矣,諸 其 爲 其 事 此 義 耳 也 也 或問 説 出 如 謝 何? \equiv 祭 楊 日 肉 不食之矣者,言其 説 曰 不 亦 . 出 不 范氏 \equiv 然。 日 所 蓋 謂 出 不 寧 三日 出 不 所 三日 食者 不 以 食 然者 之 記 失

語 范 時 謝 或問 寢 得之, 静默 非言 寢 而 食 曾 时 氏 不 楊 者 言 氏 尤 語 亦 之説 約 通 曾 然抑 氏 如 日 何 亦 ? 食 末矣。 在 \Box 日 非

^{■「}抑亦」,原作「亦抑」,據四庫本改。

亦 何? 如 辭 即 E 此 矣。 其 則 邊。立 而 《列女傳》言: 意 蓋 既 言 事 尹 明 曰 也 語 氏 而 無 失尊卑之序 必 疏 有 范 不蹕,割 爲 不 别 祭 食 尤 之 敬 乎 謝 ,則明無不 菜羹矣,而 約 也 之 ? 也。 「古者婦 尹 不正不食, 祭 得 日 7,則不 日 也。 0 之, 티 : 0 -祭之食 食對 瓜 又以 其 人 待 席 註 之 義 席不 姙 聖 人,寢 不 疏 爲 瓜 則 子,寢 人 正之 也。 繼 必 楊 諸 正不坐。」 而 之, 獨 氏 説 説 不 曰 何 居 恐 敢 皆 必 則 巾 側 未 华 如 得 齊 不 故

禮 服 以 0 月令》 祭 或問 於禮 詳 儺 亦 矣。 之 有 爲 文 朝 禮 也 服 何 何 也 也 ? ? 日 日 0 見於《 夫 朝 周

之説 飲 得 飲 或 問 不 康 可 E 子 飲 饋 既 而 藥之説 不敢當 不 飲 皆 (矣,則 日 在 : 其 范 范 中 氏 氏 所 何 楊 耶 謂 ? 口 尹

> 蓋 衣 可 曰 今未 服 服 . 吴氏 而 則 服 達 服 以 不可 故 以 爲 古 不 拜 服 敢 者 而 嘗 賜 賜 不 而 之 之車 服 拜 飲 皆 耳。 食 則 在 則 乘 E 其 以 嘗 中 而 拜 而 達 也 焉 拜 賜 也 削

《釋 門,侯 句,亦 則 教 非 矣。 爾 朝 通 X 也 聞 文》 則 諸 然亦 之, 或 未安 然 氏 聖人之動 説 問 一讀 拘 禮敬 亦 矣。 贵 唯 也 時 不 厩 至不字 尹 終 之説 之間 辭 焚 謝 氏 不 矣。 無 得 問 而 氏 非至教,然以 之,范 絶 亦 不 捐 哉 急 曾氏 皆 問 ? 句 情 於 未 之 問 馬 氏 蓋 又 如 然 説 每 以 何 必 何 也 , 楊 以 ? 不 將 故 也 爲 教 字 有 氏 未 是 日 \Box 自 以 未 及 而 日 爲 告 問 爲 離 於 陸 必 0 以 者 氏 馬 理 退

焉 而 所 後 或問 正 以 之 爲 耶 禮 聖人席 ? 也 日 不 曲 席 Ī 禮 固 不 正 坐矣,豈 主 矣 人 將 既 坐 必 迎 而 君 又 賜 食 則 IF.

之,而 矣。 請 蓋 慎之至耳。 爲 楊氏 豈先 席 矣 食則 爲 不 賓 或恐 正之席, 既 日 . 升 餕 諸説 堂, 餘 至此 以 主 如 下又精 人 何 然後 ? 則 又 矣。 IE 日 跪 之 0 皆 哉 正 得 席

去聲讀,失之矣。

以問侍食先飯之説。曰:程子第二説

以問侍食先飯之説。曰:程子第二説

文設 亦 於 未 此 · 嘗 不 也 文 或 問 何 東 所 舊説君 首 見 耶 此 ? 亦 視 本 日 疾 其 0 禮 疾 則 者 遷 之當然, 雖 居 南 居 北 牖 非 之下 牖 爲 F 此

時,去 之君 亦 亦 有 不 然實有輕君之心焉,學者於此 當往 耳。 可議者。 或 聖未遠 問 君 ,但致仕之後,或召 謝 命 氏之説, 其言必有據矣。 蓋 召 士之未仕 不 俟駕 雖 日 之説。 人之大 · , 雖 而 其 往 范氏 日 倫,不 或 ,但當觀 則 . 君召 之説 孟 異 子 以 他 之, 恐 聖 之 或

> 之臣 説 矣。 臣 臣 盡 委其 固 不爲臣之義,則非孟 人 疎,不俟駕者,事君之一 加 未 一,但 在 尤 事 必往哉? 臣 、身焉 耳。 君 道 嘗 且. 不 野 不 之 哉? 天下 不 傳贄 曰 可 有 禮 今日不得於齊, 草莽之臣矣,則 非 曉 雖定 義 惟尹 而 所 況 不 也,豈 以 仕 以 夫 當 於 氏得之。 明 外 於 孟 更 君 其 無 子之意,而於義 日 子 作 臣 所 率 朝 而 事 固 此 之義 逼 土莫 君 則 革 固 日 意 則 無適 迫 子 在 想 無 不 世 也 不不 之進 非 或 得 所 也 遽 其 不 獲已 滴 日 百 侯 爲 臣 可 退 楊 市 亦 於 而 氏 是 辭 井 氏 無 益 故 不 而 在 足 説 受, 之 之 爲 有 位 後 召 蓮 亦

本 所 意矣。 歸 則 或問 在 楊氏 我者得之, 朋 殯 友 而 不葬之説 節 其餘激昂 如 何 ? 、恐亦 · 奮厲 日 未 謝 然 非 聖 説 蓋 X 無

❶ 「矣」,原作「夫」,據四庫本改。作「夫」則屬下。

殯者 矣,夫豈然哉? 孔子之家,此殯 其月時而葬之者 ,殯於西階之上,有子弟親戚 無 謝、楊説 標權 時 圃 也。 啓,不復可以行吉禮 若 不拜之意 日 殯 而 而 , 亦恐不 不葬 在遠,及 則

説

也。

小義 何 也 耳,其 ? 或問: 曰 論食不語、寢不言者,亦然。 . 寢不尸 諸説正矣,楊 , 諸説皆同, 而楊氏獨異, 氏之云,其旁支之

非

獨范、

尹爲得耳

過矣。 恐 爲 版 斬 日 亦或有 0 爲 耳 必 未可 未必未必 或 喪服之在背者,此 或問 重 問 服, 知 盛 此 也。 謝説 禮,姑存其説,以俟知 饌 有負版 兼 之説。 功 然禮 齊衰如 緦 者, 而 家説 日: 言 蓋記 何? 乃式 也 大功 范、楊得之,謝 者釋上文式 티 : 之也, 日 以 : 者擇之。 下無負版 胡 舉衰以 然 氏 乎? M 以 氏 服 負 見

或問 色 舉之説。 2 日 . 胡 氏以爲雉之飛

> 説 也 矣。 決起,其止也下投,無翔集之狀,足以 大抵此等處必有闕文,自不必 强 爲 破此

爲惑 人心則善,而 之也,楊氏之説得之矣。 所以 人心 或問 語聖人也。 也。 車中之容。 以爲以禮自 聖人則 此 一章,在或問色舉之上。 曰:禮之所以 非 必 范氏 防,視 爲 其 知其非 必以 惑 禮 如 心 止 此 則 爲 而 者, 惑 戒 亦

0

衰」, 翻弘治本、 正德本作「齊」。

問」下空缺 色舉之説」,原脱 行。 據下條末注 文 補 弘 治 本「或

論語或問卷十一

凡二十五章

先進第十

楊氏 則 且 失之儉,則 放之意考之,則似當以程伯子、謝氏或范氏、 儉 安知當世所謂 爲 説 或問首章之説。 本。 爲 E 爲得 故與其過而失之奢,則寧不及而 如如 何? 其本 儉者 曰: 以夫子所以答林 耳,非正以 티 : ,非昔之所謂中耶 彼亦以奢儉對言, 儉 爲法也。

爲國治民之事者也。文學者,學於《詩》書》也。言語者,善爲辭令者也。政事者,達於潛心體道,默契於中,篤志力行,不言而信者或問:四科之目,何也? 曰:德行者,或問:四科之目,何也? 曰:德行者,

已也。 所貴,尤在於此,非若三者各爲一事之長 德行爲先。 者,考之不審也。 辭。」得之矣。 筆學爲詞章者,學者尤不可以不知也。 人,使各因其所長以 稱字者,弟子自相謂之辭,亦或弟子門人之 何以知其爲門人所記 ,禮》《樂》之文,而能言其意者也。 「凡稱名者,夫子之辭,弟子師前 然程子猶以爲游夏所謂文學,固 誠以躬行實造,具體聖人,學之 諸説 或以 入於道 也? 此章盡 日: ,然其序,則必以 爲 吴氏 相 夫子之言 蓋 謂 夫子 之辭 例 非秉 日 日

日: 字 遂成慈母。」此 騫,以蘆花衣之。父察知之,欲逐後母,子騫啓曰: 一子寒,母去三子單。」父善之而止,母悔改之,後至均平, 此 《韓詩外傳》:「子騫早喪母,父娶後妻,生三子,疾惡子 或集語者之誤 或問閔子騫之孝。 夫子所以 曰 : 稱之也。 然獨取胡氏之説,何 티 : 且 夫子於弟子,未嘗 吴氏詳矣。 母母 吴氏

唯 也 胡 ? 氏 爲 0 可 諸説 通 耳 善矣。 而 於文義皆有未協者,

非禮矣。 言之例,君問 論記言之例,亦學者 或問 盍稱氏以異乎門人,而去對以降於國君者乎? 六章之旨。 ,則稱孔子以對,尊君也; 티: 所當 諸説 知 大夫之問 備矣。 也。 胡 而 氏 亦然 티: 胡 氏 則 記

乎? 協 顔淵 錯 於伯 以爲己之子 爲二子之才不同,而皆夫子之子,侯氏 肅 諒 誤 推 乎 范 猶子,楊 信《家》 然二説之流,一 魚 或問 日 而 故故 楊同 未可 日 各言其 . 有以 語》最爲深篤,而 以弟子之年考之,則顔淵之死先 與 而 詳 以 氏 他 侯異 人情考之,不應 也,今亦安得固 鯉死之言爲夫子之設 以 人 子之説, 後章視予猶父之言 、然以 之子不 則害於分殊之義,一 文意考之,則 范 ·同,其 亦 氏 以 以 守 如 此 説 爲 而 此。 爲 夫 必信 孰 年 言也 0 皆 數之 則又 子 且 是 則 王 視 ? 之 不 以

> 害於理一之仁,亦其氣象之偏 此 句之文 ,惟尹氏爲 得之。 所 發 如 此 故

文而 爲有序耳 同道, 言 或問 意 八章之説。 殊迫狹,必若尹氏之云, 則前已辨之矣。 曰:范、侯、尹氏 楊氏直 然後 以予 得之。 其言 指 斯

其

平 氏之説, 心之發, 心,故不知其 耳。 或問 何獨於顔子 亦 九章之説。 爲過 慟。 之。 聖 而後發於誠 人之喜怒哀 惟 日: 尹氏之言, 范 氏 謂 樂,莫 心 哀 哉? 爲 發 得 非 於 其 楊 誠 誠

路之意,恐 楊 所 氏 以葬顔淵 爲詳 或問 顏 非聖人忠厚之心 淵厚 但 不 其 如 論 葬之説。 葬 不 鯉 得視 之得宜 猶 曰 : 也。 子 者, 諸説皆善 者 蓋 若 以 但言我之 門人之 有 罪 顔 惟

0 以一下。 原行「引」字,據四庫 本删

文意 夫子 係 辭 曰 日 故 一不得視 0 耳。 0 也 耳 也。 之門人也,近 顔 邢 淵 若 疏 深 早 夫子所謂不得視猶子者,乃歎恨之 責 以 以 死,未 門 猶 門 爲分之當 人, 子者,分 必開 是。 爲 則 顔 顔 門 曰 然, 也 淵 路 授 之失, 之 謝 徒 則 如 弟 氏 也 下 何 引 子 亦 文爲 王氏 范氏 自 然 見矣。 之説 無 以 平 . 非 爲 ? 所

之,豈其覺於斯

與

有序 尹氏 當 吕之説 則 日 日 : 「,何 死 以 源 楊 深非 生 漸 源 或 也 而夫子之告子 氏 問問 鬼 亦 自 而 以 學不躐等之説 神 見 見 得 十一章之説。 爲 之。 當 云 日 後 耳 通 0 源 本 源 平 但 源 乃 范以 源 書 然張 自見」, 路, 削 自 夜 見,是 其 則 爲孔子不告子路,而 曰: 子 而 IE 所 知 日 以 兩失之。 爲學者 程子至矣,范、 謂 其序告之也 學 張 則 當 子 至 人 源 之言, 鬼 而 於 蓋學 源 言 死 知 自 生, 故 見 固

> 之事 以 以 通 爲 乎 漸 而 書 而 以 見 夜 漸 之耳 而 而 知 見 易》。 不 楊 足 氏 夫 因 以 知 其 言之矣。 天者, 説 以 則 爲 删 是 此 聖 文 而 而 去

矣,但 矣乎? 必 也。 剛 所 其 故 楊 尤 亦 既 直 謂 則 氏 深 然者,殆不若謝、楊之説 或問: 甚矣。 所論 雜 日: 稍 得 和 盡 非孟子之文意耳 取諸 見矣。 之。 悦 曰 誠 諸説 爲 而 0 不僞之説 置 尤精 不 説之意矣, 静 誾 誾 得 者 如 前 誾 侃 其 也。 篇之訓 何? 者 侃 但以 死 ,於文之義 外 ,於前篇之訓 侃 惟 亦二家之説 曰 子 和 侃 其 古 至侯氏若字之訓 路之死 内 爲 是 、所引 亦 則 剛 近 如 其 和 也。 未 德 英材之語 此 順 ,爲傷勇之 意 有 氣 爲 不 亦 其 然楊 以 無 足 勝 深 皆 亦 見 不 厚 通 其 善 口 Mi 而

或問十三章之説。曰:謝、楊之説,各

過直 害爲 欲 尹 有 氏 所偏 使 尤其。 爲善。 天下之事 , ,蓋其情 以至於 豈懲於 》斯乎? ,皆至於極 性 氣象之不同 熙 豐 此章之説,惟范 弊 新 政 mi 之禍 如 後 此。 圖 前 而 矯枉 則 楊 其 氏

釋 堂,恐其未可專以此論之也。 路所以升堂者,直以結纓 之,聖人之言,豈其若是之迂哉 路 蓋 之勇不懼死者多矣,子路之所以得升孔氏之 夫奚爲 所見與己 推 其意 或問十四章之説。 於丘 而 失之。 不 之門耳。 同 夫程 丽 以 子所謂 不 曰:程子至矣,范氏 范 一事言之,則古 如琴瑟 氏 則謂 與己 ? 之和 夫子 楊氏 不 者 以 論 今 子 譬 子

嬰學之者也。 E 居者 胡氏論之當矣。 或問 與與 老聃同時 以爲出 楊、 墨之學,出 於二子 墨翟 胡 又在楊朱之前 ,則其考之不詳甚矣 氏日 於師、 楊朱,即 宗師 商, 莊周 大禹 信 所謂 乎 而 ? 晏 楊

> 與? 之失,不待於聚斂 明達 於其 子以 求 士 無 是 蓋不自知其學之未至, 之聚斂,是使 而 族之世官,其下則尺 已失之矣。 以 唯不仕則已,仕則未有不仕於大夫者。由 義 忠於公室,則庶乎小貞之吉矣。 於此,豈亦習於衰 者,今乃爲季氏聚斂 或問: 仕季氏而責之也? 漸 「無能 然使其仕於季氏,而 而猶望之以小貞之吉也 靡 以 改於其德,而 冉 蓋當是之時,達官重 至 權 求 此 小學夫子 臣 耳。 而後見,自其仕於季 愈强、公室 地一 世之風,而 曰 : ,於門弟子 而 賦粟倍他 民,皆非國君之有 日 謂 能勸之黜其 何 然則 0 從仕爲士之常 耶? 聖 愈 不自 夫子曷爲不 弱 人以 任,皆爲 日」言之, 中 也 今乃反爲 H 知 亦 故孟 其 氏 冉 可 謂 則 求 非

●「直」,四庫本作「甚」。

氏 得 之 或 問 辟 + 七 章 之説。 氏 日 得之。 : 愚、 魯 之説 楊

説 方之, E 中 云哉。 説 中 范 非 矣。 夫《易》所 亦奚遠哉?」此得之矣。 而 不差。 列則 -受道 有 氏 聖 程 程 間 不 言 何晏 或 尤見 但 子 正 子 從,而 問 是 本 聖人之言未嘗如是之僻而 爲去夫利欲之私耳,雖 諸説 爲 非 至於吕 謂 始 屢 意 頻 舊 若以 之 虚 以 不遠復者 空之説。 也 復 胡 説 如 中 爲 當 耳 氏 諸 何? 之不可 吕氏之説言之, 受道 虚中 矣, 、楊則又 亦 先 生亦 方其不空之時 論 不得 ·受道 II : 之反 ,豈若佛 日 之日 易 且下文以子貢 過 或從之,誤矣。 ,蓋出老、莊之説 空爲匱乏,其説 也。 矣。 復 所 而 . 論 引 氏 以 不 非 然考 州舉學試之 則貨 覺 曰 : 以 文義 知 速念 屢 晦 爲 所 吕氏 程 空爲 殖 與 也 Ĭ 説 然 子之 貨 庸 而 止 矣。 也 殖 惟 之 屢 屢 之 理 人 虚 舊

> 敬夫 其 得 稱 當 失 焉 深 説,以 察。 者 以爲夫子嘗問其與回 則所以進之也遠矣, 可 其 命爲 以警學者較計之私, 日 「子貢 爵 命 之知 ,則恐或 亞 亦其言之一 也 未安耳 孰 於 愈,至此 日 顔 用 子 之間 驗 則 並 張 所

知者 迹 果 爲 問 説 言,各有所 以 循途守轍之説爲善。 爲不循善人之迹 爲善人不循轍 則 者 爲 不 孟 ,則古人已成之迹,皆聖賢 爲惡之迹也 踐 子之言合之於此 ,今考衆説 或問善人之説。 未 或 爲惡之迹 引 知使之以 止,不 其 進 迹 而反之於 則 則 必 或 何 則 或 强 原 亦 亦 爲 以 **三** 則爲 而楊 以 説 其 不 不 本 迹 爲 而 能 能 初, 此 文 心 而 氏 不 牽 費 至 へ觀之, 至於聖神; 踐 文簡奥,有 亦爲得之,但 而 合 唯張子 蹈 所 其 辭 之耶 未 以 之 古 耳。 閫 嘗答 又未 也 垂 X 奥。 及 聖賢 教 E 於後 其 程 是二 或 成 見 或 或 不 所 > 心 子 口 其

安者,故特以程、張之説爲正耳。 世者,又安得不蹈哉? 凡此數説,皆有所未

之譏 用 何? 或連上篇爲説者,亦非是。 前説得之爲多。 前 ,故誤以色莊者繼之耳 説 或問: 曰 : ,下兩句用 是亦皆通 論 篤 尹氏蓋用 之説, 後説 ,然以是字文勢推 ●其擇之亦不精矣。 程 程子説,而上一 子 蓋子張嘗有堂堂 兩 義 不 之,疑 同 句 如

之矣。 以 則可 有怠惰 之偏 恐皆非是。 有父兄,而特救其不合於義 氏爲勇者徒行,而未必中義,則是夫子不爲其 税 耳。 以 人之事,而告冉 或問二十一章之說。 范氏 退 不待父兄之命,則是夫子之告子路 縮 子路勇於行,而 蓋夫子之意,非 前 以 税 有不勇於行之失,故各就其 人爲不可 有 專 有無父兄之心; 以 論 也。 專,而 티 : 爲仁之事也。 其 程子、楊氏得 以文意求之, 事 爲 ,特救其 由 謝 偏 心 專

> 備。 此 而救之。夫子之答公西 者,正與救失之意相戾,亦其 而自 然諸説 爲 之説 或引成 乎? 德達材,②因 故 惟敬夫之言, 華 固 小失也 Ξ 明 其 台 材 本 贵 而 末 篤 可 爲

之所歸 以 所載者。大抵相死之説爲多,亦 也。 得其説爲辨詰之辭, 推之,則不得有是言矣。 子死者, 遺意,然其言尤簡 係,不容於誤也 證 或問: 程子之説云。 且《遺書》所記此 矣。 如 何? 程子之言,顏淵 此 類 曰: 學者尤當 約 胡 或 而 氏 條 以 日 而 明白,今附見於此, 亦 之説,不 不得 其 顏淵若死於夫子之難 疑記録之或誤,徒 嘗 下文搏虎之云 精 親 論之,乃 其 考, 在 所處之正 可 i 蓋 不 如《精 以 考 得 程 大 義 其 爲 子 意 意 夫 其 所 口

^{● 「}兩」,四庫本作「一」。

② 「材」,原作「財」,據四庫本改。

章,其 ☐ : 之也。 抑 之理耳。 其恩義 之分,臨 氏之説 其可不可 敢 所 矣,己又以死從之,則道之在己者,又將 似以計較利害爲言,而不見恩義之所存者。 適 如 而 顔 ,則同 與 謂 调 夫子之死,道之在 路 謝 不 疑 遇 ,則本韓子之説,而胡氏 何 病 然則其於利害,無乃反有所 患 之也。 氏果 爲 敢 害 ,當未行 難 正同。 難 如 吕 尤重,使夫子遇難, 不當言敢 有 胡 胡 何 有 相 氏 敢 氏 ? 相 爲 日 死之理 丽 之説 若以吕 之説 且以 預斷 不在 死 日 程子嘗言之矣。 之義。 0 ,況朋友乎? 不 不可 顏子志道 如 夫子者,既 與 我 此 敢者 氏 何? 章 乎 所謂 楊 臨 之旨 難而 ? 而 ,然似未 氏 顔子之於夫子, 亦已論之矣。 死戰者言之, 所 則 是 始謀 至 ,然後如此,又 況弟子之於師 間巷之人, 論 蓋 不 顔 程子之讀 但見 也。 幸 天 避 子有相 察夫 不 / 喪子 程 審 而 師 티 : 辭 文義 弟子 夫 乎 自 喪之 乎 親 吕 之 子 ? 滅 死 死 則 遠

> 利之徇一 何? 與! 言,則 賊子,欲動其惡,●其不從者,未有能全其 下,或從一事 如前本之正而慤也。 戒,馴習蹉跌以至於從 父與君,不必由、求而知不從矣。 去,而直以 諸説皆善, ,此言 氏、張敬 於 ?邪謀亂心豈不潛消於冥冥之中乎? 或 事者皆非 曰 而已矣, 是以死難不可奪之節許二子矣。 問 . 謝 夫説 如 格君心之非爲説 而 由 氏 未遽有悖 此 楊 、求之爲 以 道 即 亦亦 則 氏 由 也 不得爲大臣 事 人而弑 尤 有 逆作亂之心 求 道 大抵 備 又曰一 所 具臣也 爲 者 逆者多 發 事 然世之順從者,其 乃 謝 然 明 事 條尤 在 高 其 氏 云。 也。 矣 非 奈 之説 於 八身者 此 則 後 況使季氏先聞此 ,此二子 履 張敬 何? 事 意 詳 高 胡 事 本 也。 霜 之外, 氏 弑 尤 矣, 多如 道 乃 堅 夫 日 切 者 然則 所 冰 始也 悉 日 逆以 恐 日 以 Ż 亂 也 此 0 删 不 如 臣 M 督 不 惟 弑 夫

子

胡

庫

見

爲

⁰ 其」,原 作 「於」, 據正 德 本及胡安國《春秋傳》(《四

事 觀 三子爲 孟 一,而又分别 其 所 子 論 未 所謂 識 四 子 道 事道 其 言 體 志, 者 則 粗 ,所指各異,不當引 可 也 以 見矣。 曾點 不 且 著 書》 事 所 以 謂 而 爲 事 以

對

精

有

序云爾

得此 豈遽: 優游 子,敷 經雖 哉? 此 諸 此 操刀之手 了,好學 終始 説 不之許 而 之疑者。 意 涵 未具,然以《書》《禮》考之,則舜之教 論 使之從事 或問 Ŧi. 曰 養,而 然猶 古 者豈 典 則 也 楊 、與夫成周鄉官樂正之法,其所 今得 范 而 子 氏 誘掖 必 氏 可 不 路所謂 然三代 於人民社稷之間, 而 之説 之説 以 慮 以 失,脩 謝 夫未成之才者,蓋有道 讀書 不之讀 夫美錦之傷 、楊、尹 高 何 IE 而 己治 矣。 爲 必 下, 爲 言,則 而 氏皆以 讀 不 既有 人之 夫三代以 遽 書 過 自 乎 然後 似 以 書矣? 桁 用 爲 不 旧 試其未 爲學 乎 不然,何 皆 范 讀者 足 L 聚 則 氏 以 矣。 以 樂 以 蓋 能 胄 於 解 六 夫 事

> 説 侯氏 妄作 聞 殊 特其 諸 不 以爲 知 説 而 好 之高 所謂學《詩》學《禮》之後者 無 社 高 所忌憚 稷 之弊 故 人民 以 ,則其 將 其 固 使 説 口 學者恃 失 學 爲 ·, 則 不但卑陋 卑 猶 其 而 謝 不 聰 之 明 楊 而 則 察 E 猶 尹 也 耳 意 爲

言所志 **=**:]1] 曰: 路 兀 티 : 氣 上,而蔡邕引 及夫子問之,然後瑟音少間 象 矣。 浴之非 十六歲, 洪氏以 何以言曾點 從 或 漢志》三月上 問問 容 也 禮, . 0 而 志 爲子路少孔子九 何以 何 點,參之父也 獨 而 此 尚 以 鼓 之見 爲 高 改 言浴 知 瑟於其間 證 E 遠 浴 几)初除, 是 也 道 爲 之爲 子 ? 也。 沿 無 之 疑,心 則其 官民潔於 日 蓋 ,乃徐舍瑟 韓 盤 歲 以 漠然若無所 不 ,曾參 濯 丛 方三子 李 齒或亞 不累 察 被 爲 疑 乎 夫 東 除 少 序 事 此 之競 裸 一於子 而 流 孔 也 巾 聞 耳 水 身 起 而

六〇

程子 育物 浴 序 累事 明高 居之位而言 之候也; 直與天地 其 夫子 終身焉者,此 IE. 加 日 謂 生 論 (志之所存,又未嘗少出 而 而 ,列子 之事 以 之 遠 風 和 此 慰 物暢茂之時 則 而 耳。 爲 則 也; 爲 而 又詠 亦 悠 冠者五六人,童子六七人,長 與 萬 也 何 安之,然後 固 馭風之事近之,其説然乎? 然遜 何 沂 聖人之志 物各得 夫 或 如 藹 其樂雖若 其氣象之雍 而 以 水、 ? 日 然 歸 又 至 避 也 舞雩,魯國之勝 天 樂 ,若終不肯見所 安 於 加 謝 其 不 地 非 有 此 所 同 春服 氏 而得其 得 止 生物 其 耶? 便是 物 也 以 已而 於 容 其 見 ? 我 爲 之心 道 閒 位 既 内 曾 所 堯 身,然以 曰 : 發 曰 : 之分明 暇,志尚 成 ,蓋澹然若 外之間 晳 也。 其 聖 舜 胸 爲者。 夫暮 何 言 處 氣 人 體 以 中 夫 焉。 世 · ; 象者 之清 對 其 以 少 和 春 言 無 哉 日 9 有 其 時 1 所 既 適 不 將 及 而

> 問 以 古 何 無實之妄言爲比, 倚著,而 例,其若此 日之與之也。 之學,而豈聖人之事 之事者,未始一息之停也。 古 聖賢之心,所以 日字起之,而 赤 已 以言夫子之許三子 答之辭 爲孔子之言, 、我之累,而 爾 可 何 見,而答孟 不察乎此,則亦何 如」之説 者 而 今從之也 尤多 不察 所謂 日 異於佛、老者 何 0 皆無 則其得失亦 》,是以 武伯之言,尤足 夫 也 天 惟 哉 ? 前 地生物之心 也? 求 乎 日 晁 非 日 此 字 . 以 若但 抑 邦」以下,舊説 洪、 曰: 者 也。 異 彼 觀 É 可 見矣。 亦 其 於 胡 \Box 以 求 此 對 見 以 氏 且 直 虚 曠 無 爾 無 皆以 其 見其 他書之 以 無 然 時 意 何 貶 異 無 寂 育 不 日 如 辭 物 平 所 爲 以 滅

⁰ 四 庫本作

語或問卷十二

凡二十四

顔淵 第十二

復,反 發之。 禮也。」炫言如 勝其嗜慾 子告之以 學及此 復之也。 嗜慾,當以禮儀齊之,嗜慾與禮儀戰,使禮 勝己之私 或問: 也。 其説 者 了, 亦 已 克己復禮,謂 此 身得 言情 克之爲勝 之謂克矣, 何 一:「克 此 爲嗜 鮮 復歸 也 · 雖若 矣。 ? 勝 慾 於 能 而此 有 所 何 日 禮 也 : 未 勝 也? 迫,已離 人受天 顔淵 瑩 如 書 去嗜慾,反 己,身也。 是乃 之説 者,然章 曰 : 問 地之 禮 爲 自 楊 而 中 而 句 復 更 身 劉 子 也 之 於 歸 以 夫 儀 有 炫 古

者,天 夫仁。 與 彼 能 離 而 事物之間 於愛,而實爲 不與其仁 下之善將無不 而復於規矩之本然,則夫本心之全德,將 以克己復禮告之,蓋 之學,所以汲汲於求仁,而顏子之問,夫子 心之所以爲規 生,而仁、義、禮、智之性具於其心,仁雖專 \Box 體之間,不能無私欲之累,以違於禮 出 乎此 不復,如 其相去之間,不能以毫髮,出乎 旦用 於彼,則 理之公也,一心之中,二者不容並 而無不盡 人 類倒錯亂 者乎 力於 而 手反復,如 不仁,則自 心體之全德 入於此矣。 由 矩者也。 此 ? 是 也。 則 然己者, ,益無所不至矣。 而 一欲其 本心之全 然人但 臂 出,天下 其 然人有是身 屈 ,禮則專主 是 其· 克去有己之私欲 一身莫適爲主 伸 人欲之 患於不 德 雖大,亦孰 誠 克 在 與 此 欲 則 於敬 私 我, 爲 爲之,其 不克,復 ,則人乎 此聖 也 耳 而 耳 而 誠 7/ 不 特 門 È 有 害 Ħ 天 而 m

二六二

語或問卷十二

之功 所 體 聞 謹 而 即 以 復 可 顔 自 私 所 目 機 當爲者皆 矣。 其 外 而 察之,知其 天之理 該 不 以 以 夫子克己復禮之言,蓋 獨 子 古 之矣。 從 不 自 此 要切 復 在 之質 亦 夫子告以 遺 於 以以 事 内 告之也 然夫所謂 在 而 、禮矣。 餘 出 也 於 我 動 而 身而言, 幾於聖人 力矣。 禮 其 四者之間 而 詳 而 於 非 非 接於 也 間 已 内 盡 兀 禮 禮 克己復禮者,必有條 ,所不當爲者皆 蓋 也 者 且 耳。 夫 則 則 勿之云, 外者 禮爲 故故 非 則 顔 也 贵 己 勿 子 禮 視 故 日 9 由 他 之 復問 以 於是請 也 心之規矩, 其問 非 而 E 人 粗 聽、言、 私 止 何 然則 禮 勿 洞 之 而 也 以 焉 内 也 視 然默 而 所 精 審 外 ? 顔 事 勿 則 於 以 非 聽者 之, 動 夫子告之, 交進 由 是克 子請 斯語 言、 是 禮 得 而 識 日 四者 小 兀 其 與 也 而 目 動 而 者 之爲 問 用 防 己 夫 顔 哉 而 而 者 其 之 謹 禮 足 後 其 無 子 子 力

矣。然 勿與 然熟 其 復於 失 未 此 道 而 是 行 動 於 在 而 有 之, 嘗 謬誤 勉 皆言道 亦 所 图 而 而 何 不 味 是道 念則 禮 處 流 不 於禮之謂 强 不 得 操 可 記 所 ·勿之間 、聖言 害其 則 離 而 遁 哉 ,則仁心自存,有不待他 者,言德 録 以 而 耳 之 真 爲 爲 也 \equiv 所 非爲學者言也 實 蓋惟 無 可 狂 爲 人 以 傳 月 非 日 疑 特 而 所 欲 仁,仁之與禮 道 不 求 不 未嘗 . 己。 道 者 盛仁 不 也 違 爲 諸 毫 自 顔 免 不 在 子之所 忽之 離 説 是 道 自是 口 有 而 一熟,自 如 如 得 而 無 離,是 雖 如 交 難 日 曰「公言克 間 故 克 言之有 是 何 而 進 明 非 如 耳 然 積 非 ? 念 用 平 反 而 曰 有 以知其言之失 日 習 則 力,其 中 得 則 聖 求 似 可 學 異」者 失, 爲 爲 視 禮 儘 失,言之 口 而 者 離 . 己,不 聖 之域 天 疑 得 聽 有 程 可 幾 非 無 理 言能 功 特 子 不 自 道 道 所 言 也 是 自 謹 是 在 雖 至 待 則 亦

天下

誤耶 之,非 己之説 其言仁、禮不異之意 是 者也 無不中 仁,言所 禮 是 歸 禮 敬 之屬 ? 理 與 盡 己自能 若 仁之 視、 於 禮 則 惟 無 立 吕 己 而 理 各以 川 乎 爲 其 真 則 私 謂 聽、 説 謝 天 箴 行 所 慎 復 可 口 無 真 是説 只 物 理 無 禮 則 言 克, 獨 游 疑 則 論 妄 可 有 也。 敬義 非 ,不必學文」,若曰「有 又 其 、動之説 克 以 以 而 楊之説 禮 通之,亦 無 也 凡 精 己 不 對 所 此 時 妄 如 者, 爲 ,所以爲克己 或 己 確 以 口 易 即 方 曰 此 道 過 之 通 縝 發 彼 也 禮 始 而 皆 可 之 者 明 心 密 而 屬 也 禮 後 是仁 -其 以 説 深 廣 失 平 者 贵 如 人 難 而 無 若 偏 中 體 日「克 切 如 人 得 其 無 處 理 明 疑 復禮 欲 胖 日 以 記 矣。 纖 無 處 或 也 而 之説 芥 敬 諸 自 録 亂 亦 己 是 事 非 口 似 疑 克 之 9 若 若 而 间 中 口 盡 稱 以 亦 事 然合 之説 之效 操 禮 恍 則 禮 復 蓋 又 所 歸 吾 則 可 禮 聖 有 惚 謂 疑。 存 爲 不 仁 其 心 人

疑

禮

訓

以

1

若

則

便

序

者深體 持守 克己 之事 理 之中 免過 之德 焉 循 疎 攝 爲歸 . 爲 則 法矣。 所謂 亦 其 理 心 不異。 又但 復禮 之地 則 高 也 日 而 之 而 未 吾仁術之中 而 於 禮 而 力行 又 天,以 規 非 免失之過 制 此 而 何 失聖人之旨。 吕氏專以 者 者 而 日 矩,善矣。 有脩爲效驗之實矣。 外 其 克己之私 規 天下歸仁者,乃特 之,其 亦 ř E 密 我視聽 内 閑 未 得 矣。 矩之可 安誠 邪, 以 嘗以 之 ·,又爲之贊 高 禮 庶 同 矣。 若 以 而 存 文 然 體 幾 爲 言 斯 禁躁 而 日 則 乎。 而 視 必 抑 爲言 有 無 是 而 心 聽 待於 循 言 以 口 果 妄, 古 外 虚 以 范 理 理 如 持 其 未 静 自 在於 其言克 加 ,循之實。 易禮 他 氏 而 此 極 所以 嘗 然 謝 專 則 理 言言之, 之説 天, 求 天下 遽 合 想 克 則 氏 自 禮 以 己 爲 夫 间 以 加

惟尹氏 之故, 非仁 後可 然,特 亂 己,而後復禮以 聖之辨,則又以 僥倖躐等之心。 以告子貢者,似 列禦寇荒唐之論 於分殊之義爲 而 以爲視人如己 是 色 無天序 其 〕,縱耳 至,一 仁,則亦失程子之意矣。 者 所 以 而有意於 庶幾近之,然其 ,則又陷 求夫知之而 天 用 日反本復常, 所聽 秩之 力 尤法。 視物 於 閑 有 博 縦其 於釋氏 · 而 以爲安仁則縱 ,若以聖人爲恃其中心安仁 本, 此 之, 所未察也。 施 者 無 如 已也。 視聽者。 且 濟 則其違 姦聲, 以爲 人, 不 以 衆 謂 頓悟之説 則 則其 以 理 爲 人 萬 非 言 爲 易禮 與 則 至 聖人之意遠矣。 物 必 楊氏以爲先 脩 物等 一於游 又 失 至其所論仁、 目 則於夫子所 積日累月 身踐 加 生於 以 近 所視,而 體, 於吕氏 氏之説 遂 啓 則 無 履 莊 以復 後 其 之當 適 周 克 無 學 而 害 而

或問二章之説。曰:脩己以敬,則私意

矣。 諸説 之對 則聖,及則賢,不及則亦不失於令名,非先以 未安。 後對,記者亦 任,故以臨民 之,蓋將使之以是自考耳。 於在邦在家,無怨惡於我者,則是敬恕之 是 無 羿之彀率也,功力之至不至,則在其 上下,其所以告人踐脩之法,猶大匠之規 已」者,若有少之之意焉。 有當也。 才,故以天下 而仁之效也。 列則 所 楊氏 如 一,何 萌 天理流行,内 張子 何? 矣; 也
 □

 :
 所 ? 亦然。 推 謂 티 : 以其 及物、在邦在家之事告之,亦 歸仁 弟子之問多矣,獨二子有 己 仲 曰 : 夫爲仁非以 以 程子至矣,但無怨之説 能充是對 弓由是守之,可以爲 吕氏則固 外 恕 二子蓋 言之; 則 致,而仁 私 仲弓 夫聖人之言,貫 求是效 度 然顔子 而記 意 以怨爲人之怨己 其 無 可 能 之也 在 所 也 邦 踐 有 我 施 人耳。 是 君 矣。 王 言 請 佐 佐 并 日 矩 過 各 功 · 而 恐 如 徹 mi 事

馬、至 爲 是 聖,豈必克己復禮之云,然後爲可充 爲 限約之也。 於從容自 得 使仲 而 敬 弓因是言也 恕之名亡, 亦 而 盡 也 何 哉 害 其 其 力

者 過 又自 訒 達 贵 則 豊 可」者,亦得之矣。 日: 心有 生之性 心有 知仁之章,既言之矣。 則 人 其 凡 獨 指 仁者之言 爲一 仁之難爲,而 或問: 難 然 事 所覺 古 皆 所覺則 言 平 則仁也」。 謂 其 説,然本文 可 ? 之説,亦不得 人之身而言之也。 謂 是人之言發之不易 爲 易言, 之仁」者, 日 之難 無 可, : 不 後 游 而 謂 且程 今直 訒 者,不謂仁 難 以仁者爲言, 氏 獨 心 蓋知 於言耶? 之説 信 於言仁爲 子以 有 以 加 而侯氏 乎? 所 爲 同 事 穀 覺 如 草木 矣。 也。 又曰 Ż 一之難 種 何 謂 日 無 以 不 且. 喻 之仁 ? 則 五穀之實 是與 0 . 日 爲 一必若 可易矣, 不 心 吾 其言 猶 爲 . 日 難 則 謂 謝 耶? 於 孟 立 而 此, 也 氏 是 不 仁 觀 人 子 也

此

言,則又首章之失也 謂之仁,亦失其旨矣。 其後又以可識 知味

爲

之耳。 引仁 無 若 何 其惡著矣。 以《傳》考之,桓魋嘗欲弒宋公,而 之,特其所謂「先正其心, 也 語 牛 内 牛 知 不 不 ? 同 或問 勇之説以明之,其 或問 有 命樂天之説 在 之所以 省爲言,然其説 有 命、 者 焉,則二説 未粹耳。 今但日 曰 : 1,然隨 四章之旨。 富貴 爲憂 司 而其 張子、謝氏言之矣。 馬之無令兄弟, 當知 其 在 也。 弟子 謝 天者 則 所 亦 命, 與 其 遇 互相 楊 日: 曰 : 頎 、章旨向 亦 語 而貧富貴賤 欲 不 而 、子車 無所當矣。 意疎 有命 而後與之人德」者 推 發明 不 此章本末,范 其 日 内 知 矣。 背 安命 也。 省之意, 亦 何 在 此 似 天之不 與 欲 也 在天之説 不 當然之理 而 蓋告之以 若范、 之同 殺 尹氏 有 則 孔 加 氏 以 知 也 曰 同 悪 子 尹 專 安 雖 得 爲

以

其

死

氏

此,程 然在 之説 也。 不審 此章,又將有 得之矣。 也。 雖 無 仁之説,首章已辨之,今不復論。 曰 0 知 不 益 此言人能持 如如 也。 待 中 其 曰 : 日 子 辨 0 當 而 E 何 取 范 四 胡 而 日 然, 當 無 ? 其 海 説 0 氏 口 樂 所 有會 流於墨氏之失,學者亦 而豊 程 謂 知 曰 : 兄弟之説 他 天 偏 敬 子 矣。 意圓 義 於吾、 倚 易 是亦至言, 則 而 之言敬 如 也。 及耶 樂 無 者。蓋得 何 心 天 間 如如 ? 耳 子夏之言, 者 ? 斷 而 乃 何? 日 ,則喜怒哀樂 無失者, 若曰 諸 而學者所當守 日 聖 此 0 其 一人之事 順天其 其論語 然其 0 日 疎 本 不 奈何 楊 之甚, 不 可 施 謝 張 氏 爲 以 之 子 渾 ? 歸 氏 口

之,且 易 或 爲 傳 問 切於身無 亦 剥 有 牀 何 以 以言膚受爲切 湔 膚 疑 及膚」之言 矣。 而《 象》以 蓋譖爲 於 身也 則則 切 毁人之行, 近 ? 凡 災 言 也 日 釋 0 膚

> 人矣。 言其 愬 之而 欲 曰 : 蘇氏曰: 爲 微淺之意,則 其事變之不同 忿心應之也。 説,亦中不明不遠者之病,學者所 以 難 爲 諸 矣。 事 不行 伸 高 説 譖愬之言。 故以此二者之相爲 出 ,愬者泛然不 之 乎聖 ,然後能 如 此章之旨 明旦 冤 何 與 前 人, ? 遠者,虚以察之,則不旋踵 常行於偏暗 若 浸 潤 明無不照也。 使其 而 事 . 切 亦 唯 何 本 范 於 非 楊 有 不 以 而 氏 身, 異 實 所 氏 隘 反對 譖 堯 懲、 爲 迫 則 而 而 者, 愬 得 而互言之,見 舜 其 亦 譖 若以膚受爲 無 當當 不 蓋 ? 不 者 耐 不 所 而 至之説 深 得其 有 足 行 遽 蘇 售 亦 戒 所 氏 不 以 然 惟 信 而 聞 也 之 足 惑 矣 極 察 不 而

2

□」,四庫本作「入」。

❶ 「□」,正保本作「至」,翻弘治本同且無下「及」字。據曹類藥》卷九、汪應辰《文定集》卷十六(俱《四庫全書》本),當作「爪」。

哉 謝氏遠字之説,亦有 之,而又下文所 殆不類其平日之言 至,若 此 不能 可 以 察 談之以 而 釋,於文 辨之, 可觀 也。 爲 高 則 解意 吕氏 ,然恐不若蘇 前 又安能 無 語、 義皆 可 使之不 愬二字得 行之 不 氏 可 實 曉。 楊 0 至

去,何 兵矣。 其簡教 失其 必不得已 目 上,死其長,如子弟之衛父兄,手足之 之可去,何也? 可可 0 制 叛之心,所謂民 時 或 也? 使制 其 ()使民 問問 有是二者,則 則 而 : 梃以 倉 里,薄 去,則兵或可 有 厚實 章 勇 撻秦、楚之堅甲 以序言之,則食爲先 曰 : 之 其 줆 而 説 信之者也。 賦 民 食足而民信,則 知 足 食矣。 斂 以信事 方 其 無 が,使民· 則 也 詳 戏備: 比其 其 可 有常産 利 曰 : 티 : (上, 而 得 兵 飭 什伍 矣。 聞 食之可 然則 民 而 捍 親 無 足 而 平 以 理 故 時 頭 其 兵 欺 於 不 ?

> 謀計 也。 無信 言之, 者 意。 得 死,而不失其尊君親上之心,則其 諸説皆得之,而程子爲尤至。 立乎天地之間。 免者,若民 民 則又將若何而處 蓋不 今以均死 爲均 心而善民 之私矣。 則信 得已 死,而 無信 爲 重。 而去之者,則去信 俗者,可 而後不爲不信,則固 若使其去食者 則失 不若守信者,則 是以 蓋死生常理,人之所 之乎 其 必 得而 所 有以 以爲民者 言矣。 使民寧 唯吕 死 恐非 所 而 政之所 E 以 氏 其 不去信 大 無 不 聖人之 以 求 而 免乎 義 必 不死 去 食 無 以 不 以 U 則

氏之説

也。 衡審密,而 異,而子貢非之若是耶? 或問: 若子成則 詞 棘子成之言,與夫子之答林 氣和 詞 氣 平、蓋 矯 激 未始以文爲可盡 而 曰: 夫子之言, 取舍則過 中矣 放 去 何

■「無」,正德本、正保本無此字。

者,不 何? 但 説 能 過 無本 之説 其 加 IE 則 而 又曰 爲子 范 中 流 無 末輕 以 所 者 偏 何以言子貢之言之有弊也 者 之 知其 善矣 尹 成 駟 不可去,擇之不精 矣, 故 偏 弊 也 氏 . 發 不 重緩急之差焉 范、 倚 何以 將 推 而 子 耳。 及 然 而 蓋 子貢於文質之間,又一 必 馬, 貢 楊、 舌 常 虎 立言之難 通之 至 惜 若謝 適 豹 爲 要當 侯 於 其 其平 戒 犬羊 氏 也 言 棄 氏 人之 ? 以 爲 禮 ,則又矯子成之失 之失 也 之云, 以文質 如 亦 范、楊、 尹氏 滅 哉 辭 此 説 法 何 ? 自非 則 而 甚 既 ? 則 爲 謝 如 曰 : 侯説 力 非 耶 有 不 氏 西 日 IE. 是 聖人,孰 不 視之 E 能 自 諸 晉 之 蓋 爲 能 子 相 爲 説 以 君 正。 去 也 成 反 相 此 如 而 而 子

如 何 取 其 或 問 一,不歸於公室,而歸 日 洪氏 以《春 以爲哀公之不足,非 秋傳》考之,是亦然矣。 於三家也 不 足 也

> 説,以 矣,則 今當以 次第 卿各 不信 無 之以君民 足,則君 氏、楊氏尤爲詳盡。 禄亦 曰 : 日 0 人與君以足,則恐 平矣。 徹法 然 而舉、蓋 有差等,以 ,出於利害之間 爲民 君 侯爲 則 雖 雖不足,亦 行 雖 自足, 足,則 諸説 體,不 Œ 則 徹 不惟野 耳。 自 至 而 如 而 無 一於君 必 何? 何 無與共其不足者; 蓋 夫百 誰 八人之井 人與君以不足; % 始非 非 厚 但孰與之説,侯氏 補 與共 君 文勢之所安。 斂之意。 ,什卿禄之制 之所與 畝 於 日 有若之意 、其足 哀 地 等 諸 均。 而 公之不 〈者民 哉? 説皆善 上之,士大 若 而 如如 君 也 皆 民 也 足 民荷 抑 尹 此 子之 民 不同 貧, 蓋 可 氏 耶 而 夫 > 告 足 范 則

隨其所欲知, 言 樊 或或 遲 皆 或問 世 以 有是 爲 崇德辨 問 名,而 思 也 其 ? 所未達,以 惑 聖 日 ,何以 人標 0 胡 加 氏 有 出之,使諸 是 爲 以 目,而 人道之門户 爲 或 古 子 有是 張 子

戰於胸 何? 所 以 言此,正欲學者審而 既 新 以 日 而 地 也 損 隨 欲 知之爲言 益 其 而 溺於愛惡之私 益於彼也,可 己之所欲,且又不能自定,而 其 高 内外本末, 可 曰 : 説 中,虚用 據 生,又欲其 也 何 得之矣。 謝 也? ,則不盡 能徙義,則其主忠信 티 : 氏 爲得之,然亦有所未盡 其力於所不能必之地,而實 交相培養,此德之所以 愛之欲其 티 : 不謂 · 而 死,所以爲惑者,何 曰:主忠信、徙義之所 乎聖人之意。 戒之,以辨其 主忠信 以彼之生死定分,爲 之惑乎? 生,惡之欲 則 딛: 也 其 生 (惑,而 有 徙 諸 用 義 其 彼 聖人 死交 日積 也? 説 而 也 死 專 無 可 日 以 如 有

卒於 如之何? 父子之倫,正之有餘 或問 亂 也 曰 : 景公審能悦夫子之言而繹之,則 曰 舉 齊 諸 政 説 矣,惜其不能,此 而授之夫子,則君臣 如 何 ? 日 蓋 齊 所 得 以

> 之所得名也。 之,但君臣、父子、兄弟、夫婦、 矣,又以爲先王達此道於天下,則又非 至 道 其極 也 9 君君、臣臣、父父、子子 也。 今侯氏以四者爲 達道 ,則行 朋友,所 則 達 達 既 謂 道 道 差 達 而

之意 以 辭未 諾爲太迫耳 無他異,但范氏宿諾之云,語意 爲豫,諸先生皆從之,蓋嫌於不 果毅爲言,則程子已辨於前矣。 耳,非 畢而人已信之也。 或問:片言折獄之爲半言, 必 ,然恐當如或説,但爲不 謂 宿 也。 티 : 諸説 宿諾 如 不密。 越 何 何 之説 也? ? 宿 ·濡滯 楊氏 以 日 遷延 償其 日 此 宿 車

本言 范氏 爲 爲 此 無 訟 ,其得之亦多矣。 兼舉本末而言,其理尤備 衍説也。 或問 恐非 聽 訟 聖人無訟之本 胡 之説 氏、吴氏説 曰:范、楊之説 謝 氏 以訟 亦 意 可 不 不 然楊氏 取 待聽 知 其 胡氏 當 專以 何 而 矣。 日 必 決

聖人耳 孔子曰當從某子。」幾是。《大學》曰:「無情者,不得 子爲魯司寇,聽訟皆進衆議者而問之何若,皆曰云云,然後 自欺其心志,此所以能使民無訟 辭,大畏民志。」言使民無情實者,不得盡其欺誕之辭,不敢 ,將以深顯夫使人無訟之難也。 順 目 徹 物 無 遁 情 其 聽訟豈可 吴氏曰: 及也 《家語》曰 而 \exists 吾 猶 盡其 人 孔 也

意 未完備 本文之旨矣。 ,自與君子處以 或問十六章之説。 唯范 氏 以 下,其推言之意則善,然亦 成 爲 曰: ●各有發明,特 稱, 則不 盡 聖人之

氏 以禮齊之者,爲贅説耳。 或問十七章之説。 日 . 諸説略同, 惟 楊

已嘗爲盜之人,安能使其皆知有貴於己者而 所 則 欲之意善矣,然以爲使民皆知 爲異,然於文之義則有所 貪欲 恐其 或問十八章之説。曰:唯張子、范、 過 ,則民亦安分知耻 也。 此章之意,但爲 不通 不爲盜 此 在 楊氏推本不 民 而 上者,無 不爲盜, 耳。 夫 尹

樂之哉

子,以爲政者上之所趨欲善,則民善耳 政教法令之施者。 備,然亦太浸。②此章之意,大 通三章而序言之,爲近於鑿耳。 或問 十九章之説。 曰 : 諸説 略 /概專 侯氏 同, 未及 勉 意 唯 康 最 楊

詳

氏

乎

論 言者,非與? 曰:是於文義若有不 礙焉,斯可以謂之達矣。曰:程子以明 其 則 何 友。 得乎 也? 曰:其在邦也,事 務 實 或問二十章之説曰:以達爲所行通 凡吾之見於行者,莫不通達 民,其在家也,父母安其 而 不近名以下,則至論 上則獲於上,治民 也。 人孝,兄 而 通,然其 諸 無 弟 説 達 所 達 繫 爲 何

2

⁰ 一日 翻弘治本、正德本作

三「或問五章之説」條下有「則亦太漫」。 「浸」,四庫本作 「侵」。 疑當作「漫」、《論語 或問

非 己,亦 而 而 説 己之色則又安得 者,又非 者狹,不 次 如 義,察言 則 出 有 則 有 聞 ? 於較計利 爲 所未 湖氏 吾之所以 非 謝 而 日 而 此 文 0 足 觀 非 氏 盡 然 聞 、尹氏得之,而范、楊氏之説,亦狹 意 章之意也。 夫子之所謂 色, 以 以 況 也 名 盡 害之私 達之辨, 在家之説,意象皆正 夫謙 下人者 夫以 聞 聖言之藴。 今必 而 四 觀 恭 達 己之言爲 耳 之乎? 達矣。 非 以 楊氏以察言觀色爲 下人者 吕 爲 求 氏 出於誠 言 益 最 者 其 范氏論 乃 爲 7,乃子 爲 可 慮 所 仁,而 得之, 察猶 心之自然, 理之當然, 以 謂 下 張 通 質 而 口 後下 人之 乎 之 所 直 尹 也 氏 指 在 聖 好 所

字訓 字 氏 差 大 概 先 重 或問二十一 蓋 得 後 之,特 日 則 義 爲 所當 所 切 章之説。 謂 當 爲之事耳 Ē 也 義 謝 曰:崇德之説 F 氏 利」,義 以 其 爲 以 志 F 字 在 下二 比 范 於 事

之,謝 耶 ? 其 怨己 爲説 不若范 利者 果 事, 不 之意,有不察也。 尹 者,皆在己之事 范、謝、楊氏皆得之,而 蓋 有害矣。 專 能 氏於攻其惡者得之,而 爲 如 其 爲 而 一而後 善矣, 忿 懲 此 意若曰「先能從事 苟 楊氏之 似慝 不在 、尹之言亦 所 得 爲 氏上下之説 則 蔽 惑,則 侯氏 也 然又 爲 不 與 荷得者 凡 病,蓋、 敢攻人之惡 聖人之本意 而 怨慝之慝 以爲其進 不見 有 不 又未 善。 又不 得 辨惑之説 ,亦得之。 知 亦類 之爲 其 利 然。 心 但皆 應 謝 後 事 害之所 此。 於道 則 如 於所謂 也。 以 尤 全 幾 以 蓋 以 必 於 此 切。 他 也 聖 爲 然此 有 知 范、 尹氏 則 何 所 則 況樊遲 人 在 人之意,正 先之意 得」云 忿之爲 以 是 而 侯氏 無攻 之 楊、侯氏 修 其 爲 所 所謂 爲 不 悪 怨 惑、欲 失 謂 相 所問 畏 以 爾。 人之惡 之説 雜 爲 得 遠 蓋 人之 伐 者 不 之。 得 怨 皆 非 其 也 以 而

得,而 但以 因其 之異者,如何? 懲之於此 記言之人本有此意,則恐亦未必然也 遊焉息焉無非學者, 是爲言 異 惑於愛惡 也 爲自今觀之,可以 有是失而警之耶 詠 , 吾恐其淪於老、佛之空無也。 楊氏之意,豈 歸 以 者猶未免爲 而告樊遲者 辨 焉 耳 曰:以文考之,殆未 則 以 ? 蓋夫子告子張者 見 足以發明言外之意矣。 有所作爲 戒其 其 其 曰 : 悠然者 如 惑於忿怒 此 楊氏 則 也 可,若以爲 爲 所 耶 其所謂 從 見其 謂 ? 贵 戒其 聖 容 É 有 賢 以 各

子夏日 悖也。 者 也 ? 亦 舉 或問 遲 直 者之相悖也。 日 明 退 「富哉言乎 白 而 曾氏之説得之矣。 問子 枉, 樊遲 而 易 夏,又以爲夫子所言者 能使枉者直。」言二者可以並 之問仁、知,夫子所以告之 知 蓋知人則有分辨。 矣。 言而兼仁智也。 而 樊 曾氏日 遲 愛人則 ,答其問智 猶 舉直 未 無之。 樊遲未達 而民遠於 行 達 而 一,何 而 不相 己。 子

> 不仁, 但 切 氏 庸》之旨。 氏 道 則 加 以 矣,又何爲贅於辭 者,心平氣和,理明意 道,但其不可而 范氏争友之云過矣。所謂争者,亦忠告而 日 之 其 其義合也,易其 簡當,使聞者不忤而樂於聽從之謂 善術誘掖之,似非文意。 0 密 日 也 蓋用 能 一,亦爲 矣。 所謂 説 以善道之,則所謂 或問二十三章之說。 使 爲 枉 程子之説,特所 忠告也 曾氏以 者 河明白. 尤 而富哉之義,不若楊氏之爲 直 善 也。 止,則 也 然恐亦近於吕 爲 其 乎? 所謂異於 道之日 人有 餘 日 以 盡,或從容深厚 則 忠告者,固已包舉之 尹 過而告之日 謂費 厚 諸 范 曰: 當 氏 薄 先 君親 氏 蓋 爲 蓋 而隱者 爲 生盡 此 之説 氏 此 用 所謂 淺 無異 説 者,則其義 則 深 勿爲此 知 如 非 善 耳。 所謂 也。 或或 説 當 而已 道 何 而 中 程 親 云 善 但 善

或問:以文會友,諸説之不同,如何?

吾有不知其説者矣。張子說、《精義》印本未詳。 一范氏所謂文者德之著,則未然。若謝氏以 有威儀,非以威儀而會朋友也。況朋友之 育或儀,非以威儀而會朋友也。況朋友之 會,亦冀其切磋講習之益,苟徒以威儀爲事, 然後 一言,以文考之,竊以張子、范、楊之説爲安。 一言,以文考之,竊以張子、范、楊之説爲安。 一言,以文考之,竊以張子、范、楊之説爲安。

二七四

論語或問卷十三

凡二十九章

子路第十三

乎蘇 爲勞也。 保之爲先,身勞之勞,其事切 ,吾是以取之爾。 氏? 或問:先之勞之,人爲一説, 故蘇氏云爾, 曰:身先之先,其義明於 而張子亦不約 於供使 何 勸 左 以 右 獨 而 相 同 之 師 取

也。 親 夫人必各舉 章之旨,首尾衡決,而皆失之矣。 ,然後能 然斯 或問:二章程子之説,何 語 不獨親其 其所知, 也,舊本 或誤别以爲 然後 親 也? 口 以 日 以言人各親 得 . 其 此 程子此章 所 所 則 不 以 知 其 全 明

> 過不赦 哉! 也。 之説, 先,❶小過之未可赦,獨患賢才之不知,仲弓真 氏正乎魯君,則其爲治也何有? 之侵官濫刑,賢才廢棄,皆季氏之爲也。 人與奸人爲無小過、張禹、胡廣、李林甫 立,則責有所歸,然常赦其小過,則賢才可 晁、吴、曾氏之説 絕者乎! 其優劣矣。惜乎四子不能如閔子之辭, 頁,夫子未嘗責之,季路之責,又不若冉有之甚,此可以見 之賢,而康子不得而知也。 , 冉有爲宰, 皆取諸孔門德行、政事之科, 亦可 吴氏曰:仲弓、子貢、子路、冉有皆事季氏,❷仲弓、子 請 ,則賢者避罪不暇, 廣大精微,無所 問 曾 諸説孰善? 氏曰: 季氏以 亦亦 而 所以爲顔 嗟乎,若淵、騫者,其孔門之超 閔子騫爲費宰,又以仲弓、子 口 此等出矣。 不備,學者所宜詳 曰: 觀 焉。 仲弓不患有司之難爲 諸説皆善 、関與 而閔子又不若顔子 仲弓正乎季氏,季 蘇氏 盧杞 晁 得 氏曰: 而舉 是也。 日 謂得人矣 可 也。 而 有 是 以 若小 時魯 司 南 惟 玩 既 面 庸

四庫本作「從」。

然閔子獨去之而不顧

,此其

先」,四庫本無此字。

衍説 手足 至於 而 得之,而其 也。 無教 間 章 所 IF. ·之事 能 所 而 論 也 或 前 此 中 ,然後主於民而言耳。 謂 此 不 西 問 耳 監 蓋 方自爲政者之身言之,至於民 而 紊 范、尹皆以 正 廉 、未遽 名者、 但 後 申狀之事 無序不和 所 耻 章之説 IF 無序不 謂 和 爾。 暴慢 睦 及 亦 之風 E 此 日 謝、 尤 和 名爲 姑 也 日 鄙 而 9 衰 楊 足 而 使 0 其 詐 ,故刑罰 氏以 以 諸 禮樂不興 然 盡 事 施之刑罰 之心 故獨范氏之説 驗聖言於 道 説 極 物之名,各得 爲禮樂不 其 者過之。 皆 入」者, 言 善 不 ()則 了,必 中 無 則 日 而 無自 0 凡 亦 所 亦 興 亦 用 程 似 措 天 其 爲 非 則 必 此 之 子

小 體 大體之説 或 問 兀 一章之説。 非孟 子之本意 티 : 諸説皆 爾 善 但 尹 氏

俗 盛 衰 或 問 政治得失,莫不具於《詩》,誠 五章之説。 諸説 情 物 能 理 誦 風 而

> 以 觀 語 謂 爲 政之廢 不切矣。 通之,則授之以 詩》者,政之所繫, 可 推 可 「得其 窮 之,亦 興 群 理 一,則 可觀言之,則庶乎 興 可 所 怨,故學之者如 似 以言 又不 則 過 不 足以 高 斯能 足 政 矣。 以 無 語 舉事 盡 不 既 專對」,以 達矣。 侯氏 風 倒 其 變之實 人 此 置 之情 可 以 則 爲《詩 楊氏 爾 以 揚子 亦 也 釋 太 謝 以 尹 此 雲 氏 漫 楊 爲 口 氏 文, 之本 以 興 氏 特 知 亦 爲 直 又 王 口

孔子 日 : 也 所 偏,不若范説 説, 吕氏爲一 按《世家》, 知二 亦 或問 有 君皆失志無常 稽 七章之説。 當是 乎 ? 時 之爲 説,謝 魯 日 : 棄國野死之君 哀公之七 備 □ : 蘇 也。 侯 氏 氏 程 年 言 日 爲一 子、 衛 之詳 ,故譏之云爾。 然則 出公之五 説, 楊、 尹 其 然 各 氏 相 年 也 有 爲 似 氏

● 「尹」,原作「禹」,據正德本、正保本改。

之哀公孫邾,出公奔宋,皆死于越。

不事 子 能之乎? 自 合進而完,自完進而美,非 能,又見其不以多財自累 荆知此 事 或問 之意, 非所存心者,直謂之苟且而已。 此可爲居室之法 八章之説 獨胡氏 善善等其 之説 富 而 (事,不 諸説 無 爲 驕 備 能彌 滿 爾 亦 既見其不以 而 同,然皆 光於 弗 胡 溢 氏曰 前 非 殖 賢 而 有 自 而 産 公

始謂是 庶而 尤佳。 則 無用之言耳。 齊有其民矣。 不可以 不富 或問 與? 曾氏曰: 有加矣。 ,則無以聚 九章之説。 然人之聞其言也,必以謂常談而置之,置之則 冉 行仁政而王。 有獨 孟子曰: 人,富而不教 能 再 問 莫之能禦也。」適衛庶乎之言。 雞鳴 日 以 . 究 犬吠相 諸 ,則近於禽獸,至於教之, 其 説皆 説 聞 然後 善 達乎四 有所發明。 而 曾 境 前 氏

寇 善。 口 曉 聞政亦久矣,而未見其效,何 但 或 爾 問 謝 十章之説。 氏 日 拔 孔 本 塞 子 之言 源 曰 : 略 如 程子 法 此 先 王之語 至矣,諸 然 也? 其 爲 魯 爲 説 日 司 亦 不

> 效宜如. 驗也。 子去魯矣。 信於市矣。 田,魯之國勢已强矣。 胡 皆不合,蓋以意言之爾 功烈已如此 譖 孫三月不違之時也,而少正卯已誅 會齊于夾谷,孔子以中都宰攝 ,受齊女樂之饋。 氏嘗言之矣。 何哉? 然則孔子爲大司寇,纔歷三時,又不得專其政 蓋其明年築囿大蒐,若孔子爲政,則 郈 ,使魯舉國以聽,而又及於朞月三年之久,則其 費既 愚按胡氏所説年數,與《周公》《孔子世 至十三年春,郊不致膰俎于大夫,而 墮 胡 至十二年夏,墮三都,是孔子行乎 氏 圍 成弗 티: 行相 以《春 克 於是桓 男女已别於途。 事,以 秋》考之,定公十 禮折齊, 子聽 公伯 不爲 齊 商 前 賈已 人歸 寮 此 其 孔 之 可

焉 説,程子得之,去殺之説 有 下之殘虐可 未 可 盡者。 也。 或問十一章之說。 楊氏 善人雖 勝,而上之刑 以 可 有 繼爲言,則於聖人之意 可 繼之道,而無其人以 티 : 謝 殺 可 勝 氏得之,參 去 殘 也 去 殺 勝 云者 殘之 而 取

^{■ 「}焉」,四庫本作「之」。

繼之,亦安能 精義》失之。 進 士 時 嘗 以 學者 成勝殘去殺之功 有 對 盍詳考之,● 策 論 此 數 則聖人之指 節 乎? 甚 詳 程 伯 而

理

或然也

愐

見,而 其説 時 足以 賈誼 太宗 之世 舉 民 則有之,至於教則猶未及也,又安能 無 天 而 理 而 事 世 言 庶幾成、康 流 無徵 爲 流 或問 爲言,則尤失之。 況太宗 之不 一而言 涕太息之言觀之,則當時之風 於仁乎? 足以當之。 行 亦未必然,蓋 融融 而 十二章之説。 費於辭 然也。 略 固 液 之萬 無《關 無 洞 二帝之治,文帝爲優, 一人不然,即 徹,而 矣。 范、尹并以 求之《詩》《書》,惟 通論 雎 耶 文帝、太宗能 范氏又以漢文帝 曰 : ? 無 其理當 麟 一物之不 所謂 謝 趾》之意 禹、湯爲 一人而 楊 如是 仁者,以 富 爲 使 爾 證 成 言 體 其 又豊 然以 爲 俗 其 則 了, 又 也。 化 當 口 民 唐 康 其

而

出之也 或 問 ? 日 十三章之説 晁氏 以 爲 何以 此 專 異乎六章 爲 爲 臣 而 · 而複

焉,内 若楊 程、范之説, 職 之母 魯君大夫又安知 則政、事之名,以 子必將合諸 冉子之所 與也 謝 則 "、尹有 氏則又但言以 或 謂季 所謂 朝 問: 子 得 冉 不同 康 將 政也,季氏之家政 十四四 大夫 聞 可 有 庀 子曰:「外朝子 者 謂 以 焉者, 季氏之家 章之説 其爲 7,季氏 無 冉子之賢 而謀之外朝, 家 事爲 以 事 易 何 政 爲 内朝之 政,而 前 也。 也? 國 程子 而 政 政 以 不能 必若謝 將業 焉。」夫君之官 故故 事 不指言其爲何 問之孔子乎 非冉有之所 티 : 則 范 耳 夫子抑之。 所謂 氏得之矣, 知 君之官職 公父文伯 其 氏 政 辨 之説 事 則 也 也 得 康

⁰ 盍 原作「蓋」 據四

何? 亦不 事 巧者,姑存而考之可也 與焉,故孔子爲不知者 季氏與其家臣謀國政於私朝,而 如吕 曰: 亦太簡 氏 此似於文義得矣,然疑其頗若傷 之説爲實也 略 矣。 其引夫子之言爲證 一而微 티: 辭 或者以 不使諸大夫 以 正之,如 爲 , 此

平正 之事,公既欲之,而桓子又助成之,是亦言不善而莫之違之 之過與? 類,是以用夫子而不克終也。 人爲可畏,三子之徒庶其少悛,而魯其或興也。 吴氏之説,亦 氏 謂有意於治矣,使其能用夫子之言,兢兢業業,以媚己之 .聽言納忠之説,爲未足以該聖言之意耳。 如如 |穩密,無毫髮偏重處,此又言外之意。 或問十五章之説。曰:諸説皆善,但范 其 善 抑嘗詳 而莫之違」以下,曲 有可 味「言不可 觀者焉。 嗟乎! 以若是 吴氏曰:定公之問 魯之衰也,豈獨三子 折見聖人之言 其 幾 惜乎女樂 也, 亦

或問十六章之説。曰:謝、尹兩句各爲

但如謝 切。 其所引之《詩》則當矣。 謂近悦本於親親者,夫子之言,未有此意,然 論之則善矣。 義,諸説皆 尹氏來之二字,文勢若有未順 、尹之説,諸説蓋其餘意耳。 相因 然夫子所以告葉公之本意,則 爲義,皆各得其 楊氏引《書》,殊爲 云。 范氏 端 一合而 所

近小,故夫子以此告之。 則平心易氣,正義明道 徇目前而忘久遠之謀,故反以害大事。 曰:欲速則急於成,而所爲者必苟,故反以不達,見小利則 氏以見利爲言,而遺其所謂小者,爲未 人之意耳。 或問十七章之説。 張敬夫之言,亦爲得之。 ,爲其可繼而已矣。 曰 : 諸説皆善, 不欲速,不見小利 以子夏之規模 張敬 盡 但 夫

功以上得相容隱,告言父祖者入十惡」,以爲或問父子相隱之説。曰:邢氏引律「大

^{● 「}證」,原作「政」,據正德本、正保本改。

情,而 情而 何其 未 情者,乃指 爲 之公理,則人情之或邪或正 切,然徒徇夫易見之近 情者,可 理,皆有所 楊氏之説 得 必其 直 0 此 范氏 皆可謂之直 必 意 而 反 果 順 ,善乎其推言之也。 陷 周 體 爲 推 也 本 下文四端之善而言 於曲矣,而 不 公之兄弟,石碏之父子,皆 而],而皆 順 廣言之甚 乎情,謝、侯氏、尹 同 易 也,讀者詳之。 見 也。 一,則霍 可 所 今試 以 可乎哉? 善,至於 謂 情 光之夫婦 爲 直 理者,近於 以 而 ,初無準則,若之 身處之,則 曰:諸説如何 也 不要之以 邪 本章之指 而 氏之説 況 相 ? 所謂若者 孟子 隱,可 荷 汎 所 咈 至 所 本 順 而 謂 其 ? 以 其 E 謂 不 平 則

涉 宜 Z ,則已 深味之。 而 或 問 謂 奇 + 非 嶮矣,與 范、尹 九章之説。 不可棄,不 亦平正有 人 、忠,又 티: 能 味。 棄 程 與 也 子至矣, 惻 二者 謝 隱 氏 初 屏 則 無 氣之 讀 尤 干 者 调

然

謂

而

之語 高 而非聖人之本意也。 ,亦非學者之事 楊氏 安土敦乎仁」

矣。 非悪 身而 二者汎 足以 焉。 之説 於己,而未能不窮於外者,士之次也, 己有耻之事也。 與 亦 篤 晁氏曰:尊義於己,不窮於外, 也,至其 實自 度之,則能充其實者,正不 此 可 爲 夫 ,至矣。 或問二十章之説。 與 爲士,何 而 高 誕 得 不 觀之,雖若僅 謾 而夫 者 得 其次吕、謝得之,而 苟 所守,則雖 曰: 行已有 中 賤 也 子以 Ē 行 ? 之 謂 而 人, 爲 曰 : 此 取 免於羞辱,然嘗 士之 規 也 耻, 日 狂 彼其 規 則 . 狷 士之上也; 於信 爲使不 孝弟稱於鄉黨,特 上邪 不 曰 程 同 識 易得,程子 子小 口 晁 意, 硜 量 果之小節 同 氏 辱, 硜 雖 故 年 人 僅 亦 曰 淺, 小 能 下 而 反 篤 亦 有 有 所 是 何 取 實 語 而 行 義

0 人 四庫 本作「行

言之。

意。

然晏子

之言

乃

就

事

而

言

而

此

章之意

之説 則 不及,非也。 不 或問 可知矣,故下章次之。 得之矣。 狂 狷之説。 狂者過 然狂 狷 於識 曰 : 猶 可 ,狷者過 楊氏、侯氏 取 也,至於無常 一於行 以 謝 狷 氏 爲

未敢 者必 所 常 日 一也 日 不 ·占自爲 無常之人,占決亦 不 不 信 有 可 9 或 通 問: 通 其 前 測 曰不待占 M 也 必然,故 度者。三 禍 不 章,亦 不占而已矣之義, 玩 四 諸家之説 其 也 而 無來歷,不知其何所指也 姑闕之以俟知者耳。 占 9 也; 必 之説 無所 日 X 不 日 可 ,曰《易》所不 巫醫 玩 據,六也。是 爲 知者 其占者,五 庶 不 二也; 何 幾 誠 以 焉 闕 則 占者。 之? 或曰 然亦 皆 也 用 日 有 之 無 ŝ

非 得 恭,而 則直指 弟,同 是焉。 足以 聖人不能究極 守 證 景 而 論 子小人情狀之隱微,自 不 晏子之説, 心,無同異 正循 也。 同 公、梁丘 未嘗失和 之,韓、富、范公上前議 驗聖言之不可易矣。 也 惡相 無乖 理 蓋此 贵 此二者,外 君子小人之情狀 則是必 争忌克之意; 據發之,則 非 而 口 濟,而其 所論 氣 無阿 矯 否之私,而 ൬ 枉 君子之和者,乃以 王、吕、章、 發明之也。 雖 諛黨比之風。 於立異 過 隙也 相 直 亦切 古 似 之 而 惟欲 無 其不 論 (, 然後 至 言 論 中其 如此 而 所 不同 曾、 一今如 哉 内 且. 似 必 不至焉。此亦 同 説 實相反,乃 若小人 病 可 蔡氏父子兄 以本朝諸 歸 不 ,或至失色, 者, 出 耳。 ,則君子之 其 可 然其 以 於是;若 引以一 乃 同 爲 軌 則 以 寅 和 協 爲 君 反 其 非 而 齊

或問二十四章之説。曰:范、謝得之,

之,而

辭有

未盡

謝

氏

出

處

語

嘿之説

似

或

問二十三章

一之説。

曰

0

尹

氏

大

意

此文之本旨也。

吕、楊、侯氏説

,皆祖晏子之

惡 之善惡,決於好惡之公私, 以人之善惡 謝 反戾。 雖皆以 身之驗 以 可 則核義理之真,●言亦各有當 氏 惡而併言之也 知之説,疑衍惡字,蓋此方論人之善,不 引 若曰 孟子 矣。 知人取人爲言,然是亦可以爲學者脩 ,決於好惡之多寡,而夫子以人 以 審其 但 范 爲 (好惡) 氏 證 所謂審其所好惡者,文勢 ,則不類。 云者 「,則 則救偏聽之失, 於義 蓋 也。 孟子之意, 爲 尹 得矣。 氏善

其道 也。 若小人則徇於 白貴。 明, 人任情,君子不以己之有餘而責人,小 其所悦者義理而已,而非悦人之悦己也,故悦之不以 而皆未盡,亦有 ,則不悦。 洪氏、張氏説亦類 或 張敬夫曰:易事者,平恕之心也; 問問 二十五章之説。 一己之私 與人爲善 而 援 已 而取人不求備 據疎 故 此。 順己則喜 闊 洪氏曰: 日 人不以己之不足 . 而 難悦者,正大之情 諸 故 不 而 使人則器之。 君子任理,小 切於 説 不察其 各 文意 有 非 發 道 而

也,勝己則忌,而惟欲責其全也,此公私之分也

若直以心 形 於上章。 ,則讀者對 或問 二十六章之説 廣體胖明泰之狀,虚 惟楊氏爲得之,但其立言傷 互以求 ,其有以自得之矣。 日 驕盛氣釋驕之 諸 説 得 。巧,不 失, 同

得之。 訓 色 機警有餘,然四 ,則亦誤矣。 訥者無巧言,天資如此,故於仁近之。 或問近仁之説。 曾氏曰: 剛則必能無欲,毅者必能力行,木者無令 者 本 以質言,而 티 : 程 子、楊氏、曾氏 仁 謝 非 氏 知 之説

者、勸 之誠 此 日 告之也。 0 切切者,教告懇 或 勉詳 而 問 無 勁訐 盡 范、 切 而不强 切 尹氏直 之 偲 害。 惻 偲 其從。 子 之義, 以 而 路 切 不 切 剛 揚其 二者皆 其 爲 直 故 責善, 偲 詳 過 有 奈 夫 子 忠 偲 何 愛 偲 ? 偲

^{● 「}義理」,正德本、正保本作「理義」。

其下 後之事 其 頗 恐其 善爲 有見 於朋友,然後得以施其責善之義 交,有所不親,故孔子告之如此 以 以 也 也 然夫子所以告子路, 切偲偲,兄弟恰恰 直告子路以 施 切 ,亦教子路當以 言之有未備 得 進 他爲 之。 弊不止於文義之間 後 其必然,使其 其責善之義 楊 文解釋之詞 德 則 耶 氏 而 責善。 語 但 其始合必有不以正 謂 於 致親於朋友 意 子 且朋友之交,而 其所 耳。 不明 路 而 爾。 爲 如是三者而 果出 謂 不 以 ,然細尋之,疑其意 謝 爲修身之效 Œ 足於 朋 其 子 責 氏 意, 於此,則夫子 友之交既 路行 善 始未及乎朋友 也。 以 而預告之以致親 中 恐其 而 爲 和 進 以 行 能 E 者 德 致親 欲 考 (,其意 使其 則 也。 則 親 之曲 此 之或 其 謝 其 於 説 爲 朋 大 然 氏 曷 致 朋 此 雖 先,責 折 之流 兄 友 概 後 蓋 未 乃 爲 親 亦 友 善 以 弟 切 詳 亦 以 未 親 之 得 亦 則

> 氏曰: 皆出就農,復罷亦 ,故無不教之民 ,則金鼓旗物之用 ,教里中之子以道 《白虎通》曰:「教民者皆里中之老,而有道德者爲右 或 問 教 民 如之。 之説 非謂教之戰也。」 藝、 坐作進退之節 孝弟、 若既成歲, 行 0 義。 吴 一然則 亦有所教矣 皆 氏 朝 人教學,立 則坐 言之詳 三時 工於間門 務農 矣。 春 而 弟 時 吴 講 就

師

武

論 語 或 問問 卷 四

凡四十七

憲 問 第 + 四

聞 者,庶乎 之,使因 足以 道之羞,而未 志 諸 其 道 卓 師 有 志 而 然 或 者如 能有了 爲 耳 枉道得禄之爲 問 其 其 也 首章之説。 所 有 此 夫子深 以 E 免 則 不爲者 而 廣 知 於素餐之愧 恐 胡氏 其 而 其 知 業 、或當 推 也。 耻 其然,而亦知其 티 : 亦 之,以 而 矣,特欲質諸 云,故獨以是言之。 益 有 其 原憲 充其 故故 道 爲 及 之時 此 安貧守道 其 以 所 問 所未 是 爲 〈學之未 雖 耳 而 古 夫 及 0 并 無 子以 知 其 吾 知 告 枉 邦

而 以 或 瀆告 憲 乃 能 以謂夫子之意,止於無道 焉 安 貧而告之。 ,豈所以 進 於日 然則 新 是 耶 徒 得 以 禄 其 之可 E

能

耻

芽 平 之至,何足以及此? 則於仁也,其 且 之? 且 之生,自 制 告之宜奈 而 而 ,蹙其根本,不使少有毫髮留 殫 之意,乃日鬭 雖 不 其末而不行於外耳,若其本則固著之於 原 殘 或 能去也。 或問 憲 然以程子之意 (蔽害 能制之終身,不見於外,而 不 不能已,制 問 能 何 之説 再 而 ? 庶幾乎 譬之木焉,不去其 問。 不 進於胸中,則夫 日 能 程子 0 敢問 以 而 而言 聖人 然以 自 不行, 以 嗚 使憲也 存 ,則四者之不行,亦 爲 未發之, 爲學 呼 矣。 日 聖人開示之深, ! 力 所謂仁者,亦 於心念之間 而 者苟不能 必 非 (根,則 亦 再 其鬱 夫孰 也 程子之學 不 問 絶 給 ,夫子 其 屈 萌 能 矣。 深 萌 不 醛 測

道,不 楊、尹 耳。 矣。 未可 指也 雖 省 乎 者 且. 不仁矣,則 發之,而 而 操存踐 一蓄其 見仁之本體,則又專 以程子之言考之,可見其失。 爲仁,亦非 ? 力行之,則亦徒爲無當之大言而 謝氏所 出 發明 止 念於隱伏之中,而未足以去夫不仁 此 吕 於四者,則其所謂仁者,不知其何所 入彼 履之實矣。 非仁 亦有 氏 不失其旨。 謂 以 其間 所不敢 「四者不行,未必不出 爲四者不行,足以去不仁,而 而 也。 何 哉? 無地 夫道二,仁與不仁而 至於范氏以爲仁之爲 盡其言者,其旨深矣。 以 可容髮也。 知見爲言,而 顧四者之不行,方 至 誠能 謂 於仁 已,故 不 未足 E 去 察

無 派所繫 有 或 所 問 而 繋 有慕乎彼 張 而 子 不 ,懷居、 去乎此 也。 之説。 也 有繫乎此者,固懷居 無 爲 有 而 爲 輕 而 遷 重 者 遷

> 也; 居爲 其推 也 則 楊之論,亦爲得之。 也。」尤學者所宜深念也 畏威如 亦 有慕乎彼者, 土 謂 有 日 夫有 而 天下之事 諸説 疾,民之上也; 言以及天子者,亦廣矣。 爲 如何? 而 則 重遷 亦懷居也。 蘇 非 者 曰:范氏言之詳矣, 孟 氏 爾。 從 子之本意 引管仲之言 懷 張子蓋推言之 如 然夫子之言 流,民之下 但以 也。 居 廣

委曲 范所 也,遠害而已。 爲 得 如夫子之對陽貨 之。 推,爲有益於人之國 或問 洪 四 氏 吴氏曰: 章之説。 日 危非 云爾 言 孫者,亦非失其正也,特少致其 矯 티 : 激 也,直 也。 諸説皆善,而尹 道而 洪氏、 己。 孫非 吴氏 团 亦

明,今以文意推尋,姑爲此説,亦夫子罕言命或問六章之説。曰:此章之説,本若難有勇,未有切當之説,唯侯、尹庶幾得之。

或問

五章之説。

曰:

諸説皆善,但仁

必

氏 過 高 爾 不 實 或 楊則 衹 從 程 專 子、 以 枝葉而言,聖人之意 范、 尹之説 亦善。 謝

亦必不然也

則亦有以啓學者自恕之弊,尤不可以不察。 仁矣」,其庶幾乎! 訓夫仁者,恐亦未安。若曰「心不在焉,則不 矣,然其曰「心不在焉,不仁也」,則直以 也。 不仁之名,則不於此 得之,特所謂「公天下、私一己」者,亦 以 聖人之意有不盡矣。 心爲說,而范氏皆以君子之行爲言 仁者固公天下,不仁者固私一己,然仁 或問 七章之説。 其曰「未害爲君子」者, 而得 吕氏所謂德心 日: 仁與不仁,● 也。 謝氏之説善 稍 心字 未 懈 則 E 當 者 於 當

皆善。 説 之不足爲愛,忠而不誨 者 皆未及 或問 然聖人之意,正 八章之説。 也。 如范 曰 : 所以明夫愛而 謝之釋 者之不足爲忠,則三 蘇、 楊 ,則勞字 尹氏之説 - 勞者 無所

當矣。

各盡 以爲羞。 己也,故世叔討論 獨任於一官,何哉? 氏曰:鄭小國也,能慎重其辭命, 其曰「子産爲政,擇能 《春秋傳》考之,與此 天下者,辭命宜亦重 其用者,子産之功 或 後世爲命者反是,此辭命所以有愧於古 問 九 章 而裨諶不以爲歉,子 ·之説。 矣, 且古之賢者,求辭命之善耳,不有 而反輕之; 有不 而 也 曰: 使之」,則能使衆 而信任於賢者如 討 同者,未 諸 洪氏 論潤色宜益衆也 説 産潤色。 皆 説 善 亦 知 而 善。 孰 子 此。 然 羽 腎 以 爲 洪 其 而

愛也。」 故夫子以惠人蔽之。 産爲政,黜汰侈,崇恭 子産之説 財足國,禁奸保民 或問 然孟子以爲惠而 爲 詳。 章之説。 及其卒 ,其用法雖深,爲政雖 儉,作封 胡氏曰: 不知爲政、禮記 也 日 恤, 鄭 ,聞之出 鑄 小國也,介乎晉 諸 刑書 説 涕 以 皆 嚴,而卒歸於愛 惜 而 通 爲能食民 幣 日 争承 而 楚。 「古之遺 胡 而 氏 U 子

● 「與」,翻弘治本、正德本作「而」。

之爾。 知矣。 孔子, 耶 不 能 之亦 宜皆所不論者。 貴賤 説 范 氏之邑 曲 ? 論子西之爲何人,然則 則 氏 而 駟夏未嘗當國,無大可 長少,秩秩焉莫不從,桓 而子西止之,其後又召白公, 可 以爲盡 難 管仲之説 ,蓋先王之政之教,子産誠 此 ,以與管仲也。 牽 吴氏曰: 也。 通 近 於 世 援 吴氏日 人道 吴氏 獨公子申與孔子同時,又讓國。 好高之弊,獨 據, 當時有三子西: ,恐非管仲 則蘇氏 秩秩亦無怨言之意 别 而 荀子論管仲云: 爲 支 稱, 離 公而貴敬之。」則 宜申 爲當, 説 甚 何 有所未及也。 鄭駟夏、楚宜申、公子 以致楚 吴 未 矣。 謀 以 所 亂 氏 究聖言之旨 能當。 但 知是否, 姑存 被 「與之書社三百 侯氏説 爲 亂 人 誅 能 是桓 則 也二字, 相去又遠。 諸家 考 其 昭王欲用 楊氏之 爲 一公奪伯 而 亦 人可 都 論 歸 迁 申

氏 章 欲 乃美管仲之功 蒙 或 問 上 + 章 伯 章之説 氏 爲 説者 前 非美伯氏之安貧 似 曰 非聖人之意。 諸説 皆善 特 也, 蓋 范

> 夫曰: 怨之難 其中。 有所守者不能也。 亦 有所主 矣。 失於外耳 此蓋未知夫無怨之味也。 富貴之地 經文之明白 是? 不 日 皆爲怨也,故貧無諂 當以 富而無驕,不矜於外物者能之, ⊟ : . 則 也 ,則失其本心,然則難易之論, ,又烏 程 是爲説矣。 皆是 子、 甚 能保其中之無怨耶? 而 於無諂 或謂世固有處貧賤而無失,至於 易 侯 也。 曉 氏 也。 所謂處貧賤 所 易, 蓋 語若 謝 諂 論 貧而 張 氏 怨 之病 引據迂 敬 無怨 相 諂 夫説 至於貧而無怨,非 而無失者,特 反 蓋 甚 之 難 有 毫有所 而其 不 時 於 無 曲,反 亦 怨則 而 怨 同 佳 不 意 一面 也 不平于 未見 然 進 不若 則 張敬 旦 於 耶 各 無 孰 樂 其 處 内

得其爲人。 詳 養母 人 \equiv 矣。 獲甲首以 而 戦 或 死。」 冉求之藝,則 公綽 問 而 四子 三北 獻 卞莊 他 之事。 無 及 日 子 所 此 母 見,而 事 塞三 死 見《新 티 : 齊 夫子固嘗 北 前 武 遂赴 伐魯 序 章 仲 所 **>** 則《 莊 稱 齊 日 稱 春 一:「莊 師 子 亦 之也。 秋 赴鬭 可 子 以

何如 也。 其近 不復聞斯行之之志 人也。 人之域,豈又取其已能者而重獎之哉? 成於禮樂焉,則亦不足爲成人矣,恐亦有此意 要君 況子路耳,言有是一能而 禮樂,則集其所長,去其 後可 者又或不能以小國之大夫也,亦難以 加 日 也。 (,而莊子與子路皆卞人, 冉求又朋友也, 不 0 故孔子言必兼此 ? 必兼 而易知者爾。 能相 曰 ,勇者至於輕死,藝者至於聚斂 以 胡氏曰: 洪氏以爲特以 爲 日: 「今之成人」以下,或以爲子路之言, 兼 成 四子之長,而 未可知也,然姑存之,以備參考 ,又無禮樂以文之,故知者至於 人,何也 此子路之所已能也。 ,而有終身誦之之堅,是以自鳴其善 胡氏以爲言卞莊子,蓋 ? 四子爲言者,四子皆魯 四人之能,而又文之以 又必文之以禮 티: 所 不能兼衆人之長,與 短 · 而 四子各有所長, 夫子方進子路於成 蓋子路晚節末路 後 可 前 以 爲 樂, 成 爲 不欲 而 舉 以 成 人 然 爲

程子論之已詳,而諸説亦不失其旨也。此固非之解耳,●與未見其止者異矣。大率此章之義

過者也。 子請享靈公也,史鰌 之疑之,何也? 文子之言豈能皆當,而其取豈能皆善乎? 人不知者,以其適宜而中度也。 因物而中理者,人不知其有是也。 取之名也? 或問: 此文子所以得不言、不笑、不取之名也 公叔文子何以得不言、不笑、不 曰 : EI: 티 : 蘇氏得之矣。 「子富君貧,禍必及矣。」觀 吴氏得之矣。 飲食而 飲食未嘗無 知其有 蘇氏曰: 吴氏曰: 五 五. 味 味 凡 夫子 此 必必 也 事之 則 文 其 而

祀 不 賢,故夫子正之。 小不同者 一發也。 知其據邑有請之爲要君爾,初不 或問 十五章 謝氏若 范、 尹 一之説。 以武仲爲恃齊以 以 竊味本文之意,但 爲 時 曰: 人以 諸 武 説 仲 請 無 能 · 爲能 者,亦 大 存 以 、異,其 存 時 祀 非 先 爲

❶ 「鳴」,正德本、正保本作「名」。

微意 以 也,安得捨其 也 以 乎? 防 夫子 之文爾 但言以 侯 氏 據 又以 邑之 防 求爲後,不言以 求 顯 後 罪 爲 而 要, 逆 探 亦 不 其 齊 察 挾 求 爲 夫 齊 所 之 後

其有 者。 程子 可 詳,文多不能悉載 未 見矣。 安。 以 之説密矣,然以 張 或 問問 惟 子 發 胡 以 晉 齊桓、晉文之正 説 譎 文之本 爲婉 爲得之。 ,學者求之《左氏》之書,自 t 心 以以 其説求之本文,則 事實字義 耐 而吕伯恭考之爲 能 譎, 使後世 奈 求之, 何 慎 所 亦 未 日 尤 若 見 舉 0

書之文 公殺 蓋 以 蓋聖人之於 未 薄 可 兄 昭之言 或 問問 爲 以 以 此 争 管仲不死之説。 據 證 人,有功則 國,而其言 證 而 其必 桓公之爲 參 然。 以 此 固 稱 章 但以公、穀《春秋 出 兄,則 其 之言 曰:程子至矣, 於薄 功, 有罪 荀 斷 昭之前 卿 之可 嘗謂 則 數 也 矣, 其 旧 桓

則可 掩 罪 得,在 之爲 是非 言以 者正,而不死 乞於白公耳。 少,亦從以明矣。 死 桓公則可,日 稱之」,則 者,正指召忽 在 何 不 雜 其 可期 於 以 而 見不死之無 罪 自 決於 爲此 無功,則 輔 諒」,若未 而兼舉之,既 於 也。 而 子 必 九 愚恐記者之失 而 其 糾 其在我者固 合 今於 遂失之也 後之有 其 以 時之義爾。 是貪生惜 不稱其 而 之功 至於程子又謂「若使管仲 免於 難 争 言。 害於義, 管 又況所謂匹夫匹婦之爲 國 則後 不以罪 仲 先 而 功 功則 蓋 與? 而 功 不 耶 自 死 召忽之於子糾 但 雖 也。 不 而 在 ? 而 可 程 不 稱 掩 有 在 後 而 於 必。 桓公、子糾之長 日 可。 子 其 其 大功,聖人 曰: 蓋 不若 義 不 於 0 又謂 功 功 記 管 日 死。 但其 死 不言其 亦 召 者 不 兀 仲 且 忽之失, 管仲之 豊 不 與 夫 管 管 牛 後 得 以 仲 其 贵 猶 仲 兀 死 大 所 功 功 事 彼 事 之 婦 此 古 ∇ 不

不

則

臣之義 管仲 子之意善矣,然不明言小白、子 之義 辜而 諸説 而君之,安得 糾弟爾,若使糾兄而當立,則齊國之士,君 若聖人之心 功,而 仲之才,是殆不若爲 後之君子 又程子言外之意,讀者 死 亦 也。 略 爲 ,無所逃矣 得天下 如 於子糾 義之小,是謀 免 未正 徙 而 夫仲之可以不死者,正以小白兄而 何? 於 義 失之矣。 有 兀 前 果出 ,亦何憚 ,君臣之義未正 幸 而夫 不 曰: 夫 其 不 ,況如管仲 幸 兀 於此 子與仲之不死,恐亦 未 范 死 利計功之言,其害 又以忽之死 而 婦 其 以 得 而 召忽之不失其正 處 之諒 則 九合爲仁之大,以 不可以不察也。 難 不爲之乎? 此 國 哉 者,苟自度其 策名委質,親 行一 ,故可以不死 ? 而 則 亦 不義 爲 糾 死,乃托 楊 幸 傷勇,仲之 長幼之序 氏 殺 理甚矣。 而 發 謝氏 也,此 已矣。 非聖 明程 於 北 無管 日 一不 君 臣 子 以 面 亦 死 0 者,必 子 意 謝 之甚矣。 糾 不

非

節

者不考其然,乃直 也。」自《公》《穀》以 之説曰:「衣裳之會九 之會不止於九,則又因「不 爾,而糾合宗族之類 固非予仲之生而貶忽之死也。 人之意也。 何 爲過,仲之不死未害義, 也 ? 曰 : 夫子特以 春 以 來,皆爲 秋 爲 ,若此者亦 忽之功 傳》 爾,其餘則 九會諸侯,至 而其 以兵車 展喜 是説、 無 功有 足 曰 甚 犒 一之文 稱 亦可 兵 衆 師 . 足褒爾 車 數 九之爲 之 也 加 謂 之會 而 桓 詞 其 説 爲 云 死

釋其善説經者, 吕氏得之爲 之著,文固 心。皆 氏所謂 ,特取其唯賢是舉, 或問十九章之説。 以 溢 乎 物 無 本文之意。 仁之著也 相 媢 雜 疾 爲 上人之心 據, 而 則 然以 殊 無今昔貴賤之嫌 티 : 過 不 矣。 多, 人之所難 范氏 知 楊 聖 氏 而其 侯氏 人之於 所 以 文爲 謂 所謂 亦 有 文 文 禮 而

氏之説 謂 今以所言 正 爲之也 之不作,可謂難矣」,然後其説可 説,意亦皆善,然以文義考之, 指 文者 難」 事,乃 恐 正 而 二十一章之説。 亦 繼之,則其 以 不作者,爲不善 其 其 未 ,則失之矣。 然。 倫 \Box 所謂 理 可順 蓋本文之意,言之爲 意或不出於此 善而 티 : 粲 [之事 楊氏 力不 然而 則 程子、范氏 通,今以「則 能爲者 當 最 而 可 日耳其 爲 爲 觀 也。 之者, 得之, 耳 爾。 言 謝 \equiv

欲 楊 家,哀公雖欲從夫子之言,然不告三子 之心矣。 以 氏 推 或問 伯諸 明其 請 説 曰: 侯 討 ,而 陳 亦 當是之時 恒 有 仗大義 之説 助 焉。 以 ,魯之兵 至謝 ト天意 曰: 氏 程子至 柄 以 分屬 則 爲 非 孔子 則 矣。 聖 兵

者

孰敢 子而 也。 不 告之,則是可否之權,決於三子, 曰 敢以 而成 古 强弱 子以左氏所記「以 敢必,而 以爲不可, 而一往焉,尚 必矣,是則不惟名義之不正,而 夫子之言。 . . 可 則 有 哉哉? 哀公誠能聽孔子以討 違之哉? 以 出 況魯之三家,即 ,而獨 是矣 已,其所以警夫三子者亦深矣。 亦非 大義 君 而 則復 然夫 臣 不量力 然其 以大義驅之耶? 孔子之意, 詔 然則夫子之戰,將不復較其 大 冀其萬一之或從也。 之耳 今無成命, 倫 子以 正言之,以明從違 所 而浪戰 ,所繫之重,雖欲不告而 魯之衆, 謂 理明義 齊之陳氏,其不欲 君命之重也 必必 乃不欲 有 也 齊 而反 處 加 IE 亂 티 : 齊之半」, 置 ,雖或不從,而 往 但 使孔子往 則亦 事 而 |其意以爲夫 故 謀 在 程子之言 亦 而三子果 不 彼 而 豊 決 何 召 曰: 不 得 討 於公 夫三 可 雖 爲 ? P 得 之 而 程 不

但

既

以

必

掩

釋爲之之義,則不必複

出「之爲

也

ご三字

削

而

讀

之,則文意

明

矣。

尹

氏

亦

善,特所

謂

未

必能爲」者,辭若太緩

爾

乃

指

爲

道

而

言

天下

共

誅

有

此

法

爲

弑

逆

聞

之説

所

謂

天

以

爲

其意之曲

人之心

氏

所記

强

弱

愐

亦

將

奚

以

子之告魯君,又當明 必告之天子 三不朝 子討 者。 而言, 凡弑 蓋 告天子,下告方伯 以天下之兵,討天下之賊,彼雖 以不討之乎? ,天下所不容,人人 其 以 之者。 折 爲哉? 當世傳聞之謬,以衆人 天下之公義,爲一 相 ,所以 而程氏 而 君 考之《春秋》,先王之時, 而 反 不伐 者,人 六師 若 楊 啓讀 固 爲 門 李 是, 移之之等耳。 氏 不 君 毅 人 證 人記其師説 者之疑 當區 何 發 臣之大義,以 告 而 得 而 明 其 耶 ,舉天下之兵 而 王 得 胡 其意 區獨 ? 爲計 濬 討之,如 而 國之私 氏乃 耳。 以 誅 日 較 之, 之腹 則 : 且 胡 有 又不 爲 日 齊、魯之 孟 先 以 也 必 弑 漢 見 疑 氏 況 0 衆强 子之 君之 乃 發 孟 程 能 爲 以 請 弑 所 必 在 謂 自 特 後 子 聖 左 誅 子 盡 其 鄰 逆 行,甚 但 以討 無以 不足以 也,其 乎 此 義 説 黨,或遂奔 之相去也 小節,忘弑 ,大要盡是矣。 范 時 法 亦 説 善 耐 則或不 敵 不 言 遠 欺 一前 爾。

之也

君以

F

或

而

可

討齊,其請於天子,理勢固 賊,爲惡尤大,當不拘常制者, 吾之力又自足以 之一字而決其必請 免乎《春秋》之責 義之如何 或問二十三章之説。 事之未至乎迫遽,而 逸而 逆之大罪,使彼得 其 俟 不 然 不 得 事 命 制 使其 事 可 機之來 不 而 之,而 非 以 告 遂 矣。 地 復得,則 也 命 行 近於天子,而 概, 乃 有當然者。 也 焉 皆可 夫以 得以告也 則 區 曰 : 則 不 告 以 告之而 园 則以當世 可 與 魯之弱 任 植 亦大拘 范、 也。 焉 不告 以 其 其 徇 少緩 ,其 楊得之, 事 根 使 俟 但楊氏 請 口 滯 而 者 力之 固 其 以 又 本 命之 命 矣。 告 在 無 其 以 欲 亦 而 地

張敬夫日 故 然勿欺其本 必 犯者,爲小 盡 誠 也。 而 不 欺 勿 戾耳。 欺 犯 矣 顔 而 則 納 誠 張敬夫之 信充 事君 積

不得已 當 以 犯 交要譽惡其聲之類,一 則於事君之道爲未盡,而 於欺君者之戒。 誠 懼其果於犯焉,故告之以勿欺爲主焉。 爲 爲 深 而 考也 世之雖 無 主,蓋謂 所 有時而犯之,則 欺 無邪 ,於本文之意 事君 心,而 毫之萌 顧其 唯 徒以 有 能 辭 以 ,皆爲欺· 犯顔爲事,亦鮮 唯 犯 感動 不 ,雖若 知 ,然後足以 足以達之,讀者 也。 苟 也。 若忠信有所不足, 且 尹氏之説,以 小 以子路之剛强 異 順 味矣。 從, ()然亦 盡 以 其 如 所 陷 忠 可 内

得之。 謂 喻 利 或 范氏 問二十四章之説。 喻 義 者,與 上達入於上智以 謝、 尹 氏皆失其旨矣。 曰 : 下 亦善,而前 程、張、吕、 楊 所

之間 也 習俗之變,非 而 矣,范、吕氏次之。 蓋 ,借聖言以 或 問 其 爲 己爲人之别。 獨 則 因 明己意,非 一事之不同,非以古之仕 古今學者之異 程子他說,乃其 日 專 0 爲釋 程子之解 以 此 明古 文 議 意 如 約 發 論 今

> 但專 失 善,而 其爲人也,亦 之道 言,則失之。 氏大意亦善,但 其三,曰成 者之失其本旨也,然其大意 者之失,而姑答其大意,未暇 今之學,今之學如古之仕也。 也。 以格物致知者爲爲己之學,則未盡 ,而於爲己之意,尤無 謂爲人非 楊氏蓋本程子成物喪已之説而推之, 物,則固 尹氏 非謂 所 務 其 所謂 本之學,則 謂 非爲人之謂 有濟 爲人者,乃正 爲 人利物之心 己可以及人者, 所發明云。 則固 亦 正 其二, 其 未免謝 日 無 以 所 喪己 所 謂 成物 則 也 病 乎學 氏之 爲 因 謝 問 亦 則 而

之言 范、楊、謝 未能寡過 ,極有味,學者所宜熟 或問二十六章之說 ,乃伯玉之事,而使者知之,雖 尹氏 得之,胡 氏 説 티 : 玩 亦 而 蘧伯 口 深省焉 伯玉克 觀 也 玉 己 使 胡氏 日 者 新

^{● 「}必」,正德本、正保本作「一」。

之事著見於外,而使者亦可謂知德而能言者矣。

矣。 其 理 大旨 以 位 楊氏一之,其 雖 或 專指 釋上文之言歟? 問 同 在官者而言,不出其位 而 二十七、 語 意 (或有未 所 八章之旨 包,有廣狹之異。 察乎 范 氏 1 於 同乎 此 則 ? 得 汎 其 不 論 日 在 旨 其

及其行 恐其 言之過 言 諸 也 説 當 皆善矣, 或 然亦 問 爲 其 也 9 行 兩 君 未 過 事 子 然以 乃與 其 敢 也 耻 行 據 其言 其 諸 舊説 者,常若勉 耻 文義 説 其言者,常若 而 意合。 過 姑記 觀之,則當作 其行 强 以 如今之文,則 之説 俟 而 考 使 有 焉 愧 有 耳 餘 而 耻 日 於 不 其 0

故 悶 勉 之云 無 人 悶 則 者當矣, 或 者矣, 問 爾。 非 矣。 三十章之説 今日 他語 其 蓋 可 獨 獨 乎哉? 亦皆善 立 立 故 不 不 懼 一,但 日 懼 之 楊 則 語 其 范 謝 딜 氏 將 亦 侯 獨 所 有 如 氏 遯 7 謂 論 遯 世 故 責 夫 己 世 無 不

> 道者爲 泯」者 亦 哉 ? 矣; 居 以責己勉人之説推之,則又不 備 不欲 欲因 造 得,聖人豈 病 子 有 耳。 此 不 亦有淺深, 有臧武仲之知 所不 則 責 蓋聖人 居之意不同,似 其 尹 而遂謂 楊氏 己 一物,而 氏 亦仁矣; 老、 通 以 以 反爲 也 所 謂「所自者道 勉 佛之餘乎 自 聖人哉 如 不 人 是 道爲夫子之事 孔 在三者之上矣,夫豈 居,不必 耳 有卞 而 子 則 ? 不居哉? 不必然,而楊 所 亦不惑矣。 莊 達 謂 唯侯氏 德者,人人 子之勇, 成 盛 若如其言 而 人 德 ·必以 仁、智、 者,有 三者雖 之事 語 則 謝 近 贵 在 則 此 得 之 於 勇 公綽 則 可 亦 其 而 語 備 之名 所 文 有 所 後 以 不 意 亦 是 然 謂 其 懼 不 所 有 同 但

明 謝 者 尹 或問 氏 似 得之,范 亦太過。 方人 之説 謝 蓋 則 方 日 疎 人 0 矣。 以 諸 窮 説 侯 理 略 氏 同 所 未 謂 而 必 作 澽 聰

氏 較 師 有 量 説 是 一别白 IE 似 心 渾 爲 也 全者 擇其善 其 而悉效其 術 ,然夫子之云「三人行 之流 不善而從違 所 則或將 爲 也 耳 有 ·, 非 此 漠 弊 公然不 必 耳 有 加 我 楊

能之患, 優? 之患,疑 有光 知之心萌于中,則其害甚矣 曰 四 輝以 端五 或問: 日 何 有 衍文耳 典,雖聖人不自以 上,尤爲詳 極乎,而 侯、尹 三十二章, 氏 何 所 張 得 願乎 密,但 敬 其 爲能盡也 夫之 諸 外 要 也。 矣。 患 説 説 若有 不 相 ,而況於學者, 强其 范 亦 類 善。 氏 毫患人不己 孰 所 充 張 不 實 爲 其不 敬 能 最 夫 而

之,但爲告君之言,故於本文之意有不切耳 不信之説,文意 逆詐、億 亦非 其曰「燭 或問三十三章之説。 不信,乃 也 乎事幾之先」者 吕 極 氏 猜 一疎,其 逆 防狡 詐 億 險之意 所 曰: 不信之説 謂 亦善。 先覺之説 范 前 氏 以 逆 最 但 爲 詐、 以爲 則 爲 心之 得 得 億

引之過 逆詐、 誠,而 折尤 贵 非事 失之矣。 蓋言 知 二句亦未曉,然恐其文義有未通 所未 之語 吕氏 自 而覺,如 而失之,若如其説,其 又易見欺 容人之見欺 誠 也。 也與? 備 燭乎 人 而言耳,至於此文,則初不爲 安、蓋未 億 匿 讀者 也。 但 不當預設猜防,但又不可爲 二者並行而 其知之名哉? 謝 不信者, 君子 爲 幾先之語,易 必 氏之説耳。 詳 夫不逆、不億者,誠 見罔 以至誠前知爲言, 予於《集註 審乎抑亦之爲用耳。 之可 之
先
覺 而 ,亦據夫子答宰我井有仁 亦奚遠哉? 不 也 不相悖 使詐 以抑字更端,亦 也,亦 若如 其 侯氏 且至誠前 與 所 雖 ,曷爲其 吕 不 燭 謂 引 録 信 楊 氏 理 是 舊 至 也; 則亦必於援 之云 之明 氏之説 加 知。 誠 説 至 也 註 尹 必 人 乎 一誠 先覺者 爲 前 偏 氏 而 可 一,則 中 知者 發 説 歸 自 章首 見 於聽 所 私 也 曲 與 然 則 其 於 焉 謂

情僞幾微,無所逃其明」,則優於諸説耳。

以 隱 其 焉 對 所 夫 問 遁 無 ,於微生之問 子 忘 答辭 謂 或 即 世 問 固 厚乎 其 爲 意之不相 而 范 己 意 高 爾 而 尹 謂 反之, 日 疾 夫子之委 爲 . 直 若 固 是欲 何所當 如 也。 一之説 使知 范 故 夫微 於微 曲 尹之説 其 爲 哉 憂 所 厚 生 時 謂 古 生 而 爲 高 則 畝 自 不 者 佞 夫 以 察 無 是 子 是 其 平 譏

德 皆 耳 乎 不 有 天 尹 ·受乎 氏 爲 有 地 天 之中 自 尤 或問 人 大 然勉强 天哉? 爲精 爲 不 學 繋乎 三十五章之説 以 也 能 而 約 生, 皆 後 習 之差,又不 ,謝氏次之,若范 若以 司 生 有 是 則 馬 知 也 德 不可 公論 氣 · 贵 而 也 禀 安行 古 可 謂之知 智 而 得 \exists 以 曰 言 伯 車 0 根 其 故 以 諸説 八吕氏 則才之與 以 賴 於 專 德 才爲 學以 金 其 繋乎 矣。 皆 與 性 以 天 善 竹 習 之 成 才受 賦 德 之 所 受 爲 而

> 子之多 孔 若 雖 者,亦奚以 侯氏 其失 才 不 蘇 君子 氏之書 以以 子 有 過 者 力, 所謂 亦 如 鎔 能 則 甚 則 此 而 範 鄙 非 力奚與焉 不以 異 所 又 面 矯 而 事 無 於駑駘 稱 其 其 以 揉 贵 用 者則 才稱 爲 末 才 爲 於 非 天 難 流 德 者 才 才 以 哉 而 下 其 强 遂 乎 也 德 其 ? 則 後 至 而 失正 稱 ? 德, 周 加 世 於 德 聖人 耳 焉 之 貴 易 公之多才藝 特 而 與 勉 之意 禍 爾 才 所 不 此 以 以 也 而 則 其 同 益 賤 爲 其 特 失 所 力 周 深 德 之端 謂 以 至 耳 夫 驥 驥 於 則

以 私 E 能 而 夫子 曲 也 德 非 忘 不之許 直 報 天 或 而 理之正 之不 問 德 顧 所 德 以 以 同 以 有 報之,各 何哉 德 也。 直 ,故聖人之教,使 大小 報 云者, ? 怨 夫 省 有怨 有 日 亦 所當 不 所 可 以 是 當 有 謂 報 私 亦私 德 亦 忠 害 天理 而 且 人情之所 公 以 意之所 怨 厚 直 矣。 不 則 之 報 不 以 有 曲 不

之也 者,反 德之上 報之 矯焉 之心 怨,而 然,而 别 或 是 不使 君父之讐,有不 勝 警 乎 則 日 直 則 耶 耳。 人忘 誠 以 人厚於 是豈 是 贵 讐 當 不 然則 若 避 「父不受誅 所以 之則 害 爲 曰 無 報 忠 怨, 其 若或人之言, 若等 德 其 復 己 則 君 且 名,故於其 月. 報 爲 而 死 周 亦逆人情、悖天理之甚 口 之 報 父之讐, 厚矣,而 德者 而 得 没 公平 不 加。 禮 私 雖 上之,每 不 其 》有 意 君 子復讐 當 此 報 報 忠厚 若 僅 所 父之讐, 不當 之, 亦有 則 於 者 復 所 則 適其 但 图 其 止 怨 哉 以 之名者,亦 欲 如 耳 而伸夫忠臣 可 殺 報 當 所 報 ? 平 益 而 所 也 亦 者 報 X 德,又將 反 怨 致 以 視 是 然 。」此當報 將 而 報之以 也 而 爲 其 不 報 則 夫 而 有 所 義 厚, 薄 怨 理 當 以 聖 雖 也 以 時 者 春 報 者 何 孝 見 人 之 哉 報 則 而 曰 而 德 以 子 終 者 秋 之 志 怨 必 夫 報 當 **令** 而 以

之斯者 之論 怨者 言有 台。 聖人之心 周 在其 盡 意 然又決於情而 而 至 相 不校之云 曰 也 0 私 於 得 也 也 公之法,孔子 是 中者 當 所 但 恩 相 焉 不校,亦 則又 其 略 不言其 報 則 曰: 伸 妨 蓋天下之事 如 大旨 則 而 而 於下 矣。 小過 則 盡 何 又 然則 報 未 其道 ? 與 辭 權 IE 「則皆 不 備 人 之言 於聖人之言。 不 티 : 聖 亦 不 重 然 要諸 楊 曰 之當誅, 當 太緩而不切矣。 而 人 如 後 輕 氏 其 0 善 八之意 有公義 然 報 ,若合符節 不 此 可 而 此 所 理 所 矣 爲 則 耳 處 意善 謂 也。 謂 亦 止 私 有 諸 而 之,使公義 謝 小 無 有 未 可 尹 大 若小 日 矣 加 怨 説 是 氏 足 而 也 氏 誅 ,而 相 即 委 於 所 私 剖 孰 楊 以 之説 之亦 曲 反 所 加 恩 爲 判 謂 此 至於 不 亦 盡 氏 者 謂 委 得 聖人之 尤 可 有 所 行 幸 如 心 口 直 似 曲 之? 以見 爲 者 庾 程 侯 謂 於 所 不 而 矣 也 明 子 在 常 未 E 曲 E 或

害 天下之公焉 則亦 君子之所 不 敢 爲 也

之也 與天 於俗 是 而 相 則 深 於天 而 而 子之意。 則 卒之上 Ł 味 反 疎 F 求之遠 知 者 達 矣。 矣。 之。 理 爲 矣,人亦 責之人而責之己;其下學 而 或 天 之 問 也 也 曰 天 焉 理 達 . 相 吕 張 而 謝 日 偏 學 子 諸 不 氏 氏 歸 加 云 求之近。 知 何耶 則 何 其 則 怨 是 爾 下 楊 亦 説 耳 之也? 又 自 庶幾焉 不尤, 學 其 事 事 如 氏 此 ? 有 而 過 之 今 而 而 何 亦 所 非 知之 益 程 E : 此 通 理 F ? 爲 以 下學 人之所 甚,而是 日 其 子以爲 達 固 但文勢 得 則 人莫之知 耶 學 曰 : . 理 者。言: 無 之。 者 固 ? 其 L 與 即 與夫子之意 程 及 天 達 學 Ĺ 不 下 於 及其 尹 夫形 小 分知者 之 子 始 夫 學 怨 事 人, 何 倒耳。 氏 而 人 至 理 也 人事 不 也 E 以 而 蓋 天 矣, 事 下 巾 尤 達 人 F 獨 則 祖 而 不 學, 也 形 莫 便 Œ 張 范 宜 駭 又 而 知 獨

> 者,何 : 得 然則 其 如 形 ? 謝 而 曰 氏 上 . 以 者 既 爲 焉, 日 下 理 學 非 矣 人 達 理 則 天 無 而 理 天 E. 而 人之異 達 何 天 哉 理

日

而

不

待其學於

此

而

通

於

彼

也

之德 者謂 繫 任,其 哉 言 萬 命 何 也 氏之黨耳,若遊 之, 道 焉, 爲 ? 窮 物之謂 也 之氣。 ,具於 天理 ? 也 或 之 則 爲 日 何 問 消 興 用 日 也 一,何 也 萬 子 捨 息 廢 ? 自其 公伯 物 路 時 然 也 胡 盈 無 受 故 ? 日 非 氏 足言 於孔 而 其 虚 理 寮 命 於 之變, 王 以 萬 形 之體 티 : 學 此 是 於 古 佐 門,則豈 爲 矣, 而 於 隳 三 平 天 之才, 寮非孔 不易; 上者謂 命者,天理 而言之, 孔 如 而 在 以 門, 孔 循 耳。 都 生 子 家 自 至 環 子 之 而 出 之 以 臣 於 其 而 則 E 弟 理 所 藏 陷 道 非 得 流 無 氣 元 子 爲 甲 之 其 其 Z 亨 形 侯 卿 端 行 若 之 朋 特 運 賦 氏 興 相 理 利 而 而 友 > 季 於 以 時 廢 卣 F 不 而

口

察矣。 言,而 遇 生 而莫逃。 也 故),則隨 侯氏 義 以天理釋之,則於二者之分,亦 其氣之運,故廢 禮 此章之所謂 智 之德 根 命。蓋指氣之所運 於 興厚薄之變 心 而 爲 性 唯 其 不 爲 所 既

之,則 奈何? 理 遠 見 相 悔 宏大,而不 不專主於人之優劣也 之大小言,張子以人之高下言,二説之不同 世者 此 似而 照 天下之幾,飄然事物之外,以没其身 至尹 或問三十九章之説。 程子得之。 而 則 心不同」,則亦兼以其時與事言之,而 曰: 以 謝 或 僅 氏之論 屑 有 氏 能 時 避 楊氏 國之事 古聖賢之迹與 而 地 避 不 而張子又謂 世 又皆發明其 能 避 以 爲 人之士,猶 但避世之士 耳。 或 舉 티 : 世 智 故 「聖賢於此 不 識 隨時之義 程 程 見 説 明達,而 伯 叔 頗 亦 一,或志 知 子 子 有 爲 爲 以 所謂 而 意 考 事 有 灼 迹 於 不 量

> 權 則 地之人矣,豈其然 初初 是 見 不在我,而窮迫不 棄於 人,無 哉 所 自 容 得已之意 而 後 去 ,反甚 其 避 之之 於避

其字 殊不 爲 君 説之爲當 亦莫有明 知夫子者,而范氏以爲誠然則失之。 下推之,意其爲隱者 曰:是不可知 而 得之。 孔子所 苟 之同 知晨 或問: 或問 用 之, 則易危爲安, 轉禍 前 謂 四十一章之説 門 其不然者,獨楊 也。 乃不直以己意發明,而 張 所謂 無 不察其意之異,蓋 ,姑存而徐考之可 夫以夫子之聖, 子作者 不 「知其不可」者,時之不 可」者 而發之意爲 七 ,己之無 氏 티 : 人之 以 無 晨門之言, 雖 爲 多耳 也。 説, 不若胡氏之 不可 不 福 極 必於援 可 亂之世 爲言 如 亦反覆 而諸 也 以 何 引 可 Ŀ 沂 説 非 ?

^{● 「}苟」,四庫本作「果」。

范 手 在 天 氏 耳 7,又 曰 他語 知其有不可爲 亦有 天未嘗遺天下,其亦疎 牴牾不合者 而冒 如如 昧 以苟爲之哉 既 矣。 以 可 不 口 爲

其 爲 晨 果哉之説,於文義爲未安。 程 口 無 而 子 心者 爲言,於此 已之説 或問 謝氏 荷費之優劣,則 「則流 荷費之説。 楊氏果哉末之難矣之説 ,吕氏末之難矣之説,范氏、尹 於老、佛之意,而 章之意,亦無 近得之。 曰:諸説之意皆善 楊氏 所 當 又若以 以聖之時 矣。 范 聖 其 氏 氏 當 論 人 但 斯

宰。」 喪之 又讀 也 一家皆 諸 作 陰,默 名 胡 或 問問 説 「梁 用 如 氏釋之日 如 諒陰之説。 此 孔 闇 也。」邢氏釋之曰: 何 訓 其 一言 而 義 爲 日 居 一謂 則 説 倚 今古 范 不同 其信 曰 : 廬 氏 言 孔 得 能 大抵 殊, 鄭 氏 之,楊、侯之説 默 信 티 : 古者天子居 氏於《禮記 而 不 謂 不 口 信 言 諒, 曉 任 也 矣。 信 冢

> 相 焉,不然, 曰 0 似 尹 皆 氏 非子 之 則 無 有 張 所諱 説 所 何 疑 避 之意 也 於君 ? 前 曰 然 不 0 侯 是 得 爲 或 免乎 猶 有 闕 君 耳 文

之譏矣。

者,語 堯、舜 以安人安百姓爲 善 然 各 則 安 舉 若近 於天下平然後 不 各得 積諸 所 得 心 人安百姓之説 而 其 平氣 是, 或問 謂 猶病者,意 雖 程子至矣。 其 此。 敬 理 至 而 四十五 一,是以 者 安 和 約 實 子路 也 静 非 有 爲 而 其 虚 是 若 所 可 擴 雖 章之説。 至,尹氏 不 范氏敬身之説非是 治之所及者 皆 動 四端 議 近 蓋言脩 以 而 喻 直 本 齊家 大之,楊氏 是 者。 之善 於脩 而 前 而 以爲 少其言, 治國平天下之本 所 己 蓋 티 : 語 己 以 施 所 始 則 推 以 敬 諸 群 爲 謂 然 以 疎 敬 而 黎 無 而 説 於是告以 脩 矣。 爲 始達 及 極其 之一言。 百 不 大 推 物 姓 自 意 以 所 而 謝 而 然 敬 皆 論 皆 至 氏 莫 口

舜, 乎? 狹 及人者,蓋 脩己以安人,而及於百姓,必有政事 安人之盡 己之餘 也。 至於 擴 加 不離於脩己以敬之一言, 而 而 統 0 夫子之言若此 以 ,皆隨其根本之淺深,而 推 則 由 然則夫子之言 其功效之及物者言也。 幼 言之也。 IE 亦 自 之而 曰:脩己以敬,貫徹 敬 而敬之至也; 謂 身及物,有待夫節 ,由己及物, 有 而 世 其 墨其本 安人 堯、舜之事 後 功效 遠 是雖若有小大遠近之差,然皆 安人安百 安 也。 則 百 前 之自 一,豈其 而 繋其 姓 疑 安百姓 티 : 待 若 9 何 然 夫舉 姓 略 非 而非 節 末,以 程子 脩 也 初無所待於外也 及 上下,包舉遠近 無大 若 推 則 己於 ? 然曰 ,則脩己之極 斯心以 物 有待擴之而 由 ,所謂 之 因 爲施 小遠近之差 格 者 日: 也 此 子 安人,則 物 學至 爲 9 路之問 之施焉 是 加諸 爲 而 非 致 然 之廣 徑 以 若 知 善堯、 耳。 後 口 爲 而 脩 彼 老 以

> 右也 要法 説,不 則百善從; 尤非此章之意也。 者,亦化民之事 終費辭説。 安人安百姓者,則失之矣。 在上也,如淵谷之在下也 主一之謂敬,無適之謂 以敬之義,亦爲 於人者以爲言,而後反之於己,以求 日 曰 . 進之則未有 ,檢身之切務歟! ,是則持敬之道 吕 以脩 氏 宜遠莫如 之説, 己以 又所謂「不言而信,若不 也 敬 ,而 内外之分也」,若曰 不 邪 得 一,如執六圭,如 敬立 爲 亦三子 之。 欲持敬者奈 諸説之外, 如 非 所當然之事,乃 師保之在 安民 一則百邪 胡 氏 之 日 之事 何? 但其 息。 類 前也 胡 可 捧 平 耳 願 敬 氏形容脩 盤水,如震霆之 日 語 如 ? 莫如 也者 進 鬼神之在左 怒而 其 意 君 主 尹 其 善 子有言 , 存 本 不 氏 以 所 . 敬 威 明 心 之 彼 則 施 以 之

爲 子 壤 安 非 死 或 問 可言論者,故叩 賊 四十六章之説。 生之説 ,疑或未 - 其脛 安。 티: 而深責之,亦不 范、尹氏 程 子 詳矣, 皆 張 以

或

問

卒

章

説

不

從

諸

家

何

也

?

然則 直 其 箕 其 爲 甚 使 氏 可 俟 子 然 自索 數 爲 周 踞 邨 弗 遠 以 奮 斂 自 也 莊之餘 也 其 莊 程 旋,此 之脛 矣。 也 聞者矣,今乃責其夷俟,何舍其重 然運 其 衛 爲聖人 以 罪 周 子 ? 足 因 禮 反 形骸之内, 之 何 而 胡 梃 數 魯之 而 六 蓋 論 亦 則 以 E 流 氏 責 以 其 不 + 數 也,亦 壤 口 也 則 知 以爲原壤 歐之哉? 人,未有若是之怒者,則 踞 失,遂以所曳之杖 後 杖 其 猶爲 見。 其 耳。 於 夫子 母 曳杖 非 異 不 鄉, 死 故 其 豈 莊 乎 以 丽 必 之喪母 人 其不可 而 周 説 七 程 毁 楊氏之説亦然。 歌 將 耳。 之流 出 + 譽 亦 子 以 杖於 善。 則 之言矣。 經 而 理曉 盛 也? 壤 而 以言喻 其 適 微擊 德 當 歌 國 楊 心」者, 見 之,不 中 絶 也,孔 氏 壤 此 曰 禮 其 所 吅 失 0 日 而 之 蓋 而 脛 旧 使 則 謂 見 其 責 愈 子 蘇 反 夷 孔

也

歟

人

猶

孔

抑

僭

曰

《 漢 迭 子 而 . 而恬 若 書》所謂吕后兒子 教之,得其旨矣。 五 侍 + 如 左 不之正 諸家 歲, 右 與 之説 所 一,豈聖 孔 畜之。 謂 璇 年 闕 則 人之心 抑《家 相 黨 執 孔 比, 筆 童 子 記 語》記 哉 子 每 坐 事 孺 視 於夫子 豈 子 童 叔 胡 之。 即 子 仲 氏 斯 之 會 以 此 踰 少 爲 句

=

論 語或問卷十五

衛 公第十 五

久,而 況靈 善,庶幾 而 有 知矣,故對以 日 一,猶 0 必然之意 改事焉, 公無道 爲 或問 以 所 國 俎 無 以 可 以 0 則夫子之行,孰謂 豆之事告之,則夫子之去,蓋 所 啓告之者,亦已詳 與言者,是以 禮 靈 , 夫子固知之矣, 特以其 也。 未學而去之。 入,至是而猶 戦 公問 使靈公於此 陳 陳, 之事 而 非 往來於 夫子 問陳焉 然不徒曰 人 其不可 矣。 有以發 遽 君 衛 行, 所 則 乃 宜 禮 爲 何 留 悟 未 其 於 問 際之 夫子 學 志 日 也 哉 於 亦 也 最 ? 未 心 而 口

得之。 以兵而 也。 民之事 對,其旨遠哉 行,又以禮際之不善而決,不專 視之,色不在孔 故《史記》又云: 然君 之失也。 又孔 末 治道之末也。 本末 之末 夫天下之至賾哉? 也。 夫子既行, 也。 無 子之謙 子於禮 范氏所引知其不可爲 ,而問軍旅,非 言,陳固兵之末,以治道而言,則 不 楊氏之説 謝氏之説,亦非夫子去衛之意。 舉矣,豈 使靈 辭,非 亦亦 夫子去衛,乃以其不問 公聞 而 子, 未有舍俎 亦非 明 日 靈公卒,衛國 以爲禮之末而以對 必專 . 日 孔子之對 孔子遂 且 諸説 是。 以其不善戰 與 賾 以 孔 其 雜亂也 豆 如 俎 行 子 而 藏於器者,而 而爲之, 豆 何 而 語 大 能 ? 問 古 於 則 見蜚 亂, 行者,況 有 亦非 禮 問 是 而問 日 司 焉 俎豆 夫 亦 治 陳 夫軍 雁 之事 子之 兵之 前 尹 或 兵 隱 則 氏 之 事 仰 蓋 V 宁 奥 旅 此 求 其

子戒子 宜 曲 者,皆失之過 矣。 謝 時,而 上下之無交爲言 亦 程 時,則不必 中 舊説安 深 矣。 氏 不待必 子之説, 味之。 盡 不欲以 不若 一、侯氏 路,有以 説 티 : 一,以 固 如 如 窮 愠 理言之,則 小人之濫」,則程子之意 以 以 子 何? 程 切直 也 也 救 子 路 子 説 見 路 子 之説 之愠 日: 簡 聖人謹微之意。 楊、侯氏皆以 孰 窮 又 路之失 愠 當 斯 是? 謂 見言之,則安知 程説 范説 而 爲不能安貧 濫 又各有所長 知 後 ,則不 乎? 此 勝 曰 : 意善 可 則 以 然曰 以文言之, 窮 一, 窮 可愠 救 曰 達 然楊 斯 子 一 也 語 固 不 濫 路 也。 固 其 亦 不 讀 在 之失 氏 爲 以 有 不 在 有 者 是 委 夫 我 惡 窮 如 其 則 窮

學,子 以一貫告之,此 或問 貢以己觀夫子 二章之説 雖 聖人之事 ,故以爲 E 聖 亦多學 生 然 知 因 己 也 不 以 待 夫 多

乎是, 然 故 洞 亦將 之學至是,其於衆理 也 聖 而言 能 然無 以 所 其 博矣,然意其特於 所 子 以以 人以 喻 夫 曉 在 有 處 理 · 貢 謂 子 矣 何所 向者之萬 以通 所不 其所嘗學者,而於其 ,而汎然莫爲之統,其 之當然,而 ,則亦不能 是 而 使知夫學者 當其 其 此告之,使之知 以 無不 而貫通之,則天下事 致 也。 通也。 貫之,然 所 力 可 欠 通 告 故其 殊,爲今日 而 以 者 矣。 未 若是者 能 而告之,彼 ()屢中 後 能 雖 聞 猶 之萬 事 爲 知 不 日 以 未 至 夫萬 所 口 而 則 貫 雖 子貢 之 知 耳。 殊 所 物之中,各 謂 以 之耶 處事 其 止 水者,固 有 其 是 未 衆 理 不 物之多 不 能 蓋子貢 以知夫衆理 一之爲一 之聞 多學, 萬 致 闡 理 中者亦多矣。 嘗學者,則 接物之間,有 ? 知二,非 之爲 之,則 者 而 已深 曰: 本 是言 無 有 之 然 疑 子 學 亦 不 知 以 以 亦 而 耳 也 音 理 億 之 脱 TTT 外 廓 知 有 不 固

甚。 説 則是 以 也。 非 其 贵 贵 理 以 所 則 以 何 相 、明之。 隨 善矣 反 以 該 牴 指 也 不 容 則 理 平 牾 然此 説 貫 蓋 善 理之行 事 待 而 至 所 不 爲 一,但皆 言者 力行 是 萬 蓋 既 其 ,然其引顔 約 謂 可 而 然 口 哉 如 謂 章之指 而 也 恕者 曾子以忠恕言之,其所謂 謂 之已 所 此 乎 告 復 之聖人, 雖或 無 有 何 事 謂 用 而 此 孟 所 用多學 以 是蓋 熟而告之,使之知此 蓋 則 浪 力 物 IE 子 不 謂 博 子之意爲 者,則 以 之 語 學者之事 同 萬者 曰 則 爲 亦 所以 之哉 求 不 間 0 ,然豈有 如 也 不 病 察乎 其 而 理 此 之 可 博 則 所 貫 無 而 説 意 其 以 學 其 謂 所 乎 而 不 其 也 己 不若 學言 語 爲 謂 而 事 子貢 (於曾 而 通者也。 一致哉? 其 9 意 詳 物 侯 楊 而 之間 忠者 所以 説 也 者 之 未 氏 但 既 氏 所 子 夫 亦亦 之, 能 間 子 引 固 爲 行 亦 之 貫 説 諸 將 尤 其 有 者 則 無 亦 孟 將 自 窮 以 所

子之言之爲當也。

德之 連 以 也 之言 之 則 己 蔡之大夫也 子路之愠見、 何 食 與 上 知 既得之, 云乎? ? 章 道 不 或 而 而不自知 别 者 知味 爲 問 諸説 之也 語 知 而 爲 德 尤 子 既 唯范 時 反 諸説 ? 説 者 之語 也 倒 不 曰 貢之疑 若 鮮 氏 耶 贵 德 置 知 多 之説 近之, 其 不知 然則 者 是 謂 則 陷 於 哉? 則 乃己 知 於老子 多 日 德 其 而 以 日 學,皆 之所 知 其 所謂 爲 侯氏 陳、 0 道 自 意 失 史記 蔡之大 得 口 知 似 道 爲 所 道 矣 其 專 德 也 未知 謂 而 贵 指 者 德 以 何 知 後 德 此 如 德 有 知 德 而

恭 所 日 日 以 0 己 0 然者也。 純敬 若是者 或問 而 已 不 爾 恭己之爲聖人 E 不言 無無 諸 其 説 事乎操 而 無 如 信, 何 爲 不 ? 而 脩 敬 怒 治 日 德之容 而 自 之 外 威 范 道 觀 氏 有 之, 何 何 以 不 見 用 知 也 也 其 其

源

恍

雖

張

夫

亦

也

范

記 官 間 舜 己之效 E 無 以《 Ш 合 見 此 베 何 也 以 爲 ,及其 簡 之所 十二牧 爲 足 其 章 獨 《書》《 奉 説 濬 若是 而 以 説 所 之 於 自 天 古 JII 吕 也 治者 以 以 見聖人之言 説 舜 古 而 爲 踐 稀 傳》考之,舜之爲 奈 而 氏 舉 爲 觀 獨言 則 帝 説 而 天子 闊 侯、 何 以 已 元凱 之,則 其 治 稱 王 何 古 體 舜 之乎 治 然 之 尹 之爲治 ? 其 位 耶 皆 信 之意 氏 也 亦 迹 後 誅 ? ,則《書》之所載,不過 知 達 善 E 乃 ? 得 足 無 蓋 四 其 順 矣, 皆 日 之爲 以 他 M 非 雖若 故詳 大 時 時 蓋 在 0 與 夫子 非 見 事 偶 其 治 事 事 即《書》 亦 攝 人 多, 也 當 然 與與 之 時 心 味 莫不然者,夫 無 政 爲 朝 之言 0 時 而 事 滴 洂 侯 夫 而 事 善爲 覲 雖 發 之 之 然 子 無 氏 而 也 謝 + 矣。 未及 考之, 無 書 之言 適 此 巡 小 氏 説 八載 加 一之所 狩、 異,然 然 事 不 説 命 非 其 乎 楊 然, 也 也 恭 九 之 則 封 0 0 H 又 則 子 此 氏

問

問

無

所

人

而

替 恭 謂 也 舜 無 己之道 又 若後 事 恭 者 己 則 以臨之, 世 乃 之君 所 必 以 怠 是以 爲 惰 當 禍 放 無 亂 肆 其 事 多事 宴安 治益 之 時 之媒 以 鴆 Ę 而 毒 也 久 不 知 而 加 聖 其 不

煮蒿 忠信 於 恍 之 答行字 虚 之大 不 所 謝 程 惚 悽 學 同 矣。 范 解 或 外 子 惚 愴之説 説 楊 釋 問 篤 概 而 之意 所 敬 又 道 氏 似 意 有 故 而 謂 五. 日 無 乃 實 微 有 餘 贵 承 所 章 ,皆猶 亦 使 往 皆 形 從 發 相 其 而 諸 見 過 子 而 以 象 明 似 内 外 説 何 之, 説 張 不 爲 其 而 者 不 而 日 也 事 如 從 口 身 參倚 意 不 往 足 人者 者 何 外 多 不 者 來 若 所 行 ? 或 而 所 行 之説 乎 以 哉 見 於 然 借 得 謬 道之 日 妻子 本 心 爲 無 者 誤。 之 其 . 非 目 别 文之意 與 尤 耳 語 程 獨 之間 之行 行 道 有 楊 其 子 如 以 之 者 非 論 於 此 氏 謝 明 是。 物 云 爾 不 語 氏 非 章 學 子 此

之怪 所 爲 過 信 爲 言 尹 餘 必 可 則 子 朝 自 忘 若 參 其 氏 論 謂 頃 有 固 亦 平 不 篤 刻之間 事 未 姑 夕 敬 能 忠 前 所 比 豊念 似 既 誕 日 諸 焉 有 離 欲 僥 必必 信 倚 以 出 华 志 駭 乎 至 乎 以 則 衡 説 形 而 人 倖 篤 大學》《 X 積 之事 頓整 乎 忠信 勿正 見 是 於 最 象 此 倉 敬 也。 累 年 老、 堯於牆 卒而冀 見 發 也 爲 者 久遠 其 篤 則 學 平. 耳。 今日 孟 佛 精 心 參 參 敬之間 抑 不 者 實 子》與 不下帶 神 之間 前 而 夫子 可。 食則 前 其效 是 之 示志 後 然 倚 倚 檢攝念慮, 亦 疑 其 拳 有 加 衡 此 衡 也 蓋 此 出 之不 而 見 而 拳 成 言,正 者則 拳拳服 ,其旨深 章之本 堯 則 於 日 其 道 功, U 服 正 存」者 近 服 意 於羹爾 可,不忘 膺之説 何 可 世 非 膺 以 初不若是 欲 ,直以 心 事 膺者,不 搏取 意 異 之 發 矣 可 言 誠 端 熟 哉 亦 以 明 意 不 其 之 程 忠 是 以 ? 但 而

或

問

P

諫

之説

日

按

(家

衛

靈

禮 然中 諸説 卒, 公不 之,非 訐 有 未 君者 卷懷之計 伯 命 之,子以父言告,公曰 爲 加 베 宜 殯於客位 計 直 或 之 盡 玉 不 命 甪 善矣, 所以 反 過 較利害之心也。 也。 節 如 知 亦 置尸 其 獨 蘧 初 何? 陷 權 則 不 子 不 伯 如 也。 其君以 夫君子之出 然專 非 知權 專 在己固爲未合於義 牖 史 日 此 玉 規 티 : 而 魚之 爲 下。 : 蓋 而 范氏大意得之。 以明 進 保 規然務 而 任 吾 殺臣之罪, 楊 伯 身計 其 已 事 其子從之。 彌 生 哲保 德 氏 於於 也 然一 玉 處, 子 不 性 「是寡 至矣,然學者 也。 爲 退 君 瑕 能 深厚 身爲 子 緘 不 臣之正,亦 其 IE 侯 瑕 史 默 於義 中 人 所以 君 氏 魚 説 靈 循 節 且 謝 之過 而 謂 此 諫 理 雖 而 公吊 死 則 預 氏 不 中 而 已, 其 不 而 無 亦當 爲 也 所 失 亦 魚 敢 或 説 愛君 行, 而 以 謂 可 過 於 初 有 1 知 也 將 遂 間 成 以 自 知 愛 失 於 激 所 盲

拘 説 其 楊 而 不 以 中 氏 得 失 口 而 與 成 其 人 亦 或 於 氏 自 德 言 所 爲 問 事 庶 各 達 耳 不 七 理 幾 才 章 有 材之分 得 得之, 亦 而 爲 之説 小大之差 其 語意 下 有 所 所 但 而 ,德之與 處 不 未 專 不 蓋 日 明 爾,不 以 0 口 盡 日 諸 耳 教 讀 與 材 我 説 人 者 言 口 、爲言 所 多 固 不 也 專 善 有 能 以 以 優 無 處 此 德 但 則 劣 疑 人 亦 章 爲 范 也 之 然 太 上 氏

如 心 地 雖 不 日 氏 何 之 能 之 亦 叮 然則 間 殺 安 德 爲 或 間 得 夫 而 而 而 此 之 殺 此 孰 害 萬 章 范 身 此 得 心 其 理 之旨 成 其 之全? 氏 德 具 而 仁 意 雖 矣。 Ľ 焉 「, 其 之説 以 不 之哉 此 爲 精密 詳 順 理 德 有 之 此 奈 日 者 理 不 而 IE 何 . 曰 合 吾身之所 ? 而 亦 程 浩 於 寬 子 不 吕 然充 違 理 博 至 氏 矣 有 之説 塞 則 則 有 味。 天 身 心 者 尹

之安; 得 日 不 事 聖 其 無 死 其 其 殺 日 日 足 仁 0 之, . 足 之 自 非 以 人 擇 日 語 則 其 其 志 弊。 間 此章之旨 身, 以 然 亦太巧矣。 則 是 不 而 若 義 謂 士 之」者 耳。 間 人於死 似 得 於 雖 則 若如 體 殺 侯 仁 之者 死 若 E 以仁人之於 是 人之 氏 身 如 則 而 生 不 不 而 此 成 遂 此 捨 生 正 不 私 私 言 亦 用 分 日 仁 以 面 生 至 無擇」云者 見 相 則 至 殊 有 志 遽 則 以 德 其 何 反 與 義 謝 專 德 老、 死 取 故 士 以 矣。 釋 有 也 也 以 氏 也 而 生 義 君 爲 彼 氏 苦樂之異 ? 釋 心 之 乃 非 也 子 之説 仁 又 爲 之學 言仁 都 説 蓋 所 然 日 仁 之 謂 人 無 如 以 而 0 然 以仁 於 也 無 所 何 私 楊 可 外 殺 亦 旧 而 則 事, 異 擇 至 身 奈 氏 乎 當 有 物 日 人 不 非 德 以 有 何 哉 外 兼 亦 死 死 惟 加 而 矣。 也 成 以 ? 物 於 不 於 聽 牛 則

體 有甚 是 義 也 决 於 者 士不以所賤 以義 死」是也。 以 決 者 決者。 易所 蓋仁 孟 子 人不以 貴之宜 論 以仁 欲 一決者 有 所惡 甚 於 傷 此 章 生 所 之言 好之 0 惡

仁,而 范 吕 庸 類 未免乎容易輕率之病,蓋 達 則 請 以 其 》誠 如 氏 事 友 氏 此 以 本 焉 而 由 或 於 非 明 問 事 固 己 事 非 觀 爲 固 賢 明 由 誠 之 九 感 聖賢之本意 仁之 不得 誠 友仁爲達仁 . 者 人之説 章之説 切 而 亦 下 爲 事 獨 非是。 兼衆 自 也 不 疎 誠 由 矣。 日 善 皆 也 川則是 而 謝 己 其平 顔淵 耳 彼仁賢 明 一乎哉? 有 程子、 氏 非 矣; 所 專 ,以己既 聞 日 自 略 以 所 夫子之語 楊 若舜之 雏 明 而 敬 以 所引《 氏 外 而 不 心 論 有 道 得 誠 生 而 之, 事 也 爲 中 所 者 恐 而 而

其 或 問 E 也 商 ? 周之 日 0 改 陽 IE. 氣 一朔,何 雖 始 於 以 黄 不 鍾 如 夏 而 其 時

> 代之制 月爲 矣; 然以 風 物 賤 得 則 始 見 以 曰 行 用 矣; 0 其 以 是 乃 之 改歲之義不 者言之,未 TITI 夏 夫輅者 言 至 爲生物之始,改歲之端,蓋 且 中正 征伐定有天下,於是更 建 貴 功 之 運 乎天 以以 ,盛德在 子 飾 也 時 器 行 之, 此孔子 然猶 新天下 也。 震 ,身之所乘,足之所履,其 而 歷 有知 則 則 動 明 I 丑 木,而春氣 潛 生 不 聚 日 9 轉 其 任 所 於 之耳 稱 而 物 焉 . 寅 所 地 以 重 周 之 凡 物 則 由 中, 致 考 而 四 功 輅 目 始 其 勞 遠 \equiv 論三王 時 未 應焉 9 爲 而 爲 也。 ,其 其 而 陽 而 五 著 未 過 費 有 華 正 始 行 9 有 爲 至於商 以人之所共 侈 也 之 \equiv 之序 以 備 飾 朔,定爲一 古之聖人, 以 物 廣 制 言 統之説 見 於 爲 何 矣。 也 乎 是 其 則 亦 用 也 而 地 叶 牛 易 勞 心 賤 也

^{●「}論」,四庫本作「謂」。

矣。 者,猶 周之意者,蓋以其監二代言之,説見第三篇 益 諸 商 壞 爲治天下致太平之事,而不察乎夫子所以 而 爲 日 之制 之意,則 説 分明,此 過 若尹氏庶其不失程子之意也歟? 費廣而又增費之,則傷 如 加之首,則體嚴 其論是吾憂也之意。 何? 與? 雖 疎矣。 周 不 曰: 可 冕 日 所以 考,然意其必 程子、張子至矣,范氏 謝 周 而 難文 氏非 冕之不爲 用約 而 :使顔子 楊氏以 詳 財,周輅之所以 不爲過 有 其 未備者 侈 制 致 此 也。 則 戒 爲 奈 但 等辨 於 何 亦 矣。 夏、 從 斯 以 損 ?

而言,合而觀之,則盡矣。三説,皆以事之遠近而言,楊氏以地之遠近三説,皆以事之遠近而言,楊氏以地之遠近

無誠 者得 之,而其所謂自克 或問 心 已矣乎之説,則 十二章之説。 者,不 楊 曰: 氏 范 不 若 如 氏 楊 范 之所 氏 氏 之爲 推 所 謂 言

得也。

謝説甚矣,文仲之賢,蓋不至是也。或問十三章之説。曰:范、楊、侯得之

横 氏尤 自厚爲本 洪氏之説 耳,非以自愛而 薄責於人者,乃理之當然,而遠怨者 理,不應猶以 猶所謂「責己重以周,待人輕以約」 反己 未知自愛者,亦不可 之云責者,乃求責之責,非咎責之責,其 逆 詳。 而 而 或問十四章之説。 發也。 不 亦善。 以咎人者,似 獨謝氏之意, 香岩以 薄責爲言矣。 若以横逆言之,則直 厚,薄 洪 氏日 曉。 責於人,以 非此 雖責善,義所當責,亦必以 티 : 夫子所謂 其以 章之指 諸 爲横 説皆善, 不 求遠 能遠 無責 躬 耳,非 逆之來 乃 蓋 自 怨也 意 其效 人之 此 厚 怨 而 mi 爲 爲 則 章 范

● 「謝」,四庫本作「范」。

之論 近蘇 舊説 非 或 謝 問 聖人 氏 蘇氏曰云云。 + 爲 Ŧi. 本意 章 説 之 説 惟謝 集註 他 未 以又有 氏 日 知其孰是也 0 乃莊生過 范、 兩 侯、 説 尹 而 而 讀 不悔 其 氏 者 用

決之 欲之 之機 則 所 而 之資 講 爲之深憂哉? 將 謂 相 放 道 明 罹 熟、皆非 辟邪侈之心滋;好行 可 也。 義 私 小 智 似 或問十六章之説。 慧者 於患 進 之 而 也 也 其 德 不同之説 稱 則 曰 : 害之微 自 業 謝氏之所 也,吾之所言,字之 所以 也 暴自棄,至 難矣哉者,憂其不入於道 子以慧爲 本 存養善 解 ,何也 今終 於義 也。 譏,以其 曰 : H ? ,理,而 心,而 於 智 諸説之是非 小慧,則行險僥倖 之間 君子 如此,聖人 曰 : 而 言言不 小者 發於 爲 本 謝 群居 慧之爲 造道 意 氏 計 乃 而言之 也 一將以 及義 推 得 人德 有 較 言 德 特 與 此 不 利

> 明者 所謂 慧才智之説 也 欲併是絕之,其失遠矣。 美 一 智者 德之正者,尹氏 然 非此章之意 曰 固 與 如如 智 亦 不能 何 相 ? 似 也 無大小之辨 不察夫 0 而 티 : 若 實 察慧 日 不 同 小者之爲 才智,則 蓋 者 也 謂 亦 又質之 以 日 非 病 察爲

當歸 義,而主於禮,雖其文勢相 之,楊氏尤密。 或問 之於義,文意始完備矣。 十七 然於孫出 章之説。 、信成二句,不 日 因 有 程 如 子、 此 者 謝 主 氏 於 得

티 : 《文集》,學者可 氏得 之,謝氏引列禦寇事 而發明之,其意尤切,而《精義》失之,今見 之矣。 雖巧 或 或問十九章之説。 問 而有益於學者,吾是以著之。 二十章楊氏 程子 以 又當 考 則皆若有未安者。 也。 語朱長 曰 : 之説,不大巧 范 程子、 氏 文引 引名譽以 此章之 范 乎? 語 謝

得 指 耳。 和 無 亦 氏 矣。 之 乎 疎 以 所 、蓋崖 和 和 若然,則恐非聖言之本 知其意之所在,恐其直謂 謂 或 問二十一章之説。 而 也 不同者言之,而未 異 期於 其論古人用字 未 争 必 皆與 不 期 人 於黨 争 曰 : 有 其 意 不同 以 也 者 不欲其至 所 范氏 别乎知 語 謂 之説 楊氏 得之,謝 和 漇 新 蓋 於 和 語 奇 則 陰 意 是 而

范氏尤詳。 或問二十二章之説。曰:諸説皆善,而

之,但 家,何 説 未 矣,然其 一經文本意 也 知 所謂 或問 見 也 類 義 皆 始 ? 斯 理 不 既 二 十 於 日: 民者爲指今日之民 粲 未 附 何 然 察乎毀譽之所 經 諸説之於此章,其 許 四 文, 曲 章 也 有 之説,一 而 故 條 直述己 其 貫 是 " 以 非 也,是以 無 莫 意 名,其 疎 所 知 意 密之際 使 取 其 則 於 人 皆 果 其 卒 欲 讀 爲 美 諸 又

之也。 之也。 譽 譽 之心 若有 謂 謂 顯,已 加 未著者,雖有 欲人之善也 於人之善惡 亦驗 之矣,請復詳之。 本 \Box 意 無 無 耻 而 與 然則 毁 言 無 預 ,光明正大,稱物平 其將然而未見其已 不 其 進 似 是 毀者,惡 詆 人 此 可 毁,則聖人之心爲有 殺 而譽之矣。 之惡 過 所以言譽 毀譽之説 皆 得 不 乃 放故 而 ,稱之未嘗 未 而 善 辜 以 是 全 有 校者,然熟察之, 決知 未著 善 但 無黑白 寧 蓋 所 速 則聖人之心 有 加 失 指 其 、惡惡緩之意 不 試 日 奈 而 不及毁,蓋非若 不 少 [譽者] 欲 遽詆 不善 何? 而 者。 經經 是 然之辭 施 有過其實者。 人 知 以 ,無毫髮之差,故 所倚 之惡 之也。 1,善未 罪 其賢,則 但 而卒未 \Box 不 耳。 疑 有先褒之善 也 則於經文之 得 矣。 也,故 惟 美 吾 顯 曰: 若有 而 試 邨 蓋 嘗 善 既 後 而 曰:有 《書》所 取 云者 然 略言 遽 聖 世 惡 雖 功 项 詆 以 稱 所

是乃 譽於人,皆以 宜 之毀譽不 難 荒 孔 如今之云也。 以爲三代之君 失,然後此 夫恝然無情 雖 惟 日 五常、元包四德之發見證驗也。 . 云 遽 唐 至公至平, 子 斯 之説 樂道 此三代之治 論 言其爲民,而 天地生物之心 但以毁譽者爲一人,直道而行者爲 9 民之所 請 ^ 春 私 人之善 意 先考諸家之意, 而 秋 者 也,此 直道 無私 可 下 爲 傳 ,賞善罰惡皆 爲今日之民,何 謝、侯、尹 得 者 **>** 至,則恐其 民,所以直 好惡 惡 亦亦 楊氏 説 而言矣。 流 所 也。 稱 謂 善 如 於 然此 「善善 人之惡之意。 矣。 又自爲一 若以 申、 夫子之爲。 氏皆以爲三代之毀 古注 而以經文 道 然如 以 商 高 是 意 長 直 慘酷 而 者 則未 爲 也 、范、游 説 道,如 聖人之心, 惡 行 其 人於老、佛 有 ? 之科 亦 説, 倚 惡 但 嘗不存 訂 而仁 而 日 侯、 短 以 夫 其 不 則 氏 0 此 句 得 經 子 皆 得 以 9 民 尹

意者。 歟? 哉? 以 暇 以 指今日之民,而上推三代以實之之辭 推 宜 可 者,乃三代之時則嘗行其直道之民, 而 今之云也。 耳,然其 於古注、范、游之説 人 言。 斯 云 明秦、漢 細 之,如伊 耳 也。 讀 民對三代之所以直道 此三代之民所以 此 日 此 況今先言斯民,而後言三代, 贵 而詳考之耳。 旨 經意隱微, 其 西 或者之一 尹 味, 不易民而 凡此 説 漢 所 亦 諸 比 謂 皆 數 前 儒 此 可 而 説 説 , 但 説 嘗 民 化之意,亦 通 直道 班 衆説 差若 有 矣。 是 既 斯 如 固《漢書 是説 民 不 雜 而 而 民 何 ?,皆指: 通矣。 淵 然 則 ? 亂 行 行 天, 如 則 通 爲 是以 加 而 日 》贊引此文, 其 古 當 則 讀 何 粗 0 所 亦 説 又何 以 者 晏 得 讀 謂 也。 則 日 不 今 是 失 是 他 得 而 則 其 者 之 擇 斯 則 民 文 Ħ. 如 經 焉 近 文 不 疑 IE 民

或問二十五章之説。曰:諸説之義,皆

示信 之見 有 豕 所 以 渡 聞 未 下 河之類 猶 通 則又 楊 足 氏 以 此 可 蓋 及 疑, 庶 意亦善。 今 幾 H 恐不若從胡氏 焉。 史書之所 但其 而范氏 个所謂 闕 意謂 者 而 闕 闕 蓋 夫子 之 以 如

之爲.

得

也

氏

所謂忍性

者。蓋、

亦可

以

兼

此

矣。

其 亂 於亂 其 外 巧言之人,何德之可 謝 疑 口 知彼言之巧,而 氏 説 以 德,與小不 之者,又不特巧言 之失,而 氏 於 所 德 亦不 成 以 有 論 或問二十六章之説。曰:巧言亂德 德 加 德 爲自爲 巧言爲他人之言者得之,但以亂 通 則亂 已乎? 又欲 則與下文亂大謀者不類矣。 矣。 忍而 巧言能亂己德,是又務內 與 德者 我 小不 自 若 聽之,則是我以巧言自 下文小不 而已 亂 亂其大謀者無異 忍,范、 ,乃多言 以 · 而 亂德 也。 巧言之害,又何 謝 忍者 而 也 尹氏以 言,則 、楊以爲無果 非 同 巧 科 矣。 爲 其 言 慎言 所 蓋 德爲 而 范、 也 且. 亂 略 以 止 不 楊

> 勇、强 能忍其愛也 之爲義,有所 爲 斷之才,侯氏以 盡 其 弱 意 不 耳。 同 , 禁而 匹夫之勇,不能 而 티 : 爲無含弘之度,兼此 皆 不 然 爲 發焉 則 不 忍, 婦 爾。 人之仁, 何 忍其 婦人之仁,不 也 ? 暴也 兀 日 一説,乃 夫 之 忍 尹

所同 取 楊、 無蔽矣。 是已。故衆人之好惡,君子必察焉,取於衆而察於獨, 張敬夫曰: ,此衆人之所惑 也。 侯尤善。 或問二十七章之説 至於事若善而其情則有害,事若不善而其情或 天下之善惡,有如白黑之易明者 張 ,而君子之所察也 敬夫又發明之, 日 如 孟子於仲子、 諸 義 説 , 衆之好 則 皆 益 同 惡 理 匡 備 而 斯

之 所 而 理 有 顯 之理 不 矣。 或問 口 大率 道 殊 一十八 無 觀 方 即道之所 章之説。 體 但 人 則 有 豊 知 日: 在 能 思 大 道 張子之意 其 則 即 所 所 可 託 以 以 大其 之人 爲 微微

哉? 爲 文之意。 尤甚。 謝 説 楊 亦 尹 善 所 但 引 徇 皆 道 與 不 此 求道之云 文不 類 似 而 楊 非 氏 本

然 改則復於 本文正深 勸 或 問二 無過之說,是雖若可 責 懲,意之向背則 + 不能改過者之辭 九章之説。 不同 日 0 矣。 今諸説乃爲 以 諸 説皆 互相 發 善 明 能 然

然其 焉。 之。 進 説 後 心 道者善矣,然亦非本文之意 非 亦 道 不 未必得 ·以爲 (所以 其所 范氏 之譬,而 或 以 非 問三 其 也。 謂 憂也。 爲 所謂「餒存 來 禄 説者。 治 十一章之説。 以 既 君子之於貧賤,自不 以 本 不求禄爲不謀食 不可 尹 下, 亦 而 が、侯氏 却,而 非 不恤 焉,禄存 則於 也 以 末」者,雖若得之, 吾復 文勢 曰 : 耕 吕 焉」者得之, 氏 而謀 謝 楊、尹之説 有 繚 氏 易憂貧 ,意亦善 以 戾 ·足以 能 食爲學 處 而 處 之, 不 動 貧 以 之 倫 其 得 其 憂 但 以 然

> 明 文勢 陷於卑陋也 材而發達之。 也 不 胡氏曰 甚 平 言雖平常,意則高遠 謀食憂貧,識致之最下者 E 聖人之教 此 外 小小 則 以成小,大以 胡 氏 之説 亦必 成大,各 誘 亦 液使 有 所 不 因 發 其 淪

之意 楊 説 深 禮 未 以 未 何 日 亦 不 安。 不 以 仁 盡 也 氏相因之意甚 ,則又重内 玩 動 0 莊,動 善者 之。 爲 程 ? 可 爲 或問三十二章之說。 發明 子、 蓋 重。 不 政之事 日 范、 ,非特爲民之不 動之不以禮 范 自 内外本末之序, 民不以禮,亦其支節之小失耳 知 氏 警 而 吕 能守之,則大本已立 及仁 皆 省 氏 輕 也 善善 以 外、 亦 信,但 以 守, 此 然 ,乃於化民成俗之具 爲 求 賤 動 章 爲學 得 爲 之不 盡 服 物 兼 極 之。 曰 : 學 而已。 而 善 臨 一爲完 者 之事 以禮 貴我之意也 而 政 程 謝 雖 全 子 處 備 氏 未 大抵 也 其 備 己 及乎 養仁之 下有 雖 而 德 而 此 莊 臨 其 也 官 章 爲 要 有 所 蒞 民

姑 亦 考於此文之本旨 當於 也。 爲 政, 而 ",而 指 敬 持 不 子 至於接物 守之固 但 门,説者 其 禮 但以 心之發 誤用其 未 大失,而 乎 政者 知 ? 爲 所以 體 未能 則 雖 語 而 處家之際,亦非 不 未暇悉及其小疵 以 . 亦 兩言之也。 而 一,而 體 專 爲 周 無以 所 己。 於爲 氏 誤 謂 外 爲 以 設 所 動 然程 而 學 臨 動爲 之 謂 藩 不 然 政之地矣。 以 垣 莊 及 子 티 : 莊 禮者,又不深 ,不考曾子 蒞 平 己之作 非 不之辨者,蓋 也。 蒞 者,不 他 周氏之問 智 禮 贵 識 動 爲 之明 皆 此章 知 不 也 之 其 E 能

氏 及告子之早爲言, 其 而 所引 意 於 云「君子之道大」以下得之,但章首四 小 若不倫者,其 或 知 四 問三十三章之説 無 + 所 不 當 動 疑 心者,若 然亦 亦 疎 或 矣。 未 以 有以 孟 可 曰 : 吕氏於文意尤不 子 以 必其然也 之不 明 程子 大 一受之 動 至 一矣,但 心 句 不不 意 范

者,自 誤矣。 精,故 知 同 喻 不 云, 安有得其精而決不可以 而 爲 物之意也。 之意,似不指此 言 氏以大受爲受道 君子小人之身而言 合,蓋其牽於經文可與不可之云,欲皆主 可 君子之於道 不 ,以爲稱量斟酌之 亦非 似 則 侯 以 可 有所不 吾 可小 亦近之,而 蓋就 小知 氏 求 此 已 以 其 章之意,與范氏 辨 知 其他 君子 其説 9 精 於序 通 而 ,得其精 之 必 不 人之於道 文義 所 語 ,固大受之一事 理 而 以 文矣。 可 以 爲 意 平 論 其 大受。 殊 語 此 衆 亦 不 ? 其 説 不 而 兼 而言 明 有 則尤 文 知若皆主 章首 而 遺 其 其 楊 然細 小 滯 若果 義 不識 折 其 粗 氏 以 不合者。 則 其 則 無 諸 粗 得 四 養 相 粗 可 亦 小然觀 爲 [句,其 如此 故可 考之, 義 其 馬 不 其粗 貴 疑 於 理 大 之 口 觀 不 不 理 也 體 説 失 則 小 可 及 大 惟 而 則 似 本 而 略 又 其 受 以 決 知 文 尹 爲 賤 於 亦 mi

君子 其爲任賢使能之異 視之猶人也,一 如 氏 而 何 爲 而 其 氏、張 庶 (材可 小 要 知 不 知 得 則 若范氏 者,至委以國 氏 旦 不盡 之, 之説 一受堯之天下,若素有之。 也與 於用 然 之説 亦 亦 善。 未 小 一; 則 人而 爲 知 未有 吴氏曰: 明 其 大受 所 不敗者。 謂 加 則 方舜之耕 無 不 小 必 張敬 疑 敗 人 可 有 於 耳 小 夫日 事 立 知 稼 談之 時 此 爲 此

爲 取之 之所 然水 内 説 水 氏之説 火 外 也 不若范氏之爲得 急,而 日 火猶 輕 或 蓋其 爲仁與水火,皆民之所 ",然以 問 重 故夫子言水火能害人,而仁不傷人, 「凡民之情 或 三十 之殊,故仁之急 蹈 反復其 害 水 今觀之,曲 四 人, 火 章 利害以深曉之。 而 而 也。 一之説。 以 死者有之,而畏仁莫肯 則 仁 但其 折太多, 未 爲 日 有 嘗 難 賴 語 0 急 害 故 以 雜 舊 於 生者 人,蓋 似 亂 蓋 爲 畏 水火者。 傷巧 此 之甚 今節 近 · 然有 於侯 章 因 密 於 民 之 而

若程 火,則 故 非 之蹈 水 與 矣。 而 蹈 氏 所 所 仁 之文義,則 亦 一般之也 火 程子 能 君 遽 萬 而 以 以 不 責之而 子之意 以蹈 而 殺 謝 有 者 子 可 水 教 小異 未 火, 同 人,仁能養人,而 不欲生以 不蹈仁, 氏 民 致 曉 仁而死 焉 以 與 爲 死 必 但 固 而 耳 必死 耳。 下 侯氏 仁 蓋 也 皆致死 則 不 其 得之矣。 數 其 也 責 爲 其 日 楊 理 於仁乎? 況聖人之於不肯爲仁之人, 爲殺身成仁 略 意 語 害 論畏仁 其 喻 冒 氏 在 同 若 如 也 不 利 利 與 首 當 此 曰 殺 蹈 者 但 説 但 而 旬 未 而 死 仁 甚 以 則 殺 死 不 小 與 嘗殺 身 甘 必 其地 也。 水 於 殺身以 身 知 不 成 語 於仁是義 侯 則可 心 死 水火 火 害 同 仁, 成 氏 簡 人,爲甚於水 赴 侯氏 位亦大遼 然 仁 能 同 而 疑矣。 死 其 則 而 者 後 養 意 成 處 下二 亦不幸 以 於 是 又 爲 明 也 相 成 此 責 以 鱪 范 旬 其 非 音 民 而

德 於義之意 也。 非 以爲仁之故陷於 然其 ,則失之矣。 辭有未達 似 死 欲 地,乃不得已 爲仁解 紛 歸 而 咎 就

發; 明夫子勉人勇於爲仁之意者。 曰 有 辭,上章爲凡 若是」者是已。 所 任 每 「不可將第一等 也,何讓之有? 仁者己之所有 謂 . 爲者發,各有所當 ,則當自勉 事 此章 程子、范、謝、侯、尹之説皆 顔 或問 必 楊氏 子曰 讓 爲學者粗 當仁不讓之說。 而 又以 「舜何人也 不 民都 而勇爲之,不可 大抵此 敢先者也。● 而 事 所謂不讓者 爲得之於己,不容有 力,讓與 自爲之,非 知仁之爲美,而 不 云爾。 知仁, 子 與上章皆勉人爲 别人做」者 何 日 : 曰 : 而 人 ,則猶程 奪 以 至於以 善 也,有 弟子之於師 若吕 憚 諸 諸 有 1,然未 於爲之者 説 彼 不 讓 其 氏 知 如 爲 而 也。 子 讓 一爲己 仁之 所謂 則 先 有 何 勇 者 事 高 古 發 ? 於 則 之 蓋 亦

> 喜 且 則 其 高 於不讓之文,亦有所未合云。 不可 矣,然未免乎夸夫義 以 分人也, 是 亦 非 理之爲 聖人之本 己 私 得,而

之固 不 過 於正 或以貞爲正而不及於固 信爲諒,尹 引孟子之言爲未安。 不易者,諒也。 古 高 切 而 耳。 執 或問 ,然亦不失本文之意,但 ,亦胥失之。 自 則 古 貞、諒 者,貞也。 以諒當信,則爲未密。 可 耳。 諒信之别,則 之别。 范、尹之説 謝 氏 不 若曰 擇 非 曰 : ,或以貞爲固而 以 邪 1借 處義既 Œ E 亦善,但 程子得之,但 彼之執 以 行之説 解 惟 至於楊、 釋 知 精, 文義 范 以 必 似 不 直 甚 信 不 爲 本 此 所 期 而

曰敬於其事,而後其求禄之心耳。今諸説於或問敬事後食之説。曰:夫子之意,蓋

❶ 「讓」,宋本作「遜」。下同。

後敬 亦敬 而仕 註 敬 説 則失其義矣。 君者、主於敬其 疑 於 事 後 加 ,然後可 其 則 此 口 遂支蔓以 亦不 其 則 乎 毫 事 則 以 事以爲主 張 奈何? 之説 釐之間 可 受 然。 敬夫嘗辨之,亦 見 禄 其 以得禄 楊 事 皆 及 矣。 也。 孔子嘗爲委吏矣,亦曰 而 日 但 氏 尤 則 此 得 己。 若曰爲 事 矯 又 之, 失 耳 而 所當察 自 以 誣 後其食,猶後獲之意。 之。 則 謝 而 當 庶官代 而 貧 其 氏 皆以 而仕。 敬 不 可 試 病 之 也 可 耳 取 有 以 食馬 意 天,不 爲 禱 · 贵 也。 甚 其 范 會計當而 先敬 者, 而 又以 焉 必 爲 説 E 張敬夫曰 者。 又 爲 可 貧 考 其 遑 然則 爲 因 不敬 代 而 之 已矣,蓋 血区 事 學者 敬 代 仕 天 其 爲 事, 之 其 集 天 而 爲 而 事 貧

得之。 得 疎 名, 而 或 侯氏 本以脩道化民爲義 但以 問 有教 尤不 爲有教之以惡者 無 可 類之説 曉 惟 范 孰孰 티 : 氏 謂 以 則 諸 人 導人於惡 非 説 矣。 性 文 爲 義 言 教 皆 而 之 者

> 若有異 之不可變者乎? 於善 是人也,原其降衷,何莫而不善,故聖人有教焉, 之資雖有 於 善 口 反之功,其卒莫能反者,則以其自暴自 文義 謂 也 之 何 不同 教之行,愚者可使之明。 教 ,則不若范氏之爲 也? 乎 ,然善惡之類,未有 ? 蓋氣有可 然堯之子不肖,舜之子亦 張 敬 反之理,人有能 夫 説 ,柔者可 得 一定 則 也 詳 而 使之强 棄 且 不可 張 反之道 不肖 而 放散夫曰 盡 己 ,變者。 矣, 所以 則 豈 而 氣 有 然 反之 蓋 所 教 類 氣 其 又 均 有

矣,則 所 言善矣,范亦得之,楊、侯之説失之矣。 謀者也 太公者,然非如君子小 處 或問道 不 何 同, 害 其 而 不同之説。 爲 未 謀 嘗 哉 不 相 人決無 爲 雖 曰 : 謀 或 張 有 也 子 事之可 如 兼 蓋 伯 歸 夷 之 荷 三仁 章 相 於 而 百 爲

以 心 尹 語聖人。 教人 於是 或問 不 可 卒章 侮 見 楊氏之説 鰥 則 之説。 寡云 可 矣。 者 **□** : 非 謝 則 是。 范、 氏 張 不欺之説, 敬 若 尹 夫 得之,但范 日 推之尤詳 聖人之仁

古 不專爲不使至於有 在坐之人者,恐其不知所爲 之階席者,慮其不見而或至 也。 侯氏以爲聖人之仁者尤善。 至誠,一以貫之,道之所在,如影之隨形,蓋無往而非是也 持,顛沛必於是,造次必於是,懼其失之也。① 可須臾離也,一失所宜,則有廢是道矣。 道,見是人則有待是人之道,遇是事則有處是事之道,道不 子張窺竊而 則 非道 矣。 無不盡矣。 告之席,既坐 亦 夫以一日之間,起居則有起居之道,飲食則有飲食之 ,蓋各止於其所而已。 在其 張敬夫曰: 事 中 有問焉,夫子以爲固相師之道, 事物物,莫不有其道,蓋所當然者,天之所爲 也。 則歷告之以在坐者,蓋待瞽者之道當然耳。 道無往而 過 不存,聖人之動 師冕之見,及階則告之階,及席 而 己。 但聖人之意,告 於覆跌,告之以 而 然不至於有 抑 是故君子戰兢自 静語 鬱 辭則近而意亦 夫惟天下之 無 默,無 聊也 過 往 而

「懼」上,正德本、正保本有「惟」字

0

三一九

論語或問卷十六

凡一十四章

季氏第十六

者。 之所爲,惟虎之聽,非二子之罪也。 牆之憂,爲陽虎之難,以吾考之,定公五年,陽虎始專季氏, 均,君臣相 相忌,則不和矣,民不信其上,則不安矣。 條,考之尤密。 得之,但虎兕龜玉之譬未然。 有七,冉有少孔子二十有九歲,蓋年十八而已,未能相季氏 囚桓子,至九年,欲殺桓子,不克而出奔齊。 惟謝氏以 或問首章之説。 而未嘗考其事實,故其言若有無 悦謂之和,上下相保謂之安。 爲罪二子之瘠魯以肥 蘇氏曰:上富而下貧,則不均矣; 曰:諸家之説,皆隨文 定公五年,孔子年四十 而蘇 又 曰: 有無相通謂 前此者,季氏 氏 舊 所 \equiv 一説以 一家者 推兩 所 君 當 臣 蕭 之

析而不能守也」。 服,而不能來也」。 之世歟? 宰,皆見於《春秋》,則伐顓臾非陽虎出奔之前。 也。 事 牆之禍,亦本泛言,非預 則 季氏取其二,而二家各有其一。 貧、安無傾、遠 之,而至於不安矣。 懼於衆少矣; 臣,而至於不和矣。 而以貧爲憂矣; 憂貧 室無尺地一民之勢,不均甚矣。 傾者,奈何 吾恐季孫之憂,不在顓臾,而在蕭牆之内 也。 雖欲長保其祭祀,而 定公十二年,子路爲季氏宰,哀公十 曰:然則所謂 哀公七年,季康子伐邾,以召吴寇,故曰 ? 公患三桓之侈也, 憂寡 十五年,公孫宿以成叛,故曰「邦分崩 人不服等説,亦爲 日 : 是 而 不和,則臣益自疑, 以 而求富不 時季氏據魯之半, 均 求 臣 無 無 知 衆愈 不均,則 亢君 傾 貧、和 哀公以越伐 而欲以越去之,故曰 危之患,其可得 甚,則 年 而 已,則君疑其 也。 是時四分魯國 不然耳 無寡、 臣 不安至此 ,冉求爲 其在季康子 疑 君 但 「遠人不 其 魯之 均 安 益 而 而 季氏 無 無 蕭 疑 常

真 指 魯 者 問 而 傾 教 合其吉 論者乎 則 則 哉 百 尤 ,此其 以 是 公君 魯者 季氏者,亦非 不 一然者言 安而 ,故夫子微辭以告之,語 和 乘 冉 然則諸説 察乎 而 之 而 無 必 其 有 爲言,亦未知 凶者 ? 也 不 制 不 與與 謂 也 等 夫子 之所以 之,豈 患於 至於傾矣。 、謀必 考之 日 也 則 痛 富若 過矣。 自 均 之所 雖 深寡矣; 范氏 矣,何疑之有? 也。 亦 前 吕 貶 而 爲 不當其事實,其 何 太不詳矣。 氏 知 損 不 之辭 以 其若 所謂 求相季氏 之謂 而 之云,乃爲季氏 以 孔子之言 患 此 子 辨 可 於 者 在 孫 而 復於諸 至 何 等耶 哉? 貧 詰 爲 雖 當 長 而 誠 矣 略 時 之也。 久,世守 爲 而 季氏 ? 且 乃據 前 而 等也 其 〈得失 侯 其 以 蓋 季 知 君 意 若 千 引 其 日 之本 有 氏 臣 則 乘、 侯氏器 E 畫 億 家 疑 其 亦 與 難 臣 詳 職 輯 初 楊 策 不信 冉 事 事 鬼 有 顯言 大 也 業 睦 也 氏 不 之 神 來 求 以 夫 口

> 識 而 窄 但 在 狹之云 蕭 牆 之内 似 以 其 爲 於文義愈 季 氏 之 慮 疎 不 闊 能及 顓 臾

言,恐亦不必然也。 矣。 楊氏之説 所避而迂其説 通, 備。 楊、 失其國,大夫三世失其 而又於後章强 尹得之,而 庶人不議之説 或問二 范氏以爲天子十 過 章之説。 高 ,意則善矣,而非經之本旨 吕 而 不 牽 楊 唯 日、謝 實,尹 其 又兼 티 : 世失其天下 吕 家 説 尹説,併 氏得之。 以 ,則於文勢 世 理 説 附合之, 勢 數之説 又蒙上 而 在後 諸諸 言 范氏 旬 其 有 語 侯 而 蓋 亦 所 尤完 五. 也 誤 世

不失? 耳。 諸 室,則政不及於大夫,將何 前 侯 己 辨之矣。 五. 或問三章之説。 日 世 蘇 孔子之言 而 氏 失 其世數 如 其 何 國之說, 無其 之説 티 : 德 蘇 而 氏 用 曰 范氏之失,其 之耶 亦 故 其 併 或 事 非 調田田 ? 者 與 也。 也 常、三 此 蓋 苟 而 牽 禄 有 失之 於前 大意 去公 其 何 德 以

矣,孰 守也 常理 不 遠 馬 胡 雖 餘 迪吉、從逆凶」;《易》之言「積 之,則所謂 謂 八 湯 ,然其 不 氏,皆得之非道,或止其 懿、 氏 世 殃」者也 然 元 、武以諸 帝 又以 故 也 過 而已矣, 高 得 八所以 反覆 牛 四 況 歡 而 後 孔子所言常理 Ŧi. 田 有國者 侯用天子之事 姓 齊之? 常 楊堅、五胡十國、 世 常、三晉傳世亦皆不過五六,而 不,猶吕 傳 其成 氣數 百千萬變,而 理者,又未 而 篡奪之迹考之,則 贵 極 敗得失,有非所計者,是 舛戾,則 徒然哉? 但儒者之所守,則 矣。 政之紹 猶 可。 唯 也 嘗 非季氏之比 若田 晉祚爲差 當然 嬴 身,或及其子孫, ,猶《書》之言「 在我者未嘗失 不 南朝四 驗也。 統 常 善 也。 而 餘 三晉 如 不 慶,不善 也 永 王 姓、五代 然 以 天定勝 亦 莽、 雖 知 者 此 而史 曰 不 論 其 以 惠 司 有 多 足

或問三友之說。 曰 : 張子、尹氏得之。

> 6 2

,其此之謂

敷?

然則 謝説 反奈何 但 則 嚴憚敬畏之益焉,皆有 則三者之於人,皆 如彼 . 無固 是亦釋其文之正 善矣,然猶其論子貢問仁之意 此章之旨,其盡於《集註》之説 ? 之所言 守之節 曰 矣,便佞 而 便 已也。 辟 有薰陶 則 意 無友善之誠矣, 則 興 云 日 無 起 漸 爾。 0 通貫之實 慕效之益焉,不 漬 損者之友 之益 若推 而 也 焉 而言之, 也 。皆有 其 乎? 相

日

至如 雖 美矣,然以 以 與 禮 諸 是之密也。 節 或 樂,以 問樂節禮樂之説。 説 不 下文二句 同, 樂節禮, 然亦未免於太 范氏 例 以爲動 而 推 不 之,則 使 曰 : 流 必 重 以 離 諸 此 , 而 禮樂爲節 相 説 句 勝 皆 文勢又 未 其 以 應 説 爲

通貫之實也」,宋本作「貫通之意矣」。

若」下,正德本、正保本有

友」、宋本、翻弘治本、正德本作「貴」。

勝

己

也

敬

不

和

矣

佚遊

則

棄

人之善矣,

宴樂則

憚

親

矣

日

然則

其

相

反

奈

何

?

曰

驕

樂

則

不

其

爲益豈

不大哉

損

者之樂,則

范

氏

得

之

焉

雖

欲

不收其放

心

以進於善,亦

不可

得

矣,

之熟,是 養 此 不 人言之,失 夫子之言 ? 經之本 氏 其 但 亂 莊 説 爲 曰 而 非 敬 0 講 爲 己。 意 和 君 不 近 明 其所謂 人之意 過 謂 於氣質之偏, 楊 節 各 過 乎 不及之過, 説 有 失 過 内 所 或 之過 之,此 或或 失人 問 也。 偏 無 兼 者。 一愆之説 未見顏色而言, 則 以 以 固 章 而 齊乎 不 皆 失 所 用 侯氏愆字之義 可 過 言 戒 之可 外 以 語 也 曰 一,但 之節 也 其 而 0 范 理 不 便 耳 亦失言耳 察 免 不 氏 以 非 然,則 之説 於愆矣。 亦 不 過 精, 失之 非 有 善 不 或

而

或

蔽

人之衰 之衰 舜 禹 爲 可 至 於天 之血 於 知 得之,但所引舜、曾子事 亦 或問三 不 前不 若 甚 叮 而 氣 但 矣。 雖衰 以 貪得者, 不以 變,必 一戒之説。 如 其 但 天 然 其 所言 舉 下 其 異 言 扶 矣。 私厚 志 如 而 日 節 而 此 : 已 若夫 其 後 則 程 則 則 能 不 未 其 子 是 其 起 曾子之將死 肖之子 嘗 意 盡 志 謂 衰 矣, 有 則 氣之 舜 也 未 其 范 不 故 盡 與 如 不 血 氏 氣 薦 亦

友,而

直

諒

多

聞

之士

集。

樂

是三

者

而

不

E

文。

與夫道人善,而悦

慕

勉强之意

新

多賢

樂之實;守之正

則外

有

以

善

其

威

儀

節

奏之

謬

則

守

之正。

存之熟,

則

内

有

以

子

之於禮樂

也

講

明不

置

則

存

其

旨

矣。

惟

吕

氏

爲

小

異

人,然

亦

非

也

日

然則

三者之爲

益

何

也

0

以

其

有

益

乎己

也,諸説皆以

益

於

曰

樂道

善

之説

,奈何

?

日

禮樂之制

而

裁

節

之,

使其

是

非

而

復

有

所

未

盡

故竊

獨

以

爲

順

亦

不

能

使

人

無

疑

也

惟

吕

矣,

然

是

愆

過

爲

·, 未

見

忠

餂

四

得之説 也; 制 務爲 子 反 置之,其亦不精之甚矣。 也 心,終日兢兢者 過 無終日之間違仁者,成 而 高 可 吕 乎? 而 不 非 如 此章之意也。 楊 ,是乃所以 而 謝 楊氏 尹 説 至大至剛 德 亦善, 爲戒 侯氏所 也 非 也 但 戒 非 以 謂 老 也 F 制事 成 而 德 乃 則 戒

厚 他説 偏 當 氏 人之説,范、吕以 得之。 薄之分者, ,合之而後備 ,蓋禀之在我 語 或問三畏之説。 意皆疎, 然大人、聖言,亦天命之所當畏也 非 耳 如天命之説,范、謝 是。 位言 ,則謂、 0 吕氏吾命之云,似 之性 謝 <u></u>: 程子至矣, 楊 · , 以 不曰 德言 命矣。 以 皆失之 爲 其 次尹 亦 天賦 大 未

絶 也? 具於 無 後篇 查 或問 滓 氣質之説。 矣。 人之生 則 於天地之性 曰: 也 其 **□** 氣 所 質 以 一無所間 程子言之已詳 之禀 有 是 四 清 隔 等 明 而 者, 純 凡 義 何 亦

> 然莫覺 駁之多 之説 則下 無復 謂 塞不 達矣,所謂學 未 小 於清明純 清 生 理之當然,有 濁 困 通者,必 有 而 民 少 而 通 間 知 亦善,此與《 IE /有清 之聖 學之衆人也。 然後 隔 而 以 而 偏、 粹 已矣。 知學 不 而 爲當然,終不知學 知學 而 純 明 人 不待 前 其 能 不能 也。 純 駁之多少勝 間 以 知之大賢 無 中 日 粹 易達 通之,而其學也 學而 其 少 無 其不 . 庸》: 之氣 清 學 至於昏 少 諸 其 T 又 明 本文之意, 查滓者, 説 及 也。 然於 則 未 純 礙 如 負 此 粹者 必 雖 以 濁 易 何 爲 者 或得 胸 偏 無 有 通 求 則雖 差。 則 中 駁 不 其 不 則 於昏 則 故 雖 日 以 者 通 通 通 又 未 其 必 於 非 亦 0 言言 甚, 昏 也 也 或得 范 其 濁 無 其 免 所 專 明 所 謂 偏 平 所 室 爲 氏 此 懵 不

⁰ 據 此 翻弘治 句下原有「凡此數者 本錯 簡情况及文意,移至下段之末 」四字, 併 注云「下有闕文」,今

於 然以 生而 者。 未 强 念 謂 乃 非 以 勸 遽 以 與 論 謂 資 疎 戒 聖愚之分,特在念不念、 而 及 L 求 敏 知之者,豈其氣禀 其 其 質 謝 而 皆有聖質。 己 乎 文考之, 所知 復 不齊之質, 而 而 氏 發 (,然其 其 也 復其初之事 得爲聖人耶? 論 所謂「人皆有聖質」者 初。 0 則 此 語 而 意 夫學者 章 若以 非 者殆 IE 上下之勢,似 也 論 初不 論 性之理 其 又 固 其 爲 凡 謂 異 敏 知 求 所禀之不齊 此 源之性 於 1,亦非 數者 此 以 困 不敏耳」。 而 衆 言,則 義 復 亦 人,特 其 理 學者 又不止 有 也 也 而 初 此 此 E, 勉 也, 以 夫 又 若 章 理 而

件 上 思 或 這 問 九 件。 思。 下有闕文 日 0 不 是 雜 然 而 思 當 這

思 是 Ē 妄 想。 無 或 問 及。 0 曰 人當 若只 若 閑 隨 塊 然守 時 事 不 而 思 自 思 家 若 量 箇 義 無 理 軀 事 殼 則 而 直 臨 思 至 事 有 則 而

> 之,謹 庸》却 好 獨 事 句 事 及,好義之速也,見 思之矣,此 亦泛 九 正心、誠意, 者能之。 足矣。 而 方 思 雖 思,閑 然 固 先理 無 思之,明辨之? 不 而 各 頃 先 至於隱 專 會 聖人説千千 無 有闕 時却莫思量,這 刻之失, 説 統矣。 知 其 却 篤 不善如 得 居以 文。② 先説 一,然隨 行之,却先 T 水水其 ,方做 荷 然後 致 探湯 亦 萬 能 志 知, 善。 《大學》何故 其 萬 以 爲 惡不仁之誠 行 得、 所 是 却 敬 在 義 能 張 説 以 當 甚易 如 行 這 義 敬 隨 達 博學 思 何 裹 爲主 得 夫 其 其 7,只守 ? 日 而 何 道 也 所 不先 之, 思 何 用 則 見 當 此 戒 又 其 焉 故 善 篤 便 此 思 懼 E 審 退 如 於 説 事 中 也 0 問 謹 則 自 不

空

2

⁰ 凡 者 此 īE 四字自上 數者 保本以此句屬 又」,原 段 無,今據翻 移 正,「又」字 F 一段。非 弘 治 據翻 本錯 弘 簡 治 情 本 况 元 正 保 本 此

一行。「此有闕文」,正保本此處不空,於下句「亦善」下

其所達 所以安 人也 之道 其 (義之所 即 其所求之志也 安; 而 其 進 也 此大人之事,故曰 所 以 推 其 道 於天下 未 耳 見 其 蓋

其聞 得其 於師 之,則亦 之法,不過 也 其私意之未忘 學《禮》 不切,而其他説則善。 范氏 日 言,則其言皆直情無禮義之文也。侯氏之説,愚所 所遺矣。 殊 陳亢 伯 者近之,但不如是之放肆 以 或問 不知聖人曷嘗有是心哉? 偏。 爲 實以私己之心期孔子,故有此問 則 魚之説,而又以孔子爲遠其子, 可 德 陳 蘇 興於《詩》, 如 以 若曰學《詩》則心氣平而 氏 性成 亢之問。 此 有警云爾。 ,而以爲聖人故推 之説 ,而自世人之私厚其 而分守定,則本 亦善。 故可 曰 : 謝氏《詩》《禮》之説各 此 以言者,於文義 程子、 蘇氏 意雖 而慢駡 曰:不學《詩》 其子而 與 楊氏得之。 末 但 侯 兼 事 子 其 耳 説 舉, 理 者觀 教 遠 則 有 明 殊 之 以 及 蓋 聞 無 相 而

近者,然其氣象則不同矣。

知此必爲孔子之言耶? 家皆以正名爲言過矣。當時邦君之妻稱號家皆以正名爲言過矣。當時邦君之妻稱號

論語或問卷十七

凡一十、

陽貨第十七

答之。 意 貨 告微生畝 所 子 心中之實然者,則是初亦未嘗詘 自言,未嘗不正其理 則 則 詘 孫 或問 辭 隨 亦 然味其旨,則 若是 避 見陽貨 其 與與 首章之説。 禍 所 不 夫辨 問 同, 謝 之暴 楊 應 長沮 何 答 而明辨之也。 亦 而 也 氏 日 如 不 無 、桀溺之語 以 ? 0 足告, 響 非 爲 程子、尹 ⊟ : 義 非苟然諾 而 理之正 觀 略 而 也。 則聖 夫子 無 氏以 姑 至於 孫 自 四家之 與 辭 明 告 人之 所 爲 而 其 之 陽 以 以 無 夫

> 仕在 親聞 道,雄之意,蓋以身與 之説善矣。 然其辨揚雄之語 此意,而亦不必 以不避陽貨,爲使知所以閩亡者,恐聖人無 亡,又何爲哉? 貨 説,不見於他書, 也 説 曰吾者,何 而貨疑其 同 諒 而 也。 ,各以其 我者, 發則可,尹氏乃以夫子本無絶貨之意 而識之與? 乎? 曰 : 如 獨此爲 亦非 一意明之,固若有異,然實則 胡氏 范、 此。 티 : \exists 尹 道 如 然則 是蓋 而獨載 則當矣。 曰 : 氏 爲二物也 權 蓋與 揚雄謂孔子於陽 然程、范因聖人之不避 此 在我耶? 皆 他説 欲見 本 然後 人言而 以夫子 於范氏之説 程子之説 ,是以 侯氏以吾將仕 如 而 彼 何 不見,往拜而 其 知 及己 此外 之不 ? 貨,①爲詘身以 八白爲 我關 日 也 党,豈其 則 事 絶 程 0 黽 無 胡、張 子之 楊 陽 無 勉 也 氏 陽 所 爲 闙 貨

● 「雄」,翻弘治本、正德本作「氏」。

歆之間 酢 言則或至於害理, 張敬夫曰: ,而自然中 0 聖人之待惡人,言雖孫而理未嘗枉。 道 擬 論 直 語 一理則或至於危言,② 周 易 》以 自 附 於夫子, 惟聖人則從容 豈 若 不 他人 謬 哉 酬 孫

也。 質者 也 形 其 也? 極 然之理,則純 性,所禀之性 之在是者,其爲品亦不一,所謂 有弗性者焉。」蓋天地之所以生物者 善反之,則天地之性存焉 前 (生物 本 告子所謂 了有偏 孟 窮原之性 或問二章之説,所 <u></u>: 其 者,氣 子 理之在是者,則 所 張子有言 IE 謂 上, 所謂· 、純駁、 粹至善 與 ,皆謂此者也。 性 生之謂 質 善善 也。 才者 香 形形 程子 而 性,程 明、厚薄之不齊 己 肾調 人物得 謂 謂之性。 ,故氣質之性,君子 所 所謂性之本 而 氣禀之性 後 子 若夫子此 謂 是 有 所謂 是 天 氣質之性 巾 氣質之性 氣 地之 然所 理 質 然其 生質之 者, ·, 所 章論 故 性 以 謂 也 者 成 謂 者 本 性 氣 何

> 之善者 於惡 也? 習於善而失其惡也。 善者 相遠 語 善至矣,而又何以 故程子以來,爲説 性 語意有不完者。 意 而 亦放 而 習於善 何 曰 : 以 ,或習於惡 日 也? 相 流 此。 於《易大傳》詳矣。③ 近 乎 而 而 汙下。 日 言 H 若范、尹則失之矣。 . . 相近言 而 如 進 自其常者 然則夫子不言性 則 乎 此 失其善; 自 古 凡是四 高 其 指 也? 吕 變者 明; 其 氏 氣 而言之,則性之 者, 性 性之惡者,習 蓋 謝 質 而 曰 : 始皆 之惡 祖 氏 言之,則 而 其説 之本 説 言之矣。 夫既 其 者,或 相 在 習 而 日 性 而 何

0

[「]散」,原作「賢」,據四庫本改。

^{≥ 「}危言」,正德本作「犯言」,翻弘治本、正保本作

歌「詳矣」下,宋本有以下一段文字:「氣質之性,固有美感」「詳矣」下,宋本有以下一段文字:「氣質之性,固有美

辨 習於 以 徐 以 不 不 耶 亦有之,但善者不習於惡 遠 日 則 亦 耶 然則 其 究 ·肯 Ė 氣 ? 忧 進 終 近 未 ? 其 不可 質 移 乎 之殊 善 不 嘗不 L 日 曰 之禀 賦 ,以習一 本 程子 而 問問 高明,習於惡 知 而 之 焉 移 失其 相 其品 下愚之品,不 以聖人之言觀之,則 後 異 之言 而此 而 也 而 近 則 不 言 而 有 惡 也 之説。 固 以 可 爲 不 以程子之言考之,則日 ,其品第 所 耳。 相絶 其 則 移 可 甚 變 但 禀 耳。 以 而 就 移 遠 耶 日 矣,然其禀生之初 日 賦 人 日 同 也 爾。 ? 其 未及乎不肯不可 責 蓋 甚 流 而 如 然則 相 程 失 異 其 聖人之言 曰:其習於善 若諸 乎 此 近 子 而 不 其 汙 日 . 之中,又自 終不 則 備 下者。 其不移 可 不移 家之説 不 善、惡者 可 矣。 移 肯 可 謂 本 移 世 而 移 以 古 相 日 也 之 張 非 皆 其 也 皆 而 不 而 有 則 近 0

之感 性 儀 有 分道 於 道 性 以 其 容相 亦 如 取 程子之説。 皆失之。 性習 前 則 儀 物 未 曷 之 本 何 謝 者 則,謂之性者,雖 始 嘗姑 與 ? 而 相 者,是矣。 而 氏 特 不不 善、 有 發於情者也,二 生 近 遠 謝 之言, 遺 猶 日 名, 據 以 近、 至 氏 知其 性 則 有 然又 尹 皆以 其 儒 爲 性之名 感於物 氣質之不 惻 而 且 所 氏 論 何 \equiv 其 同 者 隱 獲 E 見 以 爲習既 物矣。 聖賢言性之不 以 日 乎張、范之意矣。二説 之 之心 以 非 才 有 合之也。 立 而 而 出 意 出 得 分暴力 者既 指 同 姑 出 於莊 之類 作 也 於有生之初 此 相 據 至 是 也。 棄 則 遠 則 於形體 人所 爲 不 息 周 今 當 而 老、 善之名立 曰 : 之言 同 性 惻 引其 言 而 之, 飢 見 佛之言 隱之心 同 哉 矣 後不 游 食渴 則 保神 然所 ? 則 而 則 言 然聖 氏 日 固 非 言 若 之 以 有 飲 又 同 也 托 督 性 謂 探 不 於 E 而 而

之説 神 佛 爲言 恐記 之性 何 所 先 可 妙 者 者,是以張 又 不 老 而 日 移 ? 爲 有 以 魂 而 是物, 言 之意 魄 存之耳,然與上 從彦者,其門人羅 録 人爲 也, 也 不 作 日 則 **ぶ**之或誤 辨 之間 0 用 而 是 其説 所 貴 其 子之言爲未至,特 是 而 而 其 謂 且 也 者,得之矣。 大意 性 知 性 專 所 亦 所謂 也 反 托 之言爲主 其所指以 以 謂 皆誤 身 此 則善矣, 之以生, 口 性 近世 而 托 文不 移 者 誠 於 矣。 公仲素也 爲 物 者 言 矣。 爲性 無 口 言 性之大 .,是 而 然 而 曰 : 如 復 輕 生者 楊 殊 釋氏受胎 以 亦 以 是 儀 者 議之説 楊 其 氏 不 疎 成 雖 「, 反 、弊,學 則 一是又 發明 氏 所 有 矣。 性 欲 所引天 冷滯 之 益 以 爲 極 而 不 告 以 説 於 所 奪 者 其 於學 其 人 專 同 之 陰 之 地 爲 精 以 如 不 高 用

范 氏 所謂 或 問 觀子游之對者 四 章 一之説。 日 1、恐無: 0 范、 此意。 尹 氏 得 而尹氏 但

大之 於較計 禮 諸 然後爲當 孔子笑子 有 以 對 子游之才,其 也 者 但 也 反惑 者,尤不可 不必其功大名 樂 説 天下之禮樂,亦 爲 爲 其 ,似全不領略夫子之言者,其説 不辨 殊,一身有 如 夫 楊 日 謝 不可 好惡與 何 子 之私 氏 氏 邑有 之失 真 游 ? 又以莞 也 用於 曉, 則 笑子 。 豊 施 無 而 意 蓋 人同 顯 而 小 害 脩 邑 聖 非 亦 君 游 爾 而 禮 一之禮 而 身之禮樂,一 亦 隨 身齊家 善 聖 人之意哉 一若以 而 爲 子小人之云, 樂之 後 效微 而 類 其大小而 人動 喜聞 徒受以 施之 盛樂,以 但 此 不 用 知 孔 果 爲 絃歌 而 容 而 也 其 未 子爲惡子 通乎 如 ? 爲 不 周 至推 必 當 爲 致 此 家 戲, 前 至若此 今吕 旋 施 恐亦 又 戲 上下 其 亦不 之天 有一 之 則 中 則 則 以 也 以 用 於 禮 是 氏 子 辨 游 4 非 亦 焉 之甚 通矣。 家之 之則 下 之 皆 天 禮 無 之爲 以 游 文 E 刀 耳 則 樂 事 F 爲 喻 意 之

耶? 借虚 使不自 所 以是克亂 矣。 則有 得之。 之於第九篇矣。 往者,知 召孔子,其志必不在於惡矣。 東 以 周 名 可 張敬夫曰: 論 當從 尹 或 而 絶而已。 以 其必不能也。 蘇氏曰: 氏 孔 爲篡奪之計者 爲 問 ,是以亂易亂 東 子。 辟 舊 Ŧī. 周 咎之説 註 章之説。 之道。 弗擾之不能爲東周 弗擾不禀命於君,而叛其大夫,逆也。欲 孔子之不助畔 范氏 及張 謝 而 故子欲往者 多出 忠信篤敬之説 又加 子 雖《 氏 日: 説 故孔子 之失,則張敬夫辨之 於此。 甚爾。 易 人,天下之所知 程子之説善矣, 其 亦明矣,然而用孔子。 以 因其有善心 後世亂臣賊子,所 夫子豈以 象》有之,然非 頗 其有是道 未 亦然,已論 盡 是 也。 者 也 而收之, 而 蘇 卒不 欲 畔 氏 但 往 以 而

或差 盡 人 恭 道則 也 或問 而 未 蓋 六章之説 道 可。 以 盡 恭 一者 不侮 爲 得 似 亦 求 日 : 亦 謂 仁之大本則可,以 太快,恐其記 不侮人耳 程 子 至矣, ,范氏之 然 録 之 爲 日

> 爲高 耶? 仁乎? 説 者,若曰以包四者而言,則又豈 之發,則亦太急而無序矣。 者」,尤非 夫子所以告子張者, 豈聖人 室,而足跡 則又子貢博 亦 五者爲所以爲仁是 非 恐未 是。 説,而不顧文理 侯氏 、然也。 侯、尹以五者爲仁之屬,則有 聖人 其 未嘗出 又以爲聖人之仁,則 日 施濟衆之論也。 救偏藥病之意 子 又謂「信則不疑,人任 於鄉 張 也 類 未 前 如 間者, 能 遽 此 守也 以五者之效 之事 至於楊氏之説 則 士有 也。 故 失之益 止 又若 哉? 於 告 居環堵之 謝 此 非 何 氏 之 其 爲仁 其 五. 其 以 以 事 而 者 類 好 此 Fi.

不 其 則 匏 所 瓜 E 絶人者,尤得程子所未發 聞 論 不食之義,恐未 或問 之説爲 於第 七章之説。 五. 尤善。 篇 矣。 安。 楊説 尹 日 . 氏 而示人以 程子之説 蓋 亦 也 佳 祖 ,其論 程説 張子 跡之説 前 説 子 於 路 所 旧 文 謂

以 聖人,而未知以聖人觀聖人耳。 以辨之而不敢釋,亦可謂善學矣。 者,則以中心所疑,雖聞聖人之言,而自反終未能安,故問 義 語 事 張敬夫曰: 理皆所 聖人。 未安。 張敬 子路蓋不悦公山之召矣,及此而復有 夫推 范氏歸潔其身之云,非所 明 楊氏之説 然其不悦者,蓋以己 其 意 亦 觀 言

侯氏 也 所 也 亦 是 以 一,但 謂 非 非 而 程 、皆以爲真有六德,而不知學,故至於蔽 也。 其 之域耳。 非,故有蔽,則與范、侯説 子之言觀之,其失可 或 蔽者,又在於愚、亂、賊、絞、蕩、狂之外 [以其不學,故不免於有蔽,而 問 所 蓋本其好之之心,非好夫六者之僞 謂 八章之説。 明善者,則 今日 「似是而非故有蔽 曰 : 獨 見。 爲得之。 程子至矣,范、 謝氏以六者似 正相反矣,而 陷 於似 」,則是 楊 是

得 而 或 程子、謝氏尤善。 問 九 章 之説 曰 : 可以觀 可 以 則諸 興, 諸 説皆未 説 皆

> 安。 《詩》於君臣父子之際,亦 皆各得其 事 物態之微,皆可考而知也。 之説,則張子、吕氏得之,程子、楊氏之説,似 事父、事君之説,范氏 可以群,可以怨,諸説皆得之,而吕氏疎矣。 而在於學《詩》之人明理之後也,其失遠矣。 而 人之志,范氏以 風,天下之事,今古治亂得失之變,以 謝、楊、尹 然《詩》豈獨爲是而已哉 已過高,詳本文之意,恐未及是也 變,楊氏 閲 夫子之意,蓋謂《詩》之所言 理自 説 (一偏。 明 以爲比物象類,有以 則無大發明,而 ,則是所 爲觀衆人 而謝、尹氏以 以 亦疎,忠孝固 可 觀者 之情,吕 不但. 吕氏之意則善,然 而張子以 亦未有過。 不在 爲 如 極天下之蹟 無所 此 人道 氏 有 於《詩》, 而 四方之 以 爲 至人情 底 已也。 之大 親親衆 爲察 末句 滯

曰:《周南》之詩,言文王后妃閨門之化。或問:二《南》何以爲《詩》之首篇也?

疎 見 矣。 不然以 治 者,不以爲不明 似 以 日 之,用之鄉人,用之邦 意、正心、脩身、齊家之道,蓋《詩》之正風 行於江、漢之域 召 王后妃之化 召南》之詩,言諸侯之國夫人、大夫妻,被文 過之。 國之事者 其 尹氏 南 若程 (端的 ,未足以 》,則 吕氏之説 説 下 所 惟其以是爲説,是以其 謂 如 伯 ,辭若有所不 猶 也。 何? 至 子 「欲身脩 而 語二《 張 面 則 成 自 乎 牆 其意欲密,而 意亦 子所謂 德之事。 語 治家之道 曰 : 而 北 雜 南 而家齊,苟不爲《周 立」者足之,則其 而 · 而 同 足,疑記者之失之也。 程 國 爲二《南》之事 南 此。 叔子之意善 范 其 以 故其 蓋文王治 一,而 氏 日 教天下後 謝 所 意寬 盡 (所謂 (樂章 以 氏 以 性 爲 11 爲 皆 至命之 説 乎 不 以 岐 IE 者 矣, 禮 義 牆 未 世 者 通 南 而 南 也。 義 反 則 有 備 但 誠 平 名 面 化

> 之過。 《南》之近小,而 於老、佛之餘 意,與前 豈反欲其自外而入哉? 矣。 但 事,則亦過之。 厭於心歟? 語之之序,則 楊氏 此章正爲 所 以 謂 不得 然則與聖人此章之意,正 弊 好 蓋盡性至命之事 世 高 必 未 其門而 不能明之於内 而忽下者,大略相 美其言以至於此 當 遽及 入爲言,亦借 此其惡出 此 耳。 以達乎外耳 固 贵 而喜 似 | 不外此 亦 用 恐習 然 入之 他 相 後 反

庶幾 矣; 謂 《樂記》所謂 此 流 乎? 或問 也 而 不息,合 禮 詳 日 天高 味 樂之説。 范、尹之言禮 而 深體之,則於禮樂之本,其 同 地 下,萬 而 曰 : 化 前 物散 程子之言 也以 樂行 殊, 敬,其異乎 焉」者, 而 禮 至 制 矣。 行

● 「美」,正德本、正保本作「善」。

爲 有 也 程 一氏 子 所 者, 指 何 以 但 也 人言禮之用 此 章之旨, 曰 0 程 也 則 子 以 當 以 説 禮 程 雖 言 殊 子 禮 之説 之 而 體 各

似 謝 范 氏 氏 自 或問 而 爲 小不同,侯氏説賊害者,非是。 十二章之説。 説,合而觀 之,其 曰 : 范、 意 乃 尹之 盡 意 楊 同 氏

之强 嘗進 爲 惡其安於陋 相 氏 不 近 之説 口 取而無所不爲者也。 孟子曰: 可以 必與 説 或問 與 與與 有 亦 狂 引 而不可與 當。 十三章之説。 爲 而進於道也。 狷 衆説異 相遠。 者, 鄉皆稱原人,無往 蘇氏曰: 未 有 狂 然皆 爲 中 者進取 狂 也。 鄉原與中 鄉 以 狷與中 其似中 非 原 티 : 但 ,狷者有所不爲 之 是 其 庸相遠 而 庸 范氏得之,而 病 庸而非 不爲原 所謂 相近,而夫子惡之, 也 一,而孔 安於 也 人。」與中 吕 故 ,鄉原者未 子取其志 日 謝 陋 德之 蘇 各 而 庸

或問十四章之説。曰:諸説文義皆不

明白 爲 德 事言之,則 之,則謝、侯説似得之, 勝;以上下 然以二字文勢及上章德字之例觀之,則尹 氏、侯氏似以爲自棄其德,二者未知其 有德者之所賊 日 德之棄,蓋 有德者之所棄,則上 論 而以 其 今詳其 餘。 爲德之賊 固爲棄其德矣,然不曰棄夫德, 尹 句 德 意,范、 氏 可乎 相 之 似以 求, 所 也 ? 楊尤 以 而 爲 而有未盡 見 若 章德之賊 以 有 不 棄,猶 如 德 上 尹 者之所 可 章 曉, 氏 賊 鄉 也。 之説 者 字 原之賊 且. 不 之 蓋以 當 亦 調調 孰 取 例 置 日 謝 之 氏 其 推 夫 爲 其

李斯之立胡亥,張禹之右王氏,其謀皆始 之 當云患不得之,闕 而 或問 蘇氏 + 亦足以 Ŧi. 文 章 也。 之説。 驗其 鄙 夫 事 止 於營 日 實。 私 范、 蘇 於患失 其 氏 侯 害 日 至 謝 患得 於 故孔子 氏 亡國 之 得

[●] 上「禮」字,正德本、正保本作「理」。

於任 皆誤 意 事 不得之,恐 之,文義自 深畏之,曰無所不至者,言其必至於亡國 故 頗 疎 矣。 事 患得,洪 既 而 彼鄙 患 通 日 或 其 無 氏 他 ,不必 不能當耶 夫者,亦志 所 論之文耳。 以 不 爲 增字。 至,則 患其得之而 ? 於得 又豈 今《家 吕氏以爲憚 楊 説 而 但 也。 語 已矣 無 不 不能 能 病 亦 但 贵 當 作 盡 而 患 於 忠 語 憚 亦 任 患 得

於肆 過 過 者 不切 范 以 異 中 中 氏 矣。 協 哉 者 矜字之義得之,而 ,以愚者爲率其 或問 則 亦 十六章之説。 楊 又 止 汎 謝 氏 以 於 而 不釋肆 氏矜愚之説 蕩 狂 不 爲 也 切。 自恣 ,若以 性 字之義 謂 則 蓋 狂 ,則蕩之與 狂 則得 狷 與《 者以 尹氏得之爲多。 前 固 而 過 之,而 中 调 因 進 中, 庸 中 | 蕩字 取 美 肆 然行 則 以 而 以 所 狂 肆 亦 何 見 之 爲 謂 則 無 與

> 哉? 愚者 善也。 離矣。 知耳 難 進 不 通 不 如 之,於理固有所不足,至於廉字之説 有 爲不達事 教,皋陶 深廉者, 劌 未 與 退 劌者當之,則 物 爲 則 無所 盡 並 初非下 此又牽於援引之失,至於 大抵 侯氏肆、蕩、矜字之義得之,特 廉 至其爲詐 爲 是 則有分辨 之所 理,而 據矣。 仁 蓋 大賢以 則 一者,爲· 肆、廉、直三字,皆具 以 愚之愚 不 以 直爲真實不 取 又不見其峭刻之病 取 不爲姦欺 愚字之義 亦但其疾之不 其 上全德之事 而失於峭 未切,而於愚之直 人,不是過 也,安得 有辨之意 耳,未 亦 隱 然,其 刻 據 也。 ,夔之所 丽 耳 如 見其 則 以 美耳 ·, 至 太貶,又以 美惡二意 未 今以 此 不 直者 而 則 ·見其爲 於 移 可 其 而 詐 太褒 尤支 强 以 廉 所 絶 所謂 本 不足 不 謂 自 之 旧 而 而 亦

侕

哉

■ 「忠」,翻弘治本、正德本作「終」。

疾 加 詐 者 詐 ,豈若史氏 爲 直之反 所謂 則 未 塞 見 侯 微 其 生 巧 者 於 歟 愚 也 愚

蓋 協 相 相 爲 盡 則 何 乃於三者之中 知之害 而 害者 吾恐後之有國家者, 以遠 ,然後聖人惡之」。 者,深惡 難 害 害 凡 謝 而 而 物之類, 而 知 或 此 氏覆冒之説鑿矣,楊氏 日 問問 又曰「不能爲害者,遠之可 易 爲 ,有能爲害者,既於文義、事 則非聖智不 此未足以亂《雅 必然之理 見, 哉? 十八章之説。 易見之害,衆 而 有邪 唯 力言之,其 ,無故各分二等,以 若必其 其 有正 實 也。 能察 不 彼既 邪 能爲害者, 然其 將 人 同 崇而 日。 垂戒遠 也 所 有 而 不能 之與 覆邦 范、 能 名 顯 日 則 是 知 相 然 聽 尤 爲害矣,而 Œ 尹 矣。 知聖人於 也。 不 似 不 而 鄭 也 而 得之 不 爲 理 同 必必 避 者 口 後 同 今楊 侯氏 有 有 之, 者 愿之, 曉 則 而 而 能 不 親 所 也 此 未 能 氏 難 害 雖 必 利 又 爲 未

是

亦

道

或

悦 則得 首 人 \equiv 而易 之,惜乎 句 亦 惑」,於鄭聲、 楊 其 氏 推 之 之有 失 而 未 利 所 口 盡 謂 之 也 害 似 所 是 亦 謂 而 切 非」者 足 中 以 於

事

情

矣。

後説 釋氏 也。 求之, 豈亦幻妄之云乎? 氏之言至矣,學者宜熟讀 假 爲 好 而 借之辭 之言此多矣,今不知其何 或問 閉目 非 無 病 日 : 事 矣。 以正 其 + 乎 而 以以 日 彼之虚 其 坐,想大 九章之説 解此章之意, Ш 日 曉韓 河 信 大地 言 是 地 公, 會 非 無 之説 若 禪 日 而 寸 真 范蜀: . 而 日 深 土。」蓋 以 何 程 指也。 何 其 味之。 如 爲 子、 公有言 也 語 此 知 也 ? 則 信 亦 彼 張 以 小 但 其 乎其 之 日 子 張 上文 爲 可 所 0 此 子 謝 持 疑 謂 知

佞」。

⁰ 塞侯」。 弘 治 本、 正保本作「 塞佞」, IE 本 作 「蜜

也。

故因

子貢之未喻,

而

復

以

兀

時

百

物

一曉之。

夫天之不言,

而

四

時

行、

百

物

生者

此

前

非

以

爲子貢

能

言,而

於

此

有

所

不

能

論

德矣

然非

自

以

以

是發子

·貢

了; 亦

非

以

不

深

察

也

尹

故言此

以

求之於言語之間

蓋

無

不

可

論之理也

形

於事

物之間

前

夫謂

夫子

固

以

言

於人,而欲

不言以

非夫子之意。

矣。

吕氏以

曉

矣。

諸

説

如

何

默

而

成之,

不

言

mi

論之謂

耶

,夫豈言不

能

論

之

於二一者,莊

禪

也。

其卒章

此,聖人氣象其必不然矣。 有言,而方有意於不言,是亦不足以言聖人 ,而理有言之不能論者,故夫子以是發之。 發之,以見夫言之所論者 爲德孚於人,故不言而信者 若如其説 是發 數字 生之説 ? 其 而 信之也,其廣 子貢者,信矣,然理之實 不察諸 則疑 論不必得於言説之際, 聖人於此 日 也。 ,則是孔子以爲德孚 范 其 楊氏以爲子貢能 以 踐 氏 闕文誤字 爲 履 所 ,但以子貢專 己 夫子 事 謂 而 其 爲之實 未免於 造 有 而 實 大 言 不 亦亦 在 如 口 則 恍惚惚 氏謂 於天 也 之間 意耳。 耶? 由 者耳,夫豈 其 信 且 特不待言 實 是 其 ,天道至教 聖人 理, 説 所引 夫聖人固 且必以 則 無不可言者,特以 夫既 近 迥 爲 而)與天 以 而理自著耳, 豈言不能 則 脱 以 不 流 回 爲 爲 可。 失其文義 根 爲理有 ,聖人至德 於 與 地 理矣,則仁義禮智,君臣 説 、異端, 塵 日 天 百 者 用 而 地 德 而不 彝 其 不可論者,是亦老 同 如 故 不可 倫

實

則

又有不待

言

而

類

爲專求之言,而

不

察

父子

佛之

0 小字擠 不可」,翻 弘 治 本、 IE 德本無此二字,正保本此

丽

不

可

尋繹

遠

削

乖

可

以

言論

耶

0

心

之外

别有

物,恍

差,特其辭 與 病 天 又 地 有 甚 德 有 於 未達 吕 而 欲 氏 而 以 者 陷 無言 然 於此 恐 自 其 耳。 表 意 也 不 0 至 如 此 是之 其 爲

之爲多 足見者、 蓋禮際不善, 得之矣。 洪 未 意足之。 蓋 氏 有 却之如 、胡氏皆以 不終絶之,又與吴氏小異云 或問二十章之説。 尤非 ,故今《集註》取 蓋聖人之門,來者不拒,儻 謝 此 楊 所 無所稽考,難以指 其 以言 爲學《士喪禮》乃 各 峻者 有 聖人之心 發明, 其文,而 而 日 其 而皆 事 其 也。 則 言, 頗 大旨 有 此 不 以 惟吴 而 未 非 後 可 謝 則 以 有故, 、楊之 盡 事 知 氏 爲 程 者。 耳。 不 得 子 聖

問 宰 非 渦 我 自 也 或問 執 爲聖人之徒 聞 其意則忠且 喪 禮 而 家至親 二 十 一 欲 短 不 之 期 厚矣。 章諸家之説 也, 斷之言,故以質之夫子 應問 如 此 然三年之喪,生於 何 前 ? ,有謂宰我之 欲爲之文其 日 0 此 蓋 以

> 非, 矣。 人心 親 道者 非 有三 有 之心 耳。 不 乃 知之 不仁,其間 有 知仁也,是亦爲之文其過之言耳。 以 自 難 也 欲曲 盡 宰予 明之理 設使宰我實聞 而 年之愛於父母,蓋 短 可 宰 信乎? 特 其 非 其 見 我 後 爲 不察理 曲 由 爲不 喪, 之諱 · 而 食 能 蓋 折, 外 也,是其 稻 勉 至 夫子所以斥之者亦明矣。 不 然 티 : 察理,不知仁,而 則 也,亦 衣 容髮,而 而 其 而 其 錦 不 情 末 期 是其意若 禮 愛親之薄 知其道 存 減其不仁不孝之罪, 亦 斷 自 係 家 焉 心之不能已者, 之説 何 以 其存 於 固 則 爲安, 以 吾 亦 也,非 爲 異 不存,又不 心之 己 日 而 亦 仁,失之則 耶 有 不 不 則 可 不 子 知 能察 加 厚 其 知 然人之 非 愛親 降 薄 無 日 矣, 也,特 之説 其 不 · 待 而 説 愛 如 又 是 愛 雖 爲 非 親 於 是 何

❶ 「以無」,正德本、正保本作「無以」。

哉? 跂 初 痛 也。 信乎 之私 夫子 在 直 敢 處 不 或 以 絶 而 於問 無 以 自 敢 謂 其 之辭 及之乎 文不 夫 聖· 之言,女安則爲之,爲 論此 隠者。 聖人誠 宰 自 説 若如 如 而 定之 喪, 我 何 隱 徒 日 不 也 人 非 爲 於 其言,則聖 0 可 而 自 猶 而 則 豊 固 ? 處 辭 是 不 贖 夫 有聖 摘 喪之主於哀者,又非 知 日 直 不與 許 費 知 因 其 之 子 使之真 其旁支瑣細之説 其言之過 . 之,則又激於世 短 徇 日 無 過 門 言宰 而 人 只 喪 亦 安 隱之説 世 氣 不 爲爲矣,然不 此 之 則 象 以 足 俗 之所 我 何益 無 爲 情 可 以 爲 矣。 之心 爲之者, 不 薄 隱 意 安, 也 掩 以 哉 而 與人 其 之厚薄,使人 然 雖 垂 直 便 ? 而 又 一俗矯 謂 實 世 自外 此 薄 以 是 乃深 遂 失之之甚 爲 以 日 之 回 也 7 章 有 聖 爲 不 爲 僞 情 無 而 一教者, IF. 而 疑 之也 肖 責 E 人 者 或 飾 隱 其 日 至, 意 謂 者 死 而 詐 不 作 而 故

> 當 喪 實,乃 當於 然則 洪 以告之。 也 爲不仁之甚,不待至於無所 爲 思 子春 也 之自 而 氏 喪 古 ,豈習於孝弟 不 遂 有 自事親 仁 諸 有 所 人 短 以 之事 而 其 爲 不 喪 謂 心 説 然 其 俯 引 禮 如 了,乃其 矣。 樂,是乃樂之所 之禮矣 就 樂正子 喪 從兄而出 禮 孰 亦 何? 之耳。 而 也 壞 有 爲得之? 不 謝氏特恐賢者 ? 樂 所 不 爲仁之本 春 慮 字我輕 崩 日 未 唯 □ : 用情 若宰予之情,則 之言 夫 Ż 樂 盡 壞 是 若以 意 爲 所 日: 而 則 法 亦 以 蓋 重 亦 無 過 之説 似 亂 而借 未 宰 爲 善 范 不 禮 所 於 矣 紀 知 樂 薄 我 樂 其 氏 禮 用 中 洪 之 其 而 末, 然 之 也 而 之説 者 於 無 以 氏 失 後 短 V 原 無 亦 故 \Box 喪 所 Ŀ 若當 之 自 夫子 爲 喪 所 烏 故 未 者 不 亦 禮 爲 之 與 不 不 可 悔 察 我 推本 樂之 在 喪 有 ? E 然 薄 始 用 而 平

● 「作」,四庫本作「誠」。

之通義 裹 未 所由來也。 言非徒告之以短喪之不可,當示之以孝弟之真情,使知其 有處矣。 母於其子之懷,使知以父母之心爲心,則安與不安, 三年之喪,自度其有不能免者,又聞期斷之論 故夫子之不答,而直以不忍之端告之。 益 而 焉 當 以 玉 故夫子先示之以君子之所不安,待其出也,而後言父 甚矣。 則 帛 耳。 齊宣 陳焉 ,則李氏之説尤爲 此章之旨,庶乎其 但其以懷爲懷念之懷,則於文義爲 推 王欲斷喪,孟子謂公孫丑,亦教之孝弟而已, 而合於范、 然其言之失,有不待言 ,鍾鼓作焉,則其壞禮 謝 有功。 説之善者,使相表 無 所 遺矣。 李氏曰: 而崩樂 ,是以 而 ,固當自 宰予於 喻 疑 此章 者 而 也 問

諸説真以博弈爲可爲,則失之矣。 或問二十二章之説。曰:李氏説得之,

尹 子 爲 氏 有德之稱 得 或 問二十三章之説 之, 而尹 則誤矣。 氏 尤爲善。 若以德言,則 티 : 吕 氏 程子、范 之意。 以以 豊 謝 君 至

> 此耳。 其對 如此 亦鮮 守義 賢於所臨 德位之通稱,而釋二字之義甚善。 於無義而 必皆後其 爲 有德之稱,蓋其義初不異,但所施有不同者。 以不肖治賢,不以賢事不肖,凡在上者,必其 亂 之説 而言,於《孟子》之文義,亦有所未安者 小人者,則皆以位言之耳。 章言君子者三。其上二者 矣,非聖人之通言 爲亂哉? 所治之人也。 君者 亦非也。 之所 爲亂之名,所包甚 爲,顧 鬻拳兵諫,世 也 故後世因 亦牽於援 楊 ,以德言之也 氏 其以守約對 以君子爲 或有之, 以君子爲 蓋古者 據 廣,非 而 然 有 至

上,使人尊君親上之誼薄,悖逆作亂之釁萌 母之名,耳 意,是以君子樂道人之善 己 則長浮淺刻薄之心,於人則絕勸勉愧耻 或問 二十四 可聞 而 章之説。 \Box 不可 道也。 ,聞人之過 티 : 稱人之惡,在 居下 一,如聞 流 而 訕 父

其 於己者 大 以 夫也 君 子造 ,然舉凡 胡 辟 而言, 氏 在己上者 以 下 詭辭 流 爲 而 卑 而出,居是邦 兼言之則 穢之人,上 可 不 欲 賢 非 之説

是

之别 者能 俗 禮 而 楊氏之説則善矣。 矣。 也。 下文意若不 以救 以 猛 以 似 而 失,惟聖賢 不告於上,而 則未察乎其取名之善, 言之,尹 惡人者 其 子貢 説遂廢其 范氏之説,於此二句亦爲得之,他 是而 敢 以 以 則 諫爲 多言、 徼 非 其材 也,如 相 爲 則 氏 之説 屬 訕 餘則 伺 誤 不失 力未 顯言於衆耳。 方人之失 者。 察, ,尤害於理 得之。 以 此 侯氏章首兩 偏矣。 其 必過 蓋 爲 則 若 得 所惡之正 本 在 日 然謂 之矣。 洪 人,而 己 與? 而用 然此 但衆 訓 氏 之 之説 特惡其欺 事 意之不 句 之得名 兩言者,豈 謝 人 臨 勇 一, 所 故故 者字 甚善。 或 氏 事 謂 有 謂 蔽 訕 敢 材 臧耳 註 蓋 惟 於 而 世 上 則 爲 正 力 者 私 其 亂 無 者 其 疎 亦 强

可

徼爲 抄 が蘇蘇 氏 以 徼爲僥倖, 似皆若 不 如 洪 氏

之惟 旨 隸 也 下 恐 人 或問 不嚴, 也 ? 二十五章之小 怨亦 曰: 若爲惡之小人 非 所 恤 矣。 人,何以 諸家説皆失 則 知 君 其 子 爲 其 遠 僕

之説 安,無聞 惡焉 己 尤 或問卒章之説。 尹 疎, 亦不得 特無 氏 惟 似 以 楊 善 爲同 已字 氏 可 説 稱 矣 티 : 爲 爲 耳 重 庶 見惡 此無異義, 幾 恐 耳 非 則 文 謝 又 義 有 説 但 惡 亦 其 侯 未 終 氏

也

三四二

論語或問卷十八

凡一十一章

微子第十八

爲悔。 其不可 近是。 乃諫 之而 先後皆不同,惟《殷紀》以爲微子先去,比 可見矣,抑 日 一,義當早去,又決知紂之不可諫 按《史記 不以 而 或 問: 凍,而 蓋微子帝乙元子,當以 死,然後箕子佯狂 箕子見比干之死,則知己之不可諫 爲嫌。 何 三子之心,同出於至 · 殷周紀》《宋世家》所記,此 不可已也,故遂以諫 以 知其 比干少 所處之各 師,義當力諫 爲奴、爲紂 適其 先王宗 誠 也,故遂去 死而 惻 所 可 怛, 雖 祀 囚 不以 耶 者 干 知 爲 事 ? 則

謂

讀

者言之,如侯氏之云則可耳。

游氏所謂

者,以 也? 其所以 且 曉。 耶 ? 《史記》三子之事,與夫子之言,先後不同,何 之體而 未傳而 爲,易地皆然矣。 狂爲奴而不以爲辱。 己之不必去,且不忍復去以背其君也 非 之難易爲先後耳。 氏疎矣,三子之仁,豈以足以 不忍復 但 知之而 或其章首本有知字,故其下文如此,蓋 吕、謝意同, 其皆無私 曰:史所書者事之實,此所記 無違;當 不 全心之德 死 敢死? 以 已,謝氏之論 累 則其 而各當 理 其 或以爲箕子以天界《九疇 而謂之仁與? 而謝密矣,但三子之於仁, E 티 : 故 爲説迂矣。 此可以見三仁之所當 也 得 理也。 諸説 9 心之用 見 仁多如此、蓋不 微 如 有天下而名之 子之去 無 何? 而 私,故得 同 티 : 不失, 者以 謂 E 故佯 之仁 則 范 此 心 知 削 口 事

亦 游 在 時 베 贵 皆 我之問 通 日 彼 常 氏 彼 事 人之 似 之耳 得之, 之言 獨 不 在 也 雖 失 日 非 以 如 蓋 有 此 也 其 用 知 是 是 則 不 德 始 而 則 在 心 求 則 司 尹 是 於 子 在 出 則謂 之言 事 仁 無 惟 氏 於 彼 所 彼, 乎此 而 焉 如 以 所 本 謂 而 所 之仁人。 ,則又 此 得 而 所 謂 仁 章 ,而終合乎此 謂 餓 則一 蓋 其 在 以 人 當 已 死 1 則從 心 甚 人 者 爲 者, 辨之矣。 以 者 之所 事之仁 矣。 往從 ,與仁 者 求之哉 心之德 之, 則 時 安而 乎 則當以 常 彼 不 如 自爲 夷、齊者, 耳 在 也 楊、 ? 此 有 論 贼 也 此 所 子 其 若 尹 夫 其 則 是 而 以 物 前 氏 論 德 其 時 如 不 1

必 以 其 或 而 問 道 ,不以三公易 柳 F 去焉 惠 仕 何 加 屢 也 其介, 臘 朏 日 所 而 以 進 復 屢 不 仕 朏 隱 至 加 於 至

説

則

案

耳

H

人

與

可,而 其 善。 於 以 미 目 道 和 去 亦 魯 惠之 去,然則 朏 裸 於三 立心 夷、 者 孔 者 意 魯 而 而 遂 裎 之氣 近 子 諸 其 意 重 事 適 不 於 也 惠 反獨 説 於清 制 適 無 他 遂 人 若 我 滴 去 其 國矣; 行,有 矣。 集 可 他 尹 不 象 側 他 降 也 近 將 日 其 如 無 邦 復 氏 不 或 志 於 我 無 枉 大成 任 以 是 或 不 此 得 世 辱 道 以 近 不 若能 但 可 下 故 日 以三 身, 偏 於柳 可 而 能 以 爲 爲 面 其 之 者近: 則 孔 其 浼 事 枉道 直 援 謝 時 近 惠 黑出 言 意 和 非 子 下 人 道 於 説 而 出 知 所 之後,雖不 汎 歟 柳 得 則 ·之風 乎 於和 事 之, 和 以 止 玩 直 以 然 ? 下 以 固 ? 事 人 之 黜 世 道 惠之意 贵 亦 列 自信 是以 若 者 則 人,則 蓋 一不恭之意 而 日 之 而 之於逸 非 \Box 故故 無 止 爲 復 必 古 其 無 也 屑 所 不 是 仕 朏 孔 不能 不 亦 雖 口 去,然 然也 説 指 子之 察乎 民 必 夫 楊 無 不 既 袒 而 無 亦 之 蓋 必 去 裼 不 氏 杆 不

至於斯 合者 耳。 孔 矣,此 者 流 不可 自 漢 日 知甚 亦 和之守其 也 高 其 之言, 曉 楊 祖 與謝 非 若漆 日 審,其 豊 侯氏 氏 者 無 也 「焉 | 歟? 發 可 氏 放 而 雕 庶幾乎。 明 和 無 聞之師 程 并 意 自 往 開之未能 而 不 以 亦 蓋 信 而 子 篇之旨則善,然亦有疑 介者善矣,所謂 可 爲 清 相 甚 與 不 其 發。 亦若惠之爲 日 篤, 范 者之量 其以 :「柳下惠之直 失夫子之意 黜 自信 所謂 尹 之意 降 而 ,豈其 則 志辱身爲絶 確 失之 亦 同 乎其不可 也 介之量 幾 自 敷? 度 於 亦 張 馬 道 不 若 敬 於 援 有 若 其 其 則 產 此 稱 恭 夫 未 拔

間

婦

不能 程 有 子、 合 於孟 致敬 范氏 或 尹氏之説,則恐未安也。 問 子之云矣。 有 所 \equiv 禮,又不 論 章 折衷之意 之 説 能行其言, 然以文意考之,而參以 曰 亦 0 善。 程 子、 而 楊 夫季氏之專 孔子 尹 氏 氏 以 去, 得 景 則 公 之

其

則

事

責 强 僭 人之不 逼 一,夫子 我從 ,所深 也 耶 恶 ? 也 楊説見下章 又 何 必 以 是 自 而

魯之君 去之 人之謀,固 之心,知其 之口 其 或遂中 於 有 固 或問: 速 心 魯之君相 得 亦 得其 志 於 不 也 相 可 以不 外乎 ,遂乘間 無敬賢之心 孔 欲以 旨 以 不足與有爲耳, 然孔 子 史記》載孔子 出 測之禍, 之 此 使之先 是沮 走」之歌。 子之覺之也 也。 初 而 進説,以 心 孔子矣,蓋 尹氏之言, 而 與 而 有 去, ? 不 以 之去魯 今尹 而其禍之將至者 慮孔子之覺之早 熒惑 ,直以 沮敗其所 何 范 耶 一欲以 氏 氏 其 不及其 也 直 所 其 耳 女子 引 以 無敬 日 有 爲 目 爲 膰 甚 他 感 爲 齊 彼 督 知 肉

則

移

如 似 舊説之善 以 鳳 或問 德 之衰 五. 章 也 爲 之説 孔 子之不 日 0 此 見 無 用 他 於 説 時 但 恐 侯 F

遂與 桀溺 過宋 言。 群 徒 何人 肯以 不可 子 謂 尹氏 亂,夫子將 之」一句,文義微有未安。 若天下有道 誰者 丽 ,以辟 夫子 既 也。 尤詳 同群,爲夫子自辨其 夫子之道,易己所爲」,則皆不主夫子 言之也。 又曰「如何變易之」,則又不見誰字之爲 或 絶,若辟 故夫子所謂 也。 以 問問 ,乃指世人 去魯 楊氏謂 辟 可, 六章之説。 桓 誰 世自 然辟 熟復 魋 與變易之? 適 則我 今日「誰 世 之 夫子 處 衛 人者,特 而言,而 也 則 難 故機 鳥 無用與 去衛 遂 淵 爲非辟人者,而 則 日 但 與 可 不 0 孔子之不能 固 程 以 適 不 人 以 可 所謂易者,皆主 故夫子 諸 人變易矣。」 蓋桀溺言 子 義 不免於辟 陳 辟 易之」,又曰 絶 與 、張 説皆善, 去就, 至於微 人之辭 口 直與 ,群者 子「誰 解之曰 辟 鳥 丽 以 天 人矣。 而 是 下 乃 獸 未 服 則 世 鳥 以 誰 范 所 嘗 而 而 失 獸 前 夫 所 同 易

譏桀溺之辟世而與人絕耳,●非以自解其

以

不辟人也。

之,而 矣。② 所論 爲 謂 但 耶 身世之有間,爲 不 所 人、而 無我者 偶 ? 見 謂 於經 名不 或問 不見於聖人之經耳,書 聖人之事 所謂 此篇大旨,亦初 謝氏以夏、商之衰,未 認 但 耳,何 足以累之者,非 七章之説。 人爲 扶 世 爲 我 無 多 立 聖人之無我,恐 以 彼我 哉? 教 如 知 者 其 此 曰 : 不 之私耳,曷嘗 不累 亦 在 而 E 是。 諸説皆善,但范 楊 非 是 傳 辨 於名 氏 是。 也 有 丈人之名,偶 所 於 論 亦 避 載 前 而 大 子 未 又 世之士。 者 固 抵 路 誤 然。 以 固 之 丈人 匿 范 以 多 不 音 之 我 所 知 有 氏 氏

2

0

[「]前者之章」,四庫本作「前章之下」。

嘗廢 義也 氏之意 仕 道 處 然其 楊 患於不行,不合而 譏 其 曰 日 由 外然 . 之不行矣, 0 哉 所 氏 此 接 獨 觀之,道義 也 ,義則有 知子路之賢 求 亦 德 輿以下數子 之志 以 未嘗 其 則 是以 而 丈 曲 丈 隱 人 可 折 也 人 懷 而 君 不 爲 無 也 之 私 徒 者 子 而 則 0 可 去,則道 故 求 仕 未 徇 雖 止之宿, 矣,義 尹 侯説疎 又 庶 志 嘗 禄, 知 口 安得 氏 其 隱 乎 道 相 而 以 免於 而 之不 合 ? 雖 離 皆 矣。 爲皆 非 苟 乃未嘗 而 而從 不 素 也 素 日 無德之隱矣。 行 逃 行 隱 素隱者。 時之安 隱, 日 亦 前 夫 仕 則 也。 而 . 一言以 可見 尹氏 何也 所 然 未 義 道 若 嘗 亦 固 以 則 矣。 也。 及 .楊 不 未 知 之 ? 而 不 行

於 此 氏 章發之,不若其於《孟子 中 或 問 慮 之 八章之意。 説 非是 日 : 楊 氏 范 * 第 制 謝 行 相 尹 篇首章 救 氏 之 得 辨 之。 論

之之當 説,則 食、 仁得 明 則 魯之樂官 人 用 由 日 者 樂 無 官 寬平廣博者取數或多, 也 也 . 樂 張子、謝 亦亦 失 IE 所 以 莫食,凡四 ^ 職 仁 考其 或 樂 ? IE. 由 白 此 非 者異 問 侯 魯不 ,淫樂之矇,參於其 而 廢 虎 而 篇 如 也。 氏 棄 歸 其 所記 自 通》 前之説, 氏得之。 矣。 恐 賢 用 何 以 趣,是以論 所 此章之説,大抵 亞 飯。 初 耶 而 夷 以 日 皆 以 飯 其論 放 無 ? 知 爲 齊 以 棄之? 諸侯三飯、大夫再飯。」 「王者 [潔身遯] 此 則 亞 抑 説 程子 爲 下, 無 意。 與 者 以 飯 鄰 此説 而 口 蓋凡 張 闕之。 則 爲 以 爲 於仁者, 平. 無 亦 間 世 又 子 魯樂既 未 爲 侑 不 所 日 也。 之士,不應 不 本 謂 不 知 可者則得之。 此 食 食、 指 若 無 異。 飯 諫 其爲 范氏 其辭 數人之去, 之官 太偏 所 與 彼 也。 正 畫 不 據 之 所 魯不 用 以 如 而 食、 太簡 詳 謂 諸 也 爲記 後 朏 旧 而 以 能 故 晡 求 FI. 之 曠 此 有 其 夫

而通其意於下章,則又太偏而近於鑿矣。以必其然耳。楊氏以爲著之以見周公之澤,

也。 得,故 説 無恩者。 經,未見不私之文,則 施 合也 此 音移 是唐本 本已作 文》云爾 其 矣。 與 氏 ,顏音戈鼓反。 之施 親 有 與 則固 但其 或 程伯子以三句 親 以 然其 ? 施 初未嘗誤也。 問 有以 之恩者 施 、辭簡 明言之,但 者,言不 施之爲 而 而 曰 : 旨 爲 吴氏 讀 謂 不 略,未有以驗其必然耳。 施 他 如《 此 報往 分明 無失其爲親 其 弛 考開元五經文字,亦作 説 不 私 《衛綰 何 失在於望報, 如 不 反 可 疑 其 來之意者 ,則未知其 然孔説已訓爲易 . 引 二 復 何? 曉,然作 於不 親 也? 傳》之施易者 而言 暱 書爲 者 通 也 曰 : 티 : 則 則 有 弛 恐其 果 證,豈 無 有 然考 者於 似 而 人 以 陸氏《 、之所 意 以 不 何 吕 而 耳。 ,則漢 之於 至於 或 在 其 爲 氏 恝 施 義 弛 於 以 説 然 暗 出 釋 爲 爲 如

> 意 范氏 之而 恐過 以此 也。 爲考之於《書》,魯公氣象,頗 邢侯、❷《漢書》成帝欲施 重 施,今不責其 也 ,不應如 深。 又有謂 以 已 四言者戒之,其意美矣,然施字之説 哉 爲 記 ? 君子所以爲親親之道 此 施 魯之所 (望報, 至於四言之序 也 爲施刑之施 0 是皆 而徒 由 衰者,恐 日 不考於《釋文》之 諸舅之語爲證 ,而引《左傳》晉施 不施,恐文勢之 則 傷 ,豈但當不殺 嚴 亦 亦 急 吕氏得之, 未 故 必 有 周 此 调 則 公 以 邨

^{●「}應」,原作「因」,正保本作「固」,據四庫本

❷ 「邢」,原作「刑」,據《左傳》昭十四年改。

論語或問卷十九

凡二十五

子 張第十九

則 爲 尤有 則 同 ,然曰「可 Ħ. 已支矣。 止 其語揚,此又有 力。 章 或問 ,非子張之意。 · 所謂 范氏語意繁複, 首章之説。 也, 可 曰:「其可已矣」,豈 也」者 則 不同者,讀者所當 其 楊氏 語 歟? 曰:諸説皆善, 抑; 分别 蓋不 曰 日 成 口 曉 人與士之别 不猶首篇之 其 可 ·? 之爲 可 辨 已矣 又以 也 而 謝 可 則 P 氏

加

其

所以

執德者存

乎量。

量有

大小之不同

之

量

而

言

也

蓋

人

之所

以

體

道

者存乎德,

以

或問

弘之爲

寬

廣

奈

何

?

日

此

以

0

美,而 下之事 此耳。 下之事 小 若 若 之, 如是之寬 地 言 故人之所以 張 有 如 馬,此 以 È 此 有 不 不 進學之序爲言,故以信道篤 該 可 可 哉? 雖 而曾子所謂 天資之美爲言,故以 才,則必欲試其才。 不 衆 有 以 其量之小者, 以 非 有 自 其 理 有 有 廣 (所守之固 其量之大,則其所以執德者,孰 不 不 以 程 執 所容; 所 丽 而 屑 子之言 深 爲 德 加, 不迫哉? 爲 不 察 得 可 自 有 9 小 恢恢 以 弘 才 若 知 以 ,雖若與 有 事之當,則 任 善之得 足 足 而 爲 知,則 不可 所謂 乎 有 天下之重」者,正 《易》所 以 以 博 執 其 不 濟 周 德 奪 經文小戾, 執 必 胸 弘 ,則先爲 兼 爲主 衆 萬 弘 然 中 也 德 欲 爲 物 百 喜 謂 務 -常若 亦 不 用 善、 也 主 自 「寬 夫 而 弘 而 安 其 負 主 具 於 總 有 於 以 然子 能 者 知 程 夫 天 衆 謂 能 餘 天 居 既 子 蓋 而 而 爲

日

尹

得

之,但言

其

人不足爲

輕

重

耳

以

是

爲

也。

焉

能

爲

有亡之説

如

何

? 得

不弘 之序,又有未得 爲近之。 外 剛 由 其 則鄙 謝 至者 毅 積 資 有 氏 累 禀之本然, 執 而 一,足以 薄 所 但范氏 充 德 後 謂 纖 擴 ,然後 能 物 巧之心 奪其所守, 者。 以 莫能 執 所謂 至 而又信之不 德 能 謝氏 於弘 生 勝 信 不足 則 道 則 而 執字之義,反 所 哉? 要熟復而 是非 若 則 有 謂 有 篤 容 於其先後 心 范 利 不 「則鄙 不 則 氏 害得喪之 切 廣 其所 深體之, 者。 以 者 詐 淺 重 爲 守 然 人 最 深 於 發 矣。 爲 汎 守 執 説 其

弘

强

何

非

者,其於信道 其 德 似 他 所,而亦 也 執德 則 皆 不弘 張 未 不 子、 得 弘, 如前 無所係於有亡之數矣。 其 謝 旨 不篤,不能 則 氏 所 也 又 爲 云者 何 日 以 説 言 則 爲 尹 范 有亡者 雖 之 氏 氏 不出 耶 所 ? 侯 謂 不人 氏 則 日 得 爲 出 其 之

然則 於始, 觀 所 古 通 之交際,固 而 矣。 之, 有 擇 當 遽 交、擇交之異,而 奈 或問: 如 以 初學成德之不同 則 則 而拒之於終者。 初學固 何? 子 拒 程子 又 張之説 人 非 有 三章 爲 之説 所謂 親 日 當從子夏之說, 心 疎 - 之説 ,然於是 二子之言,各有所 ,則非急己緩人之道 厚薄 尹氏 亦若 者能 ,古註以二子論 之不 包氏之説 亦用 有未安者焉 好 非 一説 惡之心矣。 善惡之間 同 孰 其説,程 然 然 是 不求 於此 ? 未 偏 有 子乃 日 交, 諸 成德 容 以 爲 吾 曰 之 此 無 有 既

或

但

爲

容

物之容乎?

容

物

固

弘之

事

然

於

文

有

可

考者,故未

有

以

知

其

所

以

指

意

者

氏

所

謂

無

所

容,

1

語

既

約

前

又不

若范氏

之

乃

口

見

其

意

耳

楊氏

所謂

大不足以

有容

侯

自

執

德

字

無

所

當

若以

容字指

夫

所

執之德

而

言

則

與

下

句

信

道

不篤者,又不

相

類

恐

不

言,而 之,其 矣。 夏者 已論 不能 如 道 然於其有大故者,亦不得 如 語 則害乎交際之道。 子 意 廣 子 有 一、未有 爲 之矣。 楊 夏之言,然於不可 張 不屬 庶幾 又稱 相爲先後之意 則又若 首 氏 孔子有 則 尾 蓋 其 是 而 以 衡 乎 折以聖人之中 用 見 1 異乎夫子損益之云者,是 非 凡 無 決 程 所與有所拒,以 衆 抑 殊 互鄉 人皆當如 티 : 子 揚 人 成德大略當如子張之說 之説 不 ,則非 之力 、所及 不 他説 可 者, 絶 曉。 耳。 而 者, 此,而 原 當 道 而 亦 如 不 壤, 疎 日之本意矣。 何 似 其 蓋 絶 則 謝 之而 合 ? 以 亦 又謂 其 以 初學大 既 也 乎子 爲 明子 自 所 以 日 E 二子 以 相 非 交 以 0 ,拒之 際 張之 夏之 略 大 以 范 是 矛 病 其 當當 之 賢 氏 處 盾 當 子

身以 巧 之屬 治人,道之大者也 或問 也 何 日 以言 小 小道 者 之爲 對 專 大 一家之業以 之 農 名。 圃 醫 正 治 心 技 於 脩

> 釋氏 若謝 泥,而 明言 異端 矣。 以 其 而 氏 可 而 人,道之小者也 之 皆 必有 始固皆聖人之作, 由 E 意 乎? 當之, 不可 不可 小道之爲異端, ,則其 蓋 氏 君 也 可 初意,蓋 子 行矣,豈 坦 觀 以達於君 不爲 侯氏之失,近 所可觀者,非 則 途之支别 也。 其 ,然是皆用 也。 亦謂 説 然能於此者, 口 將 子之大道,是以 謂 范、楊之説 而 然日 此 有 其 各 則 真 自 亦 而 皆 非 有 足以惑 於世 可 矛 類 其 坦 異端之謂 '觀,亦不待致遠 盾 此。 後 或不能 物 途之支别 而 蓋 而 乃 之 人, 不 尹 以 不 本 理 可 致遠 氏 口 莊 則 於此 於 焉 無 老 謂 通 猶 雖 恐 謝 不

温 且 范 氏 故 以 之云 則 知 或問 不 所亡爲 可 Ŧì. 則 章之説。 於 知 蓋 彼 新 温 此 者猶可 故 先後 者 曰 : 之序, 也 慮其遺忘 尹 以 氏 無 最 兩 忘 爲 失 而 所 之矣。 得 温 能

以

日

知

所

爲習,

以

無

忘

所

能

則

於

彼此

文義

之間

皆

有

楊

氏

又

以習

察爲言

與

此

殊

不

相

知

所

Ì

則

可,

而於

無忘

所

其心

而

言耳

楊、

侯

氏

H

益

之過

於其分,

不察

乎

所

謂

爲

己

人之學也。

此蓋懲於玩

曰:「非爲

人者能

之」,則是凡讀

所亡,不離大體 物喪志之一言,而 能,則有 ,不得爲 之云,以之言 所不通矣。 爲 守之之固 學 尹 爲 則 無 其 调 書者 所未盡 人者 似 察 固 非 氏 所 當 講 初 高 也 疑 習 不 讀 能 所 乎 未 矣 皆 其 蓋 謂 夫 問 書 失 嘗 也 意 之 之 H 以 推 爲 又 體 子 辨 不 H 無 之所 也。 得仁 之不 子之言 若 之謂 中者 則將 叔 外 爲求仁之事 自 殊 用 有 知 子 有 馳 益 也 無 其 有 可與,然於講學之間 所 聖賢之言,求 可 也。 ,皆爲求此 不 則 者 或問 不得矣。 而其 同者 以 陷 捐 固 謂 伯子之意 仁之 何 於異端 類 叔子之言 偏 事 六章之説 (言則 亦得其 也? 棄 推者,則 1,奈何 耶 廢 體 也 物, 日 ? 講 而 無 . 者,是 티 : 曰 得 本者,然不參以 仁 專 學 蓋 ? 不 兩 曰 : ,事皆有益之謂 彼之辭,則此 以思之有序爲近也。 . 必本 之事 : 以 程子 存 程伯子之言, 以 曰 : 四者之效,雖卒 則二子之説 思之以 反 如子之言 爲 能 於實踐 初 思 事皆 所謂 是亦 心 默 如子 不 未 造 不 有 近 如其 外 有 遠乎 益 八凡言: 爲 思 夏之云, 類推之説 四者,亦 馳 而 求 也 功,而 雖 其

素定

也,不

得爲

用

不

窮者。

雖

大

於應變,然其

理

而

有

所益耳

豈遽若是之大,而

前

説

之

義

亦

Ż

耳

伯

則

仁

心

不

不

外

馴

而

事

謂

前

以

體

常

盡

變

爲

言

「則失

之

云

一, 則

可

見

其

得

失

也

謝

氏

謂

夏之言

1,所謂

知

其

所亡者,正

以

之,無

忘

所

能

則

其

見

之之明

待於温

習

而

自

不

能

忘

矣。

觀

常,然非人

之智力

所及

也也

則

非

之意

歸

於

不

在

其

要

不

之功 者之序 博學爲 習爲言 以 其 禮 求 不 於 之説 日 分 彼 孟 之矣。 居 差矣 馳 之 泛 以 爲 此 吾 理 之 之事 切 則 履 求 而 如 日 而 處 心 成 踐 所 得 問 如 此 可 此 執 不 而 之 吾 日 當 彼 志於 矣 此 有 近 而 事 博 非 而 切 . 哉 思哉 ,今方 切問 實 若 所 爲 得 之必 H. 學 又懲乎 本 諸 ? 講 事 制 彼 獨 而 而 曰 有 謝 説 近 學 而 乎 恭 不 日 詳 非 博 切 氏 求 而 思 如 不 而 且 聞 是 説 玩 問 告 有 學 仁 之理 心 放 何 可 一敬,與 然則視聽言 蓋 之, 孟 之 夫 近 求 物 不 日 ? 以 則 於 惑於博學 子 思 問 仁之意 喪 外 心 . 爲仁 則 將 又 事 日 仁 志 馳 也 吾 人之必 張 以 何 所 0 之 失之矣。 之言 固 之言 者得 范 子 蓋 以 理 反 以 亦 嘗言之矣, 也 動 之 氏 説 成 亦 預 何 有 爲 之, 則 以 之 吾 几 不 此 害 故 所 約 非 成 忠 必 乎 博 蓋 者 得 以 亦 其 當 曲 而 也 平 心 學 之 講 亦 爲 後 兀 以 而 口 以 爲 而 ? 不

> 旨 之所 楊 則 時 張 氏 子 玩 德 也 以 爲 物 性 日 喪 . 講 仁 有 學 由 志 懈 書 者 己, 所 心 讀 以 爲 尹 不 書 維 外 氏 己 則 持 馳 有 成 此 一説 此 吾 意 心 心 之仁 於 常 之疑 求 在 時 似 可 觀 放 非 皆 釋 此 下 此 以 然矣。 章之 爲 則 吾

之,其 度,正 不信 謝、 以 説 二者皆 而 磨 而 致 中 未 亦 不 尹 要其 道 或 度 爲 中 疎 謂 義 以 問 在爲 爲 之 盡 爲 有 始 致 乎 盡 蓋 成 比 七 逸 備 道 事 學之後 章 道 學 乎 耳 居 則 耳 而 爲 學 則 古 而 贵 非 無 重 不 則 所 説 無 謝 無 法 也 可 以 不 亦 其 所 氏 所 9 琢 口 各 曰 學 事 取 蓋 以 事 況 磨 . 譬亦 有 不 學 信 之 中 本 其 范 亦 理 不 致 謂 度 文 固 所 非 不 楊 道 在 能 哉 然 初 所 未 精矣。 也 致道 以 中 無 以 必 則 器 學 是 形 合 工 爲 侯 之前 爲 道 爲 不 而 有 氏 又 以 重 以 之 事 琢

必强加之乎?

常情 之意 有未 事 懼 同 深 謝 也 愧 得 侯説亦爲得之,但亦互有 小 改過先 盡善者,若曰 耻之意,似 或 但君子 而所謂 合而觀 今專以 問 人之情 八章 自訟 ·耻而· 之,則 耻 耻 一 之説 過 亦太輕易矣。 過爲 則倒 改之,小人耻而文之,則不 君子自訟 作非者, 所 庶 謂 小人之事,亦未安 乎兩 置 一普過 日 矣。 : 亦爲未 得 故能 范 今非 耻過 矣。 得 侯説善發 氏 失。 引 者 改過則 楊説 亦衆 盡 證 必 殊 蓋 甚 文之 也 人之 文意 君 謝 無 可 善 子 悔 氏

囁 言者 亦 禮 E 嚅 勿言者,蓋曰 蓋 理之所當然耳 形厲之反,尤爲 或 問 也。 取 九章之説 其 其 事 日 之難 不言 孔 子全之者,蓋 明白。 言 云 樊於 티 : 爾。 而猶言之, 期 程子至矣,其曰 而傳者失之。 所謂 事 非 合開 以 非 理 孔 以 之 子 爲 所 者 明 得 以 非 理

> 然爲· 以言 説,而· 輕 孤 以 務於不言,似亦 諸 一發爲 乎? 不 説 而 孤 厲 直 唯 自敬 或 厲。蓋 爲温 爲 楊、 内 其 者 方外, 亦 義 因 則 謝 則 本程子 誤 以爲子夏之言 以 言 尹爲得之。 未 則 矣。 下, 尤 厲 盡 儼然者獨 無 者 則 之説 其 所當 謝 獨 其 意 氏 不 附 ,然不決 也 豊 第二説 范 由 益 非 E 以 直 之 氏 方 爲 孤 外 内 贅 蓋 於理 孔子 但 爲 之 也 本 而 以 程 孤 事 出 前 發 特之 言 乎 子之 平 以 也 ? ? 徒 不

者 耳,事 意 推 專 非《禮記》之本旨也。 不 之諫 斯 之,恐皆未盡 以信爲在己,謝 或問 可 或 得之矣。 , 奈何? 以 有 十章之説。 執 變, 則 論 謝 日 其 也 氏 氏 唯 . 輕 所 專以信爲 子夏之言 曰 范 티 : 引 0 氏 一之間 然則 量 爲 程 而 有 子、楊、 又有 在 後 亦 盤庚之遷,比 誠 人,以 人者,恐 意 論 交 尹 所 其 乎 常常 謂 文 氏 勢 權 理 亦 皆

大體 矣。 未至 矣,但張子之説 乃 其 於聖爲言, 范、尹之説 以 或 自 問 · 則善 恕 + 而 ,而楊氏 章 不能 亦 正 又相 之説。 有 與 勉者, 此 張 大 爲 病 子 而 得程子 日 而 相 然謝 爲 . 非子夏之 反 文 程 ~,若 耳。 之意 氏 子、 學者 然, 張 耳 謝 子 貴 所 氏 則 知 以 至 口 出

對 對 無大 也。 究 明 故 而 夫形而 君 意 耳 便 小 端,未及乎 或 程子之言, 子 口 以習夫形 是 問 之學,不可 結之,故 得 徐 理 形 上之理 矣。 繹其 言, 十二章 而 上 緒 則未 抑 意蓋. 其 精 而下之事; 之 也 程 不由 辭 義 而 嘗 事 之説,程子 如 若 人 以 然其事之大小 之意 有 此。 神之云 其序 是説 何 有 大小之間 所 也 但 精 以以 不 ? 通 IE 方舉 義 足, 者 之, 謂 所 盡 曰 理 謂 0 則 而 夫小者近 而 而 洒 神, 無 洒 洒 固 其 意 通 掃 無 大 掃 所 掃 應 不 辭 亦 不 以 小 應 對 在 百 以 應 難 備 理

并舉 者 之説 法門 佛氏 反 只 間 理 爲 矣。 泯 所 曰 E 無 不深 0 以 在 世 毫 不 謂 爾 然 而 其 之習乎彼者言之,因 以有言有説 離 其 爲 慎 洒 致; 察,信之過 ,亦爲夫習於彼者 程伯子 而 後可 亦曰 釐 非 日 理 獨 掃 乎 大,則失之遠矣。 無 有 以 不信之甚者 無大小,故學者即 應對者, 是 是 與 以 有以契夫理之全體 不可 爲 此 語多如 耳, 非 佛 進 此之理, 甚 善悪、 夫遠者大者 家 失者; 者 爲二, 非 言小之不 默 其 即 此, 則 之 然處 理 ,則又直 以 即 遂 分 彼之 而 如第十七 則 而 此 彼之言 以 為,其 以 其 言之耳。 以 合」, 可 默 爲 耳。 爲 9 所謂 是小者, 彼之言 日 忽 而 云爾。 形 然無言 詆 儒 便 何 是非 也。 篇予欲 不 也 以 而 是 故 默 也 佛 同 今讀 爲 云者, L 然者, 之 然此 而 當 形 爲 而 也 蓋 者也 竊 其 此 叮 説 不二 亦 否 吾 無 取 要 之 亦 之 之 亦 審 則 類

直

以

其

有

序

者言之,然

其

所以

有序

而

不

口

易

則

又必

以

程子

先

後

諸

説

推

之,

而

後

得

其

而

之全

體

也

子

夏

與

程

子

此

條

之説

 $\sqrt{}$

小

子

而

欲

直

教之精

義

X

、神之事

盡

夫

形

應

對

爲

末

而

無

本

不

知

教

人之有

序,

故

於

門

之,則 之説 人,未 哉 以 事 應 極 射 分者 精 不 足 下 應 洒 説 何 ? 對 於 ,則不俟 至 以 者 對 可分者,以 粗 掃 也 一於彼。 之不 彼 而言 F 之 應 初未 也 必 求 日 何 不 也 對 理 日 能 之文 ? 也 可 失其 條 之事 0 諸 改塗 繼 ? 嘗 則 所 同 其 日 荷習 日 之説 其 説 妄 義 以 洒 以 0 \mathbb{H} 0 然 節, 曰 悉 而 其 如 亦言 其 掃 然 其 而 . 所 以大道 焉 有 若 聖 具所以然之 何 事之不 應 也 然 而 日 語 有 以 所 而 口 ? 對之 形 其 遂 皆 物 也 本 矣 然之 察, 不 至 理之 有 可 以 末 教 日 通 而 形 爾 同, 與 而 本 直 自 即 者 Ž, 0 説 而 精 贵 又 在 末 張 夫 以 此 其 而 者 F 理 其 是 勉 義 是 奈 日 子 聖 便 形 有 所 而 也 者 也 然之 誣 焉 何 人 先 人 爲 謂 餘 而 而 本 也 神 之也 洒 自 傳 聖 Ė 自 於 始 以 末 由 日 事 掃 人 學 者 後 居 本 造 此 形 是 不 洒 H 也 之 之 倦 其 言 末 掃 口 不 則 世 口 而

説

蓋

失

於

此

故

不

知

理

之

無

大

小

·, 則

以

洒

掃

體

固

己

虧

於

切近

細

微之中

矣。

此

所

以

理

無

窺

高

則

不

惟

其

所妄意者

不

可

得

而

理

之全

在

而

無

所

遺

不

由

其

序,

而

舍

近

求

遠

處

F

不

各

得

其

理

而

理

之無

大

小

者

莫

不

隨

其

所

有

所

遺

也

蓋

由

其

(序,則

事

之本

末

鉅

細

無

而

無

不

在

是

以

教

X

者

不

口

以

不

由

其

序

川

1

者

理

也

有

序

者

事

也

Œ

以

理

無

大

小

9

大

小

而

又

以

爲

教

人

有

序,

何

也

?

E

無

大

: 爲

氏

之

妙

以

佐

吾

學

之高

者

· 其

向

背

出

人

之

雖

殊

然

其

爲

失

旨

均

矣。

日

既

以

理

無

大

小,

而

教

1

者

尤

欲

必

由

其

序

也

子

游

之

程子 殊; 之心 方論 木,區 大小 格 意也 審 其 子 得 學之道 教人之序,未遽 而 有先後之序。 其 可 後 物 不懼之心 • 致 矣。 去取 難,不安於下學, 下 近 之意,正 而傳之,孰 以别矣,亦 而 也 上 學之始爲 而 知 盡 但 亦 一,而 達固 夫下 可 洒 先 脩 深 於洒 也 掃 中 相 傳 必如謝氏 身、 非 學 應對、 金、天下, 及夫師 後 反 近世學者之失矣。 掃 也,而 有 度 師之所能 ,未遽及夫 謝 而 矣。 倦 齊家之 後 其 説 應對 極 精義 其 可 意 則 而妄意於 其 平 無與 日 不 之説 小 源 而 道 地 則 事 進 可 入神者 於程 己。 不 與,然此 程 其 極 焉之妙 退 固 而 高 也 同 ,將使學者先 (捐之有 子 其 之間 倦教 臺 上達矣, 上達 此 蓋 子 亦常以 道 不異 之 其 意 也。 范氏 則 方 而 日 與子 意 亦 譬諸 其 論 E 而 且 難 孰 善 · 而 習之 不吝 達 然 於 謂 何 理 無 易 爲 有 夏、 Z 之 此 程 以 無 復 爲 獲 師 失 草 先 更

者,又 然其 爲言 出於 也。 異 則 此 忽其 子 贵 者 致 初 氏 於 以 其 其 不 所 以 非 不 自大, 爲 意 失之小 謝 大者 謂 問理之是非 小 心之使然也 謝 可 相 ,則又如 何 者,以 以 則 氏 氏之意, 無次序。 必 反 也 耳。 以 有 進 以 之 ? 而 者 明 必 所 於 其 尤 求 謂 以 大, 夫 耳 正 如謝 曰 論 其 而 者 夫大者之真不 然者 小 子夏以 : 心 以 理之所當。 顏子克己、曾子 哉 而 子 而 不謹 程子 誠 程 氏之云,則 爲 唯吾心之所欲 ? 欲 夏 子 意 以 相 使 所謂 則 雖 正 而 草 日 爲 反 人 木 以 將害 後 以 . 百 謹 能 爲區 次 理 慎 其 何 謝 出 反使 過 者,則 其 其 獨 序 無 也 與 於 氏 貴 者 大,小 如 小 爲 大小爲言 别 子 人特其 爲 獨 理 者 道之説 此 夏 也。 以 則 以 之 \Box 也, 木 自 着 不 爲 相 以 0 謝 而 然 然 程 110 敢 同 此 小 謝 馴 反 氏

^{■「}常」,正德本、正保本作「嘗」。

者 中 取 子 之學 爲道 之病 治 序之意, 小 語 見 乃 而進之之術不一,味游、 而 物 近世 以 雖 貫 焉 矣。 謝 以 其 施之武城者 通 爲 也。 氏 吾能 雖有 同 何 似 似 學者之弊 而 尹 則 曲 曰 固 意 嚴 於張子。 亦 也 티 : 自 氏 無 直 推之,則 未 ? 不 密 亦 未 楊 得 説 聖 則 善。 免謝 司 爲知之者 蘇 氏 之之 然 0 日 則 X 也。 氏 如 0 而 亦 衆 而 善 聖人所謂 胡 夏之言,子游敏於聞道 氏 之説 子夏從事小物,而後有得 是 何 謂 亦 實無 子夏以唯聖人 E, 氏曰: 矣 有 人 之失 其 ? 由 (之分, 耳 但 而大 其 若 然吾 所 草木之别者數 彼 知 人之資禀不同 日 也 序 言 又 所 小 性 有 小本 此 子 뻬 於 謂 學 亦 楊 與 未 胡 其 漸 聖 夏 中 取 而 天 氏 醇 末, 氏 相 爲 進 所 門 有 其 無 道 先 者 論 ,故夫子 反 有始卒, 教 皆 謂 以 有 而 復 傳 至 以 ,子之 施諸 游 脱 受之 焉 於 以 學 語 所 大 後 亦 下 略 浹 次 學 數 侏 深 夏 爲 口 以 口 引 於 小

> 誣者,專自教者而 小 疵 必然之理也 然教者既 言 欺 其 而 徒 以 師 則 生 受教 相 欺 者 爲説 以 欺 應 亦

之,

亦

曰

其

譏, 而 仕 意蓋 猶 道 爲 仕 有 而 而 0 則 則 未仕 仕 此 學 是 不 優 少年登高 學, 仕 或問: 耳。 意 如 亦不 則 夫子亦悦漆雕 未 H 吕 優則學,爲 也。 此 者言也 不 可 如 氏 氏 子 原 免 學 免有愛身忘 以 仕 而 十三章之言先仕 科 夏 推 伯 有 優 優 仕 席 此 魯者 背 其 則學之, 諸 耳 蓋 勢爲美官者爲 章, 得 已仕 公 餘 未 説 其 故 之對,惡子 徇 意 以 子 有 如 餘 者 私之失,學 先後之次 物之累,當 ,則又以 産 以 何 有是言。 既 意 言 ? 於 明 得 也 而 平 子 其 而 日 後學 路之佞, 不幸,其 初明夫 皮 脩 蓋 范 IE. : 推 學 有 己 時 時 己 意 程 氏 優 治 製 仕 必 子 恐 優 何 有 而 其 錦 人 學 意 程 有 或 未 也 程 餘 而 Z > 優 本 子 子 優 兼 亦 不 而

以

則

非必 主,尤 後 亦學文之意 意,亦過 可 謂其 以 爲 及 得 沛 人, 高 其大意 耳 然充足有以 楊 而 失子夏之意矣。 氏 念 侯氏 終 始 過 暇 典 人也。 時 于 學,皆 之説 此所謂 謝 亦 氏 以 善 别 學 爲 爲

於此 矣。 乃以 將 以 所當矣 爲 有 不敢過 如棘子 致哀 然所 ,本爲不及其情而過於文飾者耳。 亦 或問 可 莧 + 而 引 三言, 其 也 成之言者矣。 止 四章之説。 情 則 范氏之説,則又失之。 爲説 將 皆 有直 不得 ,則於致字之義 情 曰 : 其脱 E 徑 而 謝、 行之失,其 去之意 略小物之驗 楊之 今直 爲 范氏 子游 説 桦 善 無

其爲 故 未 ,而有譏之之意,故又曰 或問十五 耶 詞 若 有 且 章之説 一子游 未 盡 之所謂 者 若過 日 0 難 然而未仁,則非 楊 於 能 氏 厚 者,蓋 以 則 爲 亦 過 美之 何 之 害

> 未 直 盡 以 是 其 曲 爲 未仁矣。 折 也 楊 氏 於 其 語 意之 間 似

之。 狎 是 似 謝 不可 出 而 正 言必 學 爲 而 而 仁 爲 楊 相 氏 主 於 爲 於氣象之偏,學者不可不審察也。 亦未然。 而易之者,又可 仁也。 乃以 曾子 病,則 或問 則謝 氏 反 輔 己無切偲之益 反 於 人於己 於此 然謝氏 誠 而爲仁,又何 其不害爲仁,其失與楊氏前章之説 堂堂之云,亦 十六章之説。 身 夫漫然無 故故 莊不害於自持,非 章,又以 ,與子游 以文意求之,蓋 楊皆謂 其 辭 以 意 不 、觀感之助 曾 爲仁乎? 若 雖 廉 莊 謹嚴 與於我而 子 猶 小異焉。 隅之守,使人人皆 而 病 病 티 : 子 難 子 夫子 其 張 游 親 病 程 耳。 失爲 難 之未 仁之病 其 爲 二家之論 子、 病之耶? 張之不 若曰子張之 子 能 疎 蓋曾子 尤甚 范、 之意 張 略 難 之病 也 簡 尹 與 口 而 也 得 其 輔 並

如此。曾子之年輩,視子張爲先進,亦不應直譏之

推曾子 非 唯 也。 亦 云,所 非 加 孟 未安。 IE 其 尹 立 子 養生送 以 下 氏 教 蓋 或 指亦不同矣。 此 之意 所 所 問 喻人之語也。 曾子之意 謂 章之意爲反此 謝 引 + 以 氏 「於此 親 死之義而發,非 七 章 喪 所 責 一之説。 自 謂 本 夫人之當然而 不誠,惡 盡 必 ·以通 而楊氏 其 之言 信 也。 與與 曰 : 必 論常物之大情 「疑與 誠 孟 乎用其誠」者,則 IE 乃引以 程 者, 子養生送死 以釋此章之意 子之説 曾 其 不然者耳 失亦 子意 爲説,恐 本 然。 合 之 爲 而

宿父文子 必 乎 善 ? 年,魯人謂之社稷之臣 矣。 或 日 問 0 忠於公室,宿皆 莊 鄧 子 鄧 氏之言 氏 年 少 十八章之説 嗣 日 7/ . 献 則 不 又 能 與 其 子 守 季 臣 其 歷 孫 而 必賢 詳 相 改之, 宿 口 其 日 君 得 朝 莊 政 Ŧi 聞

> 變爲 事 煩,故其言 失 子乃獨能 尹氏之説,以之泛論 之未詳,而 氏之過,已論於首篇矣。 不 於元祐之改熙寧也,故不及道其 爲孝哉?」曰:諸説 政,有不 馬,是孔 也。 ,則亦考之未詳 可揜者如此,學者 E 蓋 也 善善 子之所謂 一,此雖 其天資簡 不改其父之臣與父之政,而 所以 而 如此,吾 不改,則 爲説 君子 也 難 已論 静 亦因 如 之過 亦 則 是成其父之惡耳 也。 何? 和 善 未免於 厚,而 之於長 可 楊、侯説),然心 矣 若父之臣 以自警省 ,然於孟 日 0 憚 隱 范、 府之章矣。 常 有 於作作之 忍 則 吕 與 莊子之 遷 考 矣。 偏 而 悪 父之 終 就 其 蓋 遽 而 身 之 其 以 嫌 得 事

之,但 或問 尹氏 十九章之説。 所謂 不足喜者 日 其 : 范 辭 若 謝 尹 爲 事 氏 得

❶ 「反」,四庫本作「及」。

仰 流 H 見古人怵 베 事俯 爲説 有 深 不 離 可 足 育之賴 散 哀 亦 乎 不脩? 之心 惕 矜 非 惻 而 之 是。 耳 是 内則 隱之意 有 意 所不忍耳。 以 所謂 則 無尊 恩疎 非 民 也 君親上之心 楊、侯氏皆引政 義薄,不 散 特以 今日 子 之 相維 不足,殊 其 外外 意 生 業 散 則 IE. 無 民 而 不 不 以

謹於其 全德。 過 亦 氏 也 之,然三者之中 過過 類 而 如 少覺粗厲矣。 此 開 此 或問二十一 或問二十章之説。 不足以梏亡之,過 其 則 ,但其説不至如是之甚耳。 初之意矣,學者宜 自 論 使學者之心 語》 新之路耳。 范 吕、楊之説 章之説 書,蓋屢致意 氏寬 輕 而 今謝 平, 曰 : 深 慢 能 曰 : 則 察之。 尹氏 放 范、 改 氏 肆 則 焉 尤恐未安也。 聖賢 乃 謝、 畏謹 ,然亦 謂 而 亦 范、 侯、 之貴 尹氏 不 何 德 楊 尹之 復 性 傷 不 改 意 得 謝 得 有 於 天

> 意。 以 以 之,亦復其 故人皆得 意 説 直 成湯之事當之,似亦非 爲君子之過,顯白易見,無文飾揜蔽之私 爲 范氏 善 以 其 而 以爲寡過,故人皆見之,說者又有 而見之,恐亦不必 常耳。 過 尹 失 氏 暴 尤 范氏 著,有 精 約 以 是。 不可 爲 其 改而 論 如 揜 此 人 者,最 益 皆 光 人皆 見 之之 得 楊 仰 文

説,則 毎事問 賢者 聞 周 老 而 考之,則可 而 心期、 ",然其 之禮樂也? 得 氣 識其小 象平正,亦足以見其 或問二十二章之説。范氏於文意不切 、萇弘、 有過之者。 則 馬, 文意 又 見 何 、郯子、師 則廟之祝 而後 矣。 不過 時 墜 曰 : 若 曰:何以言文、武之道,爲 得 地 如 此 月. 師 史, 襄之儔 日 此 以以 耶 道 固 何 亦其 ? 、所存 無 未 好 必 耳 賢 適 墜 此 高 矣。 者識 所謂 而 、在人之云 者之所不樂 若 師 非 也 人太 惟 楊、侯之 人,正 其 所 大率 廟 取 者 TH

也。 言,不如是之空虚恍惚而 樂之間哉? 貪 近 世學者,習於老、佛之言,皆有厭薄事實, 然彼所謂無適而非者,亦豈 高遠之意,故其説常如此,不可 但子貢本意 無所 ,則正指其 據 也。 離於文章禮 事 以 不戒 實 而

使果知之,則於夫子之門,當求其所以人者而不暇矣。張敬夫說亦善。張敬夫曰:武叔亦豈真能知子貢者,聖人豈以難知而自表見云者,爲無所當耳。或問二十三章之説。曰:范氏得之,唯

字 此意 多見,以文義考之,不若古註之訓祗也。 取其至高,范、楊説皆非是。 范氏所謂多設不欲見者,恐非文意。 抗激之弊,尤非聖賢之心耳。 書説本如此 ,自首篇之旨已如此矣。 或問二十四章之説。 其必 有所 自矣。 日 尹 大抵謝説多有 日月之喻 此 氏以 無 他説 益見 而謝 且 解 但 惟 氏

或問卒章之説。曰:程、張至矣,范、楊

亦見其卓爾而已,則其知顏子也亦淺矣。得矣。楊氏論不可階而升者甚善,而曰顏子

三六二

論語或問卷二十

凡三章

堯曰第二十

者,而 之,則 説。 以德 聖人所以知其序之屬於此 數,若曆之歲 緯之學者,其論不同,奈何? 知之,非若讖緯 而 爲言也。 或問: 而言,則自無後世妖妄之嫌,而人君之 范氏之意, 若以 湖田氏 謝氏 以 得之矣。 堯、 范 曆 月日 氏蓋 舜、 之説 數 有歸 時,亦有先後之序 避 禹之 蓋帝王 徒 治 此 而言,則又 曆 而遷就其 以 相授, 明 其 人,則以其 相 時 姓 日 承 皆有曆數之 爲 名 八説,殊 其 若後 人 以文 見 君 人 也。 次 於 八之德 第之 意 世 之 圖 不 然 考 事 知 讖 籙

道,時 也。 此 事 也 有 失亦可見矣。 本云者,喜怒哀樂未發之時 不從 木 子之説不異, 守之哉? 天下之大本,則 允執厥中 之説 也 窮 未精者,遂合二者 世 程子備矣,蓋聖賢 此曰 何 蓋以爲戒之之辭,則辭意連屬 范 止時行,夫豈專以 特 中庸云者,理之在事 ,程子、范、 氏 治 也? 允執其 ,所以行之」,以 故程子以事事物物言之,而 蓋 曆 明 推孔氏《書》傳之意言之,子 而其取譬復兼言之,豈其 游氏 曰: 亦以文考之而 時 不可 中、蓋以其 游、 之 自適當其可 楊 而 得 所言中,有二義 氏之説 端 一之與? 而 塊 是 執矣。 然不動 而 而 在事 之理 E 而 無過 不同 觀 以下文,與 哉 一,其 者 ? ,則三家之 者爲 且 知其 不及之地 日 而言,若 聖 氣 如 初 日 〈擇之 人之 又曰 是 象 何 . 不 無 几 大 執 如 程 間 海 mi

説

孰

優

日

是

亦

多

相

發

明者

未

口

以

優

:

但

民

食喪祭

謝

氏

以

爲民之三事

為爲

愈

文爲

耳

曰

.

自

謹

權

量

以

F

謝

以

周

親

爲

周

室之親

,其意亦善,

但於

書

則

范

Æ

亦

得

之

矣。

日

.

周

親

之説

如

何

樂記》所謂

將

帥之士

,使爲諸

侯」者也

也

,言所以

錫

子

善

人

也

蓋

克

商

賞

功之

時

日

詩》之序

日

:「賚,大封

於

廟

൬

聽

天所

命

耳。

日

周

有

大賚之説

如

何

.

故

不

敢

自

私

則

亦失之。

蓋此

亦謂

不

敢

自

便言

天

禄

永

終

初

無

T

盛

付

囑之意。

若如

斷

空

闕

之

處。

若

如

孔

傳之説

則

木

窮之下

亦

未

嘗

有

所

見

也。

日

述湯之

語

何

也

?

曰

以《書》考之,則

張

子

范

説

爲

得矣。

但以簡

在帝心爲以

其

如

此

氏

之説

則

所謂

各得

其

所

日

以《書》文考之當然。

范氏

之説

因

者,於《書》之文,初 也。」齊,予 ,諸説不 失之, 楊之 上文 ? 然 ? 私 范 考,由 於楊, 弟子之言 禹謨》《湯 有 以 叙 不 氏 邑者 則 則 者 F 明 舉 顛 數 和 聖人存心之説 亦 任 如周 此推之、《論語 過矣。 倒 二十篇之大旨者爲得 聖人之語 者,然於學者亦有益矣。 蓋 措合於人心 説 加 倚仗 失次者,恐或 行 誥≫泰誓≫《武成》之文, 楊引 皆 士 亦近之, 也 善。 周 民任説 也 孟 日 公語魯公,邦君夫人之稱 則 0 》蓋孔子之遺 恐失 子之意亦佳 但 前 未有 謝 不 如 楊 ,見第十 有之。 岩楊 氏 人自 文意。 何? 若 王霸 所 以 謂 書 説 氏 爲 蘇氏 也 曰 : 七篇 也。 之 古 以 而 服 而 簡 信 但以 辨 編絶 結 顛 \Box 爲 公則説之云 是其 則 蘇 倒 如 寬 第六章。 也 民 非 記 失次, 亂 此 管 民 氏 爲 削 獨 心 者 章 載孔 有 疑 夫子 仲 任 得 詞 回 者 雜 所 不 不 取《大 此 氣 奪 其 衆 . 可 可 子 載 歷 駢 謝 似 章 有 事 以 與 知 復

0 泰」,原作「 太」, 據正德本、 IE 保 本

附 以 違 則 未 安民 道 則 誠 免 治者所不廢,但非 以聖人之公言之,固至 若 乎 以 危亡至矣。 也。 干之」者,足以之自 有 有 病 爲 以後 ,然其下文所謂 而 爲之者,如 王之私言之,不求 以 此 所 以 觀 語聖人耳 之,則謝氏之言, 何 道 誠求天下之比 解 ? 當 矣。 日 如 . 此 下民之 程 是 子 其 而 有 言 古 非

則其自處未嘗不安,而何驕之有? 矣,然君子之心,一主於敬,不以彼之衆寡小大而 之畏己 IE 威 何物足以累其心 胡 其 氏 則 也 其 衣 得 或問 深謝氏 貪 之矣。 也 冠 蓋 無 作 ※時而 Ŧi. 尊其 然百姓望其容貌顔色之儼然, 得之矣。 威 美之説。 ,夫何貪? 己。 胡氏日 而 瞻 欲 惟反是心以欲仁,則求諸己 視 人之畏己 欲而 以 泰者 在人上者,大欲爲多,不 티 : 自 不貪、泰而 ,安舒自得之謂 惠 脩 威 而 而 則 而 不費,勞 已矣,非 必至 不 猛 不驕 於]而必得, 二其 近, 欲 非 而 猛 於騙 能 心 不 作 則 而 X 容

> 之乎? 也,暴 是。 其 羽刻 知 氣 不 之政言之,固有 日: 大 此,亦皆得之。 而 其 在可 泰 爲 可 得 謝 有 印 論 有 不 也,賊 無亦有未平者乎? 而 氏之總 論 司 加 司 者 叮 謝氏 反 之説 之事 忍不 慢 之域,況言之至於如此 但謝 不 也 也 之説,於文義 免於 論 ,則楊氏爲當。 能予之類; 失人 如是者矣,然若此 謝説 氏 然張氏之説 則 奈 所 何 何? 、驕耳。 心 得之, 謂 猛 之 而 泰 日 有 召 而 張敬 但 問 尤有 則 不 哉 禍 所 彼 曾 兀 驕 ? 亂 夫 以 氏 謂 恶。 唐德宗其 所 者 之流,蓋 以 世俗 未 賊 他 則 以 不 説 吾之 爲 則 必 爲 日 通 者 未 人 無道 如 不 亦 云 虐 項 非 見 無 辭 E 由

然矣 而 可 曉 又以爲聖人不須言知 者。 ,然以樂天 或問卒章之説。曰: 蓋 通 L 八知命 而 言, 爲 則 通 命 是 E 程子之言 聖 下 通下 而 亦 而 言 知 則 其 命 大旨 則 有 是

得

言

理

伯

也

姑

論

時

知

曉。

後

以

哉

夫

衆

今其言 終不],然有 則 所以治 言 知 寮章已辨之矣。 議 F 中 人 似 論 言 及 而 蓋 而 人以 亦樂 至以 亦知 以 第 闕 之 乃 踐 以 此 不 指 命 則 履 序 之可也 如 間 而 上 天之事 通 天 理 爲 説 知 能 一,固 記 以 言 此 棄絶之哉? 乎 而言者,有指. 亦非本文之意 天理之所 也, 禮 以 格 下 ,皆與平日 實之,然後 則 爲 與 聖人言命,爲中 録 物 夫 而 日 縱 知 上 者偶 則 范 窮 樂 未 格 理 中 智者有間 理 以 氏 天之事 及 賦 物 人以 9 失 此 則 所 平 之言 第三説謂有 能 窮 語 氣而言者 其 章 謂 非 事 命 理 意 有 下 真 所 知 也 謝 天 一,然後 固 不類, 倒 然限 諸 者 贵 謂 命 而 氏 也 天 置 己 以 蓋 知 事 致 人 知 理 豊 吾於 其 能 之 天 世 此 命 又謂 命 之 此 亦 諸 以 可 可 知言 者 之事 之説 章 所 爲 所 亦 與 不 己 以 中 也。 所 知 知 公 賦 ? 可 然 j 其 及 者,則 所 謝 謂 聖賢 之説 耶? 復徵 謂 近 理 警 氏 知 禮 在

事天之説 《論語》之書 兼乎古今賢不肖而言,今乃言古而 「窮達得 知言之説,則又甚矣。 之,又欲專乎内 而慕夫高遠之理,遂 之甚 其過 ,不可以不熟察而 而不及乎愚不肖,蓋欲牽夫 於 其 禮 亦近於 知言之説 止 履 中 則 喪 指 也。 似范 踐 則 不 其 禮 無所動 而 之實, 違於理」者 一於范 程子有諸己之謂 可, 章末數 文 爲 氏 亦 而 今乃 之説 氏 爲 動 而 則 言 其 不違 ,知禮之説則 得之, 句,則於讀 不分乎外, 故 夫此 耳。 心」,則范 厭 亦 深念之也 使 至 其 亦 其失至 於 若 章所謂 於以 但 非 所 人 理 推本言之, 便 何 謂 所 者 似 氏 此 以 謂 理易禮,而 禮 所 且. 此 三句之説 謝 有 禮 得之,至 書者,深 不及今,言 知人者, 文之 楊 係 據 必 此 耳 所 氏 訓 外 欲 氏 其 而 不 理 爲 則 然 尹 即 知 所 能 以 及。 胡 H 於 爲 有 如 夫 命 養 文 漆 mi

所不可得,避其所不可免,斯所以徒喪所守而爲小人也。耳。● 胡氏曰:一定而不可易者,命也。人不知命,常求其氏之説亦善,蓋合韓公、蘇公之説而爲言

「公」,正德本、正保本作「氏」,較合全書通例。

0

之所 於《論語》之首篇, 以 答其禮耳。 必 梁 獨 不 何 其 守 得 惠 招 世 性者 仁義之説,奈 以 先王 賢 君 見於諸 \pm ? 或 生 者 先 問 者,答其 越 日 物 Ŧi. 之禮,故 就 境 者 · 而 而 孟 故《史記 侯,戰國之時,士 見 不見諸 而 子 孟 不 獨 來,則 也 禮 不 子 何 論 舉 其 调 也。 然 見 至 ? 之 》以 平 所居之國 侯者,不 後 必 諸 義 梁, 亦 陰 蓋先王之禮,未仕 티 : 以 往 爲梁惠王 詳 陽 何 禮貌先焉,然後 見 得 矣。 程子 此 五. 鮮 也 先往 之。 其 行 其 而 自 ? 事 日 至矣。 不仕 重 見 若異 卓 見 而 . 之 日 前 梁 人之所 ·禮厚 五行 也 實 焉 惠 天 或 而 孟 矣。 王, 子 地 幣 之 見 實 往 則 子 者

之,則 哉? 者莫 也; 事 矣。 愛, 仁 曰:仁存 曰 同 或主 智者義之歸 陰 蓋 禮 丁,性 0 · 而 智、 體 以 陰 而愛莫 何 以 然則其 義者宜 大 陰 於愛。或主 陽 而 土無 義 然又有一 之所以 也? 其 於 陽 信 義 也 體 情 諸 尊 之殊 用 五 切於愛親,故 不 而 必 故 而 心 也, 行 티 : 也 君 而 在 爲 然日 爲體 言 而言, 人之所以 説焉 故 故 於 信 用也 其 性 仁者 用 錯 之, 以 亦 宜 發 之 也 用 人 綜 性 以 無 仁 則事 · 前 9 則木、火 則 所 交羅 義 人 義 而 以 不 是 而 皆 其 爲 以 人仁則 則 也 所 言 皆得 在 存 贵 不 則其 性 爲 性 用 施 ,則禮者仁之餘 必 也 可 心 惟 其 而言 可 者 皆 體 亦 也 不 制 混 其 其 大端 以 發 必 有 陽、金、水皆 也 雖 曰 : 後 者 宜 事言之, 所 之, 以 混 則 君 9 有 其 已舉矣 陰 義 專 然則 遺 親 則 而 而 何 君 陽 主 之 皆 其 無 制 也 所 而 矣 義 於 不 其 言 夫 官 親 體 别 則

孟子或問卷

此 是 者 用 施 奈 以 所 也 E 之間 ...義 者 . 義 之 者 何 是 不 0 孟 之和 言 得 者 也 有 子 爲 仁義,天理之自然也,居仁 有求 而 則 以 以以 所 則 和 條 言 不然者也。 乃所 又 티 : 初 而 티 : 以 制 理 也 利之心 至 安 人 非 無 固 拔 事 ? 焉 IÈ 義之爲 之爲 有 於 内 得 以 子 聖 而 本 謂 天 外 日 求 而 爲 謂 言 人之言矣 寒 程子 此 仁 下之 利 之别,學者 外之乎? 0 求 然仁義得 仁 源 則 爾。 用 則 仁 之心 利之資 義 義 利 而 之言 古 也,不 義 事 未嘗 則 不 救 外 曰 : 古 也。 古 ,然或不 其 可 É 矣, 蓋 無 於此 施 不 然則 乎 弊 得 所 此 免 無 特 利 於 不 由 ? 而 也 《易》所 其 宜 有 外 利 舉 程 其 義 明其 求利 所 孟 物 則 則 明 日 矣 矣 其 子 害至矣, 且 以 子 辨 不 君 循 是 謂 非 夫 ___ 所 之 何 得 臣 有 意 然 不 天 爾 利 1/2 以 其 父 理 然 謂 體 其 熟 不 利 而

《大學》 之難 若舊 其所 則 安。 省 贵 是 學 有 利 妄 雜 日 베 欲之甚 八爲 其 耶 陷 引 得 也 致 以 濟 諸 仇 脱之 謹 言 之説 然其 崇 ? 溺 義 謂 經 爲 説 矣。 然 其 張 怨」者, 利 傳 傳 義 勢 而 日 則 心 物之利 之文, 如 著之耳。 爲 所 子 文 之要 利、 後 顧 티 : 昏 何 相 謂 安, 以 未必 合於 而 有 則 蔽 ? 似 矣。 羞 謀 爾 以 失聖言之本 太史公之歎 而 其 尤 之遠 而 賤 知也 爲 日 爲 所 即 無 切於事 使其誠 他 忘 范 貧 情 爾 義 所 以 遷 義 則皆善矣。 以 氏之言, 程 者 我爲 近分主仁 謂 告 而 無 就 理 子 義之 君 不 利 牽 其 雖 情 知 取字 者 -旨,然、 ·合之病 求之極 言之 則 自 其 其 孟 我 學者所 和 當 不 明白 各定 子 未 知 果 之訓 耳 如 . 之學 偶 聞 和 其 而 知 亦 此 得 大 條 故 其 非 可 宜 孟 其 似 則 其 蓋未 矣 道 也 暢 其 子 見 必 恐 分 亦 日 侵 所 耶 體 之 利 以 不 則 又 謂 ? 有 然 未 奪 與 雖

不仁 享 其 不義 利 者 而 也 能 利 楊、 物 者, 尹 之言, 亦 未 有 則 知 能 利 此 於 物 而

之失 其君之欲 也 於此 旨,合與下文通爲一條,但引起下文之意耳 其 可 説 初 0 尚 曰「聖賢 但 此非 也 其 無 章 不 或問 其 矣。 以 與 此 咈 則 理 利害難 謂 意 ? 爲 乎? 可 二章之説 言極 自 其引顔子之樂, 教君 也 慮, 彼彼 尹氏 如 亦 亦若 楊 或 婉 此 以 易 日 麋 耳。 氏樂民之樂之説 出 順 求 爲言者,果聖賢之心乎 民 鹿 張 利 ,未嘗咈 於人情之不正 日: 樂其 魚 然語 子之云者,殆皆 而苟幸其言之易行 鼈遂性之言 非孟子之本旨 張 然則 意之間,深 子 人情」者,亦 可矣。 不 保其 亦非 者,又 八樂之 則 記 以 也 者 ? 孟 咈 本 安 施

後 論 詳 王 道 略 或 問三 之序 之始,於下文品節之事 章之説 其 以 狗 彘 日 食人食者,專 . 諸 説皆善, , 失於 爲 不 伯 分先 范 氏

治天下 者或反 意 之皆 敬老 也? 先 日: 人 以 而 曰 法度 仁聞 首末,皆爲王道之始,則其考之亦不 小 可 E 力 . 也 食其大,老幼之所同 食 行 民 衣帛 必五 所 既曰 而節 制度之節 之施 肉 ,似亦未安。 之實矣。 之事 日 不 者 爲 何 日 . 十而 魚鼈 得 而 用 ,但未至於詳 此 也? 至纖 則 恐 謹 其 食 勤 先 非 不 楊 庠 所 ,始於略而終於詳 亦 肉 生 後 王 至悉 七十 序 當 可 未 也。 日 氏 哉 蓋 衣 勝 . 得 盡 ? 以 以 帛,七十 節 ,故其蓄積足恃。」 耳 不 之老,不 食矣,又曰老者然後 魚鼈自生之物,養其 王道 若其意則 申 之意 密 顧 也。 違 然 孝 耳 其 農 賈 之始 其 弟 財 時 至於芻豢之畜 誼 意 所 之義, 而 得 尹 有 以下 則 有 贵 以 大率 後 氏又以 以 不贍 言 節 詳 不欲 教 食 食之 爲 備 徐 民 固 詳 肉 如 氏 亦 古 則 1 尊 己 而 矣。 此 老 者 此 1 何 有 有 口 心

t 0

説 孟 [已知尊長養老之義矣。 猶以爲未也 子之意未必然,然其爲説 奈 何 ,故又爲之庠序以申之而致其詳 氏 日 老者 蓋方其 衣帛 養之, 食肉 亦密矣。 而 而 教 少 固 者 焉 不予 己 行 其 日 則 間 民

者無敵之言爲過 或 問 Ŧi. 章之説 耳 日 0 説皆善 但 楊 氏

待物 諸 畏 其 嚴,是乃所以益見 畏之威 君之容,有 之急遽 貌 IE 合言 中者 而 固 而 譏之, 皆 言 ,然後得 或 重以 問 亦亦 矣。 必必 内 有 舒 序。 德之符,不惟可 然 何 人君之容 形 孟 荷 譏 諸 爲 則 子以梁襄 不定者,其言輕 無其 而 耶 外。 賢 必 吕 其 ? 耶 以 氏 德, 盈滿 勢 則 有人君之德, ? 日 之言 位 王 而 . 不必 日 而妄作耳。 自 不 以 欲 0 亦 艮》之六五 似 高 觀 於勢位 不 作 以 曰:「志定者 人君,不 然 威 而 疾 則 厲 也 學者雖 。」然則言 而 必 以 威 自 曰 以以 厲 有 夫 嚴 見 有 . 中 言 威 有 以 所 以 口

爲

人,而 賢之分 是其 耶? 無復 子爲之賓 而 自 日: 省 孟 耶 若然, 與襄 ? 略 子 可 悦其 曰 固 訟言其君之失 也。 而 (師,其 王言者 易 則 或 所問 不 也, 日 孟 謂 同 0 地又不 子之言當 且 孟 矣。 之大 孔 ,豈孟子自是 子蓋 果 子 且 如 爾 如 居 同 孔 此 美襄王之能 此 是 有贊 非 曷 也。 子仕於 邦 譏之也,信 何 不遂輔之以 而 不非 美之意 抑 耶 不復 七篇之中 諸 其 侯 謙 久 日 大 不 於梁 平 以 而 夫, 聖 若 ? 有

者之道 其 古之聖人,致誠 杨 氏 位 之言備 或問 而 也; 固 王 己 後之君 有 霸 矣, 之辨。 其 心以順 然推 德 子, 矣。 其 日 天理,而 能 0 意, 故 行 董子、 用 則 其 之則 猶 道 天下自 程 有 爲 則 子、 可 王 不 言 范 服 必 · 王 子

⁰ 訟 正 德 本、 正保本作「誦」。

見 亡也 然者 之; 其見之 親 矣 所 遂以 物欲之私 而 宣帝 私 而 孔 佐 0 也 孟 不 欲 而 伊 於物 不忍 之所得以 ,然其 之, 盡 爲 自言漢家 而 是 孟 尹 故間 謬 若 制 E 也 知 然 也,必 子 也 者 齊 耳 度 設 太 根 而 所 其 遽 心 之 王 而 日 失其 公 使僥 若 於 以 所 值 爲 之 以 0 之 若 雜 當然, 知所以愛之矣。 是 天 親 夫 齊 由 心 其 發 是 尹 用 興 地 本 齊 之 也 倖於 王不 者 不蔽之時 而 氏 \pm 兵 心 則 之性 桓 心之正 , 而 也。 直 霸 爲 結 於民 古 不 仁 斥 忍一 以 晉 足 其 霸者之道 怨, 者天 時,遂 用 者 是心 儒 本 文, 以王者, 自 一, 故 也 則 者 牛之死 則 末 而 則 知 則 地 爲 之存 爲 爲 急 必 其 終 然 必 得 也 假 生 \pm 言 不 於 知 所 王者 隋 不 X 明 也 者 其 則 物 可 戰 何 發 或 所 矣。 事 口 則 義 之心 之 用 伐 有 蔽 以 其 也 事 之 得 故 以 而 古 學 於 位 之 發 於 ? 微 但 漢 有 則 濟 而 不 0

利, 遠 蔽 盡 非 是 王 王 王 古 死 功 自 而 原 庖 之 猶 於 孟 之 開 心 人 知 之聖王 則 則 物之 以推 其 天 子 不 所 廚 極 示 而 而 不 其 禀氣 能 得 以 深 下 之 不 反 何 所 可 情,亦 其 之而 自 哉? 及 知仁義 耶 是 以 所 也 不 蔽 得 賦 本 民 ? 以 桓 以 ? 謂 爲 其説 心 之 形 已,豈 一、文爲 暫 孰 博 日 之所 之 不 然 功,是 之正 之 曰 明 施 知 惻 淺 戰 固 0 濟衆, 然 何 此 而 自 矣。 自 問 隱 或 禽 有 也 則 澽 爲 而 以 外 之 熠 之 則 而 昧 ? 孟 齊 本 有 疑 至 而 發 然 之生 時, 察其 孟 之 也 子 心 以 其 哉 其 日 子安得 而 既 之 通 貪 百 舉 覆天下 0 不 悦 仁之 日 告 雖 發 天 古 姓 世 忍 王 生惡 之矣, 牛之利 與 下之志 也 没 又未 既 君 丽 不 端 人異 牛 子之 於 指 死之 是 足 不 亦 之 其 見 此 能 即 以 功

「没」,正德本、正保本作「役」。

之比 矣。 非 撤 爲 肉 以 民 口 如 而 之也。 蓋 禮 有 其 殺 則 類 理 肉 此 則 之。 所造 也 其愛之者仁 ,不身翦, 仁之,雖 親 也 其 本 而 不 而 則 而 ? 不偏 物 昏 心之發 忍 乃 禀 亦 又 티 : 彼浮 於物 作 草 濁 未 何 反 曰 見 氣 而 始不 其 得 偏 恝 足 有 然則 其 此先王之道 則 故 屠之於 不 有 以 駁 然 法 異 自 死 也 愛之而 爲 暴 物 罪 與 班 其 則 哉 焉 有不 曷 其 是等差也 殄, 嘗 人 並 焉 爲 無 爲不若浮 猶 物 同 聞 乃 物,故 生於天 殺 情 禀 不得已 能 而 已,食之以 日 其 也 之者 則 也 天理 已者 所 既 其 聲 其 固 以 清 足 人 故君 地 仁之過 義 然後 非 爲 人心之自然 以 之 屠 明 則 成 錯 故君子 之間 也 正 之 盡 與 純 不 亂 有 子 而 時, 於 粹 止 X 忍 嘗 釁 非 人 斷 所 顛 矣, 之於 吾 自 則 本 殺 物 食 之 用 倒 爲 見 異 以 之 義 爲 爲 其 其 端 異 心 禮 乃 同 而 而 而

未見羊 者,其 之無不 此 鍾 掌 淺 心 於 之心,仁之端 言, 也 可 本 而 王之不忍,施於 禮之小 深之宜 一,今以小 7,何 體 此 之老,幼吾幼 忍 心 以 而 及人; 以 固 渾 而 大小輕重 也 心 而 自若也, 者 然, 無 緩 應者,又 復 分 者,失之未 1,豈必 一,若仁 罪殺 於彼 亦 有 無 未 以其 티 : 内 也 忍 戚 嘗 之際, 之 由 以以 民 見聞 但 外 而 戚 見之而 贵 分殊 可 不 天 哉 之心 未 易 焉, 動 見 無 殊 是 地 及 足 之所 感 静 以 蓋 意 (充之,則仁 人人之幼 故 也 矣。 則 之 而 始 以 次 後有 哉 則 有分矣, 此 且 間 終之間 牲 無 病 立愛必自 及, 豊 以 觀 日 心 自 夫 是心 其 之未嘗 爲其不見之故 齊 口 又正合乎愛物 日 以 大 物 而天下可 老 理 乎 王 孟 發 有 體 吾 之 未見 耶? ? 聞 所 耳 子 不 9 親 老, 衆 孟 謂 所 口 故 而 始 之 子之 見 以 勝 不 然齊 以 . 其 運 而 時 牛 忍 釁 感 用 及 理 於 爲

者,曰「此心之發,在人不同,能 又曰 擴充之,則可以至於仁矣」。 度 然輕重長短之當然,固本心之正 心 也。 則孟 於此深識其本而善推之,非欲其反推愛物之 近及遠者發,以 爲,不能舉斯心加諸彼,則孟 不易哉 之言皆至矣。 之大,而親 天下者,誠能 0 當密察存養 而 以 有 「當以 稱 及於仁民 范氏諸説皆善,但 子於禮,猶有所未學者,恐未 以 量之者,亦以 齊 心爲權度,試稱量之」,語若有病。 疎 日 王 遠 以 也。 而擴充之矣,然其明暗通塞之 愛牛之説,明 但張子論孟子獨不言《易》者 諸説 明 其心 邇 齊王 無 其曰「心有輕 如 此心之用而 而 ___ 何? 能 物 不失其序,則雖天下 以 遠遺 不 齊 學者 得 日 子此言 王 曰 近之失,欲 所 . 一不能 察識 重 此 反求之耳 理,其爲權 程子、 焉,其 求仁之事 必 長短」,而 Ē 心之發, 存養而 推 如 張子 其 此 治豈 謂 其 推 所 説

三七

孟子或問卷一

務 道 復,今樂終 必 爲 E 道。 使 而 非 孟 以 或 過爲 楊 使 兩失之。 不 從楊氏 漸 子 問 氏 人 同 得 而 不必 亦以 失孟子之微 不 也 首 去之矣。 政 能 范 之説 於 章 此不可 爲 廢, 無 齊 氏 范 姑 疑。 而失之,則是古樂終 以 而 則 正 但二公之説 楊 孟 於孟 以 其 意 夫 然 子 之 不 本 所 從 之言 説 而 審 子 謂 范 則 未 之意、 不 也 世 氏 害 其 爲 同 俗 ,皆有 之説 乎 意 救 9 之樂者 爲 固 何 爲 時 皆 之急 邦 邦 所 不 而 也 以 之 必 之 失 未

者 聞 以 者 天下 乎 或 問問 爲度,一 日 樂天畏 子 視而 聞 天 之亡 之説 同 仁,惟 友 其 何 詳 欲 復 京 使 有 人 叮 八各得 得 而

> 厚 天之威 必 得 其 耻 不 能 之事也, 也,又 惟 其 吴之方强 而 取 言 而 (國家, É 卹 以 所 各有 ,此智之 知 己 敵 不能 保文、武之天 義 之,及夫終 爲 强 理之當然,故 而 人之畏, 何 不 去,是 於 征 難 固 于 取 利 復 攸 而 不 政 伐之,仁 太王、 計 時 於仁智哉 明 其 如 當 以 治 如 葛 畏天爲 也 彼 保 而 不 民 彼以 不 與 是 下矣。 之。 期 終 仁 此 人,終焉 勾 之拘 可 昆 於 以 之 强 使湯 不 而 踐 成 化 夷之 言 ?」其説 小 至 弱 能 有 此 縱 外 王 之 以 事 也 且古 自 而 亂 鬼 忧 文保 而 何 周 無 或興 勢 大 自 强 禍 也 躬 言 哉 頌 道 而 智 立 及於 人引《 當矣。 而 ? (》之言 養夷、 是 故 日 則 使太 E 不 者 功 湯 事 以 無 業 古 日 達 之,内 敢 人,然後 孟 如 耻 大 以 王、 葛, 於事 忽 子 慇 或 事 日 獯 聖賢 保 畏 而 然而 惡 灩 之 勾 刷 則 1 荷 天 天 斷 不 畏 践 其 治 與 而 而 安 極 章 而

智者之心,以 如 不 正 何 同 有 ? 要亦 ? 其藏 書 日 古者《詩》《 耳 師 爲用 文多與 程子至矣,吕 有得失,不 弟 子 間 謀 類皆 今本 而 《書》簡 狹隘 口 不 氏 以 相 册 則 亦 同 授受, 重 泛貶之過 得之。 概 大,學者 當 論 以 故 也 何 矣 尹氏 其 者 諸 傳 不 論 説 多 能 爲

利欲 厚 謂 諫 東北 爲,信乎? 之權 民 0 范氏之説 范 劉 RIF 賊 之原,其意 或問 氏 齊 剖 民 王 析 時 楊 説者或謂 分 曰 : 有明 同 毫 正 氏 則 爲 亦 釐 矣, 不 貨、 堂 已深矣。 好 其 之妙 然也 貨 其 處 勢 色之 明堂者 特以 愛君之切 不 則 0 則有 甚 説 趙氏 《漢書》 然於 相 公私之異 齊王 所 不 遠 之説 未 孟 司 9 猶 而 僭 而 察 子 不 奈 言 欲 不 也 大 禮 前 誣 室 難 何 機 泰 之 矣。 蓋 其 於 納 所 有 ? Ш

誤矣。 美,而 非 非 以 所 則 勢 矯 不 也 也 子 所 亦 乎 IE 欲 謂 革 如 有 不 欲 害 未 孟 避 層 而 《易》 夫達 , 此 其 免 其 察於毫釐之際也 難 甚 此 子 正家者 不 絶 不虞其説之牽 若直 之權 至於楊氏并前 加 但 變之爲 害 其 與 反 倉皇之際,携 後 所 爲 此 德 民 齊王專於私己, 不復 然其 謂 段 故 失 小 哉 謂 同 矣,然於孟 特特 勇而 論 此 所論 遇 ? 之,非欲 可 孟子 説 爲厚 耳。 主 以 辭義 是 恐 大之也 紹 於 相 請 愛 强 其 至謂 未 章 民 述則善矣 巷 名言之間 移 其 婦 其 子 而 蓋齊 免 因 好 者 矣。 而 陳 君 子 無 不 勇 太 於 其 而 彼 足 之切,欲 好 善 而 王之事 以 王 者爲 好 不 曲 邪 然此 爲 來, 之小 以 ()然不 此 閉 程 思及民,故 貨 學 1 好 傳 勇 邪 説 取 有 好 四 而 何 猶特 貨 考之, 之正 色,人 勇,正 而 則 也 爲 所 世 利 其 以 敢 大之, 不盡 正 一之譏 其 則 道 有 見 爲 IE 守 情 其 其 之 似 意 亦 所

日

巧矣,然未有

以

知

其

説

之爲

然

也

或問

楊氏《徵

招

 \approx

角

招》之説

如

何

?

熙、豐之失,則意亦有未盡者,讀者詳之。

説恐 無 臣 不然。 ,正坐此耳 或 問問 ." 楊氏 賢 如 後段之意甚善,齊王之所以 不 得 已之説 曰:張子之

邪? 事 《孟子》,蘇氏《古史》從《史記》《荀子》,是 則於文、武之心,孟子之意,其庶幾乎? 爲得之邪? 記》《荀子》以 鑑》之例,凡前史異 ,與 此 亦無説,不知其何 或問:伐燕之事 日 齊之取 "張子二條,其言詳矣,第深考之, 燕,若 爲湣王,而 曰: 此則 同, 不同 《孟子》以爲宣王、《 據 必 無 司 者,而 也? 著 他 馬 其 可 温 説於《考異 考矣,然《通 曰:文、武之 孟子引之何 公《通 鑑 》從 孰 史

或問十一章之説。曰:范氏之説,深切

詳

明矣。

也? 曰:李氏之言得矣。李氏曰:孟子數語文或問:孟子告滕文公以太王之事,何

而有禮 次則效死而已 慧,不如乘勢,雖有鎡基,不如待時。」此之謂也 小人弱,非有湯、 公以太王之事,蓋以其國小人弱,不過能爲 ,能篤信孟子之言而力行之,未有能過之者 固不以湯 文之德,不能以興 文之事望之也。 、起耳。 故 善以待子孫,其 然當時 曰 情 1 諸 雖 其 有 腎 國

其論 是 先人之國,豈以非憂樂之所係 可 輕效聖賢之所爲,寧不盡乎禮法之變,而 氏人心向背之云,亦非孟 憂喜者,又失於過高。 不足以議仁人之心,至謂天下之得 曰「大賢以上不可以禮法拘」者,權 失其常也。 亦禮法而已矣。 或問十五章之説。 去邠世守之際,亦 范氏論仁人所以不私其身者 但常人 不如 太王蓋 曰 : 子之意 未至於此 楊氏 程子至矣,然其 不得 而 之精 也。 輕 已而 失不足爲 而 則 之哉 當 得中 去其 不 可 尹

言天甚善,蓋出於李泌君相不可言命之説。 或問卒章之説。曰:范氏所言魯侯不可

孟子或問卷三

而《小 Ŧī. 尊周之驗,亦未足以 但責 當其 所遺者,豈記 之盛,則管仲 以 甚 霸 善善 服 假之、管仲知義之説 其非有至公血誠之心,以復于文、武規摹 時 其 ,至斥管仲 或問:首章諸説如何? 雅》盡廢,又豈桓公、管仲之罪 ,起而救 口矣。 者失之與? 無所逃其責。 蓋周之衰亂,固 之,蓋亦仁人君子之所必爲, 爲 徒能救之於已 見其 ,則皆得之矣。 心術之隱微 其以 而其辭意,又若有 專封 ☐ : 非 亂 楊氏 哉? 日之積 事 則 不足 爲 初説 至論 適 不

心 知 性 或 問 無 所疑 孟 子之不 惑 動 動 皆合義, 心 何 無所 也? 畏怯 日 0 雖 盡

歸 是約者,孟 子,則曾子之守,尤爲得其要也。 不得者,己之言 比舍,則舍之守爲得其要,至以 之守氣,不如曾子之守約,何 矣。曰:孟子既以 之、非以其道爲同乎二子也、程子之言得 之於曾子,北宫黝之於子 此 動 當盛位、行大道,亦沛然行其所 言 而可守也。 云者,言其所守之得其要耳,非 人勇力之士耳,孟子特以其氣象之所似 之曾 物而 ,而孔子之不惑 心之有? 者亦不同 子耶? 可守,而 子既 蓋黝、舍皆守氣以養勇,然以 《易》所謂 遂以 以 曰: 矣, 也, 與 孟施舍爲守約矣,又曰 亦 孟 而 如子 守氣不如守 孟 以 子 其 施 不 之言 之所知者,他人之 夏,奈何? 事 舍矣,而 疑 説 也 也 其 貫 則告子 無 ? 舍而 所行 以 日 之, ·納爲言 事 今謂 約 可 日 而已, 又 者 爲 何 比 孟 日 之 耶 奪 守約 蓋 約 於 施 而 0 曾 舍 之 而 黝 物 明 則 爲 舍 如 何

必 之云 慊 無 其 以 辭之合理 所 爲 求 則 真 而 於 先 無 疑 言 反 同 謂 人 0 先 未 於 復推 八之言 然 於名義 得 得義之名,然後求諸 也。 不慊於心矣。 心 所以 之所 勿求 此 以 亦 也 諸 天下之故 則 必先得仁之名,而 以 之, 前 孟 諸 嘗 失者而 告子之學,先 心 非義之義,亦 則與其下文心若氣者爲 子之所知 失,而 心者 之間也 一, 而 欲 夫告子之學,他 常自 而 得其 所行 之 ,與後所謂 知之,是以 處於該淫邪遁之間 孟 至],信乎 矣。 日 説 子 爲 É 其 0 如 無 乃 求 或者以 己之言 不 由 然 ? 心 此 兼 後求諸、 不 諸 得 是 以 生於其 以爲 其 貫 雖無 合於仁義,不待 外 以 以 티 : 告子 蓋告子不 物 爲言者,名義 心 人 集 而 則 義。 是説 所考 於其間 義 IE 我 心以 之 後求 不 心 理 不 若 所 舉 者 也。 應無 而 類 證,然 明 美矣, 爲仁, 之於 自 亦 天 孟 無 不 是 復 F 知 得 不 子 而 而 而

於前 者而 聖賢 也; 之言 見 以 文辭 先 者名 古 所 即 前,後言己之所 使告子專求 之於心也 口 ',今以 得其 以失 而 有 孟 孟 以其異 告子 之教 不待 比之,則告子所不得之言,即 無疑 義理 何 義之云, 子之所以 子 此 名 所 也 其言推之,則 者。 章 一,而 所 安 承 義 所勿 而 者 之言 排 名義 是 於後 則 驗以 又何 謂 而 而 蓋 其 得,孟子之所 而 長 學 是 後 求之氣, 反之, 其先引告子之言 彼此之相形 不 反 躬行之實, 云此 而 問 何 説 以 求 得 復 所 思辨 截 不復 之於心、行之於身也 其 著 口 乎? 則 求 起 然横 明於 已得 移易 乎 即 之, 凡 求 而 告子 以 之於 力 人於此章之中 孟 諸言 無 爲 前 後。 則 者。 得,即 行 就 子 是 亦 之所 之者,是 後之相 1者,固 1 可 説 如 若必 所 孟 今以 有 其言 者 養 告子之 子 張 曉 則 以 之氣 其 日言 所 本 然 若 求 古 將 失 應 知 於 同 口 以 從 求 則 不

於氣之云者, 其多少之分 九,氣 息之 氣 氣 各 以 者 損 勿 謂 其 而 坐 剛字 字爲 趙 直 句, 而 於 也 特 其 無 前 湯 之形 氣 子 白 字 ? 縮 近 幸 所 制 蹈 萬之衆,又皆望其 之不動 以 程 加 之 屬之下 語 世之俗 句者矣,則 而 養 勝 其 火 ,得失之算,已 培 而 曰 : 程 有有 意 E 意 料 勇 視告子之不 其 從 子 重 敵之謀 心 後 程子之前 俗 首 死 而挺身以 從 複 句 師 日 師 故 之, 無 尾 (7)徒 知 也 . 此 則 言 之 相 無 趙 讀 爲 有 既 又 説 以 應 今以 所 氏 判 動 是 固 贅 赴 旌 無 疑 成 無 然於 懾 開 以「至大至 i, 蓋 麾 脉 剩 敵 以 蚍 此 亦 説 直字 其 有 絡 也 聽 亦 千 而 有 病 矣, 蜉 E 如 前 以 胸 其 有 貫 無 里 所 蟻 猶 屬 其 智 中 至 子 加 故 他 所 通 自 子 轉 之 勇 不 勇 金鼓 之 與 無 發 而 大 不 來,不 剛 之援 戰 之將 夫 爲 E 是 L 明 熊 所 至 不 獲 以 悍 爲 句 人 以 文 所 虎 疑 直 \exists 從 徒 剛 擒 自 若 寧 獨 則 向 之 貔 勝 9 耳 者 反 以 與 出 几 何 初 無 赴 貅 敗

完

而

志

益

IE

其

於

存

養

之功,

且

將

無

致

其

功

而

無

所

偏

廢

焉

, 則

志

IE

而

氣

自

完,

直

其

内

也

無暴

其

氣

所

以

防

於

外

也,

兩

者

持

志

養

氣

之爲交養

何

也

日

. 失

持

志

所

?

審之

則得

其

文

意

而

知

其

所

以

矣。

日

求

者

二,亦

文

冒

而

意

異,蓋

一以

爲

無

益

有

不

得

於言

而

不

求

諸

心

之

驗。

而

其

所

謂

m

不

口

求

以

爲

理

所

必

無

不

必

求

讀

乎

?

抑

後

篇

告

子

論

性

數章

皆

卒然立

論

定之學

也

世

不

詠

前

哲

而

誤

後

來

之

辭

窮

即

止

無

復

思

惟

辨論之意

是

又

吾

所

其説

則

是

變

聖

門

博

文

約

禮之教,

爲

異

端

不

存

矣。

日

程

子

謂

動

氣

者

什

志

者

什

何

也

? 所

日

此

言

0 志

也

加

孟

子

所

猶

有

取

於勿

求

盡

於此

亦

可

見矣。

日

知言養

如

何

日

程

子

謝

氏

得之矣。

蓋

之,則 也 理 勿 爲 未 之知言 子 與 義 而 日 説 此 大 有 道 也 暴 直 縮 0 固 論 相 之 抵 上 與 之云 其 F 不 也 所 以 道 有 義 類 此 形 揠 揠 心 讀 養 以行, 本 也 理 得 章 體 以 又 苗 苗 明 而 若如 雖 體言之,則有 す 之 氣 於 文 用 因 道 者 爲 則 同 亦 勢 如 言之言 養 之 者 曲 非 是 集 日 : 而 又 諸 何 雖 爲 殊,然其渾 也。 而 氣 亂 則非 孟子 是 義 必必 説 若 道、體 句 之 而 所 亦 帰 然 因 者矣,不取 斷 也。 之意矣。 不復 後 以 則 氣 數 勿 惟 後 氣 絶 得 是理 也者 間 爲 + 求 也 能 不 以 成文字 以 斷 日 説 句 於 義、 得直字之説, 而 合 牛 爲 然後 器 0 行 者 隔 氣 意 而 浩然之氣 而 質 何以 若楊氏 焉 絶 其 之 實 用 互 也 不本 無 也 矣。 説 有 相 氣 連 形 都 也,二者皆 間 言氣之配 蓋 發明 是 貫 無 以 與 也 以 於 而 何 日 氣 干 乃 人 又 自 孟 如 者 下 勿 世 而 涉 言 并 諸 與 告 暴 子 義 者 反 ? 如 雖 而 矣。 外 以 此 事 謂 亦 反 者 事 勿 取 日 自

之,而 集之 浩然之氣 「言 理 之説矣, 有 0 西己 Ħ. 0 而 戰 平 助 於 是 於此 不正勝。」言其 理 散 或 苟 彼 合宜 乎 此 氣自 何 不 必合其宜 則 道 略 然 爲 漫 也。 而 謂 可 程 之謂 者 者 後 知 不 義 蕭 集 而 氣 也 預 子 道 者 如 有 知 索 於 亦詳 ? 何 其 期 金 有 其 氣 氣 所 也 而 此 也。 言 不可 焉 也 事 其 之 浩 器 曰: 以 不 哉 於 ? 故 且 E 而 效 是 土 爲 然 養 期 顓 能 事 明 集 必 又曰 也 必 臾。 而 也。 則 Ш 貴, 日 焉 以 矣。 物 義 明 日。 充 有 所 之喻 有 之來, 自 道 集 而 心 義者 者 而 事 事 春 謂 又 振 日 欲 1秋傳》 於 勿 集 義 有 有 焉,言必當 集 似 至 上 . 矣。 且. 恃 志 小心 義 所 以 事 義 矣 無 帝之類。 孟 爲慊然之餒 有 之以 害 日 者 生 勿 者 然 不 之 取 子 曰 之, 言 E 也 以 後 深 所 平 而 師 何 有爲 吾 能 耶 氣 則 出 闢 不 有 勿 贵 義 以 彼 勿 不 生 所 所 理 制 裁 義 口 所 忘 日 而 Œ.

養氣 事 有 可 又作 孟 無 未 何 不 速 言之所以 其 베 也 忘 子 于 事 見 以 也 充 可 而 事 其 唯當集義 不 雖言 者 爲以 之本,程子 敬爲言 矣。 慊 ? 而 以 助 , 其或能 至 大 所 「集義 足其 之,此 集 一,則 助之也 抵 有 티 : 張之也 異 集 日 義 今 事 或 義 也。 0 心 爲 Ĺ 也 舍之之害 何哉? 而 以 衆 以 以上下文意推 而已; 有所 之 學 無 之學,以 而 已,至於程 人之通 爲 爲 然義非 然則 益 勿 必 事 較是二者 無 爲者, 助 而 先之以持 助之長 益 或 日: 忘 而 長 助 特 患 敬則 敬 以 而 不可 之 長 者 也。 孟 則 爲 忘 子之論 不察乎義之所在 預 示不 , 之害,甚於舍之, 之,孟 之, 亦 不 子之學,以 「其爲」 X 爲 期於襲取之功, 則 又不可以 志 故 可 能 德之門,此 必 之期 知 或 孟子言養氣 强 ,則每 期其 以 敬 不 子 罪 其 其 自 之所 之輕 非 勝 不 而 所 集,故 功 義 義 慊 其氣 以 其 謂 不 不 其 爲 有 謂 重 欲 而 爲 期 充

> 累,而 處 事 者 乎淵 他 如 潑 用 過 則 形 程 事 能 者 焉 何 之間 説 乃 潑 容 子 人欲之私 干 以 亦不免於人欲之私 加 則 ? 以 地 也 天 所 敬 自 則失之過 後 一、若曾 勿正 多可 ,若鳶 者 地 行,故 此 之 謂 曰 : 天 問 語 流 活 蓋 理 者, 疑 亦 作 行 爲 謝 潑 以 點之浴沂 自 之 程子 自然之妙 原 似 氏 然之 潑 高 俗 至 那 未 IE 於禪學 習 又以 或失其文義 仁 語 地 嘗 · 雖 言 焉 而 者 智 明 忘之説 戾 妙 不 而 之, 風 也。 心 以 于 助之長 持 上下察爲察見天理 也 何 得 則 雩 得 集 天 敬 取 也 以 故必 誤 而 其 義 也 其 蓋 ? 則 流 詠 而 也 爲 E 易 無 所 魚 行 則 其 於 以 絶 言 一之説 티 : 知 所 之 發 以 其 其 是 歸 日 回 也 而 事 以 訓 躍 見 此 門 二者之 用 也 是也 己 而 諸 天自 其 於 心之 人 日 忘 説 有 有 \Box 以 或 H

■「之」,正德本、正保本作「也」。

之别 范氏 成,則 志爲 端 子以 子 邪 張 先 此言集義, 聖」以下方爲公孫之問,今以宰我以下皆 大則淫 亦 ·必指 亦 無 必 其 IE. 字 知言之説 養氣以 主 以 有 説 如 心 知言爲養 難 又何者爲 之主,乃 不具 釋氏 則 一,此乃 義也 窮,故 何? 行 人 淫 則 此,故 失其 集 則 而 詖,致 以 爲 專言養 티 : 古 必 過 義爲 或曰 氣 主 然。 如 能 志氣之别。」正謂 、序矣。 非 實 爲 之本 曲 程子 何? 詖而 生浩然之氣,至 張子 則 持 則 功, 事 遁 : 氣 邪,求之一卷之中, 上文兼言志氣 志 也 辭 以 必 前 日 不安, 而集 而 曰 曰:張子、吕 以 不能矣。 爲 有 彼 釋氏之言 0 不及持 自 日 楊 邪 其 義 以 則 解 辭 論 聽 以 墨 舊 免。 必 以 此 言 居敬 IE 兼 讀 流遁失守。 志 於浩 程子 爲 也。 離 一之道, 矣,然孟 此 有 凡 氏 一夫子 淫 於 何 而 弊 爲 日 道 兀 氣 曰 以 辭 耶 數 而 日 本 0 己 持 異 爲 既 數 張 以 辭 在

> 問 體 得 識 所 書 小大 但 聖人之道 天下 程子之説,蓋 化之,無復限量之可言,故以 而 牛、閔子、顏淵氣質不偏, 日 猶 信,惟 不 辭 識之,不言而 其文學,子 也 而微 屬矣。 -,有所 一,故學 伯夷、伊 役於思勉,滯 而 此 何 亦然。 所 也 義 大而 焉 ? 微 爲 不爲,何 티 : 尹之行 張 但 已得之,或者反之,以爲顏子合 而 有 若以 日 信者,獨能具有聖人之全體 得 各得其性之所 能 功 未 六子之不同。 0 博,門 於形 其 耳 彰 此 舊説讀之, 以 威 著之 林 不義 言之也? 昔 迹,未若聖人之大而 儀 弟子 氏之説 者 理義 皆 稱 殺 竊 爲 不 者 則於上文 聞 近。 完具,故 具體 何 體 能 也 , 以 也? 日 不 徧 也 則 下 如 辜 而 林 觀 以 過 游 微爾 氏 其 惟 至 而 日 而 具. 夏 盡 默 冉 讓 得

^{■「}而所微」,四庫本作「而一之,所謂微者」

意 古 得失之際,蓋 於 不 前 詳,子之所 X 而 得 觀 逃 後編考 而 之, 諫 備 伐 則 論 而 論 有 而 可 之也 審擇之,庶乎其黑白分矣, 止 不 餓 見 勝言者,虚 此 矣。 非 其 何耶 日 道 0 義 ? 此 心 티 : 章 一介不以 以 之義 求 此 其 孟 子 同 諸 取 之 此 異 説 予

之服 仁之在 也 流 事 我 一 離 而 孟 與 飢 或 觀 惟 子 餓 不 問 己 所 夫 真 服 而 王 而 東 行 可 不 可 霸 假之 矣。 征 謂 去,此又非有名位勢力以 見。 之别。 西 長 也; 怨,虞 以 於譬喻 若七十子之從孔 執 日 以 轅 . 、芮質成者, 德 濤 也 以 行 塗、侵曹 力假 仁 則 者,不 子 伐 其 則 驅之 至於 衛 仁 人 之 心 在 知

肆 可 也 則 以 從 亦 或問 日 易以 容 審 或 或 怠 諦 家 家 惰 而 閒 閒 有 暇 是 暇 所 以 及 人 爲 大 之時 心 是時 循 無 荷 也 事 明 且 常常 其 H 然 力 政 失 有 刑 其 情 餘 口 安 何

> 彼所 日: 孔子之言矣。 謂釋氏之徒知 聖人之所 夫子 高 此 雖 循之失,而 辱 遽 爲之時,以 強 之 者 緯 明 引。鳴 謂 孔子誦周 時, 必必 知 楊 欲 道 禍 廣之流是矣 肆 及 爲 者 謂 患之來 其荒 至於 此 之 有 鴉》之詩 果 知 積 可 而 公之詩,而 夫知 道 道 何 樂, 爲 累 有 蠱 者 而 近 物哉 之時 弊積 之功。 所 道矣, 不 如 在 惟 不 其 可以 此 朝 而 恐 及 而 而 國 夕, 矣。 有 日 嘆 而 而 顧 禍 治 爲之,則 有不 之不 感於其言 其 近 而不 乃 敗生 不 世 故 知 不 미 者 世 亡哉 足, 惡 道 然, 暇 以 則 陃 可 夫 則 治 儒 其 顧 亦 也 何 丽 以 倉 不 也,若 世 甚者 欲 乃 異 也 無 仁 惶 日 及 平 有 然 順 因 迫

義 也 乎 兀 禮、智 蓋 端 或 問 性 何 之爲 而 也? 孟子 德 以 專論 日 包三者 無 0 不 所 不忍人之心 ·忍之心 不 仁也 具, 總 即 之 情 惻 而 則 之所 隱之心 後 爲 乃 及

重之别 者,何 惻 無 矣。 五常, 以 仁、義、禮、智 其 其 以 抑 讀 深 土無定位; 心名之,蓋 隱 所 心言之,何 矣。 惻 他 爲 謝 誠 也 不 顯 宜深味之。 隱 如 惻 曰 猶 也 者物之終始 《道身汗 隱 耶 通 以 而 土 然則 然則 吕 知 心 總 以其所統者言爾。 之於 五常非 티 : 其 心 爲 之則 謝 ·性 也 曰 : 其 是亦 諸 面 有仁,内 生 ? 五. (言之也, 程子言之詳 楊、尹 也 「赤,實 但孟子方以是非之心 道 説 子 惟 一行也。 信 不 ,分明仁愛性 日 是四端 如 以 其貫四端之一 不有 四 0 誠 何 之説 四 1端,情 羞惡之發 外 心 ? 無 端端 又安得 ,而信 五 交 統 物 爲 一行非 ,亦皆有所 相 日 而 矣。 性 曰 : 也 情 . 養 情 此 而 非 等説 是皆善 以貫三者 情之異, 也 土不立 其不 蓋 者 而 驗也 無 亦 而皆 ___ 端。 信 孟 先 也 可 加 其 發 子皆 之 言信 得 後 以 爲 與 程 矣。 明 輕輕 於 故 觀 故 而 以 ? 子 智 因

> 之端, 與故之云以爲之説 又謂 言 性 者 必 ,則失其旨矣。 求 其 故 而 謝 乃 引 去

謂 善以 善者天下之公理,本無 也。 而 舜之心,無一 有身,不能 之也。 誠 耳。 此二者,善 特交互言之,以 而 特言其亡私 樂取 善 虚 行 與 爲 或問 之,非 樂取 心 觀其居深山中 善,而 人同 以 謂之樂取 而行之於身,蓋不 於 聽其天下之公,蓋不 與 無私於己 大舜 有 也。 順 人 不 毫有我之私 人同、 利 理 以爲善,言其見 知其 見聖人之心 勉之 之善 而 者, 舍己從人,言其不先立己, 之目也 已,非謂 八孰爲在 聞 故 又以 意 與 在 一善言,見一善行 也。 (人同, 有物我之分焉 三在 見其 是 己,孰爲在 知善之在 1,表裏 其已有不善 然謂 此 以 人之别 何 心 人之善,則 能 知善之在 也 之 句 與 公天下 無間 ? 舍 本 理 Ξ 人也 但 日 而 如 事 至 則 此

者。曰:諸說上下疑有闕文。

若決江河,沛然莫之能禦,及其格于文祖,則

指決江河,沛然莫之能禦,及其格于文祖,則

若決江河,沛然莫之能禦,及其格于文祖,則

若決江河,沛然莫之能禦,及其格于文祖,則

之言考之,則恐其意未必果然也。然,何也? 曰:諸先生之意厚矣,然以孟子恭,非夷、惠之過,乃其流之弊耳。子之説不恭,非夷、惠之過,乃其流之弊耳。子之説不

孟子或問卷四

見王 無所逃 湯、 或日 托 位 相見之節,王 而 加 不往 疾 明 桓 則 者 君 或 未嘗受禄 公之事觀之,則其 問: 楊氏之説 之義 而 不 何 又不 可。 不俟駕 也 孟 也 ? 就 誠 子 王 蓋 而 本欲朝王 如 也 而 日 見孟子 有 何 : 召之,則既 非 所 孟子 則 齊 適 若之何 王之所 意不爲是矣。 日 則 而 於齊 矣,王召 . 可 不 以 失禮 爲 孟 而 孟 得 實 臣 可往 處 子 子 臣 之, 矣, 自 尤 所 也 賓 哉? 往 則 非 且 稱 師 而 之 其 辭 所 以 成 其 而

合矣。 親 體 或 問 曷 變 化 爲 比化者, 之前 不 用 無 而 無使 使 别 土 爲 土親膚。 親 之説 其 膚 乎 ? 其 舊説 於 日 以 0 情 以 爲

> 其 此則 類 年 氏《中説》記太原府君之言曰:「一 天下儉其親,如子之說 如《集註》之云 不易,曰無爲費天下也。」文意 此 辭 、又爲 加 費 而 舊説 是説 卒 有 於 則 所 彼 而 不 庶 不 則以 協 平 顧 也 其 其 夫 爲 倫類之不 兩 比 有 首篇 得 合敢死之士,至 稽乎? 矣。 比 IE 死 與 布 通 日 者之云 也 此 被 日 一: 王 不以 同 + 必

待之? 心哉? 火之中 伐之理告之足矣。 以 以 此 王 何 私 告之也? 日 爲 亦 或問: 當 來問,又不言齊之將 而 則是猜防險詖之私 「今伐 時 不 而 且 可 傳之誤,而 齊 無 孟子於沈同之問,曷爲 燕,此、 哉 티 : 殺 雖 戮 無 沈同 係累之暴,則其伐之也,亦 道 若遂探 文、武之時,不 史記》亦云:「孟 一、若能 史氏 古 非 爾 伐 其 輕信之耳 拯 能 燕 燕之遺 豈所 情 伐 也 而 燕者 可失 則 不 謂 預 直 盡 聖 設 民 軻 也。」 謂 於 賢 辭 以 且 其 其 其 之 以 水 可 齊 E

之事許齊王哉?民不悦,則勿取之」云爾,孟子豈直以文、武民不悦,則勿取之」云爾,孟子豈直以文、武文、武之時,則前篇所謂「燕民悦,則取之,燕

者,學者宜深味之。 其原蓋出於程子之説,所謂天理人倫之至同,何也? 曰:吕氏之疑,游氏辨之詳矣,或問:周公、管叔之事,吕、游之説不

嬖之人者,何以異乎? 尹氏之説失之矣。子之心如此,則與世之回面汙行而事君側便非謂二子之心爲然也,語其勢則然耳。若二能安其身,二子之賢,其心固如是乎? 曰:能安其身,二子之賢,其心固如是乎? 曰:

所存之正矣。 說,尤有味,且其發於夢寐者如此,蓋可見其皆善矣,熟玩之可也。楊氏齊王猶足爲善之皆善矣,熟玩之可也。楊氏齊王猶足爲善之

或問:孟子既曰「憂天下之憂」矣,又曰

何 憂? 之憂,而亦不害其樂天知命之樂,其幾是 不疑。」或人退,文中子曰:「樂天知命,吾何 憂。」「聖人有疑乎?」曰:「天下皆疑,吾獨 聖人有憂乎?」曰 爲不豫」,何 窮理盡性,吾何疑?」若孟 也? 0 「天下皆憂,吾 或問文中 子不忘 獨 子 日 乎 天下 得 去

蓋 之曰:「仕而 之情也。 之久,又當有所啟發而增益於前者,且 當時之諸侯,則猶 王無湯、武之姿,此孟子所以有去志也,然比 臣之義,亦略定矣,所以將去而不能 也,則又曰「王猶足用爲 曰寡君; 違而 取 或問: 此 云 曰: 爾 孟子見齊王而有去志矣,而 未有禄者,君有饋焉 張子之説 君薨,弗 有可 爲服也。」張子之言 取者,而況孟 如 善,何也? 何 ? 日 日 0 獻 無眷 《禮》有 子 日 ()使焉 其 居 其 眷 君 齊 齊

孟子或問卷五

舜之可 之理 質其 者 嘗學問 不 益 知 也 何 天性 . 得 固 性 ,若其大體 也 一,若究 矣。 事 ? 蓋 善 而 趣 或 之人, 聞 爲 問: 必 以實之,所以 善從 知 則 者 知 曰: 夫子之言性與天道 則 自 其 有 孟子道性 此, 悪 性 、其於性善也,信之益篤 貴 之已然, 所 加 得 以 善者 (於物, 孟 然 以 知 有 無 後 然 子之言性 陵 堯、舜之必可 順 以 互相發也。 節之 善善 知 而 逆之殊, 然後能 則學者 天 論 理言之, 而言必 理人欲 之, 甚 善,乃 耶 則 固 知仁義 董 ? 不 誠 爲矣,知 其言蓋 稱 稱 子 一,子貢 以 可 曰: 性· 堯、 有賓主 有 堯 所 語 以 不 而守之 謂 舜 舜 易 夫 猶 知 不 堯、 未 有 明 知 命

> 對之善 以進乎 子疑孟 荀、楊、 異乎吾 之過 不之信 信 論 三品,最後釋氏 孟 復來,則豈 孟子之言,非 處 子之言,雖若怪之,實則喜其 爲 善 然 焉 本,此 耳, 一,然 後 也,特 也,而 韓 此 子之言, 儒 所 後 亦 重 氏 也。 者雖習聞 聞 先 其 樂 不 禮 或以爲惡,或以爲 矣。 (思之未) 當 立 贊美之辭 可 亦 循 節 或曰: 其 復冀 時 者 莫之疑 而 理 9 夫 大者」,皆 孟 之所常聞 重 出 平 孟 得, 子不之拒 其 禮 孟子 程 孟 然後復 (思繹) 子 也, 耳,信乎? 子 節 而 子之説 性善之論 所 之言 不舍於 是 然後 而 謂 謂 也 其 有 信從 一故聞 此 混 性 能 何 然 知性 漠 安 無 也 善 思 心 也 然如 矣。 處 或 或 善 日 非 與? 至 一一 者 善 未 以 善 無 曰 非 以 飄 將 世 知 恶 爲 此 與 日 0 9 世 子 忠 安 故 風 徒 性 惡 有 有 亦

^{●「}賓主」,正德本、正保本作「主賓」。

得從 之中 言 之門 説 益 費 末 證 推 也。 神 異同 説 説 之所 **元** 矣。 辭 魂 以 而 爲 也 言 不 矣,而 事 之外,自以 節 且 文之。 以 魄 不 其 而 彝 之,至 察至善之本 及,則 與 於其門,以 爲 又不究秉彝 至 日 誤 無 好 否, 0 性,於是悦 粗之質 復 不 矣。 德 諸 蓋 彷 以 知 而 牽 推 之論 説 尹 彿 天 其 後 爲 孟子 性 質 如 理人欲 氏 孟 有 實 得 然, 之實 而 於善惡 也。 其 子之遺意矣。 何 善惡之名 之説 陷 性之真,而 以 於彼説之高 論 ? 説 於釋 聞 而 德 仁 然 爲 别 善 以 之前 티 : 庶乎其 ,而指爲贊美之空 義 專 立 同 而 氏之餘 附 禮 焉 體 從 無對之虚 以 張 前 焉 智至微 有 爲 特 子 是 有 惜 則 功 置 而 而 而 絶 信 相 乎 亦 大 直 於 造 反 孟 信 之理 善之 句 長 其 羞 吾 勞 以 孟 子 爲 位。 之 之 力 發 則 精 於 不 氏 是 吾

或問:三年之喪,何也? 曰:人子之

乎人 爲大本 常 之大本 乎 亦 釐 如 則 矣,然其學得孔門 何 不 母 心 孟子生於戰國分争之際,不得見先王之全經 之間 - 肖者 以 可 張子 既識 也 之懷 大 無 不 其 以 情世變以文之, ? 窮也 也。 之所病者,而 大經 也,故 節 有 其大者,故其考論制 備 義 不 티 : 一,聖人 文 得 起 不 度數 三年 後 矣。 不 服 爲 何 可 Ē 及也 美不 之立 以 也? 得 此 之小 後世 齊 爲 之正 而 疏 安, 劉 中 則 於 子生三年,而後 亂 亦 曰 : 議 饘 齊 向 制 大本 禮 傳, 者 備 而 禮者 粥 疏 所 節 雖 自 而 食旨 之 而 以 度,雖若疏 大 先 喪禮之大經 以 使賢 盡 不 服 於文、武之道 深歎之也。 不 是 經之際, 其 敢 王 不甘 鳣 者 明 未 爲 心者 爲 乎此 之有 ?,卒以 主 粥 不 也。 免於父 之食 喪 濶 得 則 而 有 也 過 其 就 毫 然 故 酌

●「信」,四庫本作「言」。

流 無 孟子 ,是又不免乎私意之鑿 之學 而 强 欲 爲之, 而 如 已矣。 叔 孫 通 曹 褒之

同,何 遺制 果何 則其 意 之,亦有未悉合者,何 以 亦 義者之所能知哉? 已論之矣。 亦已甚矣。 易 有 家,乃經綸之活法,而豈 而 成之業,使民 及周 或問: 溝 ,然常舉其大而不必盡於其 耶 説焉,然皆若 不必泥於其文也。 也? 更 涂 而 制 畛 大備 陳氏曰 大抵孟 所言井地之法 域 不知 每 日 也。 . 有增 亦 不 張 孟子之言,其所 夏時洪水方平 徐氏曰: 必 得 有可 子嘗言之矣,陳 子之言,雖 有 加 曰:三代授田 服 也? 一定而 則 先 疑者。 蓋 古者 疇之 其疏 其 拘 以《周禮 曰: 可 民質用約,故田 儒 日 不可易者。 蓋 耕之地少,至 田 通 曲 吾於前 推 細 畝 以 田 簡 動 之多 士牽 本三代之 歌衆,廢 氏、徐 也,師 》諸説 若此 其 制 易 既 少 煩 制 自 章 者, 少 商 其 今 不 考 擾 壞 氏 文 成 固 而 而

氏曰 厚,而 人之術 廢,而 未至。 亦 常數,又因遊豫,則視其豐凶而補助之。 未有貢也 必始於粗終於精,古之不爲此,非不知 也? 日 用 以 意 非有以養其愛親敬長之心,而教之以 應對之際,所 以明人倫爲本,故自其 王之學教民, 足, 有司稼之官 . 所 勸勉程督之者,又適所以作其躁 貢 後 禹貢之法,九州之賦,有錯 如龍子之言,乃當時諸侯用貢法之弊耳。 以教之者,不過趨 聖賢 獨 法 世 是 ,以貢爲善矣,及其既貢 未覩其 彌 蘇 文 以 ,巡野觀稼 出 禹 氏 而 以 焉。 當是之時 其 之遺 、林氏嘗言之矣。 用 漸 效 效 廣 摩 後 如 視年之上下 故 誘 何 制 世 此 受 耶 掖 咏 學校 百 時 而 田 出於他等者,不以 ? 後 ,而後知其 歌 之 干 勸 其 世 制 姓 雖存 弦 勵 日 也,勢未及 禄之技 不 學 親 以 周制鄉遂用 誦 亦 作 善若 出 校,固 蘇 之間 睦 有 隨 成 先王之學, 斂 競 而 不善 氏 時 "之者, 法 也。 脩己 風 日 而 不 日 此 而 則 爲歲之 洒 未 一: 先 加 復 俗 貢 其 耻 方其 作 其 焉 何 掃 淳 無 所 此 法

之,其 王之意 時 就 往 施 弟皆常 心 哉? 尚 行 往反爲 雖 也 亦庶 有 何望 ,顧皆 建言 先生 長材美質 後之君子, 俗 幾矣乎 其 學 屈 君 能 欲 頹 於俗 以 致 子 風 可可 漸 蓋 化 驅 儒之 變 民 有能 有 與 誘 流 憂之,●故 成 破 入於聖賢之域 陋 俗之效 俗之 深 壞 説 考其 而 , 繆, 不 説 而 程 如 不 得 夫 得 而 復 先 有 者, 申 有 於 子 王 所 兄 明 所 先 之 亦 成

皋陶 之功 當隨 當時 矣。 世 之妄,乃欲 變 市不二賈之説 大矣 然以《易》考之,二者皆神 時 風 民 或問 之學,純 淳 移 以 前 立政 ,至於唐 事簡,容或有 以 許行爲 粹 孟 是 精 而 子 而 何 密 以 虞之際 不容固守其舊矣。 行 神農之言 皋陶 戦國 而 耶 如 其 ? 則 配 許 一之時 陳 之, 日 行 謨 雖 0 之説者 農之所 何 乎? 神 種 而 程子之言 農 德 巾 有 復 況許 君 明 日 及 生, 爲 民 刑 日 0 也 禹 亦 平 盡 行 並 弼

> 之,則 教,爲 有 氏 之説 所指 其 助 非 如 德業 尤 何 徒言 多 ? 故故 \exists 也 盛 日 舜 固 欲 是 聖 傳 其 人 位 爲 於馬, 之 説 偶 當 矣。 而 禹 然 日 亦 獨 0 尹 讓 小

惟 也? 無 曰 : 講 欲去之,然豈 屈 也 而 而 其 明 ? 分 血 吾道之尊也 自 天之生物, 本 其説 或問: 氣者 得 日 血 之耳。 出 0 氣 於 ,本於根荄,皆出 天之 ,傳之當 孟 連 夷之請 子 屬 肯 固 生 雖 故 使之 眷 被 譬 不 物, 其愛亦 以 世 甲 如 見 戀 車型 一,使聞 闢 者 執 有 蠻 接 之情,自 邪 本, 夷 兵 其 再 血 主於 説 於一 寇賊之害 氣 而 者 人 而 爲 而 親 有 者,本於父母 夷 交 己 孟 不 圃 與之角哉 以發 焉。 子二本, 能 任 子 無 1,聖人 不 競 寤於 然不 蓋 者 辨 許 古 也 體 1 调 非 何 团 何

■「生」,翻弘治本作「正」,正德本作「王」。

焉,則 何也? 哉? 所從 也。 始 子之學於墨矣,而 又有以愛有差等爲 於吾儒之一本者, 以 遠 他 而 可,直以愛有差等爲 文義有所 里,爲是説者,亦自不 施之先後,稍不 親 近 無 有 人 (之可 待 出 順 今夷之乃謂愛無差等,則是 親仁民,以 而 亦不知愛 而説者乃或 於外, 而 티 : 所以 而視其父母 無 未 比 逆,故天下之勢, 也 天下之理,其 盡,蓋謂 爲愛者有差焉 邪 悖於 之所 至於愛物, 而逆者常輕,而不得不資諸 自是之外 必 謂 愚 推 無以異於路 以 其 由 正 一本則不可 其 知 本者,雖無大失,而 其 爲 理 7 施 矣,是 説 本所 ,然於親 差之毫釐, 繆以千 本 由親始之言, 本故愛有 而無 則因 ,此儒者之道 以 有 IE 求合於儒 正 以 而 非 不各得其 人 不 其分之親 也。 爲 而 順者常 一本 也 而 知 無 一本矣。 差等 謂 此 티 : 邪 暗 而 之 雖其 身之 其 所 夷 則 於 合 施 所 何 疎

蕩

其理之悖、説之窮 信,要不如 求自附於吾儒 觀之乎? 孟子,無能 而 此 不反 理 勢 也 夫吾 因 之必 是,則吾. 其 者也 所 所 然 於 以 也 明以 知 拒 雖其陰 此 其 誘 且 彼 亦 反 胡 至 之者,是以卒 可 側 不 矣, 陽 概 而 以 雜合,有 無 見,惜乎 而 近 以 彼 世 自安 未嘗 之 於漂 世 不 佛 也 無 口 學

孟子或問卷六

其節 者 志於一時,真可謂 樂此於己也 出 心,貧賤豈 所行者皆天下之大道矣。 必天下之正位矣。 之廣居矣。 티 : 其 而 居廣居、立正位、行大道爲主,而此三言 哉 廓然大公,心不狹隘 推此於人也,不得志獨行其道 或問:大丈夫之説,其詳 不在 彼 此其 能 履繩蹈 而 撓 如是,則富貴豈 下 在 而 妾 視儀、衍之以 此 移 秉彝循理,事不苟從,則 矩,身不苟安,則 也 婦之爲,而 其 決矣。 志,威 得志與 則 所 武 然此 能 所謂 可得 居 睢 贵 民 誘 盱 能 者 數言者, 則 由之,則 大丈夫 而 側 脅 所 真 聞 媚 淫 退 7 天下 而 乎? 得 者 其 屈 而

> 本末體用之間,庶乎其 去,則若程子所謂居 覺其有遺,吾皆 語,乃削 者,又以廣居爲主也。 去廣 居之云,而尹氏之於此 不能識其何説。必不得已 廣 包舉而 今《資治通鑑》之書此 居 而行大道者,其 無遺 也。 解 亦 於 而 不

不得已而然耳。 舜之民,是君子之所 及於人。 王之道,必得君而事之,然後 父子,外則君臣,人之大倫也。 或問: 君子之必仕 使其君爲堯、舜之君,其 願 欲也。 何也? 有 退而窮處,蓋 況君 以 行其 티 : 民 子學先 爲 内 道 而 則

荷賤 分 也? ,則梓匠 不 曰 或問:孟子之論 廉 0 食志 之人至。 輪輿 得以 而 不 加諸 食 食 功 食 功 爲仁義者上矣。 志 而 則 不審其 食功之 E 士日 大小之 别, 遠, 何 而

知其 非 或 問 富 天下 湯 爲 ·, 何 童 也 子 ? 復 (讐, 而 曰 聖人之心, 四海之内 皆

三九三

之,如 然大 知 其 曲 所 13 折之 謂 暘 表 葛 寒 裹 如 伯 暑 洞 此 仇 之 達 哉 餉 無 者 故 不 陽 非 感 有 貨 孟 而 所 子之言 無 爲 豚 不 事 則 通 亦 則 天 也 類 下 此 孰 然 信

堯、舜 探 辭 其 則 明聖道 本 紛 IE 也 由 爲 之不 人心 也 我 所 本之言 加 而 而 以 斥 蓋 或 必必 邪 此 涉 必 益 問 其 可 以 正 兼 其 説 以 於 、體用 使 不 以 正 也 愛,必 所 得 正 好 孟 不 心 天 理 人 以 以 辯 人 子 不偏 正 心 以 下 者 息 之 一,聖道 而 之嫌 心 乘 使 聖 而 曉 也 邪 爲 間 爲 欲 天 首 已 渞 然 距 息 乎? 先者, 息 下 人之也 之不 矣, 知 故 益 詖 尾 邪 邪 曉 孟 仁 以 相 又何 距 説 而 然 明 義 子 應 不 日 何 詖之本 知 爲 之道 之 距 如 明 也 是 必 邪 日 IE 矣,此 邪 所 詖 此 ? 爲 以 0 詖 人 説 性 在 行 然 此之紛 人 然後 心 之 也 日 既 者 善 則 心 又 放 之 不 0 此 用 其 亦 不 淫 足 排 此 稱 口

於《論 之, 也? 鈞 桀 畏天 以 哉 王 不 之, 徒 黨 氏 論 曰 0 矣 伐 而 免 撥 之害 楊、 也 也 則 亦 口 夫豈 其 命 於 誓 亂 9 紂 不畏哉 豊 知 日 所 語 墨 不 日 其 聖賢 悲 多 世 而 . 得 学 之 甚於楊、 未 不 距 好 言 衆 誓 而 吾 人窮 能 以 曉 源 討 戰 楊、 日 篇 立 其 也 反 党,豈其 好 亦 言 流,考 蜀 也哉? 0 之 矣。 法 衆 辯 墨。 既 距 賊 故 墨 一子畏 曰: 然 正 之 之小 言 日 楊、 不 贵 記 之有 而 克己 而 嚴, 儒者潛 之矣, 諸 此 得 墨者 其 録 謂 謂 子子 L 嫌 孟子之心 其 説 己 之差歟 未 至 復 人 一帝 心 前 人 如 弗 所 而 精者, 勿討 之 於 勿 禮 然 心正 聖 不 何 以 遂 然 順 距 所 如 之 反 人 耳。 輟 敢 雖 ? 天 者 好 説 此 者 道 其 之 得 亦若 吾 不 不言 日 不不 若 言 昔 徒 厥 E 其 已 可 禽 分 M 0 日 罪 湯 獸 此 本 辯 逆 而 哉 程 不 而 武 伐 惟 > 亦 之 子 畏 之 推 何 而 而 佛 爲

差」云者,則皆至論矣。

出 謂 俗之尤,先王之所必誅 性之恩哉? 故,則夫母子兄弟之間,豈可以 設其果以不義得之,而非有悖 世家,則其禄與室,非其兄不義而得之矣。 之何甚與?」其説 者,誠非中行,亦狷者有所不爲也。 情,仲子之避兄離母,豈所 道取於人而成之也。 也,以兄之室,爲不義之室,蓋謂 不義之禄,蓋 於倫理之外若是其甚哉 狷者,則亦言行之間 或問: 司馬 飾小行以妨大倫,是乃欺 謂 公曰: 其不以其 奈何? 君子之責人,當 小過乎中而 而 仲子以 不以 願邪? 曰 : 道 事 聽 逆作亂之大 是 仲子,齊之 兄之禄, 君 者 其 而 己, 若仲子 孟子過 而 也。 遂 不 得之 夫豈 世亂 滅天 探 以 其 所 其

孟子或問卷七

故其 爲未 其日 爲法 直 此心之外也。 民之産云者,則可以王耳,非謂專恃此 能擴充之,以 以王矣。」則仁心者,固王政之本也。今日 有仁心仁聞 心者,初不足恃,而 可以王也。 安耳。 爲 耳 事 或問首章之説。 法也 但 其 民法,與 · 盡 曰 : 而 盡 行 先王之道 曰是心足以 不 天 心 先王之道 孟子告齊宣王 能 理 知 播 行先王之道」,則是 一,合人心,雖 性 所謂先王之道者,又在 恶 曰: 范氏詳且 而 ,固亦由 於衆,及沓字之訓 如如 無私 王者,言有是 其 意 日 篇 是 聖 1 :「是心 末所 而推之以 人復起, 智 明矣,但 立累, 心 所 謂 心 足 謂 而 制 而

> 之不至於苦 之焉,則 心,然或未 非謂心外有法而俟於他事也。 充之,以 自 不難乎閉之矣。 道,使之曉然知善道之所在,則 患,其言不可 不知所以用之之道 邪者,奈何? 之失,譬之蔑棄規 川 有 謂 所不能易者。 敬上者,豈 雖 盡夫法制之善, 有 能 窳 仁 無 得 也 虚 心 私 孟子與 而 幾希矣。 矩,而欲以手制方圓,其器 語 仁聞,而未免於 意 人矣。 君有邪 後之人君 而逆閉之,則動 哉 小智之累,苟 時 而充吾心之固有者 君論 故 曰 : 心,所當 當因 必 所謂 事 後 爲 所 多 之 徇 人 謂 不 吾心 有 閉 類 邪 開 雖 陳 私 循 矯拂 此,其 者,亦 也, 妄作 有是 陳 是 而 善 Z 閉 擴 善

是性 故 均 有是 或問 均 有是 消 章 然惟聖 一之説。 性,故均 人能盡 曰 : 有 是 人之生 倫 其 性 均 也, 有 ,故爲人 是倫 均 有

言 之言 無無 曰 故 間 規 出 規 倫 爲 而 深有會於予 0 對 乎彼,不可 短之盡 則 矩 乎 之 君 「是 無 「碁局 對 與 之云者異 而發,然其 以 此 臣 至 蔽 窮 之言, 不仁,其 盡 也 所 於人欲, 所 矣 而 夫 方 之中 以 以 所 方圓 圓 故 對夫三 奈 以 意 各 由 法 之 矣。 (所言) 何 間 ,知此 不 盡 無 堯、 前 而 極 ? 審 不 路者 其 不 不 子 百 亦可 舜 天下之爲 能 其 道 盡 曰 : 得盡 嘗 則程子之意 六十路者云 以 有毫髮之私 以 其 幾 孰 深 而 與 盡 髮, 此雖 道 也 爲 乎天理之全矣。 味 爲 人 君 焉 對 方 萬 臣 論 與 非 티 : 乎 出 一之道 圓 世 此 此 所 Œ ? 可 乎此 者 之 堯、 介 爾 而 爲 程 謂 猶 莫 法 以 其 問 性 孟 子 乎 舜 其 人 之 推 道 善 子 則 其 用 不 之 猶

所

味

但 小 或 或 問 師 七 大 國 一之旨。 句 似 티 : 失 本 范 意 氏 耳 論 之詳 其末 所

諸

别

孟

上

由

信

焉

論 IE. 當 治 如 天下莫大於仁 此 耳 節甚善 所以 告君者

乎親 倖, 而, 皆有之, 矣,第三説 説 岐 友、悦 子 其道以求之者矣。 可 不可安之居矣; 也 便佞 之言 冥 者 或問 也 或 亦 由 問問 且曠 詭 行 親、誠身,皆以有 其 而自暴自棄,以至於此,是 奈 不 十二章之説。 日 隨 固 助 所 何 可 却 : 其安宅 章 E 長 以 不 以 ·自暴· ? 一之説。 亦 求信 可 開 而 弗之 有未 其 由 求 自 ,則必 舍其 乎友, 之塗 所 若諛 表 以 棄, 如 盡 曰 : 人之塗矣, 誠 也。 吕 者 正路 티 : 矣。 放 最 道言之, 其 程 阳 説 氏 乎 僻 爲 身者,皆 子 曰 : 意 苟 ? 諸 之 安宅 則 邪 的 初説 曲 容 論 説 當 侈 所 日 必 從 以 則 而 可 明 皆 0 IE 行 以 其 蓋 皆 以 求 而 至 哀也 是也 善 善 獲 路 交徑 險 擇 求悦 獲 有 安 宜 深 僥 平 其 誠 平 不 切

其於 識 事 能 亦 者之所從來而 不 語 氏 天 爲 取 機言之, 1,發明 皆 物之理,皆 道 非 實 未 可 其 身 也 誠 所 踐 不 不行道、 ,亦有未安者 思勉之所 知 明其 有 其所 爲,是 以 身,直以 孟 文 所 似 然,使吾心 子 情 未 意 亦 明之善 所 狀 盡 有 乃 有 所厚 非 謂 己 及 爲知 所 所 孟 所 誠 而 一,已於《 其於明善, 則 謂 謂 亦 子 者薄、 身, 未 而 知 恐其 有 曉然真知 善 明 本 過 當。 所 有 是 IE 善 意 高 諸 從 要當 狹 善於 中庸》論 謂 責 之失。 者。 身也。 其 來 心 而 善 直 其 論 吾身而 明 思 善之爲善, 未究於理 若 朋 以 餘 殊 誠 其 言行、 日 爲 友之道 其論 則 之矣 其以 不 身 當 知 知 凡 固 而 然, 已,是 之間 在 天 在 知 誠 多 以 也。 \equiv 我 而 下 我 者 至 而 楊 志 可

明 前 或 所論 問 + 重 四 人 命 章 者尤善。 之 説。 日 楊 . 氏 范 之言, 氏 之 説 學 詳

> 毫 亦 宜 釐 之間 思之而爲之説。 , 尤可 深味 也 尹 氏 分 别 天 理 人 欲 於

父之罪 徐氏 爲罪 引穀 ,亦善引據 或 問 也 一不 梁子 十八八 章之 以 者 日 不 孝 説。 羈 爲罪 貫 曰: 成 . 而 童 楊 不 以 氏 不 得 就 就 之矣。 師 師 傅 傅

論 范 曾子、周公事,先儒所 楊皆深得之,可 或問二十 或 問 十九章之説。 章之 詳 説 味 不及 也 日 日 . : 也 旧 程 程 范 子 子、 氏 至 解 矣, 張 首 所

兩

句,非

本文之意。

家 來 嘗 嘗 王 欲 考於《孟 必 ,又不與之言焉, 則 或問: 以 自 又正 驩 託 爲 於 子》之書,王 言 樂正子從子 介,未 孟 以 子 折之,至 以 嘗與 則所以 取 重。 言 驩 敖 其 行 絶之者深矣。 齊 故 弔 事 何 王之幸 於於 孟 於公行子 也 子 ? 樂 使 正 日 滕 臣 子 . 子 則 蓋

之罪 去齊, 資糧 **曷爲不與之言,而使之改與?** IE 子 恐非 輿 不 而范 其 察乎 馬 事 以 、尹皆以 孟子之意 雖 此 見 不可考,疑 孟 而 子 不 輕 能 而 也。 身 己 改 以從之, 故孟 必若其言,則 於其德,爲樂 驩 以 是積 子 意 孟 以 子 者 憾 之所 餔 特 孟 藉 而 E 啜 去 以 子 子 罪 其

但其於未 尤見聖人 本 不 孟 告而 子 或問二十六章之説。 正意 遂 及告 所 娶以 也。 處 而受堯之命 義 歸 程子之説,又推 理之精。 也 耳 然 日 : ,其後固 以 范 事 明 氏 其 理 之説 度 不容 之, 説,

之也

者,有以實對 而 有 爲言耳 曰:實之爲 或 以 問二十七章之説 實 對 華 日 虚 而 精實,何 而 言者。 何 言 也 者, 也? 此 有 曰: 所 以 謂 實 諸 日 以實對 實 對 説 0 則 是 皆得之 僞 有 虚 以 而 數 對 而

> 言者, 以 葉,有以發見於事業之間 然謂孝弟爲不僞可 於人心之不偽,此 矣,謂理 此 根精實之所在,必先 言,則以爲凡仁義之見於日 發,皆人之所 實對僞 孝弟所以 或問二十八章之説 日 爲 而言者, 義 虚, 爲仁義之實 理 僞 則 也 爲 理豈 孝弟所以 日 孝 可 矣, 莫 7 乎? 弟 乎 非 虚 也 謂 事 此 此 仁 而 也 凡惻隱、羞 爲仁義之實也 義 日 用者,惟 惟 無 説 而後其 然以 理 也 以 物 爲 范、 惟 虚 實 之 得 事 베 之 對 謂 光華 此 孝 爲 事 耳 惡 皆 華 弟 乎 實可 爲 實 之 枝 發 ? 得 本 而

之, 而李氏説亦甚 善。

四〇〇

孟子或問卷八

反」。 湯 孟 楊 曰: 盡 信 與 子 以 孟子之言,必 之意 桀 或問 ,然無他考驗,則亦論 一事言之,固亦舉其大者 《禮記》有「葬於蒼梧」之説 戰 首章之説。 之地 也 티 : 也。 有 此 所 而《 以 曰 : 據,二 (竹書) 爲 而 范 舜 闕之可 書 卒於 氏 ,然恐其未 有「南 博 駁 何 鳴條 而 雜 也 篤 邪 巡 恐 矣, ? 盡 不 則 難

曰 言,通乎巨 文乘 子 子産濟人之事,有仁人之心 以私 或問 輿 恩小利 濟 細 孔 人而 故 子 以 言之,何 不害其 言 子 則 産 之 爲君子之道 私 也? 恩 惠 小 爲 티 : 利 君子之道 焉 其 而 孔子之 已 惠 此 雖 承

其分, 然先 小 是以 也。 恐其所以 之政者, 之末邪? 是 其利澤之及人,如天地之於 鄭 理 其 葛 下 則 前 而結 是 治蜀 武侯嘗言:「治世 政, 國家之大,又安得人人 恩惠之施 ,能使都鄙 猶 王則以 曰: 其 不 而 亦 則 體 也 乃 失乎 其 莫知其 庶 不 子産之事,可 自結於 宫宫 正 徒謹 獨 驩 调 幾 大 不忍人之心,而 以 爲 有章,上下有服 己 虞之愛,顧 府、 乎 能 而 時 於此, 政 不 功之所自。 均 先王之政矣。 以 民者,或反不若子産之深 次舍、橋梁、道路 脩橋 之本。 免 平,其 煦 以 於 濡 而愛人之心不至,吾 謂有不忍人之心矣。 梁 大德,不以 有 姑 其 法 而 而 若 所 息, 耳 己 萬物,莫不各足 精 行 濟之邪? 孟 荷 遺矣。 目之所不及 將 密 不忍人之政 子 田 苟 有 曰 : 而 有 取 所 是 不 詳 封 謂 子産 況 反 悦 心 莫 惠。」 杰 洫 先 爲 於 而 不 治 王 天 Ħ 無 而 廬 相 繕 而

以 拔 之。 之及 則 是耳 不 大 時 未 難 井 日 専 本 國 其 爲子産 虚 偶 杰 . 事 有 譽者 人人,亦 出 ,故其濟 孟 「子産之才之學、於先王之 塞源之意 流 有 ,然其 伍 乃 於此 然暴 故 必 子慮夫後之爲政者,或又悦而效之, 則 獨 身相 將 而 故 有大於乘 於橋 非 有 其 也 有 未 極 不 闕 小惠 小 也。」此説最爲得之。 就 廢 如 梁 知爲 語 或 於 公道 此 又不忍乎冬涉之艱 加 之脩,蓋 非 此 ,以悦於人,人亦悦 其 政 輿 深譏之, 以 急。 深得 何 者 、之濟者矣。 市 邪 私 有 民 則 ? 橋 以警其微 餘 恩 恐 心 梁之 曰 · 違 政 子産之意, 則 力 脩, 若范 無以 聞 正 意 雖 而 理 而 者 其 有 之 而 尤 抗 氏 亦 此 稱 爲 惠 師 所 非 而

説 子 引 鄭 或 於《 問 忽 詩 事 三章之説 傳》論之詳 以《詩 序》 矣。 티 : 而 言 諸 耳 説 皆 其 善 實 未 但 必 楊

> 者 子 所謂 ,尤學者之所 或 問 真 六 義 章 理 之 當 者 説 知 至 也 矣 日 0 其 諸 日 説 守 禮 善 未 爲 而 失 張

皆善,楊 孟 子此章之本 或 問 氏引舜及孔 章之説 旨 也 明 曰 事 0 程 意 子、 則 甚 張 子 之言 然 亦

非

指 皆有之,然斯言必有爲 /邪? 矣。 或 問 抑恐其亦言己之不 九章 所 謂 後 而 患者 發,今不可 善邪 謂 ? 得 知 罪 其 於 是 其 所

然所 也 而 X 於 學者於 謂 或 問問 鄉 本 十章 分者 原之亂德矣。 ,此,宜 乃義 之説。 深察之, 理之至 日: 楊氏 當 有 非 之説 小 荷然 差, 甚 則 而 善 己 流

餘 氏 意 尤 或 也 精 問 + 然 所 章 一之説。 謂 信果 在 曰 其 0 諸 中 説 者 皆 亦 善 外 而

尹

之

四 0

發,而 趙 水 遠 欲之累,故雖其已發 發者爲 子之告吕 則 既 有 所 而 平 未 未發,然豈不 注 欲之累 ,其所以異於 察 有 物 赤子之心,全未有 同 於其 中 發已發之時 或 所 倫 程子以爲已 無 未當矣。 問 日: 耳。 知 明 恐 不 與 間 也, 物 其論之未定 則 赤 照 叔 曰 : 是 則 個 雜 子之心, 章之説。 也 赤子之純 亦有 以 固 乎 亦 酢 夫赤子之心, 衆人之心, ,但赤子之心 程 發。 自 若 純 私 萬 子 日 而 未 明 以 變, 意 所謂 知, 未 發之時 夫赤子之心 也 鑑 前所謂 張 無 人 楊 必中 曰 而 11: 子、 然以 欲 僞 其 0 氏 私 無 聖 水 而 而 程 後 ,未有 吕 之 意 僞 人 節 乎 之湛 言 其 失 已 子 兩 人欲 者 之 ? 氏 説 心皆指 之。 要 未 爾 初 説 然 明 以 如 有 亦 私 固 日 何 説 終終 不動 爲 則 爲 不 私 也 鑑 意 0 何 未 程 可 未 E 與 止 無 人 意 ?

豈 以 失,學者 離 \Box 哉 非 爲 身 以 乎 而 有 也 不 可 乎 爲 0 言之耳,不當限 可 非禮義之禮義。言 别 大 也 深 以 以 IE 何 程子 謂 此 發 一,不得 乎赤子 或問: 人 者 默 强 티 : 己 也 但 已 而 探 者 識 而 不 用 ? 以 一發乎 其 未 而 然則 物正之類,聖人亦豈有 미 心 於身,則 力於皮膚之外,而責效於旦 何 爲 耳, 離 離 君 力 日 不 通 也? 平 發 有 子 此 取 0 程子 察。 非 遠 而 深 大 而 學 哉 也 以 以 近之間 自 本 未 造之 ? 是 口 ,必其深造之以 且大人云者,亦 是 亦言聖人之心 日 行不必信果,格 未化之説 1然得 則 遠 耳 理 爲 是 不 乎 焉 以 程 化 煮 則 耳 之也。 可 中 子 而 道 與 因 未 必 已矣。 則 蓋 未化之别 程 也 是理 蓋 欲 離 口 亦 子 發 其 以 蓋 乎此 一,若以 通 之言 道, 對 乎 如 而 自 君 然 之 加 造 言 赤 此 楊 日 心 一夕之 於 然後 得 得 道 V 也 之, 則 不 則 氏 别 此 子 而 於 之 之

自 日 使 以 册」之類 排 得 厚 謂 其 於言 間 必 妙 審之也 者。 然 皆 自 開 布 務 而 9 篤 居之安 未得 我 置 不 然 其 自 意之表。 也。 則 誠 者 其 其 得 以 者,吾 方 得 起 雖 燭 之, 其 則 所 之, 之。 。 皆 所 而 日 居 有 理 道 謂 其 又 以 不 0 則資之深 則 所 將 皆 非 著 潛 是皆一 者 種 躐 必 自 日 造之之道 古 居 聞 有 得 種 自 心 其 放 夫 也 得 無 從 而 淺 不 便 得 積 以 等 不 自 多 開 之, 可 事 不 近 可禦者矣。 適 居 慮 足 得 致 居之 安。 便 則 於 何 亦 事 則 之, 以 之驗 其 自 優游 須 虚 非惡 ,莫 雖 而 也 致 居 眷 惟 地 力 無 如 放 不 君 夫 之 非 戀 涵 期 而 之 自得之, 開 其 人 子 而 得 默 安 日 義 養 不 中 而 於 • 有 之 若 拘 欲 而 識 理, 急 必 不去也。 室 學 不 所 栽 程 未 不 何 而 心 ጢ 其 得 得 廬 則 出 故 者 靠 有 培 子 也 以 通 妄 功 其 之 放 書 之 意 理 於 ? 有 安 自 深 所 而 0 得 泝 諸

之,荷 之在 吾 如 也 逢 人 籍 所 可 M 求 之也 或沿 其 9 其 蓄 既 已 不 以 居 論 身之右 惟資之深者,不 取 積 我 爲 原 見 其 則 資之淺者, 諸 者,吾 之 用 其 源 無 無 何 其身之左 矣。 多 者 日 盡 之 不 所 也 . 金金 也 值 盛 淺 而 ? 皆 籍 諸 張 其 復值 得 迫 以 珠 則 説 子 取 曰 日 來 穀 爲 籍 加 滔 如 0 0 以 之 待 處 而 用 其 帛, 易 以 滔 何 資 無 爲 艱 遠 值 9 窮 所 爲 ? 此 汩 之 所 教 遠 無 求 居 其 資 用 君 汩 資 深 人之事 求 惟 而 日 所資之本 而 之本。 不舍 子 而 而 者 不 0 所 居 未 則 或 無 所以欲其 獲, 程 之 安 取 值 固 取 窮。 *, 書 安 子之説 無 以 之 見 或 無 則 夜 不 水 又 不 本 左 其 如 則 其 得 取 右 自 或 礕 值 出 富 理 所

^{)「}便須」,原作「便雖」,據翻弘治本改,四庫本作「雖

爲 字 口 概 論 言 耳 本, 則 之 其 亦 字 善 不 則 而 足以 此 然 從 説 不 事 盡 於 恐 親 於 夫 理 非 切 程 所 亦 孟 若 子 以 其 子 造 可 之 本 之 之之道 通 又 説 本 專 焉 旨 然 以 以 也 則 求 要 全 庶 一當 於 范 章 幾 心 氏 以 大 是 其 爲 大 意

於《論 者 詳 約 示 所 以 則 曰 學 存 明 未 此 説 則 則 程 者 主 夫 然 者 亦 或 與 欲 語 子 問 至 耳 F 用 然 孟 其 以 知 章 已 + 約 力之序 後 子 要之 自 道 言之矣 之道 張 之餘 五 之言 博 得 子 深 章 學 説 之 所 造 意 之 相違 詳 之 是 深 此 意 謂 故故 蓋 説 説 也, 先 謂 則 也 欲 則 記 而 而 其 學 但 守 曰 其 正 者 反 日 不 善 者 所 0 至 以 曰 屬 乎 . 免 所 先 引 約 知 將 但 諸 之。 此 於 謂 求 要 顔子之事 以 説 語 日 耳 然後博 約 放 而 先 反 蓋 如 病 者 心, 言 其 説 博 守 何 也 指 學 學 吾 至 有 約 必

守, 若 約 之, 則 也。 所 爲 嘗 之 者 孟 甚 處 日 心 出 博者 不 之所 誠 程 理 不 在 然後 之博學 者 不 而 揚 子 此其 於約之外 而 能 極 故 蓋 得 但 若 交 乎 以 所 則 所 無 自 必 能 有 失 以 大 謂 貫 四 得 以 疑 意 語 者 會于 揚 由 貫 用 意 之 旁之 名 中 意 極 亦 先 所 雄 四 此 通 極 庸 夫 蓋 善 也 盡 耳 旁 求 約 以 言 而 心 以 親 理 所 所 \forall 善 矣, 放 下, 而 之 以 所 爲 切 謝 之 是 謂 至 識 心 蓋 之爲 發 至 謂 約一, 而 然 則支 氏 以 散 博 然 中 所 則 其 次 約 然 四 誠 四 殊 既 語 央, 謂 約 離 不 博 序 後 密 亦 旁 旁 古 於 博 博 亦 約 足 也 自 也 不 日 矣。 如 中 中 理 學 其 由 有 且 以 由 差 能 則 大 央, 央之 之 之, 博 孟 詳 未 舉 吕 楊 范 博 識 其 矣 推 實 盡 且 子 終 氏 先 是 氏 氏 中 尋 又 以 之言 詳 然 以 有 其 求 央 詳 散 使 分 初 成 向 古 之 蓋 别 非 約 所 日 E 約 未 說 殊 説 兩

之乎? 之爲約 乃 也 處 ,則又守此 未 嘗有 其 博 而 千萬之一焉 以是推之,則楊氏之意得矣。 中 所遺 茫然泛然,雜 之 也。 物, 物 方 而 由 是 揚子 於 其 亦 取 所謂 博 何 之言, 乎其外 也 足 博者之中 9 以 古 爲 則 不 約 及其 知 所 謂 此 而 ·, 僅 守 約 物 約

大之不 霸; 氏之失,亦猶范氏之云耳 事 養 范 ,然專 民者,以 意 氏 此 引德 或問 也 則 同 以 皆 力服 十六章之説。 蓋 此言 不 張 以 彼 當 子 德 皆 人之異以 則 引 之言觀之,是亦養 而 言 彼 亦 服 服 以釋 不盡本文之意矣。 人 養 明之,則 曰:張子得之矣。 此 人,又 而 也。 以 有 德 其 亦 人之一 引 力 公 非 分 政 私 此 在 王 尹 小 章

實字 無實 或 問 不祥云者,虚 十七章之説 上 句。 如 范 引 氏 以 日 之説 甚之之詞 如 張 則 子 之 也 無 意 前

> 句, 不 所 夫 有 此 祥自 由 不 亦通 得 矣,姑存 章 僅 爲 而 暢。 通 \equiv 義 矣。 句 蓋此 mi 耳 ,而下句實字 闕 然張 之可 或有 而 首 子 所爲 也 尾 ,所釋 衡 與 而 決 言 上句 言 遽 無實 如 而 此 不 無 不 相 以 祥 於 考 理

参焉 仲 言 也。 譽 所 之意,正 宿 於至善,爲 實爲本, 之義 至矣 行 尼歎水之旨, 終不 尹氏 或問 通 可 或 非 問 也。 達 旧 以 名 能 自 十八章之説。 本原 或人之問,有 誠 譽 有 無 本 久 曰 : 九 心 爲 本 耳 所 前 章 之義 吾於《論語》亦嘗言之,取 非 實行爲 末一, 原 諸 往者 不 之説 似 説 至 以 也 亦 如 語 涉 情 本,而 何? 非 其 未 □ : < 倒 日 雖 范 實 孟 盡 無 置。 約 氏 對 子之意。 者。 是 言其 日 程 謂 而 集 名譽爲 者 子、 意 蓋 註 君子 張子以 程 則 有是者 止 雖 張 子 周 備 者 以 孟 子 本 有 矣 子 情 1

耳 或記 張 天 如 爲 二夫子言之, 聖人言之, 則 也 能 其 事 何 有先 有 子 盡 禀 理 也 告之, 之説 者 ? 序 領 賦 日 謂 後也。 方 其 有 曰 猶 티 : 不 明 何 意 且 異 然不 必正 則 格 旁用之説 物 自 是亦 如 與 於物,而 亦以 生 物 察 ? 主 曰: 言 用 知 致 其説 倫 舉其 若 前 其始終 人 曰 : 安行 張子 知 之所 尹 而 得是 如 而 專 是三言者,以學言之 氏 雖聞夫子之言,而 後能 不可 ,所引别 欲旁用 何 後 事 條理言之,非 之説 以 ? 意 天理之全也 革 異 由 誠 以先 日 於 則尤 非 生 心 0 禽獸 義 謂 分類之説 正 是 後言 程 約 專 也 極 者 真以 此 言 而 矣。 子、 豈 以 自 杰 不 之

定論 説 「,但其 望 道 或 也 問二十章 文義之間 張子 曰 説立 以「而」爲「 ·之説 不 賢 沙泄 能 無 邇 티 : 如」亦 可 忘 疑者 遠 諸 説 有 恐 大 據 未 如 意 平 可 程 爲 皆 ? 子

類 爲 者 聖人 豈 夫 夫 已 無 如 乃 所 日 日 日 而 曰 與之爲 子 傷者 所以 以 0 厲 0 博 所 凍 如 Œ 不 而 是 而 言 世 自 餒 施 以 與 可 以 則然矣,然其 者矣, 深明聖人之心 鄭 濟衆 也。 如 爲 而 謂 聖人之心 殫 如 雨 例 其 靡 聖哉 箋 其 未 舉,故陸 偕 德 而 ^ 異」, 日 字 心侈 能 也。」 春 堯、 亦 而 觀之乎? 爲 其 何害其 視之猶若 聖人, 秋》:「 蓋 然, 舜 則 此 也 而 古今爲 涌 心 氏《釋文序》論音讀 猶 其 日 以 亦 每 用 亦 也。 以 而 奈 「求道之切者」,恐 混 望之如 星 以聖人 如 如 之。 若 爲 夫文王之民,固 何 讀 心 有 隕 也 爲 説 此 且子胡 病 不 ? 而 傷 如 而 而 詩 自 互. 迁 自 未見哉 ,則其於道 此 而 雨 也 日 已 足 用之久矣。 口 君子 居 亦 曰 不以 矣。 如 贅 焉 爲 以 他 左 此 附 之道 是 之訛 視 垂 如 如 則 氏 而 帶 此 説 非 亦 果 雖 民 失

因

凡

何

然也 知 及,此武 偏 於 武 發 其 心 求之,則 以 其 其 倚 ,窺度聖人者之言也。 、王之不泄 、文字之本意 物哉? 不 於一身爾。 明, 而仁之至也。),信乎 人者, 形 視聖人之心 知 雖 可 由 於 心 王之不 以天下之大,萬物之多 庶 忽 不 而 心術之間 窺 蓋其學 察乎 以 乎 哉 所 測 邇 其大公至正 其 以 是以 聖人 曰 而 泄 不忘 此 撫 無 . 今 爲 讀 本 於聖人之心,又不 者, 邇,不 此 而 摩 其 所 日 者 何 出 而 遠 E, 以 疑 而 迫 於 細 如 莫 於 非 不 世俗計 也 抑 於勢 志 考 人之疴 聖人之心 權 非 然則 自 而 搔 遠 乎 周 謀 計 指 知 而 之 曰 : 此 所 也 流 較 機變之巧,故 較 文字 其 所 者 非仁,則 癢 貫 利 謂 或 以 而 利 非 勢 而 疾痛 徹 所 害之私, 爲 無 視之 者 害 不 虚 音 能 也 者 德之 有 無 以 之 得 有 心 讀 有 爲 世 不 無 異 私 謂 之 不 無 所 不 以 所

有

異

此 哉 與之俱化 習之久, 之學者, 者 適 吾 與 爲 始 而 鄙 此 則 而 益 以其文字之美而 意 論 不 嗜 ·自覺其 合 久矣,近讀 其 1,是固 腴 則 心 德 術 雖 《 陳 人之言也夫。 端 之 魯公集》有 移 悦之,及 人 矣 良 士, 可可 其 不 亦 且 戒 誦

《詩 言 如 得 如 失, ? 尤 ? **>** 約 或問 止 然恐 <u></u>: 日 而 於 . 0 盡 泛 陳 謂《雅》亡者 詩》之本 也。 而 靈 詩 取 而 È 之, 後 義 而 孔 則皆善矣, 不可 後《 或近之也。 子作《春 春 知 矣, 秋》作, 然尹氏 秋》 無 諸 以 者 有 説 考 以 何 其 何

之訓 矣。 安 未 其 用 通 前 二字 耳。 張子之文,又有自 但 或問 一後説 語 若程子之説 正 私 勢 孔 如 淑 似 子 此 之説。 亦 之傳無 倒 亦 置 謂 故 則 謂 曰 私 窮 於上文之意, 0 私 善 ,於文章爲小 竊 張 淑 其 以 子 祖 (身於其 張子之説 考 前 遺 説 訓 得 恐 祖 戾 者 或 老

不若前説之善也。

味,而 於此 與 之意 如 知 彼 惠 爲 與之爲惠,不與之爲 死 邪 類 何 不 者 爲 怯 也已甚,其説之流將有咎 勇,過 也。 必必 也。 ? 及之意 故孟 耐 傷 或問 爲 楊 其 侵奪 惠 傷 日 欲以是爲説 失爲 若伯 尹之説 子 今之過 不死 蓋 勇,何 於此 取者貪之屬,不取者廉之屬 本之上 舉 耳。 於彼 是 易 子 傷 其 而 見, 所 爲傷 哉 亦 廉 取者爲 日 者 理 反 謂 善 ? 文既 以 則 而 也 嗇,死 病乎此者 義 則 然則 勇矣,而 例二 至 病 9 日: 但 傷 無 過 傷 不 矣 乎 楊 之爲 勇 對 程 同 () 然非 者,是亦 此 與 於 過取、 IE 説 亦 推 子傷 者, 者 之 廉 反 直 也。 畏 爲 傷 勇,不 Ż 以 則 則 之下 其 而 害 此 過 惠之説 惠 傷 孔 與 蓋 宜 失 排 精 其 章 死 廉 爲 爲 奪 過 以 死 子 所當 文又 本文 死 之 約 之 乎 猶 调 難 死 過 傷 不 傷 節 有

> 詳之。 就死 之病 過 生忍耻,終無以 於《論語》子華 與之傷惠,推之太甚 猶 均 或有 之二 以 者 使齊之事, 有益於斯 争 皆 救 爲 於 亦 不 萬 得 世 恐 既言之矣,學者 一,則不 其 之間 不 中 能 若 無弊。 也。 則 捐 與 若 其 軀 夫 貪 子 以

異 方 何 矣。 也? 善 或 讀 問 日 者 0 二十四四 融 前 會 論 而 一章 讀 貫 書 程子之説, 通 之 焉 法, 則 後 亦 前 論 不 後 見 處 不 其 事 同 有 之

言,所 發, 用 理 智 而 卒又歸 而 而 而 而 或問 發, 不 是理又皆有 以 非 可用,其下 發 今以 智 章 <u>一</u>十 明 之 首之意。 章 天 謂 六章 下 首之言 也 迹 遂言惡夫鑿智之説 事 ? 而 Ż 物, 使其 可 **□**: 説 推 尋 莫 之, 專 以以 不 不 程 爲 然。 恐 子 各 見智之不 性 有 其 以 發 章首 自 或 爲 爲 皆 然 則 爲 必 之 性 其 之

之運 之,但 於佛、老之意 見 其 滅命云者, 之言,有不 邪? 云,則荷求 廣 言以推之,則其於造 也。 亦 言之詳 天 意 矣。 主於此章之文義,然既 口 行,是乃 亦 蘇 日: 通 則有 叔 果有以發乎此 或 若 曰 : 氏 略,豈 ,然非文義之所係 子 但 程子之答張子,旁引 此 以 其故之説,又若何 可 事 乃與 以 他 以 矣。 故 前 所 曉 以 一當若 利 説 爲 爲 者。 爲 運行 爲 又以 孟 如 日 而 性 天之性, 是其 本之云恐未安。 何 子之意 之 又 之 其引列禦寇之言,以 道 故故 章之意 ? 就 所 以 所 而 倒 其 爲 躔 人 有 曰: 入德也, 通乎此, 則 置哉 前 得 正 性 事 使天 邪 如 説 其 而 亦 以 至 相 而 ? 此 可通 (大旨則 何 兼 反,且 度 静 失 也 文以 殊 用 而 而 之,蓋 故 日 其 日 而 不 而 也 切 後 . 存 : 日 性 若 塊 知 不 邪 楊 皆 爲 而 即 是 之 日 口 然 天 原 是 故 ? 氏 得 其 固 説 意 可 是 至

然

辭

則

則

孟

子

而

之遠者 無事 於運行 1,聊復 則 論 以 亦 解 何 學 以 者之惑 爲 天也 ? 此 又失

然愚嘗聞之師 焉 辯之如 己 曰 子 也。」學者於此,宜致 孔子受之不 聞 微 朝 或 此 見 廷 右 問 所 不 此 丰 師 <u>一</u>十 歷位了 之言 其 以 角 力, 辭,右 鋒 日 矣 七 . 芒 而 章 聖賢 而 相 發 然 陳 之 師 與言 日 露 猶 察馬 説。 司 以 地 禮 前 未 敗 位 孟 不 也 也 譏 子 日 不 固 爲簡 0 踰 足 孔 及 而 不 此 階 矣 子 孔 又 同 無 而 爲 心 子 也 無 異 有 相 之 盡 而 揖 論 其 使 孟

人者 天下, 盡 也 或 因其 何 問 惟 也 舜 常 ? 古之聖人多矣,必 極 而 其 曰 : 處 變 之不 法者,人 而 不失其常, 失,未足以 倫 言 而 是 舜 己。 見 以 爲 X 道之 他 法 道 聖 於

0 所 正 德 本、 正保本作 以。

之盡 未至? 若 法耳 發其 性天 耳。 説 正 之功 其淺深之序,信如楊氏之説 學者之事 護 謂 顔 之妙,人所 然其 此 藴 於 子 嚴 而 而 也。 ,使天下後世 程子所謂「觀乎聖 此 不 遽欲自以 陷於苟且 精 所謂 也,不校不 校 切 尤 티 : 信 可 法 正學者所當 難 乎? 楊 以 者 不校爲 頹 明 見 氏 惰之域 無 亦 見可以 ,而舜之所行,有 焉 以 豊 日 不 爲孟 0 一舜之自 高 人 見 故 校,成 自 用 ,則見天地」者 聞 也 特 矣。 則 子三自反,不 反 力 舉 故舉舜 恐其 所 德之 爲 處,若反之 舜 然自反之 哉? 以 而 無脩 事 自 以 爲 以 也 脩, 盡 言 見 但

> 見矣。 章之義得之矣, 詳考《大學》之序,以及此 誠,則舉天下之物在 或 問 十 二 但 章 其論格物, 之説 我 書 此 日 反身之説 則 . 而 未安。 楊 曰「反 氏 所 身 論 學 則 者 本 而 口

張 子 所 或 謂 問 二十九章 觀 人 臨 時 之説 志 如何者,尤有 曰: 程 子 以 至 曲 盡

夫聖

賢

之

心

也

楊

氏

答

T

翁

書

甚

善

其

論

尹

氏

辭

約

理

明,而其後說尤善也

正

心

誠

意

者

尤

切

但

非《

孟

子

*本

文之意。

孟子或問卷九

所 非 盡 考,姑從楊氏之説 舜 性 與孟子之意 之云 或問首章之説。 尤精。 但 張 以 可 舜 子 티 : 也 五. 所 諸 + 謂 説皆善,而 而 怨 無 其 父母 不 我 亦亦 尹 氏 無 恐

乎 之爲詳 足深 易草草領略 至」者,尤爲精切,學者所宜 ,程子之言至矣。 篇 論 矣。 象雖 或問二章之説。 使殺之,堯必 也。 ,然學者 游氏之意,亦爲 愚, 林氏 也。 亦豈 日 談己 止 不 其所疑 利 欲 司馬 其 其 宜 識 曰 : 子 亦有所不敢矣。 〇日「人 公以爲是時 得舜之心 與兄之爲天下, 萬章之言 不告而 曲 反復 情天 盡。 堯將以 耳, 娶,已 則林 而 理 象 蘇 一,於是 深 而欲 欲 氏以 此 思,未 天下 殺 見 亦 氏 殺 爲 於 不 爲 論 舜 舜 之 禪

若因 難矣。 之側微 事 别 兄 恶。 於此 所在 則 IE 曰 其不然, 傳聞之事 而殺之,未嘗可得」,即此焚廪揜井之事 聞之誤 以 蓋天下之事 此皆疑 弟 則 權 . 也。 庶乎其備 張子 則亦未爲甚頑且傲 ,尤爲 彼 天性 日「行其所無 不格姦者,但能使之不陷於刑戮,若《家語》所 權與 與正 丽 而不暇 舜 以 孟子之誤。 有非 孟子 能 於過 處,今以 不告 及 使瞽、 有不可以常情測度者, IE 一」者,語 不 實者 矣。 有 此 辨者哉? 類 不暇 化 象之不格姦矣, 豈至此 而 則 而 必 惟程子以爲此非孟子之言,乃萬章傳 之語 其 娶, 辨 他事 可 事」,亦然。 辨 無 其 ,而舜之所處,亦未足爲天下之至 耳。 日 耳。 而 亦 輕 權 日 曰 : 明之,以曉天下後 傷快。 雜 瞽叟不 己 重之 是 也。 數説 其 之,反爲失其 與 失 張 使瞽 人爲 曰「道 其 别, 子 然既 者 若曰 也。 蓋此 文義, 見 諸 象而猶知利害之 恐其皆 而猶欲害之哉 善 白 如 且聖賢於 是當 説 無 一告 事 官牛 此 世 權 至 ·要切 如 未 而言 而娶 指 豈 爲之 施 何 正 謂 安 有 世 之 在 隱 > 俗 知

之有 弟之 何? 其 心 雖 殺 惟 也 使 愛,發 己,而 恐 不 티 : 見, 不 日 獲於象,而 曰 舜之所以 幸其寬己 於自然,不以 亦 楊 在 恐 氏 吾 無 謂 術 全然不知之 舜 然者,不爲],亦非 内 後同其憂喜焉 惟 者 殺己 恐 所 似 不 以 而 非 獲 理」, 是 語 有變耳。 所 於 聖人 也 以 象者, 則是 "但↓ 其 語 矣。 日 其 舜 若 如 之 備 畏 兄

善矣。 密,告君之道 或 范氏 問 兀 章之説。 此 所 數章 當 然 於文義 也 日 程 極 子 疎, 説 《詩》之 而大義 則 解

有 從 而 而 天下 避之,有 天 以 違 禹之爲 天下 下不從,然後不敢爲,匹夫猶且耻之,而 致之 或問 加 也。 之心 廢其君之子邪? 相, 如 舜 天下歸之,而朱、均 攝行 至益不度天 邪 禹 避位之説 天子之事久矣, 是皆 事 命 抑將奉其 之至 或者疑之,以 而受位矣, 不順 逆, 至此 (君之子 而 避 則 而 由 將 爲 復 之 澼

之宜 聞 吾釋 告歸 事 也 謂 統 冢 嗚呼 謀 者。 蓋 習,妄意以 幸舜、禹 論者之學不 丕 馬馬 率、 之 也。 益 而 累 以曹操不肯釋兵 則宜其以爲不當 若益 也。 耳。 之時 師 爲 表 也,益 總百官 之哉 及夫三年之喪畢 日 陳 未 學者能反是心以求之,則聖人之心, 之得 舜、禹 然其 也。 則 讓 嘗 爲聖賢之心 ? 足 也,於其君之老也,奉 聖 求 之心,以 攝 之, 以行方喪之禮 避 於是 以 人未嘗 是 其 蓋 去 及此, 而 其 而以 位 歸 迫 也 去 得仁, 説 也; 爲 去 於天 國之心 ,其心固惟恐 而 有取 , 亦若 也 益 舜、禹 位 避之,亦禮之常 而 於其 之不 則當還 又何耻之有 而 狃 命 奈 天下之心 而 避 ,而爲舜、禹、益 己之心 於 人 何 、君之終 得 益 朱、 ? 利 心 政 爲 謀 害權 命 而 天下之不 日 均 嗣 可 而 以行 不 也 則 也 君 已 耻 謀 愚 獲 宜 以 而 也 F 其 事 其 之 其 而

安知其 可以證 之,其 實,邵子之書,乃從《史記》而 能 論 或以 年。 襄、哀之年,見於《竹書》明甚、《史記》蓋失其 未足據也。 庶乎 必其 而 其可 闕 邵 商 不誤矣。 能 可信 書》固 之可 ,知其不然,而又無所繫於大義,則 子《皇極 見矣。 不誤邪 且事之有理者可以驗,其有迹 也。 有 而 曰:《書》序之文,本非 成 》之書考之亦然,彼蓋以數 隨 數之茫 曰 : 湯既没,太甲 人 程子 以 信之邪? 昧 所論 吾 不取《竹書》,又 所 外丙、仲壬之 元年之云矣。 未學,又安 且 魏 IE 惠 亦 者 推

此 意 矣。 所 相 謂 特後段所引達可 反 或 蓋 天民 問 氏 ,豈其記 以 七章之説。 回 7,但言 Ŧi 天 就 生 録之誤。 桀 此 天所生之民耳 爲 民之中 티 : 行於天下 無傷於先覺 若如前 程子 -, 特 覺字之説 ,自與前段 爲 段之説 先覺 其 ,蓋以《論 曰 者 天 民 則 文 至 而

道,固 者之説 千 其道 之説 舜其 且 考於其實,遂 樂,亦豈其專在 就 語》先 云:「江上一犂春雨。」傳者悦其 舜之道,然堯、舜之所以 者之事則正 大業之全體,但非 亦過之。 駠 既 如 桀爲孔子所 其言, 日 則 民 矣,一介不 三親 覺之説論之, 何 非 , 昔有以此問某人, 如 善 而 也? 夫田 義,又曰 見之久矣,又何 後爲親 則 也 矣。 0 取 伊 不 夫 妄取 日 以 於 曰 尹 爲,此 野 楊 非道 爲説 見之邪? 之耕於 此 老 氏 非 道 端所能 子 道 而 之 樂堯、舜 義 此章之旨 既 義 而 亦未 則 E 何是堯、舜之道者,某人答 Z 爲 所 張 哉 必 新奇 其大者 野,其於堯、舜之 者 堯、 日 物,非 大之,其 盡 可 2堯、舜 其 用 知,而 一之道 高 舜 介,又曰 兼 論 此 也。 者 古 亦可 妙。 舉 其 其君 伊 蓋 之説 莫 亦誤矣。 體 尹之所 介千 其 義 生 所 又 而 知矣。 非 天下 、盛德 用 則 於 以 不 論 似似 . 飘 · 深 非 禪 Ŧi. 學 而

言, 氣質不 德之全耳,夫豈贅於言哉 而遺大,故 同, 介千 器識 必 兼 駟,極其多少而言也 有異、 舉 而 極言之,然後足以見其 或務大而忽小 或 蓋 拘 人之 小

乃所以 何? 知 置者 乎巖牆之下也。 聖人之知命也未嘗審, 其事之如此 乃其自取, 疎 曰: 命 ,而尹氏爲君言之, 諸説 或問: 티 : ,然於人事不得不盡」, 或問九章之說。 曰: 求 順夫天命而謹守之,此 合乎義 其 如 人事即天命也,人事 而天命不立矣。 八章之説,程子所謂 論 何? 則 無 是乃一 若曰 也。 義 日 無 0 天 已知命之若彼,而 亦可 放下者,順受乎 曰 : 命 義命之際,吕 而其行事或出於苟 人義 者,如 謂 范氏詳 命判 故 此說非是者,奈 得其 知命所以不 不盡 何 盡 聖 然二物, (要矣。 人事 且明矣,其 ? 則禍 密 人非 日 命 者 而 姑 0 是 也 然 立 不 處 盡 患 且 楊

> 聖賢 也。 得富貴,此意甚 論百里奚隱於市井, 氏》之言,則勝 言,亦甚善。 未 尹氏之説,則切中時俗之弊矣。 遇 不 其辨《史記》之失尤佳 耻 秦穆姬者,乃井百 鄙 正,宜深味之。 賤 之事 本無干穆公之意, 而惡 所引莊 不 非 由 ,然按《左 其 百 子 又言 道 里 之 以

孟子或問卷十

故以 文而 期言之,則三子不若顏子之大,以學之序而 論之,則三子皆失其 則 行以 而 金 然,無一毫人欲之私者,雖謂之聖,然於孔子 何 玉 玉 有 也 而 所至 約以 不得 造 有 備 ? 或問:三子之偏如此,而孟子以聖名之, 顔子 而 未 極,卒至乎不思不勉之地,而 曰:三子之聖,因 禮 論之,則 巧力全者,孔子也。若顏子之博於 振 而班者矣。 循序 巧 ,竭其才而不能及,則金聲已備 以進 足以 顔 所當先,故行愈力 ,則其所至未可量 子不若三子之成 中 盖 以 而 其 孟 力有 子之言差之,則 氣質之偏,而力 未充者 表裏洞 而 也 以 與? 見 愈 所

> 事,則又未必然也。 大而化、 何? 乎早 否, 豈於分畫之間, 有所未達 考之詳而論之備矣。 中道之妙,似亦有未安者。 之流,而楊氏既不之正,又自以智爲聖人從容 之,但間引知之於賢者,爲失其 則 伊 尹之學,又密 死,而不及見其成耳。然就三子而論之, 日 之,則 程子、張子至矣。 雖智而忘其智」者,亦涉 於 尹氏專守師説,而 若謂伯夷亦將爲伐桀之 夷、惠矣。 其攻王氏之失,則 而 楊氏 然與 文義。 티 : 説 亦 諸 此 老、莊 又曰 多 説 得 如

日 正 《周禮》不同,何也? 盡信者,是以諸儒之説紛然,而 孟 子時 也 《周 而《王制》亦有天子縣内諸侯之數 或問: 孟子所論班 已無 日: 禮 》所謂: 明 畿 驗,而《周 内 公邑、家邑、小 受地 曰:是不可考矣,蓋 之制 禮》後出 爵 封 或 其 都 卒不 之制, 了,又有 、大都 有 稽 能 但 皆 者 乎 得 不 其 自 與 口

張

子

而

闕

其

疑

以

俟

知

者

口

巾

以 列國之君 殆 而 然大都 曰 周禮之末失 食之,亦 爲 制》以 以《周 弟,及公卿 差 與《 降 則方百 周 ,則千里之 爲天子縣内 禮》考之,其 無嫌於不容矣。 禮 非 與 》復 里,而小都 必 以 盡 不 下 総 ,其官 如 同 諸 耳。 有所不 制 之 侯 亦 也 不 禄 亦 與《孟 曰: 其據 少 也 五 容,疑 也 則 此 十里 陳 土 皆 國 説 子》不 氏 土也。 以 如 亦 受 以 傳 視 繼世 何 地 爲 世, 同 但 此 王 ? 如

註。 傷巧 亦 驕 亦 而 之家者,其亦字亦未通 人 必 有 不 八,而屈 與獻 不然矣。 范氏之論 或問 百乘之家,則且又將并其 ,與《孟子》他文不類。 孟 子爲友也,是豈賢者之心 於無 獻 子有 至於張子之説則善矣,然 ,則是五人者,爲欲挾其賢 資 ,故不得已而 友 Ŧi. 蓋 人之説 不可考矣。 而 所 富 友 謂 貴 亦有獻 獻 曰 哉? 而 子 挾 姑從 詞 9 如 其 若 以 舊 子 亦

> 乎? 者,乃 烈至 意云 可 今爲烈」,趙氏 所 力,不若從李氏 二字,與上下文亦不相似,或者二説,亦覺費 字,自與上下文不 至 有 闕 受,則三代受人之天下 未明,是以 可 之説 今也。 或問 爾。 疑者, 而 爲 烈如《詩序》所謂厲 不爲之説 暴 或 烈不 不 又以 是三説者,擇 殷受夏 備 獨 有成説 論 闕 此 爲烈, 義如 乎? 相 而 之之愈 也 闕之耳 屬 如如 周受 矣。 此, 如如 光也,三代相受,而 曰 : 獵較、 王之烈者 也。 如 殷 趙氏之説 而 或者又謂 熟讀 而從之可 何 所 不 然此 簿 而 辭 本文此 不 IE 可 9 辭 則解 之屬 章之文, 暴烈 若義 受 今 也 巾 禦 其 + 於 饋 在 受 光 四 何

周 禮》爲説 或問 或 問 卒章楊氏之説。 六章之説。 其 、義尤 精 也 日 0 是其 説 則 當

日

范

氏

詳

矣,

楊

氏

引

脅其君也,其亦不然矣。 伊尹之志則篡」乎? 禍者,則孟子豈不嘗曰「有伊尹之志則可,無 伊尹、霍光,固以異姓之卿而行之矣,況有骨 其計慮亦豈苟然者哉! 便也 肉之親者乎? 固有所不及爲,若微子之去,亦或其勢之不 其理當如是耳。若三仁之事 矣,而有所未備 : 如此,是初無此理,而 然觀其引身而去,以全先王之世,則 然世或疑此言有以起篡奪之 也。 蓋孟子所謂易位者,言 曰: 尹氏後説如何? 若其力之可爲,則 孟 子虚説此言 ,則比干、箕子 以

孟子或問卷十

之道, 道 所有 皆性之所 揚子之説,其大指固略同 之,然後可以破告子、荀卿之説 性之本原,莫非 列則 、告子之説。 亦性也 ,而不言其爲性之有 或問二章之説。 或問首章之説。 其爲性之有明 而成於脩 無,而生於習, 飲飲 食男女,皆性 其以揚雄爲見 ,此亦有小異 至善,是 矣。 曰: 日: 揚子 矣。 也。 也 程子以爲湍 學者必 張子言禮 也 然告子以善惡 然既 以善惡皆 未流 也。 而 則 日 以 張子 爲 反近 而 習 爲安佚 此 安 未見本 水,即 意 佚 性之 以爲 於揚 而 之 推 爲

原

7,又有

:取於其脩之之説,亦

有

不

口

解

知仁之説,予於《論語》已辯之矣。 其 謝 E 氏 以性之爲 水之激躍 不善者 者,非水之性,則善 爲 非性 之至 也 亦 非 觀 调

是也。 之謂 既詳言之矣。告子不知理之爲性 但能 身,而指其能 云爾。 爲未 之偏於惡 故有杞柳之譬。 意 以 而 字 明矣。 是考之,凡告子之論性,其 終不悟其非 而 性」之一言,何 或問:子以 索言之。 喻 知覺運動,而 始而 己之意 而 也 但前此未有深究其弊者,往往隨 公都子之所引,又湍水之餘 見其但能 ,則又繼 知覺運動者以當之,所謂 也,則又於此章極其立論之本 也 至於孟 告子論性數章,皆本乎「生 既 非 也? 屈 其以食色爲言 有善惡之分。 而 於孟 知覺運動,非 子折之,則其説 爲湍水之喻,以 曰:性之爲説 子之言,而 不外乎生之一 方乃即 ,蓋猶生之 又以 教 病其説 不成 論也 又窮 生者 人之 見其 孟 吾

以

臨

事

不

精,

學者先須立人之性,學

所

以

學

論

加

章

所

謂

「今之言性者

漫

無

執

守

', 所

Ē

非

孟

子

所斥之本意,其下諸

説

則皆

至

也。

曰 :

張子諸

説

如

何?

티 :

不通

畫

夜之

嘗知其爲氣質

而

亦不

知其

有

清濁賢否之分

發

也。

日

然

則

告子

古

指

氣

質

而

言

歟

,前聖所未發

也

,而此言者

又

孟

子

所

未 ?

.

告子之所謂

性

者,

固

不

離

乎

氣質,

然未

性

疑

也。

若其

孟

惡,及人物之性所以不 不明」者,則又極 子之言爲極 亦精矣,獨生字之義 向,各爲一 小異者。 〇日「論 曰 : 於此 説 本窮源 然則 以 知其所論氣質之性 是 性不論氣不備 與之辯,而 至之言。 以 程 之類 同 ,若有未瑩,是以 其 子之説 如如 説 列則 蓋 雖 隙中日光,及以 不察其 固 奈 多 孟 [未嘗敢 論 何 子之言性 而 ? 氣 理 訖 所 吾説 不 有 有 以 曰 無 論 所 善 失 楊氏 以 既 唯 人性 又 不 於李 爲人者」,則尤親 語 日 以 所 善 陰陽 所謂 先 如 生 何

是

免有

定之論也

之之端獨

在

明 不 此又生仁内義外之説 性,然告子以生爲性,則以 攻其食色之云者,使彼 以「作用爲性,義 止 義之意 或問 於食色,其 四章之説 亦 親 有 理 切 以 一爲障 而 察之矣。 티 : 有 知 IE 」者相知 味 義之 與 飲食男女,固 性 今日 爲 類。 非 張子之説 止 佛者之言 外,則性 於是 然孟 子不 出 之 於 因

或問 五章之説 日 范 氏詳 矣。 程子 性之善矣,豈其記者之失也歟 「善者其常,而 以陰陽者,則是所謂道 之善耳。」此 陰陽 爲 先生日 無 無 不善,而 日 切 不 正張子卒章之意 . 陰陽 也。 亦有 善 二孟 不 而 子之意 予嘗以 時 氣 能 人得以 也 而 而 必 惡焉」 無 不 其 只 此章之旨 不善也 生,故 能 無 (恐其 也 無 不 則 不 非 性 昧 日 問 則 今 無 於 所

相 彼 似 内 也 傳 之敬 而 發 楊氏 明 與 義 引以爲 此 非 章 在外之意 敬 説,何 叔 父敬弟 心, 尤爲· 哉 之敬 有 功 若 不 然

性無 告之, 禀於 則程 故 誠 者 則 也 性 其 不 形 知 則 孔 若其 之動 或問: 子 爲善者 生質具,則性之在是者 形象聲 爲 善 氣 其情 何也 子 者言 者之本善, 何以言才之有不善也? 也 同 雖 所 而 也 以 多 公都子 以 之也。 臭之 有 終終 孟 流 性之相近 爲情與 爲 日 子、 日 於 不 可 ,才則性之具 則性之爲善必矣。 程子 問 不善,才亦 可 性 形容 孟 蓋 得而 性 之本 、才之本然者 子 性 ,之説, 而言,然亦 初 也, 不 而 - 體,理 變。 未 自 孟子 ,爲氣所 故 所 嘗 立 有 以二 愐 但 有 時 以 以 而 曰 : 依 能 則 氣之 情 不 已矣。 氣 而 小 一者言 爲者 拘,而 氣 明言: 此 與才 質 異 偏 初 日 而 不美 之 以 亦 於 . 而 之, 也。 形 其 情 者 然 其 其 説 不 未 不

爲 子 子 以 而 不 説 子 大傳》之言性 曰 想 隱、羞惡、 耳。 用 實 眩瞀,不知 此,而支 ,既没, . 氣 生 互相 弟 辭 無二者之分 則 是 而 而棄絶之; 孔子雖 質 乘之, 之謂 子 性 窮 至 所謂 發明 一之説 有 也 於 離 學 無 性 不 性 恭敬、是 穿 雖 所定,而爲釋氏者,又鼓其 失 復問 蠢 耳。 不 之辯 得 程 之爲 皆 ,則皆與 其 鑿之説 動 其 言 及論智愚善惡之不齊 矣。 而 張 含 高 辯 傳,吾儒之言性 相 不過告 孟子雖不言氣質之性 聞 理 則 之説 妙 非 靈皆有 近之爲 但 故 者,故其傳者 亦 虚 之 滿 相 與 一聖人 亦不 既 無 天下,學者方 其 發 近之云者不 子 亦 微 若不 佛 則 於此, 氣 生 何 得 發其端 性之説, 義 質 與 所 盡 反以 禮 可 食色之餘 據 其 者, 然 止 蓋罕言之, 智之藴 詰 解 矣。 而 爲 其 是,而 類 荒 且 焉 然覈 漫 所 云 則 前 、於《易 是是 然 不 但 平 督 誕 舉 程 固 孟 告 無 之 迷 論 妄 惻 其 而

至於

性

則

理

而

E

矣

其純

有

所

拘

有

所

徇

'; 而

氣質

之美

而

加

多

不

以

氣

質

其

之厚

薄

隨

有

不

同

耳

之必爲善也。 致詰之地,舉世之人, 至於程 特氣質之禀不齊,是 孟子之言性 矣,子尚 程子以 五行之説,以 之所從來,其 不能 異其説者 不善 質之説,然後 粹至善之德,不 之悪 以 子,則 來,乃 曰 性 安 一於義 此 氣 而 而言 得 質 其 然則孔子 也 又 爲 之 始 變 有 明 以 及 情 有 有損 理 則 其 功 不 性 化 人 周 以 明 也 耳 以 以 之 物 才 才 才 無 於 善 性 錯 子 亦 才,與 然也 謂 以 盡 别 順 如 不 爲 而 曰 : 之所罕言者, 自 而 日 言 何? 及 異 者 稱性之善者 才情之有不善,則 者,恐於文義有 孟 性 塵 無物之謂 性 (於吾説 此 勞妄想,而 子 冷論 及張子 即 周、程、 而 學不 曰 : 以來,未 前 是理 所 日 一人之才 . 謂 不 明 也。 者 程子嘗云佛 是其得之者固 足以 孟子詳言之, 心 動 張 ,異端競起 「,則 而 爲 何 統 有 爲 若吾之所謂 子又詳 原 所 也? 及 盡 不善之尤矣。 性情 前 心 不 其 未安。 此 發程子之言 輩 同,皆 者 亦 所自未 者矣。 古 之説不 亦 與 日 亦 言之,若 疑 言 時 所謂 孟子 若 與 多 其 而 變事 性 善 佛之所謂 嘗不善」者, 矣。 有 心 不 謂 日 類, 者 本 之所 言 惜乎 也。 有 可 : 杰 孟 異 則 善 是

聖門。

而

惠

於後學

也

厚

者

終

亦

不

能

亂

性

爲

無

害

於

氣質

之有

揉

有

如此

之不齊者。

理

而

與

、張子皆

有

氣

之生,其性則

同

而

氣

質

出

始

復

推

明

太極

陰陽

歸

之輪

迴

宿

習

不可

言

而

不

不

得

不

然

則

所

善

空

何

耶

且.

信

而

歸

往

之,

無有

能

也

皆

未嘗不善也

0

而

爲

有善不

善者

何

也

?

曰 :

與

情

本

非

有

不

善也

舉

天下之

獨

以

若

爲

子

不

暇

分

比

其

他

説

疑

者

其

出

於

夫

子

所

據

而

爲

疑

耶

?

曰

.

疑

亦

指

體

指

用

則

若其

所

問

者

之

彼

古

以

言動 爲君 得遁 各自 婦 其 進於前乎? 友之則也。」則得之矣。 近於佛氏 説善矣, 有 病 、子之孝、父之慈、朋友之信 多善, 别 而止 矣。 必 耳 何 約 差 焉者,其必有以 視 子而 處 ,長幼有序,朋友有信,此夫婦 也 也 聽 而 然此 於仁,爲臣而 禮 而 之云乎? 言 辭有未暢。 止於孝 而 來者 馬, 日 其 動 然其言亦有未瑩者,若曰 所論 楊氏 論物各 他 必必 張 則 性情歸 尤爲切 身之則 ,此君臣父子之則 諸 子 由 皆 也,則 然其 有則 之説 説 禮 第二説 至 止於敬,爲父而 豈其晚歲之所得 焉,此 如 論 要。 處,惻隱殘忍之心, 也。 於《三經義辨》有 前 何? 無乃空虚無實 如 丽 何 但論 日 則吾已辯 君之仁、臣 人者 ,君臣父子朋 一身之則 接於外 日 韓子未當 曰 其 長幼 也 條 是其 於第 第 視 止 而 前 有 也 之 夫 於 聽 朋 不 尤

名者 蘇氏 水之論 友之則: 之能熟,而能燬之」, 考之,恐不如是,其 《大學》物格、 喜怒哀樂之未發謂之中者, 以 氏之説則善矣。 命 心 禹授受之言論之乎? 亦未得其要領 不攻其本, 知其 一,然後物 之謂 欺 夫不可 が世、 道 也 體 以以 也, 中 不可 也。 之説也。」其所謂 物 名之道而寄之也。 者無過不 道爲 而詰其末,使彼 不 而 名之説則謬矣。 則 能 知 能 不 也。 焚能 其 至、 不 亂 然蘇氏性習之云,正告子 遺 庶乎盡之矣。 可名者,是不 吾之知思」者 亦佛氏之餘乎? 則 盍詰之曰:「道未有 熟, 意誠 及之名 則 天下之理得 若是,則 乃其設譬之不善也 之旨 又 將 而易之曰:「猶火 與 耳,皆非 則 而 至於子 何 也。 中 所以辨之者 所以 者 以 此 見 詰之乎 蓋 以 道 者不二其 豊 其 以 物 説 彼 而 狀性之 思之言 前 以 辨 釋 與 不可 經 又 所 夫 吾 蘇 文

謂

之心

二者

如

何

?

日

是

亦

記

者

之

誤

耳

子

論

心

惟

答吕

與

叔

書

最

後

篇

爲

而

失。 者 儒 荀 非 若 德 不 所 論 本 0 0 善 孟 孟 偏 爲 信 亦 揚之失, 而 是 侯 然 尹 耳 子 子之言性 或 日 倚 未 非元 爲 皆 問 . 氏 引《 是 而 有 尹 使之然,是 言 然則 則 謂 不 名 詩 及之者 則 爲 如 程 之, 蓋 愚 執 知 則 》之説 子云 湍 何 中 荀 惡 厥 善 不 性 古 非 ? 水之 亦 非 中 難 揚、 之爲 \exists 則 以 こ之中・ 以 何 本 但 見, 日 既 優 則 古 其 韓 説 其 然 自 亦 0 發 於二子 理 獨 子 深 謂 不 論 則 而 侯 不 矣。 而 則 韓 之説 可 得 夫 有 可 枝 察乎 氏 而 流 可 子 古 未 名 所 平 以 語 然 謂 於 謂 9 以 發之 闕 人 而 ? 其 孰 賢 亦 氣 佛、 約 之 之 姑 而 0 而 所 爲 而 正 情 爲 中 用 寄 不完 若 老 近 未 義 善者 以 近 以 不 性 心 之 世諸 之言 見 其 本 其 耶 不 者。 矣。 耳 也 ? 亦 口 齊 其 所 無 無

> 養,人 之意 氏悦 張子 張 善於 然 他 爲 之,天當 日 日 説 子 心 「善之所 日 之意 性 所 心之説,亦皆 也 者 如 事之不 氏 謂 何? 而 作 至 則 所 心 失 世 矣。 與 謂 統 由 之 齊 亦 曰 此 性 出 虚 矣。 其 0 者 張 日 情 正 而 禮 程 善 子 則 又 形 相 誠 其 文通 亦 子 也 以 理 密 而 反 者 論 一義 理 爲 性 上 而 俗之說 切 地 義 全在 可 何 而 者 胥 要。 悦 有 以 也? 口 失 心之説 肥 然之 無 天,以下 爲 之 若 非 磽 則不 善 矣。 前 曰 實 説 雨 則 所 理 可 此 文 程 謂 露 亦 \Box 與 耳 考 > 亦 動 離 謝

矣。 者 特休 楊 或 問 息之 尹 夜 亦 氣 餘 無 之 氣 失 説 清 其 明 日 者 日 . 耳 程 而 曰 子 程 張 然 子 子 則 遽 以 皆 夜 爲 氣 至

0

[「]枝」,四庫本作「歧」。

② 「固」下,原衍「必」字,據四庫本删。

深約 之,孰 亦且 好惡 者 有以 物慾 説 梏 乃若有契於予心者耳 故其下文引孔子之言,以 亡,蓋皆以 良 氣 孟子》本文,忽悟其意 意 者 「,則 而亡之,是以流於禽獸 而 知 子 ,首尾 存夫此 本以. 散 反 相 言 良 能 而 其意益明矣。 調 漫 近 也 能 初讀 知其旨之爲然哉 其 氣 爲 指 者 而 衡 莫 心言之, 良 心 有 無 決 之,亦 夜 義之良 夜 何 耳。 存 心之萌蘖 可守之要矣,非 氣 哉 既 亡,而 而 之 ? 得 及其 日 未 初 所存 但 休 心 用 曰 覺其 ,然後求 不 欲 爲 日 息 雖由 之間 日 . 以 而 者 ? 致 不 至, 夜 書 良 明心之不 則 不 爲 而 養於氣 然 復 予之愚 所息以下,只 所 而接 知 然其 以 反耳。 其 言 也 氣之存 更 於 良 以 程 爲 氣 也 著 物 能 程 用 後 子 雖 語 復 則 子之説 暗 心 其 也 可不 其存 大 以 或 意 清 蓋 非 字 而 力 諷 是 此 流 此 亦 則 指 明 然, 者 也 章 故 以 操 其 誦 頗 明 又 而 於 章 夜

然所謂 聖賢 於卦 爲主 學者 偶 但 以 微詞 然 入無 亦 IE 心 古 曰: 程 一,然 之正 爲 未 子 日 存 不 亦 及知 是 文以 於内矣。 於此 於 能操 心無 爲《復》, 逐物之心 奥 可 所 疾 不 其 が、朋來 以 入者,亦 内 義 見 耶 可 出 氣質之粹美 讀 荷 也 通 范氏不識 者 而 ? 謂 存之, 書 天 入,然則 皆 非 能操 無咎。」 象 本 日 暫息, 下 之不 易》之陽絶 非 心之外 0 正 荒 之志 見之所 出 而 則其 此 如 忽 可 存之, 孟 則 其 而 則 心 此 無 不 其 而 子 逐 有 此 既 出 而 常 熟, 無 能 而 意 别 物 出 出 而 盡 心 於 則此 逐 亦 莫 窺 有 者 能 未 逐 À 而 人物之性 其 外 而 物 猶 者 也。 出 知 物 識 嘗 復 前 而 心 固 彖 之 是 其 人之心 自 於 賢 J. 不 生 不 非 其 心 也 日 定 外 之 於 外 放 在 本 無 耳 何 内者 内 人 處 與 心 乃 程 也 而 也 也 耳 耳 其 非 其 常 彼 若 ?

易 如 以 其 失其本 明 此 如 所 此 以 或 人欲未 則 亦設 問 如 豊 心 此 不 程 古者 也 詞以教人耳。 易 日 子 耶? 道 果 去 所 不 何 謂 幾微之間 可 自 謂 此 以 聖 耶 須 人 之外,則亦 ? 然其所以 求 臾 離 曰 道 之 有 聖人 而 間 切 無 天 欲 斷 之所 以 理 人 須 之 汲 則 未 求

者

日

論

汲爲

之矣。 素明 易溺 之奉 識 以 説,然吕 或或 此 加 或問 問問 或意 至 涵養素定, 亦 窮 張、吕之説,有 易 之日 是耶 乏得 氏 通 彼者 十章之説。 氣之私 爲詳 此 ? 我,此 也 也。 是 然孟 程 而 人 人從學之久,豈 昔程 子 臨 三者,或 程 子所 所不能 日 事 相復者,則不 티 : 子《外 子之門人,有 有省察之功,未 論宫室之美, 張 謂之全無 免者 物欲之尤,人 書》所謂 子、吕、 自非 其 知果 尹 知 全 爲 義 無 妻妾 皆 識 有 燭 誰 不 無 所 義 之 則 知 不 理 對 得

爲

子

盡

失

切,尤足以發明《孟 愚 不 謂 可 此 但 言, 義 以 理 責 不 人言之則 能 勝 子》此章之意 私 欲 之心 恕 以 教 即 也 至 言 此 之 耳。 削

字訓仁 者,猶 然後毫釐之間 於《論 一,得告 矣。 用 親 「下學上 人心之辨 或問 切」,則 力最緊切 日 而 君之體。 語 以 + 不察其名義之所主 其 達」,則固 得之。 理 析 章 已辨之。 處 無 而 理 之説 楊氏 所差謬。 而 言 然亦 尤 不以 程伯子之言 爾 精 孔子未嘗言仁之説 必 其 티 : 就於此 范氏之言,明 以程子之説 日 其 不然則 此 以 「仁,人心 者, 孟 至 而 爲 子 亦 將直 E 矣。 就 發 不 也 也 通 以 事 能 其 明 其 言 最 詳 學 心 無

賤 范 大小之間,學者反之於身,亦 氏 詳 或 問問 矣, 十二、十三、十 雖 以 君之事 四 爲 章 未 然 之 嘗 學 説 不 則 可 無 日 貴 用

也。 身,亦曰 又當養其大者,而 腹真尺寸之膚者,亦非本文之意 子二説 不使陷 ,恐皆有未安者。 於不 不可 善,而其 唯口腹之養也。 其所以養之者 孟子所 其論 謂 則 愛

抵《孟子》此章之要,正在夫先立乎其大者之 釋此章之義 之箴,蓋得其旨,未可以晚 於思,而 言耳。 或 問問 不隨於物,其不中理者鮮矣。 + 蓋 也。 五章之説。 大者既 尹氏之云,則失其序矣。 <u>)/</u> 則凡 曰: 出 程子泛言,非 動静云爲,皆主 而易之也。 范 大 氏 以

意於 子固 天 言其 之必然者,而又何嫌之有 意於求,則是乃所謂脩天爵以要人爵者 理 、任之云爾,如何? 或問: 人爵之求耳。 人欲之别者 已斥之矣。 「人爵從之」,有以爲從之者, 其 ,特在乎求與不求之間 (或不求 殊不知此章之意,所 日。 哉 自 至 是蓋嫌其 則 日 是 0 脩 乃 猶 天 理 以 君 有 爲 有 猶

> 將 猶五 待得 以 急 之心,寬宏平正,善善蚤 要人爵者, 何 迫 以 也。 霸之假仁,猶 人爵之後,始謂 處之耶? 且若是言, 雖 Ħ 脩之,而實已棄之久矣,何 愈於不假而 之棄 則彼直 而 郭? 悪 棄 惡遲,不如是之 不脩耳。 而 曰 : 不脩者,又 若是者 聖人

有間矣,學者審之。 之云者,於學者爲有功,然比之孔子之言,則或問十九章之説。曰:張子敦篤虚静

孟子或問卷十二

失耳。 而 亦可見矣。 食色之輕 反輕於食色者,惟理明義精者,爲能權 食色矣,然其間事之大小緩急不同 不欲言者,豈所謂 或問首章之説。 權之不失,是乃所以全禮之重 也。 而范、尹於此 觀於寸木鉤 未可與權者飲 曰:禮之大體,固重於 ,皆若有所回 金之喻,孟 則 前 隱 子 之而 亦 之意 遷 深 或 一就 明 不 有

神 説 不皆然 姑舉其易者言之,而推之以至於事 亦 通 ,并妙 爲 或 問二章之説 親 ,發明言外之旨,尤爲 切,但 用 運水及搬 其 書 又 티 : 柴之説 有 日 程、張至矣。 有 此 佛 功。 自 者 無 得 龎 楊 戸 者之 氏 張 藴 細 子 有 之 莫

也。 哉? 明 則 其 如 無 但能 實理 其間 矣。」 作用爲奇特,故與 之失與? 蓋 把 者多矣,但其本不同 言,最爲 此。 孟 病 所 是凡爲佛者,去此二病,而遂與吾學不殊 如 來 ,則以 此章孟子之言,均是行 且其 適 便有堯、桀之異,是乃物則民彝,自 識 子之意 愚竊惑之。 做 蓋其學以空爲真,以 而豈人之所能爲哉? 此運水搬柴之物,則 今不察焉,而以達理自得 而 達理。 所謂 件 不可矣,何必徐行 不然,則 爲特 事 而 無適 異於釋氏之言者,豈其記者 但其言周遮,使更通徹,亦 在 夫釋氏之言,偶與聖賢相 若 吾儒之論 於周 不然者,亦未見其 殆於儒 孟 リ則雖 子之言, 遮 著 理 相 正 正 也 佛 意 雖 若釋氏之言, 爲 似 而 一,而 語 倒 相 障 而 而 後 則 性 己。 稱之,至語 實相 南 行 可 無 而 之不 逆施 疾 北 以 適 有 以 7,至於 如 反 爲 然之 以 不 縱 徐 也 同 此 則 似 須 發 横 堯 亦

乎? 文定 之耳 是 難 容周 卒無 亦未 道之精微 氏 弟之意亦佳 氏 何?」公曰 曰 亦 之言 句 於《大學》之序,必以爲 爲 而 道 於知道,故欲脩身者,必以 有 爲孝 旋 必能行之也 不弟 公曰 所 致知] 豈難 句 一句 今曹交於此 中禮 未 同 其 , 如 其 辨 云者 固 知 得 事之同。」正謂 事 矣 是 而《集 大 方始 難 失 以 禪 而 事 亦亦 體 而 知 可 者 此 合。 特患於不爲」,何哉 亦 程 向 爲弟,如 見 是妙 也。 爲 似 義》未之載 以 日 何暇 子 背 矣。 用 然以 即 拈 有 有 之間 然自始學言之, 用 其已行 槌 及乎 用 所 言 因 處。 尹 是 其本之不正 此 竪 而 未 贵 氏 小學之成功, 而 致知 爾。 拂 致知之方乎 知 也。 不 推 以 爲不孝, 以 之知 不明 妙。 爲 借 此 説 吾 爲先。 或問 티 : 妙 求之,楊 堯 觀 須是 而 而 用 知之, 是 學 舜 於 推 於 易 如 則 日 ? 致 今 莫 孝 動 胡 以 釋 是 如 而 知 如

> 後 力 有 所 施 蓋 爲 此 耳

《小弁》之怨,曰: 於我 自 也 ? 以 何 或 爲 問 哉?」蓋 日 無罪矣。 . 程 舜之怨,曰:「父母 子 反 論 「何辜 諸身以 此其所 小弁》之怨, 於天 求其 以不 我 所 同 之不 與舜 罪 未 也 歟 伊 至 我 之 不 何 ? ? 愛 辭 同

何

則

或

問

四

章

楊

氏

之説

日

是

則

然

矣,

然

其 曰 : 也 意 始 疑記 本 或 交 問 非 者小失之,讀者 未 以 儲 爲 容 君 子 逆 子欲求 儀 料 不 其 不 及 勝 不 誠, 物, 可 不察 既 幣 而 受 可 後 則 反 不 言 不 平 口 ? 利

反

矣。

但 語 亦 而 張 其 有 無 説 禮 子 或問 目 成性之説有 焉 亦 \Box 三子 何 夫孔 非 所 禮勿 之説。 賴, 子告顔淵 視 所 又 未 須 曰 : 聽 安。 反 以克己復禮 言、 程 禮 而 子、 然後 動 其 張 ,則是己 曰「徒克己 至 子 一者, 至矣, 而 則 又

論矣。 者未必然,其曰聖人無取天下之心, 其克己初不以禮爲則 之矣。 民,乃若王氏所謂 者耶? 然若是者,非既克己而不復禮也 者 與 有」者,尤不可曉。 爾者,豈以有若浮圖之盡 ,亦未有既 禮更爲消長, 曰:楊氏如 克 己 固 非 而 未 何? 其論 不復禮 有 而徒自苦耳。 不 孔子五薦 國所得容,一君所 屏物欲 曰 : ·以禮 者 其 也 爲 論 則 而卒不合禮 五 不可 而 而 就 其論天 張 能 易地 則至 則 子 克 乃 能 云 得 己

亮爲 滯 諒之類是也。 者,得之矣。 至於執字,則 者,如《中 考之《説文》,古無亮字,今以爲 固 或問: 亮之爲義, 諸説 執 固 -庸》所 爲必信 但爲 然諒有二訓: 有爲必信者,貞而 謂 持守之意,而 之意 固執者是也。 前 有止訓信者,友 讀 不同, 惡 未 不諒 日 有 今程 鳥 與 以 如 是也 子以 爲 諒 何 則 ? 其 固 通

> 義 説宜曰「不必信,則不 故吾以是推之,而從尹氏之説,直以 有不同,然 必信者、惡其至於固滯 爲 諒之諒,言君子舍是,則無 必信 ,從其一焉可也,至於執 · 而 讀 以 惡從去聲 諒 執 爲 病 古 也。 ,則其説宜 滯 則 矣」。 可 同 則 據 是 也 無 守 雖 張 也 可 |日||所 夫諒 其 子 病之理。 諒 文 亦 入勢小 爲友 有二 以 以 諒

之説故歟? 意者其有所未達於免死可以上下等之耶? 意者其有所未達於免死亦視其所遭之時如何耳。孔子皆嘗爲之,又亦視其所遭之時如何耳。孔子皆常爲之,又

四二九

孟子或問卷十三

心者 矣。 知 周 也 於夫子之言者是也。 物,或素所未嘗接 心 慮存於胸 者 . 判 則 者 ? . 脩身之事 「則固 物格 然迎刃 是 也。 或問 日 固 以 0 盡 中 平居静 今窮理 心之體 知 未嘗有 其 心, 而 3 ,曾子所以臨 至之 無 至於事 解。 無 所 而 處 限量者也, 限 於耳 無 事 不 此 貫 ,曾子 量 所 統之體 虚 至 其 通 所謂 也 不 目 明 物 所 以至於 統 思 洞 來 以 深 所 事 大概 而 達, 慮 爲 此其言盡 履 則 以 無 天 之間 盡 薄 其 者 雖 所 固 可 此 心 舉天 用 唯 無 不 以 章 加 者, 誠 毫髮 周 無 無 無 而 所 而 心 意 之用 下 所 所 H 謂 所 亦 無 無 Z 疑 不 正 疑 盡 不 何

與? 難知 若 子京 也。 也 則有 其 明 日 者是也。 焉 省 其 心 固 承 ,曾子 辨 其 0 之理 日 論 日 不 諸説 之。 身者 文譏 釋 師 吕 其 不容以四 外乎四端 者,當深思之,亦有記録傳寫之誤者,當 猶 「才數著便不盡」者,論心之發,其大目 其 以 長 與 氏 居 所 曰「無限量」與三者之名義,則至矣 安之説 如曰「贊則真養之而已」者,其誤 如 以是推 其 叔 運 是 有 開 以啓 即 何 用 最 無 盡 封 也 理 ? 爲意而 目盡者,是以不容遍舉 後 ,然其間支分脉 F 心 而 手 之自 學,非 之,則一章之指,略可見矣。 知 亦 所 識 曰: 足 書,觀之可見矣。 至 性 京 謂 而 非心者,嫌 然 論 程子至矣,然其 師 立 Ë 知 而 處 則 命 達,不 免,得 但其 無 者 庶 初 存 矣。 布 非 所譬恐未 養 連 如 IE 於不 ,千差萬别 之功者 有二 屬 是 斃 蓋性 以 而 其 盡 而 而 物 言有 没 無 悉 只是 議 其 有 的 也 也 灾 身 Ē 間 張

嘗引 師 又若 意。 盡心 尤詳 力之方,又以 質 斷 之説也。 之病 日 夫 原原 心 脩身養 其 有 有 以 其曰「有外之心不足以合天心」者,程子 意亦 之語 ,而不梏於聞 ,其曰「大其 即《 條 既 日 也 不 明 病 耳 所 同 自 無 記 如 舍 觀 性 其曰「性大於心」,尤深 \overline{Z} 非真 者。 方外, 慊之意,甚善 其 此,學者深考之可 之, 此 始 聖人 所 者。 派 、曰「盡· 見 謂 以 能 其曰「知 意 也 心」者固 聞 盡 見之狹,如其下段 則 然有 是許 盡 盡 尤 一,此 人道 性 所 别 己 明 性 白 之也 一之性」 爲 大之之意 謂 自立見,始謂之 則 類 則 ,而張子之自 心之所從來」,亦未 言,則非 善蓋 直 善。 又皆程 可 内者 其 以 者 也。 更以後段答劉 論 然 事天」, 欲 其 直 則 其 可 子 孟 而 人 張 物 内 又 後 所 疑 子 明 本 初 子 言,則 方外 心 牴 復 又曰 之本 之説 議 亦不 無 出 理 牾 有 京 用 於 以

> 改,則 篇 未 於其 今以 氣今固 未 之説 魚子 不 於 此 不 條 首大意 見 成 大 若從 在 亦 其 説 喻天 也 人性本天,而皆足以 也。 我 而 可 其 正 有 也。 天 也。 疑。 已在是矣,不 大,不待離舍見聞 事 惜之深 破 最 改 於程 人之性 人固 且魚子 前 善至 <u></u> 也,豈記 其論夭壽 大抵 東 原 子 矣。 見 不 派 所 其 • 一引《中 合矣, 録 既 之説 説 謂 学中 録之有 則 今以 必 受 積累 不免有强 不貳之説 又 成 大 庸 此 有 前 前 成天之性 此 魚 魚 而 貫 語 程 原 以 所 語 然 之 通 H 心 張 子 後 派 遺 後 氣 説 之説 之 探 後 所 子 則 者 乎 爲 體用 力 來 穿 則 以 則 京 善。 考 反 取之意 則 雜 此 渠 則 師 伍 大 之書 原 亂 范 議 引 方 魚之 致 長 其 未 不 也 名 氏 必 原 其 安 期

^{■「}人」,原作「命」,據正德本、正保本改。

② 「派」,四庫本作「譬」,下一「派」字同。

子之説 藴, 而 然則存 至論 也。 旨乎 爲 於此 專 得 至 存 乃氣之本體 反 聽 説 爲 去者得之,然其 無 心者,氣不逐物,而常守其至正也 發用 致 章首尾次序大意,甚 盡 疑。 心之爲 口 於《孟子》之本文, 性之本體見」者,如曰「守静後本,内 則皆佛、老之餘 楊氏心不 · 而 心 心養性 勝 其 **一**致 所 ,則吾於綱 尹 後段 Ħ 論 物 加 以 氏 專」者,豈儒者之言,而孟 至大至剛 惟 窮 ,儒者之説 存養 可 精 與 以爲養性之道,其說尤不可 理 日 猶 其 無、性不假脩之説 密,有可 所 則 窮 領之篇已辨之矣。 在貫通之後乎,其 所以 也。 以 又倒 理 以直」, 所 又無 ,可得 得 有條理,而 如曰 盡之者 '觀者。 置 以 天 矣。 盡 所 理 「心之地 則孟 聞 心」者近之。 與 者,大 則 乎 謝 吕氏 也 子 其 氏 不 ,善矣。 所 能使 子之 所 以 充 游 即 意 無 日 論 視 餘 以 氏 心 擴 張 性 0 口

> 者,事 累其 先事 與 則 其 儒 揣 者異端之辨 或問 功,以至於盡 盡之之方,奈何? 必 量,著意想象, 循 二章之説。 理, 而 命,然聖人 明 不 心,則 害其 矣。 而 티 : 心之體 别 티 : 日 本 然 却 求 程 然則 由 所 也 不説是命」, 子 窮 以 用 至矣,其 理 心 以 盡 在 之爲 我,不 之 致 此 知,積 推 也 必 此 日

毋 説 切 文辭矣。 IE 最是得其文義者。 李泌之言,於告 桎梏死者莫非 出 ,學者所當深 爲不直之求, 」,則非文義。 於程子,下章詳 巖 牆 念也。 徒 君之道 段則 而 以 又曰二 若張子曰「命之於 自 善 范 陷 尤 順乃受其正 氏 於 而 爲 説 其 不 有 他大旨, 亦得之,所 正 力。 者,警 尹 人無 」,則 氏 戒 教 引 尤 非 不

改。

^{● 「}其説尤不可」,原作「尤不可其説」,據正保本、四庫本

道

者

0

程子

既

日

以下

以

有指

言

也

一,若專

爲

所制

故

曰

有

命。

有得天

下

而

不爲

者矣,

亦

安

君

子

固

不

謂

命

若

其

富

貴

而

得之於天者

然

無

耶?

티 :

若是者

其

貧

賤

制

以

其

求

之

義

在

此

理

所當

義也,得之有 然聖人則 外者, 然錯 爲求 爲 日 而 外 在 義 外 義 雖 爲 力爲 以以 章 0 無命,與下數節之説 者, 者,不 中 綜 外 處 而 如富 在外者設,此乃分析内外 有 在 命 之 其 命者命也 者言 命 而 無 人 道 非 我之所當爲 我 説 言 命 求之得之,莫不有義 矣 以 貴利達之類,皆命有 者 求 以 可言 而 Ł 則 則後 程 求 命 此 得 如 而 不 子以 理 在 也 以 以 ,是其言各有 之則 又 仁義禮智之 消 亦 段 我 命 所 日 無 言 求 所 求之内 謂 爲 而 而 有 所 命 謂 在 聖人而 不問 以 求 求 命 不 求 我 則 義 也 義 通 又 之 故 者 外 彼 義 而 平 屬 也 有 言 日 而 之 故 所 又 日 命 求 爲 ? 之所取 之説 티 : 考之, 者 義 得 則 以 亦 命。蓋 而 命,然富 固 云: 前説 是是 端 夭,固 無不 命 遽謂之命而安之乎? 君子處之,固 驗 Ė 最後 也。 ,所以 其 當 爲 聞 又以 前 似 爲 通 必 正 有 命 貴、 專 或 説 中人以上 一、後説 一説, 張子説亦皆善 然 亦 有 下字 爲 而 求在外者爲自有 有功於學者 兩 楊氏所論之人,則 前 貧賤、壽 不 見皆 非 求 則 定 又以 人所取 能

之,何

也

?

之云,似專

乎

則

求

在

? 下

言

求

在

蓋誤以下爲上

耳。

且其

後

又

同

而

後

説

無

他

援

據

以

者

設」,

何

也

?

曰

以

文

矣,

後

段

之誤

蓋

無

疑

也

在

我

未

盡

雖

不

可

以言

夭,是

亦

前

定。

然

則

X

安,

又其每下

者

0

則

前

此

義

求

在

外

者

或

問問

有

聖

人有

義

)所謂 有 内 加 每 有 下 外

内

外

程

子

在

外

者

言

之,

其

日

而

後説

尤

詳

其言

其

亦前

聖

所

未

發之

此

程子言義不

言

者 Z 爾 耳 尹 氏 以 命 爲 外者, 亦 日 制之 在 彼

之中 此一 矣,非 哉? 理,而 矣。 其諸程子自道其 以 若不責之處 無 者,亦曰有其 子至矣。 者之所及,然玩 人達 爲 不嫌於心 物者 實,而 ,莫不有 或問 人爲仁之方, 强 若程 所謂 想象安排 恕 即 蓋 四章之説。 而 其 子學者先須 盡 作 心行事之實,而但欲反心以 萬物之生 行 其 萬物之理焉。 爲 理 心 德 所 ,使其備 知 心 而 則 而繹之, 所 已矣。 以 亦已 日休,實到實有之説 則吾於《論語》既言之矣。 性 亦 以入德之由 生萬 不 程 ⊟: 同乎一 識 勞矣,尚何樂之可 假 子之説 於此 其 仁 物之 存 反身而 萬 所以 所謂 養者 一條,則其 物皆備之説 焉, 本,其 理 得之,但以立 乎 發 則 萬物皆備 也,故 ? 不 誠 人者 將 能 (所以 則 雖 何 爲實。 及 水衆 説 張 亦 非學 所 也 生 言 物 程 深 高 據 子 云

> 然極 恕耶 楊 張 謂 謂 之 子 氏之説 無 既 有 誠 忠 ۰, 味。 亦 誠 做 曰「有心 而 恕 Œ 有 曰「强 又强恕之説 不 誠 是想象安排之病。 出 爲 於 恕 恕 恶 兩 者」,則 初 則忠固 字不容去一者,正 不言 失之。 其 忠, 在其 失 其 無 尹氏 中」矣。 又 日 忠 愈遠 誠 何 雖 以 者 矣。 自 謂 所 爲

則 復可 矣。 而 功。 范 終不能及人者,於義亦通 或問 耻 然六章李氏 或問 氏 矣。 所 謂 九 六 七章 章之説。 「孟子言道德 章、七章之説。 亦猶 以爲 謂 人 티 : 而 人若 范 無 必 ,學者擇焉 不 耻 尹 曰 : 以義 ·耻其 則 之説 舊説 其 配 不 爲 一者,尤 皆 可 及 皆 耻 也 善 無

節 甚得言外之意。 或 問 + 章 一之説。 日 0 范 氏 推 言 聖 人

或問十二章之説。

曰:

去惡除害,

古

尹

有

此

也

去惡 生之者 辟 以 亦 此 日 氏 者 皆 無 此 説 所 救焚拯 所 如 以 引 爲 怨 伐 生 不 説 程 彼 者 道 得 叛 爲 子 此 前 溺 除 之説 惡以 若 殺 不 又足 非 之也 日 同 後殺 害 | 去惡 也 害 常有之事 如 以 子 人,其 之,以 救 而 兼 彼 之 除 程 水火,往 彼之説 亦 害 去 子 罪 何 安 , 所指 彼 則 又 當 怨 衆 自 E 取 之 死 而 者不幸 而 所 有 此 者 吾 有 厲 彼不 謂 救 ? 其 狹 求 何 辟 焚 餘,凡 而 足以 且 所 以 不 拯 也 死 或 以 當 止 溺

張 如 過 曰 以 者 在 虎 子 張、謝 化爲 豹 考之,恐其 己言存神, 或 謝 問問 炳 氏 蔚 及物 之説 不 過 同 化 指 皆 則 而 存 而 似 不爲 於《易傳》又有 疑 神之説 其 其 又 於老、 旨 人若張 後 是 1明矣。 説 也 佛之意 、謝之説 程 以 故 子 無 蓋言 「所過 程 所 我 子 以 説 言 直 所 何 變化 過 過 以 此 固 也 化 者 所 章 與 ?

之説 必爲經 實 字 也。 耳。 形 如 以 等 先 説 聲 治 化 不 盂 生之口 ,則出 之, 子 稍 聲 所 化 語 氣習之所 可 則 而 之意 輕 之 謂 者 不 但 以 明 然後 化 凡 之, 詳 召 張 是 從 無 行之地 神字 於楊 文勢論 而化、 所 也 欲以 子 意 其 推 則 有 物 經 則 失耳 之, 被 均。 而 不 從 歷 謝 氏 其 神字 所存 稍 治 及物 之, 之篇 物物 凡 知 皆 其 則 氏 意 輕。 也 但 其身之所臨 其 所 化 文 程 亦 者神 實 爲 無 近 或或 意 此 經 也 子 所 明 但 優於 不 年 暢録 矣。 歷 亦 於 以 則 前前 其 化 謝 者 學者, 然 此 然 誠 也 少 感 張 氏 固 》所 説 不 其 , 初 者 其 異。 應之 於 子 則 疑 既 必 此 日 深 者 過 日 政 云 未 是 其 至 以立 久 之所 愛此 張 在 者、 速 而 嘗 則 不 於 經 然其 蓋 於 子 己 動 皆出 之斯 無 歷 存 有 所 如 此 口 過 於 者 及, 我 者字 決 謝 異 謂 影 亦 加 彼 風 7 於 不 深 非 氏 存 説 神

兼

此

也

以爲先王之樂,張子從之,恐不然也。或問仁聲之説。曰:程子得之矣,舊説

用之間 固仁 意 以 行乎其間。 未發者 仁之端也」,又曰「親親仁 又不見其用之所施 子天下爲度之云,恐非孟 説 明 得 '則仁義禮智渾然在中者'非想象之可得' 一之發, 之,其 體 固 或問 「, 其 正, 正 善 ,莫非要切 ,然有未 十五章之説。 日能 欲學者即是 而 體 要之體用未嘗相離 也 不 則 識 ,而其未發之理,固未嘗不 盡 已發者 惻 也。 處。 者,則又言外之意也 隱 而默識之耳。 指其 曰:程子至矣。 蓋既 子此章之正意。 親 其 也」,則 親 發 、用也。 日 之未 故孟 處 「惻隱之心 惻隱 而 發 言 以 尹 子因用 者 、親親 一,則日 未 氏 也。 楊 大 發 張

范 氏 矛盾 既 或 問 日 耶? 聰 + 明 六章之説。 聖智矣, 又謂及其爲聖人,則是舜之 又 曰:張子得之矣。 日 積 而 成 聖,無乃

> 此 初果 章 · 意者 或問 爲 野人, 十七、十八章之説。 尹 而後乃爲聖人也 氏無我之説,亦 未然 티 : 楊 范氏之言 也 氏 非 正 解

我 如 貌 此 藐 亦 嗚 可 呼難哉 謂 惻 但而 懇 至矣。 誨 爾諄

之説 位者,大人則其德已著,如《乾》之二五,通 天民之名,亦少有未盡 必 皆善也。 下而言之也。 亦係乎時與不時」者、蓋天民專指 天民之異者得之。 論達可行於天下而後行之,則善。 曰 以 大人 爲充 ,似亦可 或問十九章之説。 蓋 實光 曰 : 亦 疑,豈 張 輝 通言 然則 而 子天乎民者,尤爲未安, 之矣, 設辭之未決 未化者耶 其第二説, 此 其 處。 曰:程子至矣,然於 不言聖人,何 如《乾 其曰 與楊、 耶 一天民 ? 必先 潛隱未 尹 大人, 也 説 氏 正 物 而 亦

此 深 玩 者 ,猶性之之云也 之。 亦 日 楊氏 其 所 以仁義禮智根於心,爲本 禀者 然 爾 蓋 孟 **一子**所謂 來 所 如

性

心 舜、三代養民之法,而歸之欲治天下先治其 者,可謂至當之言矣。 或問二十三章之説。 曰:范氏極 陳 堯、

以

以明 矣,其 其 玩 海,流水盈科,興 得失,亦與 有 、斥之當矣。 本而 之,則可 楊氏 難 或問二十四章之説。 日 明 無窮則善,其論成章亦然。 無 所論 之 以 程 窮,又曰 理 也。 默識於言意之表矣。 子 然此 勝 ,猶《詩 觀瀾容光,比也。 相 物 似。 章 而 有本,當合之曰,言道 雜取 学 小之者,王雱之説 吕 有 氏 曰: 衆 比 難 學者 理 程子、張 爲 了,錯比 興 張子 也。 言以 反 後而詳 成文, 登 E 大意 子 Ц. 也 至 得 之 觀

程 未 或問 接 物 二十五章之説。 時 之 論 , 尤能 發 曰 : 明 諸説 言外之意 皆 善 而

> 之利 此《大學》之道 毫髮,苟辨之不明,其不反 者所當深念也。 穩便處,皆利 格物致知爲先 ,凡有利 心 心 所以 也。」如 便不可,如作 然程子又嘗言: 也 雖 以 此, 誠 以 則 意 利爲 正 善利之間 事 心 示不 善者鮮矣。 爲 須 重 尋 獨 相 前 自 財 去 心 利

性又 亦善。 所 不在彼,不 物之性爲權,則未見道 下,多所未安。 矣,而張子之言,尤精且詳。 自 意,而近於釋氏 雖 以憂後學者至矣,可深玩 親 爲 在 始 或問二十六章之説。 我 吕氏 」,則 道 體 而 在此,不 論 其文義尤 與 之間 天 文義 不屬中 如 下 日 在 其 同 處 其體純 中,則 論 不 其 得 間 之所 可 堯、 利 之,但 與 曰 : 曉 内外之説 恐亦非本文之正 舜 以 雖 也。 而 其 八論無 兼愛, 爲 無 不 程子、張子 所 夫 體者, 謝、 能 雜 論 既 加 名 忌憚者 楊之説 E 專 而 於爲 權 至謂 立 以 而 以 盡 至 愛 爲 物 以

攻,如 尊 兼 能 得 我 爲爲 ·; 則 孟子而并容楊、 V/ 取老、佛之微意 愛自親始,則 水火之不相 安 我矣。 能與 天下 既 兼 亦 耶 同 墨,得無 人,乃欲 愛, 利 不得爲兼愛矣。 則 能 安能 兩 與 亦 天 取 有 立 而 下 不 愛 兼 口 叛聖賢 自 存 利 兩者相 親 則 始 推 而 不

曰:詩 之説 和 通 介 也, 又 也 或 八以爲 人知 爲 家 問 古 有 其爲 介, 柳 有 功 下 此 何 矣。 和 惠 也? 訓 不 而 日 然 不 辭 티 : 施 知 小 尹 其爲 之於此, 官, 氏 不 辭 之 楊 介焉 小官 訓 氏 則 既 如 有 以 何 楊 和 氏 爲 不 ? 而

其 假 氏 許 之, 所以啓司 之未久 以卒能 或 爲惡 問問 三十章之説。 而 知 正天下,爲 馬公之疑 遽 非 歸者、 有, 則誤 亦非 久假不歸,孔子 而 曰: 來蘇 是。 而 諸 胡 蓋 氏之辨者 説皆善, 氏 如 以 此 爲 説 以 但 Ŧi. 楊 蓋 則 霸

> 無 子之本意云。 説 足 怪 ,雖若 而 未 子 有 Ė 定 論 於《 論 然皆 辨 惑》之篇 1庶幾 其不 矣。 ·悖於孟 集

之疑 則 則 折 者,亦爲得之。 詳 不 伊 免爲篡賊 尹之事 或問 不疑 盡,其處義精矣。 或問三十一 爲 三十三章之説。 可 口 耳。 否 爲, 然孟 章之説。 也 不以素行 子但 有毫髮之僞 其日 楊氏以伊 論 中道 티 : 日 在 之著不著 我 者 程子之説 范 尹惟知有忠 者 雜 則 氏 乎 有 善。 詳 是 其 而 間 心 曲 盡

之也,所謂急於救民者非是。 矣。但孟子之言,乃理之當然,非有爲而言矣。但孟子之言,乃理之當然,非有爲而言

知有天子之父,舜知有父,而不知有天下 相 問 其大意。 與 孟子之答,皆非 極 或問 論聖賢之心 而 三十五章之説。 楊氏之説, 以 爲 則又詳 爲 真 皋陶 曰 : 有 是事 矣。 范 知 氏所 有 然桃 也 法 論 應之 而 蓋 特 不 得

非 海 陶 説 楊 此 言 徒 E 法 加 則 此 杰 辨 不 爲 則 内 氏 則 或或 一棘門 天 小小 施 爲 後 非 ,猶待 其 可 此 降 臣 執 於 紛 竊 所 道 》論之已詳 聖賢之心,終亦 者既不之信矣 何 不 以 庶 周 地 而 議 之 負 以 紛 而 以 知 私 之 世家 出 不 之説 軍 以 論聖人之心矣。 不 權 異於楚人之直 而 耳 亦 釋 於 心 哉 逃 相 其 吾 反 舜 舜 焉 如 悖 生 而 輕 病 楊 讀 於 焉 何 舜 知 必 不 是皆 重 氏 則皋 於 耳。 及 ? 者考焉 其 而 人 去 亦 後 理 而 情 於舜 亦 何 不 而 説 日 以 陶 信之者 計 也 而 必 而 不 自 以 0 辭 躬」者,又謂 之獄 又謂「與之執 其 以 楊 己 出 留 此 是 川 而 何 害意之過 夫 不 矣。 於此 爲 氏 也 祈 則 明 則 哉 ,其爲 ,何以異 孟 可 孟 以 然矣, 哉 於 朝 以 子只是 子之爲 但皋 矣。 爲 皋 日 ? 忘父也 廷 鄉 説 舜之於 . 陶 公卿 陶 使皋 蓋 然 子 是 既 以 而 又 於 論 此 法 其 則 於 必 如 此 以 灞 執 IE

> 理,而 有 則 舜 味 其 心 説 者 ,學者宜深玩之。 超然 亦有 ,爲愈於前 不 所未 累於物之心 周 ,然爲 也 大抵 舜 尹 者焉 氏 慮 當 之 而 知 説 不 則 必 及乎 雖 天 有 約 下 渾 皋 無 然 陶 難 天 極

處

之事

矣

之蔽 是 則 間 惟 色本 則不 天性 間 然之故焉 本 是以 聖人 形 極 其 也 從 然之 聰,貌則 前 者也。 所 或 莫 而 得 問問 能 蓋 視 不 又 不有形, 於天者 理 盡 踐 ,莫不有 凡 口 則 能 然衆人梏於氣 其 形之説。 不恭 則 無 形 極 以 性 色本 雖 人欲之私 践 明 其 ,言則不從 有 所當 而 則 其 聽 有 然 無 是 是 形 是形 티 : 則 之 形 焉 然之則 形 是 理 極 毫 是色,莫 禀之 而 也, 人之生於天 無 聰 踐 蓋 無 以 欲之私 焉 莫不 貌 視 偏 云 以 不能盡 者 則 踐 不 則 是 不 狃 有 盡 極 其 本 雜 則 有 於 恭 明 色 形 於 有 既 其 習 所 所 地 也 是 有 其 形 聽 俗 謂 以 之 而

乎? 於此 天命 累千 者無 謂 故不 言以 彼之所以爲異端者,特以 日: 此 程 口 天下固然之理,而以常事言之,故言近 色天性,與釋氏色空之論一也。 説爲可 見其失矣 「句 儒 而 予於前篇徐行後長之論,既言之矣。 者。 之性 敢 失之耳。 萬言 怛焉 句同 張 且若其言, 又 釋 以 能 子 之辨 ·疑耳。 列 無 而以 而 事 脩 游 不 於《集義》之書,學 異端之學,自以爲精微之論 其 一理之不具,天下之物,未有 若是者,予竊深 事合,而卒不同」者質之,則 釋氏之所謂空者同之,不亦異 也。」子以 能 楊、 曰 : 實 則是儒 竟其 尹 以 楊氏 副之, 氏 義,而學者莫知 蓋 、釋之妙,同 其言爲 其自謂 皆此 别説 如踐言 者誠以程子所 有疑於其言 意 有之曰:「形 吾聖人以 精微 ,但張 如 之踐 出於空, 何哉 適 ,而多 而 子 故故 從 也 第 實 聞 然 ? 爲 亦

氏所引《論語》之文,亦不類也。 或問四十一章之説。曰:范氏失之,尹

甚善。 文義 尤切 道,得殉字之意矣。 有道 中 或問 盡之矣。 ጠ 至謂 於事理矣。 不求 四十二章之説。 以道 身之必顯 其後 殉 一説 人者 其論人君用人之法, 則 ,雖得之,無所用 也。 曰 : 所 范氏 以 張子初説 明 引守死 雖天下之 於於 善 亦 則

見,始益 善。 矣。 其 張 或問 答 氏 精 四十五章之説。 程子 推 詣 明 也與? 書時, 程 子 所 未及 尹氏一本無僞之説 以 論 此 曰 : 也 西 ,豈其晚年所 程子、張子 | 銘》之 意 其 至

亦

善。

孟子或問卷十四

矣。 言也 亦 前 拔 徒 是 張子教人讀《詩》《書》之説 本 倒 或 問 塞源 程 也 戈之所爲, 荀子以 子以 《武成》「 之論 而 爲 孟 孟子設爲是言,蓋 ,蓋雖殺者非我, 子不之信 血流漂杵」之云, 爲殺者皆殷 何 亦亦 哉 ? 其 得 而 善。 曰: 乃紂 其 亦 微 非 不 忍 意 周 之

哉 間 得 情 加 失之際則微矣,人 ,十目所視,十手所指之地也。 於 小小物, 意其鄙 或問 此 好名之士,所 何 吝之真情 好名之人,能 哉? 티 : 實態 以 亦 飾 何 千乘之國, 讓 乃 情 暇 國矣, 於彼 注 發露於所忽易 其 以 節食豆羹, 耳 而 取 目 辭 不能 美名 受之 於斯 忘

> 者。 子之言,爲 之意,然失之太簡,無以 而 不虞之地 范氏因之,誤 無所 也。 發 趙氏舊説,不察乎此, 矣。 明警戒,而 尹氏之言,若有 見其必然也 若有 所 不 今説 使孟 必

加禮焉 己之論,曰:「有爲句容令,多盗 之故,不自省己,而遽廢其配祭之人, 之,則固有是事,然初不爲水旱也。 以爲變其所配之人,諒乎? 者,又豈 説,則亦何辭之不可借,而 之所在而 君貴 之端 人之意,故取之以爲説焉,庶乎其 有未安者。 乎? 或問: ,此固兼行而不悖也,各於其時 既 止 已爾。 日: 而 於斯言 若《集註》之説,則出於彭 民貴君輕之説 盗 以理言之則民貴,以 上。 若不惟 乎? 愚 竊 其是,而姑 日 以 得 所 爲 티 : 變置 以 不 此 改置 啓後 啓後 少 或 以湯變夏觀 社 安 且 借 有 分言之 視其 稷 也 世 城 於 以 人之禍 聖賢之 合於古 社 程 水旱 稷 陳 理 輕 篡 亦 則 而 無 奪

仰之, 及者 衆, 巷之 病之 苓芝术之爲藥,平 曰 : 偏 不思 曰 今考 所 於去病之功爲 及 加 베 於於 易 0 便 無 而 孟子學孔 未必誤 功,未 之孟 孔子 能 不 間 跡 也 廣 或 聞 何 不若孔子之備 勉而從容自中 問 非 有 危 譬 其 耶 ,其意殆以 若孔子之道 急之候 必 深於道者,不能 如 風 迹 ? 子 也 程 之 優 薑 而 而 捷, 子 子者也 日。 桂 興 言 於 易 以 彼 也 居 而 大 起 見, 薑 爲 夷、 此 黄 田 焉 ,所以 此 有 桂 乃 矣。 夷 聖之清 者 則 且世人之貪懦 ,則其 孟 夫販 之 惠 耶 養性 大 非 惠聖 子 劑 之行 屢 黄 庶 不得 廣 但其 屢 婦大寒大熱者 稱 之益 大 幾 雖 爲效也速 非 稱 人,傳者之誤 夷、惠 高 聖之和, 而 所 其 非 班 贵 所 夷 矣, 中正 於孔 至 中 萬 皆 而 以 。 出 惠 和 誤 緩 鄙 然 而 施 ,如參 渾 子耳 乎? 然 偏 深 則 急 薄 於 而 於 而 其 嘆 伐 然 之 所 者 勝 固 間 不

> 仁,則 身以 性 其皆 於仁 意 程子 然後仁之爲道可見。蓋仁則性 行之實。 父子之親 調 以 孟 泯 亦 人 明之, 名耳 所謂 爲仁 老氏 之不 如 道 子之意也。 或 而 血 問 道 後 此 氣物欲之私 之謂 ,而復 + 故必以 之餘 爲 得已」,則 「公而 故 則 君臣 是 六章 道 本 又徒爲 總 乎? 乎? 小異,覽者詳之。 以人體之」,亦此 文以言之爲説, 謝 《孟子》此 之分,見 名釋之也。 之説 仁之理,合於人之身而 氏 其 而已。 日 虚 以 或 名理 言 所 道 曰 楊 於 章,但 7 謂 當矣。 氏 而 言仁 人之身而 外 而 蓋言 合 之説 無 或 一而已矣 人仁之名亡, 而 程 治論 以 而 意 言 别本,人也 其曰「義 如此 見 人 游 子 仁 不 也。 之者 天 即 而 亦 . 與 氏 尤著 道 矣, 道 張子 理 人 不 以 以 之 之 及 其 則 流 率 生

所

非

以

0

氏」, 正 德本、正保本作「尹」。

記 知 F 之以 也, 有 義 俟 凡 也 知 者、 者 Ŧi. 可 字 宜 信 也 也 乎 禮 ? 也 者、 日 0 理 不 也 口 知 智 也 也 姑 者

其去之甚速之意,當從舊説。 或問張子接淅之説。曰:如此,則未見

定 其 所 顧 其 止 問 事 爲 發棠之説。 勢則或 不 可復之故者,雖 然耳 曰: 范氏言之詳 未 可以 矣, 臆 説 然

子 富 命 薄 欲 則 不 之私 貴賤之有 於 貧富貴賤之所值 口 不 而 而 過仁 食 也 或問 賦 勉 色意 亦 ? 於仁 於人之名也 義 :二十四章之説,所謂 無不本於是焉 日 命 欲 禮智之理而 義 之私 禮 性者人之所受 於智愚賢 智之有性 亦 一,不惟智愚賢 則 無 不 已,其 不由於是也 謂 否 命 也。 之殊 之 則 發 乎 性 因 則 曰 性 天 否之所繫, 則 而 夫氣之厚 雖 命者, 者 安 然 不 食 於 謂 其 則 故 色 貧 此 之 君 意 體 何

者 脩 賢者 矣。 以 爲 然 脩 天之所以與 也 於己」者,則語到 所 聖 貴者,雖 也 其 血 不以 以 此 爲 不 命 當 Ħ. 專 終 言 ? 爲 張子 一賢者 本 通 也 者 爲 一句,恐未必 勉 亦 則 日 耳。 有 推 以 貧 也。 未 淺 . 專 所 而 説 下 又自爲 而 賤 孟 雖 盡 求之 其 主 而 我 -,尤佳。 則 楊 直 愚 曰 : 子之意 所 推 不 於 者 可 氏 謂 不肖者言之耶 蓋 禀之已 之,則 勉 必得 聖 以以 1,然君子不以天既與我而 而 以 諸説 之性 然。 推 一賢 説,於 者, 意切矣。 性 爲 其 范氏 而 中 似 其 而 亦 則 E 如 厚 所 亦 言 若 本 無 亦 説 不 曰「付命 善。 義 何 自 以 專 有 而 心 不 ,則有 若 ? 可 又「不以 而 五 亦 聲 爲 亦 有 通 前 者之命 最後 本 通 此 抑 色臭味 曰: 矣。 貧 未 制 於 所 惟 於天,責 性 其 亦 嘗 賤 度 性 推 焉 當 程 薄 智 之 不 蓋 愚 通 段 則 説 言 子 之 勉 節 富 而 不 句, 口 於 爲 肖 之 不 性 成 至 其 Ħ. 察 不

於約 如舜 其 智 則 者 也 在 或 禮 或不 之於 句 己 不 或不得於賓主 或 則 | 者 問 得 不 義 同 得於天道。 瞽 於賢者 或 而不 以 於義 瞍 不 五. ,則仁或 歸 得於君臣 者之命 亦可 之命。 ;子貢不 孔 此 子 通 不得 皆 皆 不 也 此 命 9 得 孔 於 爲 説 能 也 堯、舜 父子; 所值 子之於陽 與 聞 ,然君子 張 之位 之不 合 知 文王之 + 當 旧 貨, 同 則 賢 勉 則

欲 必 口 m 心 其 謂 接 ,然後 悪 勉 而 而 已,未 用 慕 善 物,凡其 或 不得不然,決定真實 者人之所 人矣。 問二十五章之説。 焉 力之久, 口 ,未必 必 以 所爲,一 其 謂 然此或其天質之美, 其真以 之信 悪 行之充足 旦脱 其 人矣。 皆可 爲 然有 爲然,而 人 飽 欲 也 曰 : 然 以 而 滿 而 真 亦 無 果能 處 不 善者人之所 而 足 知其善之在 心 可 或其知 無 毫 以 造 不失也 惡 歉 自 虚 則 事 於 信 僞 及 是 行 身 之 於

> 身,雖 濩,洋 熟,則 如 充 不 則 神 必 化 而 盎 加 也 迹 善之雜 於其 0 背, 是 不 造道 合其 其德之盛者 則 天下文明 而 然既 可 而 其 其所 向之所謂大者,且將春 溢 而 與 内 已 台区 不 人 隱微 施 天 四 信 ·已焉 0 焉 而 德之功 謂 於 地 出 之, 已 矣,是則 是 則 是則 曲 大者 四 合德 而 則 而 則 體 則其 折 其 日 不 所 所謂大 之間 其 至矣盡 以益盛,仁之熟者 9 未 所 口 未能 謂 日 其 必其能發見 行 有 樂 善之充於 所 美 月 在 之善 必 謂 離 亦皆 合明 人 力 人者 事 聖人者也。 其 矣,不可以 乎 者 也 在 其 方 清 融 充 也 也 内 躬 守 兀 體 則 凍 足 於外 和 者 德 也 必 時 解 形 淳 飽 然 然大而 迹之間 盛仁 有加矣 日 合序 懿 滿 則 彌 也 亦 混 至於是 於 滿 足 而 醉 如 以 然 熟 其 又 以 無 是 布 鬼 無 益 不 面

^{■「}懿」,翻弘治本、正德本作「磬」。

也

而

離則 可欲 可惡者 思之也。 是之人耳。 知是理而志之之後,得如是之人也 也? 子之言,可欲則皆以其理言之,若與子異, 於大 其 有 思勉之所及,然非思勉之而不已 Ė 非 其 理 故 不 理言,欲學者知是理 至焉者 ,則思勉之所及也,至於聖且 聖人之上復有神 所 盛 日 愚 則 可」之説,蓋 句若無實者,故張子又有「善信二句, ,皆善之理 能 德 固 竊 但 制 古 至善之極 有志於學者,不可以不熟考而 未 獨 如 心思 也。 也 嘗 以 其言,則於文義微有不協 有 人言之,庶幾不失其文義 自理 日: 也 所能 違 推其 也。 無 如子之説,然程子、 人也。 測者 自人 而言,則 聲 文義,終有所未安 而志之,以 抑 無 是則 而 張子之言,又有 臭之妙,必 夫自可 言 凡 則 神 所謂神者 可 」焉,則 焉 求 欲 欲 亦 則 爲 先 必 而 而 使 生 深 如 其 不 張 何 亦 雖 至 非 爲予 夫子 則 也。 未 前 道 所

未

非

耳

而

是

皆不 之中,則有餘於善而不足於信矣, 敖、先館舍、後長 平日涵養之功,非欲使人求之恍惚窈冥之際 免於程子所謂受變於俗者歟 神化之化 謂 ,明善必於未可 日: 能 大能 無可疑者。 樂正子以善名矣, 成 者 性之謂 ,有所謂 者 欲之際 其曰「求仁必於未惻隱之 聖者 何 也? 心 ,有以大而化 」,則欲學者 存 無 而 日 盡性之理 以 言 餔 此 其 在 歠從子 用 之爲 所 力 U 於 天 則

抑其偶然言之,無先後 固 以 或問 爲有彼善於此之意 逃墨 逃 楊,果若是 也? 然亦 曰 : 其 未可 張子之言 有 序 知 與? 也

人問答之詞,恐亦或有此 ,則失之矣。 設科以下,舊説以 或問三十一章之説 或問三十章之説。 又有 以 爲孟子之言, 曰 : 理,更考之可 爲此章皆或者與 曰 此 張子、吕氏 無異 而讀 説。 館 子 旧

未然。 得之, 耳,故 爲 也。 以 穿窬之類多 則不忍之心 識 主,亦非 其 其言 但 推 氏 蓋 擴之端耳 汝《集註》已言之。 義理之所安也 氏 如 端 與 推 説 此 故 其 害人之心易 爾 説 彼略 汝 然不先 以 非爲欲其不爲所取 之實 告君 而 與仁 此 明聖賢之意 、欲其 見, 詳 ,欲其於此 略 而 仁義之詳 有 羞惡、 義詳 以 審 者, 之心 省設 推説 納 略 恐 之

無廣 何? 道 則 則 爲 之 固 又 高 腦 泛 博之功 遠之言 或 君 問三十二章之説。 濫 淺 子 而 而 皆得之,但張子下帶 其 也 少 無深遠之趣 則固荒唐而無餘味, 成 孰 然則所謂善言 事 能 然欲其 知 之 也 乎? 曰: 約 不知約 不 之説 善道 則 日 ,然欲其 知道者 又 者,非 之可 諸 狹 説 隘 守 近 務 有 如 而

論堯、舜、禹、湯、文、武一條,尤有功,非其學或問三十三章之説。 曰:程子至矣,其

死」者, 臻聖 容周 己,其 反之爲 生死,又以哭死 楊氏乃以爲至盛德之地,然後能 下而言,聖人之事也。 教人之 亦已辨之於《論語》之篇矣。 尹氏之論「純 而於章内數語 也 前 之」,是爲天之道,所謂 爲人也」, 如 説 惡惡臭 域 旋 乃以行 謝 所指 以言進學之方 語 中 反 氏 則 禮 身 所 其 則 孰 亦不同矣。 法俟 而 如 謂 盛德之至」者 小 能 説 亦 誠 聖賢之分者,有 失其 好 亦 而哀,皆爲行法之事 及 不已,三月不違」之誤 當 命 好 此 善 則此 然 色, 文 乎? 通 也 而 然謝 爲復其 「行法 義 以 乎 出 日 爲 此 於誠 正字 耳 上文 此贊 但 之」,及楊 其 兼夫經德 以 吕 以 等 俟 然其 爲 説 初 所 一 侍 講 而 心之自 夫聖賢 經 行 級 命 彼 未 「當 言 德 法 明 所 説詳 精 明 朝 不 矣 不 爲 則 而 然 氏 則 謂 密 也 聞 回 任 П 反 又 IE 所 亦 而 實 動 以 爲 以 猶 夕 子 夫 而 謂 誤 非 但 口 爲

之傳 法俟 至於 言於其 也 之 獨 論 其門人,有曰「今容貌必端,言 語 此 三代 而 善 成 自 命之意 不傳,考之於此 有 性之之德,而 敗 君,有 已矣」。 其 未 處」, 利鈍 身以 到 以 外此 讀 則 降 日 非 甚乎其 求知於人,但 此三言者 . ,惟董子嘗言之, 者審擇 「臣鞠 專言 則 臣之明所能 其 亦寂寥而 廣己 而 反之之功 躬 亦 「所指 精思 盡 可 而造大矣。 天 力,① 見 焉 逆睹也。」 無聞矣。 也夫 理當 雖 而諸葛 ,其意 可 殊 語 死 也。 然,亦 要 必 而 正 後 亦 尹 皆 程 武 然是 斯 善 道 侯 氏 行 非 子 日 巍 其 加

理

以

不

而

循

欲

語

君之體。 必 也 言 子言外之意 ? 也 則 或 曰 問 吕 者所 . 其 侍 程 孔 日 講 者 子 當 子 敷 盡 以 藐 知 陳 畏 矣。 Ž 爲 也 詳 所以 大人,而 記 實,反 謝 然 録 子 敬之」,則 之誤, 楊 嘗以 復懇 以 孟子 孔 或然 爲 至 孟 藐 後 所 世 之 以 尤 而 之, 得 之 發 未 分 告 何 畏 而 孟 口

> 尋,而 大人,非畏大人也,畏其 當世之士,以道徇 其敬, 豈特於大人而反藐之哉 立其志,使其意. 不視其巍巍然者 然爾。 君公之,退 齊人之所 若夫君子以禮 而 氣 爾 敬 而 舒 人,内無所守 汝之。 王,莫孟 已 展, 矣,故雖 存 無 巍巍然而 孟子 心 所 子 拘 固將 不 如 之藐 束 ,故特發 肯枉 也。 已矣,故 無 勿 大 所 畏 尺 人 特 而 其 此 不 也 進 首 以 以 用 巍

懼 尤 謂「心者,性之用,可 心,天下之易染者莫 精 其 日 不必 也 或問 不 0 純 吕 沉 養 儒 溺者 者 心寡慾之説。 侍 之説 講 尤密。 所謂「天 也 如 以 欲 成 日 」,其亦 其 性 下之難持者 曰: 0 論 周 可 荀 程 子 善矣。 以 卿 子 之言 失性 之失者 至 矣 莫 不 但 所 如 止 而 則

力。 四 庫 本作 「瘁」。

0

莫孟子 如 四 庫本作 「莫如孟子」。

所至,而不由 矣,然未有不 於 子之説,於此爲有相 而 寡 不要其至,則或恐其安於小成 加 存 者 由寡慾 其序,則無自而進; 奈 何 ? 而 發之功 曰 能至於無者也 . 語 馬 其 所 也。 語由其序, 至 是以 則 語 固 周 其 然

之意,未必遽指 吕、范亦詳,而 其 反經,以事言之,固必至此然後爲 日 Œ 張子於反經,尤致意焉 或問 經 狂狷 能 久則 文義間 鄉原之説。 此也 儘 透徹,學者當深念之。 有未安者。 曰 : ,皆切要之語 程子二説皆 盡,但 吕正字説 孟 也。 子

士,伊 聖,亦非必聞前聖之道而後得之也。 後知之也。 意者得之矣。 見而知之,聞 或問卒章之説。 , 尹、太公,又湯、文之師,非必見 至於湯、文、孔子, 但禹、 而知之」者,蓋以同時言之, 皋陶之徒,本皆名世 티 : 范 氏 又或 所 謂 生 此 其 七 知 君 篇 而 之 之 大 而 日

> 者夫! 受於一 深矣。 繫焉。 斯道 誠能 志意之所存 萬 亦無有乎爾」, 於不居,而其自任之實可見。 害意焉可 斯 世 道 之 深考其言 無窮之傳者,又未嘗不在於斯 之傳,後聖當以 堂之上 觀其所 統 後之君子,其必將有慨然 也。 臣 者。蓋 當 謂 則雖若歎其 至於章末二句,則孟子之致意 也。 而自得之,則古 以 「然而 無以 君 故 前 爲 於 無有乎 異乎 聖爲 主 此 將 9 竊 以 日 師 絶,而 以 爾」,則 觀 異 ,學者不以 相 人雖遠 子 其 世 與 程子 有感於斯 也 所以啓 言 所謂 言 雖 之, 之傳 若 學 而 加 夫 授 其 則 託 則

附録一 序 跋

深欲訪

我文公著述之未傳者傳焉。」遂

授

其

輯

論語孟子或問序

[明]張元禎

郡 爲 自 爲 而學者未見成篇,終未得乎語意之詳 語、孟子《或問》,雖間載於《大全》各章 於《大全·章句》,學者無不得而 守 抄 庶吉士 四 瑨 録 方之幸。 章句》皆 我 與語及之,欣 間 朱子一生精力,盡在《 ,讀書中秘 出 有《或問》,大學 示學者 弘治初,以 然日 時 無 獲睹二書《或問》,手 不惜其未能梓行 史事 、中庸《或問》附 兀 叨 起 書》。 續 道 誦之,唯 南 貂 也。 南 康 四 康 郭 禎 書

> 序。 《大學或問》刻之, 治七年歲在 句 略》於羅司 》、《或問 俾刻,置之白 (録自天一閣藏明弘治十七年刻本) 愈憲仲 成明仲,乃知《大全》所附 甲 實《輯 昭 寅 鹿書院,既 「, 愈憲 五. 通 略 日《四 月 ·》、《或 Ŧi. 親 日 爲校字 「書或問》云。 , 禎復 後學 問 业也。 南 得《 訛 昌 缺, 奉閲 中 張 時 將 元

弘

禎

併

於

章

孟子或問序

教 所以 堯舜,論征伐 四海,養浩然之氣 義賤利 教人類多體驗充 朱文公先生謂七篇之指無所 承堯舜周公孔子之傳者也。 距 楊墨,絶鄉愿 稱 湯 而至於塞天地,尊王 武 推 擴之端,故其 仁義之端而 ,要皆所以扶世立 明周 不究,而 論 文公既爲 至 道 朏 孟 於保 德 伯 其

使有 所以 梓以 疑。 韓子 疑則 卿史公以寄方伯舒公,讀而有會于 天下後世 助 予亦曰:「讀《孟子》者當自朱子 則 疑,無 惜乎《或 問 嘉 志者益知 日 體 問問 惠後學,畀予序。 驗 有志者少,無志者多。 則辨。 求觀聖人之道者當自《 志者漫不知 擴 發 問》 充之功至 所 其 辨則 以 全本世多未之見。 義 疑 9 明。 又别爲《或問 》,無志 所疑,故《或問》設疑 而 竊惟文公之心,病 必 於 者 有事焉 道 亦求 始。 其 有志者固 孟子》始。」 庶 》以 心、欲 所 邇 幾乎 勿忘勿 以 發 者 疑 其 刻 知 1

孟中書。(録自北京大學圖書館藏明翻弘治十七年刻本)弘治十年丁已歲冬十有一月朔廬陵周

重刻四書或問序

昔文公先生嘗謂《學》、《庸》、《論》、《孟[明]韓 重

學深矣! 之。若《論》、《孟》者,雖 明之。至《中庸》,則又因石 定爲《章句》、《集注 四 焉。 秘,繼又得《輯 言,然大要有非先生不能爲是 必以問 其心,毫分縷析,一一皆中其肯綮。 與先 者當 又辨諸友。 士子猶未獲盡 學者先道 審問之」,孟子 四書或問》始爲全書。 書爲六經之階梯, 蓋嘗考諸聖門 生 知 同 所問 而 明, 其 時 學士南昌張公廷祥手録是書 《易》曰 、疑,設 也。 殊 爲 略》 見,故命工 所謂 師者當有以待問 不 今有志於學者,類 于司 爲 知 **>**9 問 弟子之務學 學者求道之至 問 義 又各設爲《或問 學問之道」者,誠 以辨之」、《 成羅 既梓行 答 理玄微 勉齋 一若親 再 公明 氏《 刻之以 叙 也 西江 先 行 輯 處 ,其 仲 前 既 中 狀 其 生 恨 略 要 問 處 庸 廣 嘉 略 爲 而 地 皆 以 **>** 況 影亦 於 以 弟 於 于 惠 而 故 其 湖 而 預 不 以 理 而 師 發 中 爲 是 後 藩 不 學 E 傳 子 得 無 察 爲

閣

藏明弘治十七年刻

本

治

甲

子

李

夏之吉後學

古絳

韓

重

書。

(録自天

베

書

謹

書

此

相

與

勵

戒

以

致丁

寧之意

云。

弘

幸,而

今日

獲

睹

者

抑

未

爲

全幸

也

工告

成

學

後

之學者

哉

則

是

書

前

此

未

見

者

古

爲

不

使

玩

物

喪

志

買

櫃

還

珠

之戒,又豈

先

生所

望

於

偶

經之階

梯

學

者

求

道之要初不在

是

卒

蹈

於

金

云。

使

或

視

爲

陳言常

語

而

於先

生

當

時

設

爲

甲

或

問

》之意

不

知

究

心

甚

則

謂

是

書

無

與

於

六

聽

辭

如

吾

耳

, 斯

爲

善學。

愚

於

是

書

亦

本

朱

語

録

,皆當以

此

法看之,視問

辭

如

出

吾

不

作

今

H

耳

聞

自

然

有

得

而

陳

定宇

亦

謂

程

行

須將

諸

弟子問

處

便作

:己間

、聖人答處

便

雖

先

生復生

一,亦不是

過以

是教

人也

程子

嘗

謂

經

實

相

貫

通

當自

有

以

逢

原

於

左

右

矣。

不

同

由

是

推

類

以

盡

其

餘

以

究

其

極

則

四

明 萬 曆 年 朝 鮮 刻 本 論 語 孟 子 或 問 跋

明 趙 璹

於奇 乃 幸。 於 别 秀 訖 相 戌 帙 以 書 才 中 高 功 朴 軍 春 剜 右 定 其 以 峰 至于我 國 諱 忠 府 缺, 籍 論 何 尹 志 明 民 考 家 E 事 伯 秀 孟《 道 其 多 也 久, 獻、亞 塾, __ 徑 才 金 政 ,其 有 朝 手楷書。 或問 遆 則 · 效之斯 侯 元 而獨 欲與二三同 誤 7,募求 垂 書之刊 壽 一使尹 偉幸 麟 字 》,文公朱紫陽 梓 等 成 不 以 遺篇 谏 廣 大 爲 諱 傳 之功 方欲 出 鄭 此 也 布 監 先 於 爲 君 即 1 之 覺崇 幾至 志精校 道 刻 東 鋟梓之際,金 病 雲龍得見二書 意 之 督 夏,實吾 嗚 出 尤 役 儒 遂不 芸閣 斯 呼 所 廢 不 錯 道 雅 著 勤 棄 誤 ·入梓。 第 也 儒 懇 數 重 載 金 以 之 侯 於 月 不 道 谪 侯 刊

孱 有 功 志 此 未 實 遂 斯 使 文之 相 與 大 新 幸 府 伯 巾 季 諱 仲 虎 樂 從 而

刻之列 年 京都 書 萬 1肆風 曆二年甲戌 跋。 月莊左 (録自北京大學 衛門 七月 刻 本。 日 原 無文題 圖 生 書 員 館 趙 藏 璹 H 本 亦 IE 在 保 監 四

朱子四書或問小註總目叙録

[明]徐方廣

先 書 擬 猶 成 義 久 於淳熙丁 生 晦 在 雖久,至己酉乃始序而傳之。 自 與 起 於 人 蓋 神 非 間 漢 自 而 明 好 唐 也。 有 羽 學 相 四 酉 翼 深 而 伍 子 秦火已後 之, 乍闢於有 大學、中 對 思 心心 也 至紫陽夫 書。 知 而 考 其 ,古聖賢之藴 庸《或問 宋。 唐 其 意 虞三 著 必必 子根 如二 作 代之學至 不 又池州 究 能 程 論 書 悉 周 奥 句 孟 之 未 張 所 力 》 成 註 模 文 諸 必 今 刊

遺, 部。 外 + 然剪 註 新刊《别録 刊《 省 低 時 明 義 諸 峰 氏 語 卷、徽 繪雪堂 理, 摘《語録》《類》《續》、 》成 以 先 有 T 語 新 而 録 原原 千萬 格子 所見? 生説 陋 数千 嘗以 安、慶 於《集註》之後, 叮 録 末 四 不 州 巡 集 十三 妄 學 讀 世 也。 **※**二十 知所 百 外 背 所 用 焉 源 之下, 十六卷《 刊《 日《增 是 年聖賢之書表章 有 註 一卷《續 著 學者左 敢 書。 適 是 與 卷,蜀 於 與 語 從 Ш 懼 因 朱 註 前 録 續 語 於《章 哉哉 增 及《蒙 是 註 王右 \sim X 類 以 中 後 張 先 ? 歲 捋 可 蓋 相 意 所 門 録 洽 则 儒 壬 竣束 句》《集註》下分外 以 陸 增 ? 到 發 ** + 引 刊《語 録 午,下 人問 精 + 一,漫不 註張 見 即 × 明 \Rightarrow 竊 義 卷。 髮受書, 於 者, 《存 唐 筆 議 答 六卷 類》一 卷 一代大儒 虞 彙成一 帷 陳 復 雙行小 而 不 疑 南 三代 或問 饒 有所 饒 晨 作 得 軒 百 建 講 州 溪 也 留 大 之 1 四 寧 所 凌 字 書 雙 求 尋 輔

方廣記之於紙尾 也 其 口 歲 賴 在 以 一癸未 得 其 三月 真 傳 晦 而 日 不 高 惑於異説 沙 後學徐 竣 斯 今名 足 喜

小註》。 書館藏清康熙四十 膽大,妄作妄爲,凡以 及朱子大小字旁加 子原. 來,不敢 本,悉仍之。 集中行款,大字、雙行高一格者出自朱 原無文題 忘所由 一年陳彝則觀乎堂刻本《朱子四書或問 也。 刻 卷 内 稿從 云僭也。 逗,係竣 中 低 凌義 所增者。 (録自北京大學圖 格 遠先生家借 雙行 細字, 後生

題四書或問小注前

[清]王懋竑

朱子 書坊 所自作,余 中見《朱子或問 往 一者康 熙壬申、癸酉間 一笑 小 而 注 置之,其謬妄蓋不足 **\rightarrow** 余應試 書,其序文 泰州 以 於於 爲

> 寳 至其謬誤,已不待辨而 於大不韙之罪,而不知作僞之罪,更有甚焉 序文、與門人書,託於朱子所自作,以爲 以 勝,而於諸家之説,頗能辨其 併《文集》、《語 《翼注》,以及近時諸家之説 慶教授 纂輯、蓋自朱子《文集》、《語類》、《四書大全》 辨。 及《蒙引》、《存疑》、《淺説》、《達説》、《説統》、 余,命分各學中。余發視之,即前所見《或問 小注》(中略)余間一視之,其書乃 教習師也。 應王 删改《文集》、《語 自後書坊中亦不復見也。 懋竑書。 時時 鄭 未至安慶,先遣使以書四百部 魚門先生督學江 類》,較《輯 (《白田草堂存稿》卷八) 類》,心 明 也 有所 釋》、《大全》爲 (中略)丁巳九月 ,皆嘗徧覽,其 八得失。 不安,遂僞 壬寅,余爲 南 老學究 先生, 特其 可 自 稍 免 所 貽 余 安

四

附 録 著 録

袁 州 本 郡 齋 讀 書 志 0 附 志

南宋」趙希弁

大學章句 卷或問二卷 中

庸

輯

略

卷

中

庸

章

句

卷

或問

卷

所藏各 述《輯略》兩卷,蓋集伊洛諸儒之説也。 又述 平 右 兩本 時問 晦 翁先生既定著《章句》于經文之下, 答 ,嶽麓書院 所疑以爲《或問 精舍及白 鹿 ^ 洞 中 書院 ・庸》又 希弁 所

刊

(卷五上)

直齋書 録 解 題

大學章 句 卷 或 問 二卷中 庸 章 旬 卷 或 問

[南宋]陳

振

孫

其 附 其 中,又記 後,皆自 朱熹撰。 所辨論取舍之意,别爲《或問 爲之序。 其説大略宗程氏, 會衆説 至《大學》,則頗 補 而 折 IE.

又

其脱簡闕文。(卷二禮類)

論 語 或問 + 卷 孟 子或 問 十四卷

朱熹撰。 《集注》既成,復論次其取舍之

所以然,别爲一 讀書者之要法, 書。 其與《集注》實 而篇首述二 相 表裏,學者

書

綱

領,與

既

而

約

其

精

粹

爲《集注

》,十卷《論

語

又

疏

其

於師

友得於心思者爲《詳

説》,舊名《訓

蒙口義》。

玉

海

南宋]王應麟

取

間

有

不

一同者。

(卷四

删

改

日

益

精

密

而《或問》不復釐正

,故其去

所

以

去取之意爲《或問》。

十卷。

其

後《集注

淳熙大學章句中庸

章

句

《大學章句》,三月戊申 各有《或問》、《中庸》又有 朱文公熹撰。 淳熙十六年二月甲 序《中 る輯 略 庸章 句》。 (卷三九) 子 書 序

又

淳 熙論 語 孟 子集注 一或問

注 吕 初 《要義》,改名《精義》,最後名曰《集義》,三十四卷 編 疏 希哲、大臨、謝、游、 次《集義》,輯 朱 參《釋文》,會諸老先生之説,間 文公熹 撰。 二程之説, 楊、侯仲良、尹氏 淳熙 兀 年 又取 六 月 九家,初名 張、范、二 癸 附 \Box 又本 所 成 聞

> 宋 史藝 文志

大學章句一 卷或問二卷中庸章句 [元]脱以 卷 脱 或問 等

二卷中 庸 輯 略 一卷(經部禮類)

論 語 中 略 或問 一十卷(經部論語類。 以上卷二

百二)

孟 子(中 略)或問 + 贞 卷(子部儒家類。 卷二百 五

兀 庫 全書 總 目

几 書或 問 三十 九卷江蘇巡撫採 進 本

附録二

著

録

四 Ŧi. Ŧī.

復以 詳 或問 以 嵤 未 欲 諸 庸 説 前 也 合爲一帙, 蓋後 章句》之末、《論 語 書修 曾 杰 輩 非 去 處 密 》三卷、《論語 ,云「亦未 類》 》用 取之意,以 諸 有 尚 駁 諸公説 至 家 ^ 時所著 得 論 難 多 人 載 中 力 之説 子 説。 他 游 觕 最 孟 庸 過、《大學》所改尤多 底 得 某 有 或問 久,故朱子答潘恭叔 或問》 云云,0 多了 八問《中 又載 ,所以 紛 滿 來坊賈 》二十卷、《孟子》十四卷。 成此書,凡《大學》二卷、《 中 朱子既 語》、《孟子》則各自爲 錯 意 庸 不 》,則 朱子以《中 處 難 則 其 庸 或問》原與 是 0 下手 朱 間 所 》編 作《 與《集 其 子 如 儘 併 因 意 不不 集 四 平 評 設 也。 有 猶 [書章句 如 庸或問 H 論 差 爲 注》及《語 比 以 《輯 何, 比 頗 問 中 程 《大學 舛 問 爲 略》俱 答 間《大學 子 處, E 不 。當自稱 舊 集 未 書,其 自 授 己 明 注 諸 又 盡 類 愜 中 附 其 都 不 緣 所 黄 極 子 安 **>**

> 縣官, 之説 當 衆説之由;其與《集注》不合者 只 書,未嘗出 並 應」云云。 叔書》,日《論語 偶 或問 集注》,不 日 録 摘 集 存之,其與《集注》合者 往往多所牴牾,後 原 數 》是無 注》 追索 多未定之論,未可 語 則 屢 《其版。 ·知《集》 口 以示人,書 暇 更不定, 見 據 重 爲不 異 注》屢 或問 編 又《晦 同 之迹,即 刊之典矣。③ 故《 卻 \leq 肆 經 人 有竊 與《 此 菴 年 修 或 於《語 書 集》中 改, 遂 譜 或 可可 刊 朱子亦不諱 久 執 問 至 無 行 稱《 曉 亦 有《 老未 (卷三五 者 或 I 然於折 前 口 或 問 夫 與 後 亟 《文集》 知 問 E 修 潘 清 以 朱 不 衷 相 端 於 m 疑 子

2

8

據」,原脱,據《四庫全書

》書前提要

^{■「}未有」、《朱子語類》卷六十二作「有未」。

類》卷六十二改。「諸」,原誤作「朱」,據《四庫全書》書前提要、《朱子語

記

或 問 語 類 三十七 卷浙江 府署刊 清周中孚

之爲 幾無餘 合爲 之涉 著録。 迄於近代諸儒 語 □□進 几 三十九卷,其門人又統 書 論 得 是 四書者,删其辨難之説 士 或 語 藴 編 語 也 秋厓督學浙 朝 歷官未詳。 刊示 類》 》二十卷、《孟子》十四卷,各標 陳 然以 此 其 所作 本凡《大學》二卷、《 凝 諸 百 後人解朱,不 編 生。 四 按 江 講 十卷,俱 時 朱子 其 解, 考四 記 凝, ,取《或問》及《語 以 其 嘗 號 、汰其 發 書自 秋厓,□□人。 撰《 如即 見《 論 揮 經 四 朱 四 四書之旨, 重複之條 朱以求之 籍藝文之 中 書 庫 注 庸》 或 以 全 列 書 問 乾 後, 類 章 降

十四卷宋刊本

記 閱 有 餘 ,舉業家于《章 (卷十二) 矣。 前有 乾 隆 ·句集 J 卯 注 訥 》, 喇 常安序 即 守 此 及 秋 厓 編

附

而

鐵 琴 銅 劍 樓 藏 目

卷附中 大學 章 庸 句 或問 卷附 卷論 大學 語 或 問 集 注 + 卷 卷 中 清星 孟 庸

子

集

注

999

章

句

印一、「 氏 貞、徴、恒、桓 每半葉七行,每行二十五字,注字 原本之舊,其佳 藏 周笈私印」、「馬晉蕃印」諸朱記。 書。 (上略)此 卷首有「毘陵周 、構、彀字皆闕筆。 本 處往往與淳祐 不 詳 氏九松迂叟藏書記」、「周 宋 何 .诗 所 (卷 本合。 刻 舊爲毘 猶 同 中 仍朱子 陵 良 匡 周

四 Ŧi. 名,而

以《或問

》、《語

類》分附之,頗

便于

簡

附録二

著

録

海航集團有限公司

1

《儒藏》精華編惠蒙善助,共襄斯文, 謹列如左,用伸謝忱。

伍拾萬元

北京大學《儒藏》編纂中心

